

उद् बाइबिल

The Open Outer Seraji Bible

This Bible is copyrighted by Free Bibles India and made available under a Creative Commons Attribution-ShareAlike 4.0 International License. Original work available at <http://www.free-biblesindia.com>. )

This Bible is provided at the cost of printing by the Digital Bible Society ([dbs.org](http://dbs.org)). This Bible, and many others, are available for free download in a variety of digital formats at [dbs.org/bibles](http://dbs.org/bibles).

मत्ती.....	4
मरकुस .....	27
लूका .....	42
यूहन्ना .....	66
प्रेरित.....	83
रोमियों.....	104
1 कुरिन्थियों .....	113
2 कुरिन्थियों .....	122
गलातियों.....	128
इफिसियों .....	132
फिलिप्पियों.....	136
कुलुस्सियों .....	139
1 थिस्सलुनीकियों .....	142
2 थिस्सलुनीकियों .....	145
1 तीमुथियुस.....	147
2 तीमुथियुस.....	150
तीतुस .....	152
फिलेमोन.....	154
इब्रानियों .....	155
याकूब.....	162
1 पतरस .....	165
2 पतरस .....	168
1 यूहन्ना.....	170
2 यूहन्ना.....	173
3 यूहन्ना.....	174
यहूदा .....	175
प्रकाशितवाक्य.....	176

# मत्ती

## भूमिका

मत्ती लिखअ द सुसमाचार दैआ इहय संदेश कि यीशू मसीहा ई आसा सह उध्दारकर्ता जसरै बारै पैहलैई का ती भविष्यवाणी हई दी। परमेश्वरै पराणें नियमा दी हजारो साल पैहलै आपणें लोगा संघै जुण वाचा की ती सह की तेऊई उध्दारकर्ता करै पूरी। अह शुभ संदेश नि सिधअ तिन्ना यहूदी लोगा लै आथी, जसा बिचै यीशू धाची-पाळी होछै का बड़अ हुआ, पर अह आसा सारै संसारा लै।

मत्ती लिखअ द सुसमाचारो आसा बड़ै धैन-मन लाई रह-तह किय द। एते शुरुआत हआ यीशू मसीहे जल्ममें विवरणा का, तेखअ आसा तेऊए बपतिस्मैं और परिक्षा हणेंओ वर्णण, एता बाद आसा गलील प्रदेशै प्रचार करनअ, शिक्षा दैणीं और बमारा लै चंगाई दैणें सेऊआ करनेंओ वर्णण। एता बाद आसा एक सुसमाचारा दी यीशूए गलीला का यरूशलेम तैणीं यात्रा होर यीशूए जिन्दगीए आखरी हप्तै घटी दी घटनांओ वर्णण, जेते पराकाष्ठा आसा तेऊओ कूसा दी छढाऊणअ और मरी करै जिऊंदै हणअ।

एऊ सुसमाचारा दी आसा यीशू एक महान गुरूए रूपै दर्शाऊअ द। तेऊ आसा परमेश्वरै व्यवस्था बखान करनेंओ हक और सह दैआ परमेश्वरै राजे शिक्षा। तेऊए शिक्षा आसा पांजा बाखा बांडी दी: (1) पहाड़ी उपदेश आसा, जुण स्वर्गराजा दी रहणें आळै लोगे चाल-चलण, फर्ज, खास हक, और आखरी आशे बारै ( अध्याय 5-7 ); (2) बाराह चेलै सेवकाई लै सखाऊणें ( अध्याय 10 ); (3) स्वर्ग राजे बारै दृष्टांत ( अध्याय 13); (4) चले हणेंए बारै शिक्षा ( अध्याय 18); और (5) स्वर्ग राजे एछणें और आझ कालकै जुगे बनाश हणेंए बारै शिक्षा ( अध्याय 24, 25 )।

### रूप-रेखा

खानदान और यीशू मसीहो जल्म 1:1-2:23

यहूना बपतिस्मैं दैणें आळैए सेऊआ काम 3:1-12

यीशूओ बपतिस्मअ और परीक्षा 3:13-4:11

गलीलै यीशूए जनसेऊआ 4:12-18-28

गलीला का यरूशलेमा तैणीं यात्रा 19:1-20:34

यरूशलेमैं आखरी हप्तअ 21:1-27:66

प्रभू यीशूओ मरी करै जिऊंदै हणअ और धेछणअ 28:1-20

## यीशूओ खानदान

(लूका 3:23-38)

1 अब्राहमैं शोहरू, दाऊदे शोहरू, यीशू मसीहो खानदान। 2 अब्राहमा का हुअ इसहाक, इसहाका का हुअ याकुब और याकुबे हुए यहूदा और तेऊए होर भाई। 3 यहूदा का हुअ फिरिस, ता, यहूदा और तेऊए लाळी तामारा का हुअ जोरह; ता, फिरिसा का हुअ हिरोन और तेऊ का हुअ एराम। 4 एरामा का हुअ अमीनादाब, ता अमीनादाबा का हुअ नहशोन और तेऊ का हुअ सलमोन। 5 सलमोन और तेऊए लाळी राहाबा का हुअ बोअज ता बोअज और तेऊए लाळी रुता का हुअ आबेद, और आबेदा का हुअ यिशै 6 और यिशैओ शोहरू त दाऊद राजअ। दाऊदो शोहरू सुलैमान हुअ तेसा बेटळी का जुण पैहलै उरियाह सैनापतिए लाळी ती।

7 सुलैमाना का हुअ रहबाम, रहबामा का हुअ अबिआह, अबियाह का हुअ आसा, 8 आसा का हुअ यहोशापात, ता यहोशापाता का हुअ योराम और योरामा का हुअ उजियाह। 9 उजियाह का हुअ योताम ता योतामो हुअ आहाज और अहाजा का हुअ हिजकियाह। 10 हिजकियाह का हुअ मनशियह और तेऊ का हुअ आमोन और आमोना का हुअ योशियाह। 11 बेबूले गुलामी दी नाशदी बारी हुअ योशियाह का यकुनया और तेऊए होर भाई।

12 बेबूले गुलामी दी नाशी करै हुअ यकुनया ता तेऊ का हुअ शालतिएल और शालतिएला का हुअ ज़रुबाबिल। 13 ज़रुबाबिला का हुअ अबिहूद ता अबिहूदा का हुअ इल्याकीम और इल्याकिमा का हुअ अजोर। 14 अजोरा का हुअ सदोक ता तेऊ का हुअ अखीम और अखीमा का हुअ इलीहूद।

15 इलिहूदा का हुअ इलियाजर ता तेऊ का हुअ मतान और मताना का हुअ याकुबा। 16 याकुबा का हुअ यूसुफ; जुण मरिअमों लाळअ त; जसा का प्रभू यीशू मसीह हुअ।

17 अब्राहमा का दाऊदा तैणीं हुई कुल चौदा पोस्ती, ता दाऊदा का बेबुले गुलाम हणें तैणीं बी हुई चौदा पोस्ती और तिधा का यीशू मसीहे जल्मा तैणीं बी हुई चौदा पोस्ती।

## यीशूओ जल्म

(लूका 1:26-38; 2:1-7)

18 ज़धू यीशू मसीहो जल्म हुअ, सह हुअ इहय करै कि जाऊं तेऊए आम्यां मरिअमे बरनी यूसुफा संघे लाई, ता तिन्ने कठा हणें का पैहलै हुई मरिअम पबित्र आत्मां करै गुरभणीं। 19 तेसरअ लाळअ यूसुफ त धरमी आदमीं, सह निं चाहंदअ त तेसा बदनाम करनअ और तेऊ किय चुप-चुपै तेसा छाडणेंओ बचार। 20 जाऊं सह इन्नां गल्ला सोचदअ त लागअ द, ता परमेश्वरो एक स्वर्गदूत तेऊए सुपनैं धेछुअ और तेऊ दूतै यूसुफा लै बोलअ, "हे यूसुफ, दाऊदे शोहरूआ, तूह निं मरिअमा संघे बैहा करनै का डरी, अह आसा पबित्र शोहरी, किल्हैकि जुण तेसे गर्भा दी आसा, सह आसा पबित्र आत्मां करै तेसा भितरी। 21 तेसरअ हणअ एक शोहरू और तूह डाहै तेऊ नांअ 'यीशू', तेऊ दैणअ आपणें लोगा लै पापमुक्त करी करै मोक्षा।"

22 इहय हुअ तै, कि जुण वाणीं भविष्यावाणीं करनै आळै बोलअ त सह हणअ त पूरअ कि, 23 "हेरा, एक कुंआरी हणीं गुरभणीं; ता, तेसा दैणअ एकी शोहरू लै जल्म और तेउओ नांअ डाहणअ "इम्मनुएल" तेतो अर्थ आसा इहय कि 'परमेश्वर आसा हाम्हां संघै।' 24 यूसुफ निंजा का उझुअ और जिहअ सबर्गदूतै तेऊलै सुपनैं बोलअ थिय, तेसा गल्ला मनी करै किय तेउ मरिअमा संघे बैह; 25 और ज़ेभै तैणीं तेसरअ शोहरू नांई हुअ, तेभै तैणीं निं तेसा संघे कठा सुतअ आथी तेऊ डाहअ तेऊ शोहरूओ नांअ यीशू।

## जोतषीओ एछणअ

2 जधू यहूदिया देश, बेतलेहमै गराऊंरें यीशू मसीहो जल्म हुआ, ता तिन्नां धैळै त तेऊ देशै हेरोदेस राजेओ राज। ता पुर्बा देशा का आए येरुशलेमा लै जोतशी और तिधी पुजी करै लागै तियां इहय पुछदै कि, 2 "एऊ दैशै आसा हुआ द यहूदिए राजेओ जल्म; सह किधि जिहअ हुआ? हाम्हें भाळअ पुर्बा बाखा तेऊओ तारअ और हाम्हें आसा आए दै तेऊ सेटा माथे टेकदै।" 3 तिन्नां जोतषीए इन्नां गल्ला शुणीं करै हेरोदेस राजअ और सारै येरुशलेम नगरीए लोग डरै, 4 हेरोदेस राजे बी नढैऊए सारै माहायाजक, शास्त्री, पंडित परोहत कठा किए और तिन्नां का पुछअ कि, "थारै शास्त्रे साबै मसीहो जल्म किधी सका हई?" 5 तिन्नां सोभी राजे लै बोलअ कि "शास्त्रा दी आसा भविष्यवक्ता इहय लिखअ द कि मसीहो जल्म हणअ बेतलेहम गराऊंरें।" एथ आसा इहय लिखअ द कि

6 "हे बेतलेहम, जुण तूह यहूदा देशा दी आसा, तूह निं कोई साबै बी यहूदे राजे का होछअ आथी, किलहैकि तारखा निखळणअ एक मालक इहय, तेऊ करनी मेरी परजा इस्त्राएलिए रखवाळी।"

7 तैबै हेरोदेस राजे तियां जोतशी पंडत चुप-चुपै आप्पू सेटा लै शादै और तिन्नां लै बोलअ इहय कि, "तम्हां तारअ ठीक-ठीक केसा घळी धेछुअ त?" 8 ता तेऊ तियां इहय बोली बेतलेहमा लै भेजे कि, तिधी नाशी करै तम्हें ठीक-ठिक पतअ करै कि तेऊ शोहरऊओ जल्म किधी हुआ, और जाऊ सह भेटे, ता मुह्लै बी करै फेळअ, तै नाशणअ मूबी तेऊ सेटा लै माथे टेकदै।

9 तिन्नां जोतषी बी राजे ईयां गल्ला शुणीं और तियां लागै तेऊ सेटा का बेतलेहमा गराऊंआ लै हांडदै, ता जुण तारअ तिन्नां पुर्बा दिशा दी भाळअ त, सह लागअ सरगै तिन्नां का आजू-आजू हांडदअ ता तियां लागै तेऊ पीछू-पीछू हांडदै और सह तारअ खट्ळूअ ठीक तेसा जैगा परदै जिधी तेऊ शोहरऊओ जल्म थिय हुआ द। 10 तेऊ तारै भाळी हूए तियां बडै भारी खुशी। 11 तियां तेऊ घरे नाठै जिधी यीशू मसीहो जल्म त हुआ द। तिन्नां सह शोहरू तेऊए आममें भोसळै भाळअ और तिन्नां उटी बाखा पळी करै माथअ टेकअ और सोभ लागै तेऊए भगती करदै। तैबै तिन्नां आपणी-आपणी बोझळी खोळी और तेता का सुन्नअ-रूपअ, लोआन, गंधरस और कई चिजा भेंट की। 12 एता बाद दैनी तिन्नां लै परमेश्वर सुपनै चतैनगी कि हेरोदेस राजे सेटा लै निं बापस नाशी, तियां बी तिधा का उझूए और तियां नाठै दुजी बाता आपणै देशा लै।

## मिस्र देशा लै नाशणअ

13 तिन्नां नाशणै का बाद प्रभूओ एक सर्बगदूत युसुफे सुपनै आअ, और तेऊ दूतै बोलअ युसुफा लै इहय कि, "हे युसुफ, खळअ उझू, एऊ शोहरू और एऊए आममा संघा निई करै भाग इधा का मिस्र देशा लै और जेभै तैणीं तालहै हूँ आप्पै निं बोलूँ, तभै तैणीं रहै तिधी, किलहैकि हेरोदेस राजअ आसा लागअ द एऊ शोहरू लोळअ और तेऊ आसा लाअ द अह मारी पाई।

14 युसुफ बी इन्नां गल्ला शुणीं राची भितरी उझूअ और मरिअम और सह शोहरू संघा नियं और तियां भागै तिधा का मिस्र देशा लै। 15 जाऊं तैणीं हेरोदेस राजअ मूँअ निं आथी, तेभै तैणीं रहै तियां तिधी। अह हुआ तै कि शास्त्रा दी भविष्याबाणीं करनै आळै जुण बचन बोलअ द थिय, सह पुरअ होए कि "मंएँ शादअ आपणअ शोहरू मिस्र देशा लै।"

16 जाऊं हेरोदेस राजे भाळअ कि जोतषी दैनअ तेऊलै धोखअ, ता तेऊ आई बडी भारी रोशे और आपणीं फूऊज भेजी करै तेऊ जोतषी का पुछै दी ठिक-ठिक तेसा घळी हूए दै बेतलेहम और तेता ओरी-पोरी गराऊंरें हूए दै शोहरू; जुण दूई बशे या तेता का होछै थियै तियां पाए तेऊ सोभ मारी। 17 तैबै जुण बचन यिर्याह भविष्याबाणीं करनै आळै बोलअ त सह हुआ पूरअ कि:

18 "रामाह दी शुळुई मरगे नाद और बडअ भारी मखाण पळअ, ता राहेल आसा लागी दी आपणै शोहरूए तैणीं लेरदी, सह निसी केही चुफुई, किलहैकि तियां निं एबै रहै आथी।"

## मिस्र देशा का बापस फिरनअ

19 हेरोदेस राजे मरी करै आअ प्रभूओ सर्बगदूत भी मिस्र देशै युसुफे सुपनै दी और तेऊ दुते तेऊ लै बोलअ, 20 "हे युसुफ, खळअ उझू और एऊ शोहरू और एऊए आममां निंऊं इस्त्राएला लै बापस, जुण एऊ शोहरू मारनअ चाहा त, सह गअ एबै मरी।" 21 सह बी तिधा का उझूअ और तिन्नां संघा लई करै आअ इस्त्राएल देशा लै बापस। 22 पर जाऊं तेऊ इहय शुणअ कि हेरोदेसा बाद आसा बणअ द तेऊओ शोहरू अखिलाउस इस्त्राएल देशै राजअ, ता युसुफ डरअ तिधा नाशणै का। तैबै युसुफा सुपनै दी परमेश्वर चतैनगी भेटी और तिधा का नाठअ सह गलील देशा लै 23 और तिधी लागअ सह नासरथ नांऊए एकी गराऊंरें रहंदअ। इहय हुआ तै कि शास्त्रा दी भविष्याबाणीं करनै आळै बोलअ द बचन पूरअ होए कि, "तेऊ नांअ पळणअ नासरी।"

## यहून्ना बपतिस्मै दैणैआळअ

(मरकुस 1:1-8; लूका 3:1-18; यहून्ना 1:6-8, 15-34)

3 तिन्नां धैळै त यहून्ना बपतिस्मै दैणै आळअ यहूदिया देशै बणै उजाळ जैगा दी रही करै इहय परचारा करदअ लागअ द कि, 2 "आपणअ मन बदळा, सर्बगो राज गअ नेळ एछी।" 3 अह आसा त सहई जसरे बारै याशायाह भविष्याबाणीं करनै आळै बोलअ त कि, "बणै उजाळ जैगा दी आसा लागअ द एक हाका लाई बोलदअ कि, प्रभूओ रसतअ बणांआ और तेऊए सळका करा सिधी।"

4 अह यहून्ना बाह्ना त घेरी ऊँटे उने झिकळै और चांभळे झोळी, और खाणा लै खाआ त सह बणै रैटै घोला और मखीर। 5 तैबै येरुशलेमा का, सारै यहूदिया का और जरदण नदी ओरी-पोरी रहणै आळै सारै लोग आए यहून्ना सेटा लै; 6 और तिन्नां आपणै पापा का मन फरेऊई करै जरदण नदी दी तेऊ का बपतिस्मअ (जल दिक्षा) लअ।

7 जाऊं तेऊ कई यहूदी और फरीसी जातीए लोग आप्पू सेटा लै बपतिस्मै लंदै एछदै भाळै, तैबै तेऊ तिन्नां लै बोलअ, "हे शपैळै शोहरूओ, तम्हां का कुंणीं खोजअ कि जै बिपती चाली एछी, तेता का भागा? 8 मना बदळणै जोगी फळ ता आणा आपणी जिन्दगी दी! 9 और आपणै-आपणै मनै निं तम्हें इहय सोचा कि म्हारअ मूळ आसा अब्राहम, हूँ आसा लागअ द तम्हां लै बोलदअ कि परमेश्वर सका इन्नां पथरा का बी अब्राहमा लै शोहरू पैदा करी, 10 खराळअ आसा हेरअ द बूटे गोधे डाही, एते तैणीं कि जुण रांबळअ फळ नाई दैआ, सह पाणअ काटी और आगी जैदरी पाणअ दहही।

11 हूँ ता दैआ तम्हां लै पाणीं करै मना बदळणैओ बपतिस्मअ, पर जुण मूँह बाद एछणै आळअ आसा, सह आसा मुखा बडअ महान; हूँ निं तेऊए बूटा चकणै जोगी बी आथी, तेऊ दैणअ तम्हां लै पबित्रआत्मा और आगी करै बपतिस्मअ।" 12 "तेऊओ शूप आसा तेऊए हाथै, और तेऊ करनी आपणै खट्ळै रांबळै करै सफाई, और नाज ता करनअ तेऊ खुडी कठा, पर भुखलअ पाणअ तेऊ एही आगी जैदरी दहही, जुण आग कधी निं हिशदी आथी।"

## यहून्ने हाथै प्रभू यीशूओ बपतिस्मअ

(मरकुस 1:9-11; लूका 3:21,22; यहून्ना 1:31-34)

13 और यीशू मसीह बी आअ गलीला का यहून्ना सेटा लै जरदण नदीए कनारै बपतिस्मै लंदअ। 14 पर यहून्ना लागअ इहय करै तेऊ रोकदअ कि, "हे प्रभू, तूह किलहै आअ मूँह सेटा बपतिस्मै लंदअ? मूँह लागा हथू तेरे हाथे पै बपतिस्मअ लणअ।" 15 यीशू तेऊ लै उत्तर दैनअ, कि एसा गल्ला दै हणै, हाम्हां लागा धर्म-कर्म एऊई रबाजे साबै पूरअ करनअ, इहयई ठिक बी हआ। तैबै जाई करै यहून्ना तेऊए गल्ल मनी। 16 जाऊं यीशू मसीह बपतिस्मै दुबकि दैई करै पाणीं का उझै निखळअ, ता हेरा-हेरी यहून्ना भाळअ इहय कि तेऊ लै सरग खुलहअ; और परमेश्वर पबित्रआत्मां भाळी एछदी कबूतरै रूपै तेऊ परदै। 17 और एक आकाशबाणीं हूई कि, "अह आसा मेरअ प्यारअ शोहरू और एऊ का आसा हूँ बडअ भारी खुशी।"

### यीशू परिक्षा

(मरकुस 1:12; लूका 4:1-13)

4 तेसाई घळी पबित्रआत्मां नियं यीशू मसीह कराहणें उजाळ जंगला लै, ताकि शैतान तेऊ परखी सके। 2 यीशू मसीह रहअ चाहळी धैळै और चाहळी राची निराहार, और चाहळी धैळै बाद आई तेऊ भुखै। 3 तैबै परखणें आळै प्रभू यीशू लै बोलअ, “जै तूह परमेशबरो शोहरू आसा, तै बोल तूह इन्नां पाथरा लै इहय कि रोटी बण?” 4 प्रभू यीशू तेऊ लै जबाब दैनअ कि, “पबित्र शास्त्रा दी आसा लिखअ द इहय कि मांहुं निं सिधअ रोटी करै जिऊंदअ, पर परमेश्वरे खाखा का निखलळै दै हर बोला करै सका सह जिऊंदअ रही।” 5 तैबै शैतानै सह पबित्र नगरी लै नियं और मांदरे पुंडरी दी खळअ करी करै 6 तेऊ लै बोलअ, “जै तूह परमेश्वरो शोहरू आसा, तै बधळू आपणें आप ईधा का उंधै, किलहै कि इहय बी आसा शास्त्रा दी लिखअ द कि परमेश्वरा छाडणें सर्बगदूत तेरी सेओआ टैहली करदें और तिन्नां चकणअ तूह हाथो हाथ, ताकि तेरै पैरै ठोहळ ना लागे।” 7 यीशू तेऊ लै बोलअ, “शास्त्रा दी आसा इहय बी लिखअ द कि तूह निं आपणें पिता परेशबरा परखदअ लागी।” 8 तेखअ निंअ शैतानै सह एकी उछटी धारा दी और तेऊ यीशू का सारै संसारा सुख भोग रहैऊई करै बोलअ, 9 “जै तूह मूँह सेटा माथअ टेके, ता मूँह दैणीं ईयां सोभै गल्ला तालहै।” 10 तैबै यीशू शैताना लै बोलअ, “हे शैतान मेरी नजरा का हअ दूर, पबित्र शास्त्रा दी आसा लिखअ द कि तूह टेकै सिधअ आपणें पिता परमेश्वरा सेटा माथअ और सिधी तेऊए ई भगती करै।” 11 तैबै शैतान प्रभू यीशू सेटा का भागअ और सर्बगदूत लागै प्रभू यीशूए सेऊआ टैहली करदै।

### यीशूए सेऊआ चाकरीए शुरुआत

(मरकुस 1:14,15; लूका 4:14,15,31)

12 जांऊं यीशू मसीह शुणअ कि यहून्ना बपतिस्मै दैणै आळअ पाअ कैदखानै दी, ता सह नाठअ गलील देशा लै 13 और नासरत गराऊंआ छाडी कफरनूहमें दरैऊए कनारै लागअ जबलून और नपतालीए देशै रहंदअ; 14 ताकि याशायाह भबिष्याबाणीं करनैआळैओ बचन पूरअ होए कि, 15 “जबलून और नमालीए देशै, दरैऊए रसतै, जरदण नदी सेटा, गलील देशै, दुजी जातीए लोग; 16 जुंण न्हैरे दी बेठै दै थियै, तिन्नां भाळअ बडअ चमकदअ प्रेशअ और जुंण तेऊ देशै मौते छैली दी बेठै दै थियै, तिन्नां दी चमकअ प्रेशअ।” 17 तधा पोर्ही किय यीशू मसीह इहय परचार करनअ शुरु कि, “पापा का बदळा आपणें मन, सर्बगो राजा आअ नेळ।

### पैहलै चेलै शदणें

(मरकुस 1:16-20; लूका 5:1-11; यहून्ना 1-35-42)

18 यीशू मसीह गलील दरैऊए करनारै घुमदी-फिरदी दुई भाई, माहळली ढाकणें आळै, शिमोन जसा लै पतरस बोला, और तेऊओ भाऊ आंदरिआस भाळै दरैऊआ दी माहळली ढाकणा लै जाळा पांदै, 19 और प्रभू यीशू तिन्नां का बोलअ, “एछा, हूँ बणाऊं तम्हां आदमीं ढाकणें आळै।” 20 ता तियां बी लागै नडैऊए आपणें जाळ छाडी यीशू मसीह पिछू हांडदै।

21 तिधा का आजु नाशी करै यीशू दुई होर भाई, याकूब और तेऊओ भाऊ यहून्ना, तियां तै लागै दै आपणें बापू जबदी संघै किशती परदें बेशी जाळा चफळदै, प्रभू यीशू तियां बी भाळै, और तेऊ तियां बी शादै, 22 ता तियां बी लागै नडैऊए आपणें बापू छाडी यीशू मसीह पिछू हांडदै।

### यीशूए रोगी ठीक करनें

(लूका 6:17-19)

23 यीशू हांडअ-फिरअ सारै गलील देशै, और कई सभा दी उपदेश दैनै, ता सर्बगो राजे खुशखबरी शणाऊंई और लोगै हर परकारे दाह बमारी रहअ ठीक करदअ लागी। 24 इहय करै सारै सिरिआ देशै गराऊंए फैलअ यीशू मसीहो जश; और लोग जुंण कई बमारी दी, दुखा दी और कोई दी थिय भूत-परेत शाचअ द, और मिर्गिए बमारी आळै थियै, तियां यीशू मसीह सेटा लै आरे,

और प्रभू यीशू मसीह कियै तियां सोभ राम्बळै 25 और बडै भारी लोगे फुंड, आरे गलील, दिकापुलिस, येरुशलैमा, यहूदिया, और जरदण नदी पारा बाखा का प्रभू यीशू मसीह पिछू।

### यीशूओ धारा परदें उपदेश

5 यीशू मसीह भाळअ कि बडै भारी लोग आरे; ता सह बेटअ धारती परदें और चेलै बी आरे तेऊ सेटा लै। 2 तैबै यीशू मसीह जोरै-जोरै तिन्नां लोगा लै उपदेशा दैदअ लागअ कि

3 “धन्य आसा तियां, जुंण मने भोळै आसा, सर्बगो राजा आसा तिन्नां।”

4 “धन्य आसा तियां जुंण शोग करा, तिन्नां लै भेटणीं शांती।”

5 “धन्य आसा तियां जुंण नम्र आसा, तियां हणें एसा धरतीए अधिकारी।”

6 “धन्य आसा तियां, जुंण धर्म भुखवै आसा, तियां रजैऊणें।”

7 “धन्य आसा तियां जुंण दैया करा, तिन्नां लै बी हणीं दैया।”

8 “धन्य आसा तियां, जसरे मनै कोई कपट निं आथी, तिन्नां भेटणअ परमेश्वर।”

9 “धन्य आसा तियां जुंण मेल-मलाप करा, तियां हणें परमेश्वरे पुत्र।”

10 “धन्य आसा तियां जसा लै धर्म करी करै लोग दुख दैआ, सर्बगो राजा आसा तिन्नां लै।”

11 “धन्य आसा तम्हें, जेभे तम्हां लै लोग मूँह पिछू चलणें बजह झुठअ बोली करै थारै बरोधा दी हर प्रकारो बुरअ बरताअ करे, 12 तेभे रहै तम्हें खुशी दी मगन किलहैकि तम्हां भेटणीं सर्बगें बडी नांम, किलहैकि तिन्नां जुंण तम्हां का पैहलै भलै मांहुं भबिष्याबाणीं करनै आळै तै, तिन्नां लै बी दैनअ तिन्नां इहयई दुख कशट।”

### लूण और लाटू

(मरकुस 9:50; लूका 14:34, 35)

13 “तम्हें आसा संसारा दी लूण; पर जै लूणों सुआद लुणअ नाई रहे, ता तै सह किजू करै करनअ लूणअ।” तेखअ निं तेता ढेका शोटणें का सुआई किछै काम रहंदअ। 14 “तम्हें आसा संसारा लै प्रेशअ, जुंण गरांअ धारा परदें बसअ द होए, सह धेछिआ सोभी का। 15 लोग निं लाटू जाळी करै दिऊटा हेठै डाहंदे पर तेऊ डाह तेता परदें, ताकि सारै घरे प्रेशअ होए। 16 ठीक इहयई थारअ प्रेशअ बी लोळी होरी लोगा सहनै चमकअ कि तियां थारै भले कामां भाळी थारै पिता परमेश्वरे, जुंण सर्बगें आसा, तेऊए बडाई करे।

### व्यवस्थे शिक्षा

17 “इहय निं समझा कि हूँ आसा आअ द बिधि बधाना और शास्त्रा नाश करदअ, पर हूँ आसा आअ द तिन्नां पूरै करदअ। 18 हूँ खोजा तम्हां का सच्चाई कि जेभे तैणीं अह सरग और धरती खतम ना होए, तेभे तैणीं बिधी बिधाना दी लिखी दी एक मात्रा और एक बिंदू बी पूरा हए बिणा निं टळणअ।”

19 “तैहीता जुंण बी इन्नां होछ्छी का होछ्छी आज्ञा का एक बी चोळे, और तिहअई लोगा का सखाऊए, सह हणअ सर्बगो राजा दी सोभी का होछ्छअ; पर जुंण कोई तिन्नां आज्ञा मने, और तिन्नां होरी का बी सखाऊए सह हणअ सर्बगो राजा दी सोभी का महान, 20 किलहैकि हूँ खोजा तम्हां का सच्चाई कि जै थारै धर्म-कर्म इन्नां शास्त्री और फरीसी का बढकर ना होए, तै निं तम्हें सर्बगो राजा दी कधी नाशी सकदै।”

### क्रोध और हत्या

21 “तम्हें आसा शुणीं दी ईयां गल्ला कि पराणें जमानेए लोग बोला तै इहय कि हत्या निं करनीं और जुंण हत्या करे, तेऊ भेटणीं कचहरी दी सजा। 22 पर हूँ खोजा तम्हां का सच्चाई कि, “जुंण बी आपणें भाई लै क्रोध करे, सह आसा हत्यारअ और तेऊ भेटणीं कचहरी दी सजा, और जुंण आपणें भाई लै नकाम्मअ बोले, तेऊ भेटणीं माहासभा दी सजा; और जुंण इहय बोले “आरा मुरखा”, तेऊ भेटणीं नरके आगी जैदरी सजा।” 23 तैहीता जै तूह आपणें भेंट बेदी दी आणें, और तिधी ताह आद फिरे कि, मेरै भाईए मनै आसा मुलहै बिरोध, तै तूह आपणें भेंटा छाड बेदी सहनै और 24 आपणें भाई संघै कर

पैहलै मेळ-जोळ और तेता बाद चढाऊ आपणीं भेंट बेदी दी।" 25 "जेभै तैणीं तूह आपणें दुशमणा संघा बाता आसा, तेभैई कर झटपटै तेऊ संघे मेळ-जोळ, इहय निं हआ कि सह पजैळा ताह ठाणैदारा सेटा और ठाणैदार दैआ ताह सपाही सेटा और सपाही पाए ताह जेहला दी। 26 हूँ खोजा तम्हा का सच्चाई कि जेभै तैणीं तूह पाई-पाई निं भरी छेके, तभै तैणीं निं तिधा का छुटणअ।"

### कंजरैई

27 तम्हें आसा शूर्णीं दी ईयां गल्ला कि कंजरै निं हणअ, 28 पर हूँ बोला तम्हां लै सच्चाई कि, "जुंण बी कसा बेटळी लै कंजरी नजरा करै भाळे बी, सह गअ मनैई मनै तेसा संघे कंजरुई।" 29 "जे तेरी दैहणीं आछ ताल्है टोहळ दैरे, ता तेसा शोट आप्पू का पोही। किल्हैकि ताल्है आसा अहई भलअ कि तेरी देही का हणअ एकै आंग नाश और तै निं तेरी सारी देही नरकै पाणीं। 30 जे तेरअ दैहणअ हाथ ताल्है टोहळ दैरे, ता तेऊ शोट काटी करै धरनीं, ताल्है आसा इहयई भलअ कि तेरअ एकै हाथ हणअ तेरी देही का नाश ताकि तेरअ सारअ शरीर ता निं नाशणअ नरका दी।"

### बैईदाऊअ (तळाक)

31 और तम्हें इहय बी आसा शुणअ द कि जुंण आपणीं लाळी छाडणअ चाहा, ता सह दैआ तेसा लै बैईदाऊअ लिखी, 32 "पर हूँ बोला तम्हां लै इहय कि जुंण बी आपणीं बेटळी कंजरै कामां का सुआई किज्जी होरी कारणे छाडे, ता सह कराऊआ तेसा का कंजरैई, और जुंण तेसा छाडी दी बेटळी संघे बैह करा, सबी करा कंजरैई।"

### कसम

33 तम्हें इहय बी हेरअ दा शुणीं कि पराणें जमानेंए लोग बोला तै इहय कि झुठी कसम निं खाणीं पर प्रभू लै करनीं आपणीं कसम पूरी। 34 "पर हूँ बोला तम्हा लै इहय कि कसम निं कधि खाणीं, नाई ता स्वर्गे, किल्हैकि सह आसा परमेश्वरो सिंहासन, 35 नां धरतिए किल्हैकि सह आसा तेऊए पारे चऊकी; नां ता एऊ देशे, किल्हैकि सह आसा माहाराजे नगरी। 36 आपणें मूंडे कसम बी निं खाई, किल्हैकि तूह नां ता एक शराळ काळअ और नां ता तूह शेतअ करी सकदअ। 37 "पर थारी गल लोळी हांए हां हुई और नाईए नाई हुई, किल्हैकि जुंण बी एता का जादअ हआ सह हआ बुराई का।"

### बदळअ

(लूका 6:29, 30)

38 तम्हें आसा इहय बी शुणअ द कि इहय बी बोला तै की आच्छीए बदळै आछ, और दांदे बदळै दांद। 39 "पर हूँ बोला तम्हां लै इहय कि बूरेओ सहानअ निं करी; पर जुंण तेरै दैहणें गलेटै चेंडै बाहे, तेऊ बाखा फरेऊरे बाऊअ गलेटअ बी, 40 और जे कोई ताखा कुरतअ छडैऊई निंए, तेऊलै दै आपणीं सुथणीं बी। 41 और जुंण ताह थोघे बाझी एक कोस दूर निंए ता तेऊ संघे नाशे दूई कोस बी। 42 जुंण ताखा किज्जे मांगे, तेऊलै दैरे, और जुंण ताखा किज्जे धुआरी मांगे, तेऊलै निं आपणीं पिठ फरेऊई।"

### शतरु संघे प्रैम

(लूका 6:27, 28, 32-36)

43 तम्हें आसा इहय बी शुणअ द कि इहय बी बोला तै कि आपणें पडोसी संघे डाहै झूरी और आपणें बैरी संघे डाहै बैर। 44 पर हूँ बोला तम्हा लै इहय कि आपणें बैरी संघे डाहै झूरी, और जुंण ताल्है दुख तकलीफ दैआ, तेऊ लै करै प्रार्थणा, 45 इहय करै हूँ तम्हें आपणें सर्बर्गिय पिता परमेश्वरे शोहरु, किल्हैकि सह दैआ भलै और बूरे दुही लै सुरजो धुपअ, और धर्मी और पापी दुही लै बरशाऊआ पाणीं। 46 किल्हैकि जे तम्हें आप्पू संघे झूरी डाहणें आळैई संघे झूरी डाहा, तै तम्हां लै किज्जे नफअ हणअ? होर लोग बी कै इहय निं करदै?

47 जे तम्हें आपणेंई रिशतैदारा लै नमस्ते करा, सह किज्जे तम्हें बडअ भारी बडअ काम करा? इहय कै होर लोग बी करदें निं आथी? 48 तैहीता हूँ बोला कि तम्हें बणां सिध, जिहअ थारअ सर्बर्गिअ पिता सिध आसा।"

### दान

6 "एसा गल्ला दी रहै चतैन कि तम्हें लोगा का रहैऊणें तैणीं निं लागी धर्म कर्म करदै, नाई ता तम्हां निं तेतो परमेश्वरा का कोई फल भेटणअ।

2 तैहीता, जे तूह दान-पून करे, सह निं सोभी का लागदअ खोजणअ कि मंए किज्जे दैनअ, जिहअ कपटी लोग सभा दी; और खळे ताटी काढा रहैऊणा लै, ताकि लोग तिन्नां भाळी बडाई करे, हूँ बोला तम्हा का सचची कि तिन्नां गअ तेतो फल भेटी। 3 पर जेभै तूह दान करे, तेभै निं तेरै बाऊंए हाथा लोळी थोघ लागअ कि तेरै दैहणै हाथे किज्जे दैनअ, 4 ताकि तेरअ दान गुप्त रहे, और परमेश्वर जुंण गुप्त गल्ला भाळा, तेऊ दैणअ ताल्है तेतो फल।"

### प्राथणां

(लूका 11:2-4)

5 "जेभै तूह प्राथणा करे, तेता बी निं तूह कपटी लोगा जेही करी, जेही तियां लोगा का रहैऊणें तैणीं बडी-बडी सभा दी, और खुल्ही जेगा दी लागा तिन्नां भजन प्राथणां करनेओ चाअ, हूँ खोजा तम्हां का सच्चाई कि तिन्नां गअ तेतो फल भेटी। 6 पर जेभै तूह प्राथणा भजन करे, तेभै नाशे आपणीं पांडा भितरी, और दुआर हूळी करै करनीं तंए गुप्त प्राथणा भजन, और तेरअ पिता परमेश्वर जुंण ताहा गुप्त भाळा, तेऊ दैणअ ताल्है तेतो फल। 7 प्राथणा करदी बारी निं तूह होरी जिहअ एकी गल्ला लै भी-भी लैळा पाई, किल्हैकि तियां जांगा इहय कि जे हाम्हें खासी लैळा पाए, तै शुळणीं परमेश्वर म्हारी। 8 तम्हें निं तिन्नां जिहै बर्णी। किल्हैकि थारअ पिता परमेश्वर जाणा थारै मांगणै का पैहलै कि थारी किज्जे कामी पेशी आसा।"

9 तम्हें करै एऊ साबै प्राथणा कि: "हे म्हारै पबित्र पिता परमेश्वर, तूह जुंण सबर्गे आसा, तेरअ नांअ लोळी पबित्र मनअ,

10 और तेरअ राज लोळी आअ; तेरी दिला मनं गल्ला; जेही सबर्गे पूरी हआ, तेही लोळी एऊ संसारै बी पूरी हुई।

11 हे प्रभू, म्हारी दोती-बैळीए रोटी दै आझ् हाम्हां लै, 12 जे हाम्हां का किज्जे भूल-चूक हुई होए, तेसा करै माफ, जिहअ हाम्हें बी तिन्नां होरी लै माफी छाडी; जुंणी हाम्हां लै दुख तकलिफ दैनीं।

13 हाम्हां लै निं कष्ट, बिपता एछणें दैई, पर हर बूरी गल्ला का डाहै हाम्हां बचाऊई (किल्हैकि राज, थल-बल और गूण-जश आसा हाम्हां लै तेरअ ई)।"

14 "जे तम्हें माळुंरे अपराध माफ नाई करे, ता तै निं थारै अपराध बी थारै पिता परमेश्वरा माफ करनै। 15 और जे तम्हें माळुंरे पाप माफ करे ता तै करनै पिता परमेश्वरा बी थारै अपराध माफ।"

### ब्रत (उपवास)

16 "जेभै तम्हें ब्रत करे, तेभै निं तम्हें कपटी लोगा जिहअ मूँह डाही छडाऊई, किल्हैकि तियां डाहा आपणअ मुँह शेऊई, ताकि लोगा का इहय पतअ चले कि अह आसा ब्रतू। हूँ बोला तम्हां का सच्चाई कि, तिन्नां गअ तेतो फल भेटी।" 17 "पर जेभै तूह ब्रतू होए, तेभै न्हैईए धोईए, और मूँडे लाए तेल, 18 ताकि तेरअ ब्रतू हणेंओ थोघ निं लोगा का लोळी लागअ, पर तेरअ पिता परमेश्वर जुंण ताह गुप्त भाळा, सिधअ तेऊ का लोळी थोघ लागअ, और तेऊई दैणअ ताल्है तेतो फल।"

### स्वर्गो धन

(लूका 12:33,34)

19 "आप्पू लै निं धरती दी धनमाया कठा करा, जिधी किळै मकोळै खराब करा, और चोर करा चोरी।" 20 "पर तम्हें करा आप्पू लै सबर्गे धन माया कठा, जिधी ना ता किळै मकोळै खांदै, और ना ता चोरी करदअ कोई चोर आथी, 21 किल्हैकि जिधी तेरअ धन आसा, तिधी रहणअ तेरअ मन बी लागी।"

देहीओ प्रैशअ  
(लूका 11:34-36)

22 “एसा देहीओ प्रैशअ आसा आछ, जै तेरी नजर साफ होए, तै हर्णी तेरी सारी देह प्रैशी।” 23 “पर जै तेरी नजर ई बूरी होए, ता तेरी सारी देह हर्णी न्हैरी; इहय करै जूण ताखा प्रैशअ आसा, जै सह न्हैरअ होए; तै सोचा सह केतरअ बडअ हणअ।”

परमेश्वर और धन  
(लूका 16:13; 12:22-31)

24 “कोई बी माछू निं दूई सुआमिऐ सेऊआ करी सकदअ, किल्हैकि जै सह करे बी, ता एकी लै डाहणीं तेऊ जीद; और दुजै लै डाहणीं तेऊ झूरी। किता एकी संघै रहणअ तेऊ नेळ-नेळ, और दुजै का रहणअ तेऊ दूर।” ठीक इहय ई, “तम्हें निं परमेश्वर और धन माया दूहीए सेऊआ करी सकदै।” 25 तैहीता हूँ तम्हां लै बोला कि “आपणै जिन्दगी लै इहय हैळअ फिकर निं करी कि, किजै खाणअ-पिणअ? और ना ता आपणीं देही लै फिकर करी कि हाम्हां किजै बाहणअ? जिंदगी किजै रोटी का, और देह कै झिकळै का किम्मती निं आथी?” 26 “सगै उड़दै पंछी लै दैआ नजर ! तियां ना बऊंदै, और ना लऊंदै आथी, और ना ता तियां भडारा भरना लै कठा करदै; तैबी दैआ थारअ पिता परमेश्वर तिन्नां लै खाणअ-पिणअ, तम्हें कै तिन्नां का खास्सै किम्मती निं आथी?” 27 “तम्हां बिचै इहय कुण आसा कि फिकर करी करै आपणीं जिंदगीए एक घळी बी सका बढाऊई?”

28 झिकळेए तैणीं किल्है करा तम्हें हैळअ फिकर? बर्णै लागै दै होछै-होछै फूला दी दैआ धन, कि तियां किहअ करै बढा? तियां ना ता मैन्थ करदै, और ना तियां कातदै। 29 तैबी बोला हूँ तम्हां लै कि सुलैमान राजै बी निं आपणै सारै गूणगाना दी तिन्नां कोही बराबर झिकळै बाहै। 30 “जै परमेश्वर घैहणींए घाहा लै, जुण आज्ञा आसा और काला दहणअ सह आगी जैदरी, तिन्नां का बी ईहै झिकळै भनैऊंआ, ता हे शक करनै आळै विश्वासिओ, तम्हां लै किल्है निं भनैऊणै तेऊ झिकळै।”

31 “इहय करै तम्हें इहय फिकर निं करी और ना इहय बोली कि हाम्हां का खाणा-पिणा लै किजै हणअ, और बाहणा लै किजै हणअ? 32 किल्हैकि होर लोग बी रहा इन्नां चिजा लोळै लागी, पर थारअ स्वर्णै रहणै आळै बाबा का आसा थोघ कि तम्हां लोळी ईयां सोभ चिजा।” 33 तैहीता हूँ तम्हां लै इहय बोला कि पैहलै करा पिता परमेश्वर धर्म, और राजे लोळ-तोप और ईयां सारी चिजा जाणीं तम्हां भेटी।” 34 “ऐबै काला धैळीओ हैळअ फिकर निं तम्हें करी, किल्हैकि कालकी धैळी हेरनअ आपणअ फिकर आप्पै करी; और आज्ञा लै आसा आज्ञाकअ दुख ही बतेहअ।”

दुजै लै दोष निं लाणअ  
(लूका 6:37,38,41,42)

7 “होरी लै दोष निं लाणअ, ताकि तम्हां लै बी कोई दोष ना लाए। 2 किल्हैकि जिहअ करै तम्हें दुजै लै दोशा लांदै लागा, तिहअई दोष लाणअ तम्हां लै बी। जेऊ नापा करै तम्हें दुजै नापा, तेऊई नापा करै नापणै तम्हें बी।”

3 “तूह आपणै भाईए आच्छी कर्णी किल्है भाळा, आपणीं आच्छी पळअ द गळू निं ताखा धेछदअ आथी? 4 जै तेरी आपणीं आच्छी ही आसा गळू पळअ द, तै किहअ करै सका तूह आपणै भाई लै इहय बोली कि एछ भाईआ हूँ काढूँ तेरी आच्छी भितरी पळी दी कर्णी पोही? 5 हे कपटीआ, पैहलै आपणीं आच्छी पळअ द गळू लअ तूह पोही काढी, तेखअ सका तूह आपणै भाईए आच्छी दी पळी दी कर्णी; राम्बळै करै हेरी भाळी करै काढी।

6 पबित्र चिजा निं कुतै लै दैआ, और नां ता आपणै मोती सुंगरा सहनै शोटणै, इहय निं हआ कि तियां जैतै तिन्नां खूरा करै, और पिछू फिरी करै तम्हां धेळे-चिरे।”

जुंण बी मांगे सह भेटणअ  
(लूका 11:9-13)

7 “जै तम्हें मांगे, सह बी हेरनअ तम्हां लै दैई, जुंण तम्हें लोळा, सह बी जाणअ तम्हां भेटी; दुआरा दैआ टोकणीं, तै खोळणअ तम्हांलै दुआर। 8 किल्हैकि जुंण मांगा, तेऊ भेता और जुंण लोळअ लागा, तेऊ बी भेता और जुंण दुआरै टकटक करी छेळ करा, तेउलै खुला दुआर।”

9 “तम्हां बिचै इहय कुण आसा कि तेऊओ शोहरू मांगा रोटी, और सह दैआ आपणै तेऊ शोहरू लै पाथर? 10 या, जै तेऊओ शोहरू माहछली मांगा, पर सह दैआ तेऊए हाथे सांप? 11 जै तम्हें बूरे हई करै बी; आपणै शोहरू लै राम्बळी-राम्बळी चिजा दैणीं चाहा, तै थारै सबर्णै बाप्पू तम्हांलै राम्बळी चिजा किल्है निं दैणीं?” 12 “ठीक इहय ई, जिहअ तम्हें चाहा कि होर आदमीं तम्हां संघै करे, तम्हें बी करा तिन्नां संघै तिहअ ई। भबिशयाबाणीं करनै आळै बी आसा बिधी बधाना दी ईयांई जैन खोजै दै।”

घाटअ और खुलहअ रसतअ  
(लूका 13:24)

13 “घाटी परऊळी बाती नाशा भितरा लै। जुंण परऊळ खुलही आसा, सह ज़ांछींआ सान रसतअ, पर सह पजैळा बनाश करी करै नरकै; और बडै भारी लोग पेशा तेसाई परऊळी बाती। 14 घाटी आसा सह परऊळ, और सह आसा बडअ भारी मुशकळ रसतअ, जुंण जिंदगी दी पजैळा, पर तेसी बाती नाशा थोळै।”

जिहअ पेळ तिहअ फळ  
(लूका 6:43,44,46; 13:25-27)

15 “झुठै संता का रहै चतान, तियां एछा भेडे भेश बणाई तम्हां सेटा लै; पर भितरी हआ तियां धेळणै चिरनै आळै बराघ। 16 तिन्नां सका तम्हें तिन्नें फळा का बछैणीं। कांडेए झाकळा का अंगूर और उंटकटारै का अंजीर कै चोळी सका? 17 ठीक इहय ई हर एक रांबळअ पेळ दैआ रांबळअ फअळ और नकाम्मअ दैआ नकाम्मअ फअळ। 18 और तिहअ ई रांबळअ पेळ निं कधि नकाम्मअ फअळ दैदअ, और नकाम्मअ पेळ निं कधि रांबळअ फअळ दैई सकदअ।” 19 “जुंण पेळ रांबळअ फअळ नाई दैदअ, सह पाणअ काटी और सह दहणअ झुका लै।” 20 इहय करै सका तम्हें तिन्नें फळा करै तिन्नें बछैण करी।

21 “जुंण मुलहै हे प्रभू, हे प्रभू करा, तिन्नां बिचै निं हर कोई सबर्णै नाशणअ, पर सहई नाशणअ जुंण मेरे सबर्णै बाप्पूए ईछा दी चले।” 22 “तेसा धैळी बोळणअ कई लोगा मुलहै कि हे प्रभू, हे प्रभू, हाम्हें कै तेरै नाऊंरें भबिशयाबाणीं निं की? और हाम्हें तेरै नाऊंरें बडै भारी चिन्ह चमतकार निं किये?” 23 “तेभै बोळणअ मुँह तिन्नां लै साफ-साफ कि हूँ निं तम्हां कधि बछैणदअ, हे कुकर्मिओ मुँह सेटा का नाशा दूर।”

घरा बणाणै आळै दूई आदमीं : बुधिमान और मुर्ख  
(लूका 6:47-49)

24 “तैहीता जुंण मेरी गल्ला शूर्णी करै तिन्नां मने, सह हणअ तेऊ बुधिमान आदमीं जिहअ, जुंण आपणअ घर शाफळा परदै पाकी जैगा दी बणांआ।” 25 ज़ांऊं बरसात आई, झहळ बागर चली, पाणिंए गाडा नाळी आई, तेऊ घरा दी लागै बडै-बडै ढेसै, पर सह घर निं दुळअ। किल्हैकि तेते मेद आसा ती पाकी जैगा दी। 26 “पर जुंण मेरी इन्नां गल्ला शुणां और नाई मंदअ आथी, सह हणअ तेऊ मुखआ आदमीं जिहअ, जुंणीं आपणअ घर रेटा परदै बणांआ।” 27 ज़ांऊं बरसात आई, झहळ बागर चली, और गाडा-नाळी आई, ता तेऊ घरा दी लागी हळकी जेही ढेस, और तेऊ घरो हुअ सर्वनाश।

28 ज़ांऊं प्रभू यीशू इन्नां गल्ला बोली मुकअ, ता तिधी तै बडै भारी लोग, तियां हुऐ रहै। 29 किल्हैकि सह निं शास्तरी फरीसी जिहअ उपदेश दैदअ त, पर सह दैआ त अधिकारी जिहअ उपदेश।



### कोहले बमारी आळअ ठीक करनअ (मरकुस 1:40-45; लूका 5:12-16)

8 जांऊं सह तेसा धारा का उंघै होथअ, ता लोगो लागअ तेऊ पिछू दहू हांददअ। 2 और तिन्नां बिचा का आअ एक कोहले बमारी आळअ आदमीं, और तेऊ टेकअ यीशू मसीह सेटा माथअ और बोलअ, “हे प्रभू, जै तूह चाहे, ता तूह सका मूँह एसा बमारी का ठीक करी।” 3 प्रभू यीशू मसीह सह आपणें हाथा करै छुँअ और बोलअ, “कोहले बमारी का हअ ठीक” और सह हुअ तेसा ही घळी ठीक। 4 प्रभू यीशू तेऊलै बोलअ, “होरी का निं कोही का खोजी, पर याजका परोहता सेटा नाश, और जुण-जुण मुसा नबीए साबै, देणें बिधि आसा खोजी दी, तेसा करै पूरी। ताकि तिन्नां लै ग्वाही हई सके।

### एकी सुबैदारो बिश्वास (लूका 7:1-10)

5 तेता बाद जांऊं प्रभू यीशू मसीह कफरनुंहंम गरांऊरें आरे, ता तिधी एकी सुबैदारै तेऊ सेटा लै एछी बोलअ, “हे प्रभू, घरै आसा मेरअ एक सेऊआकार कुबै मारअ द बडअ भारी दुखी।” 7 प्रभू यीशू मसीह बोलअ तेऊलै इहय कि “हूँ आअ तेरै घरा लै और तेऊ दैऊ ठीक करी।” 8 सुबैदारै प्रभू लै बोलअ, “हे प्रभू, हूँ निं एता जोगी आथी कि तूह मेरै घरै एछी सके, पर आपणें मूँहा का बोल, मुँह आसा विश्वास कि सह जाणअ तेरै बोळणें करै ठीक हई। 9 हूँ आसा आप्पू बी सरकारी नोकर, और सपाहीओ आसा हूँ मुखिय, और जांऊं हूँ एकी लै बोला कि पोही नाश, सह नाशा पोही और दुजे लै बोला कि ओही एछ, सह एछा ओही, और आपणें सेऊआकारा लै बोला हूँ कि इहय कर, सह करा तिहअ ई।”

10 प्रभू यीशू बी हुअ तेऊए गल्ला शुणी रहैन, और जुण तेऊ पिछू हांददै तै लागै दै, तिन्नां लै बोलअ, “मंएँ निं एतरअ विश्वास पूरै इस्त्राएला दी भाळअ, 11 “हूँ बोला तम्हां लै इहय कि, चऊ दिशा का एछी बेशणें लोग अब्राहम, याकुब और इसाका संघै सबर्णै। 12 पर राईसीए बाल बच्चै काढणें बागै न्हैरी जैगा लै, तिधी हूँ तिन्नां लेरदै और दांदा पिशदै।” 13 और यीशू मसीह सुबैदारा लै बोलअ, “जिहअ तेरअ विश्वास आसा, तिहअई लोळी तालहै हुअ” और तेऊओ सेऊआकार हुअ तेभी रांबळअ।

### कई बमारी आळै ठीक करनै (मरकुस 1:29-34; लूका 4:38-41)

14 और तेता बाद यीशू मसीह पतरसे घरै आअ और तिधी ती पतरसे शाशअ बडी बमार हुई दी। 15 यीशू मसीह तेसरअ हाथ छुँअ, ता सह उझूई तेभी खळी और सह लागी तिन्नां सेऊआ टैहली करदी। 16 जांऊं साह पळी ता तेऊ सेटा लै आरे बडै भारी बमार लोग, तिन्नां दी ती दुषटआत्मा, भूत परेत शाचै दै, और प्रभू यीशू किए तिन्नां सोभ ठिक और बमार लोग बी हुए रांबळै। 17 इहय करै हुअ याशायाह भबिशयाबाणी करनै आळै बोलअ द बचन बी पूरअ कि, “तेऊ चकी म्हारी कमजोरी आप्पू, और बमार किए रांबळै।”

### यीशूए चेलै बणणेंओ मोल (लूका 9:57-62)

18 यीशू मसीह आप्पू फेर बडै भारी लोगो दहू, और तेऊ बोलअ आपणें चेलै लै कि दरैऊआ पारा बाखा लै चाला, 19 ता तिधी एकी शास्त्री तेऊ सेटा एछी बोलअ कि, “हे गुरु, जिधा लै बी तूह चालअ, मुंबी लागणअ ताह पिछू हांददै।” 20 प्रभू यीशू तेऊ लै बोलअ, “शेळीए हआ खोखा, और सरगें चेलुए हआ बसेरै, पर मांहुँए शोहरू लै निं मुंडा लुआरना लै छान बी आथी।” 21 तेखअ एकी होरी चेलै तेउलै बोलअ, “हे प्रभू, मूँह दै पैहलै आपणें बाबे क्रिया-करम एछणें करी।” 22 यीशू मसीह तेऊ लै बोलअ, “मुँह दै मुँह दै दाबणें, तूह लाग मुँह पिछू हांददअ।”

### तुफान शांत करनअ

(मरकुस 4:35-41; लूका 8:22-25)

23 जांऊं प्रभू यीशू किशती दी बेठअ, तेऊए चेलै बी लागै तेऊ पिछू हांददै, 24 और दरैऊआ दी आई बडी भारी आंधी तुफान, और किशती लै उझूई बडी-बडी छाली ता तैबै तियां चालै किशती सघी पाणीं दी डुबी; और प्रभू यीशू मसीह त पिछू सुतअ द। 25 तैबै तियां यीशू मसीह सेटा लै आरे और लैळा पकारा पाई करै बोलअ, “हे प्रभू, हाम्हें चालै खतम हई, किशती लागी डुबदी।” 26 प्रभू यीशू तिन्नां लै बोलअ, तम्हें काचै विश्वासिओ, तम्हें किल्है डरा? इहय बोली यीशू मसीह उझुअ और आंधी तुफान और पाणीं लै काढी झाळ कि “शांत हआ”, और सह हुअ नढैऊए शांत। 27 ता चेलै हुए रहैन; कि ‘अह किहअ आदमीं आसा कि ऐऊए गल्ला शुणा आंधी तुफान और पाणीं बी!’

### दुष्टात्मां शाचै दै आदमीं ठीक करनै (मरकुस 5:1-20; लूका 8:26-39)

28 जांऊं तियां दरैऊआ पार गदरेनीं देशे पुजै ता तिधी आरे दूई आदमीं मुल्दघाटा का, तियां तै दुष्टआत्मा करे भरुए दै और यीशू मसीह सेटा पुजै, तियां तै एतरै बुरै कि तिन्नां डरै निं तेसा बाता कोहै नाशी सकदअ त। 29 जांऊं तिन्नां का यीशू मसीह धेछुअ, ता तिन्नां बडी-बडी करिगा पाई करै यीशू लै बोलअ, “हे परमेश्वरे शोहरूआ, हांम्हां निं ताहा संघै किछै मतलब आथी? तूह कै हांम्हां लै म्हारै बगता का पैहलै दुखा दैदअ आअ?” 30 तिन्नां का दूर जिहअ त एक सुंगरो छुंड लागअ द चरदअ, 31 तिन्नां दुशटआत्मा प्रभू यीशू मसीहा का अरज की कि, “जै तंएँ हाम्हें इन्नां आदमी का पोही लाई काढी, ता तै दै हांम्हां इन्नां सुंगरे छुंडा दी नाशणें जाजता।” 32 प्रभू यीशू मसीह तिन्नां लै बोलअ, “नाशा”, और तियां पेठी सुंगरे छुंडा दी और सह सुंगरो छुंड हुअ पागल और तिन्नां दैनीं दरैऊआ लै छाहळा, इहय करै सारअ सुंगरो छुंड हुअ पाणीं बिचै मरी करै खतम। 33 और तियां सुंगरा गुआळै तिधा का भागै और घरै नाशी खोजी तिन्नां सारी नगरी तिन्नां दुष्टआत्मा आळै आदमिंओ हाल कि किहअ-किहअ हुअ। 34 इन्नां गल्ला शुणीं सारी नगरीए लोग आरे यीशू मसीह सेटा और तिन्नां प्रभू यीशू सेटा एही अरज की कि म्हारै एऊ लाकै का नाश बागै।

### लकवेओ रोगी ठीक करनअ (मरकुस 2:1-12; लूका 5:17-26)

9 एता बाद नाटै यीशू मसीह तिधा का किशती दी पार आपणीं नगरी लै। 2 ता तिधी आरे कई लोग लकवे बमारी आळै, और लोगे आणें तियां प्रभू यीशू मसीह सेटा लै मांजै परंदे चकी, प्रभू यीशू तिन्नां विश्वास भाळी करै तेऊ एकी दरंगे मरीजा लै बोलअ, “बेटैया, हैळअ निं करी, तेरै पाप हुए माफ।” 3 इहय शुणीं करै तिधी आरे दै कई शास्त्री सोचअ आपणें मनै कि अह आसा लागअ द परमेश्वरे निंदा करदअ? 4 प्रभू यीशू बी हेरी तिन्नां मनै गल्ल भुझी, और तिन्नां लै बोलअ, “तम्हें लोग आपणें मनै बुरअ किल्है सोचा? 5 सान गल्ल किजै आसा, इहय बोळणअ कि तेरै पाप हुए माफ, या इहय बोळणअ कि ‘उझू हांददअ फिरदअ लाग?’ 6 पर एसा गल्ला लए तम्हें समझी कि मांहुँए शोहरू आसा पाप क्षमा करनेओ हक।” तेखअ यीशू मसीह लकवे मरीजा लै बोलअ, “उझू और आपणें एऊ मांजै चक, ता तेखअ नाश आपणें घरा लै।” 7 सबी उझुअ और नढैऊए लागअ सह हांददअ आपणें घरा लै। 8 एऊ चमतकारा भाळी करै लोग हैळुए और तियां लागै सोभ तेऊ परमेश्वरे भजना करदै, जुणीं मांहुँ लै इहय अधिकार दैनअ।

### मत्ती शादणअ

(मरकुस 2:13-17; लूका 5:27-32)

9 तिधा का आजू नाशी करै यीशू मसीह एक मत्ती नांऊंओ एक आदमीं चपै दी बेठअ भाळअ, सह करा त सरकारी कारे गराहणेंआओ काम, यीशू मसीह तेऊ लै बोलअ कि, “मूँह संघै चाल।” सह बी लागअ प्रभू पिछू हांददअ।

10 जाऊं प्रभू यीशू घरा भितरी रोटी खांदअ बेटअ, ता बडै भारी पापी लोग आऐ तेऊ सेटा लै और तेऊए चेलै संघै बेटै रोटी खांदै। 11 इहय भाळी करै फरीसी और शास्त्री प्रभू यीशू मसीहे चेलै लै बोलअ कि “थारअ गुरु पापी और कारै गराहणै आळै संघै किल्है बेशा खांदअ-पिंदअ?” 12 प्रभू यीशू इहय शुर्णी करै तिन्नां लै बोलअ कि “बैईद निं राम्बळै आदर्मी लै एछदअ, पर बमारा सेटा लाग़ा तेऊ पुजणअ जरूरी। 13 एता लै तम्हें नाशा और एतो अर्थ शिखळा: ‘हूँ निं बलिदान चाहंदअ पर हूँ चाहा दैया।’ किल्हैकि हूँ निं धर्मी शाददअ आथी आअ द, पर हूँ आसा पापी शाददअ आअ द।”

### ब्रतो सुआल

(मरकुस 2:18-22; लूका 5:33-39)

14 तैबै यहून्ना बपतिस्मैदैं आळेए चेलै प्रभू यीशू मसीह सेटा एछी करै बोलअ, “अह किजै कारण आसा कि हाम्हें और फरीसी करा एतरअ ब्रत, पर तेरै चेलै निं ब्रत करदै?” 15 प्रभू यीशू तिन्नां लै जबाब दैनअ, “बराती कै तेभै शोग करी सका जेभै दुल्हअ तिन्नां संघा हआ? पर तियां धैळै बी एछणें जेभै दुल्हअ तिन्नां का जुदअ करनअ, तेभै करनअ तिन्नां ब्रत। 16 कोरै झिकळैओ शाटअ निं पराणें झिकळै दी कोहै लांदअ, किल्हैकि सह शाटअ धेळा तेऊ पराणें झिकळै होर बी। 17 ठीक इहयई लोग निं नूऊंअ दाखरस पराणीं मशका दी डाहंदै, किल्हैकि इहय करी करै फूटा तियां मशका और दाखरस पोछिआ बागै और तियां मशका बी हआ जाऐ; पर नूऊंअ दाखरस भरा नूऊंई मशका दी इहय करै हआ तिन्नां दुही गल्लो बचाआ।”

### मूई दी शोहरी और बमार बेटळी

(मरकुस 5:21-43; लूका 8:40-56)

18 प्रभू यीशू त तिन्नां लोगा का इन्नां गल्ला करदअ ई लागअ द कि हेरा तिधी आअ एक फौजीओ सरदार और तेऊ किय प्रभू यीशू लै प्रणाम ता संघा बोलअ तेऊ इहय कि “हे प्रभू, मेरी शोहरी गई एभै-एभै जाऐ; पर तूह चाल मेरै घरा लै और तेसा दी डाह आपणअ हाथ, तै जाणीं सह जिऊंदी हई।” 19 प्रभू यीशू बी उझुअ और आपणें चेलै संघी लागअ तेऊ पिछू हांडदअ। 20 हांडदी-हांडदी हूअ इहय कि एक बेटळी आई; तेसा ती बाराह साला ओही खूना बहणें बमारी लागी दी। तेसा पिछू का एछी करै प्रभू यीशू झिकळैओ पालअ छुंअ। 21 किल्हैकि सह सोचा ती आपणें मने इहय कि ‘जै हूँ प्रभू यीशू झिकळै बी छुंई सके, तै जाणीं हूँ एसा बमारी का राम्बळी हई।’ 22 प्रभू यीशू पिछू फिरी करै तेसा लै नजर दैनी और तेसा लै बोलअ, “हैअ डाह, तेरै विश्वासै हेरी तूह एसा बमारी का राम्बळी करी।” इहय करै हई सह बेटळी तेभी राम्बळी। 23 जाऊं प्रभू यीशू तेऊ सरदार घरे पुजअ ता तिधी जाऊं लोग लेरद-पकारद और हालअ-गोल्लअ मचाऊंदै भाळे ता तैबै प्रभू यीशू तिन्नां लै बोलअ, 24 “दूर हटा, शोहरी निं मूई आथी! पर अह आसा सुती दी।” एसा गल्ला शुर्णी लागै तियां यीशू लै हासदै। 25 पर जाऊं लोगे भीळ तिधा का बागै काढी, तैबै प्रभू यीशू भितरा लै नाशी करै तेसा शोहरीओ हाथ ढाकअ और सह हुई नडैऊए जिऊंदी। 26 ता एसा गल्ले चरचा फैली तेऊ सारै देशै।

### दूई आंधै लै दृष्टीदान

27 जाऊं यीशू तिधा का आजू नाठअ ता दूई काणें आदर्मी तेऊ पिछू एही हाका पकारा लादी आऐ कि “हे दाऊदे शोहरूआ, हाम्हां लै बी कर दैया।” 28 जाऊं सह घरै पुजअ, ता तियां दुई काणें बी आऐ तेऊ सेटा लै और यीशू तिन्नां लै बोलअ, “तम्हां कै इहय विश्वास आसा कि हूँ सका एता करी?” तिन्नां बोलअ तेऊका इहय, “हां प्रभू।” 29 तैबै तेऊ तिन्नां आच्छी छुंई करै बोलअ, “थारै विश्वासै साबै लोळी तम्हां लै हआ।” 30 तेभी लागअ तिन्नां आच्छी का धेछदअ और प्रभू यीशू तिन्नां लै चतैनीगी दैई करे बोलअ कि “हेरे, धैन डाहै एसा गल्लो निं होरी कोही का लोळी थोघ लागअ।” 31 पर तिन्नां तिधा का नाशी करै फलाऊअ सारै देशै प्रभूओ गुणगान।

### एक कालअ ठीक करनअ

32 जाऊं तियां बागै तै नाशदै लागैद, ता हेरा तिधी आणअ लोगे प्रभू यीशू मसीह सेटा लै एक कालअ, तेऊदी त भूत-प्रेत शाचअ द। 33 जाऊं तेऊ काल्ले का भूत-प्रेत पोही निखळअ ता सह काल्ले लागअ गल्ला करदअ; और तिधी सोभ लोग हुऐ रहैन कि इहय चमत्कार निं एऊ इस्त्राएल देशै आझ तैणी कधी भाळअ। 34 पर फरीसी लागै इहय बोलदै कि अह काढा राखसा करै इन्नां भूता-प्रेता।

### मजदूर आसा थोळै

35 पर प्रभू यीशू रहअ नगरी और गराऊंए हांडदअ लागी और तिन्नें सभा दी उपदेशा करदअ, ता स्वर्ग राजो सुसमाचारा परचारा करदअ लागी और हर प्रकारे बमारी और कमजोरी दूर करदअ लागी। 36 जाऊं तेऊ लोगे भीळ हेरी ता तेऊ आई तिन्नां लै बडी भारी दैया, किल्हैकि तियां तै एही भेडा जिहै ब्याकुल और भटकै दै, जसरअ कोई रखबाली करनैआळअ निं आथी। 37 तैबै तेऊ आपणें चेलै लै बोलअ, “फसल पाकै दै खेच ता आसा खास्सै, पर मजदूर आसा थोळै 38 एता लै करा खेचे मालका का एही अरज कि आपणें खेचा लऊणा लै भेज बोळणअ मजदूर।

### यीशूए बारा चेलै

(मरकुस 3:13-19; लूका 6:12-16)

10 प्रभू यीशू मसीह आपणें बाराह चेलै आपू सेटा लै शादै और तिन्नां लै दैनअ दुष्टात्मां, भूता-प्रेता काढणेंओ अधिकार और शगती, ताकि तियां लोगे हरेक बमारी और कमजोरी दूर करी सके।

2 तिन्नां बाराह चेलै नांअ तै ईहै- शिमोन जसा लै पतरस बोला, और तेऊओ भाऊ आंदरिआस, जब्दीओ शोहरू याकूब, और तेऊओ भाऊ यहून्ना; 3 फिलिप्पुस, बरतुल्मी, थोमा और कारै गराहणें आळअ मत्ती और हल्फीओ शोहरू याकूब और तेऊओ भाऊ तदैई, 4 शमोन कनानी और यहूदा इसकरोती जुंणी प्रभू यीशू मसीह ढाकणें भङ्गळअ त।

### बारा प्रेरिते सेऊआ काम

(मरकुस 6:7-13; लूका 9:1-6; 10:4-12)

5 ईयां बाराह चेलै भेजै प्रभू यीशू मसीह इहय खोजी बोली करै कि यहूदी छाडी होरी लोगा सेटा निं नाशी और सामरी ज़ातीए नगरी लै बी निं नाशी। 6 पर इस्त्राएले घरानै ई नाशै लुकी दी भेडा सेटा, 7 और हांडदी-हांडदी करै इहय परचार कि स्वर्गो राज गअ नेळ एछी। 8 बमारे बमारी करै दूर ता मूँए दै करै जिऊंदै और कोहळै बमारी आळै करै रांबलै। दुष्टात्मां काढै दूर, तम्हां आसा मुफ्त भेटअ द और लोगा लै बी दैए एता मुफ्त। 9 आपणीं गांठळी निं सुन्नअ रुपअ और चाम्बअ डाही, 10 बाता हांडणां लै नां झोळी डाही, ना ता दूई कुरतै डाही, नां ता पूळे जोळी, नां हाथै शोठअ, किल्हैकि मजदूर लोळी तेऊए मजदूरी भेटी।

11 जहा नगरी और गराऊंए बी तम्हें नाशै, एसा गल्लो पतअ लणअ पैहलै करी कि तम्हां लै रहणै जोगी घर कुण आसा, और जेभै तैणीं तम्हें तिधा का नाई निखळै तेभै तैणीं रहै तम्हें तिधी। 12 ता, घरा भितरी नाशदी दैए तम्हें तेऊ लै आशिर्वाद। 13 जै तेऊ घरे लोग थारै आशिर्वाद जोगी होए, ता तै पळणीं थारी शांती तिन्नां लै, पर जै तियां तेता जोगी नाई होए, तै एछणीं सह शांती तम्हां लै बापस फिरी 14 तेखअ जुण तम्हां नाई मने और थारी गल्ला नाई शुणें, तेऊ घरा या तेसा नगरी का निखळदी बारी तुळकै आपणें खुरा का धूळअ बी पोही। 15 हूँ खोजा तम्हां का सच्चाई कि न्याये धैळी हर्णी तेसा नगरीए दशा सदोम-अमोरा का बी खासी मुशकळ।

### एछणें आळअ सांगट

(मरकुस 13:9-13; लूका 21:12-17)

16 हेरा, मंरे आसा लाऐ दै तम्हें छाडी भेडा जिहै बराघा बिचा लै, तम्हें रहै सरपा जिहै बुधिमान और कबूतरा जिहै भोळै। 17 पर लोगा का रहै बचदै,

किल्हैकि तिन्नां निणें तम्हें माहासभा दी और आपणीं चकहरी दी चिकणें तम्हें कोळें करै। 18 तम्हें निणें मेरी तैणीं प्रधाना और राजेए सहनै, तिन्नां लै और होरी जाती लै गुआह हणें तैणीं। 19 जेभै तियां तम्हां ढाके, तेभै निं तम्हें इहय हैळअ करी कि हाम्हां किहअ करै बोळणअ और किजै बोळणअ? जुंण बी तम्हां तिधी बोळणअ होए, सह हेरनअ तम्हां लै तेसाई घळी तम्हां का पबित्र आत्मां खोजी। 20 किल्हैकि बोळणें आळें निं तम्हें आथी; पर पिता परमेश्वरो पबित्र आत्मां बोला तम्हां बाती।

21 भाई करनअ भाई लै घात, ता बाप्पू करनअ शोहरू लै घात और शोहरू आळें उझणें आपणें आम्मां-बाप्पूए खलाफ हारदै-मारदै। 22 मेरें नांऊंआ करै हणें सोभ लोग थारै बैरी, पर जुंण अंत घळी तैणीं धीर धरे, तेऊओ हणअ उद्धार और सह तरनअ पार। 23 जेभै तियां एकी नगरी दी तम्हां तंग करे, ता तम्हें भागै दुजी नगरी लै। हूँ खोजा तम्हां का सच्चाई कि तम्हें निं इस्त्राएले सारी नगरी हांडी मुकणीं कि तेभै तैणीं जाणअ मांळूओ शोहरू एछी।

24 चेलअ निं आपणें गूरू का बडअ हंदअ और ना दास आपणें मालक का बडअ हंदअ। 25 चेलअ गूरूए और दास सुआमिंए बराबर हणअ आसा बडी भारी बडी गल्ल। जै तिन्नां घरे मालक लै ही शैतान बोलअ, ता तिन्नां तेउए घरआळें लै किल्है निं बोळणअ?

### कसा का उरनअ ?

(लूका 12:2-7)

26 पर तम्हें निं तिन्नां का उरी, किल्हैकि इहय निं किछें ढोपअ द आथी जुंण खोळणअ होए, और इहय निं किछें चोरी आथी डाहअ द, कि जेते जाणकारी निं आथी। 27 जुंण हूँ तम्हां लै पिठी पिछू बोला, तेउ बोलै तम्हें सोभी सहनै, और जुंण तम्हें काना पिछू शुणा, तेतो करै तम्हें कोठी परेंदै उखळी करै परचारा। 28 जुंण शरीरा लै घात करा, तियां निं आत्मा लै घात करी सकदै, तिन्नां का नि तम्हें डरी आथी, पर उरनअ सिधअ तेऊ का जुंण आत्मां और शरीर दुही नरकै नाश करी सका। 29 ढबै करै के दुई चेलीं निं बिकदी? तैबी परमात्मै इच्छा बगैर निं तिन्नां मांझै कोई एक बी माटी परेंदै पळदी। 30 थारै मुंडे शराळ बी आसा सोभ गिणेंदै। 31 इहय करै हैळिआ निं आथी, तम्हें आसा तिन्नां खासी चेली का बडी करै।

### यीशू मनणअ या नाई मनणअ

32 जुंण मूँह आदमीं सहनै नं, सह मनणअ सबगें मूँह बाप्पू सहनै, 33 पर जुंण मूँह आदमीं सहनै नाई मनै, तेऊलै करनअ मूँह बी बाप्पू सहनै नाई।

### यीशूए धरती एछणेंओ असर

(लूका 12:51-53; 14:26,27)

34 इहय निं समझा कि हूँ आसा धरती दी मेल-मलाप करदअ आअ द, हूँ निं मेल-मलाप करदअ आथी पर हूँ आसा तलबारा चलाऊंदअ आअ द। 35 हूँ आसा आअ द एते तैणीं कि मांळू तेऊए बाप्पू का और बेटी तेसरी आम्मां का, नुशा तेसरी शाशुई का जुदी करी सकूँ। 36 मांळूए बैरी हणें तेऊए घराई का।

37 जुंण आपणें आम्मां-बाप्पू लै मुखा जादअ प्रेम करा, सह निं मूँह जोगी आथी, और जसा आपणें शोहरू माठे मुखा जादें प्यारै आसा, सबी निं मूँह जोगी आथी। 38 जुंण आपणअ कूस चकी करै मूँह पिछू नाई हांढे, सबी निं मूँह जोगी आथी। 39 जुंण आपणअ प्राण बचाऊआ, तेऊका छुटणअ सह, और जुंण मेरै कारण आपणें प्राण शोटे, तेऊ भेटणअ सह।

### तबदळअ

(मरकुस 9:41)

40 जुंण थारअ अदरभाअ करा; सह करा मेरअ अदरभाअ; और जुंण मेरअ अदरभाअ करा, सह करा मेरै भेजणें आळेंओ अदरभाअ। 41 भबिष्यबगता जुंण भबिष्यबगता जाणीं करै अदरभाअ करे, तेउ भेटणअ भबिष्यबगता फल; और जुंण धर्मीं समझी करै धर्मींओ अदरभाअ करे, तेऊ भेटणअ धर्मींओ फल। 42 जुंण कोई इन्नां होछै मांजै एकी बी मेरअ चेलअ समझी करै

एक गल्लास ठांडे पाणिंओ पणेंऊए, हूँ खोजा तम्हां का सच्चाई कि तेऊ निं तेते फला पाणें का कोहै रोकी सकदअ।

### यीशू और यहून्ना बपतिस्मै दैणेंआळअ

(लूका 7:18-35)

11 जाऊ प्रभू यीशू मसीह आपणें चेलै लै आज्ञा दैई मुकअ, और तिधा का प्रभू यीशू मसीह नाठअ तिन्नां नगरी लै उपदेशा दैंदअ और परचारा करदअ।

2 यहून्ना बपतिस्मा दैणें आळें प्रभू यीशू मसीहे कामां समाचार शुणअ और आपणें चेलै तेऊ सेटा पुछदै भेजे कि, 3 “जुंण सह एछणें आळअ थिय, सह तूहैई आसा कि हाम्हें कसा होरी न्हैळें-भाळें रहूमै लागी?” 4 प्रभू यीशू मसीह तिन्नां लै उत्तर दैनअ कि, “जुंण बी तम्हें शुणा और भाळा, तिन्नां सोभी गल्ला खोजा यहून्ना सेटा नाशी करै 5 कि काणें लागै भाळें और लैंगळें लागै हांढे, कोहळी हुए कोहळे बमारी का राम्बळें और टऊणें लागै शुणदै, मूणें दै करा जिऊंदै और कंगाळा का शणाऊआ खुशखबरी। 6 धन्य आसा सह जुंण मेरै बच्चा ठोकर नां खाए।”

7 जाऊं तियां तिधा का नाठे, ता प्रभू यीशू मसीह बोलअ यहून्ने बारै इहय कि “तम्हें जंगलै किजी भाळें नाठे तै? बागरी करै चुकदी डाळी? 8 तै तम्हें किजू भाळें नाठे तै? भाळा, जुंण नरम झिकळें बाह्ना, तियां रहा राज महलै। 9 तै किल्है नाठे तै? कसा भबिष्यबगता हैरै? हां, हूँ खोजा तम्हां का सच्चाई कि तम्हें नाठे भबिष्यबगता का बी बडै भाळें।”

10 अह आसा सहई जसरे बारै इहय आसा लिखअ द कि, “भाळा मंरें भेजअ आपणअ दूत आजू-आजू, तेऊ बणाणअ ताह आजू-आजू रसतअ।” 11 “हूँ खोजा तम्हां का सच्चाई कि, जुंण बेटळी का जल्मै दे आसा, तिन्नां बिचै निं यहून्ना बपतिस्मै दैणें आळें का बडअ कोहै आथी, पर जुंण स्वर्गें राईसी दी होछै का होछअ आसा, सह आसा तेऊ का बडअ। 12 यहून्ना बपतिस्मा दैणेंआळें बगता ओही एभे तैणीं दैनअ स्वर्गें राईसी दी नाशणां लै बडअ भारी ज़ोर, पर बलबान पाआ तेऊ छडैऊई। 13 यहून्ना तैणीं रहै सारै भबिष्यबगता बिधि बधाने भबिष्यबगतीं करदै लागी, 14 तम्हें मना चाए ना मना, एलिया जुंण एछणें आळअ त, सह आसा अहैई। 15 जसरे शुणणा लै कान होए सह शुणें।

16 एऊ जमाने लोगा हूँ किहै खोजुं कि किहै आसा? तियां आसा तिन्नां बालबच्चै जिहै जुंण बजारै बेशी करै एकी दुजे लै हाका लाई बोला इहय कि, 17 “हाम्हें बाजी तम्हां लै बशूरी और तम्हें निं नाचै, हाम्हें पाई लेरा पकारा पर तम्हें निं आपणीं हीक पटाकी। 18 किल्हैकि यहून्ना नां ता खांदी आअ, नां पिंदी, और तियां बोला तेऊलै इहय कि तेऊ दी आसा दुशटत्मा? 19 मांळूओ शोहरू आअ खांदी-पिंदी, और तियां बोला इहय कि, “भाळा, पेटू और शराबी मांळू, चूंगी लगै आळें और पापीओ साथी; पर ज्ञान हेरअ आपणें कामां दी सचअ बणाई।

### बिश्वास नाई करनै आळें लै हाय

(लूका 10:13-15)

20 तैबे प्रभू यीशू मसीह तिन्नां नगरीए बारै बोलदअ लागअ जेथ तेऊ बडै भारी सामर्थी काम कियै तै; और तिन्नां आपणअ मन नि मैची बी बदळअ आथी। 21 खुराजीना लै हाय, बैतसैदा लै हाय, जुंण सामर्थे काम तम्हां दी किये, जै तियां सूर और सैदा दी किये हंदै, तिन्नां बाह्णीं ती टाट और छारे रूळी परेंदै बेशी करै फरेऊणअ त तिन्नां आपणअ मन पापा का दूर। 22 पर हूँ खोजा तम्हां का सच्चाई कि न्याये धैळी हणीं थारी दशा सूर और सैदे दशा का मुशकळ सैहणा लै। 23 हे कफरनहूम, तूह कै स्वर्गें तैणीं उछटअ लाअ करी? पर तूह नाशणअ अधोलोका तैणीं उंधे; जुंण सामर्थे काम ताह दी किये दै आसा, जै तियां सदोमा दी किये हंदै ता सह रहणअ त आज्ञा तैणीं बणीं। 24 पर हूँ खोजा तम्हां का सच्चाई कि, “न्याय करने धैळी हणीं तेरी दशा सदोम देशे दशा का बी मुशकळ सैहणीं।

### बोझा दी दाभूरे दै लोगा लै आराम

(लूका 10:21,22)

25 एता बाद तेभी प्रभू यीशू मसीह बोलअ, “हे पिता, स्वर्ग और धरतीए मालक, हूँ करार तेरअ धन्यवाद कि तंरें डाही ईयां गल्ला ज्ञानी और समझदारा का चोरी और बाल-बच्चे दी की तंरें प्रगट। 26 हां बाप्पू, किल्हैकि ताह भांऊंआ इहयई।”

27 “मेरै बाप्पू आसा सभाळी दी मुखा सोभ गल्ला; और शोहरु निं बाप्पू का सूआई कोहै बछेणदअ, और बाप्पू बी निं कोहै बछेणदअ पर शोहरु बछेणां तेऊ और तियां बी बछेणा जसा दी शोहरु प्रगट करनअ चाहे।”

28 “हे मेन्धी लोगो, और बोझे बगारी दी थकै दै लोगो, मूँह सेटा लै एछा, हूँ दैऊं तम्हां लै बिश्राम।” 29 “मेरअ जूँ चका आपणीं कान्हा, और मुखा शिखळिआ; किल्हैकि हूँ आसा नम्र और दिला का भोळअ, और तम्हां भेटणअ आपणै-आपणै मनै बिश्राम। 30 किल्हैकि मेरअ जूँ आसा सान और मेरअ बोझअ आसा हळकअ।”

### सबते धैळीओ प्रभू

(मरकुस 2:23-28; लूका 6:1-5)

12 तेसा धैळी त यीशू मसीह सबते धैळी खेचा बिची लागअ द हांढदअ ता तेऊए चेलै ती आई दी भुखै, और तियां लागै सील चोळी-मरोळी करै खांदै। 2 तिन्नां चेलै इहय करदै भाळी करै फरीसी प्रभू यीशू लै बोलअ कि, “भाळ, तेरै चेलै आसा लागै दै सबते धैळी ईहै कामां करदै; जुंण एसा धैळी करनअ ठीक निं आथी।” 3 प्रभू यीशू तिन्नां लै जबाब दैनअ, “तम्हें इहय निं पहळअ आथी कि दाऊदैं कै किय त जेभै सह और तेऊए साथी भुखै थियै? 4 सह किल्है नाठअ परमेश्वरे घरै? और तेऊ किल्है खाई बेदी दी चढाऊई दी रोटी? जसा रोटी याजका का सूआई होर आदमीं नां ता खाई सकदअ त और नां तेऊए साथी खाई सकदैं तै? 5 तम्हें कै बिधी बधाना दी इहय पळहअ निं आथी कि, याजक हआ सबते धैळी मांदरा दी बिधी बधाना चोळी करै बी निरदोष। 6 पर हूँ खोजा तम्हां का सच्चाई कि ईधी आसा सह; जुंण मांदरा का बी बडअ आसा! 7 जै तम्हें एतो मतलब समझदैं कि हूँ हआ दैया करै खुश, बळीदाना करै निं हूँ खुश हंदअ, तै निं तम्हां निर्दोशा आदमीं दोशी बणादैं तै। 8 मांछूओ शोहरु आसा सबते धैळीओ बी मालक।”

### मछैऊंरें दै हाथो आदमीं ठीक करनाअ

(मरकुस 3:1-6; लूका 6:6-11)

9 तिधा का नाठअ सह तिन्नें सभा घरा लै; 10 ता तिधी त एक आदमीं इहय, तेऊओ हाथ त मछैअ द; और तिन्नें लोगे प्रभू लै दोषा लागेणै तैणीं प्रभू का सुआल किय कि ‘सबते धैळी कै एऊओ लाज करनअ ठीक आसा?’ 11 तैबै प्रभू यीशू तिन्नां का पुछअ, “तम्हां बिचै इहय कुंण आसा कि जसा का एकै भेड़ होए और सबते धैळी पळे सह भेड़ डेका और सह निं तेसा सबते धैळी काढदअ? 12 भला, माहणुंओ मोल भेड़ा का केतरअ खास्सअ आसा?; इहय करै आसा सबते धैळी भलाई करनीं ठीक।” 13 तेखअ प्रभू यीशू मसीह तेऊ मांछू लै बोलअ कि आपणअ हाथ कर आजू, तेऊ आपणअ हाथ प्रभू सेटा आजू किय और सह हाथ हुअ दुजै हाथा जिहअ ठीक-ठाक रांबळअ। 14 तैबै फरीसी बागै नाशी करै प्रभू यीशूए खलाफ आप्पू बिचै ईहै जोगा करदैं लागै की कि हांम्हां पाणअ त अह किहअ करै मारी।

### परमेश्वरो छांटाअ द सेबक

15 प्रभू यीशू हेरी अह गल भुझी और सह लागअ तिधा का हांढदअ और बडै भारी लोग लागै तेऊ पिछू हांढदैं और प्रभू यीशू किये तियां सोभ दाह-बमारी का राम्बळै। 16 और तिन्नां लै डाहअ चतेनगी दैई करै इहय खोजी बोली कि मेरै बारै निं होरी का खोजी; 17 ताकि जुंण बचन याशयाह भबिशयाबाणीं करनै आळै बोलअ त; सह पूरअ हई सके कि,

18 “भाळा, अह आसा मेरअ सेऊआकार जुंण मंरें छांटाअ द आसा, अह आसा मेरअ प्यारअ, जसा करै हूँ खुश आसा, मूँह पाणअ आपणअ आत्मां एऊ दी और तेऊ दैणअ होरी सोभी जाती लै न्यायेओ समाचार।

19 तेऊ नां झगळअ करनअ, नां लेर पकार पाणीं और ना ता कसा का हाटै-बजारै तेऊए बोल शुळणै।

20 तेऊ निं जैटी दी नगाळै चोळणी और नां धुँआ दैदी बाती तेभै तैणीं शेऊणीं, जेभै तैणीं न्याये जीत ना होए;

21 और होरी सोभी जाती डाहणीं तेऊ दी आशा।”

### यीशू और बाआलजबूल

(मरकुस 3:20-30; लूका 11:14-23)

22 तैबै लोगे एक काणअ और काळअ आदमीं आणअ, तेऊ दी थिय भूत-परेत शाचअ द। प्रभू यीशू मसीह किय सह रांबळअ ता सह लागअ तेभी भाळअ और गल्ला बाता करदअ। 23 प्रभू यीशू हेरी अह गल्ल भुझी और सह लागअ तिधा का हांढदअ और बडै भारी लोग लागै तेऊ पिछू हांढदैं और प्रभू यीशू किये तियां सोभ दाह-बमारी का राम्बळै। 24 पर फरीसी बोलअ एसा गल्ला शुणीं करै प्रभू यीशू लै इहय कि अह निं भूता परेते राजै शैताना बिणहीं इन्नां बुरी आत्मा और भूता-परेता काढी सकदअ! 25 प्रभू यीशू मसीह तिन्नें मनै गल्ल भुझी करै तिन्नां लै बोलअ, “जसा राईसी दी फूट पळा, तेसा राईसीओ हआ बनाश और कोई बी नगरी या खानदान; जसा दी फूट पळा, सह निं कधी बणदअ। 26 इहय करै; जै शैतान ही शैताना भगाऊए, ता तै हणअ सह इहय करै आपणअ ही बरोधी, तेखअ तेऊओ राज किहअ करै रहणअ बणीं? 27 जै हूँ शैताने सहाईता करै बुरी आत्मा काढा, तै थारै बंश कसरी सहाईता करै काढा? इहय करै भरनअ तिन्नांई थारअ लेखअ-जोखअ। 28 पर जै हूँ परमेश्वरे सहाईता करै दुष्टात्मा काढा, तै गअ परमेश्वरो राज तम्हां सेटा पुजी। 29 कोहै आदमीं निं कसा आप्पू का जादैं बलबान आदमींए घरै लूट-पाट करी सकदअ, जेभै तैणीं कि सह तेऊ बलबाना बाही ना लए? तेखअ सका सह तेता बाद तेऊओ घर लुटी। 30 जुंण मूँह संघे नाई आथी, सह आसा मेरै बिरोधा दी, और जुंण मूँह संघे नाई झाळदअ सह पा छिगी। 31 तैहीता हूँ तम्हां का सच्चाई खोजा कि, ‘मांछूओ सोभी परकारो पाप और निंदा हणै माफ, पर आत्मै निंदा करनीं निं माफ हणीं।’ 32 “जुंण बी मांछूए शोहरुए खलाफ कोई गल्ला करे, तेऊओ पाप सका माफ हई, पर जो कोई पबित्रात्मै खलाफ किजै बोले, तेऊओ अपराध एऊ लोकै ता कै चालअ माफ हई पर परलोकै बी निं सह माफ हआ।”

### पेळ और तेतो फळ

(लूकाआ 6:43-45)

33 “जै पौधे लै तम्हें रांबळअ बोला, ता तै बोला तेते फळा लै बी रांबळअ, कि बोला पौधे लै नकाम्मअ, किल्है कि पौधअ बछेणींआ तेते फळा करै।”

34 “हे सांणे शोहरुओ, तम्हें बूरै हई करै किहअ करै सका शोभली गल्ला बोली? किल्है कि जुंण मनै भरअ द हआ सहई एछा खाखा दी।” 35 “भलअ आदमीं काढा आपणै मनै भलै भडारा का भली गल्ला, और बूरअ आदमीं काढा आपणै मनै बूरै भडारा का बुरी गल्ला। 36 हूँ खोजा तम्हां का सच्चाई कि, जुंण नकाम्मीं गल्ला आदमीं बोळणीं; न्याये धैळी लागणअ तिन्नां हरेकी गल्लो लेखअ जोखअ दैणअ। 37 किल्हैकि तूह हणअ आपणीं गल्ला करै ही नरदोष और आपणीं ई गल्ला करै हणअ तूह दोषी।”

### स्वर्गिय चिन्हें मांग

(मरकुस 8:11, 12; लूका 11:29-32)

38 एसा गल्ला लै कई शास्त्री और फरीसी प्रभू यीशू लै बोलअ, “ हे गुरु, हांम्हें चाहा ताखा एक चिन्ह भाळणअ।” 39 प्रभू यीशू तिन्नां लै उत्तर दैनअ, “एऊ जुगै हआ बूरै, कंजरै लोग चिन्हां लोळै लागैदैं; पर योना भबिष्याबगते चिन्हां छाडी निं तिन्नां लै होर कोई बी चिन्ह भेटणअ। 40 योना रहअ चिई राची और चिई धैळी पाणीं जैदरी माहछे पेटै, तिहअई रहणअ मांछूओ शोहरु बी चिई राची धैळी धरती भितरी। 41 निनबे लोगा लागअ न्याये धैळी एऊ

जुगे लोगा संघे बेशी इन्नां लै दोष, किल्हैकि तिन्नें बदळअ आपणअ मन योने परचारा शुणी करै और हेरा, ईधी आसा सह जुंण योना का बडअ बी आसा।” 42 दखण देशे राणीं बी लाणअ न्याये धैळी एऊ जुगै लोगा संघे उझूई करै इन्नां लै दोष, किल्हैकि सह आई सुलैमाने ज्ञाना शुणी धरतीए दुजै कनारै का, और भाळा, ईधी आसा सुलैमाना का बी बडअ।

### अधूरै सुधारा कर बिबती (लूका 11:24-26)

43 जाऊं अशुध आत्मा मांहुं का पोर्ही निखळा, ता सह लागा शुकी जैगा आप्पू लै आरामा लोळी; पर तेसा नि आराम भेटदअ। 44 तेखअ बोला सह इहय कि मूँह नाशणअ आपणै तेऊई घरै, जिधा का हूँ निखळी दी आसा, और बापस एछी करै सह भाळा इहय कि सह घर आसा शुनअ और शुहण शळैळन आसा एथ दैनी दी और घर आसा सजअ-सजाऊअ द। 45 तेखअ आणा सह आप्पू का बी बूरी-बूरी सात दुष्टआत्मा आप्पू संघे होर शादी और तियां लागा तेथ पेशी करै रंहदी-बसदी, और तेऊ मांहुं हूँ आ पैहलै का बी जादी बूरी दशा; एऊ जुगे बूरै लोगे दशा बी हणीं एही।

### यीशूए आम्मां और भाई (मरकुस 3:31-35; लूका 8:19-21)

46 जाऊं प्रभू यीशू भीळा जैदरी इन्नां गल्ला करदअ लागअ द थिय, ता तेऊए आम्मां और भाई तै बागै खहळुए दै, और तियां चाहा तै तेऊ संघे गल्ला करनीं।” 47 एकी बोलअ प्रभू सेटा एछी करै इहय कि, भाळ, तेरी आम्मां और तेरै भाई आसा बागै खहळुए दै, और ताह संघे चाहा तियां गल्ला-बाता करनीं। 48 इहय शुणीं करै प्रभू यीशू तेऊ लै उत्तर दैनअ; “मेरी आम्मां कुण आसा? 49 और मेरअ भाई कुण आसा? तेखअ प्रभू आपणै चेलै बारखा हाथ करी करै बोलअ, ‘ईयां आसा मेरै आम्मां और भाई।’ 50 किल्हैकि जुंण मेरै सबणै रहणै आळै बाप्पूए ईछा दी चले तियांई आसा मेरै भाई, बैहणीं और आम्मां।”

### बेजै बऊणै आळैओ द्रष्टांत (मरकुस 4:1-9; लूका 8:4-8)

13 तेसाई धैळी प्रभू यीशू मसीह घरा का निखळी करै बेठअ दरैऊए कनारै। 2 प्रभू यीशू मसीह सेटा हुअ एतरअ खासअ झाळअ कठा कि सह बेठअ किशती दी और सारी भीड़ रही दरैऊए कनारै खहळुई। 3 ता प्रभू यीशू मसीह दृष्टांता दी बडी भारी गल्ला बोली कि, “भाळा, एकी बगती एक बेजै बऊणै आळअ निखळअ बेजै बऊंदअ, 4 बेजै बऊंदी थोळअ बेजअ पळअ बाते कनारै दी और सह चुंघअ चेलू परखीरू। 5 थोळअ बेजअ पळअ शकरीली जिमीं दी, जिधी खासअ माटअ नाई त आथी, सह बेजअ निं दुघै माटै दी पळअ और सह टिपअ सिजना का पैहलै; 6 ता जाऊं सुरजो धुपअ टिपरु दी पळअ; तिन्नां टिपरुए पाकै जलैळै नाई हणैए बज्हा तियां टिपरु शुके। 7 इहयई थोळअ बेजअ पळअ झाकळै, ता जाऊं सह बेजअ टिपअ ता सह दाभूअ कांडै-रिंडे झाकळा जैदरी। 8 पर धख बेजअ पळअ रजदी-पजदी जिमीं दी, ता तिन्नां दी लागी खासी फसल, कोई शौ गुणा, कोई शाट गुणा और कोई तिह गुणा पजैया। 9 जसरै कान आसा सह शुणै।

### द्रष्टांतो उपदेश (मरकुस 4:10-12; लूका 8:9,10)

10 ता चेलै प्रभू सेटा एछी करै इहय बोलअ, “तूह इन्नां संघे दृष्टांता दी किल्है करा गल्ला?” 11 प्रभू यीशू मसीह तिन्नां लै उत्तर दैनअ, “तम्हालै आसा सबर्ग राजो भेद समझाऊअ द पर इन्नां का नि आथी?” 12 किल्हैकि जसा का आसा, तेऊ लै दैणअ होर बी; ता तेऊका हणअ खासअ, ता, जसा का किछै निं आथी, तेऊका लणअ सह बी बापस जुंण किछ तेऊका होए बी।” 13 हूँ करा तिन्नां संघे दृष्टांता दी एते तैणीं गल्ला कि तियां निं हेरी करै बी हेरदैं और शुणीं करै बी नि शुणदैं और नां समझदैं। 14 तिन्नें बारै आसा याशायाह भबिष्याबगता इहय बोलअ द कि,

“तम्हां काना का ता शुळणअ पर तम्हां समझ निं पळणीं। आच्छी का ता तम्हां भाळणअ पर तम्हां का नि धेछणअ आथी।

15 किल्हैकि इन्नां लोगो मन आसा गअ द पाथर हूई और काना का शुणा तियां उछटअ, और तिन्नें आसा डाही दी आपणीं आच्छी मुंदरी कि इहय नि हूआ कि तियां आच्छी करै भाळे, और काना करै शुणै और मना का समझे, और तियां बापस फिरे और हूँ तिन्नां चांगअ करुं।” 16 पर भागा आळी आसा थारी आच्छी, कि तिन्नां का धेछिआ, और भागा आळै आसा थारै कान तिन्नां का शुणिआ। 17 तैहीता हूँ खोजा तम्हां का सच्चाई कि, “कई भबिष्याबगता और धर्मी चाहअ इहय कि जुंण गल्ला तम्हां का धेछिआ, तम्हें भाळे, पर नाई भाळी, और जुंण गल्ला तम्हें शुणां, तम्हें शुणै, पर नाई शुणीं।

### बेजै बऊणै आळै द्रष्टांत समझाऊणाअ (मरकुस 4:13-20; लूका 8:11-15)

18 ऐबै शुणां तम्हें बेजै बऊणै आळैए दृष्टांतो फल। 19 जुंण कोई राईसिओ बचन शुणीं करै नाई समझा, तेऊए मनै जुंण बी बऊअ द थिय, तेऊ निंयंां सह दुष्ट शैतान छडैऊई, अह आसा सहई बेजअ जुंण बाते कनारै थिय बऊअ द। 20 ता जुंण शकरीली जिमीं दी बऊअ त, अह आसा सह जुंण बचन एकदम खुशी-खुशी मना, 21 पर आप्पू दी पाकअ जलैळणै निं दैदअ, और अह आसा थोळै इ धैळैओ, और जाऊं तेऊलै बचन मनणै कारण दुख तकलिफ और उपद्रब हूआ, ता तेऊ लागा इहय करै छेकै टोहळ। 22 जुंण बेजअ झाकळै पळअ त, अह आसा इहय जुंण बचन ता शुणां पर एऊ संसार चिंता फिकर और धन माये धोखै करै सह बचन दाभिआ; सह निं पजैया दैदअ आथी। 23 जुंण बेजअ रजदी पजदी जिमीं दी पळअ, अह आसा इहय, जुंण बचन शुणीं करै समझा और सह दैआ खासी पजैया, कोई शौ गुणा, कोई शाट गुणा, और कोई तिह गुणा।

### जंगली बेजेओ द्रष्टांत

24 तैबै प्रभू यीशू मसीह तिन्नां का एक होर दृष्टांत खोजअ, कि स्वर्ग राज आसा तेऊ मांहुं जिहअ, तेऊ बऊअ आपणै खेचै बधिया बेजअ, 25 पर जाऊं लोग सुतै द थिये, तिन्नें बैरी एछी करै डाहै गिंहुं जैदरी जंगली लबहरै बऊई। 26 जाऊं टिपरु लागै और सील निखळै, तैबै लागै तियां जंगली लबहरै दाणै बी धेछदैं, 27 एता भाळी तेऊए घरे सेऊआ चाकरै तेऊ सेटा लै एछी करै बोलअ, “हे मालक, तंए कें आपणै खेचै बधिया बेजअ निं बऊअ त? तै ईयां जंगली दाणैए डाळ किधा का आए? 28 तेऊ तिन्नां लै बोलअ, “अह आसा कसा बैरीओ काम।” तिन्नें सेऊआकारै तेऊ लै बोलअ, “ ऐबै तूह किजै बोला, हाम्हें तिन्नां गिंहुं बिचा का पेची करै कठा करीए?” 29 तेउ तिन्नां लै बोलअ, “इहय निं करी, इहय निं हूआ कि जंगली दाणै आळै डाळा कठा करदी बारी राम्बळै गिंहुंए दाणैए डाळ बी झोठिआ। 30 लऊणै तैणीं दैआ इन्नां दुही संघा-संघा बझणै, लऊणैए समै बोळणअ मूँह काटणै आळै लै इहय कि पैहलै इन्नां जंगली लबहरै पूळै बाह्ना जाळणा लै कठा और बाकि राम्बळै गिंहुं करा मेरै भडारै कठा।”

### राईए बेजेओ द्रष्टांत (मरकुस 4:30-32; लूका 13:18,19)

31 और एता बाद प्रभू यीशू मसीह तिन्नां लै एक होर दृष्टांत खोजअ कि स्वर्गो राज आसा एक राईए दाणै जिहअ, सह बऊअ एकी मांहुं आपणै खेचै, 32 सह सोभी बेजै का होछअ ता आसा पर जाऊं सह बढा, सह हूआ सोभी शाग पाचा का बडअ और सह बणां इहय बूट कि सरगे चेलू-परखीरू बी करा तेते शाह्णटी दी बसेरअ।

### सजेळैओ द्रष्टांत (लूका 13:20,21)

33 और प्रभू तिन्नां लै एक होर दृष्टांत खोजअ कि ,स्वर्गो राज आसा सजेळै जिहअ कि एकी बेटळी सह सजेळअ निंयं और चिई सेर पिठै बिचै सह मुछअ ता थोळी घळी बाद बणअ सह सारअ मुछअ द पिठअ सजेळअ।

### द्रष्टांतो इस्तेमाल (मरकुस 4:33, 34)

34 ईयां सोभ गल्ला खोजी प्रभू यीशू दृष्टांता दी और सह निं बिणा दृष्टांता बोली तिन्नां लै एक गल बी बोलदअ त। 35 तै कि जुंण बचन याशयाह भबिष्याबाणीं करनै आळै बोलअ त सह पूरअ होए कि,  
“मूँह खोळणीं आपणीं खाख भजाहणीं बोळणा लै, और तियां गल्ला करनीं मूँह प्रगट जुंण संसारे उत्पति ओर्ही गुप्त आसा रही दी।”

### जंगली बेजेओ द्रष्टांत समझाउणअ

36 तैबै प्रभू यीशू मसीह तिन्नां लोगा बिचा का घरा लै आअ और तेऊए चेलै तेऊ सेटा एछी करै बोलअ कि, “खेचा दी जंगली लबहरेओ दृष्टांत समझाऊ हांम्हां का। 37 प्रभू यीशू तिन्नां का समझाऊअ कि, “बधिया बेजे बऊणें आळअ आसा मांहुंओ शोहरू। 38 खेच आसा अह संसार, और बधिया बेजेअ आसा तम्हां जिहै स्वरगराजे पूत्र। और जंगली लबहरे आसा दुष्ट शैताने पूत्र। 39 जुंणीं बैरी तियां बऊए, सह आसा शैतान; लऊणेंओ बगत आसा एऊ संसारो अत और काटणें आळै आसा स्वरगदूत। 40 जिहै जंगली लबहरे कटा करी करै ज़ाळा, तिहअई हणअ एऊ संसारे अंता दी। 41 मांहुंए शोहरू भेजेणें आपणें स्वरगदूत; और तिन्नां करनै तेऊए राईसी का सोभ बूरे करनै आळै, कूकरम करनै आळै कठा। 42 और तियां पाणें आगीए कुंडा दी, ता तिधी हणअ सिधअ लेरनअ और दांद पिशणअ। 43 तेभै चमकणें धर्मी आपणें पिता परमेश्वरे राजा दी सुरजा जिहै, जसरै कान आसा, सह लए शुणीं।”

### गुप्त खजानेंओ द्रष्टांत

44 स्वर्गो राज आसा खेचै दाबी दी धनमाया जिहअ जुंण एकि मांहुं माया भेटी और सह डाही तिधी दाबी और खुशीएे मारै लअ तेऊ सह खेच मोलै आपणअ सोभ किछ बेची करै।

### अनमोल मोतीओ द्रष्टांत

45 स्वरगो राज आसा एक बपारी जिहअ जुंण सोभी का बधिया मोती लोळअ त लागअ द। 46 जांऊं तेऊ एक अनमोल मोती भेटअ, ता तेऊ पाअ आपणअ सोभ किछ बेची तेऊ मोती लणां लै।

### जाळो द्रष्टांत

47 ता स्वर्गो राज आसा एकी बडै ज़ाळा जिहअ, जुंण समूंदरै पाअ और तेथ शाची सोभी रंगे माहछली, 48 जांऊं सह भरुअ, ता सह आणअ कनारै लै खिची, तेता का बधिया-बधिया ता भरी टोकरी दी और नकाम्मीं-नकाम्मीं शोटी ढेका। 49 संसारे अंता दी हणअ इहयई; स्वरगदूता करनै स्वर्गा का एछी करै दुष्ट धर्मी का जुदै और तियां पाणें आगीए कुंडा दी। 50 तिधी हणअ सिधअ लेरनअ और दांद पिशणअ।

### पराणीं और नऊई शिक्षो महत्व

51 तम्हें ईयां गल्ला समझी बी कि नाई? 52 तिन्नां प्रभू लै बोलअ, “हां” और प्रभू तिन्नां लै बोलअ, “तैहीता हर शास्त्री जुंण स्वर्गो राजो चेलअ बणअ द आसा, सह आसा तेऊ भडारी जिहअ, जुंण आपणें भडारा का नऊई पराणीं चिजा काढा।

### नासरतै यीशूओ अनादर (मरकुस 6:1-6; लूका 4:16-30)

53 जांऊं प्रभू यीशू इन्नां सोभी दृष्टांता खोजी मुकअ, तेखअ लागअ सह तिधा का हांडदअ, 54 और आपणें देश एछी करै लागअ तिन्नां सभा दी ईहै उपदेशा दैदअ कि तियां हूरे रहैन और बोलदें लागै कि, “एऊ अह जैन और सामर्थे काम किधा का भेटे? 55 अह कै बडईओ शोहरू निं आथी? एऊए आम्मां नांअ मरिअम निं आथी? और एऊए भाई नांअ याकुब और युसफ,

शमोन और यहूदा निं आथी? 56 एऊए सारी बैहणीं कै हांम्हां बिचै निं आथी? ता तै एऊ ईयां सोभै गल्ला किधा का भेटी?

57 तिन्नां लागी तेऊए कारण ठोहळ, पर प्रभू यीशू मसीह तिन्नां लै बोलअ, “भबिष्याबगतो अदर भाअ निं सिधअ तेऊए आपणें घरै और आपणें देशे हंदअ, पर होरती हआ सारै दी। 58 तियां निंसै विश्वास करी और प्रभू यीशू बी निं तिधी तेखअ जादै सामर्थी काम कियै आथी।

### यूहन्ना बपतिस्मै दैणें आळै हत्या (मरकुस 6:14-29; लूका 9:7-9)

14 तिन्नां धैळै, चौथाई देशे राजै हेरोदेसै प्रभू यीशूए बारै बडी चरचा शुणीं; 2 और तेऊ आपणें सेऊआकारा लै बोलअ कि अह आसा यूहन्ना बपतिस्मै दैणेंआळअ और सह हुअ मरी करै जिऊंदअ, तैहीता एऊ का एतरै सामर्थी काम प्रगट हआ।

3 किलहैकि हेरोदेसै पाअ त यूहन्ना आपणें भाई फिलिप्पुसे लाळी हेरदिआसा पिछू शांघळी लोहै लाई जेहलखानै दी। 4 इहय किय तेऊ तै कि यूहन्ना बोलअ त राजै लै इहय कि आपणें भाईए बेटळी डाहणीं निं तालहै ठीक आथी। 5 हेरोदेस राजअ ता चाहा त यूहन्ना मारनअ पर सह डरा त लोगा का तै कि लोग मना तै यूहन्ना भबिष्याबगता।

6 पर जांऊं हेरोदेसो जल्म धैळअ आअ, ता हेरदिआसे शोहरी किय राजअ तेऊ पर्बा दी आपणअ नाच रहैऊई करै खुश; 7 और राजै दैनअ तेसा लै बचन कि, जुंण किछ बी तूह मांगे, मूँह दैण सह तालहै। 8 सह शोहरी ती तेसरी आम्मां डाही दी शगरेऊई और तेसा बोलअ राजै लै इहय की मुल्है आण यूहन्ना बपतिस्मै दैणेंआळैओ मूंड एभी काटी करै। 9 राजअ हुअ ता बडअ दुखी पर आपणें बचन और तिधी बेठै दै पाहणें पिछू दैनीं तेऊ आज्ञा कि एसा लै दैआ जुंण एसा लोळी। 10 ता जेहलखानै लै आपणें सपाही भेजी करै यूहन्ना कैंळअ पाअ काटी; 11 और थाळा भितरी आणअ तेऊओ मूंड संघा दैनअ तेसा शोहरीए हाथै और तेसा नियं सह आपणीं आम्मां सेटा लै। 12 तेखअ यूहन्नां चेलै निई तेऊए ल्हास और तिन्नां डाही सह दाबी और तिन्नां भेजेअ एतो फैंळअ प्रभू यीशू मसीह लै बी।

### पांजा हजारा मरधा का रोटी खैऊणीं (मरकुस 6:30-44; लूका 9:10-17; यूहन्ना 6:1-14)

13 जांऊं प्रभू यीशू इहय शुंणअ ता सह किशती दी बेशी करै नाठअ एकी सुनसान जैगा लै कांत और इहय शुणीं करै लोग आए नगरी का तेऊ पिछू पैदल तेऊ सेटा लै। 14 प्रभू यीशू लोगे एक बडी भीड भाळी ता तिन्नां लै आई तेऊ बडी भारी दैया और प्रभू कियै तिन्नां बमार आदमीं हर बमारी का दूर।

15 जांऊं साह पळी ता तेऊए चेलै तेऊ सेटा एछी करै बोलअ, “अह आसा बडी सुनसान जैगा और धैळअ बी गअ उडी, इन्नां लोगा कर बिदा ताकि ईयां किधी गरांऊए आपू लै रोटीओ ईतजाम करी सके।” 16 प्रभू यीशू तिन्नां लै बोलअ, “ईनों नाशणअ निं जरूरी आथी, तम्हेंई दैआ इन्नां लै रोटी खाणा लै।” 17 तिन्नां चेलै प्रभू लै बोलअ, “हाम्हां सेटा निं ईधी दुई रोटी और माहछली छाडी होर किछै आथी।” 18 प्रभू तिन्नां लै बोलअ, “ तिन्नां आणा मूँह सेटा लै।” 19 तेबै प्रभू लोगा लै घाहा परेंदें बशैळना लै बोलअ, और पांज रोटी और दुई माहछली हाथै ढाकी और स्वर्गा बाखा भाळी करै धन्याबाद किय और रोटी और माहछली दैनीं चोळी-चोळी करै चले हाथै ता तियां लागे लोगा लै बांडदें। 20 तियां सोभ लोग खाई करै रजै, और बची दी रोटीए भरुए बाराह चठै। 21 ता खाणें आळै तै बेटळी और माठै छाडी करै अटकल लाई लगभग पांज हजारा मरधा ई मरधा।

### यीशूओ पाणीं परेंदें हांडणअ (मरकुस 6:45-52; यूहन्ना 6:15-21)

22 तेता बाद नडैऊए प्रभू यीशू मसीह आपणें चेलै किशती दी जोरा-जोरी बशैळै कि तम्हें नाशा पैहलै दरेऊआ पार जेभै तैणीं हूँ इन्नां लोगा भेजी निं लूँ; 23 और प्रभू यीशू लोग बिदा किये ता आपू नाठअ धारा परेंदा लै प्राथणां करदअ साहां एकै जहळअ। 24 ता तिन्नां चेलै किशती लागी दरेऊआ

बिचै ओरी-पोरी दुळदी हाऊआ बागरी करै। 25 प्रभू यीशू मसीह आउ राचकै चरुथै पहरे दरैऊरे पाणीं परैदैं हांडी तिन्नां सेटा लै। 26 चेलै तेऊ दरैऊआ दी हांडदैं भाळी करै डरै ता तियां लागै बोलदैं कि अह आसा भूत; और तिन्नां पाई डरैमारै लैळा पकारा। 27 प्रभू यीशू कीई तेभी तिन्नां संघे गल्ला बाता कि; "हैळअ निं करा, हूँ आसा, डरा निं आथी।" 28 तैबै पतरसै प्रभू लै बोलअ, "प्रभू जै तूहैई आसा, तै दै मुल्है पाणीं परैदैं हांडी करै एछणें जाजत।" 29 प्रभू यीशू बोलअ, "ऐछ" और पतरस किशती का होथी करै लागअ प्रभू यीशू सेटा लै पाणीं परैदैं हांडदअ। 30 पर दिशा बागरी करै पतरस डरअ, और जाऊं सह पाणीं दी डुबदअ लागअ ता तेऊ पाई लैळा कि "हे प्रभू, मूँह बचाऊ हूँ चालअ डुबी मूँह बचाऊ।" 31 प्रभू यीशू झटपटै तेऊओ हाथ ढाकअ और तेऊ लै बोलअ, "हे अल्पविश्वासी, तरे शक किल्है किय?" 32 जाऊं तियां किशती दी उखळै ता तेभी दिश बागर मुकी। 33 एसा गल्ला भाळी जुंण किशती दी बैठै दै थिये, तिन्नां प्रभू सेटा माथअ टेकअ और बोलअ कि तूह आसा सच्ची 'परमेश्वरो पुत्र'।

### गनेसरतै बमार ठीक करनैं

(मरकुस 6:53-56)

34 समुंदरा पार किशती का होथी करै पुजै तियां गनेसरत देशै। 35 ता तिधे लोगे प्रभू यीशू बछैणीं करै ओरी-पोरी सारै देशै भेजअ फैळअ, और तिन्नां आपणै सोभ बमार माळूँ प्रभू यीशू सेटा लै। 36 तेखअ तियां प्रभू यीशू सेटा अरज करदैं लागै कि तूह दै हाम्हां चाऐ झिकळेओ पालअ ई छुहणें, और जेतरे लोगे बी प्रभू छुअ, तियां हुऐ सोभ बमारी का ठीक।

### रिति-रबाजा मनणेंओ सुआल

(मरकुस 7:1-13)

15 तैबै येरुशलेमा का फरीसी और शास्त्री प्रभू यीशू मसीह सेटा आए, और बोलदैं लागै, 2 "तेरै चेलै पुरखे रिती रबाजा किल्है चोळा कि हाथा धोऐ बिण्हीं बेशा रोटी खांदैं?" 3 प्रभू तिन्नां लै उत्तर दैनअ कि "तम्हें किल्है चोळा परमेश्वरे आज्ञा आपणें रिती रबाजा करै?" 4 परमेश्वरै ता इहय बोलअ त कि "आपणें आम्मां बाप्पू करै इजत पत और आपणें आम्मां बाप्पू लै निं कोहे बूरअ बोली, जुंण इहय करे, तेऊ पाऐ मारी।" 5 पर तम्हें बोला इहय कि "जै कोई आपणें आम्मां बाप्पू लै इहय बोले कि जुंण फाईदअ तम्हां मूँह करै हणअ त सह हेरअ हाम्हें परमेश्वरा लै भेंट करी?" 6 "तै तेऊ निं आपणें आम्मां बाप्पू इजत करनैं जरूरत आथी? इहय करै चोळी तम्हें आपणें रिती रबाजा करै परमेश्वरे आज्ञा। 7 हे कपटिओ, याशायाह आसा थारै बारै ठीक ई बोलअ द कि

8 "ईयां लोग होठा का ता करा मेरअ आदरमान, पर तिनों मन आसा मुखा दूर;

9 और ईयां करा मेरी भगती बेकार, किल्हैकि ईयां सखाऊआ लोगा का माँहूँरे बिधी बधान धर्म उपदेश बणाई करै।"

### अशुधद आळी गल्ला

(मरकुस 7:14-23)

10 और प्रभू यीशू लोग आप्पू सेटा लै शादी करै बोलअ, "शुणां और एसा गल्ला समझा कि 11 "जुंण खाखा दी भितरी नाशा, सह निं माळूँ अशुध करदअ पर जुंण खाखा का बागै निखळा, सह करा अशुध।" 12 तैबै चेलै प्रभू का पुछअ, "ताखा थोघ बी आसा कि एसा गल्लो मनअ फरिसी बडअ भारी बूरअ।" 13 प्रभू तिन्नां लै बोलअ, "हरेक पौधअ जुंण मेरै स्वर्गिय बाप्पू नाई आथी लाअ द, सह पेचणअ तेऊ पोही।" 14 इन्नां दैआ नाशणें, ईयां आसा आंधै रसतै रहैऊणें आळै; आंधअ जै आंधे का रसतअ खोजे, ता तियां पळणें दुहै देका।

15 एसा गल्ला शुणीं पतरसै प्रभू लै बोलअ, "हाम्हां का समझाऊ एसा गल्ला ठीक- ठीक।" 16 प्रभू तिन्नां लै बोलअ कि "तम्हें बी मैची समझै निं आथि? 17 तम्हें किजै निं समझै कि जुंण खाखा दी नाशा और पेटै पळा, और दोती दिशा नाशी करै निखळा बागा लै? 18 पर जुंण खाखा का निखळा, सह

निखळा मना का और सह ई करा माँहूँ अशुध।" 19 किल्हैकि बुरी सोच, हत्या, पराई बेटळी सेटा नाशणअ, कंझरनअ, चोरी, झुठी ग्वाही और निंदा निखळा मना का ई। 20 ईयांई गल्ला आसा जुंण माँहूँ अशुध करा पर हाथा धोऐ बिण्हीं रोटी खाणअ निं अशुध करदअ।

### कनानीं ज़ातीए बेटळीओ बिश्वास

(मरकुस 7:24-30)

21 ता एता बाद प्रभू यीशू तिधा का नाठअ सूर और सैदा देशा बाखा लै; 22 और तेऊ देशै एक कनानी बेटळी आई और जोरै-जोरै बोलदी लागी कि हे प्रभू दाऊदे संतान, मुल्है कर दैया, मेरी शोहरीए लाऐ दुशटआत्मैं बूरे हाल करी। 23 पर प्रभू निं तेसा लै कोई बी उत्तर दैनअ, पर चेलै की प्रभू का अरज कि "हे प्रभू, एसा कर बिदा, अह आसा लागी दी हाम्हां पिछु लैळा लाई तुरदी।" 24 प्रभू तेसा लै बोलअ इहय कि, "इस्त्राएली खान्दानिऐ भेडा छाडी निं हूँ होरी कोही सेटा लै आथी भेजअ द।" 25 पर सह आई तैबी और प्रभू सेटा माथअ टेकअ और बोलअ, "हे प्रभू, मेरी मदद कर।" 26 प्रभू तेसा लै बोलअ, "लान्हेए रोटी कुत्तै लै दैणीं निं ठीक हंडी।" 27 तेसा बोलअ प्रभू का इहय कि "हां प्रभू अह गल आसा सही, पर कुत्तै बी खा चूर-चार जुंण तिन्नां मालके रोटी खाणें का बचत हआ।" 28 एसा गल्ला शुणीं प्रभू तेसा लै उत्तर दैई बोलअ, "हे स्त्री, तेरअ बिश्वास आसा पाकअ, जिहअ तूह चाहा, ताल्है लोळी तिहअई हुअ" और तेसरी शोहरी हुई तेसाई घळी राम्बळी।

### कई रोगी ठीक करनैं

29 तेखअ प्रभू यीशू तिधा का गलीले दरैऊआ सेटा नाठअ और धारा परैदैं नाशी करै तिधी बेटअ। 30 ता लोगे छुंडा परैदैं छुड, लैंगळै, काणें, काल्लै, टुंडै और कई दाह बमारी आळै लई आए प्रभू सेटा लै और तियां बशैळै प्रभूए पैंरै और प्रभू कियै तियां सोभ ठीक। 31 जाऊं लोगे भाळअ कि काल्लै लागै गल्ला करदैं, लैंगळै लागै हांडदैं, टुंडै हुऐ ठीक, और काणें का लागअ घेछदअ, तै तियां हुऐ रहैन और तियां लागै परमेश्वरे जै-जैकार करदैं।

### चार हजार लोगा का रोटी खेऊणें

(मरकुस 8:1-10)

32 प्रभू यीशू आपणें चेलै लै बोलअ, "मूँह एछा इन्नां लोगे जेह्ल महेली भाळी करै दैआ, किल्हैकि ईयां आसा चिई धैळी ओही मूँह संघे, और इन्नां का खाणां-पिणां लै बी निं आथी किछै, हूँ निं चांहदअ इन्नां भुखै नचिशै बिदा करनअ, इहय निं हआ कि ईयां बाता थकी करै रहे तेतै पळी।" 33 चेलै प्रभू लै बोलअ, "ईधी जंगलै किधा का काढणीं हाम्हां इन्नां लोगा लै एतरी रोटी कि एतरे लोगे पेट रजैऊणै?" 34 प्रभू यीशू पुछअ कि "तम्हां का केतरी रोटी आसा?" तिन्नां बोलअ कि "हाम्हां का आसा सात रोटी और थोळी जेही माहछली।" 35 तैबै प्रभू यीशू तिन्नां लै घेहळी दी बेशणा लै बोलअ 36 और सात रोटी और माहछली लै परमेश्वरो धन्याबाद करी करै चोळी और चेलै हाथै रहअ दैदअ लागी और तियां रहै लोगा लै बांडदै लागी। 37 इहय करै सोभ लोग खाई करै रजै और बची दी रोटीए बचै सात चठै। 38 खाणें आळै तै तिधी बेटळी और माठै छाडी चार हजार मरध ई मरध। 39 एता बाद प्रभू यीशू तियां लोग बिदा किए और आप्पू चेलै संघे किशती दी बेशी करै पुजअ मगदण देशै।

### स्वर्गे चिन्हें मांग

(मरकुस 8:11-13; लूका 12:54-56)

16 फरीसी और सदूकी प्रभू यीशू सेटा एछी करै परखणें तैणीं बोलदैं लागै कि हाम्हां का रहैऊ सरगो कोई एक चिन्ह। 2 प्रभू तिन्नां लै उत्तर दैनअ कि "साह्नां बोला तम्हें कि "सरग रहणअ बिझअ, किल्हैकि सरग आसा लाल, 3 और दोती बोला इहय कि आज्ञा एछणीं दिश बागर, किल्हैकि सरग आसा लाल और न्हैरअ, तम्हें हेरा सरगो लछण भाळी करै तेतो भेद खोजी पर बगतो चिन्ह और भेद निं खोजी सकदैं?" 4 "एऊ जुगे बूरे



और कंजरै लोग लोळा चन्ह, पर योना नबीए चिन्हा छाडी निं तिन्नां लै होर किछै भेटणअ आथी।" तेखअ प्रभू यीशू लागअ तिन्नां छाडी हांददअ।

### फरीसी और सदुकिए शिक्षो सजेळाअ

(मरकुस 8:14-21)

5 चेलै बिसरुए दरैऊआ पार नाशदी रोटी निंणै। 6 प्रभू यीशू तिन्नां लै बोलअ, "हेरे, फरीसी और सदुकिए सजेळै का रहै दूर।" 7 तियां लागै आप्पु बिचै सोठदै कि हाम्हें रोटी ता आणीं निं। 8 प्रभू यीशू मसीह हेरी तिन्नें मने गल भुझी और तेऊ तिन्नां लै बोलअ, "हे अल्पविश्वासिओ, तम्हें आपणें मनें कै सोठा कि हाम्हां का रोटी निं आथी? 9 तम्हें कै मैची तैणीं बी निं समझै आथी? तिन्नां पांजा हजारा लै रोटी खैऊई ती तियां बी निं तम्हां आद रही? और तम्हें बचै दै रोटीए कतरै चठै चकै तै? 10 तियां चार हजारा लै सात रोटी बी बिसरुए? तिधी बी बची दी रोटीए केतरै चठै चकै तै?" 11 "तम्हें किल्है निं समझदै कि मंणें निं तम्हां लै रोटीए बारै कधि बोलअ आथी! फरीसी और सदुकिए सजेळै का रहै दूर।" 12 तैबै आई तिन्नां समझ कि प्रभू निं रोटीए सजेळै का दूर रहणा लै बोलअ; पर तेऊ बोलअ फरीसी और सदुकिए शिक्षा का दूर रहणा लै।

### पतरसो यीशू लै मसीह बोळणाअ

(मरकुस 8:27-30; लूका 9:18-21)

13 प्रभू यीशू आअ कैसरिया फलिपी देशै और आपणें चेलै का पुछदअ लागअ कि "लोग मुल्है कै बोला?" 14 तैबै तिन्नें बोलअ कि कोई बोला ताल्है यहूना बपतिस्मै दैणें आळअ, कई लोग बोला एलिया और कई लोग बोला कि अह आसा तिरमियाह भबिष्याबाणीं करनै आळअ या तिन्नां मांझे कोई एक जळअ। 15 तैबै प्रभू तिन्नां लै बोलअ इहय कि "तम्हें किजै बोला मुल्है?" 16 शिमोन पतरसै उत्तर दैनअ कि "तूह आसा जिऊंदै परमेश्वरो शोहरू मसीह।" 17 प्रभू यीशू तेऊ लै बोलअ, "हे शिमोन, योने शोहरूआ, तूह आसा धनबान, अह गल निं खुना और मासा करै हूई, पर मेरअ बाप्पू जुणु स्वर्गें आसा, तेऊ की अह गल ताह दी प्रगट। 18 और हुंबी बोला ताल्है इहय कि तूह आसा पतरस; और एसा जानिं परदै बणाणीं मूह आपणीं कलिसीया, और नरके परऊळी बी निं तेता हारी सकदी।" 19 "मूह दैणीं ताल्है स्वर्गें राजे कुंजी, और जुणु बी तूह धरती दी कठा करे, सह हणअ स्वर्गें कठा, और जुणु बी तूह धरती दी खोलै, सह खुळणअ स्वर्गें।" 20 तैबै प्रभू यीशू बोलअ कि "कोही का निं बोली कि हूँ आसा मसीह।"

### आपणीं मौते बारै प्रभू यीशू भबिष्याबाणीं

(मरकुस 8:31-33; लूका 9:22)

21 और शास्त्रीए हाथै दुख सैहूँ और तिन्नें हाथै मरुं और चिऊथे धैळै हूँ ज़िऊंदअ।" 22 एसा गल्ला लै पतरस प्रभू संघै जुदअ जिहअ नाशी करै बोलदअ लागअ कि "हे प्रभू, परमेश्वर ना करे कि ताह संघै कधि इहय होए।" 23 प्रभू पतरसा बाखा फिरी करै बोलअ, "हे शैतान, मूह सहनै का हअ दूर, तूह आसा मुल्है ठोह्ळा दैणेंओ कारण, किल्हैकि तूह लाआ परमेश्वर गल्ला छाडी मांझुए गल्ला दी मन।"

### यीशू पिछू हांदणेंओ अर्थ

(मरकुस 8:34-9:1; लूका 9:23-27)

24 तेखअ प्रभू आपणें चेलै लै बोलअ, "जै कुंण मूह पिछू एछणअ चाहा, सह करा आपणें आप्पु लै नकार और आपणअ क्रूस चका आप्पे ता तेखअ एछा मूह पिछू। 25 किल्हैकि जुणु आपणअ प्राण बचाऊणअ चाहे, तेऊ खोणअ सह; और जुणु आपणें प्राण मेरी तैणीं खोणें चाहे तेऊ बचाऊणअ सह। 26 जै मांझू सारै संसारा पाए और आपणें प्राण हानी करे, ता तेऊलै कै नफअ हणअ? या मांझू आपणें प्राणें बदळै किजै सका दैई? 27 मांझूओ शोहरू एछणअ आपणें स्वर्गदूता संघै आपणें बापुए गुणगाना करदअ और तेसा बगती भेटणअ हर एकी तेऊए कामें साबै फल। 28 हूँ खोजा तम्हां का सच्चाई कि जुणु इधी खळै आसा, इन्नां बिचै आसा कई ईहै बी, कि जेभै तैणीं मांझूरे

शोहरू तेऊए राजा दी एछदै भाळी ना हेरे, तेभै तैणीं निं तिन्नां मौतो सुआद चारखणअ।

### यीशूओ रूप बदळणअ

(मरकुस 9:2-13; लूका 9:28-36)

17 छआ धैळै बाद प्रभू यीशू पतरस, याकुब और तेऊओ भाऊ यहूना आप्पु संघा निंयें, और तियां निंए तेऊ एकांत उछटी धारा परंदा लै। 2 तिन्नां सहनै बदळुअ प्रभूओ रूप और प्रभूओ मूह लागअ सुरजा जिहअ चमकदअ और झिकळै हुए प्रैशै जिहै शेतै। 3 ता तिधी आरे हेरे मुसा और एलिया, संघा तियां धेछुए प्रभू यीशू संघे गल्ला करदै। 4 इहय भाळी पतरसै प्रभू यीशू लै बोलअ, "हे प्रभू, अह हूअ ठीक कि हाम्हें आसा इधी, जै तेरी ज़ाजत आसा, तै बणाणें हाम्हां इधी चअन मंडप, एक ताल्है, एक मुसा लै और एक एलिया लै।" 5 पतरस त बोलदअ ई लागअ द कि तिधी आयै शेतै घणें बादळ और तिन्नां बादळा बिचा का आई एही आकाशबाणीं कि "अह आसा मेरअ प्यारअ शोहरू, एऊ करै आसा हूँ खुश, एऊरे शुणां।" 6 इहय शुणीं करै चेलै पळै उटी बाखा और तियां डरै बडै भारी। 7 प्रभू यीशू तिन्नां सेटा एछी करै तियां छुंरें और बोलअ कि "खळै उझिआ, डरा निं आथी।" 8 जांऊं तिन्नें आच्छी उझै कीई ता तिन्नां का निं प्रभू यीशू का सुआई होर कोहै शुझुअ।

9 जांऊं तियां धारा का होथदै लागै ता प्रभू हांददी-हांददी तिन्नां लै आज्ञा दैनीं कि "जेभै तैणीं मांझूओ शोहरू मरी करै जिऊंदअ निं होए, तभै तैणीं निं जुणु बी अह तम्हें भाळअ, एसा गल्ला निं कोही का खोजी।" 10 तैबै चेलै प्रभू का पुछअ, "तै ईयां शास्त्री किल्है बोला इहय कि एलिया नबिओ पैहलै एछणअ आसा ज़रूरी।" 11 प्रभू यीशू बोलअ, "एलिया ता एछणअ और सोभै गल्ला सुधारनिं तेऊ। 12 पर हूँ खोजा तम्हां का सच्चाई कि एलिया मुकअ दा एछी; और तिन्नें निं सह बछेणअ; पर जिहअ तिन्नें चाहअ तिहअ किय तेऊ संघै। इहयई करै मांझूए शोहरू बी सैहणअ तिन्नां संघै दुख।" 13 तैबै चेलै समझअ ईहअ कि अह लागअ दा हाम्हां लै यहूना बपतिस्मै दैणें आळेए बारै बोलदअ।

### दुष्टात्मां शाचअ द शोहरू ठीक करनअ

(मरकुस 9:14-29; लूका 9:37-43)

14 जांऊं तियां लोगे भीळा सेटा पुजै ता एक आदर्मी आअ तिन्नां सेटा, और माथअ टेकी करै लागअ सह बोलदअ, 15 "हे प्रभू, मेरै शोहरू लै कर दैया, तेऊ एछा मिर्गिए दौरै और तेऊ हूआ बडी भारी दाह, ता बार-बार लागअ सह पाणीं और आगी जैदरी पळदअ। 16 मंणें आणअ त सह तेरे चेलै सेटा लै बी; पर तियां निं तेऊ ठीक करी सकै।" 17 प्रभू यीशू तिन्नां लै बोलअ, "हे अल्पविश्वासी हठी लोगो, मूह केभै तैणीं रहणअ तम्हां सेटा? और केभै तैणीं रहणअ मूह थारी सैहंदअ लागी? ओही आणा तेऊ मूह सेटा लै।" 18 तैबै यीशू मसीह तेऊलै एक झाळ काडी और दुष्टात्मां भागी तेऊ का दूर और सह हुअ नडैऊए रांबळअ।

19 तैबै चेलै प्रभू का एकांत नाशी करै पुछअ, हाम्हें एऊ दी शाचै दै भूता किल्है निं काडी सकै?" 20 प्रभू तिन्नां लै बोलअ, "आपणें विश्वास कमीए कारण: हूँ खोजा तम्हां का सच्चाई कि जै थारअ विश्वास राईए दाणें बराबर बी होए, ता जै तम्हें एसा धारा लै बी बोले कि इधा का पेछुई करै नाश दुजी बाखा लै; ता सह नाशणीं और तम्हां लै निं कोहै गल एही हणीं कि जुणु नांई होए।" 21 जांऊं तियां गलील देशै थियै, ता प्रभू यीशू तिन्नां लै बोलअ, "मांझूओ शोहरू ढाकणअ मांझूए हाथै,

### एकी बारी भी आपणीं मौते बारै यीशू भबिष्याबाणीं

(मरकुस 9:30-32; लूका 9:43-45)

22 तेखअ तिन्नां पाणअ सह मारी, और सह हणअ चिऊथे धैळै ज़िऊंदअ।" 23 एसा गल्ला शुणीं हुए चेलै बडै भारी उदास।



## मांदरो कारअ

24 जाऊं तियां कफरनहूम पुजै, तिधी एकी मांदरा लै कारै गराहणें आळै पतरसा का पुछअ कि थारअ गुरू मांदरा लै कारअ दैआ कि नाई?" तेऊ बोलअ 'हां, दैआ ता दैआ।' 25 जाऊं पतरस घरै पुजअ ता तेऊए पुछणें का पैहलै हेरअ प्रभू यीशू मसीह तेऊ लै बोली कि "शिमोन, तूह कै समझा? कि ईयां धरतिए राजे चंदअ या कारअ कसा-कसा का मांगा? आपणें शोहरू का या पराए का?" पतरसै बोलअ 'पराए का।' 26 प्रभू यीशू तेऊ लै बोलअ, "एऊ साबै गए तै शोहरू बची।" 27 तैबी इहय करै नि हाम्हां तिन्नां लै ठोहळ दैणीं, तूह कर इहय, दरैऊए कनारै नाश और कांडअ पा माहछली लै ता जुण माहछली पैहलै तेथ शाचे, तेसा आणें, तेसे खाख खोल्ही भेटणअ ता एक सिक्कअ और तेऊ निई करै दैरे मेरै और आपणें बदळै कारअ।

## स्वर्गे राजा दी बडअ कुण आसा ?

(मरकुस 9:33-37; लूका 9:46-48)

18 इहय करै तेसाई घळी चेलै प्रभू का पुछदै लागै कि "स्वर्गे राजा दी सोभी का बडअ कुण आसा?" 2 एसा गल्ला शुणीं प्रभू एक होछअ जिहअ लान्हअ आप्पू सेटा शादी करै आप्पू सेटा खळअ किय और बोलअ कि, 3 "हूँ खोजा तम्हां का सच्चाई कि जै तम्हें आपणीं जिंदगी दी बदळव नाई आणें और होछै लान्है जिहै नाई बणें, तै नि तम्हें स्वर्गे राजा नाशी सकदें। 4 जुण बी आपणें आप एऊ लान्है जिहअ होछअ बणें, सह हणअ स्वर्ग राजा दी बडअ। 5 जुण बी मेरै नाऊंअ करै एक ईहै लान्है ग्रहण करा सह करा मूह ग्रहण।

## पाप करने परिक्षा

(मरकुस 9:42-48; लूका 17:1,2)

6 पर जुण कोई इन्नां होछै मांझै जुण मूह दी विश्वास करा, एकी लै बी ठोहळ दैए, तेऊ लै हणअ त इहय भलअ कि बडअ घरटो थरेट बाहणअ तेऊए गळै और सह डबेऊणअ त दरैऊए डुघी आळी दी। 7 ठोहळा दैणै कारण संसारा लै हाए! ठोहळ लागणीं आसा जरूरी पर हाए तेऊ मांझू लै जसरी बझहा करै ठोहळ लाग।

8 जै तेरै हाथ पैर ताहूँ ठोहळ दैए, ता तिन्नां पाए काटी करै शोटी; टुंडअ लैगळअ जिन्दगी लै नाशणअ आसा तालहै एता का भलअ कि दूई हाथ और दुई पैरा रहंदी तूह बेअंत आगी दी पळे। 9 ता, जै तेरी आछ ताहूँ ठोहळ दैए, ता तेसा शोट कोटी करै दूर। काणें हूई करै आसा जिंदगी लै नाशणअ एता का रांबळअ कि दूई आच्छी रहंदी तूह नरके आगी दी पळे।

## लुकी दी भेडो दृष्टांत

(लूका 15:3-7)

10 हेरा, तम्हें नि इन्नां होछै मांझै कोही बी तुछ समझी, किलहैकि हूँ बोला तम्हां लै इहय कि स्वर्गे रहा तिन्ने दूत सदा मेरै पिता परमेश्वरे मूहा भाळै लागी। 11 "किलहैकि मांझूओ शोहरू आसा शोतूए दै बचाऊंदअ आअ द।"

12 तम्हें किजै समझा? जै कसा आदमीए शौ भेडा होए, और तिन्नां मांझै एक भेड भटके, तै कै नडिनुएँ भेडा छाडी सह नाळै-धारै भटकी दी भेडा लोळअ नि नाशणअ? 13 और जै इहय होए कि सह भेड तेऊ भेटे, ता हूँ बोला तम्हां का सच्चाई कि सह नि तिन्नां नडिनुएँ भेडा लै जुण भटकी दी नाई थी, तेतरी खुशी नि तेऊ हणीं, जेतरअ कि एसा भेडा लै खुश हुआ। 14 इहयई थारै बाप्पूए जुण स्वर्गे भेडा आसा, सह नि इहय चाहंदअ कि इन्नां होछै मांझै एक बी नाश होए।

## अपराधी संघे बर्ताअ

15 जै तेरअ भाई तालहै अपराध करे, ता कांगनरांगै नाशी करै तेऊ संघे गल्ला बाता, संघा दैरे तेऊ समझाऊंणी, जै सह तेरी शुणे, तै गअ ताह आपणअ भाई भेटी। 16 जै सह नाई शुणे, तै निऊं दुई आदमीं आप्पू संघे होर ताकि हरेक गल्ला लोळी दूई या चिई गुआहे सझनै हूई। 17 जै सह तिन्ने बी

नाई शुणे, तै खोज सभा दी, पर जै सह तिन्ने बी नाई शुणे, तै समझै तेऊ तूह गैर ज्ञातिओ पराअ आदमीं।

## रोकणअ और मौकअ दैणअ

18 हूँ खोजा तम्हां का सच्चाई कि जुण बी तम्हें धरती दी बाहें, सह बाहणअ स्वर्गे और जिहअ बी तम्हें धरती दी खोले, सह खुलणअ स्वर्गे। 19 तेखअ बोला हूँ तम्हां लै इहय बी कि जै तम्हां बिचै दुई जळै धरती दी कोई बी गल्ला लै; जुण तिन्नां मांगणीं, एकी मनं होए, तियां गल्ला हेरनी परमेश्वरा तिन्नां लै दैई। 20 किलहैकि जिधी दुई या चअन जळै मेरै नाऊंएँ कठा हआ, तिधी हआ हूँ आप्पू तिन्नां बिचै।"

## नदई सेवको दृष्टांत

21 तैबै पतरसै बोलअ, "हे प्रभू, जै मेरअ भाई मुल्है अपराध करे, तै हूँ केतरी बारी छाडुँ तेऊलै माफी? कै साता बारी तैणीं" 22 प्रभू यीशू तेऊ लै उत्तर दैनअ, "हूँ नि तालहै बोलदअ कि सात बारी कर तेऊ माफ, पर साता बारीए सतर गुणा करी करै छाडै तेऊलै माफी।"

23 "तैहीता स्वर्गो राज आसा तेऊ राजै जिहअ, जुणीं आपणें सेऊआकारा का साब-कताब करनअ चाहअ, 24 जाऊं सह साबा-कताबा लंदअ लागअ ता एक आदमी आअ तेऊ सेटा लै इहय; तेऊ त राजैओ दसा हजारा तोळेओ कर्ज; 25 पर तेऊका नाई त कर्ज भरना लै एक धेलअ बी आधी! तैबै तेऊए मालक बोलअ तेऊ लै इहय कि अह और एऊए बेटळी, और एऊए सारी जैदात पाआ बेघी और तेता करै करा एऊ कर्जैओ भुगतान। 26 इहय शूणीं तेऊ सेऊआकारै मालक सेटा माथअ टेकअ और धरनीं नाका करै रेखा दैनीं और मालक सेटा एही अरज की कि "हे मालक, मन मार, हूँ भरुं तेरअ सारअ कर्ज।" 27 तैबै तेऊ मालक फिरी तेऊए झीण और तेऊओ कर्ज माफ करी करै सह छाडअ तिधा का घरा लै।

28 पर जाऊं सह नोकर बागै निखळअ ता तेऊ भेटअ आपणअ साथी चाकरी करनै आळै मांझै एक जळअ; ता तेऊ तै तेऊए शौ दिनारे सिक्के धुआरै दैनै दै; और तेऊ ढाकअ तेऊओ गअळ संघा बोलअ तेऊलै इहय कि "जुण किछ बी ताह मेरअ धुआर आसा, तेऊ कर्जा दै एभी मुल्है बापस।" 29 एसा गल्ला शुणीं तेऊओ साथी सेऊआकार तेऊ सेटा माथअ टेकी करै तेऊ सेटा अरजा करदअ लागअ कि "मन मार, हूँ भरुं तेरअ सारअ कर्ज।" 30 पर तेऊ नि तेऊए गल्ला मनी और सह किय तेऊ जेह्खानै दी बंद; इहय बोली करै कि "जेभै तैणीं तूह मेरअ कर्ज नाई भरे, तेभै तैणीं रहणअ तूह इधी बंद।" 31 तेऊए होरी साथी सेऊआकार जुण तेऊ संघे हुआ त, तेता भाळी करै हुए बडै भारी दुखी, और तिन्ने बी ईयां सारी गल्ला खोजी आपणें मालक का। 32 तैबै तेऊए मालक सह शादअ और तेऊ लै बोलअ, "हे दुष्ट, तंएँ जेभै मुखा अरज कीई ती, मंएँ ता तेभै तेरअ पूरअ कर्ज माफ किय। 33 ता जेही मुंह तेरी झीण फिरी, तंएँ बी त आपणै साथी सेऊआकारा संघे इहयई करनअ!

34 मालक आई तेऊलै बडी भारी रोशे और सह पाअ जेह्खानै दी और तिधी बझैळअ भळाकणें कधि मरजिओ, संघा डाहअ सपाही लै इहय बोली कि जेभै तैणीं अह पूरअ कर्ज नाई भरे; तेभै तैणीं नि एऊ बागै छाडी।

35 ठीक इहयई तम्हें बी करा आपणै भाई बंधा लै आपणें दिला मना का माफ, जुण दिला मना का माफ ना करे, ता मेरअ बाब पिता परमेश्वर जुण स्वर्गे आसा तेऊ बी करनअ तम्हां संघे इहयई।

## बैईदाऊए (तळाक) बारै यीशूए शिक्षा

(मरकुस 10:1-12)

19 जाऊं प्रभू यीशू इन्नां गल्ला करी मुकअ, ता सह लागअ गलील देशा का हांडदअ; संघा पुजअ जरदण नदी पार यहूदिया देशै। 2 ता प्रभू यीशू पिछु आए बडै भारी लोग, और प्रभू किये तियां हर दुख तखलिफा का दूर।

3 तैबै फरीसी बी आए प्रभू यीशू पटकदें, संघा तियां प्रभू यीशू लै बोलदें लागै कि, "हरेक गळती पिछु कै आपणीं बेटळी छाडणीं ठीक आसा?" 4 प्रभू तिन्नां लै उत्तर दैनअ, "तम्हें कै इहय पळअ नि आधी कि जूणीं तियां

बणाए, तेऊ बणाए तियां शुरु का ई मरध और बेटळी; संघा बोलअ तिन्नां लै इहय कि,

5 "एऊई कारणे रहणें तियां आपणें आम्यां-बाप्पू का जुदै जिहै आपणीं बेटळी संघे, और तियां दुई हणें एक तन? 6 तैहीता तियां निं ऐबै दूई आथी पर तियां आसा एक तन; इहय करै जुण परमेश्वरै जोळअ द आसा, माळू निं तेऊ जुदै करदै लागणअ।" 7 तैबै तिन्नें प्रभू लै बोलअ, "तै मुसा नबी बधाना दी इहय किलहै आसा लिखअ कि बैईदाऊअ लिखी करै सका आपणीं बेटळी छाडी?" 8 प्रभू तिन्नां लै जबाब दैनअ, "मुसा पळअ लिखणअ एते तैणीं कि थारै मन तै पाथरा जिहै जरड हुऐ दै, जै तम्हां मनणअ ई नाई त आथी; ता तैनी तेऊ एही आज्ञा कि बेटळी लै दुखा दैणै का दैआ तेसा बैईदाऊअ दैई करै छाडी, पर शुरु का निं इहय बधान थिय।" 9 "पर हूँ बोला तम्हां लै इहय कि जुण कोई कझरनै का सुआई किजी होरी गला पिछू आपणीं बेटळी छाडी करै दुजी संघा बह करे, सह करा कझरनेओ पाप; और जुण छाडी दी बेटळी संघे बह करा, सबी आसा कझरअ।"

10 तैबै चेलै प्रभू लै बोलअ, "जै मरधो बेटळी संघे इहय रिशतअ आसा, तै निं बह करनअ ठिक आथी।" 11 प्रभू तिन्नां लै बोलअ, "सोभ निं एसा गला मनीं सकदै, एता सका तियां मनीं जसा लै अह दान आसा दैनअ द।"

12 "किछ नपुंसक हआ ईहै, जुण मांए गर्भा का ई ईहै आसा जल्मै दै, और किछ आसा ईहै जुण आदमीं नपुंसक बणाए, और किछ आसा ईहै जुण स्वर्गें राजा लै बणें नपुंसक, जुण एता मनीं सका सह मनै।"

### लान्हें लै आशीर्वाद

(मरकुस 10:13-16; लूका 18:15-17)

13 तैबै लोगे आणें लान्हें प्रभू यीशू सेटा कि तिन्नां दी हाथ लाई करै प्राथणा करे, पर चेलै लागे तिन्नां पिछू रहणा लै बोलदै। 14 प्रभू यीशू तिन्नां लै बोलअ, "लान्हें दैआ मूह सेटा लै एछणें, इना लै निं नाई करा, किलहैकि स्वर्गें राज आसा इहै लै ई।" 15 तेखअ प्रभू तिन्नां लान्हें मुंडे हाथ फेरी करै लागअ तिधा का हांढदअ।

### सेठ नौजुआन और अनंत जिऊण

(मरकुस 10:17-31; लूका 18:18-30)

16 ता एकी आदमीं प्रभू सेटा एछी करै बोलअ, "हे प्रभू, हूँ इहय किजै भलअ करू जेता करै हूँ अनंत जिऊणां लै नाशी सके?" 17 प्रभू तेऊ लै बोलअ, "तूह मुखा भलाईए बारै किलहै पुछा? भलअ ता आसा एकै, पर जै तूह अनंत जिऊणां लै नाशणअ चाहा, तेता लै कर तेऊए आज्ञा मनीं।"

18 तेऊ प्रभू लै बोलअ, "कुण जेही आज्ञा?" प्रभू यीशू तेऊ लै बोलअ, "हत्या निं करनी, नां कजरै हणअ, चोरी निं करनी, झुटी ग्वाही निं दैणीं, 19 आपणें आम्यां-बाप्पूओ करनअ आदरमान, और आपणें पड़ोसी लै करै आपू जिहअ प्रेम।" 20 तैबै तेऊ जुआनै आदमीं प्रभू लै उत्तर दैनअ कि "इन्नां गला ता हूँ पैहलै का ई मनां, एबै मूह दी कै कामीं आसा?" 21 प्रभू तेऊ लै बोलअ, "जे तूह सिध हणअ चाहा, तै नाश, और आपणीं धन माया बेची करै बांड गरीबा कगाळा लै, और ताह भेटणअ स्वर्गें धन, संघा आपू लाग मूह पिछू हांढदअ।" 22 एसा गला शुणीं हुअ सह जुआन आदमीं बडअ भारी उदास, किलहैकि सह त सेठ आदमीं।

23 तैबै प्रभू यीशू आपणें चेलै लै बोलअ, "हूँ खोजा तम्हां का सच्चाई कि धनमाया आळै आदमींओ आसा स्वर्गें राजा दी नाशणअ बेघे मुशकळ। 24 भी बोला हूँ तम्हां का इहय कि "परमेश्वर राजा दी धनमाया आळै आदमींओ नाशणें का सान आसा ऊँटो सिऊणींए पाशी बाती निखळणअ।" 25 इहय शुणीं करै हुऐ चेलै रहैन कि तै कसा सका मोक्ष भेटी, या तै कुण सका स्वर्गें नाशी? 26 प्रभू यीशू तिन्नां बाखा भाळी करै बोलअ, "मांहुँए भलै ता निं अह हई सकदअ पर परमेश्वर सका सोभ किछ करी।" 27 एता लै पतरसै बोलअ कि "भाळ, हाम्हें ता आसा गए दै सोभ गला छाडी करै ताह पिछू एछी, तै हाम्हां किजै भेटणअ?" 28 प्रभू यीशू तिन्नां लै बोलअ, "हूँ बोला तम्हां लै सच्चाई कि नऊँई पोस्ती दी जेभै हूँ आपणीं महिमें राजगदी दी बेशणअ, ता तम्हें बी जुण मूह पिछू आणे दै आसा, तम्हां बी करनअ बाराह राजगदी दी बेशी करै इस्त्राएले बाराह गोत्रो न्याय, 29 और जुणीं बी मेरी तैणीं आपणें घर-

बार, भाई-बैहण, मां-बाब, शोहरू-माठै, खेच-खअळ, मेरे नांऊंरें छाडे, तेऊ भेटणअ शौ गुणा; और तेऊ लै हणअ अनंत जिऊणो हक। 30 पर बडै भारी आसा जुण पैहलै आसा, तियां हणें पिछलै, और जुण पिछलै आसा तियां हणें पैहलै।

### बगीचे मजदूरो दृष्टांत

20 स्वर्गें राज आसा एकी ईहै घर मालका जिहअ जुण दोती-दोथी निखळअ कि सह आपणें अंगूरे बगीचै दी मजदूरदार कामां करदै लाई सके। 2 संघा तेऊ मजदूर एकी रपई धैळी मजदूरीए साबै लाए और तियां अंगूरे बगीचै दी भेजै। 3 तेखअ एकी पहरा बाद भाळै तेऊ बजारै कई होर बी बेकार खहळुए दै, 4 तेऊ तिन्नां लै बोलअ, "नाशा, तम्हें बी करा मेरै अंगूरे बगीचै दी काम, और जुण ठीक होए, तेता दैऊं हूँ तम्हां लै; और तियां बी नाठै बगीचै दी कामां करदै। 5 तेखअ तेऊ दुजै और चिऊथै पहरा नेळ बी किय तिहअई। 6 छँहकी रहअ धैळी उडणा लै एकै पहर; ता तेऊ भाळै होर बी खहळुए दै बेकार; ता तेऊ तिन्नां लै बोलअ, "तम्हें किलहै आसा इधी सारी धैळी बेकार खहळुए दै?" तिन्नें बोलअ इहय कि हांम्हां निंसी किधि बी मजदूरी खटणा लै भेटी। 7 तेऊ तिन्नां लै बोलअ कि तम्हें बी करा मेरै अंगूरे बगीचै दी काम।

8 तेखअ धैळअ उडी करै बोलअ तेऊ आपणें भडारी लै इहय कि "मजदूरा शाद और पिछलै का पैहलै तैणीं दै सोभी लै मजदूरी।" 9 ता जाऊं तियां सोभ मजदूर आणे, ता जुण उडके कहरै बी कामां करदै आणे तै तिन्नां बी भेटी एक रपई पूरी धैळीए मजदूरी। 10 ता, जुण पैहलै आणे तै तिन्नें जाणअ इहय कि हांम्हां भेटणीं इन्नां का खासी धैळी पर तिन्नां बी भेटअ पूरी धैळीओ एक-एक रपई जुण तिन्नां संघे बाहीधअ त हुअ द। 11 जाऊं तिन्नां मजदूरी भेटी ता तियां हुऐ तेऊ मालका का नराज और तेऊ लै लागे इहय बोलदै कि 12 "जुण ईयां पिछू आणे तै इनें ता सिधअ एकी कहरै किय काम, पर तंरें दैनी इन्नां लै हांम्हां बराबर मजदूरी! जूणीं सारी धैळी बोझअ चकअ और चटाक धुपेओ जाह्य सैन किय?" 13 तेऊ तिन्नां मांझै एकी लै उत्तर दैनअ कि "हे भाई, मंरें निं ताह संघे किछे बुरअ किय, तंरें आपणें निं बोलअ त कि एक रपई धैळी लोळी? 14 जुण तेरअ आसा तेऊ चक, और इधा का लाग हांढदअ, अह आसा मेरी मरजी कि जेतरअ मंरें ताल्है दैनअ तेतरअ दैणअ मूह इन्नां होरी लै बी जुण ताखा पिछू आणे दै आसा। 15 अह कै ठीक निं आथि कि हूँ आपणें ढबै संघे जिहअ चाहू तिहअ करू? जै हूँ भलअ आसा, तै तूह किलहै आसा तेता बूरी आच्छी भाळअ लागअ द?" 16 "ठीक ईहैई जुण पैहलै तै तियां हणें पिछलै और जुण पिछलै तै तियां हणें पैहलै।"

### आपणीं मौते बारै यीशूए चिऊथी भबिष्याबाणीं

(मरकुस 10:32-34; लूका 18:31-34)

17 तेखअ प्रभू यीशू मसीह येरुशलेमा लै नाशदी बारी आपणें बाराह चेलै निंयें कांगनरांगे और बाता तिन्नां का बोलदअ लागअ 18 कि "भाळा, हाम्हें चालै ऐबै येरुशलेमा लै और मांहुँओ शोहरू दैणअ माहायाजके और शास्त्रिण हाथे; और तिन्नां बणाणअ मौता दैणें जोगी दोषी। 19 तेखअ दैणअ सह तिन्नां दुजी जातीए हाथे ताकि तेऊओ ठठअ मखऊल करी सके और कोळै करै चिके; ता क्रूसा दी मारी पाए, पर चिऊथै धैळै हणअ सह जिऊंदअ।"

### एकी माँए अरज

(मरकुस 10:35-45)

20 जाऊं जब्दिए शोहरूए आम्यां प्रभू सेटा एछी करै माथअ टेकअ ता सह लागी तेऊ का किजू मांगदी। 21 प्रभू बोलअ तेसा लै कि "तूह किजै चाहा?" तेसा बोलअ इहय, "मेरै ईयां दूई शोहरू लोळी तैरै राजा दी एक तैरै दैहणीं और बांऊंई पाशळी बेठे।" 22 प्रभू यीशू तेसा लै जबाब दैनअ, "तम्हां का निं थोघे कि तम्हें कै मांगा? जुण कटोरअ मूह लागणअ झुटणअ, तेऊ कै तम्हें झुटी सका?" तिन्नें प्रभू लै तेभी जबाब दैनअ, "हां, हाम्हें सका झुटी।" 23 प्रभू यीशू तिन्नां लै बोलअ, "तम्हां मेरअ कटोरअ ता झुटणअ पर आपणें दैहणें-

बाऊंरें बशैळणअ नि मेरअ काम आथी पर ज़सा लै मेरै बाप्पू जुंण ज़ेगा बणाई आसा हेरी दी, तिन्नां लै आसा।

24 इहय शुणीं करै आई तिन्नां होरी चेलै तिन्नां दुई लै रोशै। 25 प्रभू यीशू तियां आप्पू सेटा लै शादै और बोलअ, “तम्हें इहय बी ज़ाणा कि दुजी जातीए हाकम करा तिन्नां दी हुकूमत, और जुंण तिन्नां का बडै आसा, तियां करा तिन्नां दी अधिकार। 26 पर तम्हां बिचै नी इहय हणअ; पर जुंण बी तम्हां बिचै बडअ हणअ चाहे, सह लोळी थारअ सेऊआकारा जिहअ बणअ। 27 जुंण तम्हां बिचै मुखिअ बळणअ चाहे, तेऊ बळणअ पैहलै थारअ दास, 28 जिहअ कि मांहुंओ शोहरू, सह नि एते तैणीं आई कि तेऊए कुंण सेऊआ टैहल करे, पर सह आअ एते तैणीं कि आप्पू सेऊआ टैहल करे और बडै भारी लोगा छडैऊणा लै आपणें प्राण दैई दैए।”

### दुई काणें लै दृष्टीदान

(मरकुस 10:46-52; लूका 18:35-43)

29 जाऊं तियां येरिहो देशा का बागै निखळदैं ई लागै तै, ता लोगे एक बडी भारी बडी भीळ आई प्रभू यीशू पिछू। 30 ता दुई काणें तै बाते कनारै बेठै दै। तिन्नें इहय शुणीं करै कि प्रभू यीशू आसा लागअ द एसी बाती नाशदअ, ता तियां हाका लाई बोलदैं लागै, “हे दाऊदे शोहरूआ, हाम्हां लै कर दैया।” 31 लोग लागै तिन्नां लै झांश काढी करै बोलदैं कि चुप्पी रहा, पर तियां लागै होर बी ज़ादै लैळा लांदै और बोलदैं कि “हे दाऊदे शोहरूआ, हाम्हां लै कर दैया।” 32 तैबै प्रभू यीशू खळै उझूई करै तियां शादै और बोलअ, “तम्हें इहय किजै चाहा कि हूँ तम्हां लै करूँ?” 33 तिन्नें प्रभू लै बोलअ, “हे प्रभू: हाम्हें चाहा इहय कि म्हारी आच्छी लोळी खुल्ही और हाम्हां का लोळी धेछदअ लागअ।” 34 प्रभू यीशू फिरी तिन्नें झीण और तिन्नें आच्छी छुई और तिन्नां का लागअ तेभी धेछदअ और तियां बी लागै प्रभू यीशू पिछू हाडदैं।

### येरुश्लेमें विजय प्रवेश करणअ

(मरकुस 11:1-11; लूका 19:28-40 यहुन्ना 12:12-19)

21 जाऊं तियां येरुशलेमा नेळ पुजै, और जैतून धारा सेटा बैतफुगै सेटा आरे ता यीशू मसीह आपणें दुई चेलै इहय बोली करै भेजै कि 2 आपणें सहनै एऊ गराऊरे नाशा और तिधी पुजधी भेटणीं तम्हां एक गाधी बाही दी और तेसा संघै भेटणअ तम्हां तेसरअ एक बच्चअ; ता तेऊ आणें तम्हें खोल्ही करै मूह सेटा लै। 3 जै तम्हां का कुंण किजै पुछे, ता तम्हें बोलै इहय कि प्रभू आसा एऊओ काम; तेखअ भेजणअ तेऊ सह गाधटू तेभी तम्हां संघै। 4 अह हुअ तै कि याशायाह भबिश्याबाणीं करनै आळै जुंण बोलअ त सह पूरअ होए कि

5 “सियोने बेटी लै बोला इहय कि हेर, तेरअ राजअ आअ ताह सेटा लै, सह आसा नम्र और सह आसा गाधै दी बेठअ द; इधी तैणीं कि लादू गाधै परैदैं।” 6 चेलै बी जिहअ प्रभू बोलअ तिहअ ई किय। 7 तिन्नें गाधी और तेसरअ शोहरू आणीं करै तिन्नां परैदैं आपणें चादरू पाए, और प्रभू यीशू बेठअ गाधै परैदैं। 8 ता कई लोगै छैरे आपणें झिकळै बाता और लोगै नरम शांळटी बी छैई काटी करै बाता। 9 जुंण लोगे छुंड आजू-पिछू हांडदैं तै लागै दै, तियां तै ज़ोरै-ज़ोरै बोलदैं लागै दै कि दाउदे संतान, जै-जैकार; धनबान आसा सह जुंण प्रभूए नाऊंरे एछा, तेऊए सरगै बी जै-जैकार। 10 जाऊं प्रभू यीशू येरुशलेमें पुजअ, ता सारी नगरी मचअ हालअ-गोलअ और लोग लागै बोलदैं कि अह कुंण आसा? 11 तैबै लोगै बोलअ कि अह आसा गलिले नासरत गराऊंओ भबिष्याबगता।

### मांदरा का बपारी दळाऊणें

(मरकुस 11:15-19; लूका 19:45-48; यहुन्ना 2:13-22)

12 प्रभू यीशू परमेश्वर मांदरै नाशी करै तियां सोभ भगाऊरे जुंण मांदरा भितरी लैण-दैन करदैं तै लागै दै, और सरफिए ठेलै और कबुतर और भेडा बाकरी बेचणें आळै थहळी पाई ढोळी। 13 प्रभू तिन्नां लै बोलअ, “शास्तरा दी आसा लिखअ द कि मेरअ घरअ हणअ प्राथणो घरअ” और तम्हें आसा डाहअ द अह बणाई डाकुए खोख।”

14 तेखअ काणें और लेंगळे आरे प्रभू यीशू सेटा लै और तेऊ किये तियां सोभ राम्बळे। 15 पर जाऊं माहायाजकै और शास्त्री ईयां नोखै और सामर्थी काम जुंण प्रभू यीशू मसीह किये तै और लान्हें मांदरा दी यीशू लै दाऊदे संतान और जै-जैकार करदैं भाळै ता तियां प्रभू यीशू लै गुस्सै दी बोलदैं लागै, “ताखा शुळ्किआ बी कि ईयां कै लागै दा बोलदैं?” 16 प्रभू यीशू तिन्नां लै बोलअ, “हां, तम्हें कै इहय पहळअ नि लान्हें शोहरूए खाखा का की तंए स्तुति सिध।” 17 तेखअ नाठअ प्रभू तिन्नां छाडी नगरी बागै बेतनियाह गराऊंआ लै और राच काटी तिन्नें तिधी।

### फळा बिणहीं अंजीरो बूट

(मरकुस 11:12-14; 20-24)

18 दोती जाऊं सह नगरी लै बापस फिरअ ता तेऊ आई भुखै। 19 ता बाते कनारै भाळअ प्रभू एक अंजीरो बूट; ता प्रभू नाठअ तेऊ सेटा लै; पर तेथ नि पाचा छाडी होर किछ त, इहय भाळी प्रभू तेऊ अंजीरे बूटा लै बोलअ, “ऐबै नि एभा पोही लोळी ताह दी कधि फळ लागै” और सह अंजीरो पेळ शुका नढैऊरे। 20 इहय भाळी चेलै हुए रहैण और तियां लागै बोलदैं कि अह अंजीरो बूट किल्है शुका? 21 प्रभू यीशू तिन्नां लै उत्तर दैनअ, “हूँ खोजा तम्हां का सच्चाई कि जै तम्हें विश्वास डाह और शक ना करे, ता तम्हें सका इहय करी जुंण एऊ अंजीरे बूटा संघै किय, और जै तम्हें एसा धारा लै बी बोले कि ईधा का नाश पेछुई करै समुंदरा लै ता इहय बी जाणअ हई।” 22 जिहअ बी प्राथणो करी करै तम्हें मांगे, तियां सोभ गल्ला जाणीं तम्हां भेटी।

### यीशूए हको सुआल

(मरकुस 11:27-33; लूका 20:1-8)

23 प्रभू यीशू त मांदरै नाशी करै उपदेशा दैंदअ लागअ द, तैबै माहायाजकै और लोगे मुखिए तेऊ सेटा एछी करै पुछअ, “ताह्णै इन्नां कामां करनेओ हक कुणीं दैनअ? और ताह इन्नां करनेओ किजै हक आसा?” 24 प्रभू यीशू तिन्नां लै उत्तर दैनअ, “हूँ पुछा तम्हां का एक गल कि; जै तम्हें मुखा खोजे, तै खोजणअ मूह तम्हां का बी कि इन्नां कामां करनेओ मूह किजै हक आसा।” 25 “यहून्नां बपतिस्मअ कसरी तरफा का थिय? स्वर्ग तरफा का कि संसारे माळुए तरफा का?” तैबै तियां आप्पू बिचै बाद-बिबाद करदैं लागै कि जै हाम्हें इहय बोले कि स्वर्गा का, तै एऊ बाळणअ हाम्हां लै इहय कि तै तम्हें तेऊओ विश्वास किल्है नि किय? 26 और जै हाम्हें इहय बोले कि संसारे माळुए तरफा का, तै ईयां लोग हणै म्हारै खलाफ किल्हैकि ईयां मना यहून्ना भबिश्याबाणीं करनैआळअ। 27 ता तैबै तिन्नें प्रभू यीशू लै उत्तर दैनअ कि हाम्हां का नि थोघै; और प्रभू बी तिन्नां लै बोलअ कि “तै हूँबी नि तम्हां का खोजदअ कि इन्नां कामां करनेओ मूह किजै हक आसा।”

### दुई शोहरूओ दृष्टांत

28 “तम्हें किजै समझा? एकी आदमिंए तै दुई शोहरू; तेऊ पैहलै शोहरू सेटा नाशी करै बोलअ, “हे बेटा, आझ कर तूह अंगूरे बगिचै दी काम।” 29 तेऊ दैनअ ज़बाब कि हूँ नि चालअ, पर बादा का हुअ तेऊ पचताअ और सह नाठअ बगिचै लै कामा करदअ। 30 तेखअ तेऊ दुजै शोहरू लै ढेअ किय कि हे बेटा, तूह कर आझ अंगूरे बगिचै दी काम, तेउ बोलअ हां बाप्पूजी हूँ चालअ एभी नाशी, पर सह नि नाठअ। 31 इन्नां दुई मांझे कुणीं कीई बापुए इछा पूरी? तिन्नें उत्तर दैनअ कि पैहलै। तैबै यीशू तिन्नां लै बोलअ, “हूँ खोजा तम्हां का सच्चाई कि चंदै गराहणें आळै बूरे और बेश्या पुजणें तम्हां का पैहलै परमेश्वर राजा दी।” 32 किल्हैकि यहून्ना आअ धर्म रसतै तम्हां सेटा लै, पर तम्हें नि तेऊओ भरोसअ किय, पर तिन्नें बुराईए चंदै गराहणें आळै और बेश्या किय तेऊए गल्लो भरोसअ; और तम्हें नि इहय भाळी करै बादा का बी पचताए बी आथी कि तेऊओ भरोसअ करे।”

### दुष्ट किसानों दृष्टांत (मरकुस 12:1-12; लूका 20:9-19)

33 एक होर दृष्टांत शुणां, "एक घरमालक थिय, तेऊ लाअ अंगूरो बगिचअ और तेता चऊ बाखा लाए बाळ-शोहळ और बिचै बणांअ एक बडअ गदाम और होरी जिमिंदारा लै डाहअ तेतो ठेकअ देई और आप्पू नाठअ परदेसा लै। 34 जांऊं अंगूरो सिजन नेळ आअ, ता तेऊ भेजै आपणें नोकर चाकर अंगूरा चोळदें तिन्ना जिमिंदारा सेटा। 35 पर तिन्नै जिमिंदारै तियां नोकर चाकर विक्के और कोई पाए मारी और कोई लै दैनअ पाथरो ढो। 36 तेखअ भेजै तेऊ आपणें होर बी खास्सै नोकर चाकर और सेऊआकार अंगूरा चोळदें पर तिन्नै जिमिंदारै किय तिन्नां संघै बी तिहअई। 37 आखरी दी भेजअ तेऊ आपणअ शोहरू तिन्नां जिमिंदारा सेटा लै कि मेरे शोहरूओ ता हेरनअ तिन्नां आदरमान करी। 38 पर तिन्नै तेऊ शोहरू भाळी आप्पू बिचै गला की कि अह ता तेऊओ आद-लुआद आसा, एछा, अह पाणअ हाम्हां मारी तेखअ हणअ एऊ अंगूरे बगीचै दी म्हारअ ई कबजअ। 39 तिन्नै बी सह अंगूरे बगिचै का बागै नियं और सह पाअ मारी। 40 तैहीता ऐबै जांऊं अंगूरे बगिचैओ मालक एछणअ ता तिन्नां ठेकै लगैआळै जिमिंदारा संघै सांचा कि तेऊ किजै करनअ? 41 तिन्नै प्रभू लै उत्तर दैनअ, तेऊ करनै तियां बुरै लोगा जिहै मारी खतम और अंगूरे बगिचैओ ठेकअ दैणअ तेऊ होरी लै, जुण हर सिजनै ठिक बगती तेऊ लै अंगूरे फसल चोळी दैए। 42 प्रभू यीशू तिन्नां लै बोलअ, "तम्हें कै कधि पबित्र शास्त्रा दी इहय पढळअ नि आथी कि 'जसा पाथरा लै राजमिस्त्री इहय बोलअ कि अह नि किछु कामों आथी', सह पाथर बणांअ तेऊ कुंणीए जान?" "अह हुअ परमेश्वरे मरजी दी, और म्हारै भाळदी-भाळदी हुअ नोखअ। 43 तैहीता हूँ तम्हां लै बोलअ कि स्वर्गों राज करनअ तम्हां का दूर और सह दैणअ एही ज्ञाती लै जुण तेते फळ आणें।" 44 "जुण एसा ज्ञानी परेदे पळे, तेऊए हणी छणी छिकरी; और जसा परेदे अह ज्ञान पळे, सह हणअ पिशुई करै छारा जिहअ बरीक।" 45 माहायाजक और फरिसी गारे प्रभुओ अह दृष्टांत समझी कि अह आसा लागअ द म्हारै बारै बोलदअ। 46 तिन्नै चाहअ त इहय कि अह ढाकणअ हाम्हां पर तिधी डरै तियां लोगा का; किल्हैकि तियां मना तै प्रभू यीशू भबिष्याबगता।

### बैहे धामों दृष्टांत (लूका 14:15-24)

22 एसा गला समझी लागअ प्रभू यीशू मसीह तिन्नां का होर बी दृष्टांता दी गला करदअ। 2 प्रभू बोलअ कि स्वर्गोंओ राज आसा तेऊ राजै जिहअ जुंणीं आपणें शोहरूओ बैह किय। 3 तेऊ आपणें सेऊआकार भेजै कि सोभी रिशतैदारा शादा बैहे धामा खांदै; पर तियां निं आए। 4 तेखअ भेजै राजै भी आपणें सेऊआकार छदैहरू कि जसा लै छांदअ किय द आसा, तिन्नां लै बोला इहय कि हेरे, मंए हेरी धाम खाणा लै तैर करी और खुदै धाचै दै गाभू-छेलू हेरे मंए काटी और सोभ गला गुई बणीं, तम्हें एछा ऐबै धामा खांदै एभी। 5 पर तिन्नै निं तेसा गले परबाह की, तियां लागै हांददै; कोई आपणें खेचा लै और कोई आपणें होरी कमा-काजा करदै। 6 ता जुण एता का बचै, तिन्नै कीई तिन्नां सेऊआकारा छदैहरूए जिदें मारै बेइजती और तियां पाए मारी। 7 तैबै राजै आई रोशै, और आपणीं फूऊज भेजी करै तियां हत्या करनै आळै पाए मारी और तिन्नै नगरी घअर बण और परिवार कियै नाश। 8 तेखअ तेऊ आपणें सेऊआकारा लै बोलअ, "बैहे धाम ता गुई तैर हई और जसा लै छांदअ किय त तियां निं धामा खाणें लाईक हुए, 9 तम्हें करा इहय, बाता चऊकै जेतरे लोग तम्हां भेटे, तिन्नां आणां सोभी धामां खांदै शादी।" 10 तैबै तिन्नै सेऊआकारै बी किय तिहअई, तियां सळके कनारै और चऊकै नाठै और कै भलै, कै बुरै, जेतरे बी तिन्नां भेटै तिन्नै कियै तियां सोभ कठा और बैहो घअर हुअ पाहूणें करै भरी।

11 जांऊं राजअ पाहूणें भाळअ भितरा लै आअ ता तेऊ भाळअ एक आदमी तिधि इहय कि तेऊ निं बैहे झिकळे आथी तै बान्है दै। 12 राजै तेऊ का पुछअ कि "हे साथी, तूह बैहे झिकळे बान्है बगैर इधा लै किल्है आअ?" सह हुअ नडक। 13 तैबै राजै आपणें सेऊआकारा लै बोलअ, "एऊए हाथ खूर

बाह्वां और तेखअ पाआ एऊ न्हैरी खुडी दी, तिधी लूअ लेरनअ और दांद पिशणअ। 14 किल्हैकि शादै दै ता आसा बडै भारी पर चुनै दै आसा थोळै।

### राजै कैसरा लै कारअ दैणअ (मरकुस 12:13-17; लूका 20:20-26)

15 तैबै फरिसी तिधा का नाशी करै आप्पू बिचै बचार किय कि एऊ यीशू किहअ करै फसाऊईए? 16 तैबै तिन्नै आपणें चेलै चाकर हरोदिआ संघै प्रभू यीशू लै इहय बोलदें भेजै कि "हे गुरू, हाम्हें ज्ञाणां एसा गला कि तूह आसा सचअ, और परमेश्वरे गला सखाऊआ तूह सच्चाई दी, और तूह नि किछी गले परबाह करदअ किल्हैकि तूह नि माहूणें मूहा भाळी गला करदअ। 17 इहय करै तूह समझाऊ कि एसा गले बारै तूह हाम्हां लै कै राय दैआ कि कैसर राजै लै कारअ दैणअ ठीक आसा कि नाई? 18 प्रभू यीशू मसीह हेरी तिन्नै मने बुराईओ भेद समझी और तिन्नां लै बोलअ, "हे कपटिओ, तम्हें मूह परखदें किल्है आसा लागै दै?" 19 तेऊ कारेओ सिक्कअ रहैऊआ मुखा, तैबै तिन्नै प्रभू सेटा एक दिनारो सिक्कअ आणअ। 20 प्रभू यीशू तिन्नां का पुछअ, "एऊ सिक्कै दी अह मुर्ती और नांअ कसरअ आसा?" 21 तिन्नै उत्तर दैनअ कि एथ आसा कैसर राजेओ नांअ और मुर्ती। तैबै प्रभू यीशू तिन्नां लै बोलअ, "जुण कैसर राजेओ आसा, तेऊ दैआ कैसर राजै लै और जुण परमेश्वरो आसा, तेऊ दैआ परमेश्वरा लै।" 22 एसा गला शुणीं हुए तियां रहैन और तियां लागै प्रभू यीशू मसीह छाडी हांददै।

### आदमीओ भी जिऊणअ और बैह (मरकुस 12:18-27; लूका 20:27-40)

23 तेसाई धैळी सदुकी जुण इहय बोला कि मूणें दै आदमीओ भी जिऊणअ नि आथी, तियां प्रभू सेटा लै आये और तिन्नै पुछअ, 24 "हे गुरू, मुसा नबी आसा इहय बोलअ द कि जै कुण बगैर आदी लुआदी हुए मरे, ता तेऊए बेटळी संघै सका तेऊओ भाई बैह करी और तेऊलै सका लुआद पैदा करी? 25 ऐबै म्हारै तै एकी जैगा सात भाई, पैहलअ भाई मूअ बैह करी करै और तेऊए निं आद लुआद हुई ता तेऊए बेटळी लागी दुजै संघै रहंदी। 26 पर दुजै और चियै संघै बी हुअ इहयई, इहय करै तिन्नां साता भाई तैणीं रह इहयई हंदअ लागी। 27 तिन्नां सोभी मरनै का बाद खिरी सह बेटळी बी मूई। 28 ता जै तियां जांऊं भीई जिऊई उझिए, तै सह बेटळी तिन्नां साता भाई मांजै कसरी बेटळी लीं? किल्हैकि तेसा त तिन्नां सोभी संघै बैह हेरअ द करी।" 29 प्रभू यीशू तिन्नां लै उत्तर दैनअ कि "तम्हें निं पबित्र शास्त्रा और परमेश्वरे सामर्था जाणदें, इहय करै आसा तम्हें भूला दी पळे दै। 30 किल्हैकि जिऊई उझुई करै (पुनरुत्थान हई करै) निं बैह शादी हणीं; पर तियां हणें सबणें परमेश्वरे दुता जिहै। 31 पर मरी करै जिऊंदै हणें बारै तम्हें शास्त्र निं पढळअ आथी! जुण तम्हां का परमेश्वरै बोलअ द आसा कि, 32 "हूँ आसा अब्राहमों परमेश्वर, और इसहाको परमेश्वर, और याकुबो परमेश्वर?" सह निं मूणें आदमीओ परमेश्वर आथी पर सह आसा जिऊंदैओ।" 33 प्रभूए एऊ उपदेशा शुणीं हुए लोग रहैन।

### सोभी का बडी आज्ञा (मरकुस 12:28-34; लूका 10:25-28)

34 जांऊं फरिसी शुणअ कि तेऊ की सदुकिए बोलती बंद; ता तियां हुए कठा। 35 ता तिन्नां बिचै एकी शास्त्रा जाळणें आळै आदमी प्रभू परखणा लै पुछअ, 36 "हे गुरू, शास्त्रा दी कुण जेही आज्ञा आसा बडी?" 37 प्रभू तेऊ लै बोलअ, "तूह आपणें प्रभू परमेश्वरा लै करै आपणें सारै मना, सारै प्राणां और सारी बुधी करै प्रेम। 38 बडी और पैहली आज्ञा आसा अहई, 39 और एसाई बराबर दुजी बी आसा एही आज्ञा कि तूह कर आपणें संघी साथी संघै आप्पू बराबर प्रेम। 40 ईयांई दूई आज्ञा आसा सारै शास्त्रा और भबिष्याबाणीं करनै आळैए आथरी।"

**मसीह कसरअ शोहरु आसा**  
(मरकुस 12:35-37; लूका 20:41-44)

41 जांऊं फरिसी एकी जैगा कठा तै हूए दै, ता प्रभू यीशू तिन्नां का पुछअ, 42 “मसीहे बारै तम्हें कै समझा? सह कसरअ शोहरु आसा?” तिन्नां दैनअ उत्तर कि ‘दाऊदो’। 43 तैबै प्रभू तिन्नां का पुछअ, “तै दाऊद आत्मा दी हई करै तेऊलै प्रभू किल्है बोला?” 44 “सह बोला इहय कि, प्रभू मेरै प्रभू लै बोलअ; मेरै दैहणै बेश, जेभै तैणीं कि हूँ तेरै बैरी तेरै खुरा हेठै नां करू।” 45 “भला, जै दाऊद तेऊ लै प्रभू बोला, तै सह तेऊओ पुत्र किल्है हुअ?” 46 एऊ सुआलो जुआब निं कोए बी दैई सकअ; और तथा पोहीं निं प्रभू का सुआला पुछणें हिम्मत कोही पळी।

**शास्त्री और फरीसी का चतैन**  
(मरकुस 12:38,39; लूका 11:43,46; 20:45,46)

23 तैबै प्रभू यीशू तिन्नां लोगा लै और आपणें चेलै लै बोलअ, 2 “शास्त्री और फरिसी आसा मुसा नबीए जैगा दी बेठै दै, 3 इहय करै तियां जिहअ बी तम्हां लै बोले, तिहअ करै और मनै; पर तिन्नां जिहै काम निं करी; किल्हैकि तियां बोला ता बोला पर करदैं निं आथी। 4 तिन्नां का आसा ईहै भारी बोझै जुंण तियां चकी निं सकदैं, तेता लादा तियां होरी आदमिए पिठी; पर आप्पू निं उटअ पाच तुआणअ करनअ चाहंदैं। 5 तियां करा आपणै सोभ काम लोगा रहैऊणा लै; तियां करा आपणें गळा दी जंतरा खुल्लै और आपणै झीकळैए पाळै करा लाम्मैं। 6 हर जैगा दी लोळी तिन्नां सोभी का बधिया रहणा लै और सभा दी लोळी तिन्नां खास-खास मुखिए जैगा बेशणा लै। 7 बजारै लोळी तिन्नां लै सोभी महाराज किय और जै तिन्नां लै गुरुजी बोलअ तै हआ तियां खुश। 8 पर तम्हें निं आपणें आप गुरू बणीं, किल्हैकि थारअ आसा एकै गुरू, और तम्हें सोभ आसा आप्पू मांझै भाई-भाई। 9 धरती दी निं कोही लै आपणअ बाब बोली किल्हैकि थारअ आसा एकै बाब जुंण स्वर्गें आसा। 10 नां ता आपणें आप मालक बणीं; किल्हैकि थारअ आसा एकै मालक, मतलब मसीह, 11 जुंण तम्हां मांझै बडअ होए, सह बणें पैहलै थारअ सेऊआकार। 12 जुंण बी आपणें आप बडअ बणें, सह करनअ होछअ। और जुंण बी आपणें आप होछअ बणें, सह करनअ बडअ।

**शास्त्री और फरीसीए पाखंडे मखभरी**  
(मरकुस 12:40; लूका 11:39-42,44,52; 20:47)

13 हे कपटी शास्त्री, फरिसीओ, तम्हां लै हाय! तम्हें करा माह्लूए स्वर्गें दुआर बंद, ना ता आप्पू तेथ नाशदैं, और ना होरी नाशणें दैन्दैं। 14 हे कपटी शास्त्री फरिसीओ, तम्हां लै हाय! तम्हें पा बिधबे घरा बणां खाई और होरी का रहैऊणा लै करा तम्हें बडी देर तैणीं प्राथणां, तैहीता सोभी का जादी सजा तम्हा भेटणीं।

15 हे कपटी शास्त्री फरीसीओ, तम्हां लै हाय! तम्हें करा एकी आदमीं आपणें पक्षा लै आळणें तैणीं माटअ-पाणीं कठा और जांऊं सह पक्षा दी एछा ता तेऊ पा आप्पू का दुगणें नरका दी।

16 हे काणें मुखिएओ, तम्हां लै हाय! जुंण इहय बोला कि जै कोई मांदरे कसम खाए ता तेतो निं किछे हंदअ पर जै कुंण मांदरे डाहैं दै सुनेए कसम खाए ता तेऊ लै लागणअ दोष। 17 हे मुखों, और काणेंओ, बडअ कुंण आसा, सुन्नअ कि सह मांदर जसा करै सुन्नअ पबित्र हआ? 18 तेखअ बोला इहय कि जै बेदीए कसम खाए ता तै निं किछे हंदअ, पर जुंण भेंट तेथ दी चढाऊई दी आसा, जै तेते कसम खाए ता तेऊ लागणअ दोष। 19 हे काणेंओ, बडअ कुंण आसा, सह भेंट कि सह बेदी; जसा करै सह भेंट पबित्र हआ? 20 तैहीता जुंण बेदीए कसम खाआ, सह खाआ तेसा बेदीए और तेथ परंदै डाही दी भेटा दुहीए कसम। 21 जुंण मांदरे कसम खाआ, सह खाआ तेऊ मांदरे और तेऊ दी रहणें आळै दुहीए कसम। 22 जुंण स्वर्गें शपथ खाआ सह खाआ तेऊ स्वर्गें सिंघासणा और तेथ परंदै बेठै दै दुहीए कसम।

23 हे कपटी शास्त्री और फरिसीओ, तम्हां लै हाय! तम्हें दैआ पदिनैए, सुंफो और जीरैओ दसुअ भाग पर तम्हें बिधि बधाने जरूरी गल्ला आसा हेरी

दी छाडी। हुअ ता लोळी त इहय कि तम्हें इन्नां जरूरी गल्ला बी मंदै रहंदैं और तिन्नां बी नाई छाडदैं। 24 हे काणें मुखियैओ, तम्हें फेऊळै ता छान्हां पोहीं पर ऊँट पा घुटी।

25 हे कपटी शास्त्री और फरीसीओ, तम्हां लै हाय! तम्हें मांजा कऊली और थाळू परंदै-परंदै का पर भितरा का हआ तियां धोखे और बुराई करै भरै दै। 26 हे आंधे फरीसीओ, पैहलै मांजा कटोरै और थाळू भितरा का ताकि तियां बागा का बी साफ होए।

27 हे कपटी शास्त्री और फरीसीओ, तम्हां लै हाय! तम्हें आसा चुनै लाई दी भिती जिहै जुंण बागा का ता धेछिआ चमकदार पर भितरा का हआ तियां काळी। 28 ठीक इहयई तम्हें बागा का ता धेछिया धरमीं आदमीं जिहै, पर भितरी आसा थारी बुराई और छळ कपट भरअ द।

**शास्त्री और फरीसी लै सजा एछणें भविष्याबाणीं**  
(लूका 11:47-51)

29 हे कपटी शास्त्री और फरीसीओ, तम्हां लै हाय! तम्हें भविष्याबगते समाधी सजाऊआ और धरमिए समाधि बणांआ, 30 तेखअ बोला इहय कि जै हांम्हें आपणें बाब दादेए जमानें दी हंदै ता हांम्हां निं धरमीं आदमीए हत्या करदैं तै। 31 इहय करै दैआ तम्हें आप्पू लै आप्पू ग्वाही कि तम्हें आसा तिन्नां भविष्याबाणीं करनै आळै हत्या करनै आळैए आद लुआद। 32 इहय करै भरा तम्हें आपणें बाब दादेए पापे घळै। 33 हे शपैळो, हे करते शोहरुओ, तम्हें नरके सजा का किहअ करै बचणें? 34 तैहीता भाळा, मूँह भेजणें तम्हां सेटा लै भविष्याबगता, बुधिमान और शास्त्री; और तम्हां पाणें तिन्नां बिचै कई मारी और क्रूसा दी छडाऊणें और कई चिकणें तम्हां आपणीं सभा दी कोळै करै और एकी नगरी का दुजी नगरी लै फिरनै तम्हें तिन्नां दळाऊंदै। 35 जसा का धरमीं हाबिला ओहीं बिरक्याहे शोहरु जकरयाह तैणीं, जुंण तम्हें मांदरा और बेदी बिचै मारी पाअ त, जेतरे धरमिओ खून धरती दी बगअ, तेतो पाप दोष पळनअ सारअ थारै मुंडै। 36 हूँ खोजा तम्हां का सच्चाई कि “ईयां सोभ गल्ला एछणीं इन्नां आज्ञाकालकै जमानेए लोगा लै।”

**येरुश्लेमा लै मखाण**  
(लूका 13:34,35)

37 “हे येरुशलेम, तूह जुंण भविष्याबगता मारी पाआ, और जुंण ताहा सेटा लै आसा भेजै दै, तिन्नां लै दैआ तूह पाथरो ढो, और केतरी बारी मंएँ चाहअ कि जेही मुरगी आपणें बच्चै आपणें फेंखा हेठै कठा करा, तिहई हूँबी तेरै बच्चै कठा करू, पर तंएँ निं चाहअ। 38 हेरा, थारअ घअर छाडअ तम्हां लै नबारसअ। 39 किल्हैकि हूँ बोला तम्हां लै कि एभा पोहीं जेभै तैणीं तम्हें इहय नाई बोले, कि धन्य आसा सह जुंण प्रभुए नांऊंए एछा, तेभै तैणीं निं हूँ तम्हां का भीई धेछणअ।”

**मांदरे बनाशे भविष्याबाणीं**  
(मरकुस 13:1,2; लूका 21:5,6)

24 जांऊं प्रभू यीशू मसीह मांदरा का निखळी करै हांढदअ लागअ, ता चेलै लागै प्रभू सेटा मांदरे कलाकारी रहैऊंदै। 2 प्रभू तिन्नां लै बोलअ तम्हें कै इन्नां सोभी गल्ला भाळदैं निं आथी? हूँ खोजा तम्हां का सच्चाई कि इधी निं एक पाथरा परंदै पाथर बी इहय छुटणअ जुंण ढोळणअ निं आथी।

**सांगट और क्लेश**

(मरकुस 13:3-13; लूका 21:7-19)

3 जांऊं प्रभू जैतूने धारा दी बेठअ द थिय, ता चेलै कांगनरांगे प्रभू सेटा लै एछी करै बोलअ, “हांम्हां का खोज कि ईयां गल्ला केभै हणीं? तेरै एछणेंओ और एऊ संसारा खतम हणेंओ कै चिन्ह हणअ?” 4 प्रभू यीशू तिन्नां लै बोलअ, “चतैन रहा, कसरै धोखे दी निं एछी। 5 किल्हैकि कई हणें ईहै जुंण मेरै नाऊंए एछणें और तिन्नां बोळणअ इहय कि मसीह आसा हांम्हें ई, और कई पळणें एऊ धोखे दी। 6 तम्हां शुळणी लळाई झगळे चरचा; हेरे, एता शुणीं करै निं तम्हें हैळुई, किल्हैकि इनो हणअ आसा जरूरी, पर तेभै निं अंत

हणअ। 7 किल्हैकि ज़ाती करनअ ज़ाती लै और देशा करनअ देशा लै घात और कई ज़ैगा पळणें माहा नकाळ, और ज़ाजरी हणीं। 8 ईयां सोभ गल्ला हणीं दुख तकलिफे शुरूआत। 9 दुखा दैणा लै ढाकणें तिन्नां तम्हां, और तम्हें पाणें तिन्नां मारी और मेरें नांऊंआ करै करनीं सोभी ज़ाती तम्हां संघे ज़िद। 10 तेभें लागणीं तम्हां बिचै कई टोहळ और एकी दुजेए हणें बैरी। 11 बडै भारी झूठै भबिष्याबाणीं करनै आळै उझणें खळै और कई पाणें तिन्नां धोखै दी, 12 जांऊं अधर्म बढणअ ता कईओ प्रेम पळणअ फिकअ। 13 पर जुंण आखरी तैणीं धीर धरे, तेऊओ हणअ उध्दार, 14 राईसिए सूसमाचारो परचार हणअ सारै संसारा दी ताकि सोभी लोगा लै ग्याही होए और तेखअ हणअ अंत।

### माहा सांगटे शुरूआत

(मरकुस 13:14-23; लूका 21:20-24)

15 तै तम्हें तेसा नाश करनै आळी बूरी गल्ला, जसरी चरचा दानिएल भबिष्याबाणीं करनै आळै की ती, पबित्र ज़ैगा दी खट्खुई दी भाळे, (जुंण पट्ळे, सह समझे)। 16 तेभें जुंण यहूदिया दी होए, तियां दुहरै धारा लै, 17 और जुंण घरा भितरी होए, तियां नि किछू समाना लंदै घरा का बागा लै निखळी। 18 और जुंण खेचै होए, तियां नि आपणें झिकलै आणदें पिछू नाशी।

19 तिन्नां धैळै जुंण गुरभणीं और दुधा पणेंऊं दी होए, तिन्नां लै हणीं हाय। 20 और प्राथणा रहै करदें लागी कि तम्हां हिंऊंदे धैळै और सबते धैळै भागणअ नां पळे, 21 किल्हैकि तेसा बगती एछणअ इहय दुख क्लेश कि जुंण एऊ संसारे शुरूआता का आझ्र तैणीं कधि नि हुअ और नां कधि हणअ। 22 और ज़ै तियां धैळी घटाऊई नि हंदि, तै नाई त कोई बी प्राणी बचणअ त; पर जुंण चुनै दै आसा, तिन्नें कारण करै घटाऊणीं तियां धैळी। 23 और तेसा बगती जै तम्हां का कोई इहय बोले कि भाळा, मसीह आसा ईधी या इहय बोले कि मसीह आसा तिधी, तेऊओ भरोसअ नि करी।

24 किल्हैकि झूठै मसीह और झूठै भबिष्याबगता उझणें खळै कई, और तिन्नां बडै-बडै आख फलाअ बी करनै एते तैणीं कि जुंण तम्हें चुनै दै आसा, तम्हां बी धोखै दी पाई सके। 25 हेरे, एसा गल्लो डाहै धैन मणें हेरी ईयां गल्ला तम्हां का पैहलै ई खोजी। 26 तैहीता ज़ै तियां तम्हां का बोले कि भाळा, सह आसा जंगलै, ता तम्हें नि बागै निखळी। जै कुंण इहय बोले कि सह आसा कोठरी दी तै तम्हें नि भरोसअ करी।

27 किल्हैकि जेही बिजळी पुर्बा का निखळी करै पछमां दी चंमका तिहअ हणअ मेरअ एछणअ बी। 28 ज़िधी डागअ मूँअ द होए तिधी हणीं गरली बी।

### मांणहूए शोहरुओ फिरी एछणअ

(मरकुस 13:24-27; लूका 21:25-28)

29 तिन्नां धैळीए दुख क्लेशा का बाद सुरज हणअ न्हैरअ, और जोथे चंमक बी पळनीं फिकी और तारै बी चुटणें सरगा का और सरगे सारी शगती हणीं आजू-पिछू। 30 तेभें धेछणअ तम्हां का मेरअ चिन्ह सरगा दी, और तेभें हणें धरतीए सोभ कुल-ज़ातीए लोग हिका पटाकदैं; हूँ भाळणअ तिन्नां बडी शगती दी और बडै ठाहठ-बाहठा और गुणगाना संघे सरगे बादळा बाती एछदअ। 31 मूँह भेजणें नरशिगेए एकी बडै बोला संघे आपणें स्वर्गदूत और तिन्नां सरगे एकि कुणें का दुजै कुणें तैणीं करनै चऊ दिशा का आपणें चुनै दै कठा।

### अंजीरे पेळो उदाहरण

(मरकुस 13:28-31; लूका 21:29-33)

32 अंजीरे पौधै का शिखळा दृशटांता; जेभें तेते डाळी नरम हूआ, और तेता का पाची निखळदी लागी, तै समझा तम्हें कि गरमीए धैळी आसा नेळ एछणें आळी। 33 ठीक इहयई जेभें तम्हें इन्नां सोभी गल्ला हंदि भाळे, ता तेभें ज़ाणें तम्हें कि सह धैळी आसा नेळ, और इहय समझे कि सह आसा थारै दुआरै ई। 34 हूँ खोजा तम्हां का सच्चाई कि जेभें तैणीं ईयां गल्ला हई नाई मुके, तभै तैणीं नि अह पोस्ती खतम हणीं। 35 सरग और धरती टळणें; पर मेरी गल्ला नि टळणीं।

### बिऊधै रहै

(मरकुस 13:32-37; लूका 17:26-30, 34-36)

36 तेसा धैळी और तेऊ बगते बारै नि कोहै ज़ाणदअ, ना स्वर्गदूत, ना पुत्र। तेता ज़ाणा सिधअ पिता परमेश्वर। 37 ज़िहै नुहे धैळै तै तिहअई हणअ मेरअ एछणअ बी। 38 किल्हैकि ज़िहै जल परळ्या का पैहलै जेभें तैणीं नुंह ज़हाजा दी नाई बेठअ, तेभें तैणीं रहै लोग खांदै-पिंदै और तिन्नां बिचै रहा ती बैह शदी हंदि। 39 ज़ांऊं तैणीं तियां जल परळ्या दी नाई बहाऊरे, तेभें तैणीं नि तिन्नां का किछ बी पतअ चलअ। ठीक तिहअई हणअ मेरअ एछणअ बी। 40 तेसा बगती दुई ज़है हणें खेचै, तिन्नां मांझै एक चकणअ उझै और एक छाडणअ तिधी। 41 दुई बेटळी हणीं घरटा पिशदी, एक चकणीं उझै और दुजी छाडणीं तिधी। 42 तैहीता बिऊधै रहै, किल्हैकि तम्हें नि ज़ाणदै कि थारअ प्रभू केभै एछणअ। 43 पर इहय लूआ समझी की जै घरे मालका का इहय पतअ हंदअ कि चोर केऊ पहरै एछणअ, ता तै रहणअ त तेऊ बिऊधै और आपणें घरै नि देंणीं ती तेऊ चोरी हणें। 44 ठीक इहयई तम्हें बी रहा हमेशा तैर, किल्हैकि ज़हा बगते बारै तम्हें सोचदै बी नि आथी, तेभैई एछणअ हूँ।

### बिश्वासा करने जोगी दास और दुष्ट दास

(लूका 12:41-48)

45 ता, इहय बिश्वासा करनै जोगी और बुधिमान माळुं कुंण आसा जुंण तेऊए मालक आपणें नोकर चाकरा परंदै मेट बणाअ; ताकि तिन्नां लै रोटी पाणीं करे दैई? 46 धन्य आसा सह दास, ज़हा तेऊओ मालक एछी तेऊ इहयई करदै भाळे। 47 हूँ खोजा तम्हां का सच्चाई कि तेऊ बणाणअ सह आपणीं सारी संपत्तिओ भडारी। 48 पर ज़ै सह दुशत दास इहय सोचदअ लागे कि मेरे मालक एछणा लै आसा मैची देर, 49 और इहय समझी करै आपणें साथी चिकदअ लागे, और शराबी संघे खाए पिए, 50 ता तेऊ दासो मालक एछणअ एही बगती, जेभें सह न्हैळअ नि होए लागअ द। और इहै बगते कि सह नि ज़ाणदअ और 51 तेऊ लै भेटणीं एही सज़ा ज़ेही कपटी लै हूआ और तिधि हणअ लेरनअ और दांद पिशणेंओ काम।

### दसा कुंआरीओ दृष्टांत

25 तैबै स्वरगो राज हणअ तिन्नां दस कुंआरी ज़िहअ जुंण आपणें-आपणें मसलै ज़ाळी निखळी आपणें दुल्है का मिलदी। 2 तिन्नां बिचै ती पांज मुख पर पांज ती समझदार। 3 तिन्नें मुखै आपणें-आपणें मसलै ता ज़ाळी करै नियें; पर आपणें हाथै तेल नि नियें। 4 पर तिन्नें समझदारै पाई आप्पू संघे तेले कुप्पी बी भरी करै। 5 ज़ांऊं दुल्है एछणा लै देरी पळी ता तिन्नां लागी राची निजा करै उंघी, और बादा का तियां सुती।

6 आधी राची मची गाज़ै-बाज़ेए धूम, कि हेरा दुल्हअ आअ और तेऊ सेटा मिलदैं चाला। 7 तैबै तियां दस कुंआरी आपणें-आपणें मसलै ठीक करदी लागी। 8 ता तिन्नें मुखै समझदारा का बोलअ कि आपणें तेला का दैआ थोळअ-थोलअ हाम्हां लै बी, किल्हैकि म्हारै मसलै लागै हिशदैं। 9 पर तिन्नें समझदारै तिन्नां लै उत्तर दैनअ कि "इहय नि हूआ कि अह तेल नां हाम्हां लै पूरअ हआ और ना तम्हां लै, एता का आसा भलअ इहय कि तम्हें आणा हाटी का आप्पू लै होर तेल मोलै लई।" 10 ज़ांऊं तियां हाटी लै तेला मोल लंदी नाठी ता तेतरी गूअ दुल्हअ एछी और जुंण तैर थी तियां ता नाठी तेऊ संघे बैह करी तेऊए घरा लै और दुआर हुअ बंद। 11 एता बाद तियां दुजी कुंआरी बी लागी बोलदी कि "हे मालक, हे मालक, हाम्हां लै बी खोल दुआर पोर्ही।" 12 तेऊ तिन्नां लै ज़बाब दैनअ कि "हूँ खोजा तम्हां का सच्चाई कि हूँ नि तम्हां ज़ाणदअ।" 13 "तैहीता ज़ाणदै रहा, तम्हें ना ता तेसा धैळी ज़ाणदै और ना ता तेऊ बगता ज़ाणदै।

### तोळैओ दृष्टांत

(लूका 19:11-27)

14 किल्हैकि अह आसा तेऊ आदर्मीए दशा ज़िहअ जुंणीं परदेसा लै नाशदी बारी आपणीं सारी सम्पती डाई आपणें नोकरा चाकरा का सभाळी। 15 तेऊ

दैनै एकी का पांज तोळे, दुजै लै दुई तोळे ता चिउथे लै एक तोळअ; मतलब हरेकी लै जेतरअ जुंण सबाळी सका; तेतरअ-तेतरअ दैनअ और आप्पू नाठअ सह परदेसा लै। 16 तैबै जसा लै तेऊ पांज तोळे दैनै तेऊ किय नडैऊए तेता करै लैण-दैन शुरु और तिहअ करै तेऊ खटै तेता करै पांज तोळे होर। 17 इहय करै जसा लै दुई तोळे दैनै तै तेऊ बी खटै दुई होर। 18 पर जसा लै एकै तोळअ भेटअ त, तेऊ खणअ एक खाड संघा सह तेऊए मालक दैनअ द र्पई डाहअ तेऊ तेथ दाबी।

19 तेखअ हूअ इहय कि कई धैळै बाद जांऊं तिन्नां नोकर चाकरो मालक घरा लै बापस आअ और तिन्नां का साबा कताबा लंदअ लागअ, 20 ता जहा लै पांज तोळे दैनै तै, तेऊ पांज तोळे आणी करै मालक लै बोलअ, “हे मालक तंए जुंण मुल्है पांज तोळे सबाळै तै, भाळ; तेता करै खटै मंए पांज तोळे होर।” 21 तेऊए मालक बोलअ तेऊ लै इहय, “शाबाश, धन्य आसा तूह, तूह आसा रांबळअ और भरोसै करनै लाईक; किल्हैकि तंए किय थोळे दी विश्वास, मूँह बणाणअ तूह खासी चिजो मालक और तूह नाशणअ प्रभूए खुशी दी।

22 इहयई जसा लै दुई तोळे दैनै तै, तेऊ बी दुई तोळे आणी करै बोलअ, “हे मालक तंए जुंण मुखा दुई तोळे सबाळै तै, भाळ मंए खटै तेता करै दुई तोळे होर।” 23 तेऊए मालक तेऊ लै बोलअ, “शाबाश, तूह आसा मेरअ भरोसै लाईक दास तूबी रहअ थोळे दी विश्वासी एबै मूँह बणाणअ तूह खासी गल्लो मालक, और तूबी नाशणअ प्रभूए खुशी दी।”

24 खीरी आअ सह जसा एकै तोळअ भेटअ त, तेऊ बी एछी करै बोलअ, “हे मालक, मुखा त तेरअ थोघ कि तूह आसा बडअ काठअ आदमी। तूह जिधी नाई बूँदअ तिधा का लूआ और जिधी नाई छिगदअ तिधा का झाळा।” 25 तैहीता हूँ डरअ ताखा और मंए डाहअ तंए दैनअ द तोळअ माटै जैदरी चोरी करै दाबी; भाळ, अह आसा सहई जुंण तंए दैनअ त। 26 तेऊए मालक तेऊ लै जबाब दैनअ, “कि हे दुष्ट, आळसी नोकरा, जै ताखा इहय थोघ थिय कि जिधी हूँ नाई बूँदअ तिधा का लूआ और जिधी हूँ नाई छिगदअ; तिधा का झाळा, 27 तै तंए त दैनअ मेरअ र्पई सेठ बपारी का और किछ न किछ हूँ तेऊ का आपणअ धन बैजा संघी ता लंदअ बापस।

28 तैहीता एऊ का मांगा एऊ तोळे बापस और एऊ दैआ तेऊ लै जसा का दस तोळे आसा। 29 किल्हैकि जसा का आसा, तेऊ लै दैनअ होर और तेऊ का हणअ खासअ। ता जसा का नाई आथी; तेऊ का छडैऊणअ सह बी पोही जुंण तेऊका आसा। 30 ता एऊ नकाम्मै नोकरा पाआ बागे न्हैरी खुडी दी जिधी सिधअ लेरनेओ और दांदा पिशणेओ काम आसा।

### न्याये धेळी

31 जांऊं मांहुँओ शोहरू आपणै गुणगाना दी एछणअ, और स्वर्गदूत तेऊ संघे एछणै, तभै हणअ सह आपणै गुणगाना दी आपणै सिंहासणा दी बेटअ द। 32 तैभै सोभै जाती करनी तेऊ सेटा कठा; और जिहअ फुआल बाकरी का भेडा जुदअ करा, तिहई करनै तियां तेऊ एकी दुजै का जुदै। 33 भेडा करनी तेऊ आपणीं दैहणीं पाशळी और बाकरी करनी तेऊ आपणीं बांऊंई पाशळी खळी। 34 तैबै राजै आपणीं दैहणीं पाशळी आळै लै बोळणअ, हे मेरै बापुए धनबान लोगो, एछा, तेसा राईसिए अधिकारी बणा, जुंण तम्हां लै शुरु का ई आसा हेरअ द बणाई डाही। 35 किल्हैकि हूँ त भुखअ और तम्हें दैनअ मुल्है खाणा लै; हूँ त नचिशअ और तम्हें पणैऊंअ मुखा पाणीं, हूँ थिय परदेसी और तम्हें दैनी मुल्है आपणै घरे रहणा लै जैगा। 36 हूँ त नांगअ और तम्हें दैनै मुल्है बाहणां लै झिकळै, हूँ त बमार और तम्हें की मेरी हेर सभाळ, हूँ त जेहल पाअ द और तम्हें आए मूँह सेटा लै हेरा सभाळा।

37 तैभै दैनअ धरमी आदमीं तेऊ लै इहय उत्तर कि “हे प्रभू, हाम्हेँ कधू भाळअ तूह भुखअ कि हाम्हेँ खैऊअ? और तूह कधू त नचिशअ कि ताखा हाम्हेँ पणैऊअ? 38 और हाम्हेँ कधू भाळअ तूह परदेसी कि घरे डाहअ और कधू त नांगअ कि हाम्हेँ ताखा झिकलै भनैऊंए? 39 कधू त तूह बमार और कधू त तूह जेहला दी और कधू आरे हाम्हेँ ताह सेटा लै हेरा सभाळा? 40 तैभै धमीं राजै तिन्नां लै उत्तर दैनअ, “हूँ खोजा तम्हां का सच्चाई कि जुंण तम्हें

इन्नां मेरै होछै का होछै भाई मांझै कसा एकी संघे बी किय, सह किय तम्हें मुल्है।

41 तैबै तेऊ आपणीं बांऊंई पाशळी बाखा आळै लै बोळणअ, हे शापै दै लोगो, मूँह सेटा का नाशा तेसा कधी ना खतम हणै आळी आगी जैदरी जुंण शैताना और तेऊए दुता लै आसा बणाई दी। 42 किल्हैकि जेभै हूँ भुखअ त तैभै निं तम्हें मुल्है रोटी दैनीं, और हूँ त नचिशअ और तम्हें निं मुखा पाणीं बी पणैऊंअ। 43 हूँ त परदेसी पर तैभै निं तम्हें मुल्है आपणै घरे रहणा लै जैगा दैनीं, हूँ त नांगअ और तम्हें निं मुल्है झिकळै दैनै, हूँ त बमार और जेहला दी पर तम्हें निं मेरी हेर सभाळ की।

44 तैभै दैनअ तिन्नां तेऊ लै उत्तर, “हे प्रभू हाम्हेँ कधू भाळअ तूह भुखअ, नचिशअ, नांगअ, परदेसी बमार या जेहला दी, और कधू निं हाम्हेँ तेरी सेऊआ टैहल की। 45 तैभै दैनअ तेऊ तिन्नां लै जबाब कि “हूँ खोजा तम्हां का सच्चाई कि जुंण तम्हें मेरै इन्नां होछै का होछै संघे नाई किय, सह निं तम्हें मुल्है किय आथी। 46 एते तैणीं अह अनंत सजा आसा तम्हां लै और धरमीं नाशणै अनंत जिऊणा लै।

### यीशूए खलाफ षडयंत्र

(मरकुस 14:1,2; लूका 22:1,2; यूहन्ना 11:45-53)

26 जांऊं प्रभू यीशू मसीह इन्नां गल्ला बोली मुकअ, ता एता बाद सह आपणै चेलै लै बोलदअ लागअ, 2 “तम्हां का आसा थोघ कि दुई धेळै बाद आसा फसेओ पर्व; और मांहुँओ शोहरू ढाकणअ कूसी दी मारना लै।”

3 तैबै याजकै और पुरनिंए काईफा नांऊंए माहायाजके आंगणै कठा हई एक बेटक की। 4 तिधी तियां आप्पू बिचै जोगा करदै लागै कि यीशू ढाकणअ हाम्हां छळ कपट करी करै बी और सह पाणअ मारी। 5 तेखअ तियां इहय बी लागै बोलदै कि जाचे धेळी निं हाम्हां इहय करनीं, इहय निं हूआ कि लोग करे घामअ।

### बेतनियाह यीशूए सीख

(मरकुस 14:3-9; यूहन्ना 12:1-8)

6 जांऊं प्रभू यीशू मसीह बेतनियाह कोळ्हीए घरे त, 7 ता एक बेटळी आई और एकी भांडे दी एक किम्मती खुशबूदार इत्र आणअ और जांऊं प्रभू यीशू मसीह रोटी खांदा त बेटअ द, ता तेसा तरैळअ प्रभू यीशूए मूँडै। 8 एता भाळी बोलअ चेलै इहय कि अह एतरी मँहगी चीज किल्है की एसा बरैबाद? 9 अह बिकणअ त बडी बधिया किमती और तिन्नां ढबै सका तै कंगाळा लै बांडी। 10 अह गल हेरी प्रभू यीशू समझी और तेऊ तिन्नां लै बोलअ एसा लै किल्है आसा लागै दै बुरै बोलदै, एसा की मूँह संघे भलाई। 11 कंगाळ रहणै तम्हां संघे कबलै, पर हूँ निं तम्हां संघे कबलअ चालअ रहई। 12 एसा जुंण अह मेरी देही दी इत्र तरैळअ, अह किय एसा मूँह दाबणा लै। 13 हूँ खोजा तम्हां का सच्चाई कि सारै संसारा दी जिधी बी सुसमाचार परचार हणअ, तिधी हणअ एसरै एऊ कामे गल्ला बी जरूरी।

### यहूदा इसकरोतिओ बशभासघात

(मरकुस 14:10,11; लूका 22:3-6)

14 तैबै यहूदा इसकरोती नांऊंए चेलै तिन्नां बाराह मांझै एकी माहायजका सेटा नाशी करै बोलअ, 15 “जै हूँ यीशू थारै हाथे ढाकणै दैऊं, ता तम्हां मुल्है के दैनअ? तिन्नां बोलअ इहय कि ताल्हे दैणै तिह चदिए सिक्के तोली करै। 16 तांऊं तैभी पोही लागअ सह प्रभू यीशू ढाकणै मोके लोळअ।

### चेलै संघे सजेळी रोटीए पर्बो आखरी भोज

(मरकुस 14:12-21; लूका 22:7-13, 21-23; यूहन्ना 13:21-30)

17 सजेळी रोटीए पर्बा का पैहली धेळी चेलै प्रभू यीशू का पुछदै लागै, “हे प्रभू, तूह किधी चाहा कि हाम्हेँ ताल्हे पसहे पर्बे रोटी बणाणै तैरी करे?” 18 प्रभू यीशू तिन्नां लै बोलअ, “नगरी नाशै फलाणै आदमीं सेटा और तेऊ लै बोलै कि गुरु बोला इहय कि मेरअ बगत आसा नेळ, और मूँह मनांऊणअ तैरै



घरें चेलै संघे एछी अह पर्व। 19 इहय करै चेलै बी जिहअ बोलअ तिहअई किय और फसहे बर्बो भोज तैर किय।

20 जांऊं सान्ह पळी ता प्रभू यीशू मसीह तिन्नां बाराह चेलै संघे रोटी खांदअ बेठअ। 21 जांऊं तियां खांदे लागै, ता प्रभू तिन्नां लै बोलअ, “हूँ खोजा तम्हां का सच्चाई कि, तम्हां बिचै बझैळणअ हूँ कसा एकी जहँ ढाकणै। 22 एसा गल्ला शुणीं हुऐ तियां बडै भारी उदास और सोभ लागै प्रभू का पुछदै कि, “हे गुरु, सह कुण आसा? 23 प्रभू तिन्नां लै उत्तर दैनअ, “जुणीं मेरै थाळू दी हाथ पाअ, तेऊई बझैळणअ हूँ ढाकणै। 24 मांळुओ शोहरु ता नाशणअ तिहअ ई जिहअ तेऊए बारै लिखअ द आसा; पर तेऊ आदमीं लै आसा शोग जसा सह ढाकणै बझैळणअ; तेऊ लै त भलअ इहयई कि तेऊओ जल्म ही नाई हंदअ।” 25 तैबै यहूदा इसकरोती जुणीं प्रभू यीशू ढाकणै लाअ त बझैळी तेऊ प्रभू लै बोलअ, “सह हूँ किनि आसा?” तेऊ बोलअ तेऊलै, “तूह मुकअ बोली।”

### प्रभू भोज

(मरकुस 14:22-26; लूका 22:14-20 1कुरिथियो 11:23-25)

26 प्रभू तेऊ लै बोलअ, “तूह मुकअ बोली”, और जांऊं तियां खांदे तै लागै दै; प्रभू यीशू रोटी हाथे लई और परमेश्वर का आषिश मांगी करै चोळी; और सोभी चेलै लै दैई करै बोलअ, “हुंजा, एसा खाआ, अह आसा मेरी देह।” 27 तेखअ प्रभू दाखरसा करै भरअ द कटोरअ चकअ और धन्याबाद करी करै आपणें चेलै लै दैनअ और बोलअ, “एता का झुटा तम्हें सोभै”, 28 किल्हैकि अह आसा मेरै नऊंए बायदेओ खुन, अह बगणअ कईए पाप माफी करना लै। 29 हूँ बोला तम्हां लै इहय कि दाखो अह रस निं मूँह तैभै तैणीं झुटणअ जेभै तैणीं तम्हां सोभी संघे बेशी आपणें बाप्पूए राईसी नऊंअ रस ना झुटूं। 30 एता बाद तियां भजन गान करी करै नाठे जैतून धारा लै।

### पतरसे नकार करने भविष्याबाणी

(मरकुस 14:27-31; लूका 22:31-34; यहूना 13:36-38)

31 तैबै प्रभू यीशू तिन्नां लै बोलअ, “तम्हें हणें आज्ञा राची ई मुखा दूर; किल्हैकि शास्त्रा दी आसा लिखअ द कि “मूँह पाणअ फुआल मारी और छुंडे भेडा छिगणीं ओरी-पोरी। 32 पर मूँह नाशणअ जिऊंदै हई करै तम्हां का पैहलै गलीला देशा लै। 33 एसा गल्ला शुणीं पतरसै बोलअ, “जै सोभ जहँ ताह छाडी दैए, पर हूँ निं ताखा दूर हंदअ।” 34 प्रभू यीशू तेऊ लै बोलअ, “हूँ खोजा ताखा सच्चाई कि आज्ञा राची मुसै बाशणें का पैहलै करनअ ता मुल्है चिई बारी नाई।” 35 पतरसै प्रभू लै उत्तर दैनअ कि जै मूँह ता संघे मरनअ बी पळे, तैबी बी निं हूँ मुकरदअ, और इहयई बोलअ तिन्नें होरी चेलै बी।

### गतसमनिं दी प्राथणां

(मरकुस 14:32-42; लूका 22:39-46)

36 तेता बाद प्रभू यीशू मसीह गतसमनिं नांऊंए जैगा दी नाठअ और आपणें चेलै लै बोलअ कि इधी रहै तैभै तैणीं बेशी जेभै तैणीं कि हूँ प्राथणां करी फिरी ना एछूं। 37 प्रभू निंए पतरस और जब्दोओ शोहरु दुहै आप्पू संघा, और प्रभू यीशूए भरुए गळ घुघलै दुखा दी। 38 तैबै प्रभू यीशू बोलअ कि “मेरअ जिऊ आसा बडअ उदास इहय कि मेरै चालै जिहै प्राण निखळी, तम्हें बेशा इधी मूँह संघे जागदै रहै सुती निं आथी।” 39 तेखअ प्रभू यीशू धख आजू नाठअ और उटी बाखा लागअ प्राथणां करदअ कि “हे मेरे पिता, जै हई सका ता एऊ कटोरै झुटणेंओ बगत लोळी मुखा टळअ; तेबी बी जिहअ हूँ चाहा तिहअ निं पर जिहअ तूह चाहा तिहअ लोळी हुअ।” 40 तेखअ प्रभू यीशू मसीह आपणें चेलै सेटा लै आअ और तियां तै सुतै दै, और प्रभू यीशू पतरसा लै बोलअ, “तम्हें कै मूँह संघे एकी घळी बी निं जागदै रही सकदै?” 41 “जागदै रहा, और प्राथणां रहा करदै लागी कि तम्हें परिक्षा दी ना पळे, आत्मां ता आसा तैर पर अह शरीर आसा कमजोर।” 42 तेखअ प्रभू यीशू मसीह दुजी बारी प्राथणां करदअ नाठअ और एही प्राथणां की कि “हे मेरे पिता, जै मेरे झुटै बगैर अह कटोरअ नाई हटी सकदअ ता तै लोळी तैरे दिला मनै गल्ला पूरी हुई। 43 तैबै प्रभू यीशू मसीह एकी बारी भी चेलै सेटा लै आअ ता तियां तै

भी सुती गए दै किल्हैकि तिन्नें आच्छी ती निंजै भरुई दी। 44 प्रभू यीशू नाठअ तिन्नां छाडी भीई प्राथणां करदअ और सहैई गल बोली प्राथणां दी चिऊथी बारी। 45 एता बाद प्रभू यीशू मसीह आपणें चेलै सेटा आअ और तिन्नां लै बोलअ कि “एबै रहा सुती और आराम करा; हेरा, एबै गई सह घळी एछी और मांळुओ शोहरु दैणअ पापिए हाथे ढाकणै। 46 उझिआ, चाला, भाळा, मूँह ढाकणें आळअ गअ नेळ एछी।”

### यीशू धोखे संघे ढाकणअ

(मरकुस 14:43-50; लूका 22:47-53; यहूना 18:3-12)

47 प्रभू यीशू त इहय बोलदअ ई लागअ द कि यहूदा जुण बाराह चेलै मांझै एक त, सह आअ और तेउ संघे आएे माहायाजका और पुरनिंए तरफा का एक बडअ छुंड हाथे तलबारा और शोटै पाई। 48 यहूदा इसकरोति त तिन्नां लै इहय बोलअ द कि जसा हूँ चुंजी माखी दैऊं सह आसा यीशू तेऊ ढाकै तम्हें। 49 तिधी पुजदी सह नढैऊए प्रभू यीशू सेटा लै आअ और बोलअ “हे गुरु, प्रणांम” संघा तेऊ दैनीं प्रभू लै चुंजी माखी। 50 प्रभू यीशू तेऊ लै बोलअ, “हे साथी, जेऊ कामां लै तूह आअ द आसा, तेऊ कर।” तैबै तियां प्रभू यीशू सेटा लै आएे और तिन्नें प्रभू यीशू ढाकअ। 51 ता प्रभू यीशूए चेलै बिचे एकी आपणें तलबार खिंची और माहायाजके दासा लै बाही और तेऊओ कान शोटअ काटी करै धरनीं। 52 तैबै प्रभू यीशू मसीह तेऊ लै बोलअ, “आपणें तलबारा डाह काठी दी चकी, किल्हैकि जुण तलबार चलाऊआ, तियां करनै तलबारा करै ई नाश। 53 तूह एसा गल्ला निं समझदअ आथी कि हूँ सका आपणें बाप्पू का एही अरज बी करी कि स्वर्गदूते भेज बाराह पळटणा का बी ज़ादी मूँह सेटा लै, ता सह सका एभी भेजी? 54 पर इहय हणअ आसा जरूरी नाई ता पबित्र शास्त्रे गल्ला किहअ करै हणीं पूरी? 55 तेखअ तेसाई घळी प्रभू यीशू मसीह तिन्नां लोगा लै बोलअ, “तम्हें तलबारा और शोटै लई मूँह ढाकदै आसा आएे दै ईहै जिहअ कि जाळणअ हूँ आसा डाकू? जेभै हूँ हर धेळै मांदरै हआ त उपदेशा दैदअ, तैभै निं ढाकअ हूँ तम्हें?” 56 पर इयां सोभै गल्ला हुई एते तैणीं कि भबिष्याबगते गल्ला पूरी होए; तैबै तिधा का सारै चेलै भागै प्रभू यीशू मसीह छाडी करै।

### माहासभा सहनै यीशू

(मरकुस 14:53-65; लूका 22:54,55,63-71; यहूना 18:13,14, 19-24)

57 प्रभू यीशू मसीह ढाकणें आळै निंय सह काईफा माहायाजका सेटा लै; और तिधी तै शास्त्री और पुरनिंए कठा हुऐ दै। 58 पतरस बी दूर जिहअ पिछू-पिछू प्रभू पिछू माहायाजके आंगणें तैणीं नाठअ और तिन्नें नोकरा संघे रहअ फंसलै भाळअ बेठी। 59 माहायाजक और सारी सभा ती प्रभू यीशू मारना लै झुठी ग्वाही लोळै लागै दै। 60 पर बडै भारी झुठै गुआह आणें पर तैबै बी निं तिन्नां प्रभू मारना लै दोश भेटी निसअ। 61 खीरी बोलअ दुई जहँ इहय कि “एऊ बोलअ इहय कि अह सका एऊ परमेश्वरे मांदरा ढोळी और चिऊथे धेळै सका भी बणाई।”

62 तैबै माहायाजके खळै हई करै बोलअ कि “तूह बोलदअ किल्है निं आथी? इयां लोग भाळ तैरे खलाफ कै ग्वाही दैआ? 63 पर प्रभू यीशू मसीह रहअ चुप्पी और तैबै माहायाजके बोलअ, “हूँ दैआ ताल्हे पबित्र परमेश्वरे कसम कि जै तूह परमेश्वरो पुत्र मसीह आसा; ता तै खोज हाम्हां का।” 64 तैबै प्रभू यीशू मसीह तेऊ लै बोलअ, “तंए हेरअ आप्पे बोली, पर हूँ बोला तम्हां का इहय बी कि एभा पोर्ही भाळणअ तम्हां मांळुओ शोहरु परमेश्वरे दैहणै बेठअ द और बादळा दी भाळणअ तम्हां एछदअ।” 65 तैबै माहायाजके आपणें झिकळै धेळी करै बोलअ, “एऊ की परमेश्वरे निंदा, एबै हाम्हां कसरी ग्वाहीए कै जरूरत आसा? भाळा, तम्हें सोभी शुणीं एभै की एऊ की परमेश्वरे निंदा! 66 एबै थारअ किजै बघार आसा?” ता तिन्नें होरी बी दैनअ इहय जबाब कि अह आसा मारनै जोगी। 67 तैबै तिन्नें प्रभू यीशूए मुंहा लै थुकअ और कोई बाही धमूके करै और कोई चैडै बाही करै बोलअ, 68 “हे मसीह, हाम्हां लै ला जोतश कि ताल्हे कुणीं बाही?



**पतरसो नकार करनअ**

(मरकुस 14:66-72; लूका 22:56-62; यहूना 18:15-18,25-27)

69 ता पतरस त बागै आंगणां दी बेटअ द और एकी बेटळी तेऊ का पुछअ कि तुबी त एऊ गलीली यीशू संघे भाळी? 70 पतरसै तिन्नां सोभी सहनै इहय बोली करै किय नाई कि तूह किजै बोला मुखा निं किछी गल्लो थोघ आथी? 71 तेता बाद नाठअ पतरस डेहळा बागै; ता तिधी बी एकी होरी पतरसा भाळी करै तिन्नां होरी का बोलअ कि अह बी त यीशू नासरी संघे। 72 पतरसै किय कसम खाई नाई कि हूँ निं तेऊ मांळू जाणदअ बी आथी। 73 थोळी घळी बाद जुंण तिधी थिये तिन्नां पतरसा सेटा एछी करै बोलअ, "तेरअ बोल चाल खोला तेरअ इहय भेद कि तूह आसा जरूर तिन्नां मांझै एक।" 74 तैबै लागअ पतरस भी सफाई दैदअ और कसमा खादअ कि हूँ निं तेऊ मांळू जाणदअ, और नडैऊरे बाशअ मुरगअ बी। 75 तैबै पतरसा प्रभू यीशू बोली दी गल आद फिरी कि "मुरगै बाशणै का पैहलै करनअ ताह मुल्है चीई बारी नाई। पतरस बी तिधा का नाठअ और सह लागअ हिं-हिं करै हीक पटाकी लेरदअ।

**पिलातुसे सहनै यीशू**

(मरकुस 15:1; लूका 23:1,2; यहूना 18:28-32)

27 जांऊं राच भैई ता सोभी याजकै, माहायाजकै और पुरनिंए प्रभू यीशू मारना लै आप्पू बिचै जोग किय। 2 संघा तिन्नां प्रभू यीशू मसीह बाहअ और तिधा का सभाळअ तिन्नां पिलातुसा हाकमा सेटा।

**यहूदे आत्म हत्या करनीं**

(प्ररिते काम 1:18, 19)

3 जांऊं यहूदा इसकरोती भाळअ कि प्रभू यीशू बणांअ तिन्नां दोशी, और सह पचताअ बडअ भारी और तेऊ दैनै तियां तिह चन्दीए सिक्के माहायाजका और पुरनिंए लै बापस फरेऊड, 4 संघा तेऊ तिन्नां लै इहय बी बोलअ कि "मरुं किय अह पाप कि निर्दोश दैनअ थारै हाथै? तिन्नां बोलअ इहय कि हाम्हां किजै आसा तूह जाण?" 5 तैबै तेऊ तियां सिक्के शोटै मांदरै और आप्पू लै दैनीं फांसी।

6 माहायाजकै तिन्नां सिक्के लै बोलअ इहय कि ईयां सिक्के निं भडारै डहणै ठीक आथी, किल्हैकि अह आसा खूने किम्मत। 7 ता तिन्नां आप्पू जोग किय, और तिन्नां सिक्के करै लअ परदेसी दाबणां लै एकी खमारो खेच मोलै। 8 इहय करै तेऊ खेचा नांअ आसा पळअ द आझो-आझो खूनो खेच। 9 इहय करै हुअ यिर्मयाह भबिशयाबगता बोलअ द बचन पूरअ कि, "तिन्नां तियां तिह सिक्के लए, 10 और जेही प्रभू मुल्है आज्ञा दैनीं ती तिहअई तिन्नां खमारो खेचो मोल दैनअ॥"

**पिलातुसे सुआल**

(मरकुस 15:2-5; लूका 23:3-5; यहूना 18:33-38)

11 जांऊं प्रभू यीशू मसीह हाकमा सहनै खळअ थिय, ता तेऊ प्रभू का पुछअ, "तूह कै यहूदिओ राजअ आसा?" प्रभू यीशू बोलअ, "तूह आसा लागअ द आप्पू बोलदअ।" 12 जेभै माहायाजक और पुरनिंए प्रभू यीशू लै दोशा लांदै तै लागै दै, तेभै निं प्रभू तिन्नां लै किछ बी उत्तर दैनअ। 13 एता लै हाकम पिलातुसै बोलअ, ताखा कै शुणदअ निं आथी कि ईयां तेरै खलाफ किजै-किजै ग्याही दैन्दै आसा लागै दै? 14 पर प्रभू यीशू निं तेऊए गल्लो बी किछै जबाब दैनअ, इधी तैणीं कि पिलातुस बी हुअ रहैन।

**सजाए मौत दैणें आज्ञा**

(मरकुस 15:6-15; लूका 23:13-25; यहूना 18:39-19:16)

15 हाकम पिलातुसो त इहय रबाज कि तेऊ पबै सका त सह लोगा लै एकी कैदी जुंण जेहला दी होए और जसा तियां लोग चाहे, तेऊ कैदी छाडी। 16 तेऊ जमानै त बराब्बा नांओ एक नार्मी कैदी जेहला दी बंद किय द। 17 ता जांऊं तियां कठा हुए, ता पिलातुसै तिन्नां लै बोलअ, "तम्हें कसा चाहा कि हूँ छाडूं तम्हां लै? बराब्बा छाडूं, कि यीशू, जहा लै मसीह बोला? 18 तेऊ का

थिय पतअ कि प्रभू यीशू आसा तिन्नां जिंदै मारै बिणा कोई दोशै ढाकअ द। 19 जांऊं सह न्याय आसना दी बेटअ द थिय, ता तेऊए लाळी भेजअ तेऊ लै फैळअ कि "तूह धरमिंए मांमलै दी निं हाथ पाई आथी; किल्हैकि मूह हूअ द सुपनै करै बडअ भारी दुख।

20 माहायाजकै और पुरनिंए होर लोग ईहै शकाऊए कि तम्हें मांगे बराब्बा और यीशू लै बोलै इहय कि एऊ पा मारी। 21 पिलातुसै जांऊं इहय पुछअ कि इन्नां दुई मांझै तम्हां कुंण लोळी कि तम्हां लै हूँ छाडूं? ता तिन्नां सोभी बोलअ इहय कि हाम्हां लै छाड बराब्बा। 22 पिलातुसै तिन्नां का पुछअ, "तै यीशूओ जसा लै मसीह बोला, एऊओ कै करूं?" तिन्नां सोभी बोलअ इहय कि एऊ पा कूसा दी मारी। 23 हाकिमें तिन्नां का पुछअ कि किल्है, एऊ कै बुराई आसा की दी?" पर तियां लोग लागै होर बी लैळा और हाका-पकारा पाई बोलदै कि "एऊ लै दैआ कूसे मौत।" 24 जैबै पिलातुसै भाळअ कि अह गल निं बळणें आळी आथी और इनै लाअ होर बी हालअ-गोलअ करी, ता तेऊ पाणिंओ कटोरअ मंगाऊअ और तिन्नां सहनै आपणें हाथ धोए और तिन्नां लै बोलअ, "हूँ आसा एऊ धरमींए खुना का नरदोश; और एता जाणां तम्हैई।" 25 तैबै तिन्नां सोभी लोगै उत्तर दैनअ, एऊओ खून लोळी हाम्हां और म्हारै शोहरू लै पळअ। 26 इहय शुणीं करै पिलातुसै बराब्बा किय कैद खाने का मुक्त और प्रभू यीशू लै कोळैए मार दैई करै सभाळअ तिन्नां हाथै कूसा दी मारना लै।

**सपाहीओ यीशूओ अपमान करनाअ**

(मरकुस 15:16-20; यहूना 19:2,3)

27 तेखअ हाकमे सपाही प्रभू यीशू जेहला भितरा लै नियं और सारी पळटण की तेऊ फेर खळी। 28 तेखअ तेऊए झिकळै खोल्ही करै तेऊ लै किरमिजी चोळअ भनैऊअ 29 और झरीलै कांडेओ मुकट गुंदी करै तेऊए मुंडा परदै डहअ और हाथै दैनअ एक कुंगळअ शोटअ और तेऊ सहनै जाहूं दी बेशी लागै मजाका करदै कि हे यहूदिओ राजैआ, 'नमस्ते।' 30 तिन्नां प्रभू यीशूए मूहा दी थुकअ और तेऊई शोटै करै लागै तेऊए मुंडै बांहदै। 31 जांऊं तियां ठठअ मजाक करी मुकै, ता सह चोळअ तिन्नां खोलअ और तेखअ भनैऊंए तेऊएई झिकलै और तेखअ नियं तिन्नां सह कूसा दी मारना लै।

**यीशू कूसा दी छडाऊणअ**

(मरकुस 15:21-32; लूका 23:26-43; यहूना 19:17-27)

32 बागै नाशदी बारी भेटअ तिन्नां एक शिमोन नाऊंओ कुरेनिं आदमीं और तिन्नां सह नभेउशै ढाकअ और तेऊ लै बोलअ कि कूस चक। 33 तेखअ तेसा जैगा जसा लै गुलगुता बोला, मतलब खोपळीए जैगा, पुजी करै 34 दैनअ तिन्नां दारखरस झुटणा लै पर प्रभू यीशू निं सह च़ाखी करै झुटणअ चाहअ। 35 तैबै तिन्नां प्रभू यीशू कूसा दी छडाऊअ और परची पाई करै तेऊए झिकळै बांडै 36 और तियां रहै तिधी पहरी बेशी। 37 ता पिलातुसै प्रभू यीशूए दोशपत्रा दी लिखअ कि "यहूदिओ राजअ आसा यीशू मसीह" और तिन्नां सह दोश पत्र तेऊए मुंडा परदै कूसा दी टोकअ। 38 प्रभू यीशूए दैहणें और बांऊंए छडाऊए दुई होर डाकू बी 39 और तेसी बाती एछद-नाशदै करा तै आपणें मूंड झळाऊई करै तिन्नां निंदा; 40 संघा करा तै तियां इहय बोली कि "हे मांदरा ढोळणें आळैआ, और चिऐ धैळै बणाणें आळैआ, तूह आप्पू ता बच, जै तूह परमेश्वरो शोहरू आसा, तै होथ कूसा का धरनीं। 41 इहयई माहायाजक बी पुरनिंए संघे मिली करै लागै ठठै मजाका करदै और तियां बोला तै इहय कि "होर ता बचाऊए एऊ पर आप्पू निं अह बची सकदअ। 42 अह ता "इस्त्राएलो राजअ आसा।" एबै जै अह कूसा का धरनीं होथे, तै करमें हाम्हें एऊ दी विश्वास। 43 अह ता परमेश्वरा दी भरोसअ डाहा, जै सह चाहा; तै एबै छडैऊए एऊ, किल्हैकि अह बोला त इहय कि "हूँ आसा परमेश्वरो शोहरू।" 44 इहयई जुंण तियां डाकू बी कूसा दी छडाऊए दै थिये, तियां बी लागै प्रभू यीशूए निंदा करदै।

## यीशूए प्राण शोटणें

(मरकुस 15:33-41; लूका 23:44-49; यूहन्ना 19:28-30)

45 दपहरा पोर्ही चिऊथै पहरै तैणीं रहअ तेऊ देशै घोर न्हैरअ छैऊई।  
46 चिऊथै पहरै नेळ प्रभू यीशू जोरै-जोरै बोलअ, "हे मेरै परमेश्वर, हे मेरे परमेश्वर, तंए हूँ किल्है छाडअ?" 47 ता जुंण तिधी खट्ठुए दै थियै तिन्नां मांझै कई लोगे बोलअ इहय कि अह आसा लागअ द एलियाह शाददअ; 48 और तिन्नां बिद्या का एक आअ तुहरी करै और तेऊ सिरकै दी चुशू डबेऊअ और बरछे मुंडकी दी लाई करै दैनअ प्रभू यीशू लै चुशणा लै। 49 ता होरी बोलअ इहय कि खळिआ, भाळा हेंनू कि एलियाह एछा बी एऊ बचाऊंदअ। 50 तैबे प्रभू यीशू जोरै पुकार पाई और आपणें प्राण शोटे। 51 तै हेरा, मांदरै लाअ द परदअ धेळुअ और तेऊए हुए दुई भाग, और सारी धरती हुई ज़ाजरी और भिळी दी लागै पाथर चटकारदै। 52 कब्रा खुली और मूणें दै पबित्र लोग हुए जिऊंदै 53 और जिऊई करै नाठै तियां पबित्र नगरी लै और बडे भारी लोगा का तियां धेछुए बी। 54 तैबे एकी सुबेदारै जुंण यीशूए पहरी तै, जुंण सह ज़ाजरी हुई ती, तेता का डरै और बोलअ कि अह आसा सच्ची "परमेश्वरो शोहरू।" 55 तिधी ती बडी भारी बेटळी बी गलील देशा का प्रभू यीशूए सेऊआ करदी आई दी और तियां ती लागी दी इन्नां सोभी गल्ला भाळी। 56 ता तिन्नां बिचै ती मरिअम मगदीलणीं, याकुब और योसेसे आम्मां मरिअम और जब्दिए शोहरूए आम्मां बी।

## यीशूए लाहस दाबणीं

(मरकुस 15:42-47; लूका 23:50-56; यूहन्ना 19:38-42)

57 जाऊं सान्ह चाली ती पळी, ता एक युसुफ नांओं अरिमतियांहा गरांओं सेठ आदमीं, सह त आप्पू बी प्रभू यीशूओ चेलअ। सह आअ और तेऊ पिलातुसा का प्रभू यीशूए लाहस मांगी। 58 पिलातुसै बी दैनीं तेऊलै लाहसा निणें जाजत। 59 युसुफै लाहस निई करै शेतै कापळै दी पळेटी 60 और सह लाहस डाही तेऊ नऊई कब्रा दी जुंण तेऊ शाफळा दी मजदूरा लाई करै खणीं दी ती, और तेसा घोरी परेंदै एक बडी जान डाही करै लागअ घरा लै हांडदअ। 61 तिधी ती मरिअम मगदलनिं और दुजी मरिअम ती कब्रा सहनै बेठी दी।

## कब्रा दी पहरअ

62 दुजै धैळै जुंण जाचे तैरी करने धैळैओ दुजअ धैळअ थिय, ता माहायाजकै और फरीसी पिलातुसा सेटा सोभी कठा हई करै बोलअ, 63 "हे माहाराज, हाम्हां का आसा थोघ कि तेऊ भरमाऊणें आळै बोलअ त आपणीं जिऊंदी पलका इहय कि, "मूँह हणअ चिऊथै धैळै भी जिऊंदै। 64 ता तूह दै एही आज्ञा कि चीई धैळै तैणीं डाहणअ हाम्हां तेसा घोरी बागै जिधी सह दाबअ द आसा, पहरअ पाई, इहय निं हूआ कि तेऊए चेलै एछी करै तेऊए लाहस पाए घोरी और लोगा का लागे इहय बोलदै कि सह हुअ मरी करै जिऊंदअ, और अह हणअ हाम्हां लै पिछलै धोरखै का बी बुरअ।" 65 पिलातुसै तिन्नां लै बोलअ, तम्हां का पहरी ता आसा, और तम्हें नाशा, संघा दैआ आपणें साबै पा तिधी पहरअ। 66 तिन्नें बी पहरी नियें, और कब्रा बागै पाथरा दी रोम राजे मोहर लाई, और तिधी पाअ सपाही करै पहरअ।

## यीशूओ मरी करै जिऊंदै हणअ

(मरकुस 16:1-10; लूका 24:1-12; यूहन्ना 20:1-10)

28 सबते धैळी बाद, हबते पैहली धैळी, दोती दोथी मरिअम मगदीलणीं और दुजी मरिअम कब्रा भाळी आई। 2 ता हेरा तिधी हुई एक बडी ज़ाजरी, किल्हैकि प्रभूओ एक स्वर्गदूत सरगा का होथअ, और सह पाथर पाअ बदळी और तेता परेंदै बेठअ। 3 तेऊए झिकळै तै शेतै और तेथ त जिहअ पाळअ पळअ द और चमकदअ लागअ द और तेऊओ रूप त बिजली जिहअ। 4 तैबे तेऊए डरै तियां पहरी लागै कांबदै और तियां हुए जिहै मूणें दै जिहै। 5 स्वर्गदूतै तिन्नां बेटळी लै बोलअ, "तम्हें निं डरा आथी, मुखा आसा थोघ कि तम्हें आसा लागी दी प्रभू यीशू लोळी जुंण क्रूसा दी मारअ त। 6 सह निं इधी आथी, पर जिहअ तेऊ बोलअ त; तिहअई हुअ सह जिऊंदअ। एछा, एसा जैगा भाळा जिधी प्रभू त डाहअ द। 7 तम्हें करा इहय एभी नाशा तेऊए चेलै का खोजा कि सह हुअ मरी करै जिऊंदअ; और हेरे, सह गअ तम्हां का पैहलै गलील देशा लै नाशी। तिधी हणें तम्हां तेऊए दर्शण, हेरे, मूणें हेरअ तम्हां का खोजी।"

8 तियां हैळुई ता जरूर पर बडे आनंदा दी खुशी-खुशी कब्रा सेटा का फिरी घरा लै और तुहरी चेलै लै समादा खोजदी। 9 हेरा, प्रभू यीशू तिन्नां भेटअ और तिन्नां संघै की गल्ला-बाता और चेलै बी प्रभू सेटा एछी करै टेकअ माथअ। 10 तैबे प्रभू यीशू तिन्नां लै बोलअ, "डरा निं आथी, मेरै होरी भाई लै बोला कि गलीला लै नाशा, हूँ धेछणअ तिन्नां का तिधी।

## पहरीओ फैळअ

11 तियां ती हांडदी ई लागी दी कि तिन्नां पहरी मांझै नाठै कई जळै नगरी लै माहायाजका का खोजअ पूरअ हाल। 12 तैबे तिन्नें पुरनिंए संघे कठा हई करै जोग किय, और तिन्नां सपाही लै बडी भारी चन्दी दैई करै बोलअ कि 13 एसा गल्ला निं कोही का खोजी, पर लोगा का बोलै इहय कि राची तै हाम्है सुतै दै और तेऊए चेलै पाई राची सह लाहस घोरी। 14 जै अह गल पिलातुस हाकमें कानै पुजे, ता तेऊ संमझाऊंमें हाम्है और तम्हें बचाऊणें हाम्हां तेऊ खातरै का। 15 ता तिन्नें ढबे नियें और जिहअ तिन्नें बोलअ त तिहअई तिन्नें सोभी का बोलअ। अह गल आसा आज्ञा तैणीं बी यहूदी बिचै फैली दी।

## प्रभू यीशूओ धेछणअ और आखरी आज्ञा

(मरकुस 16:14-18; लूका 24:36-49; यूहन्ना 20:19-23; प्रेरिते काम 1:6-8)

16 तियां गैरा चेलै गलीलै तेसा धारा परेंदै नाठै जुंण प्रभू यीशू तिन्नां का खोजअ त। 17 तिधी नाशी तिन्नां प्रभू यीशू मसीह भेटअ और तेऊ सेटा माथअ टेकअ, पर कई जहणें त मैची बी मनै शक। 18 प्रभू यीशू तिन्नां सेटा एछी करै बोलअ कि, "स्वरग और धरतिओ सारअ अधिकार दैनअ मुल्है, 19 एता लै तम्हें नाशा और सोभी ज़ातीए लोगा बणांआ मेरै चेलै, और तिन्नां लै दैआ पिता, पुत्र और पबित्र आत्में नांओएँ बपतिस्मअ। 20 संघा सखाऊआ तिन्नां का तिन्नां सोभी गल्ला मनणीं, जुंण मूणें तम्हां लै आज्ञा दैनीं दी आसा; और हेरा, हूँ आसा एऊ संसारा खतम हणें तैणीं तम्हां संघै।"

# मरकुस

## भूमिका

मरकुस लिखअ द सुसमाचार हआ ईहै बोला करै शुरु कि, "परमेश्वरे शोहरु यीशू मसीहो सुसमाचार।" एथ आसा यीशू मसीह एक सोभी चिजा परँदै अधिकार डाहणें आळअ मालक और क्रियाशील व्यक्ति रूपेँ दर्शाऊअ द। तेऊओ अधिकार आसा प्रगट हुअ तेऊए शिक्षा दी, दुष्टातमां काढणें दी और सोभी लोगे पाप क्षमा करनैं दी। एथ बोला यीशू आपू लै 'मांछूओ शोहरु'। सह आअ एते तैणीं कि सोभी लोगा पापा का आज्ञादी करना लै आपणें प्राण दैए। मरकुस निं यीशू मसीहे वचन और कामां दी जोर देंदअ पर सह दैआ तेऊए कामें बारें जोर। तैहीता सह तेऊए कथैया सीधी, सान और प्रभावशाली रूपेँ करा पेश। यूहन्ना बपतिस्मैं दैणें आळअ, यीशूओ बपतिस्मअ और तेऊए परीक्षे बारें थोळी जेही भूमिका दैणें का बाद लाग लिरखणें आळअ नद्वैऊए यीशूए चंगाई और सेऊआ कामें बारें खोजदअ। जिहअ-जिहअ बगत बितदअ लाग तिहै-तिहै लागै तेऊए चेलै तेऊ राम्बळे करै समझदें, पर यीशूए बिरोधी हुए होर बी जादें दुश्मण। आखरी अध्याय दी करा यीशूए संसारे जिन्दगीए आखरी हमे घटी दी गला पेश, जेता मांझे खास तेउओ कूसा दी मरनअ और मरी करै जिऊंदै हणअ आसा।

## रूप-रेखा

सुसमाचारे शुरुआत 1:1-13

गलीलै यीशूए जन सेऊआ 1:14-9:50

गलीला का यरुशलेम तैणीं यात्रा 10:1-52

यरुशलेमैं आखरी हप्तअ 11:1-15:47

यीशूओ जिऊंदै हणअ 16:1-8

जिऊंदै हई करै प्रभू धेछणअ और स्वर्गा लै नाशणअ 16:9-20

## यूहन्ना बपतिस्मैं दैणें आळैओ प्रचार

(मत्ती 3:1-12; लूका 3:1-18; यूहन्ना 1:19-28)

1 परमेश्वरे पुत्र यीशू मसीहे सुसमाचारे शुरुआत। 2 जिहअ याशायाह भबिश्चाबाणीं करनैं आळैए कताबा दी लिखअ द आसा, "भाळ, मूँह भेजणअ आपणअ दूत ताह आजू जसा ताल्है बात दैणीं बणाई। 3 उजाळ जैगा का आसा लागअ द एकी हाका लागें आळैओ बोल शुद्धदअ कि "प्रभूए सळका करा सिधी और तेऊओ मार्ग करा तैर।" 4 यूहन्ना आअ, जुंण उजाळ (बियबान) जैगा दी बपतिस्मअ दैआ थिय और सह करा त पाप माफी लै मनाफरेऊणेंओ परचार। 5 सारै यहूदिया देशै और यरुशलैमै सारै रहणैआलै निखळी करै तेऊ सेटा लै नाठै, और आपणै-आपणै पाप मनी करै जरदण नदी दी तेऊका बपतिस्मअ लअ। 6 यूहन्ना ऊँटे शराळे झीकळै बान्ही करै और आपणी कुछी दी बान्हा त चाभळैओ पटकअ और खाणा लै खा त बणें रैटै और मखीर 7 संघा करा त सह इहय परचार कि "जुंण मूँह बाद एछणें आळअ आसा, सह आसा मूरुखा बी बडअ शक्तिओ मालक और इधी तैणीं कि हूँ निं तेऊए बूटे तसमैं खोळणें जोगी बी आथी।" 8 "मंए ता दैनअ तम्हा लै पाणीं करै बपतिस्मअ पर तेऊ दैणअ तम्हां लै पबित्रात्मा करै बपतिस्मअ।"

## यीशूओ बपतिस्मअ और परिक्षा

(मत्ती 3:13-4:11; लूका 3:21,22; 4:1-13)

9 तिन्नां धैळै प्रभू यीशू बी गलील देशे नासरत गराऊंआं का यूहन्ना सेटा लै आअ और जरदण नदी दी तेऊ का बपतिस्मअ लअ। 10 जांऊं सह पाणीं जैदरा का डुबकी दैई करै ऊझै निखळअ, ता तेभी खुल्लअ तेऊलै सरग और सरगा का आत्मां कबूतरा जेही आपू परँदै एछदी भाळी; 11 और एही आकाशवाणी हुई की "तूह आसा मेरअ प्यारअ शोहरु और हूँ आसा ताह करै खुश।"

12 एता बाद तेभी भेजअ प्रभू यीशू पबित्रात्मा जंगलै उजाळ जैगा बाखा लै। 13 जंगला दी शैतानै च्हाहळी धैळी तैणीं तेऊए परिक्षा की; और सह रहअ वणें उजाळ जैगा दी जानवरा संघै, और स्वर्गदूत रहै तेऊए सेऊआ चाकरी करदैं लागीं।

## यीशूए सेऊआ चाकरीए शुरुआत

(मत्ती 4:12-17; लूका 4:14,15)

14 यूहन्ना जेहलखानै दी बंद करनै का बाद प्रभू यीशू गलील देशै आअ और परमेश्वरे राजो सुसमाचार प्रचार कीय, 15 और बोलअ, "परमेश्वरो राज गअ नेळ एछी; मन फरेऊआ और सुसमाचारा दी करा विश्वास।"

## मछुआरै शादणें

(मत्ती 4:18-22; लूका 5:1-11)

16 गलीले समूंदरे कनारै-कनारै हाँडदैं तेऊ शमोन और तेऊअ भाई अनिद्रयास समूंदरा दी ज़ाळा पांदै भाळै, किल्हैकि तियां तै माहृछली ढाकणें आळै। 17 प्रभू यीशू तिन्नांलै बोलअ, "मूँह पिछु ऐछा, हूँ बणाऊं तम्हां आदमीं ढाकणें आळै मछुआरै।" 18 तियां बी लागै तेभी ज़ाळा छाडीकरै तेऊ पिछु हाँडदैं।

19 थोळै आजू नाशीकरै, तेऊ जवदीओ शोहरु याकूब और तेऊअ भाई यूहन्ना किस्ती परँदै ज़ाळा सोहरदैं भाळै। 20 तेऊ तियां बी शादैं, और तियां लागै आपणें बाबा जवदी मजदूरा संघे किस्ती छाडीकरै तेऊ पिछु हाँडदैं।

## दुष्टात्मां शाचअ द आदमीं ठीक करनअ

(लूका 4:31-37)

21 तिधा का पुजै तियां कफरनहूम गरांऊंए और प्रभू यीशू लागअ तेभी पोर्ही तेसा सबतै धैळी आराधनालै दी उपदेशा देंदअ। 22 सोभ लोग हुए तिधी तेऊए उपदेशा शुणीं करै रहैन, किल्हैकि सह निं तिन्नां लै शास्त्री जिहअ उपदेश देंदअ त पर सह दैआ त अधिकारी जिहअ उपदेश। 23 तेभै थिय तिन्नें आराधनालय दी एक इहय आदमी, तेऊदी थिय भूत-परेत (दुष्टात्मां) शाचअ द। 24 तेऊ जोरै-जोरै हाका पाई और सह लागअ बोलदअ "हे यीशू नासरी, हाम्हां ताह संघे किजै काम? तूह कै हाम्हां खत्म करदअ आसा आअ द? मुखा आसा थोघ कि तूह कुँण आसा? तूह आसा परमेश्वरो पवित्र मांछूँ।" 25 प्रभू यीशू तेऊलै एक झाहळ काटी करै बोलअ, "चुप्पी रहअ; और एऊ भितरा का निखळ पोर्ही।" 26 तेखअ तेभी तियां भूत परेत निखळै तेऊ मरोळी करै और लैळा पकारा लांदी दूर। 27 एसा गल्ला भाळी हूई सोभी लोग

रहनी और आपू बिचै लागै गल्ला करदैं कि अह किजै गल आसा? अह ता कोई नऊअ उपदेश आसा! अह ता अशुध्द आत्मां लै बी बड़ै अधिकारा करै दैआ नीखळणें आज्ञा! और तियां बी मना जिहअ एऊ बोलअ तिहअई!" 28 ता इहय करै प्रभू यीशूओ नांअ फैलअ ओरी-पोरी सारै गलील देशै।

### कईबमार ठीक करनैं

(मत्ती 8:14-17; लूका 4:38-41)

29 प्रभू यीशू तेभी आराधनालय का निखळी करै याकूब और यूहन्ना संघें शमोन और अनिद्रयासे घरा लै आअ। 30 शमोनै शाशुई त जअर आअ द और तिन्नै तेभी तैसरै बारै प्रभू यीशू का खोजअ। 31 तेखअ तेऊ नेळ नाशी करै तैसरअ हाथ ढाकअ और सह झैऊई खळी; और तैसरअ जअर उतरअ तेभी और सह लागी तिन्नै सेउआ टैहली करदी। 32 सान्हा जाऊं धुपअ उड़ी गअ ता तेसीए सोभी लोगै जसा दी भूत परेत तै शाचै दै और दुष्टात्मां ती और जुण बमार थियै तियां आपणै सोभ प्रभू यीशू मसीह सेटा लै। 33 और सारी नगरी हुई दुआरा आजू कठा। 34 तेऊ बड़ैभारी जुण रगे-रगे बमारी करै दुःखी थियै, तियां कियै ठीक, बड़ी भारी दुष्टआत्मा काडी, और दुष्टआत्मा निं बोळणैई दैनअ, किलहैकि तिन्नां का थिय तेऊओ थोघ।

### यीशूए कांगनरांगै प्राथणां करिनिं

(लूका 4:42-44)

35 दोती दोथी धूपै लागणै का पैहलै प्रभू यीशू उझुअ और तिधा का निखळी करै नाठअ एकी कांगनरांगी जैगा लै और तिधी पुजी लागअ प्राथणां करदअ। 36 ता पिछू आरे शमोन और तेऊए होर साथी तेऊ लोळै। 37 जाऊं प्रभू यीशू तिन्नां भेटअ, ता तिन्नै प्रभू लै बोलअ, "सोभ लोग आसा ताह लोळै लागदैं।" 38 प्रभू यीशू तिन्नांलै बोलअ, "चाला, हाम्हां नाशणअ किधी ओरी-पोरी बस्ती दी ताकि हूँ परचार करी सकूँ; किलहैकि हूँ आसा एतेई तैणीं आअ द।" 39 तेखअ प्रभू यीशू मसीह सारै गलील देशै नाठअ और तिन्नै आराधनालै दी प्रचार कीय और दुष्टआत्मां भी रहअ काढदअ लागी।

### कोळ्हे बमारी आळअ रोगी ठीक करनअ

(मत्ती 8:1-4; लूका 5:12-16)

40 तिधी एक कोळ्हे बमारी आळअ तेऊ सेटालै आअ और प्रभू का जाहू टेकी करै अरज की कि "जै तूह चाहे ता तै सका तूह मूँह ठीक करी।" 41 प्रभू फिरी तेऊए बड़ी भारी झीण और तेऊदी हाथ लाअ और तेऊलै बोलअ इहय कि "हूँबी चाहा इहय कि तूह लोळी ठीक हुआ।" 42 सह आदमीं हुआ तेभी कोळ्हे बमारी का ठीक। 43 प्रभू तेऊलै एही चतैनगी दैई करै सह बिदा किय कि 44 "हेरे, एसा गल्ला निं होरी कोही का खोजी। हाँ, नाश, और याजका सेटा एछ आपू रहैऊई, और आपणै बमारी का राम्बळै हणैए बारै दी जुण बिधि बधान मुसा नबी करना लै बोलअ द आसा, तेऊ साबे भेंट चढाऊ, ताकि तिन्नांलै ग्वाही होए।" 45 पर सह नाठअ तिधा का बागै और तेऊ फणाऊंअ इन्नां गल्ला खोजी करै सारअ देश एतरअ कि प्रभू यीशू बी निं लोगा सहनै नगरी दी नाशी सकअ, पर बागै रह बणै; पर तेथ बी लागै चऊ बाखा का लोग प्रभू यीशू सेटा लै एछदैं।

### लकवे बमारी आळअ ठीक करनअ

(मत्ती 9:1-8; लूका 8:17-26)

2 खास्सै धैळै बाद प्रभू यीशू बी कफरनहूमा लै आअ, और लोगै शुणअ की सह आसा एऊ घरै। 2 तेखअ तिधी हुऐ ऐतरै लोग कठा कि दुआरा आजू बी निं सिऊणीं सहरना लै जैगा रही और प्रभू त तिन्नां का बचना शणाऊंदअ लागअ द। 3 तिधी आणअ लोगै एक लकवे बमारी आळअ मरीज चऊ बराहळै प्रभू यीशू सेटा लै चकी। 4 दुआरा सेटा लोगे झाळैओ रश हणैए कारण जाऊं तियां प्रभू सेटा नाई नाशी सकै, ता तिन्नै तेऊ घरौ छपर जेता हेतै प्रभू बेठअ द थिय, तिन्नै सह छपर पेचअ और जाऊं तियां छपर पेची मुकै ता, जहा खाटा दी सह दरंगो मरीज सताऊअ द थिय, सह छडाऊअ तिन्नै छपरा बाती उंधे। 5 प्रभू यीशू तिन्नां विश्वास भाळी करै तेऊ लकवे

बमारी आळै मरीजा का बोलअ, "हे पुत्र, तेरै पाप हुऐ माफ। 6 तेखअ कई शास्त्री जुण तीधी बेठै दै थियै, तियां लागै आपणै-आपणै मना दी सोचदैं कि, 7 "अह आदमी इहय किलहै बोला?" अह ता परमेश्वरे निन्दा करा 8 प्रभू यीशू हेरअ तेभी आपणी आत्मां दी भूझी कि इयां आपणै-आपणै मना दी किजै सोचा और प्रभू तिन्नां लै बोलअ, "तम्हें आपणै-आपणै मना दी इहय किलहै आसा लागै दै सोचदैं?" 9 सान किजै आसा; कि लकवे मरीजा का इहय बोळणअ की तेरै पाप हुऐ माफ, या इहय बोळणअ की उझू आपणी खाट चक और हाँडदअ फिरदअ लाग? 10 जिहअ करै तम्हां का थोघ लागे कि मांछूए शोहरू लै आसा धरती दी पाप क्षमा करनेओ अधिकार। तेखअ प्रभू यीशू तेऊ लकवे मरीजा लै बोलअ, 11 "हूँ बोला तालहै, उझू और आपणै खाट चक संघा नाश आपणें घरा लै।" 12 सह मरीज बी तेभी सोभी सहनै ऊझुअ और सह लागअ हाँडदअ आपणें घरा लै।" एसा गल्ला भाळी हुऐ सोभ लोग रहैन और तियां लागै परमेश्वरे बड़ाई करदैं कि "हाम्हें निं इहय चमत्कार आज्ञा तैणीं कधी हेरअ।"

### चुंगी लणै आळअ लेवी शादणअ

(मत्ती 9:9-13; लूका 5:27-32)

13 प्रभू यीशू बी तिधा का उझुअ और समुंदरे कनारै नाठअ और सारै लोग तिधा का निखळी करै समुंदरे कनारै आरे, ता तिधी आरे बड़ै भारी लोग तेऊ सेटा और सह लागअ तिन्नां लै उपदेशा दैदअ। 14 तिधा का नाशदी बारी प्रभू यीशू मसीह हल्फीओ शोहरू चुंगीए चौकी दी बेठअ द भाळअ और तेऊ लै बोलअ, "मूँह पिछू एछ।" ता सबी बी तिधा का उझुअ और सह लागअ प्रभू यीशू पिछू हाँडदअ।

15 जाऊं सह तेऊए घरै रोटी खांदअ बेठअ, ता तिधी बेठै कई चुंगी लणै आळै और पापी मांछू प्रभू यीशू मसीह संघे रोटी खांदै किलहैकि तियां तै बड़ै भारी लोग और तियां लागै तै सोभ प्रभू यीशू पिछू हाँडदैं। 16 शास्त्री और फरीसी इहय भाळी करै कि अह आसा लागअ द चुंगी लणै आळै और पापी लोग संघे रोटी खांदअ; ता तिन्नै प्रभूए चेलै लै बोलअ, "अह ता चुंगी लणै आळै और पापी लोग संघे रोटी पाणीं खा-पिया?" 17 यीशू इन्नां गल्ला शुणी करै तिन्नां लै बोलअ, "जहा कोई दाह खीज नाई हंदी; तेऊ निं बैदे जरूत हंदी पर बमारा हुआ बैदे जरूरत; हूँ निं धर्मी लै आथी पर हूँ आसा पापी शादअ आअ द।"

### ब्रतो सुआल

(मत्ती 9:14-17 लूका 5:33-39)

18 यहून्ना बपतिस्मै दैणें आळै चेलै और फरीसी करा तै ब्रत; ता तिन्नै प्रभू यीशू मसीह सेटा एछी करै बोलअ, "यहून्ने चेलै और फरीसीए चेलै किलहै डाह ब्रत; पर तेरै चेलै निं ब्रत डाहदैं?" 19 प्रभू यीशू तिन्नां लै बोलअ, "जेभै तैणीं दुल्हअ बराती संघे रहा, तियां कै तेभै ब्रत डाहा? इहय करै जेभै तैणीं तिन्नां संघे दुल्हअ आसा, तेभै तैणीं निं तियां ब्रत करी सकदैं। 20 एक बगत एछणअ इहय बी कि दुल्हअ करनअ तिन्नां का जुदअ और तेभै डाहणअ तिन्नां ब्रत।"

21 "कोरै कापळेओ शाटअ निं पराणै झिकळै दी कोहै लांदअ, नाई ता सह शाटअ धेळा तेऊ झिकळै होर बी, अर्थात सह नऊंअ शाटअ धेळा तेऊ पराणै झिकळै होर बी जादअ। 22 नऊंएँ दाखरसा बी निं पराणीं मशका (खालहळै) दी कोहै डाहदैं, नाई ता पराणीं मशका फुटा तेता करै, और दाखरस बी और तियां मशका बी हुआ इहय करै दुहै गल्ला जाएँ। पर नऊंअ दाखरस सका नऊंई मशका दी भरी।"

### सबते धैळीओ प्रभू

(मत्ती 12:1-8; लूका 6:1-5)

23 इहय हुआ कि प्रभू यीशू त सबते धैळी खेचा बाती लागअ द नाशदअ, और तेऊए चेलै लागै हाँडदी-हाँडदी खाणां लै गिंहुँए सीला चोळदैं। 24 तैबै फरीसी तेऊ लै बोलअ, "हेर, इयां सबते धैळी तेऊ कामां किलहै करा जुण तेसा धैळी करनअ ठीक निं हंदअ?" 25 तेऊ तिन्नां लै जबाब दैनअ, "तम्है के

कधू इहय नि पहळअ कि जधू दाऊदा जरूरत पळी और ज़ांऊं सह और तेऊए साथी भुखै थियै तेभै तेऊ किजै किय?" 26 तेऊ किहअ करै अबियातार माहा याजके ज़माने परमेश्वरे भबनें नाशी करै भेंट चढाऊई दी रोटी खाई; जिना रोटी याजका छाडी होर कोहै नि खाई सकदअ त, और तेऊ दैनी तियां आपणें साथी लै बी?" 27 तेखअ प्रभू तिन्नां लै बोलअ, "सबतो धैळअ आसा आदमी लै बणां अ द, आदमी नि सबते धैळै लै आथी। 28 तैहीता माळूओ शोहरू आसा सबते धैळैओ बी प्रभू।"

### मछैऊंरें दै हाथा आळअ ठीक करनअ

(मत्ती 10:1-4; लूका 6:12-16)

3 तेखअ प्रभू यीशू मसीह अराधनालै लै नाठअ, और तिधी थिय एक आदमी इहय कि तेऊओ हाथ त मछैअ द। 2 और तियां तै यीशू लै दोशा लागेणें तैणी घात लाई तारखे दै की हाम्हां भाळणअ हेरू कि अह सबते धैळी एऊ आदमी रांबळअ करा कि नाई। 3 यीशू तेऊ मछैऊंरें दै हाथा आळै आदमी का बोलअ, "इधी खट्ठू बिचै।" 4 तेखअ यीशू तिन्नां सोभी लै बोलअ, "सबते धैळी कै भलअ करनअ ठीक आसा कि बुरअ करनअ? प्राण बचाऊणें कि मारनअ?" पर तियां सोभ रहै चुप्प। 5 यीशू तिन्नें कठोर मना भाळी उदास हई करै रोशा संघे चऊ बाखा भाळअ और तेऊ आदमी लै बोलअ, "आपणअ हाथ कर आजू।" तेऊ बी आपणअ हाथ आजू किय और तेऊओ हाथ हुअ रांबळअ। 6 तेखअ लागे फरीसी तिधा का बागै नाशी करै तेभी हेरोदेसे लोगा संघे यीशूए खलाफ इहै जोगा करदै कि अह हाम्हां किहअ करै करनअ खतम।

### यीशू पिछू लोगे भीळ नाशणीं

7 यीशू आपणें चेलै संघे दरैऊआ बाखा लै नाठअ; और गलीला का आरे बडै भारी लोग तेऊ पिछू। 8 ता यहूदीए, और येरुश्लेमे, और इदूमिए, और जरदन नदी पार, और सूर और सैदा ओरी-पोरी का आरे बडै भारी लोग इहय शूर्णी करै की सह किहै-किहै नोखे काम करा, तेता भाळै आरे सारै यीशू सेटा लै। 9 यीशू आपणें चेलै का बोलअ, "इन्नां लोगे भीडे कारण डाहै मुल्है एक होच्छी किस्ती तैर, ताकि हू इन्नां लोगे जेह्ल-मरेह्ली बिचा का बची सकूँ। 10 किल्हैकि यीशू मसीह किये तै कई रोगी ठीक और जेतरे बी बमार लोग थिये; तियां पळा तै प्रभू यीशू मसीह छुहंदै प्रभू परेदें चुटी। 11 दुष्टआत्मां का बी ज़ांऊं प्रभू यीशू धेछिया त; ता तियां बी पळा ती प्रभू यीशू मसीह सेटा उटी बाखा और लैळा पकारा लाई करै बोला ती तियां इहय कि "तूह आसा परमेश्वरो पुत्र।" 12 और तेऊ बी तिन्नां लै कई बारी चतैनगी दैनी कि मूँह नि प्रगट करी।

### बाराह चेलै चुनणें

(मत्ती 10:1-4; लूका 6:12-16)

13 तेखअ नाठअ प्रभू यीशू मसीह धारा परेदा लै और जुण तेऊ आप्पू संघे निणें चाहै तियां नियें तेऊ आप्पू संघे और तियां तेऊ सेटा लै आरे। 14 तेखअ तेऊ बाराह मर्ध चुनै कि तियां तेऊ संघा-संघा रहे ताकि सह तिन्नां प्रचारा करदें भेज्नी सके 15 और दुष्टआत्मां काढणेंओ अधिकार तिन्नां का होए। 16 तियां बाराह जह्ले आसा ईयां; शमोन जसरअ नांअ तेऊ पतरस डाहअ, 17 और जबदीओ शोहरू याकूब और याकूबो भाई यूहन्ना, जसरअ नांअ तेऊ बुअनरगिस अर्थात गर्जणेंओ शोहरू डाहअ। 18 और आन्द्रियास, और फिलिप्पुस, और बरतुलमै, और मत्ती, और थोमा, और हलफीओ शोहरू याकूब, और शमोन कनानी, 19 और यहूदा इस्करोती जुणी सह ढाकणें बी बज्जैळअ त।

### यीशू और बालजबूल

(मत्ती 12:22-32; लूका 11:14-23; 12:10)

20 तेखअ यीशू एकी घरा दी आअ; और तिधी हुए एतरै खास्सै लोग कठा कि तियां नि रोटी बी खाई सकै। 21 ज़ांऊं तेऊए टबरै इहय शुणअ, ता तियां

आरे तेऊ ढाकदै; किल्हैकि तियां बोला तै तेऊलै इहय कि तेऊओ चित नि टकाणें दी आथी।

22 येरुश्लेमा शास्त्री बी तै आरे दै, ता तियां बोला तै इहय कि एऊ दी आसा "शैतान" और "अह काढा दुष्टात्मं सरदार शैताने सहायता करै दुष्टात्मां।"

23 एसा गल्ला पिछू यीशू तियां आप्पू सेटा लै शादें और घेरै फेरै दृष्टांता दी तिन्नां समझाऊंदअ लागअ कि, "शैतान किहअ करै सका शैताना काढी?" 24 "जै कसरै राजा दी फूट पळे; ता सह राज किहअ करै सका बणीं रही?" 25 "और जै कसा घरा दी फूट पळे, ता सह घर किहअ करै सका सलामत रही?" 26 "जै शैतान आपणअ ही बरोधी हई करै आप्पू ही मांझै फूट पाए, ता तेऊओ राज किहअ करै सका बणीं रही? तेऊओ ता अंत ई हआ।"

27 "पर कोई बी आदमी नि ज़ोरा आळए (बलवन्त) घेरै पेशीकरै तेऊओ माल तेभै तैणी लूटी सकदअ, जेभै तैणी की सह तेऊ ज़ोरा आळै आदमी बान्हीं न लए; और एता बाद सका सह तेऊ लूटी।"

28 "हूँ बोला तम्हां का सच्चाई कि मांझूए आदी लुआदीए सोभ पाप और निंदा हणें माफ, 29 पर जुण कोई पवित्र आत्मं खलाफ निन्दा करे, सह नि कधी माफ हणअ; पर सह हणअ अनंत पापो अपराधी।" 30 किल्हैकि तियां बोला तै प्रभू लै इहय कि एऊ दी आसा दुष्टात्मां। 31 तेखअ प्रभूए आम्मां और भाई आरे, और बागै खळै हई करै प्रभू लै समाद भेजअ। 32 लोगे भीड ती प्रभू ओरी-पोरी बेठी दी, और तिन्नें प्रभू लै बोलअ, "भाळ, तेरी आम्मां और तेरै भाई आसा बागै ताह लोळै लागे दै।" 33 प्रभू तिन्नां लै उतर दैनअ, "मेरी आम्मां और मेरै भाई कुण आसा?" 34 और तिन्नां बाखा, जुण तेऊ ओरी-पोरी बेठै दै थियै, तिन्नां भाळी करै बोलअ, "भाळा, मेरी आम्मां और मेरै भाई आसा ईयां। 35 किल्हैकि जुण कोई परमेश्वरे मरजी दी हांढे, सहई आसा मेरअ भाई और सहई आसा मेरी बेहण और सहई आसा मेरी आम्मां।"

### बेजै बऊणें आळैओ दृष्टांत

(मत्ती 13:1-9; लूका 8:4-8)

4 तेखअ भी प्रभू यीशू दरैऊए कनारै उपदेशा दैदअ लागअ; ता तिधी ढाभूए बडै भारी खास्सै लोग और प्रभू यीशू दरैऊआ दी नाठअ और एकी किस्ती भितरी बेठअ, ता सारै लोग रहै दरैऊए कनारै शुकी जैगा खट्ठुई। 2 ता प्रभू यीशू तिन्नां का दृष्टांता दी कई गल्ला सखाऊंदअ लागअ और आपणें उपदेशा दी प्रभू यीशू मसीह बोलअ, 3 "शुणा, एक बेजै बऊणें आळअ निखळअ बेजै बऊंदअ, 4 बऊंदी बारी धख बेजअ पळअ बाते डोरै, ता सह चेलू पखीरू ऐछी करै चुंघअ। 5 धख बेजअ पळअ पथरीली जिम्मी दी, तिधी तेता खासअ माटअ नि भेटअ, खासअ माटअ नाई भेटणें कारण सह टिपअ छेकै। 6 तिन्नां टिपरूए जलैळै नि डुघै माटे दी थिये और जांऊं चटाक धुपअ लागअ ता तियां टिपरू जळै और शुके। 7 ता धख बेजअ पळअ झाकळै, और ज़ांऊं कांडै-रिंडै बडै ता सह दाभुअ तेथ, और तेथ नि फळ लागै। 8 पर थोळअ बेजअ पळअ रजदी पजदी जिम्मी दी और सह टिपअ रांबळअ, और तेथ लागी बडी भारी फसल और तिन्नां मांझै आणें कोई तीह गुणां, कोई शाठ गुणां, ता कोई शौ गुणां फळ।" 9 तेखअ प्रभू तिन्नां लै बोलअ, "जसा का शुळणां लै कान आसा, तियां शुणां।"

### दृष्टांतो मकसद

(मत्ती 13:10-17; लूका 8:19-10)

10 ज़ांऊं प्रभू यीशू कल्ही रहअ, ता तेऊए साथी और तिन्नां बारह संघी प्रभू का तेऊ दृष्टांतै बारै पुछअ। 11 ता यीशू तिन्नां लै बोलअ, कि तम्हां लै आसा परमेश्वरे राजे भेदा समझणें समझ दैनी दी, पर इन्नां होरी लै लागा ईयां गल्ला दृष्टांता दी खोजणीं, 12 ऐतै तैणी कि, "तियां शरैछी आच्छी भाळै, पर तिन्नां का नाई शुझिए, और शुणदें शुणें बी और ना समझै; इहय नि हआ की तियां फिरे और तिन्नांलै माफी भेटे।"

### बेजै बरुणें आळअ दृष्टांत समझारुणअ

(मत्ती 13:18-23; लूका 8:11-15)

13 तेखअ तिन्नां लै प्रभू बोलअ, "तम्हें ऐऊ कै नाईं समझदें? ता तै ईयां होर दृष्टांत किहअ करै समझणें? 14 बरुणें आळअ बरुआ वचन। 15 जुण बेजअ बातें डोरें पळअ, सह आसा परमेश्वरो वचन, ईयां आसा तियां लोग, जुंणी परमेश्वरो वचन ता शुणअ, पर शैतान आअ तेभी और जुण वचन तेऊ दी बरुआ त, तेऊ चकअ तेभी सह बचन तेऊए मना का। 16 तिहअई ही जुण बेजअ पाथरा आळी शकरीली जिम्मी दी बउअ, अह आसा सह जुण वचना शुणा, और तेभी खुशी-खुशी संघे मना, 17 पर आपणें भितरी पाकअ विश्वास नाईं हणें कारण तियां रहा थोळें ही धैळें लै, और वचन मनणें कारण जांऊं तिन्नां लै मुसीबता ऐछा, ता तियां खा तेभे ठोहळ। 18 और जुण बेजअ कांडें रिडें जैदरी पळअ, ईयां आसा तियां आदमी, जुंणी वचन ता शुणअ, 19 पर संसारे चिंता, और धन माया, लाळच, और कई सारी चिजो लाळच और इन्नां ई गला दी ला तियां सारअ धन मन, और वचन रहा तिन्नां दी दाभुई और तेथ निं कोई बी फळ लागदअ। 20 ता जुण बेजअ रजदी-पजदी जिम्मी दी बरुआ द आसा, ईयां आसा तियां लोग, जुंणी वचन शुणअ, और वचन ग्रहण किय, और तिन्नां दी लागी फसल बी, कोई दी तीह गुणां, कोई दी शाट गुणां, ता कोई दी लागे शौ गुणां फसल।"

### दीऊएओ दृष्टांत

(लूका 8:16-18)

21 प्रभू यीशू तिन्नां लै बोलअ, "दीऊअ निं दीऊटा हेतै डाहणां लै हंदअ? दीऊए के एतै तैणीं निं ज़ाळदें कि दीऊटा परेंदें डाहे? 22 किल्हैकि कोई बी चीज निं छुपी दी आथी, पर एतै तैणीं आसा कि शुझिए; 23 और ना किजै गुप्त आथी, पर एतै तैणीं कि प्रगत होए। जसरे कान आसा, सह शुणें।"

24 तेखअ प्रभू यीशू तिन्नां लै बोलअ, "चतैन रहा कि तम्हें कै शुणां। जसा गजा करै तम्हें होरी लै नापा, तेसाई गजा करै नापणअ तम्हां लै बी, और तम्हां लै बी दैणअ खासअ। 25 किल्हैकि जसा का आसा, तेऊ लै दैणअ होर बी; और जसा का नाईं आथी, तेऊ का निणअ सह बी बापस जुण तेऊका आसा।"

### टिपणें आळें बेजो दृष्टांत

26 प्रभू यीशू बोलअ तिन्नां लै भी इहय कि, "परमेश्वरो राज आसा इहय, जिहअ कोई माळूं जिम्मी दी बेजअ बरुआ, 27 और सह राची सुता, और धैळी जागा, और सह बेजअ किहअ करै टिपा, और किहअ करै बझा, एसा गल्लो निं तेऊका थोघे। 28 अह जिम्मी दैआ आपणें आप फसल, पैहलै लागा टिपरु, तेखअ लागा सील, और एता बाद ह्आ सिला दी दाणअ त्यार। 29 पर जेभै फसल पाका, तेखअ लागा सह खुश हई करै हासदअ, किल्हैकि तेऊए फसला ल्ऊणेंओ बगत गअ हई।"

### राईए दाणेंओ दृष्टांत

(मत्ती 13:31,32,34; लूका 13:18,19)

30 तेखअ प्रभू यीशू तिन्नां लै बोलअ, "हाम्हें परमेश्वरो राज कसा जिहअ खोजमें, और अह कसा दृष्टांता करै समझारुणअ? 31 शुणा, परमेश्वरो राज आसा राईए दाणें जिहअ; राईओ दाणअ आसा भूमिणें सोभी बेजै का होछअ बेजअ, 32 जेभै तेऊ बरुआ, सह आसा ता भूमिणें सोभी बेजै का होछअ, पर जांऊं तेऊ बउई हेरा, ता सह ह्आ सोभी घाहा-पाचा का बउअ, और जांऊं तेते शाळीं बडी ह्आ; ता सरगे उडणें आळें चेलू बी सका तेतै छैली दी बसेरअ करी।"

33 प्रभू यीशू तिन्नां लै ईहैई कई दृष्टांत खोजी करै तिन्नें समझे साबै शणांऊंआ तै तिन्नां का बचन, 34 और बिणां कोई दृष्टांत खोजी निं सह तिन्नां का कोई बी गल करदअ त, पर कांगनरांगे नाशी करै खोजा त प्रभू आपणें चेलै का तिन्नां सारी गल्लो अर्थ।

### तुफान शांत करनअ

(मत्ती 8:23-27; लूका 8:22-25)

35 तेऊई धैळें जांऊं साह चाली ती पळी, ता प्रभू यीशू आपणें चेलै लै बोलअ, "एछा हाम्हं नाशणअ दरैऊआ पारा लै।" 36 ता तियां लोगा छाडी करै जिहअ सह आसा त, किस्ती दी संघा नियं; और तेऊ संघे ती होर बी किस्ती। 37 तेखअ हूअ इहय कि बउअ भारी तुफान आअ, और छाली लागी एतरी कि किस्ती लागी पाणीं करै भरदी। 38 पर आपू त प्रभू किस्तीए पिछलै हीसै दी सुतअ द। चेलै प्रभू खळअ झैऊअ और बोलअ "हे गुरु, ताह हैळअ फिकर निं आथी कि हाम्हें चालै पाणीं जैदरी डुबी खतम हई?" 39 प्रभू यीशू खळअ उझुअ और तुफाना लै एक झांश काडी, और पाणीं लै बोलअ कि शान्त हअ, इधी खहळू।" ता आंधी-तुफान तेभी रुकअ और समुंदर हुअ शांत, तैबै जाई करै हुअ चैन। 40 तैबै प्रभू तिन्नां लै बोलअ, "तम्हें किल्है डरा? तम्हां कै मैची बी विश्वास नी हुअ?" तियां सोभ बडै भारी हैळुए और आपू बिचै गला करदें लागे कि, 41 "अह कुण आसा, एऊए हर गला मना आंधी-तुफान और पाणीं बी?"

### दुष्टात्मां शाचअ द आदमीं ठीक करनअ

(मत्ती 8:28-34; लूका 8:26-39)

5 तियां दरैऊआ पार गिरासेनिये देशा दी पुजै, 2 और जांऊं प्रभू किस्ती का होथअ, ता नडैऊए आअ एक आदमी, तेऊ आदमी दी ती दुष्टात्मां बसी दी, सह निखळअ मुल्दघाटा का और प्रभू यीशू सेटा लै आअ तुहरी करै। 3 सह रहा त मुल्दघाटै, और कोई बी लोग निं तेऊ शांघळी लोहै करै बी बान्हीं सकदें तै, 4 किल्हैकि तेऊ लै लाए तै कई बारी शांघळी लोहै, पर तेऊ किये तै शांघळी लोहेए बी चोळी करै टोर-टोर, और कोहै निं तेऊ बश करी सकदअ त। 5 सह रहा त कबलअ राची धैळी मुल्दघाटा दी और नाळें धारै जोरै-जोरै हाका लैळा लांदअ लागी, और आपू पाथरा दी रळारुई करै हआ त घाईल।

6 यीशू भाळी करै सह दुराई का तुहरी करै आअ और प्रभू लै किय तेऊ प्रणाम, 7 और जोरै बोलअ तेऊ इहय, "हे यीशू परमप्रधान परमेश्वरे शोहरुआ, मुँह ताह संघे कै काम? हूँ दैआ ताल्हे परमेश्वरै कसम कि तुह निं मुल्है दुख दैई।" 8 किल्हैकि प्रभू यीशू बोलअ तेऊलै इहय कि, "हे दुष्टात्मां, एऊ आदमी का निखळ पोर्ही।" 9 प्रभू यीशू तेऊ का पूछअ, "ताह नाअ कै आसा?" तेऊ दैनअ प्रभू लै उत्तर कि, "मुँह नाअ आसा सैना, किल्हैकि हाम्हें आसा खास्सै।" 10 तेऊ प्रभू यीशू का बडी भारी अरज की कि हाम्हं निं एऊ देशा का बागै भेजी।"

11 तिधी त धारठी परेंदें एक सुंगरो छुंड लागअ द चरदअ; 12 तिन्नें प्रभू सेटा एही अरज करी करै बोलअ, "हाम्हं दै इन्नां सुंगरा बिचा लै नाशणें, ताकि हाम्हें इन्नां भितरी पेशी सके।" 13 तेखअ प्रभू तिन्नां लै आज्ञा देंनीं, और तियां दुष्टात्मां तेऊ आदमीं का निखळी करै सुंगरा भितरी पेठी, तिन्नां सुंगरे छुंडा दी तै खास्सै नाईं ता कोई दुई हाजार सुंगर और तियां सुंगर पळें बेघरुई करै धारठी परेंदा का दरैऊआ भितरी और तियां हुए सोभ मरी करै खतम।

14 तियां फुआल भागै तिधा का गराऊंआं नगरी लै और तिन्नें खोजअ इन्नां गल्लो सारअ समाचार तिन्नां का और सोभ लोग आए तिधी भाळें। 15 प्रभू यीशू सेटा एछी करै तियां सोभ तेऊ दुष्टात्मा आळें आदमीं सचेत झिकळें बाहें दै बेठअ भाळी करै डरै। 16 तिधी आच्छी सहनै भाळणें आळें तेऊ दुष्टात्मा आळें आदमींओं और तिन्नां सुंगरो पूरअ हाल खोजअ। 17 तियां सोभ लोग प्रभू का एही अरज करी करै बोलदें लागे कि म्हारी सिंऊंआं का नाश दूर।

18 जांऊं प्रभू यीशू किस्ती दी बेठदअ लागअ ता तेऊ दुष्टात्मां आळें आदमीं बोलअ कि "हे प्रभू मुँबी दै आपू संघे रहणें।" 19 पर प्रभू यीशू तेऊए अह गल निं मनी और तेऊलै बोलअ, "आपणें घरें नाश और लोगा का खोज इना गला कि प्रभू ताल्हे दैया करी करै किहै बडै-बडै सामर्थी काम कीए।" 20 सह माळूं बी तिधा का नाशी करै दिकापुलिस नगरी दी इन्नां गल्लो प्रचार करदअ लागअ की प्रभू यीशू मुल्है किहै बडै-बडै सामर्थी काम कीए; और सोभ लोग हआ तै रहैन।

### याईरे मुई दी शोहरी और एक बेटळी

(मत्ती 9:18-26; लूका 8:40-56)

21 जांऊं प्रभू यीशू भी किस्ती दी दरैऊआ पार नाठअ, ता एक लोके बडी भीड़ हई प्रभू सेटा लै जम्हां। प्रभू दरैऊआ पार कनारै ई पुजअ त कि, 22 याईरे नांओं एक आराधनाले सरदारा मांझें का एक आअ, और प्रभू भाळी करै सह प्रभूए पेरै पळअ, 23 और इहय बोली करै तेऊ प्रभूका बडी भारी अरज की, और इहय बोलअ, "मेरी होच्छी शोहरी आसा मरनै आळी, तूह एछ और तेसा दी आपणअ ला ताकि सह ठीक होए।" 24 प्रभू यीशू तेखअ तेऊए अरज शुणीं तेऊ करै तेऊए घरा लै नाठअ; ता बडै भारी लोग लागे प्रभू यीशू पिछू हांडदै संघा।

25 बाता हांडदी थी एक बेटळी, तेसा ती बाराह साला ओही खुनां बगणें बमारी। 26 तेसा कराऊअ त बडै भारी डाक्टरा बैदा का आपणअ लाज बी पर सह निसी ती किछू गल्ला करै ठीक हई। तेसा आपणीं सारी जिंदगीए कमाई बी की तेसा बमारी पिछू खतम; पर बमारी का ठीक हणेंए जेगा लागी सह होर बी जादी बमार हंडी। 27 सह बी प्रभू यीशूए गल्ला शुणीं करै, लोके भीळा जेंदरी प्रभू पिछू नाठी और तेसा पिछू का प्रभू यीशूए झिकळै छुंए। 28 किल्हैकि सह सोचा ती आपणें मनै इहय कि, "जै हूँ प्रभू यीशूए झिकळै बी छुंए ता तेता करै जाणीं हूँ एसा बमारी का छुटी।" 29 जांऊं तेसा प्रभूए झिकळै छुंए ता तेभी हुअ तेसरअ खून बगणअ बंद। 30 प्रभू यीशू का आप्पू बी जाळुअ कि मुखा निखळी सामर्थ; ता प्रभू यीशू तेतरै लोग जेंदरी पिछू फिरी करै बोलअ, "मेरै झिकळै कुणीं छुंए?" 31 तेऊए चेलै तेऊ लै बोलअ, "तूह इन्नां केही गल्ला करा, तूह भाळा बी हैनू ताह पिछू भाळ केतरै लोग आसा हांडदै लागे दै, और तूह बोला की कुणी हूँ छुंअ?" 32 प्रभू यीशू तेऊ भाळणा लै चऊ बाखा नजर दैनीं जुणीं अह काम किय त। 33 तेखअ सह बेटळी इहय सोची करै कि, मेरी भाळ केही भलाई हई, तेसा डरदी-कांबदी प्रभूए पेरै पळीकरै सारै हाल सन्नै-सन्नै खोजै। 34 प्रभू यीशू तेसा लै बोलअ, "बेटी, तेरै विश्वासै की तूह ठीक।" राम्बळै करै नाश और एसा बमारी का रहअ बची।

35 प्रभू त इहय बोलदअ ही लागअ द कि आराधनाले सरदारै घरा का भेजअ लोगे फैळअ कि, "तेरी शोहरी ता मरी गई, ऐबै तरें गुरू लै किल्है लाअ थोघे बाझी इधा लै एछणेंओ कष्ट दैई?" 36 जिना गल्ला करदें तियां तै लागे दै, तियां गल्ला की प्रभू यीशू शुणीं ना शुणी; और आराधनाले सरदारा लै प्रभू बोलअ, "हैळअ नि करी, सीधअ विश्वास डाह।" 37 प्रभू यीशू नि पतरस, याकूब और याकूबे भाई यहूना छाडी होरी कोही आप्पू संघे एछणें दैनअ। 38 आराधनाले सरदारै घरे पुजी करै प्रभू तियां लोग लेरदै-पकारदै और मखाण पळअ द भाळअ। 39 तेखअ प्रभू भितरी नाशी करै तिन्नां लै बोलअ, "तम्हें किल्है आसा लागे दै लेरदै-पकारदै? शोहरी नि मुईदी आथी अह आसा सुती दी।" 40 तियां सोभ लाग लागे एसा गल्ला शुणीं करै मजाका करदें, पर प्रभू काडै तिधा का तियां सोभ लोग बागा लै, और शोहरीए आंमां-बाप्पू और आपणें साथी संघी डाहै भितरी जिधी शोहरी ती डाही दी। 41 तेखअ प्रभू शोहरिओ हाथ ढाकी करै बोलअ, "तलीता कूर्मी।" एतो मतलब हआ, "हे लान्हीए", संघा बोलअ इहय कि "खळी उझू।" 42 जांऊं प्रभू इहय बोलअ ता सह शोहरी उझुई तेभी खळी और सह लागी हांडदी-फिरदी; किल्हैकि सह ती बारह साले। एसा गल्ला भाळी हुरे लोग रहैन। 43 तेखअ प्रभू तिन्नांलै चतैनगी दैनी कि एसा गल्लो थोघ नि लोळी कोही का लागअ, तेखअ बोलअ प्रभू तिन्नां लै इहय कि "एसा शोहरी लै दैआ किजै खाणा लै।"

### नासरतै यीशूओ अनादर

(मत्ती 13:53-58; लूका 4:16-30)

6 तिधा का एछी करै नाठअ प्रभू यीशू आपणें देशा लै और तेऊए चेलै बी नाठै तेऊ संघा। 2 सबते धैळी प्रभू यीशू आराधनाले दी उपदेशा दैदअ लागअ, और बडै भारी लोग हुरे शुणीं करै रहैन, और तियां लागे इहय बोलदें कि, "एऊ ईयां गल्ला किधा का शिखळी? अह कुण जिहअ ज्ञान आसा जुण सिधअ एऊले आसा दैनअ द? ता हेरे; एऊए हाथे भाळ किहै-किहै चमत्कारे काम हआ।" 3 अह कै सहेई बडई नि आथी जुण मरियमों शोहरू, और याकूब, योसेस, यहूदा, और शमौनों भाई आसा? एऊए बैहणीं कै हाम्हां

बिचै नि रहंदी?" तैही लागी तिन्नां तेऊए बारै ठोहळ। 4 प्रभू यीशू तिन्नां लै बोलअ "भविष्यदक्ततो आपणें देशे, और आपणें टबरा बिचा और आपणें घरा छाडी होरती हआ सोभी जैगा अदरभाअ। 5 प्रभू यीशू नि तिधी किछे बडे सामर्थी काम किये, प्रभू यीशू तिधी सिधे थोळै जिहै बमारा दी हाथ लाई करै कियै तियां राम्बळै।

6 प्रभू यीशू हुई एसा गले रहैनी कि तिन्नें नि विश्वास किय; और प्रभू यीशू लागअ तेते ओरी-पोरी गराऊंए चऊ बाखा उपदेशा दैदअ।

### बाराह चेलै भेजणें

(मत्ती 10:5-15; लूका 9:1-6)

7 प्रभू यीशू बाराह जणें आप्पू सेटा लै शादैं और तेऊ तियां दुई-दुई करै भेजै; और तिन्नांलै दुश्टात्मा काढणेंओ अधिकार दैनअ। 8 प्रभू तिन्नां लै आज्ञा दैई करै बोलअ; "बाता हांडणां लै शोठे का सुआई नि आप्पू संघा किछ पाई, ना रोटी, ना झोळी ना बटुअ ना ढबै। 9 पर बुट बान्हां, और ना आप्पू संघा दुई-दुई कुरतै पाई।" 10 होर प्रभू तिन्नांलै बोलअ, "जेभै तम्हें कसरै घरै नाशे, ता तेभै तैणीं नि तम्हें तिधा का होरती नाशी, जेभै तैणीं तियां आप्पू नि बोले। 11 जेसा जैगा लोग तम्हां नाई मनै, और थारी गल्ला नाई शुणें, तेसा जैगा तुळके आपणें पैरा का धूळअ बी पोही, ताकि तिन्नां लै ग्वाही होए।" 12 प्रभूए चेलै बी नाठै और तिन्नें बी इहय प्रचार किय कि मन फरेऊआ। 13 संघा तिन्नें बडी भारी दुष्टआत्मां काढी, और कई लोगा लै तेल मळअ और तियां किए ठीक।"

### यूहन्ना बपतिस्में दैणें आळेए हत्या

(मत्ती 14:1-12; लूका 9:7-9)

14 हेरोदेसे राजे बी प्रभू यीशूए चर्चा शुणीं, किल्हैकि तेऊओ नांअ फैलअ त सारै देशे, और तेऊ राजे बोलअ इहय कि, "यूहन्ना बपतिस्में दैणें आळअ हुअ मरी करै जिऊंदअ, तैहीता तेऊका ईयां सामर्थ और चमत्कारे काम हआ प्रगट।" 15 ता कई होरी लोगे बोलअ इहय बी कि, "अह आसा एलिया।" पर कोई लोगे बोलअ इहय कि "अह आसा भविश्याबाणीं करनै आळअ; या आसा अह तिन्नां भविश्याबाणीं करनै आळें मांझें कोई एक जळुअ।" 16 हेरोदेसे राजे इन्नां गल्ला शुणीं करै इहय बोलअ कि, "जसा यूहन्ना बपतिस्में दैणें आळेंओ मणें कैळअ काटअ त, मेरैखैलै हुअ सहेई जिऊंदअ।" 17 हेरोदेसे आपणें भाई फिलिप्पुसै लाळी हेरोदियासा पिछू, जसा संघे तेऊ बैह किय त, तेऊ भेजे तै यहूना ढाकणा लै सपाही संघा पाअ त यहूना तेऊ जेहला दी कैद करी। 18 ईयां गल्ला हुई एही कि यहूना बोलअ त हेरोदेसा लै इहय कि, "आपणें भाईए लाळी डाही करै नि तरें ठीक किय।" 19 एता पिछू डाहा ती हेरोदिआस यहूना संघे जीद, और सह चाहा त तेऊ किहय करै मारनअ; पर इहय नि हई सकअ, 20 किल्हैकि हेरोदेस राजअ डरा त यहूना का इहय करै कि यहूना त बडअ धर्मी और पबित्र मर्ध, और तेउए हेर सबाळ बी करा त, और सह डरा त तेऊए गल्ला शुणीं करै बडअ भारी, ता बडी खुशी-खुशी तेऊए गल्ला शुणा बी थिय।

21 ता जेऊ मोकें लोळी हेरोदिआ लागी दी थी; सह मोकअ भेटअ तेसा तेभै जांऊं हेरोदेसे आपणी जल्म धैळी, आपणें प्रधाना, सेनापति और गलील देशे बडै-बडै लोगा लै भोज दैनअ। 22 ता हेरोदियासे शोहरी आई भीतरा लै, और आपणअ नाच रहैऊई करै हेरोदेस और तेऊ संघे बैठे दै सोभ कीए खुश, तेखअ तेसा का खुश हई करै राजे तेसा शोहरी लै बोलअ, "तूह जुण बी मुखा मांगे, मुँह दैणअ ताल्है खुशी-खुशी।" 23 होर ता होर राजे तेसा लै बचन दैई करै सोभी सन्नै बोलअ इहय कि, "जुण बी तूह मुखा मांगे सह लाअ मणें ताल्है दैई; ईधी तैणीं बी कि जै तूह मुखा आधअ राज बी मांगे; तेता बी दैऊ हूँ ताल्है।" 24 सह शोहरी बी बागे आपणी आम्मां सेटा पुछदी नाठी कि, "हूँ किजै मांगूँ?" तेसरी आम्मां बोलअ तेसा लै इहय कि, "यूहन्ना बपतिस्में दैणें आळेंओ मुंड मांग।" 25 सह तेभी राजे सेटा भीतरा लै आई और तेसा राजे सेटा अरज करी करै बोलअ कि "हूँ चाहा कि तूह दै मुल्है एभी यहूना बपतिस्में दैणें आळेंओ मूंड काटी थाळा भितरी आपणीं।" 26 एसा गल्ला शुणीं करै राजअ हुअ बडअ भारी दुखी पर सोभी सन्नै दैनै दै बचना और आप्पू संघा बैठणें आळें लोगे कारण तेसा गल्ला नि सह टाळणअ चाहंदअ त। 27 राजे

बी तेभी आपणें सपाही लै आज्ञा दैनी कि नाशा, तेऊओ मूँड आणां काटी करै एभी। 28 सपाही बी नाठअ और थाळा भितरी यहूना बपतिस्में दैणें आळेओ मूँड काटी करै दैनअ तेसा शोहरी लै आणी और तेसा शोहरी दैनअ सह आपणीं आम्मां लै। 29 इहय शुणी करै यहूने चेलै आरे और तेऊए लाहश निर्ई करै डही दाबी।

**चेलैओ बापस फिरनअ और यीशूओ कांत नांशणअ**  
(मत्ती 14:13, 14 लूका 9:10)

30 सारै प्रेरित हुऐ प्रभू यीशू सेटा कठा और जुंण किछ तिन्नै कीय और सखाऊअ त; तिन्नां सारी गल्ला हाल खोजअ तिन्नै प्रभू यीशू मसीह सेटा। 31 प्रभू तिन्नां लै बोलअ, "तम्हें नाशा किधी कांगनरांगी जैगा लै संघा करा आराम।" किल्हैकि तिधी रहा तै बडै भारी लोग एछदै-नाशदै लागी, और तिन्नां निं रोटी खाणेंओ बक्त बी भेटदअ त। 32 तेखअ तियां किस्ती दी बेशी करै एकी कांगनरांगी जैगा लै नाठै।

**पांजा हजारा मरधा का रोटी खैऊणीं**  
(मत्ती 14:15-21; लूका 9:11-17; यहूना 6:1-14)

33 लोगे हेरै तियां नाशदै भाळी और बछैणीं, ता लोग तुहरै पिछू पैदल और तियां गऐ तेसा जैगा पैहलै पुजी जिधा लै प्रभू और तेऊए चेलै पुजै। 34 प्रभू तिधी पुजी करै किस्ती का होथअ और तिधी बडी भारी लोगे भीळ भाळी करै फिरी प्रभू तिन्नै झीण। किल्हैकि तियां तै एही भेडा जिहै जसरअ कोई फुआल ही नी हदअ; और तेखअ प्रभू कई गले शिक्षा दैदअ लागअ।

35 जांऊं धैळअ उडदअ लागअ ता तेऊए चेलै तेऊ सेटा लै आरे और तियां लागै बोलदै इहय कि, "अह आसा बडी सुनसान जैगा, ता धैळअ बी गअ उडी। 36 इन्नां लोगा कर विदा ताकि ओरी-पोरी गराऊंएँ और बस्ती दी नाशी करै ईयां आप्पू लै खाणें-पीणेंओ प्रबन्ध करी सके।" 37 प्रभू तिन्नां लै उतर दैनअ कि, "तम्हें दैआ ईनालै खाणा लै।" तिन्नै प्रभू लै बोलअ, "हाम्हां के इन्नां सोभी लै शौआ दिनारे रोटी लाई आणीं लई और तेखअ खैऊणीं?" 38 प्रभू तिन्नां लै बोलअ, "नाशा, और भाळणीं दैआ हेरू तम्हां सेटा केतरी रोटी आसा?" तिन्नै भाळी करै बोलअ, "हाम्हां का आसा सिधी पाँज रोटी, और दुई माहछली।"

39 तेखअ प्रभू यीशू तिन्नां लै बोलअ, "सोभी बशैळा धरनीं हरी घाह और दुभळी परेंदै घेहळी दी।" 40 तियां सोभ शौ-शौ और पजाहा-पजाहा करै एकी-एकी घेळी दी बेटै। 41 प्रभू तियां पाँज रोटी और दुई माहछली हाथे ढाकी और सरगा बाखा लै भाळअ संघा धन्यावाद करी, और रोटी चोळी-चोळी करै लागअ चेलै का दैदअ और तियां लागै लोगा लै बांडदै, और तियां दुई माहछली बी दैनीं सोभी लै बांडी करै। 42 इहय करै सोभी लोगा का खैऊई रोटी और तियां सोभ लोग रजै। 43 ता बाराह चठै भरुए बची दी रोटीए, और माहछलीए बी बची कई चठी। 44 जेतरे जहँ रोटी खाई तियां तै गिणती दी लगभग पाँज हजारा मरधा ही मरधा। बेटळी और माठे निं तधू काला गिणती हंदी ती।

**यीशूओ पाणीं परेंदै हांढणअ**  
(मत्ती 14:22-33; यहूना 6:15-21)

45 तेखअ तेभी बोलअ प्रभू यीशू आपणें चेलै लै किस्ती दी बेशणा लै और जोर दैई बोलअ तिन्नां लै इहय कि जेभै तैणीं हूँ इन्नां लोगा ईधा का बिदा नि लऊं करी; तेतरी नाशा तम्हें मुखा पैहलै दरैऊआ पार बैतसैदा लै। 46 तिन्नां लोगा बीदा करी करै नाठअ प्रभू प्रार्थना करदअ धारा परेंदा लै। 47 जांऊं सान्ह पळी ता किस्ती ती दरैऊआ बिचै और प्रभू त कल्ही समुंदरे बाढै। 48 जांऊं तेऊ भाळअ की तियां चेलै किस्ती खेऊंदी-खेऊंदी डरे, किल्हैकि दरैऊआ बिचै हई दिश बागरी एही; तेसा आणें तियां हारी मारी। ता प्रभू यीशू बी राचकै चरुथे पहरै दरैऊए पाणीं परेंदै चेलै सेटा लै आअ और तिन्नां का च़ाह ती प्रभू आजू नीखळणअ। 49 तिन्नै चेलै सह दरैऊए पाणीं दी हॉडदअ भाळअ और तिन्नै सोचअ इहय कि अह आसा भूत, ता तिन्नै पाई डरै मारै जोरै-जोरै लैळा पकारा; 50 तियां सोभै जहँ तेऊ भाळी करै डरै, पर प्रभू यीशू

की तिन्नां संघे तेभी गल्ला बाता और तिन्नां लै बोलअ, "ढेठ डाहा, हैळिआ निं आथी हूँ आसा।" 51 प्रभू यीशू तिन्नां सेटा किस्ती भितरी आअ और तेभी दिश बागरी बी हुई बंद और तियां सोभ चेलै हुऐ रहैन। 52 तिन्नां निं तिन्नां रोटीए बारै बी समझ आई ती। किल्हैकि तिन्नै मन तै काठै हुऐ दै।

**गन्नेसरतै दाह बमारी आळै ठीक करनै**  
(मत्ती 14:34-36)

53 तियां सोभ दरैऊआ पार उतरीकरै गन्नेसरता दी पुजै, और किस्ती लाई कनारै दी। 54 जांऊं तियां कीस्ती का उतरै, ता लोगे हेरअ प्रभू तेभी बछैणीं, 55 संघा तियां लोग ओरी-पोरीए देशे गरांउआ दी तुहरै, और कई बमार आदमीं आणें मांजै परेंदै चकी, और जिधी-जिधी तिन्नां का पतअ चलअ कि प्रभू यीशू आसा; तिधा लै रहै तियां निंदै लागी। 56 ता जिधी-जिधी बी प्रभू यीशू गरांउएँ, नगरै, चाए बस्ती दी नाशा त, लोग करा तै बमारा आदमीं बजारा लै निं करै एही अरज कि हे प्रभू हाम्हां दै तेरै झिकळेओ पालअ छुंहणें; और जेतरे तेऊ छुंआं तै तियां सोभ हुआ तै बमारी का ठीक।

**रिति-रवाजा मनणेंओ सुआल**  
(मत्ती 15:1-9)

7 तैबे फरीसी और कई शास्त्री जुंण येरुश्लेमा का आरे दै थियै; तियां सोभ जहँ हुऐ प्रभू यीशू सेटा कठा। 2 तिन्नै भाळै प्रभू यीशू चेलै बिण्ही हाथा धोए रोटी खांदै; 3 किल्हैकि सारै फरीसी और यहूदी चला तै आपणें बजुणें रिति-रवाजे साबै और जांऊं तैणीं राम्बळे करै हाथ निं धोंदै तै; तांऊं तैणीं निं तियां रोटी खांदै तै। 4 तियां ओरी-पोरी हाटा बाजारा का एछी करै जांऊं तैणीं तियां न्हैऊई-धोऊई नी लूआ तै; तांऊं तैणीं निं तियां रोटी खांदै तै। एही आसा होर बी कई गल्ला जुंण तिन्नां लै मनणा लै पजेळी दी आसा; जिहअ कऊली लोटकी और चांबे भांडे धोणें मांजणें बगैरा-बगैरा। 5 तैहीता फरीसी और शास्त्री प्रभू यीशू का पुछअ, "तेरै चेलै किल्है निं बुजुणें रीती-रवाजा दी चलदै; और नधोए हाथे किल्है खा तियां रोटी?" 6 प्रभू यीशू तिन्नां लै जबाब दैनअ कि,

यशयाहै तम्हां कपटीए बारै दी आसा ठीक भबिश्वाबाणीं की दी, जिहअ लिखअ द आसा, "ईयां लोग होठा का ता करा मेरअ आदर मान, पर इनो मन रहा मुखा दूर।

7 ईयां करा मेरी आराधना फजूल ही, किल्हैकि ईयां सखाऊआ लोगा का माहूणै रिति-रवाजा लोगा लै, धर्म उपदेश बणाई करै। 8 किल्हैकि तम्हें मना परमेशरे आज्ञा टाळी करै माहूणै दै रिति-रवाजा।

9 तेखअ प्रभू यीशू तिन्नां लै बोलअ तम्है आपणें रिति-रवाजा मनणें तैणीं भाळा किहै राम्बळे करै करा परमेशरे आज्ञा दूर 10 किल्हैकि मूसा नबी बोलअ इहय कि, "आपणें आम्मां बापुओ करै आदरमान और जुंण आपणें आम्मां-बापु लै बुरअ बोले, तेऊ पाए मारी। 11 पर तम्है बोला इहय कि जै कुंण आपणें आम्मां बापु लै इहय बोले कि 'जुंण किछ तम्हा मुखा फाईदअ हई सका त सह तेतो गूअ सकळप हई।' 12 इहय करै निं तम्हें तेऊ आपणें आम्मां-बापुए सेऊआ टैहल करनै दैन्दै। 13 इहय करै तम्हें आपणें रिति-रवाजा करै जुंण तम्हें बणांएँ दै आसा; तेता करै टाळा तम्हें परमेशरे आज्ञा और कई ईहैई काम बी करा।"

**मांहुँ अशुध करनै आळी गल्ला**  
(मत्ती 15:10-20)

14 तैबे प्रभू लोगा आप्पू सेटा लै शादी करै बोलअ, "तम्हें मेरी गल्ला शुणां, और समझा। 15 एही निं किछै चीज आथी जुंण बागा का आदमींए पेदै पेशी करै आदमीं अशुध करा; पर जुंण आदमींए भीतरा का नीखळा, तियांई करा तेऊ अशुध। 16 जै कसरै शुळणा लै कान आसा, सह शुणें।" 17 जांऊं प्रभू लोगा जैदरा का घरा लै नाठअ, ता तेऊए चेलै एऊ दृश्टाते बारै तेऊ का पूछअ; 18 प्रभू तिन्नां लै बोलअ, "तम्हें बी कै ईहै नासमझ आसा? तम्हें कै जाणदें नी आथी की जुंण चीज बागा का आदमी लै नाशा, सह निं तेऊ अशुध करदी? 19 किल्हैकि तियां निं तेऊए मनै पेशदी, तियां नाशा पेटा



भितरा लै और बागा लै बी निखळा। इहय करै की तेऊ सारी खाणें पीणें चिजा शुध।<sup>20</sup> तेखअ प्रभू बोलअ, "जुंण आदमीए भितरा का नीखळा तियां गल्ला करा आदमी अशुध।<sup>21</sup> किल्हैकि भीतरा का मतलब जुंण आदमीए मना का बुरै-बुरै बचार, व्यभिचार, चोरी, हत्या, पराई स्त्री लै बुरी नजर, <sup>22</sup> लोभ, दुष्टता, छल, लूचपन, कुद्रीदी, निंदा, घमण्ड, और मुखता, निखळा; <sup>23</sup> ईयां सारी बुरी गल्ला निखळा भीतरा का, और ईयांई करा आदमी अशुध।"

### सुरुफनिकी जातीए बेटळीओ बिश्वास (मत्ती 15:21-28)

<sup>24</sup> प्रभू यीशू लागअ तेखअ तिधा का हांडदअ और तिधा का आअ सूर और सैदा देशा लै; और तिधी एकी घरै पुजी करै चाहअ त प्रभू यीशू मसीह इहय कि मेरअ पतअ निं लोळी होरी कोही का लागअ कि इधी आसा; पर सह निं लोगा का छुपी सकअ। <sup>25</sup> तिधी गई तेभी एक बेटळी एछी; तेसरी होछी शोहरी दी ती बुरी आत्मा शाची दी, सह आई प्रभूए चर्चा शुणी करै और सह तिधी एछी करै प्रभूए पैरै पळी। <sup>26</sup> सह बेटळी ती यूनानी और सुरुफनिकी जातीए। तेसा प्रभू सेटा अरज की कि मेरी शोहरी का काढ एसा बुरी आत्मा दूर। <sup>27</sup> तेऊ तेसा लै बोलअ, "पैहलै दै लानहै रजणें, किल्हैकि लानहेए रोटी लई करै कुत्तै आजू शोटणी निं ठीक आथी।" <sup>28</sup> तेसा प्रभू लै उतर दैनअ, "अह गल आसा ठीक, पर हे प्रभू; तैबी बी कुत्तै बी हेरा लानहै खोळै शोटै दै ठोर म्हार खाई।" <sup>29</sup> तैबै प्रभू तेसा लै बोलअ, "एसा गले कारण तूह नाश; और दुष्टात्मां गई तेरी शोहरी का निखळी।" <sup>30</sup> तेसा आपणें घरै पुजी करै भाळअ कि दुष्टात्मा गई तेसा शोहरी का निखळी।

### टऊणें और हकलै आदमींओ ठीक हणअ

<sup>31</sup> तेखअ प्रभू यीशू सूर और सैदा देशा का निखळी करै दिकापुलिस बाती हांडदी पुजअ गलील दरैऊआ सेटा। <sup>32</sup> ता, लोगे आणअ प्रभू यीशू मसीह सेटा लै एक टऊणअ और सह करा त गल्ला बी थाबळी, संघा की तिन्नै प्रभू सेटा एही अरज कि आपणअ हाथ ला एऊ दी। <sup>33</sup> तैबै प्रभू सह आदमीं लोगे जेल्हमरेल्ही जैदरा का दूर जिहअ निय और आपणी गुंठी तेऊए कांनै पाई और धख जिहअ थूक लाई करे तेऊए जिभ छुई, <sup>34</sup> और सरगा बाखा लै नजर दैनी, और लामअ शाह काडी करै, तेऊका बोलअ, "इफ्तह।" अर्थात्, "खुल जा।" <sup>35</sup> और तेऊए कान खुल्है और तेऊए जिभे गांठ बी खुल्ही, और सह लागअ साफ-साफ बोलदअ। <sup>36</sup> तैबै तेऊ तिन्नां लै बोलअ इहय कि एसा गल्ला निं कोही का खोजी। पर जेतरअ तेऊ तिन्नां लै इहय बोलअ कि कोही का निं खोजी, पर तिन्नै किय तेतरअ बी जादअ प्रचार। <sup>37</sup> तियां लागै रहै हई करै बोलदै कि, "तेऊ जुंण किछ बी कीय, सह किय बधिया; सह दैआ टऊणें लै शुळणें और टाटै लै दैआ बोळणे शगती।"

### चार हाजार लोगा का रोटी खैऊणें (मत्ती 15:32-39)

**8** तिन्नां धैळी ज्ञांऊं भी बडै भारी खाससै लोग कठा हुए, ता तिन्नां हजारां लोगा लै नाई त तिधी खाणां-पिणां लै आथी, तैबै प्रभू यीशू आपणें चेलै आपू सेटा लै शादें और तिन्नां लै बोलअ, <sup>2</sup> "मूँह लागी इन्नां लोगे बडी भारी झीण, किल्हैकि ईयां आसा मूँह संघे चिई धैळी ओही भुखवै नचिशै, और इन्नां का खाणा लै बी निं किछे आथी। <sup>3</sup> जै हूँ इन्नां भुखवै घरा लै भेजू, ता ईयां थकणें बाता; किल्हैकि इन्नां मांझै आसा कई दूरा-दूरा का आए दै।" <sup>4</sup> तेऊए चेलै तेऊ लै उतर दैनअ, "ईधी जंगलै किधा का लाई हाम्हे एतरी रोटी काडी कि ईयां एतरै लोग रजे।" <sup>5</sup> तेऊ तिन्नां का पूछअ, "तम्हों सेटा केतरी रोटी आसा?" तिन्नै बोलअ, "सात।"

<sup>6</sup> तेखअ बोलअ प्रभू तिन्नां चेलै लै इहय कि इन्नां लोगा बशौळा घेहळी, और तियां सात रोटी ढाकी और धन्याबाद करी करै चोळी, और आपणें चले हाथै रहअ दैदअ लागी, ता चेलै लागै लोगा लै घेहळी बांडदै। <sup>7</sup> तिन्नां सेटा ती धख जेही होछी माहछली बी; प्रभू धन्यावाद करी करै तिन्नां माहछली बी बोलअ बांडणा लै। <sup>8</sup> तियां सोभ लोग खाई पी करै रजे, ता चेलै भरै बची दी रोटीए

सात चठै टिरा बहंदै। <sup>9</sup> तिधी खाणें आळै लोग तै लगभग चार हजार मरध ई मरध, और तेऊ कियै तियां सोभ बिदा। <sup>10</sup> तेखअ नाठअ सह तेभी किस्ती दी बेशी करै आपणें चेलै संघे दलमूता नांओ देशा लै।

### फरीसिए यीशू का स्वर्गिय चिन्हें मांग करनीं (मत्ती 16:1-4)

<sup>11</sup> तेखअ आए तिधी फरीसी शास्त्री और तेऊ संघा लागै वाद-विवाद करदें, और तेऊ परखणें तैणीं लागै तेऊ का स्वर्ग चिन्हां मांगदें। <sup>12</sup> तेऊ आपणी आत्मां दी आहा भरी करै तिन्नां लै बोलअ, "एऊ जमानें लोग किल्है लोळा चिन्ह? हूँ बोला तम्हां का सच्चाई कि एऊ जमानें लोगा निं कोई बी चिन्ह भेटणअ।" <sup>13</sup> तेखअ नाठअ सह तिन्नां छाडी किस्ती दी बेशी करै दरैऊआ पार।

### फरीसिओ और हेरोदेसो सजेळअ (मत्ती 16:5-12)

<sup>14</sup> ता चेलै बिसरुए रोटी संघा निणें, और किस्ती दी ती तेऊ का एकै रोटी, <sup>15</sup> तैऊ तिन्नां लै चतैनगी दैनीं कि, "हेरे, फरिसीए सजेळै और हेरोदेसे सजेळै का रहै दूर।" <sup>16</sup> तियां लागै आपू मान्झै सोचदें-वचारदें और इहय बोलदें कि, "हाम्हां सेटा रोटी ता आथी निं।" <sup>17</sup> तिन्नै मनें गल्ला भुझी करै प्रभू यीशू तिन्नां लै बोलअ, "तम्हें आपू मांझै इहय बचार कील्है आसा लागै दै करदें कि हाम्हां सेटा निं रोटी आथी? कै तम्हा मैची तैणीं थोघ निं लागअ और समझ निं पळी? थारअ मन कै काठअ हुअ? <sup>18</sup> कै तम्हां आछी करै बी नी शुझदअ, और कान हंटी बी निं शुझदअ? और कै तम्हां आद नी आथी रही दी; <sup>19</sup> जेभे मंए पांजा हजारा लोगा लै रोटी चोळी करै दैनीं ती ता तम्हें बची दी रोटीए केतेरै चठै चकै तै?" <sup>20</sup> "और जधू मंए चार हजारा लोगा लै सात रोटी चोळी-चोळी करै दैनीं ती, ता तम्हें बची दी रोटीए केतेरै चठै चकै तै भरी करै?" तिन्नै बोलअ "सात चठै।" <sup>21</sup> तैबै तेऊ तिन्नां का बोलअ, "तम्हें कै मैची बी नाई समझै?"

### बैतसैदा नगरी एक काणअ ठीक करनअ

<sup>22</sup> तेखअ तियां बैतसैदा दी आए; और लोगे एक काणअ आदमी तेऊ सेटा लै आणअ और तेऊ का अरज की कि एऊ छुह। <sup>23</sup> तेऊ सह काणअ आदमी हाथा का ढाकी करै गर्रांओआ का बागा लै निय, और तेऊए आच्छी दी थुकी करै तेऊए आच्छी दी हाथ डाहै, और तेऊ का पुछअ, "ताखा कै शुझदअ लागअ?" <sup>24</sup> तेऊ आच्छी खोल्ही करै बोलअ, मुखा आसा लागै दै आदमी शुझदें, तियां लागैदा मुखा शुझदें जिहै हांडदें फिरदें डाळा-बूटा जिहै।" <sup>25</sup> तेखअ भी प्रभू यीशू, तेऊए आच्छी दी हाथ डाहै, और काणें का लागअ रांबळअ शुझदअ और सह हूअ बिलकुल ठीक, और सोभ किछ लागअ तेऊका निम्बळअ शुझदअ। <sup>26</sup> प्रभू सह इहय बोली करै घरा लै भेजअ, कि एऊ गराऊंआं भितरी निं पैर बी डाही।"

### पतरसो प्रभू यीशू: मसीह मनणअ (मत्ती 16:13-20; लूका 9:18-21)

<sup>27</sup> प्रभू यीशू और तेऊए चेलै कैसरिया फिलिप्पीए गरांउआं लै नाठै, बाता तेऊ आपणें चेलै का पूछअ, "लोग मुल्है किजै बोला?" <sup>28</sup> तिन्नै उतर दैनअ, "यूहना बपतिस्मै दैणें आळअ; पर कोए एलियायाह कोए-कोए बोला ताल्है कि अह आसा भविश्याबाणी करनै आळै मांझै एक।" <sup>29</sup> तेऊ तिन्नां का पूछअ, पर तम्हें मुल्है कीजै बोला?" पतरसै बोलअ "तूह आसा मसीह।" <sup>30</sup> तैबै प्रभू तिन्नां लै चतैनगी दैनीं कि इहय निं मेरै बारै कोही का बोली।

### आपणीं मौते बारै यीशूए भविष्याबाणीं (मत्ती 16:21-23; लूका 9:22)

<sup>31</sup> तेखअ सह तिन्नां सखाऊंदअ लागअ, कि आदमीए शोहरू लै आसा जरूरी की सह बडै भारी दुःख सैहे, और पुरनिए और प्रधान याजक, और शास्त्री तेऊ तुच्छ समझीकरै मारी पाए, और सह चिई धैळी बाद जीऊई

उझिए। 32 ईयां गल्ला तेऊ तिन्नां का साफ-साफ खोजी। एता लै पतरसै प्रभू जुदअ जिहअ नियं और झिडकदअ लागअ, 33 पर प्रभू पिछू फीरी करै आपणें चेलै बाखा भाळअ, और पतरसा लै झिळकी करै बोलअ, "हे शैतान, मूँह सल्लन का हट दूर, किल्हैकि तूह निं परमेश्वरै गल्ला दी मन लांदअ पर तूह ला आदमीए गल्ला दी मन।"

### यीशू पिछू हांडणेंओ अर्थ (मत्ती 16:24-28; लूका 9:23-27)

34 प्रभू तियां लोग और आपणें चेलै, सोभै जहँ आपू सेटा लै शादै और तिन्नां लै बोलअ, "जुण कोई मुँह पीछू एछणअ चाहे, सह करै आपणें आपू का नकार, और आपणअ कूस आप्पे चकी करै लागै मूँह पिछू हांडअ। 35 किल्हैकि जुण कोई आपणअ प्राण बचाऊणअ चाहे, तेऊ खोणें आपणें प्राण, पर जुण कोई मेरै सुसमाचारा और मुँह पिछू आपणें प्राण खोए, सह बचाऊणअ तेऊ। 36 जुण आदमी सारी संसारा बी हासल करे, पर आपणें प्राणें हांन्री करे, ता तेऊ कै फायदअ भेटणअ? 37 और माहूँ आपणें प्राणें बदळै किजै सका दैई? 38 दूता संघे और आपणें बापुए महिमा संघे एछणअ, ता तेभै शरमणअ तेऊ बी तेऊ आदमी का।

9 प्रभू यीशू तिन्नां लै बोलअ, "हूँ बोला तम्हा का सच्चाई कि ईधी जेतारै खट्ठूए दै आसा, तिन्नां मांझै आसा कोए-कोए ईहै बी, कि जेभै तैणीं परमेश्वरो राज पूरी शगती संघे नाई एछे, तैभै तैणीं निं तियां मरणै।

### यीशूओ रूप बधळणअ (मत्ती 17:1-13; लूका 9:28-36)

2 छहा धैळी बाद प्रभू यीशू पतरस और याकूब और यूहन्ना सोभै जहँ संघा आपणें, और कांगनरांगे दी एकी उछटी धारा परेदा लै नीयै। तिधी बधळई प्रभू यीशूए काया तिन्नें सल्लनै एही कि, 3 तेऊए झीकळै लागै ईहै चमकदै कि फेर हूअ तिधी प्रैशअ, एसा पृथुईओ कोई बी धोबी निं तिहै झिकळै धोई सकदअ। 4 ता तिधी शुझरे तिन्नां का मूसा और एलियायाह बी; और तियां दुहै जहँ लागै प्रभू यीशू संघे गल्ला-बाता करदै। 5 एता लै पतरसै प्रभू यीशू लै बोलअ, "हे गुरू, अह हुअ ठीक कि हाम्हेँ आसा ताह संघे इधी: तै हाम्हां बणाणें इधी चून मंडप; एक तालहै, और एक मुसा लै, और एक एलियायाह लै। 6 तिन्नां का निं थोघे त कि किजै बोळणअ, और तियां तै बडै भारी डरै दै। 7 तैबै एक बादळ तिन्नां परदै आअ, और तेता का एक शब्द शुंछूअ, कि अह आसा मेरअ पैरअ शोहरू, तम्हें शुणां एऊए।" 8 तेखअ तिन्नें चऊ बाखा नजर दैनीं, और यीशू छाडी निं तिन्नां आपू संघे होर कोहै शुंछूअ।

9 धारा का उंधे होथदी, प्रभू यीशू तिन्नां लै बोलअ, "जेभै तैणीं माहूँओ शोहरू मुणें दै बिचा का जिऊंदअ नी होए, तेभै तैणीं जुण तम्हें ईयां गल्ला हेरी, एता निं कोही का खोजी। 10 तिन्नें डाही ईयां गल्ला आद और आपू मांझै लागै छफळदै कि मुणें दै आदमीओ जीऊंदै हणेंओ मतलब किजै आसा होए?

11 और तिन्नें प्रभू यीशू का पुछअ ईयां शाश्वती ता इहय बोला, कि एलियायाह नबीओ पैहलै एछणअ आसा जरूरी? 12 प्रभू यीशू तिन्नां लै जबाब दैनअ और बोलअ, ईयां गल्ला ता आसा सच्ची की पैहलै एछणअ एलियायाह और तेऊ करनी सोभै गल्ला ठीक, पर माहूँए शोहरू लै इहय किल्है आसा लिखअ द कि 'तेऊ लै हणें बडै भारी दुख और सह समझणअ सोभी का तुछ?' 13 पर हूँ खोजा तम्हां का सच्चाई कि एलियायाह ता गअ एछी, और जिहअ तेऊए बार लिखअ द आसा, और तिन्नें जुण बी तेऊ संघे करनअ चाहअ; तिन्नें सह किय बी।

### दुहात्मां शाचअ द शोहरू ठीक करनअ (मत्ती 17:14-21; लूका 9:37-43)

14 तैबै प्रभू यीशू आपणें चेलै सेटा लै आअ, और तेऊ भाळअ कि तिन्नां फेर आसा लोगे भीळ कठा हुई दी, और शाश्वती आसा लागै दै तिन्नां संघे बाद-बीवाद करदै। 15 और प्रभू यीशू भाळी करै हुई सोभी बडी रहैनिं, और तेऊ सेटा लै तूहरी करै एछी करै किय नमस्कार। 16 प्रभू यीशू तिन्नां का पुछअ, "तम्हें इन्नां संघे किजू बिवादा करदै आसा लागै दै? 17 ता, लोगे भीळा

मांझै का एकी यीशू लै बोलअ, "हे गुरू, मैं आसा आपणअ शोहरू जसा दी काली (गुंगी) आत्मां आसा बसी दी, सह आसा मैं ताह सेटा लै आणअ द; 18 और जिधी बी तेऊ सह गुंगी आत्मां ढाका ती, सह पळा त तेभी धरनीं लाम्मअ, और तेऊए खाखा का निखळा ती लाळा और शेफा, तेऊए किल्हिआ ती दांद दाहळा पठी, इहय करै सह मछेंआ त पठी, और मणें बोलअ तेरै चेलै का बी कि ऐसा गुंगी आत्मां काढा, पर ईयां निं तेसा काढी सकै।" 19 इहय शुणी करै प्रभू यीशू तिन्नां लै बोलअ, "हे अल्पविश्वासी लोगे, मूँह कधु तैणीं रहणअ तम्हां संघा? और मूँह केभै रहणअ थारी सैहंदै लागी? ओही आणा तेऊ मूँह सेटा लै!" 20 तिन्नें सह प्रभू सेटा लै आणअ, और जाऊं प्रभू सह भाळअ, ता तेसा आत्मा सह मरोळअ, और सह बदळअ धरनीं माटै दी, और तेऊए खाखा का छुटी शेफा और लाळा। 21 और तिन्नें तेऊए बाबा का पूछअ कि "एऊए अह ऐही हालत कथा ओही आसा?" 22 तेऊए बाबे बोलअ, "एऊओ आसा अह हाल होछी उझै; एऊ भूते ता अह हारी मारी आणअ, केभै शोटअ अह तेऊ भूतै पाणी जैदरी, ता केभै शोटअ आणी जैदरी, तेऊए बाबे बोलअ इहय कि जै तूह किजै करी सका, ता तै कर तूह हाम्हां लै दैया और ऐऊ कर ठीक। 23 प्रभू यीशू तिन्नां लै बोलअ; जै तूह करी सका; विश्वास करणें आळै लै सका सोभ गल्ला हूई। 24 शोहरूए बाबे तेभी बडी भारी लेरपकार पाई करै बोलअ; "हे प्रभू, मूँह करनअ विश्वास, मेरै अविश्वासो कर तूहैई कोई लाज। 25 जाऊं प्रभू यीशू भाळअ कि बडै भारी लोग हूए तिधी कठा, ता, प्रभू यीशू तेसा बुरी आत्मां लै झाळ काढी करै बोलअ, "हे काली और टौणी आत्मां, हूँ बोला तालहै एऊए देही का निखळ पोही और भी निं लागी एऊए देही दी हटी करै एछदी। 26 तेखअ तेसा बुरी आत्मा पाई जौरै-जौरै लैळा-करिगा, और तेऊ मरोळी करै निखळी पोही, और शोहरू पळअ जिहअ धरनीं नरतान, लोग लागै इहय बोलदै कि अह शोहरू मूअ। 27 पर प्रभू यीशू तेऊअ हाथ ढाकअ, और सह उझुअ खळअ। 28 जाऊं प्रभू यीशू और तेऊए चेलै घरा लै आए, ता तियां प्रभू यीशू का कांगनरांगे दी पुछदै लागै कि "हाम्हेँ तेसा बुरी आत्मां किल्है निं काढी सकै?" 29 प्रभू यीशू तिन्नां लै बोलअ कि "एसा जातीए बुरी आत्मां नि बिणा उपवास प्राथणां किये होरी कोई बी तरिके करै निखळदी।

### आपणीं मौते बारै यीशूए भबिष्याबाणीं (मत्ती 17:22, 23; लूका 9:43-45)

30 तेखअ तियां तिधा का गलील देशा बाती नाशी करै नाटै, और सह निं चाहंदअ त कि एसा गल्लो थोघ कसा का लागे। 31 किल्हैकि प्रभू यीशू करा त आपणें चेलै लै इहय उपदेश दैई, और तिन्नां लै करा त इहय बोली कि माहूँओ शोहरू ढाकणअ और तिन्नां पाणअ सह मारी, और सह हणअ मरी करै चिई धैळै बाद जीऊंदअ। 32 पर तियां गल्ला निं तिन्नां समझ एछदी ती, ता एसा गल्ला पूछणेंए लागी ती तिन्नां तेऊका डरअ।

### सोभी का बडअ कुण

(मत्ती 18:1-5; लूका 9:46-48)

33 तेता बाद तियां कफरनूहम देशा दी आए, और एकीए घरै पूजी करै प्रभू यीशू तिन्नां का पूछअ कि "बाता तम्हें किजू गल्ला पिछू तै छफळदै लागै दै?"

34 तियां सोभ हूए चुपचाप, किल्हैकि तियां तै बाता हांडदी इहय बाद-बिबाद करदै लागै दै कि हाम्हां मांझै बडअ कुण आसा? 35 तेखअ प्रभू यीशू धरनीं बेटअ, और तियां बारह चेलै आपू सेटा लै शादै, और तिन्नां लै बोलअ, "जै कोई बडअ हणअ चाहा, ता तेऊ लागी पैहलै सोभी का होछअ बळणअ।" 36 तेखअ प्रभू यीशू तिन्नां बिचै एक शोहरू खळअ किय और सह आपणें भोसळै बशैळी करै तिन्नां लै बोलअ, 37 "जुण कोई मेरै नाओएँ ईहै शोहरू ग्रहण करा, सह करा मूँह ग्रहण, और जुण मुँह ग्रहण करा, सह निं सिधअ मूँह ग्रहणअ करदअ, पर सह करा मेरै भेजणै आळै ग्रहण।"

### जुंण खलाफ निं आथी सह आसा पक्षा दी

(लूका 9:49, 50)

38 तेखअ यहूना प्रभू यीशू लै बोलअ, “हे गुरु, हाम्हें भाळअ तैरें नांओरें एक आदमीं दुष्टात्मां काढदअ, हाम्हें लागें तै तेऊ लै नाई करदें बी कि ईहअ निं करै; किल्हैकि सह हाम्हां संघें ता ऐछदअ निं आथी।” 39 प्रभू यीशू तिन्नां लै बोलअ, “तेऊ रोकदें निं लागी; किल्हैकि ईहअ निं कोहै बी आथी, जुंण मेरें नांओरें चमत्कारे काम करा, और तेभी मुल्है बुरअ बोली सकै।” 40 प्रभू यीशू तिन्नां लै बोलअ कि, “जुंण म्हारै खलाफ नी आथी, सह आसा म्हारै पक्षा दी। 41 जै कुंण तम्हां लै एक कौली पाणीए ऐतै तैणीं पणेंऊए कि तम्हें आसा मसीहे, ता तेऊ निं आपणअ प्रतिफल कधी खोणअ।

### ठोहळा लागेंओ कारण

(मत्ती 18:6-9; लूका 17:1, 2)

42 पर जुंण इन्नां होछें मांझें, जुंण मूँह दी विश्वास डाहा, और तिन्नां लै कुंण ठोहळ लाए, ता तेऊए गळें बान्हणअ एक बडै घरटो पाट और सह शोटणअ समुंद्रा दी। 43 जै ताल्है तैरें हाथे कारण ठोहळ लागे, ता तूह शोट तेऊ हाथा काटी करै दूर; ताकि तूह टुण्डअ हई करै ही स्वर्गें नाशी सके, अह गल आसा ताल्है एता का भली कि दुही हाथा संघें तूह नरके आगी जैदरी पळे, जुंण आग कधी नी हिशणें आळी आसा, 44 जिधी तिनों किळअ निं मरदअ और आग निं हीशदी। 45 और जै ताल्है तेरअ खूर ठोकर खैऊए, ता तूह पा तेऊ खूरा काटी। लैगळअ हई करै स्वर्गें नाशणअ आसा ताल्है एता का भलअ कि तूह दुही खूरा संघें नरके आगी दी पळे। 46 जिधी तिनों किळअ निं मरदअ और आग निं हीशदी। 47 और जै ताल्है तेरी आछ ठोकर खैऊए, ता तैहा काढ पोहीं। काणअ हई करै ही परमेश्वरे राज्य दी प्रवेश करणअ आसा ताल्है भलअ कि तूह दुई आच्छी संघें नरका दी पळे। 48 जिधी तिनों किळअ निं मरदअ और आग निं हीशदी। 49 किल्लुहैकि हरेक आदमीं करनअ आगी करै लूणअ 50 लूण आसा ठीक, पर जै लूणां सुआद खराब होए, ता सह किजू चिजा करै करनअ लूणअ? आपू दी डाहा लूण, और आपू मांझें रहा मिली-जूळी करै।”

### बैईदाऊए (तलाक) बारै यीशूए शिक्षा

(मत्ती 19:1-12; लूका 16:18)

10 तेखअ सह तिधा का उझई करै यहूदिए देशै जरदण दरैऊआ पर आआ। और तेऊ सेटा हूए बडै भारी लोग कठा, और प्रभू लागअ आपणें साबे तिन्नां लै उपदेशा दैदअ।

2 तैबै फरीसी तेऊ सेटा एछी करै परखणा लै पुछअ कि, “अह गल ठीक आसा कि मरध सका आपणीं बेटळी छाडी?” 3 तेऊ तिन्नां लै बोलअ कि “मूसा तम्हां लै एते बारै किजै आज्ञा आसा दैनीं दी?” 4 तिन्नां बोलअ, “मूसा आसा राजी नांअ लिखी करै छाडी दैणा लै बोलअ द। 5 प्रभू यीशू तिन्नां लै बोलअ, “थारै काठै मन हणेंए कारण आसा तम्हां लै तेऊ इहय लिखअ द। 6 मांझें आसा शूरुई का तेऊ मरध और बेटळी ही बणांए दै। 7 एऊई कारणें रहणअ मरध आपणें आम्मां-बापू का जुदअ आपणी बेटळी संघें, 8 और तिन्नां हणें दूहै मिलीकरै एक तन; तैहीता तिन्नां निं ऐबै दुई तन आथी पर तिन्नां रहा एक देही बर्णी। 9 तैहीता जुंण परमेश्वरें जोळें दै आसा तिन्नां तम्हें जुदें करदें निं लागी।”

10 तैबै चेलै घरें पुजी करै एते बारै पुछअ। 11 प्रभू यीशू तिन्नां का बोलअ, “जुंण आपणी बेटळी छाडी करै दुजी संघें बह करा, ता सह करा तेसा छाडी दी बेटळीए खलाफ भ्यभिचार; 12 और जै बेटळी आपणें मरधा छाडी करै कसा होरी संघें बह करे ता सह बी करा भ्यभिचार।”

### लान्हें लै आशीर्वाद

(मत्ती 19:13-15; लूका 18:15-17)

13 तेखअ तिन्नां लोग यीशू सेटा लै शोहरु माठै आणदें लागें कि सह तिन्नां दी हाथ डाहे, पर चेलै लागें तिन्नां लै इहय बोळदें कि गुरु निं तंग करा।

14 प्रभू यीशू तिन्नां लै रोशा संघें बोलअ “इन्नां शोहरु दैआ मूँह सेटा लै ऐछणें, इन्नां निं रोकी, किल्हैकि परमेश्वरो राज आसा इन्नां शोहरु जिहैओ।”

15 यीशू तिन्नां लै बोलअ कि “जुंण आदमी इन्नां शोहरु जिहै नाई बणें, तिन्नां निं स्वर्गें नाशी सकदें।” 16 प्रभू यीशू तिन्नां शोहरु भोसळें बशेळें और तिन्नां लै दैनीं आशीश।

### सेठ नौजुआन और अनंतजिऊण

(मत्ती 19:16-30; लूका 18:18-30)

17 तेखअ जाऊं प्रभू यीशू बाता हांडदअ त लागअ द, ता एक आदमी आअ तुहरी करै और जाहू टेकी करै यीशू का पुछअ, “हे गुरु, अमर जिऊण पाणा लै हूँ किजै करूँ?” 18 प्रभू यीशू तेऊ लै बोलअ, “तूह मुल्है उतम किल्है बोला? परमेश्वरा सुआई निं कोहै बी उतम आथी।” 19 तूह इन्नां आज्ञा ता जाणा होए; कि हत्या नी करणी, कंजरें निं हणअ, और चोरी नी करणी, और झुठी ग्वाही नी दैणी, धोखअ नी दैणअ, आपणें आम्मां-बापुए सेऊआ-चाकरी और तिन्नां आदरमान करनअ।” 20 तेऊ आदमी यीशू लै बोलअ, “हे गुरु, इन्नां गला ता हूँ होच्छी ऊझें आसा मंदअ आअ द।” 21 प्रभू यीशू तेऊ बाखा लै भाळअ और तेऊ लै बोलअ, “ताह दी आसा एकी गले कार्मी; नाश, जुंण तेरअ आसा, तेऊ बांड गरीबा और कंगळा आदमी लै और ताल्है भेटणअ तेरअ धन स्वर्गें, और आपू लाग तूह मूँह पिछु हांडदअ। 22 जाऊं प्रभू तेऊ लै ईयां गला बोली, ता सह हुअ बडअ उदास, और सह लागअ तिधा का हांडदअ, किल्हैकि सह त बडअ भारी सेठ। 23 प्रभू यीशू चहू बाखा भाळअ और आपणें चेलै लै बोलअ, “सेठा आदमीओ स्वर्गें नाशणअ आसा बडअ भारी मुशकळ।” 24 चेलै तेउए गला शुणीं करै हूए रहैण, यीशू तिन्नां लै बी बोलअ, “हे बालको, जुंण धन-माया दी विश्वास डाहा, तिन्नां आसा परमेश्वरे राजा दी प्रवेश करणअ मुशकळ। 25 परमेश्वरे राजा दी सेठा मांझेंओ प्रवेश करनअ आसा ईहअ, जिहअ ऊँटो सीऊंणीए पाशी बाती नीखळणअ। ऊँट सका सीऊंणीए पाशी बाती निखळी, पर सेठ आदमी नी स्वर्गें नाशी सकदअ।” 26 चेलै हूए बडै भारी रहैण और तिन्नां आपू मांझें गला करदें लागें, “तेखअ बोलअ तिन्नां इहय कि, “तै कुंण सका स्वर्गें नाशी?” 27 प्रभू यीशू तिन्नां फेर भाळअ, और बोलअ, “आदमी नी एऊ कामां करी सकदअ; और परमेश्वर ही सका एऊ कामां करी।” 28 पतरसै यीशू लै बोलअ, “भाळ, हाम्हें ता आसा सोभ गला छाडी करै ताह पिछु आए दै।” 29 प्रभू यीशू तिन्नां लै बोलअ, “हूँ बोला तम्हां का सच्चअ कि इहय निं कोहै बी आथी जुंणी मेरें और सुसमाचारें तैणीं आपणें भाई-बैहणा, आपणें आम्मां-बापु, और आपणें घरा-बणा, खेचा-खहळा छाडी मूँह पीछु आअ द होए 30 और ऐऊ बगतै तिन्नां शौ गुणा फल नाई पाए, घरा और भाई बैहणा, आम्मां-बापु, और शोहरु आळें, और खेचा दी दुख-दर्ध संघें, और परलोका दी भेटणअ अनंत जीऊण। 31 पर बडै भारी आसा ईहै जुंण आगलै आसा तिन्नां हणें पिछलै, और जुंण पीछलै आसा तिन्नां हणें आगलै।

### आपणीं मौते बारै यीशूए चिऊथी भविष्यवाणीं

(मत्ती 20:17-19; लूका 18:31-34)

32 यरुशलेमा लै नाशदी बाता हांडदी त प्रभू यीशू तिन्नां का आजू हांडदअ लागअ द तिन्नां तै रहैण हूए दै और जुंण तेऊ पिछु-पिछु तै हांडदें लागें दै तिन्नां तै डरें दै। तैबै प्रभू तिन्नां बाराह जळें निर्यें और सह लागअ तिन्नां संघें तिन्नां गला करदअ जुंण आजू ती हणें आळी, 33 कि “हेरा, हाम्हें आसा चालें दै यरुशेमा लै, और मांझेंओ शोहरु ढाकणअ प्रधान याजक और शास्त्रीए हाथें, और तिन्नां लाणअ तेऊलै मारी पाणें जोगी दोष और तेखअ दैणअ तिन्नां होरी जातीए हाथें, 34 और तिन्नां करनअ तेऊओ ठठअ मजाक, तेऊ लै थुकणअ, और कोडें करै चिकणअ, और जानी का करनअ खत्म, पर सह हणअ चिऊथै धैळें मरी करै जीऊंदअ।”

### याकूब और यूहन्नें अरज (मत्ती 20:20-28)

35 तेखअ जबदीए शोहरु याकूब और यूहन्नें तैऊ सेटा एछी करै तेऊ लै बोलअ, “हे गुरू हाम्हेँ चाहा तै इहय कि जुण हाम्हेँ ताखा मांगे तूह करै तेता हाम्हा लै।” 36 यीशू तिन्नां लै बोलअ, “तम्हें किजै चाहा की हूँ तम्हां लै करूँ?” 37 तिन्नें तेऊ लै बोलअ, “हाम्हेँ चाहा इहय कि तेरी महिमा दी एक दैहणी बाखा, ता दुजै बेशणअ तेरी बाऊई बाखा।” 38 यीशू तिन्नां लै बोलअ, “तम्हां का नी थोघे कि तम्हें किजै मांगा? जुण कटोरअ मुँह झुटणअ, कै तम्हें बी तेऊ झूटी सका? और जुण बपतिस्मअ मुँह लणअ, कै तम्हें बी तेऊ लई सकआ ऐ?” 39 तिन्नें यीशू लै बोलअ, “हाम्हेँ बी सका करी।” यीशू तिन्नां लै बोलअ, “तम्हें बी सका करी, 40 पर जुण-जुण तेसा जैगा लै टांके दै आसा, तिन्नां छाडी नि होरी आपणै दैहणें और बाऊरें बशेळणअ मेरअ काम आथी।”

41 इहय शुणीं करै तियां दस जह्नें याकूब, और यूहन्ना लै लागै रोशै घरेछी भाळै। 42 प्रभू यीशू तियां आप्पू सेटा लै शादै और तिन्नां लै बोलअ, “तम्हें जाणा एसा गल्ला कि जुण होरी जातीए हाकीम हुआ, तियां करा तिन्नां दी प्रभुता; और तिन्नां मांझे जुण बडै हआ तियां डाहा तिन्नां दी अधिकार। 43 पर तम्हां बिचै नि इहय आथी, जै तम्हां मांझे कुण बडअ हणअ चाहे, ता सह बणें पैहलै थारअ सेऊआकार; 44 और जुण तम्हां मांझे प्रधान हणअ चाहे; ता सह लोळी पैहलै सोभीओ दास बणअ। 45 माळूओ शोहरु नि एते तैणीं आथी आअ द की कुण तेऊए सेऊआ टैहल करे, पर सह आसा एतै तैणीं आअ द कि सह होरिए सेऊआ टैहल करे और सोभी लोगा बचाऊणें तैणीं आपणै प्राण दैए।”

### काणें बर्तिमाई लै नेत्रदान (मत्ती 20:29-34; लूका 18:35-43)

46 तियां यरीहो दी आरे, जाऊं प्रभू यीशू और तेऊए चेलै, और बडै भारी लोग यरीहो का निखळै तै, ता तिमाईओ शोहरु बरतिमाई त एक काणअ भीखारी सळकीए डोरै बैठअ द। 47 जाऊं तेऊ काणें आदमी शुणअ कि यीशू नासरी आसा, ता तेऊ काणें आदमी बोलअ, “हे दाऊदै शोहरु यीशूआ मुल्है कर दैया।” 48 सोभी दैनी तेऊ काणें आदमी लै गाळी कि चुप्पी रह, पर सह रहअ तेतरअ ज़ादअ बोलदअ ई लागी कि “हे दाऊदै शोहरु यीशूआ मुल्है कर दैया।” 49 तेखअ प्रभू यीशू खट्ठुअ और बोलअ, “ऐऊ काणें आदमी आणा ओही।” और तिन्नें लोगे सह काणअ आदमी शादअ और तेऊ लै बोलअ, “हिम्मत डाह, और खळअ उझू, यीशू बोला ताल्है पोर्ही एछ।” 50 तेऊ आपणै झीकळै टाल्है शोटै तिधी और सह खळअ उझूअ और तेभी आअ यीशू सेटा लै। 51 यीशू तेऊ लै बोलअ, “तूह किजै चाहा की हूँ ताल्है करूँ?” काणें यीशू लै बोलअ, “हे गुरू, मेरी आच्छी कर ठीक, मुखा लोळी शुझुआ।” 52 प्रभू यीशू तेऊ लै बोलअ, “नाश, तेरै विश्वासै किय तूह ठीक।” तेऊ का लागअ तेभी धेछदअ, और सह लागअ बातै प्रभू यीशू पिछू हांडदअ।

### येरुश्लेमें विजय प्रवेश करणअ (मत्ती 21:1-11; लूका 19:28-40; यूहन्ना 12:12-19)

11 जाऊं तियां यरुश्लेमा नेळ जैतून धारा दी बैतफगे और बैतनिय्याह सेटा आए, ता तेउ आपणै चेलै मांझा का दुई जह्नें इहय बोली करै भेजै, 2 “ऐऊ सद्दनें घरा लै नाशा, और तिधा का एक गाधधीओ शोहरु जसा दी आझः तैणीं कोहै नी बैठअ द आथी, सह भेटणअ तिधी तम्हा बान्हअ द, तेऊ आणा खोल्ही। 3 जै तम्हां का कुण पुछे कि तम्हें अह किल्है लाअ निर्ई? ता तम्हें बोले तिन्नां लै इहय कि प्रभू आसा ऐऊए जरूरत तेखअ हेरनअ तेऊ तेभी तम्हा लै दैई। 4 तियां बी नाठै और तिन्नें भाळअ कि गाधधीओ शोहरु आसा सच्ची खोळै बाहअ द; तियां लागै तेऊ गळेऊंडी का खोलदै; 5 ता तिन्नां मांझे जुण तिधी खट्ठुए दै थिये, कोए-कोए लागै तिन्नां मांझे तिन्नां लै इहय बोलदै कि एऊ किल्है लाअ अह गाधटू खोल्ही? 6 जिहअ-जिहअ प्रभू यीशू तिन्नां का खोजी बोली त डाहअ द, तिहअ-तिहअ ई तिन्नें बी तिन्नां का खोजअ; इन्नां गल्ला शुणीं दैनअ तिन्नें लोगे तिन्नां सह

गाधटू नीणै। 7 तिन्नें स गाधिओ शोहरु यीशू सेटा पजैळअ और तेऊ परैदै आपणै झीकळै पाए और प्रभू यीशू तेऊ परैदै बैठअ। 8 ता कई छैरे आपणें झिकळै खोल्ही करै धरनीं बाता; और कई आणअ खेचा का घाह पाच बाता छैणां लै। 9 ता जुण तेऊ आजू-पीछु हांडणें आळै आसा तै तियां लागै जोरै-जोरै बोलदै, “होशाना, धन्य आसा सह जुण प्रभुए नांओए ऐछ। 10 महारै बाब दादै दाउदो राज जुण ऐबै एछी चालअ; सरगा दी होशाना।”

11 यीशू यरुश्लेमे मांदरै पूजअ और चूह बाखा नजर दैई सारी चिजा भाळी और आपणें बाराह चेलै संघै बैतनियाह लै नाठअ, किल्हैकि सान्ह गई ती पळी।

### फळा बिणहीं अंजीरो बूट (मत्ती 21:18, 19)

12 दुजी धैळी जाऊं तियां बैतनिय्याह का नाठै; ता प्रभू आई भुखै। 13 ता सह दुरा का ऐकी जंगली अंजीरे हरै पेळा भाळी करै तेऊ सेटा इहय सोची करै नाठअ कि ऐथ भेटणअ किजै खाणा लै; पर तेथ नि पाचा छाडी किछ भेटअ; किल्हैकि तियां धैळै नाई तै फळा फळूटे आथी। 14 ऐता लै यीशू बोलअ कि “आझः पोर्ही नि तेरअ फळ कोही खाणअ।” ता तेऊए चेलै तै शुणें लागै दै।

### मांदरा का बपारी बागै काढणें (मत्ती 21:12-17; लूका 19:45-48; यूहन्ना 2:13-22)

15 तेखअ तियां यरुश्लेमेमें आरे, और यीशू मांदरा भितरी नाठअ; और जुण तियां तिधी लैण-दैन करदैं तै लागै दै, तियां सोभ काढे बागा लै, सनारै और कबूतरा बेचणें आळैए समान पाए तेऊ ढोळी पोछी, 16 और मांदरा का नि कोही बी भाण्डै बरतन ना आळणें दैनै, और ना निणें दैनै। 17 संघा उपदेश दैई तिन्नां बोलअ, “तम्हां का थोघ नि आथी की धर्म शाशत्रे कताबा दी लिखअ द आसा कि मेरअ घअर हणअ सोभी जातीए लोगा लै प्रार्थणा करनेंओ घर? पर तम्हें आसा अह डाकू-लूटेरेए खोख बणाई दी।” 18 इहय शुणीं करै प्रधान और याजक, शाशत्री लागै तेऊ मारी पाणें मोके लोळै; किल्हैकि तियां उरा तै तेऊ का इहय करै कि सोभी लोगा पळा त तेऊए उपदेशा शुणीं करै प्रभाब। 19 धूपै उडदैं ई तियां गराऊंआ का बागै नाठै।

### शुकै दै अंजीरे बुटा का शिक्षा (मत्ती 21:20-22)

20 जेभै तियां दोती तेसी बाती नाशा तै, ता तिन्नें भाळअ सह अंजीरो बूट चुँडी का गोधै तैणीं शुकअ द। 21 तैबै फिरी पतरसा सह गल आद और तेऊ प्रभू यीशू लै बोलअ, “हे गुरू, अह अंजीरो बूट जसा लै तंरें थ्राप दैनअ त सह शुकअ।” 22 यीशू पतरसा लै बोलअ, “परमेश्वरा दी डाहा बिश्वास। 23 हूँ खोजा तम्हां का सच्चाई कि, जुण विश्वास करी करै बोले कि अह धार लोळी उधै पळी, ता सह पळणीं। और आपणै मना दी शक नि करी, विश्वासा संघै बोले, तै जुण तूह बोले सह जाणअ हई। 24 तैही बोला हूँ तम्हां लै कि जुण तम्हें प्रार्थना करी करै और प्रेमा संघै मांगे, सह भेटणअ तम्हां, और सह जाणअ तम्हां लै हई। 25 और जेभै तम्हें खळै हई करै प्रार्थना करे और थारै मना दी कसरै प्रति बैर-बिरोध होए, ता तिन्नां लै करै माफ, तै करनै थारै बाप्पू जुण स्वर्गा दी आसा तेऊ करनै थारै अपराध बी माफ। 26 जै तम्हें कसरै अपराध माफ नाई करे, ता थारै बाप्पू जुण स्वर्गा दी आसा, तेऊ बी नि करणै थारै पाप माफ।

### यीशूए आधिकारो सुआल (मत्ती 21:23-27; 20:1-8)

27 और जाऊं तियां यरुश्लेमा दी आरे, और तियां तै घुमदै लागै दै, ता प्रधान याजक, शाशत्री और पुरनिए प्रभू यीशू पुछदैं लागै, 28 “तूह इन्नां कामां कसरै अधिकारा संघै करा? और अह अधिकार ताल्है कुणी दैनअ?” 29 यीशू तिन्नां लै बोलअ, “हूँबी पुछा तम्हां का एक गल; जै तम्हें मेरी गल्लो उतर दैए, ता तै दैनअ मुँबी थारी गल्लो उतर, और मुँबी खोजणअ तम्हा का कि हूँ कसरै

अधिकारा संघे करा इन्नां कामां।<sup>30</sup> यूहन्नो बपतिस्मअ कसरी तरफा का हुआ त, स्वर्ग तरफा का, कि मांछूए तरफा का। मेरी गल्लो उत्तर दैआ?"<sup>31</sup> तेखअ तियां लोग आप्पू मांझें छैफळदें लागे कि जै हाम्हेँ इहय बोले कि "स्वर्गा का, ता ऐऊ बोळणअ हाम्हां लै इहय कि तम्हेँ तेऊ संघे प्रेम किल्है निं किय?<sup>32</sup> और जै हाम्हेँ इहय बोले कि, "मांछूए तरफा का, ता लोगा का लागी डौर, किल्हैकि सोभ लोग ज्ञाणा तै इहय कि यूहन्ना त सच्चअ भविष्यदक्ता।<sup>33</sup> तेखअ तिन्नें यीशू लै बोलअ, "हाम्हां का निं थोघै।" प्रभू यीशू तिन्नां लै बोलअ कि "मुँबी निं तम्हां का खोजणअ की हूँ इन्नां कामां कसरे अधिकारा संघे करा।"

### दुष्ट किसानों दृष्टांत

(मत्ती 21-33-46; लूका 20:9-19)

**12** तेखअ यीशू तिन्नां का घेरै-फेरै दी गल्ला करदअ लागअ; "एकी आदमी एक अंगूरो बगीचअ लाअ, और तेता फेर बाळ-शोहळ लागे और पाणीओ एक कुँअ कोतअ, और एक गुंमट बणाअ, और जिर्मीदारा लै तेतो ठेकअ दैई नाठअ आप्पू परदेसा लै।<sup>2</sup> तेखअ पिछू तेऊ फळा दैणए सिजनें जिर्मीदारा सेटा लै आपणअ एक दास भेजअ इहय बोली कि, अंगूरो बगीचै दी जुंण फसल लागी दी होए तेतो हेस्सअ आणें मांगी।<sup>3</sup> पर तिन्नें जिर्मीदारे सह ढाकअ और चिकी फणाटी करै भेजअ बापस।<sup>4</sup> और तेखअ तेऊ एक होर दास तिन्नां सेटा लै भेजअ, पर तिन्नें फाळअ तेऊओ मुँड और तेऊए निं कोई इज्जत-पत की।<sup>5</sup> तेखअ भेजअ तेऊ एक होर दास, तिन्नें पाअ सह बी मारी। इहेई तेऊ मालकै भेजे तिन्नां सेटा लै होर बी कई; पर तिन्नें जिर्मीदारे पाए तियां कोई चिकी-फणाटी और कई पाए तिन्नां मांझें मारी।<sup>6</sup> एबै त एक ही रहअ द, जुंण तेऊअ प्यारअ शोहरू आसा त; खिरी भेजअ तेऊ सह आपणअ शोहरू बी, इहय सोची करै की तिन्नां मेरे शोहरूओ ता हेरनअ करी आदरमान।<sup>7</sup> तिन्नें जिर्मीदारे आप्पू मांझें जोग करी बोलअ, "अहेई ता सह बारिस (शोहरू) आसा; ऐछा अह पाणअ हाम्हां मारी और फसल हणीं सोभ म्हारी।<sup>8</sup> और तिन्नें बी सह मारअ और अंगूरे बगीचै का शोटअ बागै।

<sup>9</sup> तेखअ एबै तेऊ बगीचे मालक तिन्नां संघे किजै करणअ होए? तेऊ एछणअ, और तिन्नां जिर्मीदारो करनअ सर्वनाश, और अंगूरो बगीचअ दैणअ होरी लै।<sup>10</sup> तम्हेँ कै पवित्र शाशत्रा दी पळह द नी आथी कि

"जुंण पाथर राजमिस्त्री नकाम्मअ समझअ त, सह ई बणाई तेऊ कुंणीए जान।"

<sup>11</sup> ईयां गल्ला प्रभुए तरफा का हुई; और ईयां आसा म्हारी नजरा दी नोखी।

<sup>12</sup> तिन्नें चाहअ सह ढाकणअ, किल्हैकि तियां गे तै समझी कि ऐऊ बोली ईयां गल्ला हाम्हा लै। पर तियां डरै लोगा का और तिन्नें सह छाडअ और तिघा का नाटै।

### राजै कैसरा लै कारअ दैणअ

(मत्ती 22:15-22; लूका 20:20-26)

<sup>13</sup> तेखअ तेऊ गल्ला दी फसाऊणें तैणीं तिन्नें किछ फरीसी और हेरोदिरे तेऊ सेटा लै भेजे।<sup>14</sup> तिन्नें तेऊ का पूछअ और बोलअ "हे गुरू, हाम्हेँ का आसा थोघ कि तूह आसा सचअ, और तूह निं कोहिए परवाह करदअ; और नां तूह आदमीए मुहां भाळी गल्ला करदअ, पर तूह खोजा परमेश्वर रसतेए बारै बडी सचाई संघे। पर हाम्हां का खोज इहय कि "कैसर राजै लै कारअ दैणअ ठीक आसा की गळत आसा?"<sup>15</sup> हाम्हां कारअ दैणअ लागा कि नाई?" प्रभू हेरअ तिन्नें दीलो कपट समझी और तिन्नां लै बोलअ "तम्हेँ मुँह परखदें कील्है आसा लागे दै?" प्रभू यीशू तिन्नां लै बोलअ "एक दीनार आणा मुँह सेटा लै, मुँह भाळणअ सह।"<sup>16</sup> तिन्नें एक दीनार आणअ, तेखअ यीशू तिन्नां लै बोलअ, "ऐथ छाप कसरे नांअए आसा लागी दी।" तिन्नें बोलअ "राजै कैसरे नांअए।"<sup>17</sup> यीशू तिन्नां लै बोलअ, "जुंण कैसर राजेए नांओएँ आसा, तेऊ दैआ कैसर राजे लै, और जुंण परमेश्वरा लै आसा, तेऊ दैआ परमेश्वरा लै।" तेखअ तियां हुए तेऊ लै बडे रहैन।

### भी जिऊणअ और बैह

(मत्ती 22:23-33; लूका 20:27-40)

<sup>18</sup> तेखअ तियां सदूकिरे बी, जुंण इहय बोला तै कि "मुँएँ दै आदमीओ जीऊई ऊझणअ निं आथी," तियां यीशू सेटा लै आए और यीशू का पुछअ, <sup>19</sup> "हे गुरू, मुसा नबी आसा हाम्हां लै इहय लिखअ द कि, जै कसरअ भाई बिणां कोई लुआदीए मरे और तेऊए लाळी एकै रहे, ता तेऊओ होछअ भाऊ सका तैहा संघे बैह करी, और आपणै भाई लै सका वंश पैदा करी।<sup>20</sup> ऐकी जमानेए गल आसा एही कि ऐकी बारी तै सात भाई, पैहलअ भाई बैह करी करै बिणा कोई आदी लुआदी मुँअ,<sup>21</sup> और दुजे भाई कीय तेऊए बेटळी संघे बैह और सबी मुँअ बीणहीं आदी लुआदी, और इहयई करै तेऊ चीए भाई बी कीय और सबी मुँअ।<sup>22</sup> इहय करै साता के साता जणहै निं शोहरू हुए और खीरी सह बेटळी बी मुँई।<sup>23</sup> ता, एबै जैभै सह जीऊई ऊझणीं ता सह तिन्नां साता भाई मांझें कसरी बेटळी हणी? किल्हैकि पैहलै ता सह साता जणहे बेटळी आसा ती रही दी?"

<sup>24</sup> यीशू तिन्नां लै बोलअ, "तम्हां का नाई ता पवित्र शास्त्रो थोघ आथी, और ना परमेश्वर शक्तिओ थोघ आथी?"<sup>25</sup> जेभै तियां मुँएँ दै मांझें जीऊई उझणै; तेभै तिन्नां ना ता बैह करनअ और ना तियां बैहा लै दैणै, पर स्वर्गा दी हणें तियां सपाही जिहै।<sup>26</sup> मुँएँ दै मांझें जीऊई ऊझणैए बारै कै तम्हेँ, मूसा नबीए कताबा दी झाकळा आळी कथैया निं शुणीं आथी कि परमेश्वर मूसा नबी लै बोलअ कि हूँ आसा अब्राहमो परमेश्वर, और इसहाको परमेश्वर, और याकूबो परमेश्वर?<sup>27</sup> और इहय बी बोलअ कि परमेश्वर निं मुँएँ दै आदमीओ आथी, परमेश्वर आसा जिऊंदैओ, पर तम्हेँ आसा बडी भूला दी पळै दै।"

### सोभी का बडी आज्ञा

(मत्ती 22:34-40; लूका 10:25-28)

<sup>28</sup> शाशत्री मांझें एकी तियां आप्पू मांझें छफळदें शृणें, कि ऐऊ ता ईयां बडे बढीया चारै समझाऊए, और तेऊ प्रभू का पुछअ कि, "सोभी का जरूरी आज्ञा कुंण जेही आसा?"<sup>29</sup> यीशू तेऊ लै बोलअ, "सोभी का मुख्य आज्ञा आसा अह, "हे इस्त्राएल शृण, म्हारअ प्रभू परमेश्वर आसा एकैई,<sup>30</sup> तूह प्रभू आपणै परमेश्वरा संघे सारै प्राणा, और आपणी सारी बुधी संघे, और सारी शक्ति संघे डहै प्रेम।<sup>31</sup> और दुजी आज्ञा आसा अह की, "तूह आपणै पडोसी संघे डहै आपणै टबरा जिहअ प्रेम। ऐता का बडी निं कोहै होर आज्ञा आथी।"<sup>32</sup> शाशत्री यीशू लै बोलअ, "हे गुरू, तएँ बोलअ ठीक कि सह आसा एकै, और तेऊ का लाऊआ निं होर कोहै आथी।<sup>33</sup> और तेऊ संघे सारै मना का, और सारी बुधि, और सारै प्राणा संघे, और सारी शक्ति संघे डहै प्रेम; और आपणै पडोसी संघे डहै आपणै-आपणै टबरा जिहअ प्रेम, ईयां गल्ला आसा सारी होमबळी और सारै बळीदाना का बढीकरै।"<sup>34</sup> जाऊं यीशू भाळअ कि तेऊ दैनअ बडी समझा संघे उतर, ता यीशू तेऊ लै बोलअ, "तूह निं परमेश्वरे राज का दूर आथी।" तेखअ निं कोही बी तेऊ का पुछणैए हिम्मत हुई।

### मसीह कसरअ शोहरू आसा ?

(मत्ती 22:41-46; लूका 20:41-44)

<sup>35</sup> तेखअ यीशू मांदरा दी उपदेश दैदी बेरी इहय बोलअ, "शाशत्री किये करै बोला इहय कि मसीह आसा दाऊदो शोहरू?<sup>36</sup> दाऊदुँ आसा आप्पैई पवित्र आत्मां दी बोलअ कि;

"प्रभू मेरै प्रभू का बोलअ कि मेरी दैहणें बेश, जेभै तैणहीं हूँ तेरै बेरी तेरै पैरा हेठै चऊकी ना करी हेरूँ।"<sup>37</sup> "दाऊद ता आप्पू बी तेऊ लै प्रभू बोला त, ता तेखअ सह तेऊओ शोहरू केऊ साबै हुअ? और लोग शृणा तै तेऊए गल्ला बडे मजै दी।"

### शाशत्री का रहै चतैन

(मत्ती 23:1-36, लूका 20:45-47)

<sup>38</sup> यीशू तिन्नां लै आपणै उपदेशा दी बोलअ, "इन्नां शाशत्री का रहै चतान, जुंणी ईयां लाम्मै-लाम्मै चोगे हूआ बान्हें दै, और रहैऊणा लै फिरा बडे भारी

हाथा जोळदें, 39 और मांदरा दी लोळी इन्नां खास-खास जैगहा बेशणा लै, और खाणा लै बी लोळी तिन्नां बधिया-बधिया जैगहा, 40 ईयां खा विधवा बेटळिरे घर, और रहैउणा लै फिरा ईयां बडी देरा तैण्हीं प्राथणां करदें, इन्नां लै भेटणीं सोभी का ज़ादी सज़ा।”

### कंगाळ विधवो दान

(लूका 21:1-4)

41 यीशू मांदरें बढारा सेटा लागअ भाळअ कि ईयां मांदरें बढारा दी ढबें धेळें केऊ साबें पाआ; बडै-बडै सेटें बडअ पाआ भारी ढबअ धेलअ। 42 तेतरी आई एक कंगाळ विधवा, तेसा पाई दुई दांबळी, जेते किम्मत एकी धेळें बराबर हआ। 43 तेखअ यीशू आपणें चेलें आपू सेटा लै शादें, और तिन्नां लै बोलअ, “हूँ बोला तम्हां लै सच्चाई कि मांदरे बढारा दी दान दैणें आळें मांझें दैनअ एसा कंगाळ विधवा सोभी का ज़ादअ दान; 44 किल्हैकि सोभी दैनअ आपणें खास्सै ढबें धेळें मांझें आपणी बढदी कमाई बिचा का, पर एसा कंगाळ विधवा दैनअ आपणी घटदी बिचा का (अर्थात) एसा दैनीं आपणी सारी कमाई।”

### मांदरे नाश हणें भविष्यवाणी

(मत्ती 24:1,2; लूका 21:5,6)

13 जांऊं प्रभू यीशू मांदरा का डेऊई चालअ त, ता तेऊए चेलें मांझें एकी तेऊ लै बोलअ, “हे गुरू, भाळ, किहै बडै-बडै भवन और पाथर आसा” 2 यीशू तिन्नां लै बोलअ “जुंण तम्हें इन्नां बडै-बडै पाथरा और भवना भाळा, ईयां नि एक बी रहणै।”

### सांगट और क्लेश

(मत्ती 24:3-14; लूका 21:7-19)

3 जांऊं यीशू जैतुनें धारे मांदरा सहनै त बेठअ द, ता पतरस, याकूब, और युहन्ना और अनिद्रयासै यीशू का पुछअ, 4 “हाम्हां का खोज की ईयां गला केभै हणीं, तेऊ बगतो चिन्ह के हणअ?” 5 यीशू तिन्नां लै बोलदअ लागअ, “भाळें तम्हें रहै चतैन कि कोई हेरे तम्हां ठगा। 6 जेभै तम्हां का देशें लळाई जुधे गला शुळणी, ता तम्हें नी डरी; किल्हैकि ईयां गला हणीं आसा जरूरी, पर तेऊ बगतै बी नि अन्त हणअ। 7 जेभै तम्हां का देशें लळाई जुधे गला शुळणी, ता तम्हें नी डरी; किल्हैकि ईयां गला हणीं आसा जरूरी, पर तेऊ बगतै बी नि अन्त हणअ। 8 और जाती लै हणीं जात घाती और राजा लै हणअ राज घाती। और कज़ीधळी हणीं ज़ाज़री और देशें पळणें नकाळ, और तेभा पोही ही हणीं दुखेए शुरुआत।

9 “पर तम्हें रहै आपणें बारे दी चतैन; किल्हैकि लोगा निणें तम्हें बडी-बडी सभा दी, और तम्हें पंचायता दी चिकणें, और मेरें कारण तम्हें हाकमां और राजे सेटा बी करनै खळें, ताकि तिन्नां लै ग्वाही होए। 10 पर जरूरी आसा की पैहलें लोळी सुसमाचार सोभी ज़ाती सेटा पुजअ। 11 जेभै तियां तम्हां नीए, और तिन्नां सेटा खळें करे, ता तम्हें हैळअ फिकर करी की हाम्हां किजै बोळणअ; पर जुंण तम्हां लै तैहा घळी खोजणअ, ता तम्हें बोलै तिहअ ई, किल्हैकि तेसा बगती नि बोळणें आळें तम्हें हणें, पर तेभै हणीं बोळदी पवित्र आत्मा। 12 भाई लै भाई और बाबा करनअ शोहरू घात, और शोहरू उझणें आपणें आममां-बाप्पु लै चिकदें-मारदें खळें और मारी बी पाणें। 13 और मेरें नांओए कारण डाहणीं लोगा तम्हां संघा जीद, पर जुंण आखरी तैणीं धीर धरे, मोक्ष भेटणअ तेऊई।

### माहासांगटो बगत

(मत्ती 24:15-28; लूका 21:20-24)

14 “और जेभै तम्हें तेसा नाश करनै आळी नकाम्मीं चिजा, जिधी तेसरअ रहणअ ठीक नी आधी, जै तैहा तम्हें तिधी भाळे, (पहळणें आळअ समझें आपी) ता तेभै जुंण यहूदिया दी होए तियां नाशें धारा परेंदा लै, 15 और जुंण छापरे होए, तियां नि घरा भितरा का किजू निणें तैण्हीं ऊँधें होथी और ना घरा भीतरा लै नाशी; 16 और जुंण खेचै होए, ता सह नि आपणें झीकळें निणें तैणीं पीछु हटी। 17 तिन्नां धेळी जुंण सुंदी और दुधा पणैउंदी होए, तैहा

लै हाय-हाय। 18 तम्हें रहा प्राथणां करदें लागी कि ईयां गला नि हींऊंदै धेळें लोळी हुई। 19 किल्हैकि ईयां धेळें हणें ईहै दुखा सांगटे कि एसा दुनिंए शुरुआता का जुंण परमेश्वरें बणाई दी आसा, जुंण आझें तैणीं कधि नी हुऐ, और ना कधि हणें। 20 जै तिन्नां धेळी प्रभू घटाऊदअ नाई त, ता तै निं कोहै बी जीब बचदअ त; पर तिन्नां चुनै दैए कारण, जुंण प्रभू चुनै दै आसा, ईयां धेळी आसा तिन्नें कारण घटाऊई दी। 21 तिन्नां धेळी तम्हां लै जै कुंण इहय बोले, “भाळा मसीह आसा ईधी, और मसीह आसा तिधी, ता तिन्नां दी निं बिश्वास करी; 22 किल्हैकि झुठें मसीह और झुठें भबिश्वाबाणीं करनै आळें हणें खळें, और तिन्नां रहैऊणें बडै-बडै चिन्ह और चमत्कार, और जुंण चुनै दै बी होए तियां बी भरमांऊणें। 23 पर तम्हें रहै चतैन, किल्हैकि मंए आसा हेरी दी ईयां गला तम्हा का पैहलें ई खोजी।

### मांहुंए शोहरूओ फिरी एछणअ

(मत्ती 24:29-31; लूका 21:25-28)

24 “तिन्नां धेळी तेऊ कलेशा बाद, सूरज फिरनअ काळअ, और जोध फिरनिं धुमधूमिं; 25 और सरगा का लागणें तारें अळदें, और सरगे सारी शक्ति हीळणी-चुकर्णी। 26 तेखअ लोगा सह मांहुंओ शोहरू बडी शक्ति और महिमा संघे बादळा बिचै ऐछदअ भाळणअ 27 और तेऊ बगतै भेजणें तेऊ आपणें दूत, और धरतीए एकी कूणें और सरगे एकी कूणें तैणीं और चौहु दिशा का करनै आपणें चुनै दै लोग कटा।

### अंजीरे बूटो उदाहरण

(मत्ती 24:32-35; लूका 21:29-33)

28 “अंजीरे डाळा का शिखळा एसा गला, जेभै तेऊए डाळी नरम फीरा और पाच निखळनै शुरु हआ; ता तेभै हेरा तम्हें ज़ाणीं कि बसंतें रीत आसा नेळ। 29 और इहय ही, जांऊं तम्हां ईयां गला हंटी हेरनिं, ता तम्हें समझें कि तियां धेळें आसा नेळ, मतलब तियां आसा डेहळी बागें। 30 हूँ खोजा तम्हां लै सच्चाई कि जेभै तैणीं ईयां गला हई नि मुके, तेभै तैणीं निं ईयां लोग नाशणें। 31 सरग और पृथूई टळणीं, पर मेरी गला निं कधि टळणीं।

### बिऊधै रहा

(मत्ती 24:36-44)

32 “तैहा धेळी और तेऊ बगता निं कोहै जाणदअ, ना स्वर्गें दूत और ना शोहरू; पर एसा गला थोघ आसा सिधअ परमेश्वर पिता का। 33 भाळा, बीऊतै रहा और प्राथणा करदें रहा लागी, किल्हैकि तम्हा का निं एसा गला थोघ आथी कि सह साईत केभै हणीं। 34 अह आसा तेऊ आदमी जेही गल, जुंण परदेशा लै नाठअ, और आपणअ घरअ सभाळअ आपणें दासा का, और सोभी नोकरा चाकरा का डाहअ तिन्नां काम सभाळी, और दुआरे पहरदारा डाहअ इहय बोली कि बिंऊतअ रहै। 35 तैही बोला हूँ तम्हां लै बी कि ज़ागदें रहा किल्हैकि तम्हां का निं थोघें कि घरों मालक केभै ऐछणअ, सह ऊडै ऐछणअ, कि आधी राची, की मुर्गे बाशणें बगती, कि सह दोती एछे। 36 इहय निं हआ की तम्हें होए सुतै दै और मालक एछे तेऊई बगतै 37 और जुंण हूँ तम्हां लै बोला, तिहअई बोला हूँ सोभी लै कि ज़ागदें रहा।”

### यीशूए खलाफ शडयंत्र

(मत्ती 26:1-5; लूका 22:1,2; यूहन्ना 11:45-53)

14 दूई धेळें बाद आसा त फसह पर्व और अखमीरी रोटीओ पर्व हणेंआळअ, और माहायाजक और शास्त्री तै एसा गला लोळें लागें दै कि, किहअ करै छळ-कपट करी करै पाणअ त यीशू मसीह मारी। 2 पर तियां बोला तै इहय बी कि पर्व धेळी निं हाम्हां इहय करनअ, इहय निं हआ कि लोगा बिचै होए चिक-फणाटी।

### बेतनियाह यीशू सीख

(मत्ती 26:6-13; यूहन्ना 12:1-8)

3 जांऊं प्रभू यीशू बेतनियाह शमौण कोल्हीए (कोल्हे बमारी आळअ) घरै रोटी खांदअ त बेठअ द, और जांऊं एक बेठळी संगमरमे भांडै दी जटामांसीओ किम्मती तेल आणअ और प्रभू यीशूए मुंडे तरैळअ। 4 पर कई लागै आपणें मनं बोलदै कि अह एतरअ खासअ किम्मती तेल किल्है किय एसा बरैबाद? 5 किल्हैकि एऊ इत्रा सका तै चिई शौआ दीनारा का बी ज़ादी किम्मती बेची करै कंगाळा लै बांडी। 6 प्रभू यीशू तिन्नां लै बोलअ, “एसा छाडा, एसा किल्है करा तम्हें तंग? एसा ता मूँह संघे भलाई की। 7 कंगाळ रहणें कबल्लै तम्हांई संघे: तम्हें जेभे चाहे तेभे सका तिन्नां संघे भलाई करी, पर हूँ निं तम्हां संघे कबल्लअ चालअ रहई। 8 जुण बी अह करी सका ती और जुण एसा किय, एसा मळअ मूँह दाबणा लै पैहलै ई मेरी देही लै तेल। 9 हूँ खोजा तम्हां का सच्चाई कि सारै संसारै जिधी बी सुसमाचार प्रचार होए, तिधी हणीं एसे एऊकामें चरचा एसा आद करना लै जरूर।

### यहूदो विश्वासघात

(मत्ती 16:14-16; लूका 22:3-6)

10 तैबै यहूदा इसकरोती, जुण तिन्नां बाराह मांझै एक त, माहायाजका सेटा लै नाठअ कि प्रभू यीशू तिन्ने हाथे ढाकणें दैए। 11 इहय शुर्णी करै हुऐ तियां बडै भारी खुश और तेऊलै मनै तिन्नें ढबै दैणें। ता सह बी लागअ मोकै भाळअ, कि किहअ करै बडैळणअ सह ढाकणें।

### चेले संघे फसैओ आखरी भोज

(मत्ती 26:17-25; लूका 22:7-14,21-23; यूहन्ना 13:21-30)

12 अखमीरी रोटिए पैहली धैळी, जेता का फसह लै बलिदान करा तै, प्रभू यीशूए चेलै प्रभू का पुछअ, “तूह किधी चाहा कि हाम्हेँ ताल्हेँ फसह खाणें तैरी करे?” 13 तेऊ आपणें चेलै मांझै दूई जण्हेँ इहय खोजी करै भेजै कि, नगरी लै नाशा, और एक आदर्मी भेटणअ तम्हां पाणिए घळै चकी करै, तेऊ पिछु लागै हांढदै। 14 तेखअ सह जसा घरा लै नाशे, तेऊ घरे मालका लै बोलै तम्हें कि गुरू बोला इहय कि तेरी पाहुणशाला किधी आसा, जिधी हूँ आपणें चेलै संघे फसह खाई सकूँ। 15 तेऊ रहेऊणीं तम्हां का एक सजी-सजाऊई दी पांड, तिधी करै मुल्है फसह खाणें तैरी। 16 ता चेलै नगरी दी आरे, और जिहअ प्रभू तिन्नां का बोलअ त, तिन्नां भेटअ तिहअ ई और तिन्नें किय फसैहो भोज त्यार।

17 जांऊं साह पळी ता प्रभू आअ तिधा लै आपणें बाराह चेलै संघे।

18 जांऊं तियां रोटी खांदै बेठै, ता प्रभू यीशू तिन्नां लै बोलअ, हूँ खोजा तम्हां का सच्चाई कि, तम्हां बिचै आसा एक इहय जुण मूँह संघा इधी रोटी खांदअ बी आसा बेठअ द, तेऊ बडैळणअ हूँ ढाकणें। 19 तियां हुऐ बडै भारी उदास, और तियां एक-एक करी करै बारी-बारी बोलदै लागै कि, सह कै हूँ आसा? 20 प्रभू तिन्नां लै बोलअ, सह आसा तम्हां बारह मांझै एक, जुण मूँह संघा थाळू दी हाथ पा। 21 किल्हैकि माळूओ शोहरू, जिहअ तेऊए बारै लिखअ द आसा, सह ता तेऊई साबै नाशणअ; पर तेऊ माळू लै हाय, जसरै कारण सह ढाकणें बडैळणअ। जै तेऊ माळूओ जल्म ही नाई हंदअ ता, तै हणअ त तेऊलै भलअ।

### प्रभू भोज

(मत्ती 26:26-30; लूका 22:14-20; 1 कुरिन्थियों 11:23-25)

22 और जांऊं तियां खांदै ई तै लागै दै, और आशीष मांगी करै रोटी चोळी, और तिन्नां लै दैनीं, और इहय बोलअ कि “हूँजा, अह आसा मेरी देह।” 23 तेखअ तिन्नें कटोरअ लई करै धन्यावाद किय, और तिन्नां लै दैनअ और तिन्नें सोभी तेता का झुटअ। 24 तेखअ प्रभू तिन्नां लै बोलअ, “अह बाचा आसा मेरअ लोहू, जुण बहूतरे लै बहाऊणअ। 25 हूँ खोजा तम्हां का सच्चाई कि, दाखो रस निं मूँह तेभे तैणीं झुटणअ, जेभे तैणीं हूँ परमेश्वर राजा दी नऊंअ दाखरस निं झुटूँ।”

26 तेखअ नाठै तियां भजन गाई करै बागै जैतूने धारा लै।

### पतरसे नकार करनं भविष्यवाणी

(मत्ती 26:31-35; लूका 22:31-34; यूहन्ना 13:36-38)

27 तैबै प्रभू यीशू तिन्नां लै बोलअ, “तम्हां सोभी खाणीं ठोहळ, किल्हैकि इहय आसा लिखअ द कि, मूँह पाणअ फुआल मारी और भेडा छिंगीं ओरी-पोरी। 28 पर हूँ नाशणअ जिऊदअ हई करै तम्हां का पैहलै गलीला लै।” 29 पतरस प्रभू यीशू का बोलअ, “जै कुण ठोहळ खाए, ता सह खाए, पर हूँ निं ठोहळ खांदअ।” 30 प्रभू यीशू तेऊ लै बोलअ, “हूँ खोजा ताखा सच्चाई कि, आझू एसाई राची, मुगं दूई बारी बाशणें का पैहलै मुकरनअ तूह मेरे बारै चिई बारी। 31 पर पतरस हौर बी जोर दैई करै बोलअ कि जै मूँह ताह संघे मरनअ बी पळे, ता तैबी बी निं हूँ तेरे बारै मुकरदअ। इहयई तिन्नें होरी बी बोलअ सोभी जण्हेँ।

### गतसमर्नी बगीचै दी प्राथणां

(मत्ती 26:36-46; लूका 22:39-46)

32 तेखअ तियां गतसमर्नि नांओए एकी जैगा लै आरे, और प्रभू आपणें चेलै लै बोलअ, इधी रहा बेशी, जेभे तैणीं हूँ प्राथणां करूँ। 33 तेऊ पतरस याकुब और यहूना नियें आप्पु संघा, और बडअ अधीर और व्याकुल लागअ हंदअ। 34 तेऊ बोलअ इहय, मेरअ मन आसा इधी तैणीं उदास कि मेरे चालअ महूई: तम्हें रुका इधी, और जागदै रहा। 35 तेखअ प्रभू धख आजू जिहअ नाठअ और धरती दी पळी करै लागअ प्राथणा करदअ कि जै हई सके ता अह घळी मुखा पोहीं टळे। 36 और एही प्राथणां की, कि हे अब्बा, हे बाप्पूआ, ताखा सका सोभे गल्ला हई, एऊ कटोरै चक मूँह सेटा का पोहीं, तैबी बी जिहअ हूँ चाहा, तिहअ निं लोळी हूअ, पर जिहअ तूह चाहा तिहअ लोळी हूअ। 37 तेखअ प्रभू यीशू आअ, तियां सुतैदै भाळी करै, पतरसा का बोलअ, “हे शमौन, तूह सुतअ द आसा? तूह एकी घळी बी निं जागी सकअ? 38 जागदै और प्राथणा करदै रहा लागी, कि तम्हें परिक्षा दी ना पळे, आत्मा ता आसा तैर, पर शरीर आसा कमजोर। 39 तेखअ सह भी नाठअ और तिहअ ई बोली करै प्राथणा की। 40 एता बाद तेखअ भी एछी करै भाळै तियां सुतैदै, किल्हैकि तिन्नें आच्छी ती निजा करै भरुई दी; और तिन्नां का निं पतअ त कि तेउलै कै जबाब दैणअ। 41 तेखअ प्रभू चिऊथी बारी एछी करै तिन्नां लै बोलअ; एबै रहा सुती और आराम करा, बस, सह घळी गई एछी; भाळा, माळूओ शोहरू लाअ पापीए हाथे ढाकी। 42 उझिआ, चाला, हेरा, मेरअ ढाकणें आळअ गूअ नेळ एछी।

### यीशू धोखे करै ढाकणअ

(मत्ती 26:47-56; लूका 22:47-53; यूहन्ना 18:3-12)

43 प्रभू त इहय बोलदअ ई लागअ द कि, यहूदा, जुण तिन्नां बारह मांझै एक त, आप्पु संघा, शास्त्री, पुरनिऐं एक बडी भीळ तलबारा और शोठै पाई तेभी तिधी पुजी। 44 और तेऊ ढाकणें आळै तिन्नां लै इहय बोलअ कि जसा लै हूँ चुंजी-माक्की दैऊं, सहई आसा, तेऊ नियें ढाकी करै। 45 और सह आअ, और तेऊ तेभी प्रभू सेटा नाशी तेऊ लै बोलअ: “हे रब्बी,” और तेऊ लै दैनीं चुंजी-माक्की। 46 तैबै तिन्नें यीशू लै हाथ पाए और सह ढाकअ। 47 तिन्नां चेलै मांझै जुण तिधी नेळ तै खट्छुऐ दै, एकी आपणीं तलबार खिंची और माहायाजके दासा लै बाही ता तेऊओ कान शोटअ धरनीं। 48 प्रभू यीशू तिन्नां लै बोलअ, “तम्हें कै डाकू समझी करै मूँह ढाकदै तलबारा और शोठै लई आसा निखळै दै? 49 हूँ ता हर धैळै तम्हां संघा मांदरै उपदेश दैआ त, तेभे किल्है निं हूँ तम्हें ढाकअ? पर अह हूअ तै कि पबित्र शास्त्रा दी लिखी दी गल्ला पूरी होए। 50 इहय भाळी सोभ चेलै तिधा का भागै।

51 ता एक जुआन आपणीं नांगी घेरी दी चादरु पळुची करै लागअ तेऊ पिछु हांढदअ और लोगै सह ढाकअ। 52 पर सह चादरु तिधी छाडी करै भागअ नांगअ ई।



### माहासभा सम्हनै यीशू

(मत्ती 26:57-68; लूका 22:54,55,63-71; यूहन्ना 16:13,14,19-24)

53 तेखअ नियं तिन्नै प्रभू यीशू मसीह माहायाजका सेटा लै, और याजक, शास्त्री और पुरनिऐं बी हूऐ तिधी सोभै जण्हें कठा। 54 पतरस दर जिहअ पिछू-पिछू नाठअ माहायाजके आंगणै तैणीं, और लोग बिचै पैदें संघे बैठअ आगी नैथदअ। 55 माहायाजक और सारी माहासभा ती यीशू मारी पाणें तैणीं तेऊए बिरोधा दी ग्वाही लोळी लागै दै; पर तिन्नां निं किछ दोष निसअ त भेटी। 56 किल्हैकि कई तै लागै दै तेऊए खलाफ झुठी गूआही दैन्दै, पर तिन्नै ग्वाही नाई ती एकी रगे बी आथी। 57 तैबै कई खळै उझूई करै एही झुठी ग्वाही दैनीं कि 58 "हाम्हें शुणअ अह इहय बोलदअ कि, मूँह पाणअ अह हाथा करै बणांअ द मांदर ढोळी और चीई धैळै बाद बणांणअ दुजअ, जुंण हाथा करै बणांअ द न होए। 59 एसा गल्ला लै बी नाई ती तिन्नै गूआही एकी रगे थी।

60 तैबै माहायाजकै बिचै खळै हई करै प्रभू यीशू का पुछअ, "तूह किछै जबाब निं दैदअ? इयां लोग तैरे खलाफ भाळ कै ग्वाही दैआ?" 61 पर प्रभू यीशू रहअ मौन, और कोई बी जबाब निं दैनअ; माहायाजकै तेऊ का एकी बारी भी पुछअ, "तूह कै परमधन्य परमेश्वरो शोहरू आसा?" 62 प्रभू यीशू बोलअ, "हाँ, हूँ आसा, और तम्हां भाळणअ माह्लुँओ शोहरू सर्वशक्तीमाने दैहणें बेटअ द और सारें बादळा संघे एछदअ।" 63 तैबै माहायाजकै आपणें झिकळै धैळी करै बोलअ, "ऐबै निं हाम्हां कोही ग्वाहीए जरूरत आथी? 64 तम्हें सोभी बी हेरी अह निंदा शुणीं, तम्हां होरीए कै राय आसा?" तिन्नै होरी बोलअ कि "अह आसा मारना जोगी ही।" 65 तैबै कई लागै तेऊलै थुकदै, और कोए लागै तेऊए मुंहा ढोपदै और मुहकै बाहंदै, और तेऊलै लागै इहय बोलदै कि ऐबै कर भबिष्याबाणीं, और तिन्नै पैहलबानें बाही तेऊलै चैंडै।

### पतरसो नकार करनअ

(मत्ती 26:69-75; लूका 22:56-62; यूहन्ना 18:15-18)

66 जांऊं पतरस आंगणै त, ता माहायाजके दासी मांझै एक तिधी आई। 67 और पतरस आगी सेटा नैथदअ भाळी करै टकटकी लाई करै भाळी लागी और बोलअ, "तूबी थिय तेऊ यीशू नासरी संघे त भाळी? 68 पतरसै किय नाई, और बोलअ, "हूँ ता तेऊ जाणदअ ई निं, मूँह निसी समझ पळी कि तूह किजै बोला?" तेखअ नाठअ सह बागै डेहळी सेटा, और मुरगे बी बाशअ। 69 तेखअ सह दासी, तेऊ भाळी करै तिन्नां का जुंण तिधी नेळ तै, बोलदी लागी कि "अह आसा तिन्नां मांझै कोई एक जण्हअ।" 70 पर पतरस मुकरअ भी, और थोळी घळी बाद तिन्नै बी जुंण तेऊ नेळ तै खट्खुएदै बोलअ, "जरूर आसा तूह तिन्नां मांझै कोई एक, किल्हैकि तूह ता गलीली बी आसा?" 71 ता पतरस लागअ नाई करदअ और कसमा खांदअ कि, "तम्हें जसा आदमीए गल्ला करा, हूँ निं तेऊ बछेणदअ बी आथी।" 72 नदैऊए दुजी बारी मुर्गअ बाशअ और पतरसा सह गल जुंण प्रभू यीशू तेऊलै बोली ती सह आद फिरी कि मुर्गे दूई बारी बाशणें का पैहलै करनअ ता मेरअ चिई बारी नकार। एसा गल्ला सोची करै लागअ सह लेरा लांदअ।

### पिलातुसे सम्हनै यीशू

(मत्ती 27:1,2,11-14; लूका 23:1-5; यूहन्ना 18:28-38)

15 दोती दोथही प्रधान याजक, पुरनिऐं, और शाश्वरी और सारी माहासभे लोगें, आप्पू मांझै सारै मशबरअ किय और यीशू बान्हीं करै नियं, और सह किय पिलातुसै हवालै। 2 पिलातुसै यीशू का पुछअ, "कै तूह यहूदीओ राजअ आसा?" यीशू तेऊ लै बोलअ, "तूह आसा आप्पू ई बोलदअ लागअ द।" 3 प्रधान याजकै यीशू लै बडै भारी दोश लागै। 4 पिलातुसै यीशू का भी पुछअ, "तूह जबाब किल्है निं दैदअ, भाळ इयां लोग ताल्है केतरी गले दोषा आसा लांदै लागै दै?" 5 यीशू निं तिन्नां लै कीछ जबाब दैनअ; पिलातुस हुअ बडअ रहैन।

### सजाए मौते आजा

(मत्ती 27:15-26; लूका 23:13-25; यूहन्ना 18:39-19:16)

6 पिलातुस करा त तेऊ पर्वा दी ऐकी कैदी आजाद, 7 बरअब्बा नाओं एक आदमी बी त तिधी कैद किय द, तेऊ कैदी आसा त खून खराबअ किय द। 8 खास्सै लोग नाठै ऊझै और तेऊ का अरजा करदै लागै कि जिहअ तूह हाम्हां लै आजाः तैणीं करदअ आसा आअ द तिहअई कर। 9 पिलातुसै तिन्नां लै बोलअ, "कै तम्हें इहय चाहा की यहूदीए राजै, हूँ तम्हा लै छाडू?" 10 पिलातुसा का थिय थोघ कि प्रधान याजकै आसा अह धोखै संघे ढाकअ द। 11 पर प्रधान याजकै तै तियां लोग शकाऊए दै, और लोगें बोलअ तेऊ बरअब्बा ई छाडणा लै। 12 जांऊं पिलातुसै इहय शुणअ, ता तेऊ तिन्नां का एकी बारी भी पुछअ, "जसा लै तम्हें यहूदीओ राजअ बोला, ता तेऊ लै हूँ कै करूँ?" 13 तियां लोग लागै जोरै-जोरै बोलदै कि, "ऐऊ छडाऊआ कूसा दी।" 14 पिलातुसै तिन्नां लै बोलअ, "किल्है, ऐऊ किजै बुरअ काम कीय?" पर तिन्नै होर भी जोरै-जोरै हाका लाई "ऐऊ छडाऊआ कूसा दी।" 15 तेखअ पिलातुसै लोगा खुश करनैए तैणहीं, बरअब्बा तिन्नां लै छाडअ, और यीशू लै कोळै बाहै, और कूसा दी छडाऊणा लै दैनअ।

### सपाही यीशूओ अपमान करनअ

(मत्ती 27:27-31; यूहन्ना 19:2,3)

16 सपाही यीशू किलै भितरी आंगणा लै नियं, जीधा लै प्रीटोरियुम बोला तै, और सारै सपाही तिधा लै शादै। 17 तेखअ तिन्नै यीशू लै बैजनी रांगे झिकळै भनैऊए और काण्डैओ मुकट तेऊए मुंडै लाअ, 18 और इहय बोली करै नमश्कार करदै लागै, "हे यहूदीए राजैआ नमश्कार।" 19 तिन्नै तेऊए मुँहा लै थुकअ, और तेऊए मजाका करदै और ठठै दी प्रणाम करदै लागै। 20 तेखअ तिन्नै तेऊ का बैजनी झीकळै पोर्ही खोल्है और तेऊए ई झीकळै तेऊ दी भनैऊए, और कूसा गैहै छडाऊणा लै बागा लै नियं।

### यीशू कूसा दी छडाऊणअ

(मत्ती 27:32-44; लूका 23:26-43; यूहन्ना 19:28-30)

21 सिकन्दर और रुफुसो बाप्पू शमौन, और एक कुरैनी आदमी त लागअ द गरांओआ का ऐछदअ, सह तेसी बाती आअ; तिन्नै सह ढाकअ और तेऊ लै बोलअ कूसा चकणा लै। 22 तिन्नै यीशू गुलगुता नांओए जैगा लै जेतो मतलब खोपळीए जैगा हआ, तिधा लै नियं। 23 तिधी तियां तेऊ लै शराबा पेरै मलाऊअ द दाखरस दैन्दै लागै, पर यीशू निं सह झुठअ। 24 तेखअ तिन्नै यीशू कूसा दी छडाऊअ और तेऊए झिकळै लै चिठी पाई कि कसा लै कै लोळी भेटअ और तियां बांडै। 25 सह आसा त दोतकअ बगत आसा त जेभै यीशू तिन्नै कूसा दी चढाउअ। 26 और तेऊओ दोष पत्र तेऊए मुँडा परदै लाअ, और तेथ त लिखअ, "यहूदीओ राजअ।" 27 और तिन्नै दुई डाकू बी कूसा दी चढाउए, एक यीशुए दैहणी बाखा और एक बाई बाखा। 28 तैबै सह बचन पूरअ हुअ, जुंण पवित्रशास्त्रा दी लिखअ द आसा त कि "तेऊए गिणती हणीं अपराधी संघे।" 29 बाता हांडणै, नाशणै आळै लोग, यीशुए मजाका करदै और तेऊ लै बोलदै लागै, "वाह, मांदरा ढोळणै आळैआ, और चिई धैळी भितरी बणांणें आळैआ, 30 ऐऊ कूसा का नीखळ, और आप्पू ता बच हेरु।" 31 प्रधान याजक और शाश्वरी, सोभै मजाका करदै और बोलदै लागै, होर ता ऐऊ बचाऊए, पर आप्पू निं बची सकअ। 32 इस्राईले राजै मसीह, कूसा का होथी धरनीं ता ऐछ हैनू, तै करनअ हाम्हां बी विश्वास।" जुंण यीशू संघे कूसा दी डाकू छडाउए दै आसा तै, तियां बी करा तै तेऊए निंदा।

### यीशूए प्राण शोटणै

(मत्ती 27:45-56; लूका 23:44-49; यूहन्ना 19:28-30)

33 दपहरा हंदी सारै देशै हुअ न्हैरअ, और ऊडै तैणीं रहअ न्हैराघोर हई, 34 उडकै यीशू बडै जोरै एक बोल बोलअ, "इलोई, इलोई, लमा शबकनी?" "जेतो मतलब हआ इहय, "(हे मेरे परमेश्वरा) हे मेरे परमेश्वरा, तूणें हूँ किल्है छाडअ?" 35 जुंण तिधी खळै आसा तै, तिन्नां मांझै कई शुणअ, और बोलअ,



“भाळा सह आसा लागअ द एलियायाह लै बोलदअ।”<sup>36</sup> ऐक आअ तुहरी करै, और चुशु सिरकै भितरी डबेरुअ और सरकंडै दी डाहअ, और तेऊ का दैनअ चुशु संघा बोलअ, “भाळा हेरू, एलियायाह ऐऊ खोलदअ ऐछणअ कि नाई।”<sup>37</sup> तेखअ यीशू का जोरै हाक छुटी, और प्राण शोटे।<sup>38</sup> और मांदरो पर्दअ ऊपरा का तोळ तैणी धेळुअ और तेते हुऐ दुई भाग।<sup>39</sup> जुण सुबेदार यीशू सेटा खट्ठुअ द थिय, और जाऊं तेऊ सह इहय जोरा सघै प्राणा शोटदअ भाळअ ता तेऊ बोलअ, “अह आदमी ता सच्ची परमेश्वरो शोहरू आसा त।”

<sup>40</sup> कई बेटळी बी ती दुरा का भाळी लागी दी, तिन्नां मांझै तै मरियम मगदलीनी, होछअ याकूब, और योसेसे आम्मां मरियम, और सलोमी आसा तै तिधी।<sup>41</sup> जधू यीशू गलीला दी हआ ती, ता ईयां बी हआ ती यीशू संघै, और तियां बी करा तै तेऊए सेऊआ चाकरी; होर बी ती बडी भारी बेटळी जुण यीशू संघै यरुशलैमा लै ती आई दी।

### यीशू दाबी डाहणअ

(मत्ती 27:57-61; लूका 23:50-56; यूहन्ना 19:38-42)

<sup>42</sup> सह त सबतो धैळअ एछणें आळअ और उडकअ बगत गअ त हई, <sup>43</sup> अरिमतियो रहणें आळअ यूसुफ आअ, और सह त माहासभो सदस्य, और सह त आप्पू बी परमेश्वरे राजो खोजबीन करनै आळअ। सह बडी हिम्मत बाह्नी करै पिलातुसा सेटा लै नाठअ और तेऊ यीशूए लाहस मांगी। <sup>44</sup> पिलातुस हुअ रहैन कि सह ऐतरअ छैकै गअ मरी; पिलातुसै सुबेदार शादअ और पुछअ, “कै तेऊ मरी खासअ बगत गअ हई?”<sup>45</sup> और जेभै पिलातुसा हाल चाले बारै पतअ लागअ, ता लाहस तेऊ यूसूफा लै दैनीं। <sup>46</sup> तेखअ यूसुफै एक मुखमले चादर लई संघा लाहस तैहा चादरी दी पळेटी और पाथरा दी कोती दी कबरा दी डाहअ। <sup>47</sup> मरियम मगदलीणीं और योसेसे आम्मां मरियम ती लागी दी भाळी कि यीशू किधी आसा डाहअ द।

### यीशूओ भी जिऊंदै हणअ

(मत्ती 28:1-8; लूका 24:1-12; यूहन्ना 20:1-10)

**16** जाऊं सबते धैळी बीती गई ता मरियम मगदलीनिं, और याकूब आम्मां मरियम, और सलोमी, बडी खूशबू आळी सुगंधित चिजा लई आणीं ताकि यीशू मसीहे लाहसा दी मळी सके।<sup>2</sup> हबतेए पैहली धैळी, दोती दोथही, धुपै निखलदी ही, तियां कब्रा सेटा लै आई,<sup>3</sup> और तियां ती लागी दी आप्पू मांझै गल्ला करदी कि हाम्हां लै कब्रो पाथर कसा दैणअ बदळी? <sup>4</sup> जाऊं तिन्नें हेरअ कि कब्रा का आसा पाथर पोर्ही नीखळअ द, और सह पाथर त बडअ भारी बडअ। <sup>5</sup> जाऊं तियां कब्रा भितरी डेऊई, ता तिन्नां का एक शेते झीकळै आळअ जुआन आदमीं दैहणी बाखा बेटअ द धेछुअ और तियां हुई बडी रहैन। <sup>6</sup> तेऊ जुआनै आदमीं तिन्नां लै बोलअ, “रहैन किलहै हई, तम्हें यीशू नासरी लोळा, जुण कूसा दी छड़ाउअ त? भाळा सह हूअ जिऊंदअ, और ईधी नी सह आथी, हेरा, अह आसा सह ही जैगा, जिधी तिन्नें सह डाहअ द थिय। <sup>7</sup> पर तम्हें नाशा, और तेऊए चेलै और पतरसा लै बोलै इहय

कि सह नाशणअ तम्हां का पैहलै गलीला लै। और जिहअ तेऊ तम्हां लै बोलअ द आसा, तम्हां भेटणअ सह धी। <sup>8</sup> तियां बी डरदी-डरदी और काम्दी-काम्दी तिधा का भागी, और तिन्नें निं कोही का खोजअ तियां ती बडी भारी डरी दी।

### मरियम मगदलीनी का यीशू धेछणअ

(मत्ती 28:9-10; यूहन्ना 20:11-18)

<sup>9</sup> हबतेए पैहलै धैळै दोती न्हैर-प्रैशै, प्रभू यीशू जिऊंदै हणै का बाद सोभी का पैहलै मरियम मगदलीनी, जसा का यीशू सात दुष्टात्मा काड्ही ती, तेसा का शुझुअ। <sup>10</sup> तेखअ सह नाठी और तेसा यीशूए साथी का, जुण शोका दी पळे दै और लेरदै-पकारदै तै लागै दै, तिन्नां का खोजअ। <sup>11</sup> जाऊं तेसा तिन्नां का खोजअ कि प्रभू यीशू हुअ जीऊंदअ और मणें भाळअ सह आपणीं आच्छी, पर तिन्नें निं तेसे गल्लो विश्वास कीय।

### दुई चेलै का यीशू धेछणअ

(लूका 24:13-35)

<sup>12</sup> तेखअ सह तिन्नां दुजै रूपा दी तिन्नां मांझै दुई जळै गराओंआ लै नाशदा बेरी शुझुअ। <sup>13</sup> तिन्नें बी खोजअ होरी सोभी का एसा गल्लो समाचार, पर तिन्नें निं तिन्नां दी बी विश्वास कीय।

### सोभी गैरा चेलै का यीशू धेछणअ

(मत्ती 28:16-20; लूका 24:36-39; यूहन्ना 20:19-23; प्रेरित 1:6-8)

<sup>14</sup> पीछु सह तिन्नां ग्यारह जहणें बी, जाऊं तियां रोटी खांदै बेटै दै तै, तिन्नां का शुझुअ, और तिन्नों विश्वास नी करनअ, और तिन्नें कठोर मना लै विश्वास दैनअ किलहैकि जुणी प्रभू यीशूए जिऊई ऊझणें का बाद भाळअ त, इन्नें निं तिन्नें गल्लो विश्वास कीय त। <sup>15</sup> और यीशू तिन्नां लै बोलअ, “तम्हें सारी दुनियां दी नाशा, और सारै संसारे लोगा लै सुसमाचार शणाओंआ। <sup>16</sup> जुण विश्वास करे, और बपतिस्मअ लए, मोक्ष भेटणअ तेऊ ई, और जुण विश्वास निं करे, सह ठराओणअ दोषी। <sup>17</sup> विश्वासा करनै आळेए हणें इयां चिन्ह, कि तिन्नां मेरै नाऊंआं करै बुरी आत्मामां कादणी, और नऊई-नऊई भाषा बोळणी। <sup>18</sup> तिन्नां चकणें सर्प बी हाथै, और नजाणें दी तियां जहर बी झुटे, ता तैबी निं तिन्नां किछ हणअ, और तिन्नां जाऊं बमारा दी हाथ डाहणअ, ता बमार आदमी हणअ ठीक।

### यीशूओ स्वर्गा लै नाशणअ

(लूका 24:50-53; प्रेरित 1:9-11)

<sup>19</sup> तिन्नां संघै गल्ला-बाता करने का बाद चकअ प्रभू यीशू स्वर्गा लै और परमेश्वरे दैहणीं बाखा बेटअ <sup>20</sup> और तियां तिधा का नाठै, तिन्नें किय हर जैगा प्रचार, और प्रभू रहअ तिन्नां संघा काम करदअ, और तिन्नां चिन्ह चमत्कारा संघै, जुण तिन्नां करै हआ तै, और बचना रहअ मजबूत करदअ। तथास्तू।

# लूका

## भूमिका

लूका लिखअ द सुसमाचार करा प्रभू यीशू मसीह एसाएलो प्रतिज्ञा किय द उध्दारकर्ता और सारै संसारे मनुष्या जातीए उध्दारकर्ता दुहीए रूपै पेश। लूका लिखा इहय कि यीशू शादअ प्रभूए आत्मा "कंगाळा लै सुसमाचार शणांऊणें तैणीं।" तैहीता अह सुसमाचार कई प्रकारे समस्या दी पळै दै लोगे फिकरा करै आसा भूअ द। लूका लिखै दै एऊ सुसमाचारा दी आसा आनन्दे भावे बी प्रधानता खासकर शुरुआती धैऊआ दी, जेथ दी यीशूए एछणें घोषणां आसा की दी, और आखरी दी बी जिधी यीशूए स्वर्गारोहणों वर्णन आसा। यीशूए स्वर्गारोहणा बाद आसा एसा कताबा लिखणें आळै मसीहीए विश्वासो विस्तार और विवरण प्रेरिते काम नांऊणें कताबा दी किय द।

दुजै और छःऊरे भागा दी ( हेतै दैनीं दी रूप रेखा हेरा ) लिखी दी कई गल्ला भेटा सिधी एऊई सुसमाचारा दी। जिहय, यीशूए जल्मा दी स्वर्गदूतो स्तुति गान, फुआलो यीशू भाल्ले नाशणअ, बच्चपणें यीशू यरुशलेमें मांदरै, दयालू सामरी, उडाऊ पुत्रो द्रष्टांत बगैरा। पूरै सुसमाचारा दी आसा प्राथणां, पवित्रात्मां, यीशूए जनसेऊआ दी जनानींए भागीदारी और परमेश्वरा करै पाप माफी दी जादअ जोर दैनअ द।

रूप-रेखा :

भूमिका 1:1-4

यूहन्ना बपतिस्मै दैणें आळै और यीशूओ जल्म और बच्चपण 1:5-2:52

यूहन्ना बपतिस्मै दैणें आळैए जनसेऊआ 3:1-20

यीशूओ बपतिस्मआ और परिक्षा 3:21-4:13

गलीलै यीशूए जनसेऊआ 4:14-9:50

गलीला का यरुशलेम तैणीं यात्रा 9:51-19:27

यरुशलेमें आखरी हसअ 19:28-23:56

प्रभूओ जिऊंदै हणअ, धेछणअ और स्वर्गा लै नाशणअ 24:1-53

## भेत-बछेण

1 हे श्रीमान थियूफिलुस, जुंण घटणां हाम्हां बिचै बिती दी आसा, तेऊ इतिहासा कटा करना और लिखणां लै आसा हाम्हां मांझै कई लोगै मॅन्थ की दी। 2 ईयां गल्ला पजैळी तिन्नै हाम्हां सेटा तिन्नां का शुंणीं करै जुंण पैहलैई का आपणीं आच्छी भाळणें आळै और प्रभू यीशूए वचन प्रचार करा थियै। 3 तै समझअ मंणें इहय ठीक कि हूँ लिखूं ताल्लै बाडै शुरु ओहिं इन्नां गल्लो पूरअ हाल; 4 ताकि ताखा एसा गल्लो थोघ लागे कि जेतै ताह शिक्षा आसा भेटी दी; केही अटळ आसा।"

## यूहन्नै पैदा हणेंए घोषणां

5 यहूदिया देशे राजै हेरोदेसे जमानै दी त अबियाहे दला दी एक जकरयाह नांओं एक याजक और तेऊए लाळी ईलिशीबा ती हारुणें खानदानी का। 6 तियां दुहै जळै तै परमेश्वरे नजरा दी भलै और प्रभूए सारी आज्ञा और बिधी-बधाना मनणां लै निं तिन्नां लै कोई दोष थिय। 7 पर तिन्नै निं कोई आद लुआद थी। किल्लैकि इलिशीबा ती बांढी और तियां दुहै जळै गए तै बुढळै हई।

8 एकी धैळै जकरयाह जांऊं आपणीं मंडळीए बारी दी परमेश्वरे सहनै याजको काम करा त, 9 ता तेऊए नांऊणें निखळी याजके रबाजे साबै परची कि प्रभूए मांदरै नाशी करै जाळै धूपा। 10 जांऊ सह भितरी धूपा जाळदअ त लागअ द ता बागै तै लागै दै बडै भारी लोग प्राथणां करदैं। 11 नचानक धेछुअ तेऊका कि एक परमेश्वरो स्वर्गदूत हुअ धूप बेदीए दैहणीं बाखा प्रगट।

12 जकरयाह प्राछुअ तेऊ भाळी करै और तेऊ फिरअ बडअ भारी हैळअ।

13 पर स्वर्गदूतै तेऊलै बोलअ, "हे जकरयाह डरै निं आथी, प्रभू हेरी तेरी प्राथणा शूणीं और तेरी बेटळी इलिशीबा का हणअ तेरअ एक शोहरू और तूह डाहै तेऊओ नांअ यहून्ना। 14 ताह हणीं तेऊ करै आनंद और खुशी; संघा होरी बी भेटणीं बडै भारी लोगा तेऊए जल्मां करै खुशी। 15 किल्लैकि सह हणअ प्रभूए सहनै महान। तेऊ निं कधी शूर-शराब झुटणअ और सह हणअ

आपणीं आममें गर्भाई का पबित्र आत्मा करै भरुअ द; 16 और तेऊ फरेऊणें इसराला का बडै भारी लोग प्रभू परमेश्वरा बाखा लै। 17 सह नाशणअ प्रभू आजू-आजू शगती और पवित्र आत्मां दी एलीया नबी जिहअ ताकि सह बुजुगीं मन तिन्नै लाहें बाखा लै फरेऊए और आज्ञा नाई मनणै आळै धर्म समझ एछे और प्रभू लै एक धर्मी परजा बणाई सके।

18 जकरयाह स्वर्गदूता का पुछअ, "हूँ किहअ करै करूं एसा गल्लो भरोसअ? आपू ता हूँ बुढळअ आसा; और मेरी लाळी बी गई बुढळी हई?" 19 स्वर्गदूतै बोलअ तेऊलै इहय कि "हूँ आसा जिबराईल स्वर्गदूत; और हूँ रहा हमेशा परमेश्वरे सहनै खट्छुई; ता परमेश्वरै आसा हूँ ताह सेटा लै गल्ला करदअ और एसा खुशखबरी शणांऊदअ भेजअ द। 20 पर ऐबै शुंण, जेभै तैणीं ईयां गल्ला पूरी नि हई मुके, तेभै तैणीं रहणअ तूह चुप्पी (काल्ले जिहअ) और तूह निं किछै बोली सकदअ; इहय हणअ तै किल्लैकि तंणें निं मेरी इन्नां गल्लो भरोसअ किय जुंण ठीक बगती पूरी हणीं।" 21 ता लोग तै बागै जकरया न्हैळै-भाळै लागै दै और तियां हुए रहैन-प्रशैन कि जकरया मांदरा भितरी एतरी देर किल्लै पाई? 22 जांऊं जकरयाह बागै निखळअ; ता सह निं किछै बोली सकअ, जकरयाह लागअ तिन्नां लै शारै करदअ और सह रहअ काल्लअ ई। और तै गए तियां समझी कि एऊ हुए मांदरै किजै दर्शण। 23 जांऊं तेऊए सेऊआ चाकरीए धैळै पूरै हुए, ता सह नाठअ आपणें घरा लै।

24 इन्नां धैळै बाद हुई तेऊए लाळी इलीशीबा पेरभारी; पांजा भिने तैणीं निं तेसा अह गल कोही का खोजी कि 25 अह किरपा की प्रभू मूह संघे लोगा बिचै ईज्जत डाहणें तैणीं।

## यीशूए जल्म लणेंए घोषणां

26 इलिशीबा पेर भारी हणें छहा भिन्नै बाद भेजअ परमेश्वरै जबराईल नांओं स्वर्गदूत गलील देशे नासरथ नांऊणें नगरी एकी कुंआरी सेटा; 27 तेसा कुंआरी नांअ त मरिअम और तेसरी बरनिं ती दाऊदे खानदानिंए एकी युसुफा नांऊणें मरधा संघें हुई दी। 28 स्वर्गदूतै तेसा लै भितरी एछी करै बोलअ; "नमस्ते, परमेश्वरै दैनअ ताल्लै पठाथअ और प्रभू आसा ताहा संघे।" 29 एऊ बचना शूणीं करै मरिअम हैळुई और सह लागी इहय सोचदी कि

'इन्नां गल्लो किजै मतलब आसा?' 30 तैबे स्वर्गदूतै तेसा लै बोलअ, "हे मरिअम, डरै निं आथी, ताल्है हुई परमेश्वरे दैया। 31 भाळ, तूह हणीं पैर भारी और तेरअ हणअ एक शोहरू; और तूह डाहै तेऊ नांअ "यीशू"। 32 सह हणअ महान; और सह हणअ परम परधान परमेश्वरो शोहरू। प्रभू परमेश्वरा दैणअ बाब-दादैं राजे दाऊदो सिंहासन तेउलै; 33 और तेऊ करनअ ईजराइले घराने दी सदा राज, और तेऊए राज निं कधि खतम हणअ।" 34 मरियमैं स्वर्गदूता लै बोलअ, "इहय किहै करै सका हई? हूँ ता कसा मरधा जाणदी बी निं आथी?" 35 स्वर्गदूतै तेसा लै बोलअ कि "ताल्है एछणअ पबित्र आत्मां और परम प्रधान परमेश्वरे सामर्थ रहणीं ताह संघै। जुण सह पबित्र शोहरू पैदा हणें आळअ आसा, तेऊ लै बोळणअ परमेश्वरो शोहरू। 36 भाळै, तेरी मसेरी बैहण इलिशिबा सोभ जाणा तै कि सह आसा बांझ; एभै आसा तेसरअ छऊअ भिनअ लागअ द। 37 परमेश्वरा लै निं कोई बी गल्ला मुशकळ आथी। 38 मरियमैं तेऊ लै बोलअ, "भाळ, हूँ आसा प्रभूए भगतण, जिहअ तूह बोला तिहअ ई लोळी मुल्है हुआ।" तेखअ हुअ स्वर्गदूत तिधा का लोप।

### मरियमों इलिशिबा सेटा मिलदै नाशणअ

39 संघा तिन्नाई धैळै मरिअम उड्डुई और सह नाठी सराजा दी यहूदे एकी नगरी लै। 40 जांऊ सह जकरयाहे घरे पुजी और तेसा इलिशिबा लै नमस्ते किय, 41 ता जेसा घळी इलिशिबा मरिअमैं नमस्ते शुणीं, ता तेसाई घळी तेसे पेटै लागअ शोहरू हिलदअ चुकदअ और इलिशिबा भरुई पबित्र आत्मां करै। 42 ता तेसा ज़ोरै लैळ पाई करै बोलअ, "तूह आसा सोभी बेटळी दी धनबान और तेरे पेटो फळ बी आसा धनबान, 43 और मेरै ईयां भाग किधा का खुल्है कि मेरै प्रभूए आम्मां आई मुँह सेटा लै? 44 भाळ मरिअम, जांऊ तंरें मुल्है नमस्ते की, और सह बोल जांऊं मेरै कानै पुजअ ता तेसाई घळी लागअ मेरै पेटै शोहरू खुशी-खुशी हिलदअ चुकदअ। 45 भागा आळअ आसा सह जुणीं एसा गल्ला विश्वास किय कि जुण गल्ला प्रभूए तरफा का बोली ती, तियां ह्नीं पूरी।"

### मरियमों स्तुति भजन

46 तैबै मरिअमैं बोलअ, "मेरअ प्राण करा प्रभूए जै-जैकार, 47 और मेरी आत्मां हुई मोक्ष दैणें आळै परमेश्वरा करै खुश। 48 किल्हैकि तेऊ दैनी मेरी भलाई दी नजर और तैहीता भाळा, एभा पोहीं जुगे-जुगे लोगा बोळणअ मुल्है भागा आळी। 49 किल्हैकि तेऊ सर्वशगतिमान परमेश्वरै किये मुल्है बडै-बडै काम और तेऊओ नांअ आसा पबित्र; 50 और तेऊए दैया ह्आ तिन्नां लै जुण तेऊए डरा हेठै रहा, और सह दैआ रहा पोस्ती दर पोस्ती बर्णीं। 51 तेऊ रैहैऊअ आपणीं बाहो बल और जुण आपणै आप बडअ समझा तै तियां दळाऊए तेऊ साते बातै। 52 तेऊ शोटै बलबान राजगादी का धरनीं; और दिन दुखी कियै बडै। 53 भुखे दैनें तेऊ शोभली-शोभली गल्ला करै रजैऊई और धनबान काढै छुछै हाथे दळाऊई। 54 आपणै सेऊआकार इस्त्राएले की तेऊ हेर सभाळ कि सह तेऊए दैया आद डाहे; 55 जुण आबराहमा और तेऊए खानदानी दी हमेशा रहणीं और जिहअ तेऊ म्हारै बाब दादैं का बोलअ त।" 56 मरिअम रही चीई भिनै तेसा सेटा और तेता बाद आई सह घरा लै बापस फिरी।

### यहूना बपतिस्मैं दैणें आळैओ जल्म

57 तैबै इलिशिबे सुणें धैळै आरे और तेसरअ हुअ एक शोहरू। 58 जांऊं तेसरै संघी-साथी और पडोसी शुणअ कि परमेश्वरै की तेसा लै दैया और तेसरअ हुअ शोहरू; ता तियां बी हुए बडै भारी खुशी। 59 तेखअ हुअ इहय कि आतुरे धैळै नियं आपणअ शोहरू तिन्नें खतनै करना लै; ता तिन्नें लाअ त तेऊओ नांअ तेऊए बाप्पू जिहअ जकरयाह डाही पर 60 इलिशिबा बोलअ इहय कि एऊ शोहरूओ नांअ डाहणअ यहूना। 61 तिन्नें होरी बोलअ तेसा लै इहय कि तेरी खानदानी निं इहय नांअ कोहीओ आथी? 62 तैबै तिन्नें तेऊ

शोहरूए बाप्पू का शारै करै पुछअ कि किहअ करनअ? 63 कि तूह एऊओ नांअ के चाहा डाहणअ? तैबै तेऊ तिन्नां का लिखणें तगती शदाऊई और लिखअ कि एऊओ नांअ आसा यहूना, और तियां सोभ हुए रहैण। 64 ता तेऊओ मुँह और जिभ खुल्ही नडैऊए ता सह लागअ गल्ला-बाता करदअ और परमेश्वरे जै-जैकार करदअ। 65 ता तेऊए ओरी-पोरी रहणें आळै सोभी पळअ हैळअ तियां गल्ला फैली तेसी बाती सारै यहूदिया देशे सारै सराजै। 66 ईयां गल्ला जुणीं बी शुणीं तियां लागै आपणें मनै बचार करी करै बोलदै कि अह शोहरू किहअ हणअ? किल्हैकि एऊ परदै आसा परमेश्वरो हाथ।

### जकरयाहो स्तुति भजन

67 ता तेऊ शोहरूओ बाप्पू जकरयाह भरुअ पबित्र आत्मां करै और सह लागअ भविश्याबाणीं करदअ कि

68 "प्रभू, इस्त्राएले परमेश्वरा लै धन्य, कि तेऊ दैनी आपणें लोगा लै नजर और तिन्नां लै दैनअ छुटकारअ;

69 और आपणें सेऊआकार दाऊदैं खानदानिं दी काढअ एक मोक्ष दैणें आळअ शींग।

70 जिहअ तेऊ आपणें पबित्र भविश्याबाणीं करनै आळै का जुण एऊ संसारे शुरुआता का ई बोळदै आसा तै लागै दै, तिन्नां का खोजअ।

71 मतलब, म्हारै बैरी का, और म्हारै बैरीए हाथा का दैनअ हाम्हां लै छुटकारअ,

72 और म्हारै बाब दादैं लै दैआ करी करै आपणअ पबित्र बाईदअ डाहअ आद।

73 ता सह बचन जुण तेऊ म्हारै बाप्पू अब्राहमा लै दैनअ त;

74 कि तेऊ दैणअ हाम्हां लै इहय कि हाम्हें आपणै दुशमणें हाथा का छुटी करै

75 तेऊ सहनै पबित्र धर्मीं और बिणा कोई हैळै फिकरै तेऊए सेऊआ टैहल करदै रहे।

76 और तूह हे बेटैआ, तूह हणअ परम प्रधान परमेश्वरो भविश्याबगता, किल्हैकि तूह हांडणअ प्रभूए बाता ठीक करदअ तेऊ आजू-आजू;

77 ताकि तूह तेऊए लोगा लै मोक्षो ज्ञान दैई सके, जुण तिन्नें पाप क्षमा हई करै भेटणअ।

78 अह हणअ परमेश्वरे बडी दैया और करुणा करै; जहा करै उपरा का हाम्हां लै दोतकअ प्रैशअ निखळणअ कि

79 न्हैरै और मौतै छैली दी बेटणै आळै लै प्रैशअ होए; और म्हारी खूरे गंई सरली और बाता दी सीधी बशैले।"

80 इहय करै सह शोहरू लागअ बढदअ और आत्मा दी लागअ बलबान हंदअ और इस्त्राएल देशै प्रगट हणै का पैहलै तैणीं रहअ सह बर्णे बूटै उजाळ जैगा।

### यीशूओ जल्म

(मत्ती 1:18-25)

2 तिन्नां धैळै दैनीं राजे अगस्तूस कैसरै ऐही आज्ञा कि सारै दैशे लोगे नांअ करा दर्जा। 2 अह ती दुनियां दी पैहली नांअ लखाई जुण तेऊ जमानै हई, जधू क्विबिरिनिउस सुरिआ देशो मुखिय थिय। 3 और सोभ लोग नाठै नाऊआ दरज करदै आपणीं-आपणीं नगरी लै। 4 और एते तैणीं नाठअ युसुफ बी किल्हैकि सबी त दाऊदे खानदानी का। और सह गलीले नासरत नगरी का यहूदिया देशै दाऊदे नगरी बेतलेहमा लै नाठअ कि 5 आपणीं हणें आळी लाळी मरिअम, जसा संघे बरनी लाई दी आसा नांअ दरज करी सके। 6 और तेसरै तिधी रहंदी हुए मरिअमैं सुणें धैळै पूरै और 7 तेसा दैनअ आपणें जेठै शोहरू लै जल्म और तेसा सह झिकळै दी पळेटअ और तेसा डाहअ सह डागेए घाह खेऊणें चराठी भितरी किल्हैकि तिन्नां निं सरांई भितरी रहणा लै जैगा भेटी ती।

### स्वर्गदूतों फुआला लै फेळअ

8 और तेऊ देशै तै कई गुआळै फुआल और तियां हआ तै राची आपणीं भेडा बाकरीए छुंडा पहरी दहळै सुतै दै। 9 और प्रभूओ दूत आअ और तिन्नां सेटा खहळुअ ता प्रभूओ झलकार (चमकदअ प्रेशअ) चमकअ तिन्नां फेर ता तियां सोभ हैळुए। 10 और तैबै स्वरगदूतै तिन्नालै बोलअ कि, "उरा निं आथी, भाळा, तम्हां का लाअ मंए खुशीओ समाचार खोजी। अह समाचार हणअ सारी दुनिये लोगा लै खुशी दैणै आळअ। 11 आज्ञा हुअ दाऊदे नगरी तम्हां लै मोक्ष दैणै आळैओ जल्म, और अहैई आसा मसीह पबित्र प्रभू। 12 और तेऊए बछेण आसा एही कि सह भेटणअ तम्हां डागै-धणा लै घाह खैऊणै चराठी भितरी झिकळै दी पळेटअ द।" 13 और तेसाई घळी हेरा हेरी तिधी धेछुअ तिन्नां का स्वरगदूतो एक छुंड तिन्नां का परमेश्वर जै-जैकारा करदी इहय बोलदअ कि

14 "सरगै हुई परमेश्वर महिमां धरती दी जुण मांळू तेऊ करै खुश आसा, तिन्नां शांती होए।"

15 जांऊं स्वरगदूत तिन्नां सेटा का बापस स्वरगा लै नाठै; ता तिन्नां गुआळै फुआलै आप्पू बिचै गला की कि, "चाला हाम्हां सोभी नाशणअ बेतलेहमा लै और जुण गल हाम्हां का प्रभू खोजी, तेसा एछमै हाम्हें भाळी।" 16 और तियां नढैऊए नाठै और मरियम युसुफा संघें भाळअ तिन्नां सह शोहरू चराठी दी डाहअ द। 17 तिन्नां भाळी करै तिन्नां सह गल प्रगट की जुण तिन्नां का तेऊ शोहरूए बारै बोली ती। 18 और सोभी शुळणै आळै हूए इन्नां गला शुणीं करै रहैण जुण तिन्नां गुआळै फुआलै तिन्नां सोभी का खोजी। 19 पर मरिअमै डाही ईयां गला आपणै मनै और सह लागी आपणै मनै सोचदी। 20 और तियां गुआळै फुआल तिहअई शुणीं और भाळी करै परमेश्वर भजन और जै-जैकार करदी फिरै बापस।

### यीशूओ नांमकरण

21 जांऊं आठ धैळै पूरै हूए और तेऊए खतनै करनैओ धैळअ आअ, ता तिन्नां डाहअ तेऊ नांअ यीशू, जुण स्वरगदूते तेसा का शोहरू पेटै एछणै का पैहलै खोजअ त।

### मांदरै यीशूओ अर्पण

22 और जांऊं मूसै बिधि बधाने साबै शुचै हणैए धैळै पूरै हूए ता एता बाद नियं तिन्नां सह येरुशलेमा लै ताकि तियां प्रभूए सन्ननै तेऊ आणीं सके। 23 जिहअ कि प्रभूए बिधि बधाना दी लिखअ द आसा कि, "हरैक जेतअ शोहरू हणअ प्रभू लै पबित्र।" 24 और प्रभूए बिधि-बधाने साबै एक पालळीओ जोळअ, नाई ता पालळीए दूई बचै लागणै आळणै जरूरी।

### शमौने गिह

25 और येरुशलेमै थिय एक शिमोन नांऊंओ मांळू और सह त बडअ धरमीं और भलअ भगत आदमीं, और सह हआ त इस्त्राएले शांती न्हैळअ लागअ द और तेऊ दी त पबित्र आत्मां। 26 और तेऊ लै थी पबित्र आत्मां का चतैनगी भेटी दी कि जेभै तैणीं तूह मसीह भाळी निं लए, तेभै तैणीं निं तूह मरनअ आथी, 27 और सह आअ आत्मां दी भरुई करै मांदरा लै और जांऊं आम्मां-बाप्पू सह शोहरू भितरा लै आणअ कि बिधि-बधाने साबै तेऊलै तियां करे, 28 और तेऊ सह शोहरू आपणै भोसळै ढाकअ और परमेश्वरो धन्याबाद करी करै बोलअ कि,

29 "हे मालक, एबै दै आपणै सेऊआकारा लै तूह आपणै बचनै साबै शांती संघें बिदाई,

30 किलहैकि मेरी आच्छी हेरअ तेरअ मोक्ष भाळी,

31 जुण तंए सोभी देशा सन्ननै तैर किय द आसा कि,

32 होरी सोभी ज़ातीए लोगा लै प्रेशै दैणैए तैणीं तेरी आपणीं परज्जा इस्त्राएलीए महिमा हई सके।"

33 और तेऊ शोहरूए आम्मां बाप्पू जुण इन्नां गला शुणां तै तियां हआ तै रहैण जुण तेऊ शोहरूए बारै दी हंदी ती लागी दी। 34 और एता बाद शिमौने

तिन्नां लै आशिरबाद दैनअ और शोहरूए आम्मां मरिअमा लै बोलअ, "हेर, अह शोहरू आसा ईसराले कई लोगा लै बधळणै और उझणै और ईहै चिन्हां लै टांकअ द, जस्रै खलाफ बरोधा दी कई गला हणीं। 35 इधी तैणीं कि तेरी आत्मां बी भेदणीं तलबारा करै आर-पार - एता करै हणै कईए दिले बचार प्रगट

### हन्नाहे ग्वाही

36 और अशेरे गोत्रा का ती एक हन्नायाह नांऊंए फनुअले शोहरी भबिश्याबाणीं करनै आळी और सह ती खासी बुढळी बी गई दी हई और सह रही ती तेसरै बैहा हणै का बाद साताई साला आपणै लाळै संघै। 37 सह ती चरैसी साला ओही बिधबा और सह रहा ती मांदरै ई और ब्रत और प्राथणा करी करै रहा ती राची धैळी भगती करदी लागी। 38 और सह बी तेसा घळी तिधी एछी करै लागी परमेश्वर धन्याबाद करदी और तिन्नां सोभीए बारै लागी बोलदी जुण येरुशलेमै छुटकारै न्हैळै तै लागै दै, तेऊ शोहरूए बारै गला करदी लागी।

### नासरता लै बापस नाशणअ

39 जांऊं तियां बिधी-बधाने साबै सोभ गला नबटाऊई मुकै ता तेता बाद नाठै तियां गलीले देशै आपणीं नगरी नासरता लै।

40 और शोहरू लागअ बढदअ और बलबान हंदअ और बुधी दी लागअ परिपूरण हंदअ और परमेश्वरो जश त तेऊ दी।

### शोहरू यीशू मांदरै

41 और तेऊए आम्मां-बाप्पू करा तै हर साल फसहे जाचा लै येरुशलेमा लै नाशी। 42 जांऊं सह बाराह बरशो हुअ, और तियां नाठै पबै रिति रबाजे साबै येरुशलेमा लै और 43 तियां तिन्नां धैळै पूरै करी करै बापस फिरदै लागै ता सह शोहरू रहअ येरुशलेमै ई और तेऊए आम्मां-बाप्पू का निं थोघै कि सह किधी आसा। 44 तिन्नां ज़ाणअ ईहअ कि सह हणअ होरी मसाफरा संघै आजू-आजू पर एकी धैळीए डेरै पाणै का बाद लागै तियां सोभी ज़ाणै-बछेणै और टबरा पुछदै और तेऊ लोळै। 45 पर जांऊं सह नाई भेटअ ता तियां आपे लोळदी-लोळदी येरुशलेमा लै बापस फिरी और 46 चिई धैळै बाद भेटअ तिन्नां सह मांदरै उपदेशा दैणै आळै बिचै बेटअ द और सह त तिन्नां गला शुणअ और तिन्नां का सुआला करदअ। 47 और जेतरे बी तेऊ शूणै तै लागै दै, तियां हूए तेऊए समझ और तेऊए उत्तरा शुणी रहैण। 48 इहय भाळी करै हूए तेऊए आम्मां-बाप्पू बी रहैण और तेऊए आम्मां मरिअमे बोलअ कि, "आरा बेटैआ, तंए किलहै किय हाम्हां संघै इहय? हूँ और तेरअ बाप्पू थकै ताह लोळी-लोळी?" 49 तेऊ तिन्नां लै बोलअ, "तम्हें मूँह लोळै किलहै लागै? तम्हें इहय निं ज़ाणदै कि मूँह आसा आपणै बाप्पूए भबना दी रहणअ जरूरी?" 50 पर जुण अह गल तेऊ तिन्नां का बोली, तिन्नां निं अह समझी। 51 तेखअ नाठअ सह तिन्नां संघै और नासरथै पुजै और सह रह तिन्नां साबै तिधी और तेऊए आम्मां डाही ईयां गला आपणै मनै

52 और प्रभू यीशू मसीह डील-डौल और परमेश्वर और मांळूरे जशा दी लागअ बढदअ।

### यहन्ना बपतिस्मै दैणै आळैओ संदेशअ

(मत्ती 3:1-12; मरकुस 1:1-8; यहन्ना 1-1-28)

3 तिबरिउस केसरे राजा दी पंद्रउई बरशा दी जांऊं पुंतिउस पिलातुस यहूदिया देशो हाकम थिय और गलीलै त हेरअदेस चौथाई देशो राजअ इतुरैईआ, और तरखोनिसिसे त तेऊओ भाई फिलिप्पुस और अबिलेना दी त लिसानिआस चौथाई देशे राजै। 2 और जधू हन्ना और कैफा माहायाजके पदबी दी थिये, तिन्नां धैळै परमेश्वरो बचन यहन्ना सेटा पुजअ। 3 और यहन्ना लागअ जरदण नदी आर-पार लोगा लै पाप माफी और मना बढळणैओ बपतिस्मैओ परचारा करदअ। 4 जिहअ याशायाह भबिश्याबाणीं करनै आळै बोलदै बचने कताबा दी लिखअ द आसा कि,

“बणै बुटै उजाळ जैगा दी आसा लागअ द एक हाका लांदअ कि प्रभूए बात बणांआ, और

तेऊए सळका करा सिधी।

5 हरेक नाळ खोहळ भरनै और सोभ धारा-धारटी ढोळणीं गोधै; और जुंण कुण्ळअ

आसा सह करनअ सिधअ और

जुंण उछटअ-निंऊंअ आसा

सह बणाणअ चकोर रसतअ।

6 हरेकी प्राणीं भाळणअ परमेश्वरो मोक्ष।”

7 और लोगे छुंड ई छुंड एछा तै तेऊ सेटा लै बपतिस्ममें लंदै और सह बोला त तिन्नां का इहय कि, “हे शपैळ शोहरुओ, तम्हां का इहय कुणीं हेरअ खोजी कि आजू एछणें आळी बिबती का भागा? 8 मना बदळणें जोगी फळ ता आणा और आपणें-आपणें मनै इहय निं सोचा कि म्हारअ बाब दादअ आसा अब्राहम। हूँ बोला तम्हां का इहय कि परमेश्वर सका इन्नां पाथरा का बी अब्राहमा लै शोहरु पैदा करी। 9 और ऐबे आसा हेरअ द खराळअ पेळे गोधै लाई और जुंण पेळ रांबळअ फळ नाई दैआ सह पाणअ काटी दहणा लै।

10 तैबे लोगे यहूना का पुछअ कि तै हाम्हां किजै लागणअ करनअ? 11 तेउ तिन्नां लै उत्तर दैनअ कि जहा का दुई कुरतै आसा सह दैआ एक कुरतअ तेऊलै जसा का नाई आथी और जसा का रोटी आसा सह बी करा इहय ई।

12 और कारै चुंगी गराहणें आळै बी आरे तेऊ सेटा लै बपतिस्ममें लंदै और तेऊ का पुछअ कि हे गुरु, हाम्हेँ कै करमै? 13 तेउ तिन्नां लै बोलअ कि जुंण तम्हां लै मांगणें लै बोलअ द आसा तेता का खासअ निं मांगी आथी। 14 और सपाही बी तेऊ सेटा एछी करै पुछअ कि हाम्हेँ कै करमै? और तेऊ तिन्नां लै बोलअ कि कोई लै थोघै बाझी कूट मार करी और ना कसा लै झूठअ दोष लाई और आपणीं मजदूरी दी डहै संतुष्टी।

15 और सोभी लोगा ती आशा और तियां सोभ तै आपणें-आपणें मनै यहूने बारै सोचदै लागे दै कि अहैई किन्नीं आसा मसीह? 16 और यहूने तिन्नां लै उत्तर दैनअ कि “हूँ ता दैआ तम्हां लै पाणीं करै बपतिस्मअ; पर सह आसा एछणें आळअ जुण मुखा शक्तीमान आसा और हूँ नि तेऊ सेटा एता जोगी बी आथी कि तेऊए बूटै तस्मै खोल्ही सकै। तेऊ दैणअ तम्हां लै पबित्र आत्मा और आगी करै बपतिस्मअ। 17 तेऊओ शूप आसा तेऊए हाथै और तेऊ शुहणअ आपणअ खहळ झाळी करै और गिहूँ करनै तेऊ आपणें भडारै कठा और भुखलअ पाणअ तेऊ आगी दी दहई जुंण आग कधि निं हिशणी।”

18 और सह कई शिक्षा दैई करै रहअ लोगा समझाऊंदअ लागी और लोगा लै सुसमाचारा शणाऊंदअ लागी। 19 पर तेऊ चौथाई देशे राजै हेरोदेसा लै तेऊए भाईए बेटळी हेरोदिआसे बारै और सोभ कुकरम जुंण तेऊ राजै कियै तै, तेता लै बोलअ कि ईयां आसा गलत। 20 और हेरोदेसै किये तेता का बी जादअ कुकरम कि यहूना पाअ जेह्खानै दी।

### यीशूओ बपतिस्मअ

(मत्ती 4:1-11; मरकुस 1:12,13)

21 जाऊं सोभी लोगे बपतिस्मअ लअ और प्रभू यीशू बी त बपतिस्ममें का बाद प्राथणा करदअ लागअ द और हेरा-हेरी सरग खुलअ और 22 पबित्र आत्मां उतरअ तेऊ परेंदै कबूतरे रूपे और एही आकाशबाणीं हुई: “कि तूह आसा मेरअ प्यारअ शोहरु और हूँ आसा ताखा खुशा।”

### यीशूओ खानदान

(मत्ती 1:1-17)

23 जाऊं यीशू आप्पू बी उपदेशा दैंदअ लागअ, ता तेऊए अमर ती कोई तिहा साले जिहअ समझा तै कि सह त यसुफो शोहरु और यसुफ त एलीओ शोहरु। 24 और सह त मत्तातो और सह लेबीओ और सह मलकिओ और मलकी यन्ना और सह यसुफो 25 और सह मतिंयाह और सह आमोस और सह नहूम और नहूम त अस्ल्याहो शोहरु और सह नोगहो 26 नोगह त मातो और सह त मतिंयाहो और सह त शिमिओ और सह त योखेसो और सह त योदाहो 27 और सह त यहूनो और सह त रेसा और सह त जरूब्बाबिलो और सह त शलतिएल और सह त नेरीओ। 28 और सह त मलकिओ और मलकी

त आदीओ शोहरु और आदी त कोसामों और सह त इलमोदामो और सह त एरो शोहरु। 29 एर त येशूओ और सह त इलाजारो और सह त योरीमो और सह त मतातो और सह त लेबीओ शोहरु। 30 लेबी त शमौनो और सह त यहूदाहो और सह त यसुफो और सह त योनानो शोहरु और सह त इल्याकिमो शोहरु 31 और सह त मलेआह और सह त भिन्नाहो और सह त मत्तातो और सह त नातानो और नातान त दाऊदो शोहरु। 32 दाऊद त यिशैओ शोहरु और सह त ओबेदो और सह त बोअजो और सह त सलमोनो शोहरु और सह त नहशोनो। 33 नहशोन त अम्मीनादाबो और सह त अरनीओ और अरनी त हिसरोमो शोहरु और सह त फिरिसो और सह त यहूदाहो शोहरु। 34 और सह त याकुबो शोहरु और सह त इसहाको शोहरु और इसहाक त इबराहिमो शोहरु और सह त तिरहो और सह त नाहोरो शोहरु। 35 नाहोरो त सरुग और सह त रऊओ और सह त फिलिगो और सह त एबिर और सह त शिलोहो 36 और सह त केनानो और सह त अरफजदो और सह त शेमओ और सह त नूहो शोहरु और सह त लिमिको शोहरु। 37 लिमिक त मथूशिलोहो और सह त हनोको और सह त यिरिदो और सह त महलेल और महलेल त केनानो शोहरु। 38 सह त एनोशो और एनोश शेतो और सह त आदमो और आदम त परमेश्वरो।

### यीशूए परिक्षा

(मत्ती 4:1-11; मरकुस 1:12,13)

4 तेखअ प्रभू यीशू मसीह पबित्र आत्मा करै भरुअ और जरदण नदी का नाठअ बणें उजाळ जैगा लै और चाहळी धैळै तैणीं रहअ पबित्र आत्में साबै जंगलै हांडदअ लागी। 2 शैतान रहअ तेऊ परखदअ लागी और तिन्नां धैळै निं प्रभू किछै बी खाअ ना पीय और जाऊं चाहळी धैळै पूरे हुए ता तेऊ आई भुखै। 3 और शैताने प्रभू लै बोलअ कि, “जै तूह परमेश्वरो शोहरु आसा ता तै बोल एऊ पाथरा लै कि रोटी बण।” 4 प्रभू यीशू तेऊ लै उत्तर दैनअ कि, “पबित्रशास्त्रा दी आसा लिखअ द कि मांहुँ निं सिधअ रोटी करै जिऊंदअ आथी।” 5 तैबै शैताने प्रभू यीशू नियं और घळी भर सारै संसारो राज रहैऊअ, 6 और तेऊ प्रभू यीशू लै बोलअ कि, “इन्नां सोभी गल्लो हक और सुख बिलास दैणअ मूह ताल्हेँ किल्हेँकि अह आसा मेरै कब्जै दी और जसा लै हूँ चाहा तेऊ लै दैआ हूँ। 7 जै तूह मुल्हेँ ढाल करे ता तै हणीं ईयां सोभ गल्ला तेरी।” 8 प्रभू यीशू तेऊ लै उत्तर दैनअ कि, “पबित्रशास्त्रा दी आसा लिखअ द कि तूह निं आपणें प्रभू परमेश्वरा छाडी नी होरी लै ढाल करी और सिधी तेऊए भगती करै। 9 तैबै तेऊ प्रभू यीशू मसीह येरुशलैमा लै नियं और मांदरे पुंडरी परेंदै खळअ किय और प्रभू लै बोलअ, “जै तूह परमेश्वरो शोहरु आसा तै पळ इधा का ढेका, 10 किल्हेँकि शास्त्रा दी आसा लिखअ द कि तेऊ छाडणै स्वर्गदूत ताह बचाऊंदै, 11 और तिन्नां चकणअ तूह हाथों हाथ, ताकि इहय निं हआ कि तेरै पैरै ठोहळ लागे।” 12 यीशू तेऊ लै उत्तर दैनअ कि शास्त्रा दी आसा इहय बी लिखअ द कि, “तूह निं आपणें प्रभू परमेश्वरा परखदअ लागी।” 13 और जाऊं शैतान सोभी गल्ला परखी मुकअ और थोळी घळी लै नाठअ सह यीशू सेटा का दूर।

### यीशूए सेऊआ चाकरीए शुरुआत

(मत्ती 4:12-17; मरकुस 1:14,15)

14 और प्रभू यीशू मसीह आत्में जशा दी भरुई करै आअ गलीला लै बापस और तेऊए चरचा फैली ओरी-पोरी सारै देशै। 15 और सह रहअ तिन्नेई आराधना सभा घरा दी उपदेशा दैंदअ लागी और सोभ करा तै तेऊए सराहणा।

### नासरतै यीशूओ अनादर

(मत्ती 13:53-58; मरकुस 6:1-6)

16 तेखअ आअ यीशू नासरथा लै जिधी सह धाचअ पाळअ द थिय और आपणें रीती रबाजे साबै सबते धैळी आराधनालै दी बचना पहळदअ खळअ हुअ। 17 और तेऊ लै दैनी याशायाह भबिश्यबागते कताब पहळणा लै और तेऊ कताब खोल्ही करै सह बरकअ काढअ, जिधी इहय त लिखअ द कि,

18 “प्रभुओ आत्मां आसा मूँह दी तै कि तेऊ कंगाळा लै सुसमाचार शणांरंगा लै मेरअ अभिषेक किय और हूँ आसा भेजअ द एते तैणीं कि गुलामा लै छुटकारेओ और काणें लै आच्छी धेछणेंओ सुसमाचार शणांरं और दाबै दै छडैऊं,

19 और प्रभू खुश रहणेंओ परचार करुं।” 20 तैबै तेऊ कताब बंद करी करै सेऊआकारे हाथे दैनी और आप्पू बैठअ। ता आराधनालै दी बेठै दै सोभ लोग लागै तेऊ भाळै। 21 तैबै तेऊ तिन्ना लै बोलअ कि, “आझ हूअ अह लिखअ द तम्हां सझनै पूरअ।” 22 और सोभी जहँ सराहअ सह और जुण जशा आळी गल्ला तेऊए मुंहा का निखळा ती तेता शुर्णी हआ तै तियां रहैन और तियां लागै इहय बोलदै कि, “अह ता यूसुफो शोहरु निं आथी?” 23 तम्हां बोळणीं मुल्है अह कहाबत कि “बैद, तूह आपणै आप हअ रांबळअ, जुण हाम्हें शुणअ कि कफरनहूमें किय, तिहअ कर इधी आपणै देशे बी।” 24 और तेऊ तिन्ना लै बोलअ कि, “भबिशयाबगता निं आपणें देशे आदरमान भेटदअ।” 25 “हूँ खोजा तम्हां का सझाई कि एलिया नबीए जमाने जधू साढै चीई बरशा सरग बंद रहअ त, और इधी तैणीं कि सारै देशे पळअ त नकाळ और इस्त्राएला दी थी कई बिधबा। 26 पर एलिया निं तिन्नां मांझै कोही सेटा लै भेजअ, पर सैदा देशे सारपत गरांऊरें बिधबा सेटा भेजअ। 27 और एलिया भबिशयाबगते जमाने तै इस्त्राएला दी बडै भारी कोहळी, पर नामान सुरयानी कोहळी छाडी निं होर कोहै तिन्नां बिचै रांबळअ किय।” 28 इन्नां गल्ला शुंळदी ई तिधी बेठै दै आराधनाघरै हुऐ सोभ रोशै दी लाल पिंऊळै। 29 और तिन्नां काढअ प्रभू यीशू मसीह नगरी बागै और जेसा धारा दी तिन्नां नगरी बसी दी थी, तिन्नां निय सह तेसा धारे चुंडी परैदै ढेका शोटणा लै; 30 पर प्रभू नाठअ तिन्नां बिचा का दूर,

### दुष्टात्मां शाचअ आदर्मी ठीक करनअ

(मरकुस 1:21-28)

31 तेखअ नाठअ सह गलील देशे कफरनहूमें नगरी लै और सबते धैळी लागअ लोगा लै उपदेशा दैदअ। 32 और लोग हुऐ तेऊए उपदेशा शुर्णी रहैन, किल्हैकि तेऊए बचन हआ तै पूरे अधिकारा सघै। 33 और आराधनालै दी त एक इहय आदर्मी तेऊ दी थी दुष्टात्मां और 34 सह लागअ जोरै-जोरै लैळा लांदअ कि, “हे यीशू नासरी, हाम्हां ताह संघे कै काम? हूँ जाणा कि तूह किजै आसा? तूह आसा परमेश्वरो पबित्र आदर्मी।” 35 यीशू लागअ तेऊ नैरदअ कि, “चुप्पी रह, और एऊ आदर्मी का निखळ पोर्णी।” तैबै तेसाई घळी तेऊ आदर्मी का निखळी दुष्टात्मां तेऊ धरनीं बदळी करै बिणा कोई नकसान करी करै पोर्णी। 36 एऊ चमतकारा भाळी हुऐ सोभ रहैन और तियां लागै आप्पू मांझै गल्ला करदै कि “अह किहअ बचन आसा कि अह काढा बडै अधिकार और शगती करै दुष्टात्मां और भूता-परेता दरळाऊई और तियां निखळा? 37 और चऊ दिशा मची एसा गले धूम।

### पतरसे शाशू और कई लोग बमारी का ठीक करनै

(मत्ती 8:14-17; मरकुस 1:29-34)

38 तैबै यीशू आराधनालै का उझुअ और नाठअ शिमोने घरा लै और शिमोने शाशूई त जूर आअ द और तिन्नां की तेसा लै अरज कि हे प्रभू एसरअ जअर कर दूर, 39 और तेऊ तेसा सेटा खट्खूई करै जरा लै एक झाल काढी और जअर नाठअ दूर और सह हुई तेसाई घळी राम्बळी और सह लागी सेऊआ टैहली करदी।

40 सुरज जुबी करै जसा-जसा घरै लोग कई बमारी दी जुबै दै थियै; तिन्नां आणें तियां सोभ तेऊ सेटा लै और यीशू तिन्नां सोभी लै एक-एक करी करै तिन्नां दी हाथ लाअ और तियां सोभ हुऐ राम्बळै। 41 और कई दुष्टात्मां भागी लैळा लांदी-लांदी और इहय बोलदी कि तूह आसा परमेश्वरो शोहरु और प्रभू यीशू मसीह करा त तिन्नां झाहळ काढी चुप्पी और तिन्नां निं दैदअ त बोळणें, किल्हैकि तियां जाणा तै कि अह आसा मसीह।

### आराधना घरै प्रचार करनअ

(मरकुस 1:35-39)

42 जांऊं दुजी धैळी हुई ता प्रभू तिधा का नाठअ एक जंगली जैगा लै और लोगे कई छुंड आए प्रभू यीशू सेटा लै और तियां लागै तेऊ रोकदै कि हाम्हां सेटा का नि दूर नाशै। 43 पर प्रभू यीशू तिन्नां लै बोलअ कि मूँह आसा होरी नगरी बी परमेश्वरे खुशखबरी शणांरणीं जरूरी; किल्हैकि हूँ आसा एतेई तैणीं भेजअ द। 44 और एता बाद प्रभू रहअ गलीले आराधनालै दी परचारा करदअ लागी।

### पैहलै चेलै शदणें

(मत्ती 4:18-22; मरकुस 1:16-20)

5 जांऊं इयां गल्ला हई मुकी और लोग पळा तै चुटी परमेश्वरे बचन शणुदै। प्रभू यीशू त गन्नेसरत दरैऊए कनारै खट्खूअ द और इहय हुअ कि; 2 तेऊ भाळी दरैऊए कनारै दुई किशती खट्खूई दी और तियां माहछली ढाकणें आळै तै किशती का होथी करै लागै दै ज़ाळा धोंदै। 3 तिन्नां किशती मांझै एकी किशती दी, जुण शमोन पतरसे थी, प्रभू यीशू बैठअ तेथ दी और प्रभू बोलअ तेऊ लै इहय कि एसा किशती निंऊं कनारै का धख पाणीं बिचा लै और तेखअ लागअ तेसा किशती परैदा का तिन्नां लोगा लै उपदेशा दैदअ। 4 जांऊं सह गल्ला करी मुकअ, तेखअ प्रभू शमोना लै बोलअ कि; “किशती निंऊं दुधै पाणीं बिचा लै और माहछली ढाकणा लै पा आपणअ ज़ाळा।” 5 शमोने प्रभू लै बोलअ कि, “हे प्रभू, हाम्हें की सारी राची बडी भारी मैन्थ पर हाम्हां निं किछे बी भेटअ! पर जे तूह बोला, तै पाणअ मूँह ज़ाळा।” 6 तैबै तिन्नां जिहअ ई बोलअ तिहअई किय और तिन्नां ज़ाळा दी शाची बडी भारी माहछली और तिन्नां ज़ाळा चालै धेळुई; 7 और तिन्नां शदें आपणें होर बी साथी ज़ाळा खिचदै जुण दुजी किशती दी थिये; और तिन्नां भरी दुई किशती एही कि किशती बी चाली पाणीं दी जुबी। 8 एता भाळी शमोन पतरसे प्रभू यीशूए पारै पळअ और बोलअ, “हे प्रभू, हूँ आसा पापी माळुं मूँह सेटा का नाश दूर।” 9 किल्हैकि एतरी माहछली ढाकणां लै हुऐ तियां सोभ जहँ रहैन 10 और तिहअई जब्दीए शोहरु याकुब और यहूना जुण शमोने साथी तै; तियां बी हुऐ रहैन और तेखअ प्रभू यीशू शमोना लै बोलअ, “उरै निं आथी, एभा पोर्णी ढाकणें ताह जिऊंदै माळुं। 11 और तिन्नां आणीं किशती कनारै लै और सोभ गल्ला छाडी लागै तियां प्रभू यीशू मसीह संघे हांददै।

### कोहळे बमारी आळअ ठीक करनअ

(मत्ती 4:1-4; मरकुस 1:40-45)

12 जांऊं प्रभू यीशू मसीह एकी नगरी थिय, तिधी आअ एक कोहळे बमारी आळअ मांझुं और सह पळअ प्रभू यीशू भाळी उटी बाखा और तेऊ की एही अरज कि “हे प्रभू, जे तूह चाहे, ता तै सका तूह मूँह राम्बळै करी।” 13 प्रभू यीशू आपणअ हाथ आजू किय और बोलअ कि, “हूँ चाहा कि तूह लोळी रांबळअ हुअ और सह तेऊए कोहळे बमारी हुई ठीक।” 14 तैबै प्रभू यीशू तेऊ लै बोलअ कि, “होरी का निं कोही का खोजी आथी पर तूह नाश याजका सेटा लै और तिन्नां का रहैऊ, और बमारी ठीक हणै का बाद मुसा नबी जुण किछ बी चढाऊणा लै बोलअ द आसा; तेता चढाऊ ताकि तिन्नां लै ग्वाही हई सके।” 15 पर प्रभू यीशूए गल्ला फैली सारै देशे और लोगे छुंड लागै एछदै प्रभू यीशूए गल्ला शणुदै और बमारी ठीक करदै, 16 पर प्रभू यीशू नाशा त जंगलै तिन्नां का दूर प्राथणां करदअ।

### लकवे बमारी आळअ रोगी ठीक करनअ

(मत्ती 9:1-8; मरकुस 2:1-12)

17 और एकी धैळे हुअ इहय कि प्रभू यीशू त उपेशा दैदअ लागअ द और फरीसी और व्यवस्था बणाणें आळै बी थिये तिधी बेठै दै, तिधी तै तियां गलील और यहूदिया और हर गराऊंआं का और येरुशलेमा का आए दै और बमारी का ठीक करना लै ती प्रभू यीशू मसीह शगती तेऊ संघे ई। 18 और हेरै तिधी आणअ लोगे एक दरगे बमारी आळअ और तिन्नां आणअ सह मांझै परैदै

चकी। और तियां लागे प्रभू यीशू मसीहा सेटा भितरा लै नाशणा लै बाता लोळे कि तेऊ मरीजा प्रभूए मुंहा सेटा निंए। 19 तिधी ती लोगे जेल्ह-मरेल्ही और तिधी निं सिऊण्णीं सहरना लै बी जैगा थी और तिन्नै बी सोची एक तरकीब और तियां उखळै छापरे और तिन्नै छापरे शिला पेची और मरीज छडाऊअ छापरा बाती उंधे प्रभू यीशूए मुंहा सेटा लै। 20 प्रभू यीशू तिन्नै विश्वासा भाळी बोलअ कि, “हे माळूआ तेरे पाप हुरे माफ।” 21 तैबै शास्त्री और फरीसी आप्पू बिचै हठळदै लागे कि, “अह कुण आसा? जुंण परमेश्वरे निंदा करा? परमेश्वरा छाडी निं होर कुंण सका पाप माफ करी?” 22 प्रभू यीशू हेरी तिन्नै मने गल्ला ज़ाणीं और तिन्ना लै बोलअ, “तम्हें आपणें मनै किल्है आसा लागे दै हठळदै? 23 सान जेही गल किजै आसा? इहय बोळणअ कि तेरे पाप हुरे माफ, कि इहय बोळणअ कि उझू हांडदअ फिरदअ लाग? 24 पर मंए बोलअ तै कि तम्हें एसा गल्ला जाणीं सके कि माळूएँ शोहरू आसा धरती दी पाप माफ करनेओ हक बी दैनअ द।” और प्रभू यीशू तेऊ दरगे बमारी आळै लै बोलअ, “हूँ बोला ताल्हे ईहूअ कि उझू आपणें खीथळे गोदळै चक और घरा लै लाग हांडदअ।” 25 और सह बमार उझूअ नढैऊरे तिन्नै सल्लनै खळअ और जेथदी सह सुतअ द थिय, तेता चकी करे नाठअ परमेश्वरे जै-जैकारा करदी घरा लै। 26 एसा गल्ला भाळी हुरे सोभ लोग रहैन टैन और सोभ लागे परमेश्वरे जै-जैकारा करदें और कई लागे डरै मारै बोलदें कि, “आझू भाळी हाह्मै नोखी गल।”

### लेवी शादणअ

(मत्ती 9:9-13; मरकुस 2:13-17)

27 और एता बाद प्रभू यीशू बागा लै नाठअ और लेबी नांऊएँ एकी चुंगी लणे आळअ थळ्ही दी बेठअ द भाळअ और तेऊ लै बोलअ कि, “मूह पिछू एछ। 28 और सह बी सोभ गल्ला छाडी लागअ प्रभू पिछू हांडदअ। 29 और तेऊ लेबी आपणें घरे प्रभू लै खाणा-पिणा लै बणांअ और प्रभू संघे बैठे होर बी कई लोग रोटी खादें, तेथ ती बडे भारी लोग। 30 और फरीसी और शास्त्री लागे प्रभू यीशूए चेलै लै ताह्मे दै-दै कि, “तम्हें चुंगी लणे आळै होछै लोगा और पापी संघे किल्है खा-पिया?” 31 प्रभू यीशू तिन्नां लै जबाब दैनअ कि, “बैद निं राम्बळै आदमीं लै हंदअ पर सह हआ बमारा लै जरूरी। 32 हूँ निं धरमीं लै आथी आअ द पर हूँ आसा पापीए मना बदळणें तैणीं आअ द।”

### ब्रतो सुआल

(मत्ती 9:14-17; मरकुस 2:18-22)

33 और तिन्नै प्रभू लै बोलअ, “यहनं चेलै करा ब्रत और प्राथणा और फरीसीए बी करा तिहअ ई, और तेरे चेलै हआ धैळ खादें-पिंदै लागे दै।” 34 प्रभू यीशू तिन्नां लै बोलअ, “जेभै तैणीं लाळअ संघा आसा, तेभै कै बरातू ब्रत करा?” 35 पर ईहै धैळै बी एछणें जेभै लाळअ तिन्नां का जुदअ हणअ और तेभै डाहणअ तिन्नां ब्रत।” 36 और प्रभू यीशू खोजअ तिन्नां का एक होर दृश्टांत कि, “कोई बी आदमीं आपणें पराणें झिकळै दी नंऊअ शाटअ निं लांदअ किल्हैकि सह निं पराणें दी मेल खांदअ। 37 और कोई बी नूऊअ दाखरस पराणीं मशका दी निं भरदअ, नाई ता नूऊअ दाखरस पोछणअ मशका फाळी करै बागै और तियां मशका बी हणीं बरैबाद। 38 पर नूऊअ दाखरस लागा नूऊई मशका दी भरनअ। 39 कोई बी निं पराणअ दाखरस झुटी करै नूऊअ चाहंदअ किल्हैकि तेऊ का आसा थोघ कि पराणअ हआ बधिया।”

### सबते धैळीओ मालक

(मत्ती 12:1-8; मरकुस 2:23-28)

6 और एता बाद तै सबते धैळी, तियां खेचा बाती लागे दै हांडदै, और चेलै तै लागे दै हांडदी-हांडदी सील चोळी-चोळी करै और हाथे मरोकी करै खांदै। 2 और एता भाळी करै लागे फरीसी बिचै कई बोलदें कि, “तम्हें करा इहय काम जुंण सबते धैळी करनअ ठीक नाई आथी।” 3 प्रभू यीशू तिन्नां लै जबाब दैनअ कि, “तम्हें इहय निं पढळअ आथी कि दाऊद और तेऊए साथी ज़धू भुख्खे थिये; तिन्नै किजै किय? 4 सह किल्है नाठअ परमेश्वरे घरै

और भेंटे रोटी खाई जसा याजका का छाडी होर कोहै निं खांदअ त, तियां तेऊ आपणें साथी लै बी दैनीं? 5 और प्रभू तिन्नां लै बोलअ कि, “माळूओ शोहरू आसा सबते धैळीओ बी मालक।”

### मछैऊरें दै हाथा आळअ आदमी ठीक करनअ

(मत्ती 12:9-14; मरकुस 3:1-6)

6 और इहय हुअ कि एकी दुजी सबते धैळी आराधनालै दी लागअ प्रभू यीशू मसीह उपदेशा दैदअ और तिधी त एक आदमीं इहय कि तेऊओ त दैहणअ हाथ शुका द। 7 शास्त्री और फरीसी प्रभू यीशू मसीह लै गलती काढणें तैणीं हआ तै ताका रहै दै और तियां लागे भाळै कि हेरा हेनूं अह एऊ सबते धैळी ठीक करा कि नाई। 8 पर प्रभू यीशू हेरा त तिन्नै बचार ज़ाणीं और प्रभू यीशू तेऊ शुके दै हाथे आदमीं लै बोलअ कि, “उझू इधी खहळू बिचै।” सबी उझूअ और बिचै खहळूअ। 9 और प्रभू यीशू मसीह तैन्नां का पुछअ कि, “मुखा खोजा तम्हें सोभ एसा गल्ला कि सबते धैळी ठीक कै आसा? भलअ करनअ कि बूरअ? प्राण बचाऊणें कि नाश करनै?” 10 और प्रभू चऊ बाखा सोभी भाळी करै तेऊ आदमी लै बोलअ कि, “आपणअ हाथ कर आजू” और तेऊ बी किय हाथ आजू और तेऊओ हाथ हुअ भलअ चांगअ। 11 पर तियां हुरे आपणें आप्पै का ई बागै और आप्पू बिचै लागे हठळदै कि यीशू संघे कै करनअ?

### बाराह चेलै चुनणें

(मत्ती 10:1-4; मरकुस 3:13-19)

12 और तिन्नाई धैळै नाठअ प्रभू यीशू मसीह प्राथणां करदअ और परमेश्वरा सेटा प्राथणां दी बिताई सारी राच। 13 जाऊं दोत हई ता प्रभू आपणें चेलै शादें और तिन्नां बिचै बाराह जळै चुनै और तिन्नां लै बोलअ प्रेरित। 14 और तिन्नां चेलै नांअ तै ईहै- शमोन; जसा नांअ प्रभू पतरस डाहअ, और तेऊओ भाऊ आंदरिआस और याकुब, यहून्ना, फिलिप्पुस और बरतुल्मै। 15 और मत्ती, थोमा, हलफूईओ शोहरू याकुब और शमोन जसा लै जेलोतेस बी बोला। 16 और याकुबो शोहरू यहूदा और यहूदा इसकरोती जुंण बादा का प्रभू यीशू मसीह ढाकणें आळअ बी हुअ।

### शिक्षा दैणीं और बमारी का ठीक करनै

(मत्ती 4:23-25)

17 और तैबै प्रभू यीशू मसीह तिन्नां आपणें चेलै संघे उंधे होथे और एकी चकोर जैगा दी खहळूअ और तेऊए चेलेए बडी भीळ और सारै यहूदिया, येरूशलेम, सूर और सैदा और समुंदरे कनारे सारै लोग 18 प्रभू यीशू मसीह शुणदें और आपणीं बमारी ठीक करदें प्रभू सेटा लै आरे और तियां तै तिधी। और दुष्टात्मां करै बुरै हाल हुरे दै लोगा बी करा त प्रभू ठीक। 19 सोभ लोग चाहा तै प्रभू यीशू आपणें हाथा करै छूहणअ किल्हैकि प्रभू का निखळा ती शगती और तेता करै हआ तै तियां ठीक।

### आशीष और श्रापे बचन

(मत्ती 5:1-12)

20 तैबै प्रभू आपणें चेलै बाखा भाळी करै बोलअ, “धन्य आसा तम्हें जुंण दीन मने आसा, किल्हैकि स्वरगो राज आसा थारअ।

21 “धन्य आसा तम्हें जुंण भुख्खे आसा, किल्हैकि, तम्हें रजैऊणें; “धन्य आसा तम्हें जुंण एभै लेरदें आसा लागे दै किल्हैकि तम्हें हासणै।

22 “धन्य आसा तम्हें जसालै लोग मेरी बजह करै बैर-बरोध करा, और बागा लै काढा और निंदा करा और थारअ नांअ बूरअ ज़ाणीं करै काटे।

23 “तेसा धैळी दैरे खुशी हई करै छाहळा, किल्हैकि भाळा, तम्हां लै आसा सबरगे बडअ फळ; और तिन्नै बाब दादें आसा भविश्याबगता संघे बी इहय किय द।

24 “पर हाय तम्हां लै; जुंण धनबान आसा किल्हैकि तम्हें मुकै आपणीं शांती भोगी।

25 “हाय तम्हां लै जुंण रजै पुजै दै आसा; तम्हें हणै भुखै; और “हाय तम्हां लै जुंण हासा, तम्हां लै पळणअ शोग और तम्हें हणै लेरदै।

26 “हाय तम्हां लै; जांऊं सोभ आदमीं तम्हां लै भलअ बोला, किल्हैकि इने बाब दादै बी बोला तै झुटै भविश्याबाणीं करनै आळै लै भलअ।

### शतरु संघे प्रेम

(मत्ती 5:38-48; 7:12)

27 “पर हूँ बोला तम्हां शुळणै आळै लै कि आपणै शतरु संघे बी करा झूरी और जुंण तम्हां संघे बैर करा, तिन्नां लै बी करा भलअ। 28 जुंण तम्हां लै श्राप दैआ, तिन्नां लै दैआ आशीश और जुंण थारी बेईजती करा, तिन्नां लै करा प्राथणां। 29 जुंण तेरै एकी गलेटै दी चैडै बाहा, तेऊ बाखा लै फरेऊ दुजअ बी और जुंण तेरअ दोहर छडैऊए, तेऊ निं कुरतै निणै का बी रोकी आथी। 30 जुंण बी ताखा मांगे, तेऊ लै दैरे; और जुंण तेरी चिजा छडैऊए, तेऊ का निं मांगी आथी। 31 और जिहअ तम्हें चाहा कि लोग तम्हें संघे करे, तम्हें बी करा तिन्नां संघे तिहअ ई। 32 जै तम्हें आपणै प्रेम करनै आलै संघे ई प्रेम करे ता तै थारी कै बडाई हणीं? पापी और बुरै लोग बी ता इहय ई करा। 33 और जै तम्हें आपणै भलाई करनै आळै संघे ई भलाई करा, ता तै थारी किजै बडाई हणीं? पापी और बुरै आदमीं बी करा इहय ई। 34 और जै तम्हें धुआर दैआ, और तम्हें बापसीए आशा डाहा ता तै थारी किजै बडाई हणीं? पापी और बुरै बी दैआ धुआर और तियां चाहा कि एतरअ ई लोळी हाम्हां भी भेटअ। 35 पर तम्हें करै आपणै दुशमणां लै बी झूरी, और भलाई रहा करदै लागी; और धुआर दैई करै बापसीए चाहना निं करी; तै भेटणअ तम्हां बडा फळ और तै हणै तम्हें परमपरधान परमेश्वरे शोहरु किल्हैकि सह करा तिन्नां लै बी किरपा जुंण तेऊलै धनयाबाद बी निं करदै। 36 जिहअ थारअ बाप्पू परमेश्वर दैयाबान आसा; तिहैई बणां तम्हें बी दैयाबान।

### दोष निं लाणअ

(मत्ती 7:1-4)

37 “दोष निं लाणअ ताकि तम्हां लै कुंण दोष ना लाए, दोशी निं बणाणअ; तै निं तम्हें बी दोशी बणाणै; माफ करा; तै भेटणीं तम्हां लै बी माफी। 38 जै तम्हें दैई करे; तै दैणअ तम्हां लै बी, लोग दैणअ नापी करै और तिंहीं करै और खरोळी करै छूप लाई थारै भोसळै पाई, किल्हैकि जेऊ नापा करै तम्हें नापा, तेऊ नापा करै नापाणअ तम्हां लै बी। 39 तेखअ प्रभू तिन्नां लै एक समझाई दैनी कि “काणै कै लाई काणै का बात रहैऊई? कै तियां दुहै गाढै दी नी पळणै आथी? 40 चेलअ निं आपणै गुरु का बडअ हंदअ आथी, पर जुंण बी सैणअ होए, सह हणअ आपणै गुरु जिहअ। 41 तूह आपणै भाईए आच्छी किल्है भाळा कर्णीं? आपणीं आच्छी निं ताखा गळू धेछदअ? 42 जै तेरी आपणीं आच्छी गळू आसा, तै तूह आपणै भाई लै किहअ करै सका बोली कि हे भाई खट्ठू, हूँ काढूँ तेरी आच्छी पळी दी कर्णीं? हे कपटी, पैहलै काढ आपणीं आच्छी पळअ द गळू बागै, तै सका तूह आपणै भाईए आच्छी दी पळी दी कर्णीं राम्बळे करै भाळी करै काढी।

### जिहअ तिहअ फळ

(मत्ती 7:16-20; 12:33-35)

43 कोई बी रांबळअ पेळ निं नकाम्मअ फळ दैदअ और ना ता कोई नकाम्मअ पेळ रांबळअ फळ दैदअ। 44 हरेक पौधअ बछैणिआ तेऊए फळा का; किल्हैकि कोई बी लोग निं कांडैरिंडै का अंजीर चोळदै और नां ता झाखळा का अंगूर चोळदै। 45 भलअ आदमीं काढा आपणै मने भलै भडारा का भली गला; और बूरअ काढा बूरी गला, किल्हैकि जुंण मने हआ; सईई एछा खाखा दी।

### घरा बणाणै आळै दुई मांळू

(मत्ती 7:24-27)

46 “जै तम्हें मेरी गला मंदैई निं आथी; तै किल्है हआ तम्हें हे प्रभू, हे प्रभू लाई दी? 47 जुंण मूह सेटा एछा और मेरी गला शुणीं करै तिन्नां मना, हूँ खोजूँ

तम्हां का कि सह कसा जिहअ आसा? 48 सह आसा ईहै आदमीं जिहअ जुंणीं घरा बणां दी बगती दुधी मैद खल्लीं करै शाफळा परदै आथरी पाई और जांऊं बरसाती गाड नाळी आई और हरल पेठअ तेथ पर तेऊ घरा निं झकाऊई बी सकी; किल्हैकि सह त पाकी जैगा बणअ द।” 49 पर जुंण शुणीं करै नाई मंदअ, सह आसा तेऊ जिहअ जुंणीं माटै दी आथरी खल्लीं बिणही घर बणांअ, जांऊं बरसात आई ता सह घर हूअ ढूळी करै बरेबाद।”

### एकी सबैदारो विश्वास

(मत्ती 8:5-13)

7 जांऊं प्रभू यीशू मसीह लोगा का आपणीं सारी गला खोजी मुकअ, ता तेता बाद आअ सह कफरनुंहमा लै। 2 और एकी सबैदारा थिय आपणअ एक नोकर बडअ भारी प्यारअ और सह नोकर हुअ बमार और सह त मरदअ तैर। 3 तेऊ बी ती प्रभू यीशूए चरचा शुणीं दी और तेऊ यहूदिए कई पुरनिंए प्रभू यीशू सेटा लै एही अरजा करना लै भेजै कि हे प्रभू मेरै नोकरा कर इधी एछी करै ठीक। 4 तिन्नां प्रभू यीशू सेटा एछी करै अरज की कि “हे प्रभू तेऊ लै कर किरपा सह आसा एता जोगी, 5 किल्हैकि सह करा म्हारी जाती लै प्रेम और तेऊई आसा बणांअ द हाम्हां लै आराधनालय बी।” 6 प्रभू यीशू तिन्नां संघे नाठअ और जांऊं तेऊए घरा का थोळअ दूर जिहअ पुजअ ई थिय कि सबैदारै आपणै कई साथी का फैळअ भेजअ कि “हे प्रभू, जादअ कशत निं करी, हूँ निं एता जोगी आथी कि तूह मेरै घरे छापरा हेठै एछी सके। 7 तैहीता हूँ एता जोगी बी निं आथी कि ताह सेटा आप्पै एछी सकूँ, तैहीता हूँ आअ निं, पर आपणै मुँहा का बोल एक बोल और मेरअ नोकर हणअ ठीक। 8 हूँ आसा आप्पू बी पराधीन आदमीं और सपाही आसा मेरै काबू दी, जांऊं हूँ एकी लै बोला कि नाश, ता सह नाशा और दुजे लै बोला हूँ कि ओही एछ, ता सह एछ; और आपणै कोई बी नोकर चाकरा लै बोला हूँ कि इहय कर; ता सह करा तिहअ ई।” 9 एसा गला शुणीं हुअ प्रभू यीशू मसीह रहैण और प्रभू पिछू फिरी करै लोगा लै जुंण पिछू तै हांढदै लागै दै बोलअ कि “हूँ खोजा तम्हां का सच्चाई कि इहय विश्वास निं मंएँ पूरै इस्त्राएला दी किधी भाळअ।” 10 और तियां भेजै दै लोग जांऊं बापस घरै पुजै ता तिन्नां भाळअ सह नोकर ठीक-ठाक।

### बिधवे शोहरी लै जिवनदान

11 थोळै धैळै बाद प्रभू यीशू नाठअ एक नाईन नांऊंए नगरी लै और तेऊए चेलै और पिछू तै बडै भारी लोग संघा लागै दै ऐछदै। 12 जांऊं प्रभू नगरीए परौळी सेटा पुजअ ता तिधी तै लोग एकी मुळदै बागालै निंदै लागै दै; सह त आपणीं बिधबा आमो एकलौतअ शोहरु, और नगरीए बडै भारी लोग तै तेऊ मुळदै पिछू हांढदै लागै दै। 13 तेसा बिधबा भाळी आई प्रभू यीशू दैया और प्रभू तेसा लै बोलअ, “कि लेरदी निं लागे।” 14 तैबै प्रभू यीशू लाहसा सेटा लै नाठअ और सह खाट छुँई और तियां चकणै आळै खट्ठुए और प्रभू यीशू मसीह बोलअ कि, “हे जुआन, हूँ बोला ताहहै खळअ उझू।” 15 तैबै सह मुळदअ उझूअ खळअ और सह लागअ गला-बाता करदअ और प्रभू सभाळअ सह तेऊए आमंमां का। 16 एसा गला भाळी उरै सोभ लोग और तियां लागै परमेश्वरे जै-जैकारा करदै और इहय बोलदै कि, “हाम्हां बिचै आअ एक महान भविश्याबगता और परमेश्वरै की आपणै लोगा लै किरपा।” 17 प्रभूए बारै ईयां गला फैली सारै यहूदिया देशै और ओरी-पोरीए सारै देशै।

### यहूना बपतिस्मै दैणैआळैओ सुआल

(मत्ती 11:2-19)

18 और यहूना लै बी दैनीं तेऊए चेलै इना गले खबर। 19 तैबै यहूना आपणै चेलै मांझै दुई शादै और तियां प्रभू यीशू सेटा इहय पुछदै भेजै कि, “जुंण सह एछणै आळअ थिय; सह तूहई आसा कि मैची हाम्हे कहा होरी न्हैळै रहमै लागी?” 20 और तिन्नां चेलै बी प्रभू यीशू का बोलअ कि, “यहूना आसा भेजै दै हाम्हे इहय पुछदै कि, जुंण सह एछणै आळअ थिय; सह तूहई आसा कि मैची हाम्हे कहा होरी न्हैळै रहमै लागी?” 21 और प्रभू यीशू तेसाई घळी कई दाह बमारी और भूता परेता शाचै दै आदमीं किहै ठीक और कई काणै कियै शरैछै।



22 प्रभू यीशू तिन्नां लै बोलअ कि, “जुंण बी तम्हें भाळअ और शुणअ, तिन्नां गल्ला खोजा यहून्ना का कि “काणें लागें भाळें, लेंगळें लागें हांढदें-फिरदें, कोहळें बमारी आळें करा राम्बळें; और टऊणें लागें शुणदें; और मुल्दें लागें जिऊदें हदें और कंगळा का शणांऊंआ सुसमाचार। 23 और धन्य आसा सह जुंण मेरें कारण ठोहळं नां खाए।”

24 जांऊं यहून्ने चेलें तिधा का नाठें ता प्रभू यीशू मसीह यहून्ने बारें लोगा का बोलदअ लागअ कि, “तम्हें जंगलें उजाळ जैगा किजू भाळें नाठें तै, बागरी करै चुकदें डाळा? 25 तै तम्हें किजू भाळें नाठें तै? नरम झिकळें बाह्वें दै आदमी? शुणां, जुंण भडकीलें रंग-बरंगें झीकळें बाह्वा, और जुंण सुख भोग बिलासा दी रहा, तियां रहा राज मैहला दी। 26 तै तम्हें किजू भाळें नाठें तै? कसा भबिशयाबाणीं करनै आळें? हां, हूँ खोजा तम्हां का कि, तम्हें नाठें तै भबिशयाबागता का बी बडै भाळें। 27 अह आसा सहैई जसरें बारें लिखअ द आसा कि

“हेर, मंरें भेजअ आपणअ दूत ताखा आजू-आजू और तेऊ करनी ता आजू-आजू बात सरली। 28 हूँ बोला तम्हां का कि जुंण बेटळी का जल्में दै आसा, तिन्नां मांझें निं यहून्ना का बडअ कोहें आथी। पर जुंण परमेशरे राज्य दी होछे का होछअ आसा, सह आसा तेऊ का बी बडअ। 29 और सोभी आम लोगें और चुंगी लणें आळें बी शुणीं करै यहून्नां बपतिस्मअ लई करै परमेश्वर सन्नअ मनअ। 30 पर फरिसी और व्यवस्था आळें बपतिस्मअ ना लई करै परमेश्वरे योजना जुंण तिन्नें बारें थी सह टाळी।

31 कि “हूँ एऊ जुगे लोगा लै कै बोलू कि तियां कसा जिहें आसा? 32 तियां आसा तिन्नां लान्हें जिहें जुंण बजारें बेशी करै एकी दुजें लै हाका लांदें आसा लागें दै कि, हान्हें तम्हां लै बशूरी बाजी पर तम्हें निं नाचै, हान्हें आपणीं हीक पटाकी पर तम्हें निं लेरै।” 33 किल्हैकि यहून्ना बपतिस्मं दैणें आळें नां रोटी खाई और नां दाखरस झुटअ और तम्हें बोलअ इहय कि तेऊ दी आसा भूत परेत। 34 मांझूओ शोहरू आअ खांदी पिंदी; और तम्हें बोला इहय कि भाळा पेटू और पियक्कड आदमी, चुंगी लणें आळें और पापिओ साथी। 35 पर ज्ञान आसा आपणें सोभी बच्चें का सन्नअ किय द

### फरिसीए घरें पापी बेटळी लै माफी

36 तेखअ एकी फरिसी प्रभू का अरज की कि, “हे प्रभू, मूँह संघें खा रोटी, और प्रभू नाठअ तेऊए घरें रोटी खांदअ।” 37 और हेरा, तेसा नगरीए एक पापी बेटळी का जांऊं इहय पतअ चलअ कि प्रभू यीशू बेटअ फरीसीए घरें रोटी खांदअ, ता तेसा आणअ संगमरमरे भांडें दी इत्र। 38 और सह प्रभूए पैरा सेटा, पिछू खहळुई करै लेरदी-लेरदी प्रभूए पैरा लागी आछिए आशू करै भेऊंदी और आपणें मुंडे शराळा करै लागी पैरा दुशदी और तेसा प्रभूए पैरें माखू दैनै और तेथ मळअ सह इत्र। 39 इहय भाळी तेऊ फरीसी जुणीं प्रभू यीशू आपणें घरा लै शादअ त, आपणें मनै सोचदअ लागअ कि जै अह भबिशयाबागता हंदअ ता तै लागणअ त एऊ का थोघ कि अह बेटळी जुंण एऊ छुंहदी आसा लागी दी अह कुंण आसा और अह केही बेटळी आसा? किल्हैकि अह आसा पापी बेटळी। 40 प्रभू हेरी तेऊए मनं गल भुझी और तेऊए जबाबा दी बोलअ “हे शमोन, मंरें लाअ ताखा किजै बोली।” तेऊ बोलअ, “हां गुरु बोल।” 41 “एकी सेठे तै दुई दैणदार, एकी तै पांज शौ और दुजें तै पजाह दिनार तेऊए दैणा लै। 42 तिन्नां का निं दैणा लै किछें थिय और तेऊ सेठे किये तिन्नें ढबै माफ। तै तिन्नां दुई मांझें सेठा लै खासअ प्रेम कसा करनअ?” 43 शमोनै उत्तर दैनअ कि, “मेरी समझा दी करनअ तेऊ जसरें खास्सै ढबै माफ हुऐ।” प्रभू यीशू बोलअ कि, “तंरें बोलअ बिलकुल ठीक।” 44 और तेसा बेटळी बाखा फिरी करै प्रभू शमोना लै बोलअ, “एसा बेटळी बी भाळा तूह? हूँ आअ तेरें घरें पर तंरें निं मुल्हें खूरा धोणा लै पाणीं बी दैनअ पर एसा धोए मेरें पैर आशू करै और आपणें मुंडे शराळा करै दुशै। 45 तंरें निं मुल्हें चुंजी माखी दैनी पर जेभा ओही हूँ आअ द आसा; तेभा ओही निं एसा मेरें खूरा दी माखी दैणीं छाडी। 46 तंरें निं मेरें मुंडे तेल मळअ पर एसा मळअ मेरें पैरें इत्र। 47 तैहीता हूँ ताल्हें बोला कि एसरें पाप जुंण खास्सै तै तियां हुऐ माफ, किल्हैकि एसा की मूँह संघें खासी झूरी पर जसरअ थोळअ माफ हुअ; तेऊ करनी थोळी झूरी। 48 और प्रभू तेसा बेटळी लै बोलअ, “तेरें पाप हुऐ

माफ।” 49 तैबे जुंण लोग प्रभू संघें तिधी रोटी खांदें बेटें दै थियें, तियां आपणें मनै सोचदें लागें कि, “अह कुंण आसा कि पाप बी करा माफ?” 50 पर तेसा बेटळी लै प्रभू बोलअ, “तेरें विश्वासै बचाऊई तूह; खुशी-खुशी नाश घरा लै।”

### यीशू चेली

8 एता बाद प्रभू यीशू गराऊंरें-गरांउंरें और नगरी-नगरी परमेश्वरे राजो सुसमाचार शणांऊंअ, और प्रभूए बारा चेलें बी तै प्रभू संघा। 2 और कई बेटळी ती भूत परेत शाचअ द और ती बमारी दी पळी दी। प्रभू यीशू की तियां सोभ ठीक तिन्नां बिचै ती मरिअम मगदीलणीं बी और तेसा दी त सतरूपी राखस। 3 और हरोदेसे भडारी खोजेए लाळी योआना और सूसना और कई होर बेटळी ती, ईयां सोभ करा ती आपणीं-आपणीं धन सम्पती करै प्रभूए सेऊआ।

### बेजें बऊणें आळेंओ दृष्टांत

(मत्ती 13:1-9; मरकुस 4:1-9)

4 जांऊं बडै भारी लोग कठा हुऐ और नगरी-नगरीए लोग प्रभू सेटा लै एछा तै, प्रभू यीशू तिन्नां का दृष्टांता दी खोजअ कि, 5 “एक बऊणें आळअ निखळअ बेजें बऊंदअ, और बऊंदी बारी किछ बेजअ पळअ बाते कनारें और सह जैँटअ कई ता चेलू पखिरू लै हुअ तेतो चुनण। 6 धख बेजअ पळअ गळू-पाथरा जैँदरी सह टिपअ ता टिपअ पर जलैळें दी बाच नाई हणेंए बजहा का शुका। 7 किछ बेजअ पळअ झाकळें और सह बडअ ता बडअ पर दाभूअ कांडें रिडें जैँदरी। 8 और किछ बेजअ पळअ रजदी-पजदी जिम्मी दी और सह बेजअ टिपअ और तेथ लागी राम्बळी फसल; और प्रभू जोरें बोलअ कि जसरें कान आसा सह शुणें।”

### दृष्टांतो उदेश्य

(मत्ती 13:10-17; मरकुस 4:10-12)

9 प्रभूए चेलें पुछअ प्रभू का इहय कि अह दृष्टांत कै आसा? और प्रभू तिन्नां लै बोलअ कि, 10 “तम्हां लै आसा परमेश्वरे राज्ये भेदे समझ दैनी दी पर होरी का लागा दृष्टांता दी समझाऊणअ एते तैणीं कि ‘तिन्नां का निं भाळी करै बी शुझदअ और शुणीं करै बी निं समझदें।’

### बेजें बऊणें आळें दृष्टांतो अर्थ

(मत्ती 13:18-23; मरकुस 4:13-20)

11 “अह दृष्टांत आसा इहय कि बेजअ आसा परमेश्वरो बचन। 12 बाते कनारेंओ बेजअ आसा सह जुंणीं शुंणअ और शैतानें किय तेऊए मना का बचन दूर कि इहय निं हूआ कि, अह विश्वास करी करै स्वरगा लै नाशे। 13 और गळू पाथरा जैँदरो बेजअ आसा सह जुंण शुणा और खुशी-खुशी बचन मना बी पर गहराई दी ना समझणें कारण तियां थोळी घळी ता करा विश्वास और जांऊं धख परिक्षा दी पळा ता तेखअ हैळिया तियां। 14 जुंण बेजअ झाकळें पळअ सह आसा इहय, जुंण शुणा ता शुणा पर सुलें-सुलें शाचा तियां चिंता फिकर, धन माया और जिऊणेंए सुख भोगा दी और तिन्नें फसल बी नि हंदी। 15 पर रजदी-पजदी जिम्मी दी बेजअ आसा इहय जुंण बचन शुणीं करै भलें और पबित्र मनं सभाळी डाहा और धीर धरी करै फूला-फळा।

### सदीएओ दृष्टांत

(मरकुस 4:21-25)

16 कोहें निं लाटू जाळी करै भांडें हेठें दाबदअ और नां तेऊ दीऊटा हेठें डाहंदअ पर सह डाहा तेऊ उछटै दी ताकि भितरी ऐछणें आळें लै प्रैशअ होए। 17 किछें गल निं आथी लुकी दी जुंण प्रगट निं होए और नां कोई गल गुप्त आथी जसा गल्लो थोघ निं लागे और ना प्रगट हणीं। 18 एते तैणीं चतैन रहा, कि तम्हें केऊ साबै शुणां? किल्हैकि जसा का आसा, तेऊ लै दैणअ होर बी, और जसा का नाई आथी तेऊ का निणअ सह बी जेता सह आपणअ समझा।”

### यीशू आम्मां और भाई (मत्ती 12:46-50; मरकुस 3:31-35)

19 प्रभू आम्मां और भाई आये तेऊ सेटा लै पर लगे जेह्ल-मरेह्नी जैदरीं नि तियां तेऊ का मिली सकै। 20 और प्रभू का बोलअ कुंणी इहय कि तेरी आम्मा और भाई आसा बागै खट्ठुए दै और तियां चाहा ताखा मिलणअ। 21 और प्रभू यीशू बोलअ इहय कि, "मेरै आम्मां और भाई आसा ईयां जुण परमेश्वरो शुणा और मना।"

### तूफान शांत करनअ (मत्ती 8:23-27; मरकुस 4:35-41)

22 तेखअ एकी धैळी प्रभू यीशू और चेलै किशती दी बेठे और प्रभू तिन्नां लै बोलअ कि, "चाला हाम्हां नाशणअ दरैऊआ पार; और तिन्नां बी किशती खोल्ही। 23 पर जांऊं किशती पाणीं दी चलदी लागी, ता प्रभू यीशू मसीह सुतअ और दरैऊआ दी आअ ढीष-डुआळअ और किशती लागी पाणीं करै भरदी और तियां सोभ चालै डुबी। 24 तैबै तिन्नां प्रभू यीशू मसीह झैऊअ और बोलअ, "हे प्रभू, हे मालक हाम्हां चालै खतम हई। तैबै प्रभू यीशू ढीष-डुआळ लै झाळ काढी और ढीष-डुआळअ रुकअ, और तैबै जाई करै हुअ चैन। 25 और प्रभू तिन्नां लै बोलअ, "थारअ विश्वास किधी आसा? पर तियां डरै, और तियां हुए रहैन और आप्पू मांझै लागै गल्ला करदै कि, "अह कुण आसा? जुण ढीष-डुआळअ और पाणीं लै बी करा डेअ और तियां शुणा एऊए हर गल्ला?"

### दुष्टात्मा शाचअ द आदमीं ठीक करनअ (मत्ती 8:28-34; मरकुस 5:1-20)

26 तेखअ तियां पुजै गिरासेनिंए देशै जुण दरैऊआ पार गलीला सहननै आसा। 27 जांऊं तियां पार कनारै उतरै ता तेसा नगरीओ एक माळू तिन्नां भेटअ, तेऊ दी ती दुष्टात्मां और सह निं झिकळै बी बाहदअ त और ना ता सह घरै रंहदअ त, सह रहा त मल्थानै। 28 तेऊ पाई प्रभू यीशू भाळी लैळा और प्रभू सेटा बधळुई करै जोरै-जोरै बोलअ कि, "हे परमपरधान परमेश्वरे पुत्र यीशू, मूह ता संघे कै काम आसा? हूँ करा ताखा अरज कि मुल्है निं कशट दैई।" 29 तेऊ बोलअ इहय तै कि प्रभू यीशू दैनीं दुष्टात्मां तेऊ का पोही निखळणें आज्ञा। किल्हैकि दुष्टात्मां हआ ती तेऊ दी भी-भी परचंड, लोग ता डाहा तै तेऊ लोहे शांघळी करै बाहिन पर सह पा त तिन्नां बी चोळी और दुष्टात्मा भगाऊआ ति तेऊ सारै जंगलै। 30 प्रभू यीशू तेऊ का पुछअ कि, "ताह नांअ कै आसा?" और तेऊ दैनअ जबाब कि, "सैना" किल्हैकि तियां ती खासी दुष्टात्मां। 31 और तिन्नां दुष्टात्मां प्रभू का अरज की कि हाम्हां निं घोर गाढे दी पाई आथी। 32 तिधी त धारठी लागअ द एक सुंगरो बडअ छुंड चरदअ और तिन्नां की प्रभू का अरज कि हाम्हां दै एथ पेशणें और प्रभू यीशू बी दैनअ तिन्नां तेथ नाशणें। 33 तैबै दुष्टात्मां तेऊ का निखळी और तियां पेठी सुंगरे छुंडा दी और सारै सुंगर हुए बेगरै और तियां पेठे दरैऊए डुघै पाणीं दी और मुरै।

34 इहअ भाळी तियां सुंगरा फुआल तिधा का भागै और नगरी गराऊंरें दैनअ एसा गल्लो फैळअ। 35 और लोग आये एता भाळै ता प्रभू यीशू सेटा एछी करै जसा दी तियां दुष्टात्मां निखळी ती, सह भाळअ तिन्नां प्रभू यीशूए पैरा सेटा रांबळअ, झिकळै बान्ही, होशा-बाशा दी बेठअ द और तियां डरै। 36 और होरी मोकै दी भाळणै आळै खोजअ तिन्नां का पूरअ हाल कि किहअ करै हुअ अह आदमीं रांबळअ। 37 तैबै गिरासेनिंए आरी-पारीए सोभी लोगै प्रभू यीशू का अरज की कि, "म्हारै देशा का नाश दूर" किल्हैकि कि तिन्नां पळअ बडअ भारी हैळअ-फिकर। प्रभू बी किशती दी बेठअ और फिरअ बापस। 38 जसा माळू का दुष्टात्मां निखळी ती सह लागअ प्रभू का अरजा करदअ कि मूह दै आप्पू संघे एछणें पर प्रभू यीशू किय तेऊ लै इहय बोली नाई कि 39 "आपणें घरा लै नाश और सोभी का खोज कि परमेश्वरै ताल्है किहै बडै-बडै काम कियै।" और सह लागअ सारी नगरी खोजअ कि प्रभू यीशू भाळा मुल्है किहै-किहै बडै काम किये।

### याईरै मूई दी शोहरी और एक बमार बेटळी (मत्ती 9:18-26; मरकुस 5:21-43)

40 जांऊं प्रभू यीशू बापस त एछदअ लागअ द ता लोग मिलै तेऊ संघे खुशी-खुशी, किल्हैकि तियां तै तेऊ न्हैळै भाळै लागै दै। 41 और याईर नांओ एक माळू आअ, सह त आराधनालैओ मुखिअ। सह प्रभू यीशूए पैरै पळअ और प्रभू का अरजा करदअ लागअ कि मेरै घरा लै चाल। 42 तेऊए ती बाराह साले एकलौती शोहरी और सह ती मरदी तैर। जांऊं प्रभू यीशू मसीह हांढदअ लागअ ता लोग पळ तै प्रभू फेर चुटी। 43 और एक बेटळी, तेसा ती बाराह साला ओही खुना बगणें बमारी और तेसा हेरी ती आपणीं सारी धन-दौलत लाजा पुआई लै बैईदा पिछू खतम करी और सह निं तजी बी ठीक हुई ती। 44 और तेसा बी पिछू का एछी करै प्रभूओ झिकळैओ पालअ छुंअ और नढैऊए हुअ तेसरअ खून बगणअ बंद। 45 एता लै प्रभू यीशू बोलअ, "हूँ कुंणी छुंअ?" जांऊं सोभी नाई किय ता पतरसै और तेऊए होरी साथी बोलअ "हे मालक, एतरी लोगे जेह्ल-मरेली जैदरी कसरअ हाथ लागअ होए, कै पतअ?" 46 पर प्रभू यीशू मसीह बोलअ तिन्नां लै कि, "हूँ छुंअ कुंणी इहय कि मुखा गअ थोघ लागी कि मुखा निखळी सामर्थ।" 47 जांऊं तेसा बेटळी जाणअ कि हूँ नि एबै लुकी सकदी, तैबै सह कांबदी-कांबदी प्रभू यीशू मसीह सेटा लै आई और पळी प्रभूए पैरै और सोभी सहननै खोजअ कि मरें तूह किल्है छुंअ और किहै करै हुई तेभी राम्बळी। 48 प्रभू तेसा लै बोलअ, "बेटी, तेरै विश्वासै की तूह राम्बळी, शोभलै करै नाश घरा लै।" 49 प्रभू थिय तेसा लै इहय बोलदअ ई लागअ द कि आराधनाले मुखिए घरा का आअ फैळअ कि, "तेरी शोहरी गई मरी एबै निं प्रभू लै इधी एछणेंओ कशट दैई।" 50 प्रभू यीशू एसा गल्ला शुणीं तेऊ लै हैअ दैनअ, कि डरै निं आथी बिशबाश कर, तै जाणीं सह बची। 51 घरै पुजी करै प्रभू पतरस, यहूना, याकुब और तेसा शोहरीए आम्मां-बाप्पू छगडी निं कोहै आप्पू संघे भितरा लै एछणें दैनअ। 52 और सोभ तै तेसा लै लेरदै-पकारदै लागै दै, पर प्रभू तिन्नां लै बोलअ "लेरा पकारा निं ला, अह निं मूई आथी अह आसा सुती दी।" 53 और तियां लागै एसा गल्ला शुणीं हासदै कि अह ता मरी आसा गई दी। 54 पर प्रभू तेसरअ हाथ ढाकअ और तेसा लै गल्ला की कि, "शोहरीए खळी उझू।" 55 और तेसा शोहरी फिरअ भी शाह और सह उझूई खळी। और प्रभू यीशू बोलअ तिन्नां लै इहय कि, एसा लै दैआ किजै खाणा लै। 56 तेसरै आम्मां-बाप्पू बी हुए रहैन। पर प्रभू तिन्नां लै बोलअ कि, अह जुण इधी हुअ, एसा गल्ला निं कोही का खोजी।

### बाराह प्रेरित भेजणें

(मत्ती 10:5-15; मरकुस 6:7-13)

9 तेखअ प्रभू यीशू आपणें बाराह चेलै शदै और तिन्नां लै दैनी दुष्टात्मां और बमारी दूर करनें सामर्थ और अधिकार। 2 और तियां भेजै परमेश्वरे राजे (राईसीए) परचारा करदें और बमारा ठीक करदें। 3 और प्रभू तिन्नां लै बोलअ, "बाता लै निं किछे निई; नां ता शोटअ, नां झोळी, नां रोटी, ना ढबे और नां दुई-दुई कुरतै। 4 और जहा घरै बी तम्हें बेशे, तम्हें रहै तिधी और तिधी का नाश। 5 जुण तम्हां नाई मने, तेसा नगरी का बागै निखळदी तुळकें आपणें खुरा का धूळअ बी पोही ताकि तिन्नां लै ग्वाही होए।" 6 तेतै तैणीं तियां नाठै गराऊंरें- गराऊंरें सूसमाचारा शणाऊंदै और हर जैगा लोगे बमारी का ठीक करदी-करदी रहै फीरदै लागी।

### राजै हेरोदेसे उलझण

(मत्ती 14:1-12; मरकुस 6:14-29)

7 और तेऊ देशो चौथाई राजअ हरोदेस इन्नां गल्ला शुणीं हैळुअ, किल्हैकि कई लोगै बोलअ तेऊ का इहय कि यहूना हुअ मरी करै जिऊंदअ। 8 और कई लोगै बोलअ इहय बी कि हाम्हां का धेछुअ एलिया; और कई बोलअ इहय कि पराणें भबीशयाबगता मांझै हुअ कोई एक जिऊंदअ। 9 पर हरोदेसै बोलअ, "यहून्नो ता हेरअ दा मरें कैळअ काटी, पर एबै अह कुण आसा? जसरै बारै हूँ एही गल्ला शुणा?" और तेऊए हुई प्रभू यीशू भाळणें ईछा।

**पांजा हजारा मरधा का रोटी खैऊणी**  
(मत्ती 14:13-21; मरकुस 6:30-44; यहूना 6:1-14)

10 प्रभू यीशू चेलै बी फिरै बापस और जुंण-जुंण तिन्नै किय त तिन्नै सारअ हाल प्रभू का खोजअ और प्रभू नाठअ तिन्नां छाडी करै बैतसैदा नांऊए एक नगरी दी एक सुनसान जैगा लै। 11 प्रभू यीशू भाळी आप्पू पिछु लगे भीळ एछदी और सह मिलअ तिन्नां का खुशी-खुशी; और तिन्नां का खोजी परमेश्वर राइसीए गल्ला और जुंण बमारी का ठीक हणअ चाहा तै तियां कियै ठीक।

12 जांऊं धैळअ उडी चालअ, ता प्रभू यीशू बाराह चेलै बोलअ कि, "प्रभू, इन्नां लोगा लै दैआ बिदाई; ताकि ईयां किधि गराऊंए आप्पू लै रोटी पाणिओ इंतजाम करी सके और तिधी रहे; किल्हैकि हाम्हें आसा इधी बडी सुनसान जैगा दी।" 13 प्रभू यीशू तिन्नां लै बोलअ, "तम्हें ई दैआ इन्नां लै खाणा पिणा लै", तिन्नै प्रभू लै उत्तर दैनअ कि, "हाम्हां का निं पांज रोटी और दुई माहछली छाडी होर किछै आथी; पर हां जै हाम्हें इन्नां लै रोटी मोल आपणें लई ता तै सका हई।" तियां लोग तै पांज हजारा का बी जादैं। 14 पर प्रभू यीशू मसीह तिन्नां लै बोलअ कि, "इन्नां लोगा बशैला पजाह-पजाह करै घेहळी दी। 15 और चेलै बी किय तिहअ ई और तियां सोभ लोग बशैळै। 16 प्रभू यीशू तियां पांज रोटी और दुई माहछली हाथै ढाकी और स्वरगा बाखा भाळी करै परमेश्वर लै धन्याबाद किय और रोटी चोळी-चोळी करै चेलै लै दैनीं और तिन्नै दैनीं लोगा लै। 17 और जांऊं तियां खाई करै रजै, ता बची दी रोटिए चकै तिन्नै बाराह चटै।

**यीशू पतरसा 'मसीह' मनणअ**  
(मत्ती 16:13-20; मरकुस 8:27-30)

18 जांऊं प्रभू यीशू मसीह कांत जैगा दी प्राथणां करदअ थिय लागअ द और चेलै बी तै तेऊ संघा; ता प्रभू तिन्नां का पुछअ कि, "लोग मुल्है किजै बोला?" 19 तिन्नै प्रभू लै जबाब दैनअ कि, "यहूना बपतिस्मा दैणैआळअ, और कई लोग बोला एलिया, और कई बोला इहय कि पराणें भबीष्याबगता मांझै हुअ कोई एक जिऊंदअ।" 20 प्रभू तिन्नां लै बोलअ कि, "तम्हें किजै बोला मुल्है?" पतरसै बोलअ कि, "परमेश्वरो मसीह।" 21 और प्रभू यीशू तिन्नां लै बोलअ कि, "एसा गल्ला निं कोही का खोजी।"

**आपणीं मौते बारे यीशू भविष्यवाणी**  
(मत्ती 16:21-23; मरकुस 8:31-33)

22 और तेऊ तिन्नां लै बोलअ, "माह्णू शोहरू लै आसा अह जरूरी कि सह दुख भोगे और पुरनिए, माहायाजक और शास्त्री पाए तेऊ मारी और सह उझणअ चिऊथै धैळै मरी करै भी खळअ।

**यीशू पिछू नाशणेंओ अर्थ**  
(मत्ती 16:24-28; मरकुस 8:34-9:1)

23 और प्रभू सोभी लै बोलअ कि, "जै कोई मूँह पिछू एछणअ चाहे ता सह करै आपणें आप्पू लै बी नाई और आपणअ दुख तकलिफी सैहणा लै रहै हर धैळै तैर। 24 किल्हैकि जुंण आपणें प्राण बचाऊणें चाहे, तेऊ खोणें तियां और जुंण मेरी तैणीं आपणें प्राण खोए, तेऊए प्राण बचणै। 25 जै माण्हू सारै संसारा बी आपणें बशै करे और आपणें प्राण खोए; या तेऊए आपणें प्राण हानी होए; ता तेऊ लै किजै नफअ हणअ? 26 जुंण कोई बी मूँह करै और मेरी गल्ला करने का शरम चेतै, तेऊ लै चेतणीं माह्णू शोहरू बी शरम जेभै सह आपणें पिता परमेश्वर गुणगाना संघे एछणअ। 27 हूँ खोजा तम्हां का सच्चाई कि जुंण इधी खळै आसा, तिन्नां बिचै आसा कई ईहै बी; कि जेभै तैणीं परमेश्वरो राज निं भाळी हेरे, तेभै तैणीं निं मरनै आथी।

**यीशू काया बधळणीं**  
(मत्ती 17:1-8; मरकुस 9:2-8)

28 इन्नां गल्ला हणै का बाद कोई आठा धैळै बाद पतरस और यहूना और याकुबा संघा निई करै नाठअ धारा परंदै लै प्राथणा करदअ। 29 जांऊं प्रभू

प्राथणा करदअ त लागअ द, ता प्रभू मूँहो रूप बधळुअ और तेऊए झिकळै हुए शेते और तियां लागै चमकदैं। 30 मूसा और एलिया लागै दुहै प्रभू संघे गल्ला करदैं। 31 तियां धेछूए बडी महिमा संघे और तियां लागै प्रभू यीशू मरनेए गल्ला बाता करदैं जिहअ-जिहअ येरुशलैमा दी आजू हणै आळअ त। 32 पतरस और तेऊए होर साथी तै निंजै भरुए दै और जांऊं तियां राम्बळै बिंऊंछुए ता तैबे धेछुअ तिन्नां का प्रभू यीशू महिमा और तियां दुई जळै जुंण प्रभू यीशू संघे खट्छुए दै थियै। 33 जांऊं तियां दुई प्रभू सेटा का बापस नाशदैं लागै; ता पतरसै प्रभू यीशू का बोलअ कि, "हे मालक, अह हूअ ठीक कि हाम्हें आसा इधी, हाम्हां बणाणें इधी चून मंडप, एक ताल्हे, एक मुसा लै और एक एलिया लै।" पर पतरसा का निं थोघै थिय कि सह किजै आसा लागअ द बोलदअ। 34 सह थिय बोलदअ ई लागअ द कि एक घणअ बादळ घोरुअ तिन्नां परंदै और जांऊं तियां तेऊ बादळा दी घेरदैं लागै ता तियां डरै। 35 और तेऊ बादळा जैदरा का हई एही आकाशबाणी कि, "अह आसा मेरअ शोहरू और अह आसा चुनअ द, एऊए शुणा।" 36 और एसा आकाशबाणी बाद त प्रभू यीशू मसीह एकै; और तियां रहै चुपचाप और जुंण बी तिन्नै भाळअ त; तेते गल्ला निं तिन्नै तिन्नां धैळै कोही का खोजी।

**दुष्टात्मां शाचअ द शोहरू ठीक करनअ**  
(मत्ती 17:14-18; मरकुस 9:14-27)

37 और दुजै धैळै जांऊं तियां धारा का उंधै होथै ता बडै भारी लोग आए तिन्नां सेटा लै कि कोई गिणती निं करी सकदैं। 38 और तिन्नां लोगे जेह्ल-मेह्लै जैदरा का पाई एकी हाका कि, "हे गुरु," हूँ करा ताखा अरज कि मेरै शोहरू लै कर किरपा, मेरअ आसा सह एकै शोहरू। 39 तेऊ दी आसा एक दुष्टात्मां शाची दी और सह ला लैळा पकारा; और सह मरोका तेऊ ईहै कि तेऊ का निखळा शेफा और सह हूआ धरनीं चाछळदअ और तेऊ हूआ बडी भारी तकलिफ। 40 मंए की ती तेरै चेलै सेटा बी अरज कि तेसा काढ पोहीं पर तियां निं काढी सकै।" 41 प्रभू यीशू बोलअ कि, "हे अविश्वासी और हठी लोगो, मूँह केभै तैणीं रहणअ तम्हां संघे, और केभै तैणीं रहुँ हूँ थारी सैहंदअ लागी? आपणें शोहरू आण ओहीं।" 42 सह त एछदअ ई लागअ द कि दुष्टात्मां शोटअ सह मरोळी करै धरनीं और नढैऊए प्रभू यीशू मसीह काढी तेऊ लै झाहळ कि एक का निखल पोहीं, और शोहरू हूअ रांबळअ और प्रभू सभाळअ सह तेऊए बाप्पू का। 43 तैबे सोभ लोग परमेश्वर माहा सामर्थी कामा भाळी हूए रहैन।

**एकी बारी भी आपणीं मौते बारे यीशू भविष्यवाणी**  
(मत्ती 17:22,23; मरकुस 9:30-32)

44 पर जांऊं सोभ लोग प्रभू तिन्नां कामां भाळी रहैन हूआ तै, प्रभू आपणें चेलै का बोलअ, "इन्नां गल्ला डाहै तम्हें शुणीं, किल्हैकि माह्णूओ शोहरू आसा लाअ द माह्णू ई ढाकी।" 45 पर तिन्नै निं अह गल समझी आथी, तैहीता अह गल तिन्नां का गुप्त रही; कि तियां समझी ना सके और एसा गल्ला पुछणा का बी डरा तै तियां।

**सोभी का बडअ कुंण आसा**  
(मत्ती 18:1-5; मरकुस 9:33-37)

46 और एकी धैळै लागै तियां आप्पू बिचै हठळदैं कि हाम्हां मांझै बडअ कुंण आसा? 47 प्रभू यीशू हेरी तिन्नै मने गल समझी और एक शोहरू आप्पू सेटा खळअ किय और 48 तिन्नां लै बोलअ कि, "जुंण बी मेरै नांऊंए एऊ शोहरू मने, सह मना मूँह और मेरै भेजणै आळै। किल्हैकि जुंण तम्हां बिचै होछै का बी होछअ आसा सह आसा सोभी का बडअ।"

**जुंण खलाफ निं आथी सह आसा फक्षा दी**  
(मरकुस 9:38-40)

49 तेबे यहूना प्रभू लै बोलअ, "हे मालक, हाम्हें भाळअ एक आदमी तेरै नांऊंए दुष्टात्मां काढदअ और हाम्हें किय तेऊ लै नाई बी किल्हैकि सह निं हाम्हां संघे हई करै बी हाम्हां पिछू एछदअ। 50 प्रभू यीशू तेऊ लै बोलअ कि,

“तेऊ लै नि नाई करी; किल्हैकि जुंण थारै खलाफ निं आथी सह आसा थारी तरफा दी।”

### सामरी लोगो यीशूओ बिरोध

51 जांऊं प्रभू यीशूए स्वरगा नाशणें धैळै नेळ थीयै, ता प्रभू यीशू मसीह किय येरुशलैमा लै नाशणेंओ बचार पाकअ। 52 और प्रभू भेजे आप्पू आजू-आजू दूत कि सामरिया गराऊंरै नाशें और तिधी करै मुल्है जैगा तैर। 53 पर तिन्नै निं प्रभू तिधी एछणें दैनअ किल्हैकि सह त येरुशलैमा लै चालअ द। 54 एसा गला भाळी याकूब और यहूना बोलअ इहय कि, “प्रभू, तेरअ के बचार आसा, हाम्हे आजा दैम कि सरगा का लोळी आग पळी और इयां लोळी सोभ भसम हुरे?” 55 पर प्रभू यीशू झाले तियां और बोलअ कि, “तम्हां का निं थोघ कि तम्हें केही आत्में आसा। 56 पर तेऊ काडी तिन्नां लै झांश कि और बोलअ कि “हूँ निं लोगे प्राणा नाश करदअ आथी आअ द, हूँ आसा सोभी बचाऊंदअ आअ द।” और तियां नाठै कसा होरी गराऊंअ लै।

### यीशूए चेलै बणणेंओ मोल

(मत्ती 8:19-22)

57 जांऊं तियां बाता हांडदै तै लागै दै, ता बिचा का बोलअ प्रभू लै कुणों इहय कि, “जिधा-जिधा लै तूह नाशे, मूँबी एछणअ ताह पिछू।” 58 प्रभू तेऊ लै बोलअ, “रुहले ह्आ जुहळी और सरगै उडदै पंछीए ह्आ बसेरै, पर माळ्णू शोहरू लै निं मुंडा लुआरनें जैगा बी आथी। 59 और प्रभू एकी होरी लै बोलअ कि, “मूँह पिछू एछ, पर तेऊ उत्तर दैनअ कि, “हे प्रभू, मूँह दै पैहलै आपणें बाप्पूए क्रिआ करम एछणें करी।” 60 प्रभू तेऊ लै बोलअ, “मूँएदें दै मुल्दै जाळणें पर तूह शणांऊं नाशी करै परमेश्वरे राजे गला।” 61 और एकी बोलअ इहय कि, “हे प्रभू, हूँ चालअ ताह संघे, पर मूँह दै आपणें घरें एछणें बोली करै बिदा हई। 62 प्रभू तेऊ लै बोलअ; “जुंण बी आपणअ हाथ हळे आळी दी डाही करै पिछू भाळा, सह निं परमेश्वरे राजा जोगी आथी।”

### सत्तर चेलै भेजणें

10 इन्नां गला हणें का बाद प्रभू यीशू सतर होर चेलै चुनै और जहा-जहा नगरी और गराऊंरें प्रभू आप्पू नाशणअ त तिधा-तिधा लै भेजे तियां दुई-दुई करै आप्पू आजू। 2 और प्रभू तिन्नां लै बोलअ कि, “फसल आसा गई दी पाकी पर मजदूर आसा थोळे, एता लै करा खेचे मालक लै अरज कि होर मजदूर भेज।” 3 नाशा, हेरे, हूँ भेजा तम्हां भेडै भेशे; बराघा बिचा लै। 4 तैहीता नां तम्हें बटुअ निर्ई, ना झोळी, ना बूट और ना ता बाता कसा लै नमस्कार करदै लागी। 5 जहा घरें बी तम्हें नाशे, पैहलै ल्पे तेऊ घरे राजी खुशी मांगी। 6 जै तिधी कुंण गुण-जशा जोगी होए, तै लागणअ थारअ गुण-जश तिधी, नाई ता एछणअ बापस फिरी। 7 और तम्हें रहै बी तेऊई घरें और जुंण बी तियां दैए तेता ई खाए-पिए, किल्हैकि मजदूर लोळी तेऊए मजदूरी भेटी जरूरी, और घरें-घरें फिरदै निं लागी। 8 और जेसा नगरी तम्हें नाशे, और तिधे लोग तम्हां लै बेशणा लै बोले, ता तम्हें खाए-पिए तेताई जुंण तियां थारै मुँहा सेटा डाहे। 9 तिधे बमारा करै राम्बळै; और तिन्नां का बोले इहय कि ‘परमेश्वरो राज आअ तम्हां नेळ।’ 10 पर जसा नगरी तम्हें नाशे, और तिधे लोग तम्हां नाई मने, ता तिधी नाशे तम्हें बज्जारै बोलदै कि 11 ‘थारी नगरीओ धूळअ बी जुंण म्हारै खूरै शाचअ त, अह तुळकअ हाम्हे तम्हां नदरी, तैबी बी एसा गला ल्पे तम्हें समझी कि परमेश्वरो राज आसा पुजअ द तम्हां नेळ।’ 12 हूँ बोला तम्हां लै सच्चअ कि न्याए धैळै हणी तेसा नगरीए दशा, सदोमे दशा का बी बुरी।

### विश्वास नाई करनै आळी नगरी लै हाय।

(मत्ती 11:20-24)

13 “हाय खुराजीन नगरी! हाय बैतसैदा नगरी! जुंण सामर्था काम तम्हां बिचै कियै, जै तियां सूर और सैदा नगरी कियै हंदै, ता तिन्नां बेशणअ त छारे रूळी परेंदै और बोरी बान्ही करै हेरनअ त कधु मन बदळी। 14 पर न्याये धैळी हणी थारी दशा सूर और सैदा नगरी का बी खासी कशटा करै भरुई दी। 15 हे

कफरनहूम, तू कै स्वरगा का बी उछटअ लाअ दा करी? तूह पाणअ पैईताळा का बी हेटै।

16 “जुंण थारी शुणें, सह शुणां मेरी, और जुंण तम्हां तुछ समझा, सह समझा मूह तुछ और जुंण मूह तुछ समझा; सह समझा मेरै भेजणें आळे तुछ।”

### सत्तर चेलैओ बापस फिरनअ

17 तियां सत्तर जळै बडै खुशी-खुशी करै प्रभू सेटा लै बापस आए और तिन्नै प्रभू का बोलअ कि, “हे प्रभू, हाम्हे की दुशट आत्मां बी तेरै नांऊंअ करै आपणें बशै।” 18 प्रभू तिन्नां लै बोलअ, “हूँ थिय शैताना भाळअ लागअ द, सह पटिकअ सरगा का बिजळी जिहअ। 19 भाळा, मंरें दैनअ तम्हां लै सरपा और बिचू जेंटणेंओ, और दुशमणें सारी सामर्था दी अधिकार; और तम्हां निं कोही गला करै कोई बी हानि हणी। 20 तैबी बी तम्हें एता करै निं जादै खुशी हई कि आत्मां आसा थारै बशै, पर तम्हें हरे एसा गला लै खुशी कि थारै नांअ आसा स्वरगै लिखै दै।”

### यीशूओ खुश हणअ

(मत्ती 11:25-27; 13:16,17)

21 तेसाई घळी प्रभू पबित्र आत्मां करै बडै आनंदा दी भरुअ और बोलअ, “हे पिता, स्वरगा और पृथुईए मालक, हूँ करा तेरअ धन्यवाद कि तंरें डाही इयां गला ज्ञानी और समझदारा का गुप्त पर इन्नां बचै का की प्रगत किल्हैकि ताह लागअ इहय ई रांबळअ।” 22 और प्रभू बोलअ कि, “मेरै बाप्पू सभाळी मुखा सोभै गला; और कोहै निं जाणदअ कि शोहरू कुंण आसा, सिधअ बाप्पू जाणा एसा गला। और इहय बी निं जाणदअ कि बाप्पू कुंण आसा, पर शोहरू जाणा एसा गला; और सह बी सका जार्णी जसा का सह शोहरू खोजे।”

23 तैबै प्रभू चेलै बाखा फीरी करै एकांता दी बोलअ कि, “धन्य आसा तियां आच्छी जुंण इन्नां गला हेरा जुंण तम्हें भाळै आसा लागै दै। 24 किल्हैकि हूँ खोजा तम्हां का कि बडै भारी भविश्याबगता और राजे बी चाहअ कि जुंण गला तम्हें भाळा, तियां बी भाळे; पर तियां निं भाळी सकै, और जुंण गला तम्हें शुणा; तियां बी शुणें, पर तियां निं शुणी सकै।”

### दयालू सामरीओ दृष्टांत

25 और हेरे तिधी आअ एक बकील और सह लागअ प्रभू लै इहय बोली करै परखदअ कि, “हे गुरु, अनंत जिऊंणां पाणा लै हूँ कै करुं?” 26 प्रभू तेऊ लै बोलअ कि, “बिधि बधाना दी किजै आसा लिखअ द? और तूह किहअ पढळा?” 27 तेऊ उत्तर दैनअ कि, “तूह करै आपणें पिता परमेश्वरा संघे आपणें सारै मना और सारे प्राण और सारी बुधि और सारी शगती संघे झूरी; और आपणें पडोसी संघे करै आप्पू जेही झूरी। 28 प्रभू तेऊ लै बोलअ कि, “तंरें बोलअ बिलकुल ठीक, इहय ई करै, तै रहणअ तूह जिऊंदअ।” 29 पर तेऊ आपणें आप इहय खोजणें साबै कि हूँ आसा पैहलैई धरमी, तेऊ प्रभू का पुछअ कि, “तै मेरअ पडोसी कुंण आसा?” 30 और प्रभू यीशू तेऊ लै उत्तर दैनअ कि, “एकी बारीए गल आसा एही कि एक आदमी नाठअ येरुशलैमा का यरिहो लै, और बाता घेरअ सह डाकू और सह लूटअ तिन्नै। और तेऊए झिकळै बी नियें तिन्नै खोल्ही और चिकी-मारी करै डाहअ सह मूँअ ना जिऊंदअ बाता शोटी। 31 और इहय हुअ कि तेसाई बाता नाठअ एक याजक, पर तेऊ सह भाळअ और सह लागअ हांडदअ। 32 इहय ई करै एक लेबी बी नाठअ तेसा बाता, और तेऊ भाळी लागअ सह बी हांडदअ। 33 पर एक सामरी मसाफर आअ तेसा बाता और तेऊ भाळी आई तेऊ दैया और तेऊ लै तरस खाअ। 34 ता सह तेऊ सेटा लै आअ और तेऊए जखमा दी तेल हळजै और दाखरस पाई करै पाटी बाहिं, और आपणीं शुंआरी दी बशैली करै एकी सराई लै निंअ और तेऊए बडी भारी सेऊआ टैहल की। 35 दुजे धैळै तेऊ दुई दनार तेऊ सराईए मालका लै दैनै और बोलअ कि, “एऊ मरीजे करै सेऊआ टैहअ, जुंण बी तेरअ खरचअ लागे; तेता दैऊं हूँ तालहै बापस फीरदा। 36 एबै थारी समझा दी अह जुंण डाकू करे घिरअ द थिय; इन्नां चीई

मांझे कुंण आसा एऊओ सचचअ पडोसी। 37 तेऊ उत्तर दैनअ कि, “सहैई आसा जुंणीं तेऊ लै दैया की।” प्रभू यीशू बोलअ, “तूह बी कर इहय ई।”

### मार्था और मरियमं घरै यीशू

38 एता बाद नाठअ प्रभू यीशू एकी गराऊंरें, और मार्था नांऊंरें एकी बेटळी बशैळअ प्रभू यीशू आपणें घरै; 39 और मरियम नांऊंरें ती तेसरी एक बैहण, सह प्रभूए पैरा सेटा बेठी करै लागी बचना शुणदी। 40 पर मार्था थकी सेऊआ टैहली करी-करी और सह प्रभू सेटा एछी करै लागी बोलदी कि, “हे प्रभू तम्हां निं किछै फिकर आथी भाळी कि मेरी बैहणीं आसा डाही दी हूँ एकै जल्लीं सेऊआ टैहली करदी लाई? एसा लै बी बोल हँनू कि मूँह संघे बी कर धख काम टैहला।” 41 प्रभू यीशू तेसा लै बोलअ, “हे मार्था, तूह करा खासी गल्लो हैळअ फिकर और तेखअ थका तूह। 42 पर एक गल आसा जरूरी, और सह उत्तम भाग आसा मरियमं चुनअ द, जुंण एसा का कोहे निं छडैऊई सकदअ।

### चेलै का प्राथणां करनीं सखाऊणीं

(मत्ती 6:9-13)

11 प्रभू यीशू त एकी जैगा प्राथणा करदअ लागअ द और जांऊं सह प्राथणा करी मुकअ ता तेऊए चेलै मांझे एकी बोलअ, “हे प्रभू जिहअ यहूना आपणें चेलै का प्राथणा करनअ सखाऊअ तिहअ ई सखाऊ हाम्हां का बी।”

2 प्रभू तिन्नां लै बोलअ, “जेभै तम्हें प्राथणा करे, तेभै बोले तम्हें इहय: हे पिता, तेरअ नांअ लोळी पबित्र मनअ और तेरअ राज लोळी आअ।

3 म्हारी धैळीए रोटी कर हाम्हां लै हर धैळै देई।

4 और म्हारै पाप कर माफ, किल्हैकि हाम्हें बी करा म्हारै हर अपराधी लै क्षमा और हाम्हां निं परिक्षा दी पाई।”

### प्राथणें बारै यीशूए शिक्षा

(मत्ती 7:7-11)

5 और प्रभू तिन्नां लै बोलअ कि, “तम्हां मांझे कुंण आसा इहय कि जसरअ एक दोस्त आसा और सह आधी राची एछी करै इहय बोले कि ‘हे साथी, मुहँ दै चअन रोटी।’ 6 किल्हैकि एक मसाफर आसा आअ द मेरें घरें और तेऊलै निं मुखा खैऊणा लै किछै आथी।’ 7 और सह बोला भितरा का कि ‘मूँह तंग करदअ निं लागै, एबै हेरअ हाम्हें दूआर बंद करी और मेरें लान्हें-सुन्हें आसा मूँह संघे चैनै सुतै दै, और एभै निं हूँ ऊझुई करै ताल्है रोटी देई सकदअ?’ 8 हूँ बोला तम्हां लै कि जै सह दोस्त हई करै बी चैनै का उझुई करै नां दैए, तैबी बी दैणअ तेऊ खळै उझुई तेऊए लाज शरम छाडी करै मांगणें भाळी तेऊलै जेतरा तेऊ जरूरत आसा, तेतरअ। 9 और हूँ बोला तम्हां लै कि मांगा, तै दैणअ तम्हां लै; लोळा, तै भेटणअ तम्हां, दुआरा दी करा टक-टक, तै खुलणअ सह तम्हां लै। 10 किल्हैकि जुंण मांगा, तेऊलै दैआ; और जुंण लोळा, तेऊलै भेटा; और जुंण दुआरा दी टक-टक करा तेऊलै खुला दुआर। 11 तम्हां बिचै इहय कुंण बाब आसा कि तेउओ शोहरू मांगा रोटी और सह दैआ तेऊ लै पाथर; और जै माहछली मांगा ता तेते बदळै दैआ तेऊलै सांप। 12 जै आंडअ मांगे, ता तेऊलै दैआ बिंचू। 13 जै तम्हें बूरै हई करै बी आपणें शोहरू लै राम्बळी जिजा देई सका, ता तै थारअ स्वर्ग रहणें आळअ पिता परमेश्वर आपणें मागणें आळै लै पबित्र आत्मा किल्है निं दैई सकदअ।”

### यीशू और बालजबूल

(मत्ती 12:22-30; मरकुस 3:20-27)

14 एता बाद प्रभू यीशू मसीह एकी आदमी का काढी एक काली दुष्टात्मा, और जांऊं सह काली दुष्टात्मा तेऊ का पोही काढी ता सह काल्ज आदमीं लागअ गल्ला करदअ और लोग हुऐ बडै भारी रहैन। 15 पर तिन्नां बिचै बोलअ कई इहय कि, “अह काढा शैताने नाऊंरें भूता-परते मालका करै इन्नां भूता-परते। 16 और कई मांगअ प्रभू यीशू का परखणा लै सगरै एक चिन्ह। 17 प्रभू

यीशू मसीह हेरी तिन्नें गल्ला जाणीं, और प्रभू यीशू मसीह तिन्नां लै बोलअ, “जहा राजा दी फूट पळा, सह राज निं बणीं रहंदअ और जहा घरै फूट पळा, सह घर हुआ नाश। 18 और जै शैतान आपणअ ई बरोधी होए ता तिन्नों राज किहअ करै रहणअ सलामत? किल्हैकि तम्हें बोला मुहँ इहय कि शैताना करै काढा इन्नां भूता-परते? 19 जै हूँ शैताना करै भूता-परते काढा, तै थारी संतान कसरी सहायता करै काढा? तैहीता तिन्नांई भरनअ थारअ न्याय करनेओ करज। 20 पर जै हूँ परमेश्वर शगती करै इन्नां भूता-परते दरळाऊआ, ता तै गअ परमेश्वरो राज तम्हां सेटा पुजी। 21 जांऊं बलबान आदमीं अस्त्र-शस्त्रा करै आपणें घरे रखवाळी करे, तैही रहणीं तेऊए धन सम्पती बची। 22 पर जै तेऊ का बडअ बलबान तेऊ लै चढाई करे, ता तै जीता तेऊ का सह बलबान और तियां अस्त्र-शस्त्र जेथ दी तेऊ भरोसअ त तिन्नां पाआ सह छडैऊई और तेऊए सारी सम्पती पा सह लूटी। 23 जुंण मूँह संघे नाई आथी सह आसा मेरअ बरोधी, जुंण मूँह संघे नाई झाळदअ सह पा पोछी।

### अधूरै सुधारा करै बिपत्ती

(मत्ती 12:43-45)

24 “जांऊं परेत आत्मां आदमीं का बागै निखळा, सह लोळा शुकी जैगा दी बशैघणा लै, और जांऊं तेसा नाई भेटा ता तेखअ बोला सह इहय कि मूँह डेऊणअ तेऊई घरा लै बापस जिधा का हूँ पैहलै निखळी दी आसा। 25 और बापस फिरी करै भाळा सह तेऊ घरा धोअ-शोअ द। 26 तेखअ आणा सह आप्पू संघे आप्पू का बी बूरी सात आत्मां और तियां पेठा तेथ दी सोभ, और तेऊ आदमिंए दशा हुआ पिछली दशा का बी जादी बूरी हालत।”

### धन्य कुंण आसा ?

27 जांऊं प्रभू यीशू मसीह इन्नां गल्ला बोली मुकअ ता लोगे भीळा बिचा का एकी बेटळी जारै-जारै बोलअ, “धन्य तेऊ गरभा लै जेथ तूह रहअ, और तियां मांऊं जुंण तंरें झुटै।” 28 प्रभू यीशू बोलअ, “हाँ, पर धन- धन आसा तियां जुंण परमेश्वरो बचन शुणां और मना।”

### स्वर्गीय चिन्हें मांग

(मत्ती 12:38-42)

29 जांऊं लोगे बडी भारी भीळ कठा हुआ ती, ता प्रभू यीशू लागअ बोलदअ कि एऊ जुगे लोग आसा बूरै; तियां लोळा चिन्ह, पर योना नबीए चिन्हां छाडी निं तिन्नां होर चिन्ह भेटणअ। 30 जिहअ योना नबी निनबे नगरीए लोगा लै चिन्ह हुआ, तिहअ ई हणअ हूँ बी लोगा लै चिन्ह। 31 दरखण देशे राणीं न्याये धैळी एऊ जमाने लोगा संघे उझुई करै लाणअ तिन्नां लै दोष कि सह आई सुलेमाने ज्ञाना शुणदी धरतीए दुजै कनारै का, पर हेरा, इधी आसा सुलेमाना का बी बडअ।” 32 निनबे लोगा बी लाणअ न्याये धैळी एऊ जमाने लोगा लै दोष, किल्हैकि योना नबीए गल्ला शुणीं फेरअ तिन्नें बुराई का आपणअ मन पिछ, और हेरा, इधी आसा योना नबी का बी बडअ।”

### शरीरो दिऊअ

(मत्ती 5:15; 6:22,23)

33 “कोहै आदमीं निं लाटू जाळी करै चोरी डांहदअ और नां तेऊ कूंचा हेठै डांहदअ पाई, पर सह डाहा लाटूए दिऊटा परेंदै ताकि बागै-भितरी नाशणें आळै सोभी लै प्रैशअ होए। 34 तेरी देहीओ लाटू आसा तेरी आछ, जै तेरी आछ ठीक होए, ता तै हणअ तेरअ सारअ शरीर प्रैशअ, पर जै तेरी आछ खराब होए ता तै हणअ तेरअ सारअ शरीर न्हैरअ। 35 तैहीता चतैन रहै कि जुंण प्रैशअ ताखा आसा, इहय निं हुआ कि सह न्हैरअ होए। 36 जै तेरअ सारअ शरीर प्रैशअ होए; और कोए बी भाग तेतो न्हैरअ ना होए, तै हणीं सोभे गल्ला एही प्रैशी, जिहअ लाटू जाळी करै प्रैशअ हुआ।

### शास्त्री और परीसी लै सीख (मत्ती 23:1-36; मरकुस 12:38-40)

37 जांऊं प्रभू यीशू इन्नां गल्ला बोलदअ त लागअ द, ता एकी फरीसी आदर्मी प्रभू सेटा अरज की कि हे प्रभू, आज्ञा खा मेरै घरै रोटी; और प्रभू यीशू मसीह नाठअ भितरा लै रोटी खांदअ। 38 और फरीसी लागअ एसा गल्ला सोचदअ कि प्रभू रोटी खाणें का पैहलै न्हैऊअ किलहै निं? 39 प्रभू तेऊ लै उत्तर दैनअ, “हे फरीसीओ, तम्हें कऊली और थाळू बागा का ता मांजा पर भितरा का आसा तम्हें कोहमीं और बुराई करै भरुए दै। 40 हे नरबुधियो, जुंणीं बाघलअ भाग बणांअ, तेऊ कै भितरा का बी निं आथी बणांअ द? 41 पर हां, भितरे चिजा करा दान, तेखअ भाळै तम्हें कि तम्हां लै हणीं सोभै गल्ला शुध।

42 पर हे फरीसीओ, तम्हां लै हाय! तम्हें पदीनेंओ और जळी बुटिओ और भाजी तरकारीओ दसुअ हेसअ ता दैआ, पर न्याय और परमेश्वरो प्रेम डाहा तम्हें पिछू, हूअ ता लोळी त इहय कि इन्नां बी रहा करदें और तिन्नां बी निं छाडदें। 43 पर हे फरीसीओ, तम्हां लै हाय! तम्हें सभा दी चाहा बडी जैगा बेशणअ और बागै भितरी चाहा तम्हें नमस्कार। 44 तम्हां लै, किलहैकि तम्हें आसा जिहै दाबै दै मुल्दें जिहै, जसा परेदी लोग हांडा पर तिन्नां का नि पतअ हंदअ।

45 तैबै एकी शास्त्री प्रभू लै बोलअ, “हे गुरु, इहय बोली करै करा तूह म्हारी निंदा।” 46 प्रभू बोलअ, “हे शास्त्रीओ, तम्हां लै बी हाय! तम्हें आसा ईहै बोझै जुंण कोहीए निं चखदें, और तिन्नां बोझा लादा तम्हें होरी माळू लै और आप्पू निं एकी गुंठी करै बी छूंहदें। 47 तम्हां लै हाय! तम्हें बणांआ तिन्नां संते कबरा जुंण थारै बाब दादें मारै दै आसा। 48 तम्हें आसा तेते गुआह और आपणें बाब दादें कियै दै कामां दी आसा तम्हें साझू, किलहैकि तिन्नां ता पाए तियां मारी और तम्हें खणां तिन्नां खाती। 49 तैहीता परमेश्वरे बुधी बोला इहय कि ‘मूह भेजणें तिन्नां सेटा लै संत और प्रेरित और तिन्नां पाणें तिन्नां मांझै ई जळै मारी और कई करने तिन्नां दुखी।’ 50 ताकि जेतरे संतो खून संसारे उत्पति ओही बहाऊअ द आसा, तेतो लेखअ जोखअ लणअ एऊ जुगे लोगा का। 51 हाबिले हत्या ओही जकरयाह तैणीं जुंण बेदी और मांदरा बिचै घात किय द आसा, हूँ खोजा तम्हां का सच्चाई कि तेतो लेखअ-जोखअ लणअ एऊई जुगे लोगा का। 52 हाय तम्हां व्यवस्था बणाणें आळै लै! कि तम्हें आसा डाही दी ज्ञाने कुंजी आप्पू का, ना ता तम्हें आप्पू स्वरगै नाठै और नां तम्हें तिन्नां नाशणें दैन्दे जुंण नाशी सका।”

53 जांऊं प्रभू तिधा का नाठअ ता फरीसी पळै पिछू और तियां लागै छफळदें कि खासी गले चरचा करनीं 54 और तियां रहै एसा गले ताका कि प्रभू मूँहा कोई बी गलत गल ढाकी सके।

### पाखंडे खलाफ चतैनगी (मत्ती 10:26,27)

12 तेतरी हुई हजारा लोगे भीळ कठा, कि लोग लागै एकी दुजै परेदी भाळै। ता प्रभू यीशू मसीह लागअ चेलै लै बोलदअ कि फरीसिए सजेळै का रहै चतान। 2 इहय निं किछै आथी ढोपअ द कि जुंण खोलणअ लागे और किछ निं आथी चोरी डाहअ द कि जसरअ पतअ निं लागणअ। 3 तैहीता जुंण तम्हें न्हैरे दी आसा बोलअ द, सह शुझणअ प्रेशै दी, और जुंण तम्हें पांडा भितरी काना पिछू बोलअ द आसा; तेतो हणअ छापरा का प्रचार।

### कसा का डरनअ (मत्ती 10:28-31)

4 “पर हूँ बोला तम्हां का जुंण मेरै साथी आसा कि जुंण शरीरा लै घात करी सका; तियां निं होर किछ करी सकदें; तिन्नां का निं डरी। 5 हूँ दैआ तम्हां लै चतैनगी कि कसा का डरनअ? मारी करै जसा नरका दी पाणेंओ अधिकार आसा, तेऊ का डरै, हाँ, हूँ बोला तम्हां का, सिधअ तेऊई का डरै। 6 दूई पैसेए कै पांज चेली निं बिकदी? तैबी बी निं परमेश्वर तिन्नां मांझै एकी बी

बिसरदअ। 7 इधी तैणीं कि थारै शरीरे आसा सोभ बाळ बी गीणें दै, तैहीता बोला हूँ डरी निं आथी, तम्हें आसा तिन्नां चेली का बढकर।

### यीशू मनणअ या नाई मनणअ (मत्ती 10:32,33; 12:32; 10:19;20)

8 “हूँ बोला तम्हां का कि जुंण मूँह माळूए सझनै मनै, सह मनणअ मूँह परमेश्वरे स्वरगदूते सझनै। 9 पर जुंण मुल्है माळूए सझनै नाई करै तेऊलै करनअ परमेश्वरे स्वरगदूते सझनै नाई।

10 जुंण मेरअ बरोधी हई करै किजै बोले, तेऊओ अपराध सका हई माफ, पर जण पवित्रआत्मे निंदा करे तेऊए अपराध निं कधि माफ हणें।

11 “जेभै लोग तम्हां प्रधाना और अधिकारिए सझनै निंए, तेभै निं हँळअ फिकर करी कि हाम्हां किहूअ करै और किहअ बोळणअ, या कै उत्तर दैणअ। 12 किलहैकि पबित्र आत्मां सखाऊणअ तम्हां का तेभी कि तम्हां किजै बोलणअ।”

### एकी सेठ मुखो दृष्टांत

13 तेखअ एकी लोगे भीळा बिचा का बोलअ, “हे गुरु, मेरै भाई लै बोल इहय कि बाप्पू संपतिए बांड दै मुल्है बी।” 14 प्रभू तेऊ लै बोलअ, “हे मांझूआ, हूँ कुंणीं आसा डाहअ द थारै फैसलै करदअ और बांडणीं करदअ?” 15 और प्रभू तिन्नां लै बोलअ, चतैन रहा, और हर प्रकारे लाळचा का डाहा आपणें आप बचाऊई: किलहैकि कोहीए जिन्दगी निं तेऊए खासी सम्पती करै बचदी।” 16 और प्रभू तिन्नां का एक दृष्टांत खोजअ कि, “एकी सेठे हुई जिम्मी दी बडी भारी पजैआ। 17 और सह लागअ आपणें मनै सोचदअ कि एबै मूँह कै करनअ? किलहैकि मुखा निं एतरी जैगा आथी कि आपणअ नाज पाणीं डाही सकूं। 18 और तेऊ सोचअ कि मूँह करनअ इहय कि मूँह बणाणीं होछी मणशी दरोटी खोलही करै बडी और तेथ डाहणअ मूँह आपणअ नाज; 19 और आपणें शाह लै दैणीं मूँह एही दसली कि तारखा आसा बडी भारी साला लै धन सम्पती डाही दी; चैन कर, खा पी और सुखी रह। 20 पर परमेश्वरै बोलअ तेऊ लै इहय कि, “हे मूर्ख, तूह मरनअ एसा ई राची और जुंण बी तंए कठा आसा किय द, सह कसरअ हणअ?” 21 इहयई आसा सह मांझू बी जुंण आप्पू लै धन माया कठा करा, पर परमेश्वरे नजरा दी निं सह सेठ आथी।”

### परमेश्वरा दी डाहा भरोसअ (मत्ती 6:25-34)

22 एता बाद प्रभू यीशू आपणें चेलै लै बोलअ कि, “तैहीता हूँ तम्हां लै बोला कि, आपणें प्राणें फिकर निं करी कि हाम्हां कै खाणअ, कै पिणअ ना आपणें शरीरे फिकर करी कि कै बाहणअ।” 23 किलहैकि रोटी का आसा प्राण और झिकळै का आसा शरीर बढकर। 24 इन्नां काऊडै लै दैआ धैन; ईयां ना ता बऊँदें और ना ता लऊँदें ना ता तिन्नां खेच खटळ हंदें, तैबी धाचा तिन्नां परमेश्वर आप्पै; तम्हें आसा इन्नां का जादें किम्पती। 25 तम्हां बिचै ईहूअ कुंण आसा जुंण फिकर करी करै एक घळी बी आजू बढाऊई सका? 26 तैहीता हूँ बोला तम्हां लै कि, “जै तम्हें एक होछअ जिहअ काम बी निं करी सकदें ता होरी गल्ला लै किलहै करा फिकर। 27 सोसने पेळा दी दैआ धैन कि तियां किहूअ करै बढा; तियां नां ता मैन्थ करदें और ना तियां कातदें; तैबी बी बोला हूँ तम्हां लै कि सुलैमाने राजे बी निं आपणीं जिंदगीए सारै राज पाठा दी तिन्नां मांझै कसा एकी बराबर झीकळै बाहै। 28 जै परमेश्वर घैहणीए घाहा लै जुंण आज्ञा आसा और काळा पाणअ सह जाळी, ईहै झिकळै भनैऊँआ; ता हे अल्पविश्वासिओ, तम्हां लै किलहै निं सकदअ सह भनैऊँई। 29 और तम्हें निं एसा गल्ला लोळै निं रहा लागी कि कै खाणअ, कै पिणअ और ना ता शक करा, 30 किलहैकि संसारे जाती रहा इन्नां गल्ला लोळी लागी; पर थारअ पिता परमेश्वर जाणा कि तम्हां किजै जरूरत आसा। 31 पर तम्हें रहे तेऊए राईसी लोळै लागी, ता तै भेटणीं तम्हां ईयां गल्ला आपणें आप।

**स्वर्गो धन**  
(मत्ती 6:19-21)

32 "हे होच्छी जेही जुंडळीए, उरै निं आथी, किल्हैकि थारै पिता परमेश्वरा लागअ भलअ इहय कि तम्हां लै दैणअ राज। 33 आपणीं सम्पती करा बेची करै दान; और आप्पू लै बणांआ ईहै बटूरे जुंग कधि पराणीं निं हंदै, अर्थात स्वर्ग करा आप्पू लै धन कठा जुंग कधि निं घटदअ, नां तेता नेळ चोर एछदअ और नां ता कीळै-काई खांदै। 34 किल्हैकि जिधी थारअ धन आसा, तिधी रहणअ थारअ मन बी लागी।

**बिऊधै रहा**

35 "थारी कुछी लोळी गाची बाह्नि रही, और थारै लाटू लोळी जळदै रहै। 36 और तम्हें बणा तिन्नां माळू, जिहै जुंग आपणै मालका न्हैळै रहा लागी, बैहा का केभै एछणअ फिरी कि जेभै सह दुआर टोके, ता तेभै खोळणअ नढैऊरे तेऊलै दुआर। 37 धन्य आसा तियां दास, जहा सह मालक एछी करै जागदै भाळे, हूँ खोजा तम्हां का सच्चाई कि जेभै सह तिन्नां रोटी खांदअ बशौळे, और तिन्नां सेटा एछी करै करनीं तेऊ तिन्नें सेऊआ। 38 जै सह राचीए दुजे पहरे या चिऊथै पहरे तिन्नां जागतै भाळे, ता धन्य आसा तियां दास। 39 पर एसा गल्ला लए तम्हें समझी कि जै घरे मालक का इहय पतअ हंदअ कि चोर केभै एछणअ ता तै रहणअ त तेऊ बिंऊतै और आपणें घरे निं तेऊ चोरी दैणीं ती हणै। 40 तम्हें बी रहा तैर; किल्हैकि जेसा घळी तम्हें सोची बी निं सकदै, तेसा घळी एछणअ हूँ।

**विश्वासा करनै या नाई करनै जोगी दास**  
(मत्ती 24:45-51)

41 तैबै पतरसै बोलअ, "हे प्रभू, एऊ दृष्टांता कै तूह सिधअ हाम्हांई का बोला कि होरी लै बी बोला?" 42 प्रभू तेऊ लै बोलअ, "सह विश्वास करनै जोगी और बुधिमान भडारी कुंण आसा, जसरअ मालक तेऊ सोभी नोकरा चाकरा लै देऊआ करदअ और कामां कराऊंदअ बणाए कि तिन्नां लै करै खाणै-पीणए चिजा दैई। 43 और धन्य आसा सह दास जसा तेऊओ मालक इहय ई करदै भाळे। 44 हूँ खोजा तम्हां का सच्चाई कि तेऊ बणाणअ सह आपणीं सारी संपत्तिओ भडारी। 45 पर जै सह दास इहय सोचदअ लागे, कि मेरअ मालक एछणा लै आसा माची देरी और सह नोकरा चाकरा चिकदअ मारदअ और शूर शराबा झुटदअ लागे, 46 ता तेऊओ मालक एछणअ तेसा धैळी, जहा धैळी सह न्हैळअ बी निं होए लागअ द और तेसा घळी; जहा सह जाणदअ बी निं आथी कि सह एछणअ, और तेऊ भेटणीं तेते सजा और सह गिळणअ अल्पविश्वासीए भागा संघे। 47 और सह दास जुंग आपणें मालकए इच्छा ता जाणां थिय पर तैर निं रहअ और ना ता आपणें सूआमीए साबै चलअ, तेऊ भेटणीं बडी भारी मार। 48 पर जुंग नजाणें दी मार खाणें जोगी काम करे, तेऊ भेटणीं थोळी मार। तैहीता जसा लै खासअ आसा दैनअ द, तेऊ का मांगणअ खासअ ई और जसा का खासअ डाहअ द आसा, तेऊ का काढणअ बी खासअ।

**यीशू एछणेंओ परिणाम**  
(मत्ती 10:34-36)

49 "हूँ आसा धरती दी आगी चैळदअ आअ द; हूँ होर एता सुआई किजै चाहा कि आग एभी जळे। 50 मुँह आसा एक बपतिस्मअ लणा लै, जेभै तैणीं सह निं हुअ तेभै तैणीं आसा हूँ और तेखअ हणअ पूरअ। 51 तम्हें किजै समझा कि हूँ धरती दी मेल मलाप करदअ आसा आअ द, हूँ बोला नाई, पर हूँ आसा आअ द जुदै करदअ। 52 किल्हैकि एभा पोही हणै एकी घरे पांज जळै आप्पू बिचै बिरोधी चिई जळै दुई का और दुई जळै चिई का। 53 बाप्पू शोहरू संघे और शोहरू डाहणअ बाप्पू संघे बैर, आम्मां शोहरी संघे और शोहरी आम्मां संघे, शाशुई नुशा संघे और नुशा डाहणीं शाशुई संघे जीद।"

**बगते नछैण**  
(मत्ती 16:2,3)

54 तेऊ लोगे भीळा लै बी बोलअ, "जेभै तम्हें बादळ पछमां बाखा भाळा, तेभै बोला तम्हें इहय कि पाणीं हणअ और इहयई ह्आ बी। 55 जेभै दखना बाखा हाऊआ चला, तेभै बोला तम्हें इहय कि लू लागणीं और इहयई ह्आ। 56 हे कपटिओ, तम्हें धरती और सरगे भेद सार ता सका समझी पर एऊ जुगो किल्है निं समझदै?"

**जिद्दी संघे मेल-मलाप**  
(मत्ती 5:25,26)

57 तम्हें आप्पै किल्है निं फेंसलअ लंदै कि ठीक किजै आसा? 58 जेभै तूह आपणें जीदी संघे जजा सेटा लै चालअ द आसा, ता बाताई कर तेऊ संघे फेंसलअ, इहय निं ह्आ कि सह नियां ताह जजा सेटा लै खींची और जज दैआ पुळसे हाथै और तियां पा ताह जेहला भितरी। 59 हूँ खोजा तम्हां का सच्चाई कि जेभै तैणी तूह पाई-पाई ना भरी छेके, तेभै तैणीं निं तूह तिधा का छुटी सकदअ।"

**मन फरेऊआ या हआ नाश**

13 और तेभै आये प्रभू सेटा तिधी कई लोग और तियां लागै गलीली लोगे बारै दी चरचा करदै, जसरअ लोहू पिलातुसै तिनेई बळीदाना संघे मलाऊअ त। 2 इहय शुंणीं करै प्रभू तिन्नां लै जबाब दैनअ, "तम्हें किजै समझा कि ईयां गलीली कै होरी गलीली का पापी थिये कि तिन्नां लै पळी एही बिबता?" 3 हूँ बोला तम्हां लै इहय कि नाई; पर जै तम्हें आपणअ मन ना फरेऊए, तै हणै तम्हें बी इहयई करै नाश। 4 या तम्हें कै समझा कि तियां ठारह लोग जसा परदैं शिलोहे पुंडरी पळी और तियां मुँए दाभूई करै; तियां के येरुशलेमा नगरी दी रहणें आळे होरी सोभी का खास्सै पापी थिये? 5 हूँ बोला तम्हां लै कि तियां नाई तै पापी आथी; पर जै तम्हें आपणअ मन बुराई का नाई फरेऊए, तम्हें बी हणै ईहैई करै नाश।"

**फळा बिणहीं अंजीरे बूटो दृष्टांत**

6 तेखअ प्रभू यीशू मसीह तिन्नां का एक दृष्टांत खोजअ कि, "एकीए अंगूरे बगीचे दी थिय एक अंजीरो पेळ लागअ द; सह लागअ तेथ फळा लोळअ पर तेऊ निं भेटी, 7 तैबै तेऊ बगिचेए चरुकीदारा लै बोलअ कि भाळ, चिई साला ओही आसा हूँ एऊ पेळा दी फळा न्हैळअ लागअ द, पर मुखा निं एथ एक दाणअ बी धेछुअ, एऊ पाआ ऐबै काटी, अह आसा थोघे बाझी जिम्मीं दी शलैउआ लांदअ।" 8 तेऊ चरुकीदारै उत्तर दैनअ कि हे मालक एसा साला दै एऊ रहणें, हूँ पाऊं एता चरु बाखा खळीं करै खाद-गोबर। 9 जै आगली साला एथ फळ एछे ता ठीक, नाई ता तेखअ पाणअ मुँह अह काटी।"

**सबते धैळी कुबळी बेटळी ठीक करनीं**

10 सबते धैळी त प्रभू यीशू मसीह आराधनालै दी उपदेशा दैदअ लागअ द, 11 और एक बेटळी ती तिधी एही, तेसा ती ठाराह साला ओही एक कमजोर करनै आळअ भूत शाचअ द, और सह ती बाख कुबळी हुई दी और सह निं आजरी खळी बी हुई सकदी ती। 12 प्रभू यीशू सह भाळी और आप्पू सेटा लै शादी संघा तेसा लै बोलअ कि, "हे नारी, तूह छुटी आपणीं कमजोरी का।" 13 और प्रभू यीशू मसीह तेसा दी हाथ लाअ और सह हुई सिधी खळी और सह लागी परमेबरे जै-जैकार करदी। 14 प्रभू यीशू मसीह की ती सह सबते धैळी राम्बळी, ता आराधनाले सरदारै बोलअ जिदै मारै लोगा का इहय कि छः धैळै आसा जेथ काम लागा करनअ, और तिन्नांई धैळी ह्आ ठीक पर सबते धैळी निं हणअ। 15 इहय शुणीं करै प्रभू उत्तर दैई करै बोलअ, "हे कपटिओ, सबते धैळी कै तम्हें आपणें डागै धणा का गळैऊंडी का खोल्ही करै पाणीं निं पणेंऊंदै? 16 अह कै ठीक नाई त आथी कि अह बेटळी बी आसा अब्राहम शोहरी, शैतानै ती अह ठाराह साला ओही डाही दी ढाकी, और सबते धैळी आज्ञा तेऊ बंधना का छुटी?" 17 जाऊं प्रभू यीशू मसीह



ईयां गल्ला बोली ता प्रभूए सारै बिरोधी हुऐ शरमिदै और होर सारै लोग प्रभूए इन्नां कामां भाळी जुंण सह करा तै, तियां हुऐ खुश।

### राईए दाणेंओ दृष्टांत

(मत्ती 13:31,32; मरकुस 4:30-32)

18 तेखअ बोलअ प्रभू इहय कि, “परमेश्वरो राज कसा जिहअ आसा? हूँ तेता कसा जिहअ खोजूँ। 19 सह आसा एक राईए दाणें जिहअ, जुंण एकी माळूँ बगिचै दी बूऊअ: और सह बणअ बढी करै बडअ पौधअ; चेलू पखीरू किय तेथ दी बसेरअ।”

### सज्जेळेओ दृष्टांत

(मत्ती 13:33)

20 प्रभू तेखअ इहय कि हूँ तम्हां का परमेश्वरो राज कसा जिहअ खोजूँ? 21 सह आसा ईहै सज्जेळे जिहअ; जुंण एकी बेटळी चिई सेरा पिठै दी मुछअ और सिज्जी करै बणीं सह सारी आरी सज्जेळअ।”

### सांगळअ दुआर

(मत्ती 7:13,14; 21-23)

22 प्रभू यीशू नगरी-नगरी और गराऊंरें- गराऊंरें उपदेशा दैदी त लागअ द येरुश्लेमा लै नाशदअ। 23 और कुणीं पुछअ इहय कि, “हे प्रभू, मोक्ष कै सिधै थोळे आदमीं भेटणअ?” 24 प्रभू तिन्नां लै बोलअ, “सांगळें दुआरा बाती करा नाशणेंए कोशिश, हूँ खोजा तम्हां का सच्चाई कि कई लोगा चाहणअ तेसी बाती नाशणअ पर तियां निं नाशी सकदै। 25 जांऊं घरे मालक दुआर बंद हेरनअ करी और तम्हें हणें बागें खट्खट्टे दै दुआरा टोकदै कि हे प्रभू, हाम्हां लै बी खोल, और तेऊ दैणअ इहय ज़बाब कि हूँ निं तम्हां जाणदअ कि तम्हें किधे आसा?” 26 तेभै बोळणअ तम्हां इहय कि हाम्हें ता तेरै सल्लनै खाअ-पिअ और तंरें दैनअ त म्हारै लाकै दी उपदेश बी। 27 पर तेऊ बोळणअ तम्हां लै इहय कि, “हूँ निं तम्हां जाणदअ कि तम्हें किधे आसा, हे कुकरमियां मूँह सेटा का नाशा दूर।” 28 तिधी हणअ लेरनअ और दांद पिशणअ, जेभै तम्हां अब्राहम, इसहाक, याकुब और सारै भबिश्याबाणीं करनै आळें परमेश्वरे राजा दी बेटे दै भाळे और आपणें आप धेछणें तम्हें बागें निखळदै। 29 और तिधी एछणें पुरबा-पछमां और उतर-दखना का परमेश्वरे राजा दी भोजा खांदै। 30 और जुंण पीछू आसा तियां हणें आजू और जुंण आजू आसा तियां हणें पीछू।

### राजै हेरोदेसे दुशमणीं

31 तेभै बोलअ कई फरिसी इहय प्रभू लै कि “ईधा का नाश दूर किल्हैकि हेरोदेस चाहा ताह मारनअ।” 32 प्रभू तिन्नां लै बोलअ, नाशा, तेऊ रुहलै लै बोला इहय कि भाळ आझ और काळा काढा हूँ दुश्टआत्मां और बमारा करा हूँ राम्बळे और चिऊथै धैळै करनअ मूँह आपणअ काम पूरअ। 33 तैबी बी आसा मूँह आझ, काळा और परशी हाडणअ जरूरी, किल्हैकि इहय निं हई सकदअ कि कोई भबिश्यबगता कुण येरुशलेमा नगरी का बागें मारे।

### येरुश्लेमा लै विलाप

(मत्ती 23:37-39)

34 “हे येरुशलेमा! हे येरुशलेमा! तूह जुंण भबिश्याबगता मारी पाआ, जुंण ताह सेटा लै भेजे दै आसा, तिन्नां लै दैआ पाथरो ढो, केतरी बारी मंरें चाहअ कि जेही मुरगी आपणें बच्चै आपणें फेंखा हेठै कठा करा, तिहैई ही चाहै मंरें कि तेरै शोहरू करनै मूबी कठा, पर तंरें निं इहय हणें दैनअ।” 35 भाळा, थारअ घर छाडअ मंरें तम्हां लै शुनअ और जेभै तैणीं तम्हें आप्पै निं इहय बोले कि “धन्य आसा सह जुंण प्रभूए नांऊंरें एछा, तेभै तैणीं निं हूँ तम्हां का भी धेछणअ।”

### फरीसीए घरै यीशू

14 एता बाद प्रभू यीशू मसीह सबते धैळी फरीसिए कसा एकी सरदारो घरै रोटी खादअ बेटअ और तियां तै प्रभू घात करनेए ताका दी। 2 और एक आदमीं आअ प्रभू यीशू सेटा, तेऊ ती झलोदरे बमारी। 3 एता भाळी प्रभू यीशू मसीह शास्तरी और फरीसी लै बोलअ कि, “सबते धैळी एऊए बमारी ठीक करनी सही आसा कि गलत?” पर तियां रहै चुप्पी। 4 तैबै प्रभू तेऊ बमारा माळूँ लै हाथ लाअ और सह हुअ रांबळअ और तेऊ दैनअ नाशणें। 5 और प्रभू तिन्नां लै बोलअ कि, “तम्हां बिचै इहय कुंण आसा जसरे गाभू या बाछू कुऐं दी पळे और सबते धैळी सह बागा लै नढैऊए नाई काडे?” 6 तियां निं एसा गोलो उत्तर दैई सकै।

### नम्रता और पाहूणेंओ आदरमान

7 जांऊं प्रभू यीशू मसीह भाळअ कि छांदे करी शादै दै लोग किल्है चाह बडी जैगा दी बेशणअ, ता प्रभू यीशू मसीह तिन्नां लै एक दृश्टांत खोजअ 8 कि, “जेभै तम्हां कुंण बैहा-कारजा लै शादे, ता बडी जैगा निं बेशणअ इहय निं हआ कि तेऊ होए तम्हां का बी बडै लै छांदअ किय द 9 और जुंणीं ताल्लै और तेऊ दुही लै आसा छांदअ किय द; जै सह इहय बोले कि एसा जैगा दै एऊ लै बेशणा लै, और तेभै लागणअ ता शरमिदै हई करै सोभी का होच्छी जैगा दी बेशणअ। 10 पर जेभै ताह शादे, तेभै बेश सोभी का होच्छी जैगा दी, ताकि सह जुंणीं ताल्लै छांदअ आसा किय द, सह इहय बोले कि हे साथी, इधी बेश आजू: तेभै हणीं तिन्नां होरी बिचै तेरी बडाई। 11 जुंण बी आपणें आप बडअ बणें, सह हणअ होछअ और जुंण आपणें आप होछअ समझे, सह करनअ बडअ।”

12 तेभै प्रभू आपणें तेऊ छांदे करनै आळें लै, जुंणीं प्रभू आपणें घरा लै शादअ त तेऊ लै बोलअ, “जेभै तूह कलारी या बैळी खाए, तेभै निं तूह आपणें बडै टबरा साथी भाई या सेटा पड़ोसी शाददअ लागी, इहय निं हआ कि तियां बी ताल्लै छांदअ करे और तियां लूए तेतो बदळअ। 13 पर जेभै तूह रोटी खाए, तेभै शादै गरीब, कंगाळ लैंगळें, काणें और टुँडें। 14 तै हणअ तूह धन्य, किल्हैकि तिन्नां का निं ताल्लै बदळें लणा लै किछे आथी, पर जेभै धरमीं माळूँ ज़िऊई उझणें, तेभै भेटणअ ताह एतो प्रतिफल।”

### बडै भोजो दृष्टांत

(मत्ती 22:1-10)

15 प्रभू संघे घेहळी बेटे दै एकी जहूँ इन्नां गल्ला शुणीं करै प्रभू का बोलअ, “धन्य आसा सह जुंण परमेश्वरे राजा दी रोटी खाए।” 16 प्रभू तेऊ लै बोलअ, “एकी आदमीं दैनअ बडअ भोज और तेऊ शादे बडै भारी लोग।” 17 जांऊं धाम खाणा लै तैर गई हई ता तेऊ आपणें सेऊआकारा का सोभी लै छांदअ भेजअ कि एछा, धाम गई तैर हई। 18 पर तियां सोभ लागै माफी मांगदै। पैहलै बोलअ तेऊ का इहय कि मंरें आसा लअ द एक खेच मोलै, ता मूँह लागा तेते हेर सभाळ करनीं जरूरी, ता हूँ निं तै एछी सकदअ ! 19 दुजे बोलअ इहय कि मंरें आसा पांज ज़ोळी बल्द लूए दै, और आझ आसा लाए दै मंरें तियां परखी कि हळै हांडा बी कि नाई? इहय करै मुल्है छाड माफी, हूँ निं एछी सकदअ। 20 और एकी होरी बोलअ इहय कि मंरें आसा एभै बैह किय द और हूँ निं एछी सकदअ। 21 और तेऊ सेऊआकारै खोजी ईयां सारी गल्ला आपणें मालक का, तैबै आई घरे मालक रोशै और तेऊ आपणें सेऊआकारा लै बोलअ, नगरीए बजारै और गळी-गळी नाश और गरीब कंगाळ, लाटै टुँडें और आंधें टाटै आण इधा लै शादी। 22 और तेऊ सेऊआकारै बोलअ आपणें मालक का भी इहय कि हे मालक, जिहअ तंरें बोलअ त मंरें किय तिहअई; पर मैची बी आसा जैगा खाली। 23 मालक तेऊ लै बोलअ, बाता हांडदै और ओरी-पोरी नाशी करै आण लोगा ज़बरदस्ती बी शादी मेरअ घर लोळी भरूअ। 24 किल्हैकि हूँ बोला ताखा इहय कि तिन्नां रिशतैदारा, जसा लै छांदअ किय त तिन्नां मांझे निं मूँह लोळी एक बी धामा खादअ बेटअ।”



### चेले बळणेंओ मोल (मत्ती 10:37,38)

25 प्रभू यीशू मसीह पिछू ती एक बडी भीड़ लागी दी हांडदी ता प्रभू पिछू फिरी करे तिन्नां लोगा लें बोलअ, 26 “जै कुंण मूँह सेटा लें एछे, और आपणें आम्यां-बाप्पू, बेटळी माठै, भाई बैहण, इधी तैणीं कि आपणें प्राणा लें बी मुखा ज़ादी झूरी करे, सह निं मेरअ चेलअ बर्णी सकदअ। 27 और जुंण कोई आपणअ कूस नाई चके, और मूँह पिछू नाई एछे, सबी निं मेरअ चेलअ बर्णी सकदअ। 28 तम्हां बिचै इहय कुंण आसा कि गहळ चाहा बणाणअ और पैहलै बेशी करै तेतो खरच ना ज़ोळे, कि एता हूँ पूरअ बी सका करी कि नाई? 29 किधी इहय निं हआ कि आथरी लाई करै तेऊ त्रिणीं निं सके और लोगा करनअ तेता भाळी करै मज़ाक 30 कि अह बणांदअ ता लागअ त पर बणाई निं सकअ? 31 या इहय कुंण राजअ आसा कि दुजै राजै संघे जुधा करदअ ता नाठअ, पर पैहलै बेशी करै इहय बचार निं किय कि जुंण बिहा हजारा फौज़ी पाई करै आसा लागअ द मूँह संघे जुधा लें एछदअ, तेऊओ मकाबलअ हूँ इन्नां दसा हजारा करै करी सका कि नाई? 32 नाई ता दूरा का ई दूत भेज्जी करै करनअ तेऊ संघे समझऊतअ। 33 ठीक इहयई तम्हां मांझै जुंण आपणअ सोभ किछ जेभै तैणीं त्याग ना करे, सह निं मेरअ चेलअ हई सकदअ।

### नसादअ लूण (मत्ती 5:13; मरकुस 9:50)

34 “लूण ता आसा ठीक पर जै लूणों सुआद बिगळे ता तेथ किज्जू करै पाणअ सुआद? 35 सह ना ता जिम्मीं लें और ना ता खादीए कामें एछदअ, तेऊ पा लोग बागै शोटी। जस्रै शुळणा लें कान आसा, सह शुणा।”

### लुकी दी भेडो दृष्टांत (मत्ती 18:12-14)

15 प्रभू यीशू मसीह सेटा लें एछा तै सोभ चुंगी लणें आळै और पापी आदमीं ताकि तेऊए शूणी सकै; 2 पर फरीसी और शास्त्री लागे इहय बोलवै कि, “अह बेशा पापी और होछै लोगा संघे और तिन्नां संघे खा-पिया बी।”

3 तैबै प्रभू यीशू मसीह तिन्नां लें एक दृष्टांत खोजअ कि, 4 “तम्हां बिचै इहय कुंण आसा कि जसरी शौ भेडा होए, और तिन्नां मांझै एक लुके और सह नडिनुए भेडा जंगलै छाडी; तेसा लुकी दी भेडा लोळअ रहा तेभै तैणीं लागी, जेभै तैणीं सह भेड भेटी निं जाए? 5 और ज़ाऊं सह भेटी जाए, तैबै एछणअ सह बडअ खुशी-खुशी तेसा कान्हा चकी करै और 6 घरै खोजा सह सोभी का कठा करी कि बडी भारी खुशीए गल आसा, मेरी ती भेड लुकी दी और सह गई मूँह भेटी। 7 हूँ बोला तम्हां का इहय कि ठीक इहयई करै पापा का दूर हटणें आळै पापीए बारै बी हआ स्वरगै एही ई खुशी, जेतअर कि नडिनुए धरमीए बारै निं हंदी, जहा पापा का दूर हणें जरूरत ई निं आथी।”

### लुके दै सिक्केओ दृष्टांत

8 “या एही कुंण बेटळी होए कि जसा का दस सिक्के होए, और तेता बिचा का एक शोठिए; और सह लाटू ज़ाळी करै झाळी-तुहळकी करै जेभै तैणीं सह नाई भेदे, तेभै तैणीं रहा सह लोळी लागी। 9 और ज़ाऊं सह भेटी जा; ता सह खोजा आपणीं सोभी संघी-साथणीं का कठा करी करै कि मूँह संघे हआ सोभ खुश मेरअ त सिक्कअ शोठुअ द एबै गअ मूँह सह भेटी। 10 हूँ खोजा तम्हां का कि एकी मना फरेऊणें आळै पापीए बारै हआ परमेश्वरै स्वरगदूता सहनै एही ई खुशी आनंद।”

### ऊड़ाऊ पुत्रो दृष्टांत

11 तेखअ बोलअ प्रभू इहय कि, “एकी आदमींए थियै दुई शोहरू। 12 तिन्नां मांझै होछै बोलअ आपणें बाप्पू का इहय कि हे बाप्पू, मेरी बांड दै मुल्है ओही, और बाप्पू दैनीं तिन्नां लें धन सम्पती बांडी। 13 खास्सै धैळै बी नाई तै हूए कि होछअ शोहरू नाठअ सोभ गला कठा करी करै परदेसा लें और तिधी की

तेऊ आपणीं सारी सम्पती कूकरमां दी खतम। 14 ज़ाऊं सह सोभ किछ खरची मुकअ, ता तेऊ देशै पळअ नकाळ और सह हुअ कंगाळ। 15 और सह रहअ तेऊ देशै एकिए घरै नोकर, तेऊ डाहअ सह आपणें खेचै सुंगरा चराऊंदअ लाई। 16 और सह मालक चाहा त इहय कि जुंण तियां सुंगर खा तेता करै भरे अह बी आपणअ पेट, और सह निं तेऊलै किछ बी दैदअ त। 17 ज़ाऊं सह आपणें आप्पै दी आअ ता सह लागअ इहय बोलदअ कि, मेरे बाप्पूए नोकरा चाकरा बी भेटा तिन्नें पेटा भरनें का बी ज़ादी रोटी, और हूँ आसा इधी भुखै लागअ द मरदअ। 18 मूँह नाशणअ एबै आपणें बाप्पू सेटा लें बापस फिरी और मूँह बोळणअ आपणें बाबा लें इहय कि हे बाप्पूआ, मंए कीय परमेश्वरै खलाफ और तेरी नज़रा दी बूरअ काम। 19 एबै निं हूँ एता जोगी आथी कि तूह मूल्है आपणअ शोहरू बोले, मूँह डाह इधी आप्पू सेटा नोकरा जिहअ।

20 “तैबै सह तिधा का आपणें बाप्पू सेटा लें नाठअ, सह त मैची घरा का दूर जिहअई कि तेऊए बाप्पू आई तेऊ भाळी करै दैया और तुहरअ तेऊ सेटा लें और तेऊए गळा फेर पाई बाहा और बडी भारी चुंजी माखी दैनीं। 21 और तेऊ शोहरू बोलअ, “हे बाप्पूआ, मंए किये परमात्मै खलाफ और तेरी नज़रा दी बूरै काम। एबै निं हूँ एता जोगी आथी कि तूह मुल्है आपणअ शोहरू बोली सके। 22 पर तेऊ बाप्पू बी आपणें नोकर चाकर शादै और तिन्नां लें बोलअ, झटपटै आणा राम्बळै-राम्बळै झिकळै और एऊ लें भनैऊंआ और एऊए हाथै भनैऊंआ सुत्रेए मुंदळी और खूरा लें दैआ नंऊरे बूट, 23 और खुडा का आणा धाचअ द बडअ गाभू, तेऊ काटा और सोभी लें दैआ धाम। 24 किल्हैकि मेरअ अह शोहरू गअ त मुल्है मरै बराबर हई, अह त लुकअ द और एबै गअ अह भेटी; अह त मुअ द पर अह हुअ भी जिऊंदअ, और तियां लागै सोभ खुशी मनाऊंदै।

25 “पर तेऊओ ज़ेठअ शोहरू त खेचा लें नाठअ द और ज़ाऊं सह बापस घरा नेळ पुजअ ता तेऊका शुळुंआ गाणें-बज़ाणें और नाचणेंए छेळ। 26 तेऊ पुछअ एकी नोकरा का कि ऐथ कै आसा लागअ द हंदअ? 27 तेऊ नोकरे बोलअ कि तेरअ होछअ भाऊ आअ घरा लें फिरी और तेरै बाप्पू काटअ तेऊए सलामतीए खुशी दी खुडै धाचअ द बडअ गाभू, किल्हैकि तेऊ भेटअ सह राजी रांबळ बापस। 28 इहय शूणीं करै आई तेऊ बडै शोहरू बडी भारी रोशै और तेऊओ निं भितरा लें नाशणेंओ मन बी किय: पर तेऊओ बाप्पू आअ बागा लें और सह लागअ तेऊ मनैऊंदअ। 29 और तेऊ आपणें बाप्पू का बोलअ कि “भाळ, एतरी साला ओही आसा लागअ द हूँ तेरी सेऊआ चाकरी करदअ, और हूँ नि कधि तेरै खलाफ नाठअ, तैबी बी निं तंए कधि मुल्है एक होछअ जिहअ मिम्मू बी दैनअ कि आपणें साथी भाई संघे खुशी मनाऊं। 30 पर ज़ाऊं अह तेरअ शोहरू जुंणीं तेरी सारी सम्पती रांडा पिछू खतम की और एभै आअ अह सोभ किछ बरैबाद करी करै घरा लें और तंए काटअ एऊ लें खुंडी धाचअ द बडी नसलिओ गाभू! 31 बाप्पू तेऊ लें बोलअ कि हे बेटैआ, तूह हआ धैळ मूँह संघे और जुंण बी मेरअ आसा सह आसा तेरअ ई 32 पर एभै चाहिए ताह बी खुशी मनाऊंणीं, भाळ, तेरअ भाऊ गअ त मरी और अह हुअ एबै भी जिऊंदअ, अह त लूकअ द और एबै भेटअ अह भी।

### चलाक भडारी

16 तेखअ प्रभू यीशू मसीह चेलै का बी बोलअ कि, “एकी सेठो थिय एक भडारी, और लोगे लाअ तेऊ सहनै तेऊ भडारी लें इहय दोष कि अह करा तेरी सारी संपति बरैबाद। 2 ता मालक सह भडारी शादअ और तेऊलै बोलअ कि ‘लोगे भाळ तेरै बारै कै बोलअ? आपणें भडारीए धैळैओ लेखअ जोखअ दै मुल्है और आजू निं तूह भडारी रही सकदअ 3 तैबै भडारी लागअ इहय सोचदअ कि एबै हूँ कै करुं? किल्हैकि मेरै मालकै लाअ हूँ एबै नोकरा का पोही काढी, नां ता हूँ खेचै कदाळ चकी सकदअ और लोगे शरमै भीख किहअ करै मांगणीं? 4 तेऊ सोची एक तरकीब कि मूँह करनअ किजै इहय कि, जेभै हूँ एऊ भडारीए कामां का दूर होए, तेभै लोग ता डाहे मूँह आपणें घरै नोकरा। 5 और तेऊ आपणें सुआमिंए देनदारा मांझै हर एक जळै शादै और तिन्नां हरेकी का पुछअ कि ताह मेरै सुआमिंओ किजै आसा दैणा

लै? 6 एकी बोलअ इहय कि शौ मण तेल, तेऊ बोलअ इहय कि आपणी खाते बही निऊं और एथ लिख पजाह मण तेल। 7 और दुजै का तेऊ पुछअ कि ताह किजै आसा दैणा लै? तेऊ बोलअ कि मूँह आसा शौ मण कणक दैणा लै। और तेऊ बोलअ तेऊलै कि आपणी खातअ-बही निई करै लिख तेथ अशी मण कणक।

8 तेऊ मालक सह अधरमी भडारी सराहअ कि तेऊ किय बडी चलाकी संघे काम; किल्हैकि एऊ संसारे लोग आपणें बगते लगे रिती और बभारा दी आसा धरमी लोग का जादै चलाक। 9 और हूँ बोला तम्हां लै कि अधरमें धना करै बणां आपू लै मित्र; ताकि जेभै सह नाशे, ता तेभै तियां तम्हां आपणें बसेरें लै निए। 10 जुण थोळै का थोळै दी सच्चअ आसा; सह आसा खास्सै दी बी सच्चअ और जुण थोळै का थोळै दी अधरमी आसा सह आसा खास्सै दी बी अधरमी। 11 तैहीता जै अधरमें धना दी तम्हें सच्चै नाई रहे ता तम्हां का सच्चअ धन कसा सभाळणअ? 12 जे तम्हें पराए धना दी सच्चै नाई रहे ता तै जुण थारअ आसा, सह कुंणी लाअ तम्हां लै दैई?

13 “कोई बी दास निं दूई सुआमिणें सेऊआ करी सकदअ, किल्हैकि एकी संघे ता डाहणीं तेऊ झूरी और दुजै संघे हणअ तेऊ बैर या एकी संघे रहणअ तेऊ मिली और दुजअ हणअ तेऊ लै तुछ। परमेश्वर और धन, दुहीए निं तम्हें कठा सेऊआ करी सकदै।”

### यीशूए उपदेश

(मत्ती 11:12,13; 5:31,32; मरकुस 10:11,12)

14 फरीसी जुण लाळची थियै, तियां लागे इना गल्ला शुणीं करै ठठै करदै। 15 प्रभू तिन्नां लै बोलअ, “तम्हें माळूँ सहनै ता बणां आपणें आप धरमी; पर परमेश्वर का आसा थोघ कि थारै मनं किजै आसा, किल्हैकि जुण चिजा-बस्तिए साबै माळूँए नजरा दी महान आसा, सह आसा परमेश्वर नजरा दी नकाम्मअ।

16 “व्यवस्था और भविष्यवागता रहै यहून्ना तैणीं, तेऊ बगता ओही परमेश्वर राज्ये सुसमाचारा शणांऊंदै, और हर कोई आसा लागअ द बडी तेजी संघे तेथ नाशदअ। 17 आकाश और धरती टळणें पर बबस्थो निं एक बिंदू बी टळी सकदअ।

18 “जुण आपणीं बेटळी छाडी करै दुजी संघे बैह करा, सह करा भ्यभिचार, और जुण बी तैहा छाडी दी बेटळी संघे बैह करा, सह बी करा भ्यभिचार।

### सेठ आदमीं और गरीब लाजर

19 “एक सेठ आदमीं थिय, सह रहा त मुखमले रंगबरंगें झिखळे बाहिनै करै बडै सुख बिलासा दी बडी ठाठ-बाहटा दी। 20 और लाजर नांऊंओ एक गरीब थिय दुखणें फणींहणें करै भरुअ द, तेऊ दैआ तै लोग तेऊ सेठे खोळे लोग छाडी। 21 और सह चाहा त कि तेऊ सेठे खाणें-पिणें का बचअ द जुठअ सह खाई करै आपणअ पेट भरी सके, कुत्तै बी एछा तै तेऊए शरीरा दी पळे दै घाऊआ चाटदै। 22 और इहय हुअ कि सह गरीब मूँअ, और स्वरगदूतै निंअ सह, और सह बशैळअ अब्राहमें भोसळै। और सह सेठ बी मूँअ और सह डाहअ लोगे दाबी, 23 और अधोलोकै नाशी करै पळअ सह दुखा दी और तेऊ भाळअ उझै कि सह गरीब लाजर आसा अब्राहमें भोसळै बेटअ द। 24 तेऊ लाई अब्राहमां लै हाका कि हे पिता अब्राहम, एऊ लाजरा छाड मूँह सेटा लै, कि अह आपणीं गुंठीए मुंडकी पाणीं दी भेऊई करै मेरी जिभ ठाडी करे, हूँ आसा लागअ द एसा आगी जैदरी तळफदअ। 25 पर अब्राहमें दैनअ तेऊ लै जबाब इहय कि, “हे पुत्र आद फरेऊ, तूह आसा मुकअ द आपणीं जिंदगी सोभै राम्बळी चिजा भोगी, और तिहअई लाजरै आसा भोगी दी सोभ बुरी चिजा, तैहीता एऊ इधी शांती भेटी और तूह आसा लागअ द इधी तळफदअ। 26 और इन्नां सोभी गल्ला छाडी करै आसा हाम्हां और तम्हां बिचै एक बडी भारी बडी खाई बणाई दी; कि जुण इधा का पारा बाखा लै तम्हां सेटा लै एछणअ चाहे, तियां निं नाशी सके, और ना ता पारा बाखा का कोई हाम्हां सेटा लै एछी सके। 27 तेऊ सेठै बोलअ कि हे पिता, हूँ करा ताखा अरज कि तेऊ भेज बापस मेरै बाप्पूए घरै। 28 किल्हैकि मेरै आसा पांज भाई,

तिन्नां का खोजणीं मूँह ईयां सारी गल्ला, इहय निं हआ कि तियां बी एऊ नरके दुख दाह जैदरी पळे। 29 अब्राहमें तेऊ लै बोलअ, तिन्नां का आसा मूसा नबिए शास्त्रे कताबा, तियां सका तिन्नां शुणीं। 30 पर तेऊ बोलअ इहय कि नाई, बाप्पू, जै कोई तिन्नां सेटा मरी करै बापस डेऊए तै करनअ तिन्नां विश्वास। 31 अब्राहमें बोलअ, “जै कोई मूसा और भविष्यवागते नाई शुणदै ता जै मरी करै बी कुण जिऊई उझिए, तिन्नां निं तैबी सह मनणीं।

### टोहळ लागणेंओ कारण हणअ

(मत्ती 18:6,7,21,22; मरकुस 9:42)

17 तेखअ प्रभू यीशू मसीह आपणें चेलै लै बोलअ कि, “इहय निं हई सकदअ कि टोहळा निं लागे, पर हाय तिन्नां लोगा लै जसा करै टोहळा लागे। 2 जुण इन्नां होछै मांझै कसा एकी लै बी टोहळ खैऊआ, तेऊलै त इहय भलअ कि तेऊए गळै बाहणअ त घरट और सह पाणअ समुंदरै। 3 होशा बाशा दी रहा, जै तेरअ भाई अपराध करे, ता तै दैरे तेऊ समझाऊणीं जै सह पचताए, तै कर तेऊ लै माफी। 4 जै पूरी धैळी सह साता बारी अपराध करे, और साता ई बारी सह ताह सेटा एछी करै माफी मांगे, ता तेऊ लै करै माफी।”

### विश्वास

5 तैबै चेलै प्रभू लै बोलअ कि, “म्हारअ विश्वास बढअ एसा गल्ला शुणीं करै।” 6 प्रभू तिन्नां लै बोलअ, “जै तम्हां राईए दाणें बराबर बी विश्वास हन्दअ, तै सका तै तम्हें एऊ पेळा लै बोली कि जलैळै का पेछू और समुंदरै लाग, थारी गल मनणीं ती एऊ।

### एकी दासो फर्ज

7 “पर तम्हां मांझै इहय कुण आसा, जसरअ दास हळ जुंडा या भेडा चराऊआ, और जांऊं सह खेचा का काम-काज करी करै एछा ता तेऊलै बोला इहय कि नढैऊए बेश रोटी खांदअ? 8 और इहय निं बोले कि मुल्है बणांआ खाणां-पिणां लै और जांऊं तैणीं हूँ खाई-पी नाई मुके तेभै तैणीं कर मेरी गाची बाह्नी करै सेऊआ, एता बाद खाए तूह बी रोटी। 9 तेऊ कै आपणें तेऊ दासो बडअ सान-मान डाहणअ कि जुण बी काम मंणें देऊए, ईयां कियै एऊ सोभ? 10 एऊई साबै तम्हें बी तिन्नां कामां करी मुका जसा करना लै तम्हां लै आज्ञा दैनीं दी थी, और तेखअ बोलअ इहय कि हाम्हें आसा नकाम्में दास; कि जुण हाम्हां करनअ चाहीए त हाम्हें किय सहई।”

### कोहळे बमारी आळै दस रोगी ठीक करनै

11 और इहय हुअ कि येरुशलेमा लै नाशदी बारी प्रभू सामरिया और गलीला बिचीए बाता त लागअ द नाशदअ। 12 गरांऊंए बाती नाशदी भेटै प्रभू दस कोहळी। 13 और तिन्नां दूरा का ई खहळुई करै लैळा पाई और बोलअ कि, “हे प्रभू, हाम्हां लै कर दैया।” 14 प्रभू तिन्नां भाळी करै बोलअ, “नाशा, याजका का एछा तम्हें रहैऊई।” और हांढदी-हांढदी गए तियां रांबलै हई। 15 तैबै तिन्नां मांझै एकी भाळअ कि हूँ गूअ रांबळअ हई, तेऊ जोरै-जोरै परमेश्वर जै-जैकार की और सह फिरअ प्रभू सेटा लै बापस। 16 और तेऊ प्रभू यीशूए पैरै पळी करै माथअ टेकअ और तेऊ बडअ भारी धनयाबाद किय; सह त सामरी। 17 एता लै प्रभू यीशू बोलअ कि, “कै दस जळें निं हुए ठीक? तै तियां नौ जळें किधी आसा? 18 एऊ परदेसी छाडी होर कोहै निं निखळअ जुण परमेश्वर बडाई करदअ?” 19 तैबै प्रभू तेऊ लै बोलअ, “उझू नाश, तैरै विश्वासै किय तूह ठीक।”

### परमेश्वरो राज एछणअ

(मत्ती 24:23-28; 37-41)

20 जांऊं फरीसी प्रभू का पुछअ कि परमेश्वरो राज केभै एछणअ? प्रभू तिन्नां लै उत्तर दैनअ कि, “परमेश्वरो राज निं प्रगटअ एछदअ। 21 लोग निं इहय बोली सकदअ कि भाळा, इधी आसा, या तिधी आसा, किल्हैकि भाळा, परमेश्वरो राज आसा तम्हां बिचै।”

22 और प्रभू आपणें चेलै लै बोलअ, “ईहै धैळै बी एछणें, जसा दी तम्हां मेरी धैळी मांझै एक धैळी चाहणीं भाळणीं पर नाईं भाळी सकदै।” 23 लोगा बोलणअ तम्हां का कि भाळा, इधी आसा या तिधी आसा, पर तम्हें नाशै आपणी बाता, तिन्नां पिछू निं नाशी। 24 किल्हैकि जेही बिजळी सरगै एकी बाखा झमकी करै दुजी बाखा चमका, तिहअई हणअ माळुओ शोहरु बी एकी धैळै प्रगत। 25 पर पहलै आसा जरूरी कि सह बडअ भारी दुख चके और एऊ जुगे लोग तेऊ तुछ समझे। 26 जिहअ नूहे जमानें हुअ, तिहअ ई हणअ माळुओ शोहरुए जमाने बी। 27 जसा धैळी तैणीं नूहे जहाजा दी नाईं बेठअ, तेभै तैणीं रहै लोग खांदे-पिंदै लागी, और तिन्नां बिचै हआ तै शादी-बैह, और तेखअ हूए तियां जल प्रळया दी नाश। 28 और जिहअ लूते जमानें हुअ, कि लोग रहै खांदे-पिंदै और लैण-दैन करदै, पेळा पौधै लांदै और घरा-बणां बणांदै। 29 पर जहा धैळी लूत सदोमा का निखळअ, तेसा धैळी बरसी सरगा का आग और गंधक और तियां सोभ किये नाश। 30 माळुओ शोहरुए प्रगत हणैए धैळी बी हणअ इहय ई।

31 “तेसा धैळी जुण बागे होए, और तेऊओ समान घरा भितरी होए, सह निं तेऊ समाना आणदअ भितरा लै नाशी, और तिहैई जुण खेचै होए, तियां निं पिछू फिरी। 32 लूते लाळी डाहै आद। 33 जुण आपणअ प्राण बचाऊणअ चाहे, तेऊ खोणअ सह और जुण आपणअ प्राण खोए तेऊ डाहणअ सह जिऊंदअ। 34 हूँ खोजा तम्हां का कि तेसा राची हणें लोग मांझै दी सुतै दै और तिन्नां मांझै एक निणअ और दुजअ छुटणअ तिधी। 35 दूई बेटळी हणीं संघा लागी दी शिला दी पिशदी, एक निणीं और दुजी छुटणीं तिधी। 36 दूई आदमीं हणें खेचै, एक निणअ और दुजअ छाडणअ तिधी।” 37 इन्नां गला शुणीं तिन्नें प्रभू लै बोलअ, “हे प्रभू अह किधी हणअ?” प्रभू यीशू तिन्नां लै बोलअ, “जिधी लहाशा आसा, तिधी ह्नीं गरली कठा।”

### अधर्मी न्यायी और बिधवा

18 प्रभू यीशू बोलअ कि धैळ करनीं प्राथणां और हैअ निं छाडी, और तिन्नां का एक दृष्टांत खोजअ कि, 2 “एकी नगरी रहा त एक न्यायी; सह नां परमेश्वरा का उरदअ थिय और नां कसा माळुओ परबाह करदअ त। 3 और तेसाई नगरी रहा ती एक बिधवा बी; सह बोला ती तेऊ सेटा एछी करै कि मेरअ फँसलअ करी करै मूँह बचाऊ मेरै जिदी का। 4 कई धैळै तैणीं की तेऊ तेसरी गला शुणीं ना शुणीं, पर आखरी किय तेऊ आपणें मनै बचाव कि, एही ता निं हूँ परमेश्वरा का उरदअ और ना हूँ माळुओ परबाह करदअ, 5 तैबी बी एसा बिधवा आणीं मुल्है अंतै, एसरअ फँसलअ हुअ मूँह एबै करनअ, इहय निं हआ कि अह घळी-घळी एछी डाहे धैळ कांग लाई।”

6 प्रभू यीशू बोलअ कि, “शुणां, अह अधर्मी न्यायी किजै बोला? 7 परमेश्वरा कै आपणें चुनै दै माळुओ न्याय निं करी सकदअ? जुण राची धैळी तेऊए दुहाई दैन्दै हआ लागै दै; तेऊ कै तिन्नें बारै बेर लाई करी। 8 हूँ बोला तम्हां का, तेऊ करनअ नदँऊरे तिन्नां न्याय; तैबी बी जेभै माळुओ शोहरु एछणअ, तेभै कै तेऊ धरती दी विश्वास भेटणअ?”

### फरीसी और चुंगी लणेंआळैओ दृष्टांत

9 और प्रभू कई लै जुण आपणें आप भरोसअ डाहा तै, कि हाम्हें आसा धरमी, और होरी समझा तै तियां तुछ, तिन्नां लै एक दृष्टांत खोजअ कि, 10 “दूई आदमीं थियै; तियां नाठै मांदरै प्राथणा करदै, एक त फरीसी और दुजअ त चुंगी लणें आळअ। 11 फरीसी लागअ खळअ उझूई करै आपणें मनै इहय बोलदअ कि “हे परमेश्वर, हूँ करा तेरअ धन्याबाद कि हूँ निं इन्नां होरी आदमीं जिहअ बुरै करनै आळअ, अन्यायी, भ्यबिचारी आथी और नां एऊ चुंगी लणें आळै जिहअ आथी। 12 हूँ करा हबते दूई बारी ब्रत और आपणीं कमाईओ दसूअ भाग बी दैआ हूँ।

13 “पर तेऊ चुंगी लणें आळै दूर खहळुई करै स्वर्गा बाखा निं भाळणअ बी चाहअ, तेऊ आपणीं हीक पटाकी करै बोलअ, हे परमेश्वर मूँह पापी लै कर दैया। 14 हूँ बोला तम्हां लै इहय कि, सह दुजअ निं पर अहैई माळुओ नाठअ धरमी बणीं करै आपणें घरा लै। किल्हैकि जुण बी आपणें आप बडअ समझे,

सह करनअ होछअ और जुण आपणें आप होछअ समझे, सह करनअ बडअ।”

### लान्हें लै आशीर्वाद

(मत्ती 19:13-15; मरकुस 10:13-16)

15 तेखअ लागै लोग आपणें शोहरु माठै बी प्रभू सेटा लै आणदै कि प्रभू तिन्नां दी आपणअ हाथ डाही करै आशीर्वाद दैए; और चेलै लाए तियां डांटी। 16 प्रभू यीशू तियां शोहरु आपू सेटा शादी करै बोलअ, “इन्नां दैआ मूँह सेटा लै एछणें, इन्नां निं रोका आथी, किल्हैकि परमेश्वरो राजा आसा इन्नां जिहैओ ई। 17 हूँ बोला तम्हां का सच्चाई कि जुण बी परमेश्वरे राजा इन्नां शोहरु जिहअ ग्रहण निं करे, सह निं तेथ कधि नाशी सकदअ।”

### सेठ आदमी और अनंतजिऊण

(मत्ती 19:16-30; मरकुस 10:17-31)

18 एकी सरदारै पुछअ प्रभू का इहय कि, “हे उत्तम गुरु, अनंत जीबना पाणां लै मूँह किजै लागणअ करनअ?” 19 प्रभू यीशू तेऊ लै बोलअ कि, “तूह मुल्है उत्तम किल्है बोला?” उत्तम निं परमेश्वरा का सुआई कोहै आथी। 20 तूह आज्ञा ता ज्ञाणां कि भ्यभिचार निं करनअ, हत्या नी करनी, चोरी नी करनी, झूठी ग्वाही निं दैणीं, और आपणें आमणां बापुओ करनअ आदरमान।” 21 सरदारै प्रभू लै बोलअ कि, “हूँ मना इन्नां गला बचपणा ओर्ही।” 22 इहय शुणीं प्रभू यीशू तेऊ लै बोलअ कि, “ताह दी आसा मैची बी एकी गले कार्मी, आपणअ सोभ किछ बेची करै दै कंगाळा लै बांडी और ताह भेटणअ एते बदलै स्वर्ग धन; और आपू एछ मूँह पिछू।” 23 सह सरदार हुअ इहय शुणीं करै बडअ भारी दुखी, किल्हैकि सह थिय बडअ भारी सेठ।

24 प्रभू यीशू तेऊ भाळी करै बोलअ, “सेठा आदमींओ आसा स्वर्ग राजा दी नाशणअ मुशकळ। 25 परमेश्वरे राजा दी सेठा आदमीं नाशणें का आसा ऊंटो सिऊणीए पाशी बाती नाशणअ सान।” 26 तैबै तिन्नें होरी शुळ्णें आळै बोलअ कि, “तै कसरअ उद्धार सका हई?” 27 प्रभू तिन्नां लै बोलअ, “जुण माळुओ भलै नाईं हई सकदअ, सह सका परमेश्वरे भले हई।” 28 पतरसै प्रभू लै बोलअ, “भाळ, हाम्हें आसा गए दै आपणअ घर बार छाडी ताह पिछू एछी।” 29 प्रभू तिन्नां लै बोलअ कि, “हूँ खोजा तम्हा का सच्चाई कि इहय निं कोहै आथी, जुणीं परमेश्वरे राजा लै आपणअ घर- बार, भाई-बैहण, आमणां-बापू या बेटळी-माठै छाडै होए, 30 और एऊ बगतै तिन्नां कई गुणा खासअ और परलोकै अनंतजिऊण निं भेटणअ।”

### आपणीं मौते बारै यीशूए चिऊथी भविष्यवाणीं

(मत्ती 20:17-19; मरकुस 10:32-34)

31 तेखअ प्रभू आपणें बाराह चेलै संघा निचें और तिन्नां लै बोलअ, “भाळा, हाम्हें चालै येरुशलेमा लै और माळुओ शोहरु लै हणीं भबिशयाबगतै लिखी दी सारी गला पूरी। 32 किल्हैकि सह दैणअ होरी ज्ञातीए हाथे और तिन्नां करनअ तेऊओ ठठअ मखऊल; और तिन्नां करनीं तेऊए बेइजती और तेऊ लै थुकणअ बी तिन्नां। 33 और सह चिकणअ तिन्नां कोडै करै और पाणअ मारी; पर सह हणअ चिऊथै धैळै जिऊंदअ।” 34 पर तिन्नें नी इन्नां गला मांझै एक गल बी समझी: और अह गल रही तिन्नां का गुप्त। जिहअ प्रभू बोलअ, सह निं तिन्नें समझा दी आअ।

### काणें भिखारी लै नेत्रदान

(मत्ती 20:29-34; मरकुस 10:46-52)

35 जाऊं प्रभू येरिहो नेळ पुजअ, ता एक काणअ त बाते कनारै भिखा मांगदअ बेठअ द। 36 सह लागअ लोगे हांडणैए छेळा शुणीं पुछदअ कि, “एथ कै आसा लागअ द हंदअ?” 37 तिन्नें खोजअ कि, “प्रभू यीशू आसा लागअ द एसा बाता नाशदअ।” 38 तैबै तेऊ काणें हाक पाई कि, “हे प्रभू, दाऊदे संतान, मुल्है कर दैया।” 39 जुण आजू तै हांडदै लागै दै तिन्नें काढी तेऊलै ज्ञाळ कि चुप्पी रह, पर सह लागअ होर बी जोरै-जोरै लैळा लांदअ कि, “हे दाऊदे संतान, मुल्है कर दैया।” 40 तैबै प्रभू यीशू खळै उझूई करै आज्ञा दैनीं

कि, "एऊ काणें आणां मूँह सेटा लै।" जांऊं सह काणंअ नेळ आअ ता प्रभू तेऊ का पुछअ, 41 "तूह किजै चाहा कि हूँ ताल्है करूँ?" तेऊ बोलअ, "हे प्रभू, मुखा लोळी आच्छी का धेछुअ।" 42 प्रभू यीशू तेऊ लै बोलअ, "भाळअ लाग, तेरें विश्वासै हेरअ तूह ठीक करी।" 43 और सह काणंअ लागअ तेभी भाळअ; और परमेश्वरे बडाई करदी लागअ सह प्रभू यीशू पिछू हांढदअ, और सोभी लोगे की एता भाळी करै परमेश्वरे जै-जैकार।

### चुंगी लणें आळअ जक्कई

19 प्रभू यीशू मसीह पुजअ येरिहो नगरी, 2 और भाळा, तिधी थिय एक जक्कई नांओ आदमीं, सह थिय चुंगी लणें आळेंओ सरदार और सह त सेठ बी। 3 सह चाहा त प्रभू यीशू मसीह हेरनअ कि कुण आसा? पर लोगे जेह्ल-मरेह्ली जैंदरी नि पिछू का सह भाळी सकदअ त, किल्हैकि सह त बाऊंणुं। 4 सह तुहरअ प्रभू यीशू भाळअ आजू और सह उखळअ एक गुलरे बूटा दी, तेऊ का थिय थोघ कि प्रभू एछणअ एसी बाती। 5 जांऊं प्रभू यीशू मसीह तेसा जैगा पुजअ, ता प्रभू भाळअ उझै बाखा लै और तेऊ लै बोलअ कि, "हे जक्कई, उंधे होथ आझः रहणअ मूँह तेरें घरै जरूरी।" 6 सह होथअ तेभी उंधे और तेऊ बडी खुशी संघे प्रभू यीशू नियं आपणें घरा लै।

7 एता भाळी लागै सोभ लोग निंदा करदें कि, "अह ता एकी पापी माळूँरे घरे बेटअ।"

8 जक्कई खळै उझई करै प्रभू लै हाथ ज़ोळी बोलअ, "हे प्रभू, हेर मंएँ लाई आपणें आधी संपति कंगाळा लै दैई, और जै मंएँ कसरअ बुराई करै लुटअ द बी आसा, ता तेतो दैणअ मूँह चऊगणअ बापस" 9 तैबै प्रभू यीशू तेऊ लै बोलअ, "आझः आअ एऊ घरै उद्धार, एबै आसा अह बी इबराहिमों शोहरू। 10 किल्हैकि माळूँओ शोहरू आसा शोतुरे दै लोळअ और तिन्नै उद्धारा करदअ आअ द।"

### दसा मोहरो दृष्टांत

(मत्ती 25:14-30)

11 जांऊं तियां इन्नां गल्ला शूणें तै लागै दै ता प्रभू यीशू मसीह खोजअ तिन्नां का एक दृष्टांत एते तैणीं कि तियां थियै येरुशलैमा नेळ और तियां समझा तै कि परमेश्वरो राज हणअ एभी प्रगट। 12 तैबै प्रभू बोलअ, "एक सेठ आदमीं नाठअ दूर देशा लै कि राजपद पाई करै बापस फिरी एछे। 13 और तेऊ आपणें दासा मांझै दस शादें और तिन्नां लै दैनीं दस मोहरा और तिन्नां लै बोलअ इहय कि मेरें बापस फिरनं तैणीं करै लैण-दैण। 14 पर तेऊए नगरी रहणें आळै करा तै तेऊ संघे बैर, और तेऊ पिछू दूत भेजी करै दैनअ फैळअ कि हाम्हेँ निं चाहदें कि अह हाम्हां परेंदें राज करे।

15 "पर जांऊं सह राजपद पाई करै बापस फिरअ ता इहय हूअ कि तेऊ आपणें दास जसा का तियां मुहरा (रोकड) दैनीं ती आप्पू सेटा शादें, ताकि पतअ करी सके कि तिन्नै लैण-दैण करी करै कै खटअ। 16 तैबै पैहलअ आअ और तेऊ बोलअ कि, 'हे मालक, तेरें मुहरा करै खटी मंएँ दस मुहरा होर।' 17 और तेऊ बोलअ कि शाबाश, तूह आसा सोबी का बधिया, धन्य आसा तूह किल्हैकि तूह बडै भारी थोळै द विश्वासी, एबै बण तूह दसा गराऊंओ मुखिया। 18 और दुजै बोलअ कि हे मालक तेरी मुहरा करै खटी मंएँ पांज मुहरा होर। 19 तेऊ मालक बोलअ कि तूबी कर पांजा गराऊंरे राज। 20 विऊथै बोलअ कि हे मालक, भाळ, तेरी मोहर आसा अह, अह आसा डाही दी मंएँ मोटळी दी बाही। 21 किल्हैकि हूँ डरा ताखा, इहय करै कि तूह आसा बडअ काठअ आदमीं: जुण तंएँ नाई डाहअ, तेऊ चका तूह; और जुण तंएँ नाई बऊअ तेऊ लऊआ तूह। 22 सूआमीं तेऊ लै बोलअ कि हे दुष्ट दास, ताल्है ला हूँ तेरें ई मुँहा का दोश, जै ताखा थोघ थिय कि हूँ आसा काठअ आदमीं, जुण मंएँ नाई डाहअ तेऊ चका हूँ और जुण मंएँ नाई बऊअ तेऊ लऊआ हूँ। 23 ता तै तंएँ मेरें ढबै कसा लै बैजउए किल्है निं दैनै ताकि हूँ तिन्नां बैजा सुता संघी ता लंदअ बापस? 24 और जुण लोग तिधी नेळ तै खहछुए दै तिन्नां लै तेऊ बोलअ कि एऊ का लूआ तेसा मुहरा बापस और जसा का दस मुहरा आसा एता दैआ तेऊलै। 25 और तिन्नै बोलअ कि हे मालक, एऊ का ता दस मुहरा पैहलैई का आसा, 26 "सूआमीं बोलअ इहय

कि हूँ बोला तम्हां लै कि जसा का आसा, तेऊलै दैणअ होर बी और जसा का नाई आथि, तेऊ का मांगणअ सह बी बापस जुण तेऊ का आसा। 27 पर मेरें बैरी का जुण इहय नाई चाहदें तै कि हूँ तिन्नां परेंदें राज करूँ, तिन्नां आणा मेरें मूँहा सहनै पाआ तिन्नां मारी।

### येरुश्लैमें विजय प्रवेश

(मत्ती 21:1-11; मरकुस 11:1-11; लूका 19:28-44)

28 इन्नां गल्ला खोजी करै प्रभू यीशू मसीह लागअ आजू-आजू येरुशलैमा लै हांढदअ

29 और जांऊं प्रभू जैतून नांऊंएँ धारा दी बेतफगे और बेतनियाह नेळ पुजअ, ता प्रभू आपणें चेलै मांझै दूई जळें इहय बोली करै भेजै कि, 30 "पार सहनैए गराऊंआ लै नाशा और, तिधी पुजदी एक गाधीओ बच्चअ भेटणअ तम्हां बाहअ द जेथ परेंदें कधि कुण बेटअ निं आथी, तेऊ आणा खोह्ली करै। 31 जै तम्हां का कुण पुछे कि किल्है लाअ अह खोह्ली, ता तै बोलै इहय कि प्रभू आसा एतो किजै काम।"

32 जुण भेजै तै; तिन्नै किय तिहअई जिहअ-जिहअ प्रभू तिन्नां लै बोलअ त। 33 जांऊं गाधेए बच्चै खोह्लदें तै लागै दै; ता तेऊए मालकै तिन्नां लै बोलअ कि, "तम्हें किल्है आसा लागै दै एऊ खोह्लदें?" 34 तिन्नै बोलअ कि, "प्रभू आसा एऊओ किजै काम।" 35 तिन्नै बी सह गाधअ प्रभू यीशू सेटा लै आणअ और आपणें झीकळै तेऊ गाधै परेंदें पाए और प्रभू यीशू मसीह हुअ तेऊ गाधै परेंदें शुंआर। 36 जांऊं सह हांढदअ लागअ ता लोगे छैएँ आपणें झीकळै बाता।

37 जांऊं प्रभू नेळ जिहअ जैतून धारे ढलाना दी पुजअ ता चेलै सारी मंडली तिन्नां सामर्थे काम जुण तिन्नै भाळै तै, तिन्नां आद करी करै बडी खुशी-खुशी किय परमेश्वरो जै-जैकार:

38 "धन्य आसा सह राजअ, जुण प्रभूए नांऊंएँ एछा, स्वर्गे शांती और सरगे लोळी तेऊए महिमां हुई।"

39 तैबै लोगे भीड़ा बिचा का लागै कई फरीसी बोलदें कि, "हे गुरु इन्नां चेलै दै समझाऊणीं।" 40 प्रभू तिन्नां लै जबाब दैनअ कि, "जै ईयां चुप्पी रहै ता पाथरा पांणीं लैळा।"

### येरुश्लैमा लै विलाप

41 जांऊं प्रभू यीशू मसीह येरुशलैमा नगरी नेळ पुजअ ता नगरी भाळी पाई प्रभू यीशू लेरा। 42 और प्रभू बोलअ, "भलअ हणअ त इहय कि; हां, तूहई एसा धैळी सलामतीए गल्ला जाणदअ, पर एबै गई तियां तेरी आच्छी सेटा का लुकी। 43 किल्हैकि तियां धैळीबी एछणीं ताल्है कि तेरें बैरी घेरनअ तूह मोरचै बाह्नि करै और चऊ बाखा दबाऊणअ तूह; 44 और तूह और तेरें शोहरू जुण मुँह दी आसा, मलाऊणें माटै जैंदरी, और ताह दी निं तिन्नां पाथरा परेंदें पाथर बी छाडणअ; किल्हैकि तंएँ निं सह मोको बछेणअ जेऊ मोकै ताल्है किरपा दृष्टी हुई।"

### मांदरा का बपारी बागै काढणें

(मत्ती 21:12-17; मरकुस 11:15-19; यूहन्ना 2:13-22)

45 तैबै प्रभू यीशू मसीह मांदरै नाठअ और तिन्नां बेचणें आळै लागअ बागा लै काढदअ। 46 और प्रभू तिन्नां लै बोलअ, कि शास्त्रा दी आसा लिखअ द कि, "मेरअ घर हणअ प्राथणा करनेओ घर, पर तम्हें आसा डाही दी अह जेही डाकुए खोख बणाई।"

47 प्रभू यीशू मसीह दैनै धैळ मांदरै उपदेश, पर माहायाजक और शास्त्री और लोगे प्रधान लागै प्रभू मारनैए मोकै लोळै। 48 पर तियां निं कोई बी तरीके करै मारी सकै कि किहअ करै, किल्हैकि लोग शूणां तै प्रभू यीशूए गल्ला बडी भारी चाऊआ करै।

### यीशूए अधिकारो सुआल

(मत्ती 21:23-27; मरकुस 11:27-33)

20 एकी धैळी हुअ इहय कि जांऊं प्रभू यीशू मसीह मांदरै लोगा लै उपदेशा दैदअ और सुसमाचारा शणाऊंदअ थिय लागअ द, ता

तिथी आअ माहायाजक आपणें पुरनिंएँ संघै। 2 तियां लागै बोलदै कि, “हाम्हां का खोज इहय कि तूह इनां कामां केऊ अधीकारा संघै करा और सह कुण आसा, जुंणी तालहै अधिकार आसा दैनअ द?” 3 प्रभू यीशू मसीह तिनां लै बोलअ कि, “हूँबी पुछा तम्हां का एक सुआल; मुखा खोजा इहय कि 4 यहुन्नो बपतिस्मअ स्वर्गा का थिय कि मांछू तरफा का थिय?” 5 तैबै लागै तियां आप्पु मांछै बोलदै कि, “जै हाम्हें इहय बोले कि स्वर्गा का, तै बोलणअ एऊ की तै तम्हें तेऊओ विश्वास किल्है निं किय! 6 और जै हाम्हें बोले कि मांछू बाखा का, ता लोगा मारनै हाम्हें पाथरा करै, किल्हैकि तियां मना इहय कि यहुन्ना आसा त भबिशयाबगता।” 7 ता तिन्नै दैनअ जबाब कि, “हाम्हां का निं थोधै कि सह कसरी तरफा का थिय।” 8 प्रभू यीशू बोलअ तिनां लै कि, “हूँबी निं तम्हां का खोजदअ कि हूँ कसरी अधिकारा करै करा इनां कामां।”

### दुष्ट जिम्मीदारो दृष्टांत

(मत्ती 21:33-46; मरकुस 12:1-12)

9 तैबै प्रभू यीशू लोगा का एक दृष्टांत खोजअ कि, “एकी आदमी लाअ अंगुरो बगीचअ, और तेतो ठेकअ दैनअ तिधे जिम्मीदारो का और आप्पु नाठअ परदेसा लै। 10 और खास्सै धैळै बाद हूअ इहय कि तेऊ भेजअ आपणअ एक दास तिनां सेटा लै कि अंगुरे बगिचे साला बाद हुई आमदनिं मांछै तेऊअ भाग दैआ ओही, पर तिन्नै पाअ सह चिकी और सह फिरअ बापस। 11 तेखअ भेजअ तेऊ एक होर दास, पर सबी भेजअ तिन्नै चिकी मारी बेइजत करी करै बापस खाली हाथ। 12 तेखअ भेजअ तेऊ चिऊथअ और सह बी किय तिन्नै घायल, तेखअ दरळाऊअ तिधा का। 13 तेखअ अंगुरे बगीचे मालकै सोचअ इहय कि ‘एबै हूँ कै करूँ?’ एबै भेजणअ मूँह आपणअ प्यारअ शोहरू, कै पतअ तेऊओ ता करे तियां आदर-मान। 14 जांऊं तिन्नै जिम्मीदारै भाळअ कि तेऊओ शोहरू आअ ता तिन्नै किय आप्पु बिचे बचार कि ‘अह आसा तेऊए लुआद, एछा अह पाणअ हाम्हां मारी और बादा का हणीं सारी जायदात म्हारी।’ 15 तिन्नै बी सह अंगुरे बगिचे का बागे काडअ और सह किय जानि का खतम: एबै सोचा तम्हें कि अंगुरे बगिचे मालका तिनां संघै कै करनअ? 16 तेऊ एछणअ और तियां जिम्मीदार करनै तेऊ खतम; और अंगुरे बगिचअ दैनअ तिनां होरी का।” इहय शुणीं करै तिन्नै बोलअ, “परमेश्वर निं इहय करे।” 17 प्रभू तिनां बाखा भाळी करै बोलअ कि, “तै अह कै आसा शास्त्रा दी लिखअ द कि

‘जसा पाथरा लै राज मिस्त्री बोलअ कि अह निं किछू कामों आथी, सहैई बणअ कुणीओ पाथरा।’ 18 जुंण बी एऊ पाथरा परेंदै पळे, सह हणअ चूर-चूर और जसा परेंदै अह पाथर पळे, सह बी पिशणअ छारा जिहअ।

### राजै कैसरा लै कारअ दैनअ

(मत्ती 22:15-22 मरकुस 12:13-17)

19 शास्त्री और माहायाजकै चाहअ प्रभू यीशू ढाकणअ किल्हैकि तियां गए समझी कि अह दृष्टांत बोलअ एऊ हम्हां लै, पर तियां डरै तिथी लोगा का। 20 पर तियां रहै प्रभू यीशू ताका और प्रभू पिछू लाए भेदिए धरमों भेष बणाई करै, ताकि तेऊए कोई ना कोई कमजोरी ढाकै; और तेऊ हाम्हें हाकिमें हाथे दैई सके। 21 तिन्नै प्रभू का पुछअ कि, “हे गुरु, हाम्हें जाणा कि तूह बोला सोभै गल्ला ठीक और सखाऊआ बी, और कसा संघै भेदभाव बी निं करदअ, परमेश्वरो रसतअ खोजा तूह सच्चाई दी।” 22 एबै खोज तूह इहय कि म्हारअ कैसर राजै लै कारअ दैनअ ठीक आसा कि गलत?” 23 पर प्रभू हेरी तिन्नै चलाकी समझी और तिनां लै बोलअ कि, “एक दिनारो सिक्कअ रहैऊआ मुखा। 24 प्रभू बोलअ कि एथ दी कसरी मूरती और नांअ आसा?” तिन्नै बोलअ कि, “कैसर राजैओ।” 25 प्रभू तिनां लै बोलअ कि, “जुंण कैसर राजैओ आसा, तेऊ दैआ कैसरा लै और जुंण परमेश्वरो आसा तेऊ दैआ परमेश्वरा 26 तियां निं लोगे सहनै तेसा गल्ला ढाकी सकै बरन तियां हुए तेऊए जबाबा शुणीं रहैन और तियां रहै चुप्पी।

### भी जिऊणअ और बैह

(मत्ती 22:23-33; मरकुस 12:18-27)

27 तेखअ सदुकी जुंण इहय बोला कि मूँएँ दै का जिऊंदअ हणअ निं किधि आथी और तिनां मांछै कई आए प्रभू यीशू मसीह सेटा लै और पुछअ कि 28 “हे गुरु, मूसा नबी आसा हाम्हां लै इहय लिखअ द कि ‘जै कसरअ भाई आपणीं लाळी रंहदी बिणहीं शोहरू माठै हई मरे, ता तेऊओ दुजअ भाई करै तेसा संघै बैह और आपणें भाई लै करै लुआद पैदा। 29 ता एकी जैगा तै सात भाई और पैहलअ भाई मुँअ बैह करी करै और तेऊए निं कोई बी लुआद हई। 30 इहय करै दुजै और चिऊथे बी किय तेसा संघेई बैह। 31 इहय करै तियां सात भाई मूँएँ बिणा कोई लुआद पैदा करी। 32 खीरी तिनां सोभी का पिछू मूँई सह बेटळी बी। 33 तै जिऊंदै हई करै सह कसरी बेटळी हणीं किल्हैकि सह ती तिनां साता जळें लाळी।” 34 प्रभू यीशू तिनां लै बोलअ, “एऊ जुगे संताने ता हूआ बैह शादी 35 पर जुंण तेऊ जुगा जोगी होए, कि मरी करै भी जिंदगी तिनां भेटे, तिन्नै निं बैह शदी हणीं। 36 ना ता तियां मरनै, तियां हणें स्वर्गदूता जिहै, और जिऊंदै हणें आळी संतान हई करै हणें तियां परमेश्वरे संतान। 37 पर एसा गल्ला, कि मूँएँ दै हूआ जिऊंदै, मूसा नबी आसा झाकळे कथैआ प्रगट की दी कि सह बोला प्रभू लै ‘अब्राहमा परमेश्वर, इसहाको परमेश्वर और याकुबो परमेश्वर।’ 38 परमेश्वर निं मूँदैओ आथी, पर सह आसा जिऊंदैओ परमेश्वर; किल्हैकि तेऊ सेटा आसा सोभै जिऊंदै। 39 इहय शुणीं तिनां शास्त्री बिचा का कई जळें बोलअ इहय कि, “हे गुरु, तंएँ बोलअ ठीक।” 40 और तिनां निं तेखअ भी पुछणें हिम्मत पळी।

### मसीह कसरअ शोहरू आसा

(मत्ती 22:41-46; मरकुस 12:35-37)

41 प्रभू तिनां का सूआल पुछअ कि, “मसीहा लै दाऊदे संतान किल्है बोला? 42 दाऊद बोला आप्पे भजने कताबा दी कि ‘प्रभू बोलअ मेरै प्रभू का, 43 कि मेरै दैहणें बेश, जेभै तैणीं कि हूँ तेरै बैरी तेरै पैरा हेठै निं करूं।’ 44 दाऊद ता तेऊ लै प्रभू बोला, तै सह तेऊओ संतान किहअ करै हुअ?”

### शास्त्री का चतैन

(मत्ती 23:1-36; मरकुस 12:38-40)

45 जांऊं सोभ लोग तै शुणदै लागै दै ता प्रभू यीशू आपणें चेलै का बोलअ, 46 “इनां शास्त्री का रहै दूर, जहा लाम्मै-लाम्मै झिकळे बाह्नी करै घुमदै-फिरदै रहणअ भलअ लागा और बजारै नमस्कार, और सभा दी बेशणा लै बडी जैगा और भोजा दी लोळी इनां पबित्र जैगा बेशणा लै। 47 इयां बिधबे घरा लै ता नाशा और रहैऊणा लै करा बडी देर तैणीं प्राथणां, इनां भेटणीं सोभी का खासी सजा।

### गरीब बिधवो दान

(मरकुस 12:41-44)

21 प्रभू यीशू भाळै सेठ आदमीं आपणें-आपणें साबै दान भंडारा लै दैन्दै। 2 और प्रभू यीशू मसीह भाळी एक कंगाळ बिधबा बी तेथ दई दांबळी पांटी। 3 तैबै प्रभू यीशू बोलअ कि, “एसा बिधबा बेटळी दैनअ सोभी का जादअ दान। 4 किल्हैकि सोभी दैनअ आपणें खास्सै का थोळअ जिहअ, पर एसा का थिय थोळअ जिहअ और एसा पाई आपणीं पूरी पूंजी दान करी।”

### मांदरे बनाश हणें भविष्यवाणीं

(मत्ती 14:1,2; मरकुस 13:1,2)

5 और कई लोग तै मांदरा लै इहय बोलदै लागै दै कि अह मांदर भाळ किहअ शोभलै पाथरा करै आसा बणांअ द और शोभली चिजा करै सजाऊअ द, ता प्रभू यीशू मसीह बोलअ, 6 “ईहै धैळै बी एछणें, जेभै ईयां जुंण बी तम्हें

ईधी भाळा, इन्नां मांझें निं एक पाथर बी इहय छुटणअ जुंण ढोळणअ निं आथी।”

### सांगट और क्लेश

(मत्ती 24:3-14; मरकुस 13:3-13)

7 तिन्नै प्रभू का पुछअ, हे, “गुरु, इहय कधू हणअ? जांऊं ईयां गल्ला पूरी हणीं, तेऊ बगतो के चिन्ह हणअ?” 8 प्रभू तिन्नां लै बोलअ कि, “चतान रहै, कसरै ज्ञाणें निं लागी, कई बोळणअ मेरै नाऊंएँ एछी करै कि हूँ आसा सहैई; अह बगत आसा गअ द नेळ एछी, तम्हें तिन्नां पिछू निं नाशी। 9 जेभै तम्हें लळाई झगळे, चरचा शुणें, तेभै निं हैळुई आथी; किल्हैकि इनो आसा पैहलै हणअ जरूरी पर तेभै निं नढैऊरै अंत हणअ आथी।”

10 तैबै प्रभू तिन्नां लै बोलअ, “जाती लै करनी जाती और राईसी लै करनी राईसी चढाई। 11 और बडी-बडी जाजरी हणीं, और जैगै-जैगै पळणअ नकाळ और माहामारी हणीं और सरगै हणें बडी डरैऊणीं गल्ला और बडै-बडै चिन्ह हणें प्रगट। 12 पर इन्नां सोभी गल्ला का पैहलै ढाकणें तम्हें मेरै नाऊंएँ, और तम्हां लै दैणीं बडी दुख तकलिफ और पंचायता दी करनै तम्हें खळै, तम्हें पाणै जेहला और राजे सेटा और हाकमा सहनै निणें तम्हें। 13 पर अह हणअ तम्हां लै ग्वाही दैणेंओ मोकअ। 14 तैहीता, आपणें मनै डाहा टानिं कि पैहलै का ई जबाबा दैणें चिंता निं करनीं। 15 किल्हैकि मूँह दैणीं तम्हां लै ईहै बोल और बुधी कि थारै सोभ बिरोधी निं थारअ सहनअ और खंडन करी सकदै। 16 एसा गल्ला डाहै आद कि थारै आम्मां-बाप्पू और भाई, टबरा और थारै साथी बी ढाकणें तम्हें; इधी तैणीं कि तम्हां मांझें कई पाणें मारी। 17 मेरै नाऊंएँ करनअ सोभी तम्हां संघे बैर। 18 पर थारै मूँडो निं बाळ बी बांकअ हणअ। 19 आपणें धीर धरी करै सका तम्हें आपणें प्राण बचाऊई डाही।

### येरुश्लेमें बनाश हणें भविष्यवाणी

(मत्ती 24:15-21; मरकुस 13:14-19)

20 “जेभै तम्हें येरुश्लेमा सेना करै घेरै दै भाळे, तेभै जाणें तम्हें कि येरुश्लेमा उजळणअ आसा नेळ। 21 तेभै जुंण यहूदिया दी होए, तियां भागै उझै धारा लै, और जुंण येरुश्लेमा भितरी होए, तियां निखळै बागा लै और जुंण गराऊंएँ होए, तियां निं तेथ नाशी। 22 किल्हैकि ईयां हणें बदळै लणें ईहै धळै, जहा दी लिखी दी सारी गल्ला पूरी हणीं। 23 तिन्नां धैळी हणीं सुंदी बेटळी और दुधा पणेंऊंदी बेटळी लै हाय! हाय!, किल्हैकि देशै हणअ बडअ भारी क्लेश और इन्नां लोगा लै एछणीं बडी बिपत्ती। 24 तियां हणें तलबारे कौर और सोभी देशे लोगा जैदरी नाशणें गुलाम हई, और जेभै तैणीं होरी जातीओ बगत पूरा निं होए, तेभै तैणीं हणअ येरुश्लेमा होरी जातीए हाथे बरैबाद।

### मांझू शोहरूओ भी एछणअ

(मत्ती 24:29-31; मरकुस 13:24-27)

25 “सुरज, जोथा और तारै दी धेछणें चिन्ह, और धरती दी हणअ देशा देशे लोगा लै सांगट; किल्हैकि तियां हीळणें समूंदरे गरजणा करै और छालीए करिंणा करै हैळणें तियां। 26 और डरा करै और संसारा दी एछणें आळी घटणा न्हैळदी, भाळदी-भाळदी निं लगे शाह-दी-शाह जिऊ रहणअ और सरगे शगती बी सिकणीं ओही-पोही। 27 तेभै तिन्नां मांझूओ शोहरू हेरनअ सामर्थ और गुणगाना संघे बादळा दी एछदअ। 28 जेभै ईयां गल्ला हंटी लागे, ता सिधै हई करै आपणें मूँड करै खळै किल्हैकि तेभै हणअ थारअ छुटकारअ नेळ।”

### अंजीरे बूटो उदाहरण

(मत्ती 24:32-35; मरकुस 13:28-31)

29 प्रभू तिन्नां का एक दृष्टांत बी खोजअ कि: “अंजीरे बूटा और सोभी बूटा भाळा, 30 जांऊं तेथ पलीर निखळा, ता तम्हें हेरा तिन्नां भाळी समझी कि गरमीं गई एछी। 31 ठीक इहय ई जांऊं तम्हें इन्नां गल्ला भाळे, तेभै समझै कि परमेश्वरो राज आसा नेळ। 32 हूँ खोजा तम्हां का सच्चाई कि जेभै तैणीं ईयां

गल्ला नाई होए, तेभै तैणीं निं एसा पोस्तिओ अंत हणअ। 33 सरग और धरती टळणें पर मेरी गल्ला निं कधी टळणीं।

### बिऊधै रहा

(मत्ती 24:36-44, मरकुस 13:32-37)

34 “तैहीता, बडै साबधान रहै, इहय निं हूआ कि थारै मन खूमर और मतबालै और एसा जिन्दगीए चिंता दी सुस्त हए, और सह धैळी एछा तम्हां लै नचानक जिऊआ लै जजाळ। 35 किल्हैकि सह एछणीं सारी पृथुई दी रहणें आळै लै एकी साबै। 36 जगते रहै और हर बगत रहै प्राथणां करद लागी कि तम्हें एछणें आळी सारी बिपती का बचे, मांझूएँ शोहरूएँ सहनै खळै हूँ जोगी हई सकै।”

37 और प्रभू यीशू देआ त धैळी मांदरै उपदेश और राची नाशा त बागै जैतून नांऊंएँ धारा लै 38 और दोती एछा त भैगा और सोभ लोग एछा तै प्रभूएँ गल्ला शुणदै मांदरा लै।

### यीशूएँ खलाफ षडयंत्र

(मत्ती 26:1-5; मरकुस 14:1,2; यूहन्ना 11:45-53)

## 22

अखमीरी रोटीओ पर्व जहा लै फसहेओ मेळअ बोला, सह त नेळ। 2 और माहायाजक और शास्त्री ते एसा गले ताका दी कि यीशू पाणअ हाम्हां किहअ करै मारी पर तियां डरा तै लोगा का।

### यहूदो विश्वासघात

(मत्ती 26:14-16; मरकुस 14:10, 11)

3 और शैतान बसअ यहूदा इसकरोती दी, जसा प्रभू यीशूएँ बाराह चेलै दी गिणा। 4 तेऊ की माहायाजका और पहरीए सरदारा संघे गल्ला बाता कि किहअ करै दैणअ प्रभू यीशू मसीह तिन्नै हाथै। 5 तियां हुए बडै खुश और तिन्नै किय तेऊ लै ढबै दैणेंओ बाहीदअ। 6 तेऊ तिन्नै गल्ला मनीं और सह लागअ मोकै भाळअ कि बिना कोई हालअ-गोलअ पाई बडैळणअ ढाकणें प्रभू यीशू तिन्नै हाथै।

### चेलै संघे फसहेओ आखरी भोज

(मत्ती 26:17-25; मरकुस 14:12-21; यूहन्ना 13:21-30)

7 अखमीरी रोटीओ मेळअ बी पुजअ, जेथ दी फसहेओ मिम्मू बळी करनअ हआ ती जरूरी। 8 और प्रभू यीशू आपणें चेलै पतरस और यहून्ना लै बोलअ कि, “नाशा, मुल्लै करा खाणा लै फसहो भोज तैर।” 9 तिन्नै प्रभू का पुछअ कि, “तूह किधी चाहा कि हाम्हें ऐता बणांए? 10 प्रभू यीशू तिन्नां लै बोलअ कि नगरी भितरी नाशदी भेटणअ तम्हां एक आदमी पाणिए घळै पाई, जसा घरा लै सह नाशे, तम्हें डेओए तेऊई पिछू। 11 और तेऊ घरे मालक लै बोलै इहय कि गुरू बोला ताल्लै इहय कि पाहुणें लै किधी आसा जैगा, जिधी हूँ आपणें चेलै संघे फसहो भोज करूं? 12 तेऊ रहैऊणीं तम्हां का एक सजाऊई दी पांड और तिधी करै तम्हें भोजे तैरी। 13 तियां बी नाठै और जिहअ प्रभू तिन्नां लै बोलअ त, तिन्नै किय तिहअई और फसहो भोज किय त्यार।

### प्रभू-भोज

(मत्ती 26:26-30; मरकुस 14:22-26; 1कुरिन्थियों 11:23-25)

14 जांऊं बगत हुअ ता प्रभू चेलै संघे तिन्नां बिन्नै रोटी खांदअ बेठअ। 15 प्रभू तिन्नां का बोलअ कि, “मेरी ती बडी भारी चाहना कि दुख भोगणें का पैहलै तम्हां संघे हूँ फसह खाऊं। 16 किल्हैकि हूँ खोजा तम्हां का सच्चाई कि जेभै तैणीं सह परमेश्वरे राजा दी पूरअ ना होए तेभै तैणीं निं मूँह अह कधि खाणअ।” 17 प्रभू यीशू कटोरअ चकअ और धन्याबाद किय और बोलअ, “एऊ ढाका और आप्पू मांझें बांडा। 18 हूँ बोला तम्हां लै इहय कि जेभै तैणीं परमेश्वरो राज निं एछे, तेभै तैणीं निं मूँह कधि दाखरस झुटणअ।” 19 तेखअ प्रभू यीशू रोटी चकी और धन्याबाद करी करै चोळी और तिन्नां लै इहय बोली करै दैनी कि, “अह आसा मेरी देह, जुंण मंएँ तम्हां लै दैनीं, मूँह आद करना लै करै तम्हें इहय ई।” 20 इहयई करै प्रभू यीशू बोलअ कि, “अह कटोरअ आसा

मेरे लोहू दी नूँई बाचा जुंण तम्हां लै मूँह बहाऊणअ। 21 पर हेरा, मूँह ढाकणें आळैआ हाथ आसा मूँह संघे मेरे मेजा दी। 22 किल्हैकि मांळुओ शोहरू ता आसा तेता लै ई चुनअ द पर हाय! तेऊ मांळु लै जहा सह ढाकणें बझैऊणअ।” 23 तैबे तियां आप्पु बिचै लागे पुछ-ताछ करदै कि हाम्हां बिचै कुळ आसा जुंणी अह काम आसा लाअ द करी?

### महान कुंण आसा ? परेंदै बाद-बिबाद

24 तिन्नां बिचै हुअ इहय बाद-बिबाद बी कि हाम्हां बिचै बडअ कुंण आसा? 25 प्रभू तिन्नां लै बोलअ कि, “होरी जातीए राजे करा तिन्नां परेंदै राज; और जुंण तिन्नां परेंदै अधिकार डाहा, तिन्नां लै बोला उपकारक। 26 पर तम्हें नि ईहै हई, पर जुंण तम्हां मांझै बडअ होए, सह हरे सोभी का होछअ और जुंण परधान आसा, सह बणें सेऊआकारा जिहअ। 27 किल्हैकि बडअ कुंण आसा, सह जुंण रोटी खांदअ बेठअ द आसा; या सह जुंण सेऊआ करा? सह जुंण रोटी खांदअ बेठअ द आसा? पर हूँ आसा तम्हां बिचै सेऊआकारा जिहअ।

28 “पर तम्हें आसा तियां जुंण मेरी परिक्षा दी लागतातर मूँह संघे रहै। 29 जिहअ मेरे बाप्पु मुल्है एक राज आसा डाहअ द, 30 तिहअई डाहा हूँ तम्हां लै बी ताकि तम्हें मेरे राजा दी मूँह संघे मेरी मेजा दी खा-पिया, इधी तैणीं कि सिंहासणा दी बेशी करे इस्त्राएले बाराह गोत्रो न्याय करे।

### पतरसे नकार करनें भविष्यवाणीं

(मत्ती 26:31-35; मरकुस 14:27-31; यूहन्ना 13:36-38)

31 “शमोन, हे शमोन, भाळ, शैताने मांगे तम्हें ताकि तम्हां गिँहूँ जिहै मांडे। 32 पर मंए की तालहै अरज कि तेरअ विश्वास नि लोळी कम हुअ और जाऊं तूह बापस फिरे, ता आपणें इन्नां भाई करे हेर सभाळ करी करे पाके।” 33 पतरसे प्रभू लै बोलअ कि, “हे प्रभू, हूँ आसा ताह संघे जेहला दी नाशणा लै और मरना लै बी तैर।” 34 प्रभू तेऊ लै बोलअ कि, “हे पतरस, हूँ बोला तालहै इहय की आझः दोती मुरगै बाशणें का पैहलै करनअ ताह मेरे बारें नाई कि हूँ नि जाणदअ एऊ।”

### बटुअ, झोळी और तलवार

35 प्रभू बोलअ होर तिन्नां लै इहय कि, “जधू मंए तम्हां लै बटुए, झोळी और बुटा बिणही भेजे तै, तधू कै तम्हां किछू गले कामी हुई ती?” तिन्नां दैनअ जबाब कि, “हाम्हां नि किछू गले कामी पळी।” 36 प्रभू तिन्नां लै बोलअ, “ऐबे जसा का बटुअ होए सह पाए तेऊ संघा और झोळी बी, और जसा का तलवार नि आथी, सह बेचै आपणें झिकळे और तेते लए तलवार। 37 किल्हैकि हूँ बोला तम्हां लै कि अह जुंण लिखअ द आसा, कि अपराधी संघे गिणअ, सह आसा मूँह दी पूरअ हणअ जरूरी, किल्हैकि मेरे बारें लिखी दी गल्ला आसा पूरी हूँ आळी।” 38 तिन्नां प्रभू लै बोलअ कि, “इधी आसा दूई तलबारा” और प्रभू बोलअ इहय कि, “इयां आसा बतेही।”

### जैतूने धारा दी यीशूए प्राथणां

(मत्ती 26:36-46; मरकुस 14:32-42)

39 तेखअ प्रभू यीशू मसीह तिधा का निखळअ बागे और आपणीं रीतिए साबे नाठअ जैतूने धारा लै और चेलै नाठे तेऊ पिछू। 40 तिधी पुजी करे बोलअ प्रभू इहय कि “प्राथणां करा, ताकि तम्हें परिक्षा दी ना पळे।” 41 और आप्पु नाठअ तिन्नां का जुदअ जिहअ और लागअ प्राथणा करदअ कि, 42 “हे पिता, जै तूह चाहा ता एऊ कटोरें कर मुखा दूर, तैबी बी मेरी नि तेरी इछा लोळी पूरी हुई।” 43 तैबे स्वर्गा का एक दूत प्रभू का धेछूअ सह दैआ त प्रभू लै सामर्थ। 44 प्रभू यीशू मसीह बडअ संकटा दी ब्याकुल हई करे बी दिले बेदना संघे रहअ प्राथणा करदअ लागी, और प्रभूओ परसिनअ त लागअ द पळदअ खूनं बडे-बडे टिपू जिहअ धरती दी। 45 प्रभू यीशू प्राथणां का उझुअ और उदास हई करे चेलै सेटा लै नाठअ पर तियां तै सुतै दै, प्रभू तिन्नां लै बोलअ कि, “तम्हें किल्है आसा सुतै दै।” 46 खळे उझिआ, प्राथणां करा ताकि परिक्षा दी ना पळे।

### यीशू धोखे करै ढाकणअ

(मत्ती 26:47-56; मरकुस 14:43-50; यूहन्ना 18:3-12)

47 प्रभू त इहय बोलदअ ई लागअ द कि लोगे एक बडी भीड़ आई और तिन्नां बाराह मांझै एकी जसा नांअ यहूदा त, सह त तिन्नां लोगा आजू-आजू और सह आअ प्रभू यीशू सेटा लै और प्रभू लै दैनअ गलेटै माळू। 48 प्रभू तेऊ लै बोलअ, “हे यहूदा, माळू दैई करै आसा तंए लाअ द हूँ ढाकणें बझैळी?” 49 चेलै जाऊं भाळअ कि के हणें आळअ आसा, तिन्नां बोलअ, “हे प्रभू तूह कै बोला हाम्हें तलबार चलाऊमै?” 50 और तिन्नां मांझै एकी माहायाजके सेऊआकारा लै तलबारें बाही और तेऊओ दैहणअ कान शोटअ धरनीं। 51 एता लै प्रभू यीशू बोलअ; “बस करा ऐबे।” और प्रभू यीशू लाअ तेऊओ कान बापस और सह हुअ रांबळअ। 52 तैबे प्रभू यीशू माहायाजका लै और मांदरे पैहरू, पुरनिए लै जुंणीं राची तियां घेरें तै, तिन्नां लै बोलअ, “तम्हें कै हूँ डाकू आसा समझअ द कि तलबारा और शोठै लई आसा निखळै दै? 53 जेभै हूँ मांदरें हर धैले तम्हां संघे त, तेभै नि तम्हें मूल्है हाथ पाअ, पर अह आसा थारअ बगत और न्हैरेओ अधिकार।”

### पतरसो नकार करनअ

(मत्ती 26:57,58,59-75; मरकुस 14:53,54,66-72; यूहन्ना 18:12-18, 25:27)

54 तेखअ तिन्नां प्रभू यीशू ढाकअ और माहायाजके घरा लै निअ। पतरस रहअ दूर पिछू-पिछू हाढदअ लागी। 55 और जाऊं तियां ताटी तै आगी जाली करे बेठै दै थिये, ता पतरस बी बेठअ तिन्नां बिचै नैथदअ। 56 और एकी बेठळी भाळअ सह आगीए प्रेशै दी बेठअ द और तेऊ बाखा ताकि करे लागी बोलदी कि, “अह बी ता तेऊ संघे थिय।” 57 पतरसे किय नाई कि “हे नारी, हूँ नि तेऊ जाणदअ बी आथी।” 58 थोळी घळी बाद बोलअ एकी होरी तेऊलै कि, “तूबी ता तिन्नां साथी आसा भाळी?” पतरसे बोलअ इहय कि, “तूह कै आदमी आसा, हूँ नि आथी सह।” 59 कोई एकी घांटे बाद एकी होरी आदमी बोलअ बडे पाकी बछैणा संघे कि “जरूर अह भाळअ मंए तिन्नां संघे किल्हैकि अह आसा गलीली।” 60 पतरसे बोलअ कि, “आरा भाई पतअ नि तूह कै गल बोला?” पतरस त बोलदअ ई लागअ द कि नडैऊरे बाशअ मुरगअ। 61 तैबे प्रभू पतरसा बाखा लै भाळअ और पतरसा आई प्रभूए सह गल आद कि “आझः मुरगै बाशणें का पैहलै करनअ ताह चिई बारी मुल्है नाई।” 62 और पतरस निखळअ तिधा का बागे और सह लागअ हिं करे लेरा लांदअ।

### यीशूओ फिरी एछणअ

(मत्ती 26:67,68; मरकुस 14:65)

63 जुंणीं आदमीं प्रभू यीशू ढाकअ द थिय, तियां लागे प्रभूए ठठै करदै और तेऊ चिकदै। 64 और प्रभूए आच्छी ढोपी करे बोलअ कि, “भविष्यवाणी कर कि तालहै कुंणीं बाही।” 65 और तिन्नां बोली प्रभू लै कई बूरी और निंदे गल्ला।

### माहासभा सहनै यीशू

(मत्ती 26:59-66; मरकुस 14:55-64; यूहन्ना 18:19-24)

66 जाऊं राच भैई ता लोगे पुरनिं और माहायाजक, शास्त्री हुए कठा और तिन्नां आपणीं माहासभा दी प्रभू आपणअ और पुछअ, 67 “जै तूह मसीह आसा, तै बोल हाम्हां का।” प्रभू तिन्नां लै बोलअ, “जै हूँ तम्हां का बोलूँ तै नि तम्हां बिश्वास करनअ। 68 जै हूँ पुछूँ, तै नि तम्हां जबाब दैणअ। 69 पर एभा पोर्ही रहणअ मांळुओ शोहरू सर्वशक्तिमान परमेश्वरें दैहणीं बाखा बेशी।” 70 एसा गल्ला शुणीं तिन्नां सोभी प्रभू लै बोलअ, “तेरअ कै मतलब, तूह परमेश्वरो शोहरू आसा?” प्रभू बोलअ, “तम्हें आसा लागे दै आपी बोलदै, किल्हैकि हूँ आसा।” 71 तैबे सोभी बोलअ, “ऐबे नि हाम्हां किछी ग्वाहीए जरूरत आथी, किल्हैकि हाम्हें शुणअ आपणै काने एऊए मूहा का।”



### पिलातुसे सहनै यीशू

(मत्ती 27:1,2,11-14; मरकुस 15:1-5; यूहन्ना 18:28-38)

23 तैबे सारी सभा उझूई और तिन्नै नियं प्रभू यीशू मसीह पिलातुसा सेटा लै। 2 और तियां लागै प्रभू लै ईहै दोषा लांदै कि, "हाम्हें भाळअ अह लोगा शकाऊदअ और अह करा राजै कैसरा लै कारै दैणा लै नाई, और आपणै आप शुणअ हाम्हें मसीह राजअ बोलदअ।" 3 पिलातुसै प्रभू का पुछअ, "तूह यहूदिओ राजअ आसा?" प्रभू दैनअ जबाब कि, "तूह आसा लागअ द आपणै बोलदअ।" 4 तैबे पिलातुसै माहायाजका और लोगा लै बोलअ, "मुखा नि एऊ आदमी दी किछे दोष धेछदअ।" 5 पर तियां लागै होर बी जादैं बोलदैं कि अह शकाऊआ गलीला ओही इधी तैणीं, सारी यहूदीया दी उपदेश दैई सोभी लोगा।" 6 इहय शुणीं करै पिलातुसै पुछअ कि, "अह गलीली आसा?" 7 और इहय जाणीं करै कि सह रियासत आसा हेरोदेसे, तेऊ भेजअ प्रभू हेरोदेसा सेटा लै किल्हैकि तिन्नां धैळै त सह येरुशलेमें ई।

### हेरोदेसे सहनै यीशू

8 हेरोदेस हुअ प्रभू यीशू भाळी बडअ खुश किल्हैकि सह चाहा त कई धेळै ओही प्रभू यीशू भाळणअ और तेऊ त प्रभूए बारै बडअ भारी शुणअ द और सह चाहा त तेऊदी किजै चिन्ह हेरनअ। 9 तेऊ पुछी प्रभू का बडी भारी गल्ला पर प्रभू नि किछे जबाब दैनअ, 10 माहायाजक और शास्त्री तै खट्छुरे दै बडै तन मन लाई प्रभू लै दोषा लांदै। 11 तैबे हेरोदेसै आपणै सपाही संघै किय प्रभू यीशूओ ठठअ-मखऊल और भडकीलै झिकळै भनैऊई भेजअ बापस पिलातुसा सेटा लै। 12 तेसाई धैळी हुऐ पिलातुस और हेरोदेस आप्णू मांझै दोस्त, एता पैहलै तै तियां एकी दुजै लै बैरी।

### पिलातुसे करै यीशू लै सजाए मौत

(मत्ती 27:15-26; मरकुस 15:6-15; यूहन्ना 18:39-19:16)

13 पिलातुसै माहायाजका, सरदारा और लोगा लै बोलअ, 14 "तम्हें बोला एऊ आदमी लै कि अह शकाऊआ भडकाऊआ लोगा और तै आणअ तम्हें अह मूँह सेटा लै, हेरा मंएँ जाचअ भाळअ अह तम्हां सहनै; पर जहा गल्लो तम्हें एऊ लै दोषा लाअ, इहय नि मुखा एऊ दी दोषा लागै जोगी किछे भेटअ। 15 ना हेरोदेसै एऊ दी दोषा भाळअ, किल्हैकि तेऊ भेजअ अह मूँह सेटा लै बापस; और भाळा, एऊ का नि इहय किछे हुअ कि मारनै जोगी सजा दैई सके। 16 तै लाअ मंएँ अह चिकी करै छाडी।" 17 पिलातुस त पबे धैळी तिन्नां लै एकी आपराधी छाडणा लै बिबश। 18 तैबे सोभी पाअ हाल्लअ-गोल्लअ और लैळा पाई करै बोलअ कि, "एऊओ काम करा तमाम और हाम्हां लै छाडा बरअब्बा।" 19 बरअब्बा त जुंणीं नगरी दी बिद्रोह और हत्या की ती और सह त जेहला दी पाअ द। 20 पर पिलातुस चाहा त प्रभू यीशू छाडणअ और तेऊ समझाऊए तै लोग एकी बारी भी। 21 पर लोगै लैळा पाई-पाई बोलअ कि, "एऊ मारा क्रूसा दी।" 22 पिलातुसै चिऊथी बारी तिन्नां लै बोलअ, "किल्है, एऊ दी कै बुराई आसा? मंएँ नि एऊदी मौता दैणै जोगी किछे दोषा भाळअ, तै लाअ मंएँ अह चिकी करै छाडी।" 23 पर तियां पळै पिछू कि "एऊ छडाऊआ क्रूसा दी" और तियां लागै होर बी जोरै लैळा लांदै। 24 तैबे पिलातुसै आज्ञा दैनी कि इनेई साबै करा। 25 और तेऊ सह आदमीं जुंण बिद्रोह और हत्या पिछू जेहला दी थिय बंद किय द सह छाडअ पोही, जहा तियां मांगा तै और प्रभू यीशू सभाळअ तिन्नै साबै जिहअ तियां चाहा तै।

### यीशू क्रूसा दी झडाऊणअ

(मत्ती 27:32-44; मरकुस 15:21-32, यूहन्ना 19:17-27)

26 जांऊं तिन्नै प्रभू निअ ता तिन्नै शिमोन नांओ कुरेनी, सह त गराऊंआ का लागअ द एछदअ ढाकअ और क्रूस लादअ तेऊए कान्हा कि यीशू पिछू-पिछू निऊं एऊ।

27 और लोगे बडी भीड़ लागी पिछू हांडदी और कई बेटळी लागी लेरदी और हीका पटाकदी। 28 प्रभू यीशू तिन्नां बाखा भाळी करै बोलअ, "हे येरुशलेमें पुत्रिओ, मुल्है नि लेरा ला, पर आपणै-आपणै शोहरू लै ला लेरा।

29 किल्हैकि हेरा, तियां धैळै एछणै कि लोगा बोळणअ इहय कि धन्य आसा सह जुंण बांझ आसा, सह गर्भ जुंणीं कसा लै जल्म नि दैनअ और तियां चूई, जुंणीं कसा दै दुध नि पणैऊंअ। 30 तेऊ बगती बोळणअ तिन्नां इन्नां धारा लै इहय कि हाम्हा परेंदैं दूळा और टिलै लै बोळणअ तिन्नां इहय कि हाम्हां ढोपा।

31 किल्हैकि जै तियां हरै पेळा संघै इहय करा ता शुके लै भुजा कै नि तिन्नां करनअ होए।"

32 तिन्नै दुई होर आदमीं बी क्रूसा दी छडाऊणा लै नियं जुंण कुकरमीं थिये।

33 जांऊं तियां तेसा जैगा पुजे, जसा लै खोपळीए जैगा बोला, ता तिन्नै तिधी तियां दुई कुकरमीं बी एक दैहणै और एक बाऊंए क्रूसा दी छडाऊरे।

34 तैबे प्रभू यीशू बोलअ, "हे पिता, इन्नां कर माफ, किल्हैकि ईयां नि जाणदैं कि ईयां किजू करदैं आसा लागै दै?" और तिन्नै आप्णू बिचै चिठी पाई और तिन्नै प्रभू यीशूए झिकळै बांडे।

35 लोग तै लागै दै खट्छुई करै भाळै और तियां सपाहीए सरदार बी लागै ठठै करदैं और इहय बोलदैं कि, "एऊ होर ता बचाऊरे, जै अह मसीह आसा और जै अह परमेश्वरो चुनअ द आसा तै आप्णू ता बच।" 36 सपाही बी आरे नेळ और तिन्नै दैनअ प्रभूए खाखा सिरकअ और तियां बी लागै मजाका करदैं कि: 37 "जै तूह यहूदिओ राजअ आसा, तै बचाऊ आपणै आप।" 38 और प्रभू परेंदैं ती एक चिठी बी टोकी दी कि अह आसा यहूदिओ राजअ।

### मना बदळणै आळै कुकर्मीं

39 जुंण तियां कुकरमीं लटकाऊए दै थिये, तिन्नां मांझै बोलअ एकी निंदा करी करै इहय कि, "तूह कै मसीह नि आथी? तै तूह आप्णू बी बच और हाम्हां बी बचाऊ।" 40 एता लै दुजै तेऊ पैहलै लै झाएळ काढी करै बोलअ इहय कि, "तूह कै परमेश्वरा का बी नि डरदअ आथी? ताल्है बी ता अहैई सजा आसा दैनी दी। 41 हाम्हें आसा न्याये साबै ठीक सजा भुगतदैं लागै दै किल्हैकि म्हारै कामों भेटणअ त हाम्हां अहैई फल, पर एऊ नि किछे बुरअ काम किय आथी।" 42 तैबे तेऊ बोलअ कि हे प्रभू, "जेभै तूह आपणै राजा दी एछे, तेभै डाहै मेरअ बी खैळ।" 43 प्रभू तेऊ लै बोलअ कि, "हूँ बोला ताल्है इहय कि तूह हणअ आझं ई मूँह संघै स्वर्ग।"

### यीशू प्राण शोटणै

(मत्ती 27:45-56; मरकुस 15:33-41; यूहन्ना 19:28-30)

44 और लगभग दुई पहरा बाद चिऊथै पहरै सारै देशै हुअ न्हैरअ घोर। 45 सुरज डुबअ और मांदरो परदअ धेळूअ बिचो-बीच दुई बाखा लै। 46 और प्रभू यीशू मसीह बडै जोरे बोल बोलै कि, "हे पिता, मंएँ सभाळी आपणी आत्मां तैरे हाथै, और इहय बोली करै प्रभू यीशू प्राण शोटै। 47 सुबैदारै जुंण तिधी हुअ, तेता भाळी करै की परमेश्वरे बडाई और बोलअ कि, "जरूर अह आदमीं त धरमीं।" 48 और लोगे भीड़ जुंण तिधी भाळै तै आरे दै इहय भाळी नाठै हीका पटाकदी घरा लै। 49 प्रभू यीशूए सोभ भेतू-बछैणू और जुंण बेटळी गलीला का प्रभू सेटा आई, तियां ती दूर खट्छुई करै भाळी लागी दी।

### यीशू दाबी डाहणअ

(मत्ती 27:57-61; मरकुस 15:42-47; यूहन्ना 19:38-42)

50 और एक युसुफ नांओ एक मंत्री सज्जन और धरमीं माहूँ त। 51 और सह नि तिन्नै बचारा और कामां का खुश थिय। सह त यहूदिए नगरी अरिमतिओ रहणै आळअ और सह त परमेश्वरे राजा न्हैळअ लागअ द। 52 सह पिलातुसा सेटा लै नाठअ और तेऊ मांगी तेऊ का प्रभू यीशूए लाश। 53 और लाहस तेऊ क्रूसा का धरनीं शुआळी और चादरा दी पळेटी और कब्रा दी दाबी जुंण भीळी दी ती कोती दी और तेथ नि कोहै त डाहअ द। 54 सह धैळी ती फसहे तैरीए धैळी और सबते धैळी ती शुरु हणै आळी। 55 और तिन्नै बेटळी जुंण गलीला का आई दी थी, तियां पिछू-पिछू नाठी और सह कब्र भाळी और इहय बी कि लाहस केई साबै डाही 56 और तिन्नै बापस फिरी करै खुशबूदार इत्र बणांअ और सबते धैळी तिन्नै बचनै साबै किय आराम।



### यीशूओ जिऊई उज्जणअ

(मत्ती 28:1-10; मरकुस 16:1-8; यूहन्ना 20:1-10)

24 पर हबते पैहली धैळी तियां दोती दोथी तिन्नां सुगन्धित चिजा जुंण तिन्नें बणाई ती, तिन्नां निई करै कब्रा सेटा लै नाठी।<sup>2</sup> और तिन्नें कै भाळअ कि पाथर आसा पोर्ही बदळअ द।<sup>3</sup> और तिन्नें भितरी भाळअ कि प्रभू यीशूए लाहस बी निं इधी आथी।<sup>4</sup> एसा गल्ला भाळी तियां झशकूई कि अह कै हुअ और हेरे, तिधी आये दूई मरध झलमलै झिकळै बाहै दै और तियां खहळुए तिन्नां सेटा।<sup>5</sup> तियां जांऊं डरी, और धरती बाखा मूँह ढोळी करै रही ता तिन्नें दूई दूतै बोलअ, "तम्हें जिऊंदै लोळी मूँए दै बिचै किलहै आसा लागी दी?"<sup>6</sup> सह निं इधी आथी, पर सह हुअ जिऊंदअ; आद करा कि जधू सह गलील नगरी थिय, तधू तेऊ कै बोलअ त, <sup>7</sup> कि अह आसा जरूरी कि मांङ्गुओ शोहरू पापिए हाथै पळे और कूसा दी मरे और चिऊथे धैळै जिऊंदअ होए।"<sup>8</sup> तैबै आई तिन्नां प्रभू खोजी दी गल्ला आद।<sup>9</sup> और तियां तिधा का तुहरी और तिन्नें सारी गल्ला गैराह चेलै का और होरी सोभी का खोजी।<sup>10</sup> जुंणीं प्रेरिता का ईयां गल्ला खोजी, तियां ती मरिमम मगदीलणीं, योअन्ना, याकुबे आम्मां मरिमम और होर बेटळी बी ती।<sup>11</sup> पर तिन्नें गल्ला लागी तिन्नां होरी काहणीं जेही और तिन्नें निं तिन्नें गल्लो विश्वास किय।<sup>12</sup> तैबै पतरस उज्जुअ और कब्रा सेटा लै तुहरअ और तिधी भाळै सिधै झिकलै पळे दै और जुंण हुअ त तेता भाळी हुअ सह रहैन, और सह फिरअ घरा लै बापस।

### इम्माऊसे बाता यीशू चेलै संघे

(मरकुस 16:12,13)

13 और तेसाई धैळी तिन्नां मांङ्गे दूई चेलै तै लागे दै इम्माऊस नाऊंरें गराऊंआ लै नाशद, सह त येरुशलेमा का कोई सात मील दूर।<sup>14</sup> तियां तै इन्नां गले बारै आप्पू बिचै गल्ला करदै लागे दै जुंण हूई ती।<sup>15</sup> और जांऊं तियां आप्पू बिचै गल्ला-बाता और पूछ-ताछ करदै तै लागे दै, ता प्रभू यीशू आअ और तिन्नां संघे लागअ हांडदअ।<sup>16</sup> पर तिन्नें आच्छी ती एही बंद कि तियां निं प्रभू बछैणीं सकै।<sup>17</sup> प्रभू तिन्नां का पुछअ कि, "तम्हें कै गल्ला करा आप्पू मांङ्गे हांडदी-हांडदी?" तियां खहळुए उदास जिहै।<sup>18</sup> इहय शुणीं एकी क्लियोपास नाऊंरे मांङ्गू बोलअ कि, "तूह कै येरुशलेमें परदेसी एकै आसा कि जहा का इहय थोघ बी निं आथी कि इन्नां धैळै येरुशलेमें कै हुअ।"<sup>19</sup> प्रभू तिन्नां का पुछअ कि, "कै गल्ला हूई?" तिन्नें बोलअ इहय कि, "यीशू नासरीए बारै जुंण परमेश्वर और सोभी लोगा नेळ काम और बचना दी सामर्थी और भबिशयबगता थिय,<sup>20</sup> और सह धरमीं ढाकअ माहायाजकै और सरदारै कि तेऊ लै दैणीं मौतै सजा और सह मारअ तिन्नें कूसा दी।<sup>21</sup> पर हाम्हां ती आशा कि एऊ दैणअ इस्त्राएला लै छुटकारअ, और इन्नां गल्ला का लावा एसा घटना हुअ आझ् चिऊथअ धैळअ।<sup>22</sup> और हाम्हां बिचै कई बेटळीए गल्ला शुणीं झाखुए हाम्हें होर बी, तियां नाठी दोती कब्रा दी और <sup>23</sup> तिन्नां निं प्रभूए लाहस तिधी भेटी और तियां बोला इहय कि तिन्नां भेटै तिधी स्वर्गदूत और तिन्नें दुतै बोलअ कि यीशू हुअ जिऊंदअ।<sup>24</sup> और म्हारै साथी मांङ्गे बी नाठै कई भाळै और जिहअ तिन्नें बेटळी बोलअ त तिन्नें बी भाळअ तिहई, पर सह नी भाळी तिन्नें।<sup>25</sup> तैबै प्रभू तिन्नां लै बोलअ, "हे निर्बुधिओ, भबिशयाबगते सारी गल्ला दी विश्वास करना लै मंदमत्तिओ! <sup>26</sup> अह कै जरूरी नाई त आथी कि मसीह दुख भोगी करै आपणीं महिमा लै नाशे?" <sup>27</sup> तैबै प्रभू मूसा नबी और भबिशयाबगते कताबा का शुरु करी करै पबित्र शास्त्रा का आपणें बारै दी हूई दी सारी गल्लो अर्थ तिन्नां का समझाऊअ।

28 तेतरी ग्पे तियां तेऊ गराऊंआ नेळ पुजी, जांऊं तियां तिधा लै नाशदै लागे ता तेऊए हांडणें साबा का चलअ इहय पतअ कि सह चाहा तिन्नां का बी आजू नाशणअ।<sup>29</sup> पर तिन्नें बोलअ इहय कि, "हाम्हां संघे दै आझ् बैली रहणें ऐबे गई साह पळी।" तैबै सह तिन्नां संघे नाठअ भितरा लै।<sup>30</sup> जांऊं सह तिन्नां संघे रोटी खांदअ बेटअ, ता तेऊ किय रोटी ढाकी करै धन्याबाद और रोटी चोळी करै लागअ तिन्नां लै दैंदअ।<sup>31</sup> तैबै तिन्नें आच्छी खुल्ही और तिन्नें बछैणअ कि अह आसा प्रभू, पर प्रभू हुअ तिन्नें आच्छी सेटा का लोप।<sup>32</sup> तैबै तिन्नें आप्पू बिचै गल्ला की कि, "बाता हांडदी जांऊं सह हाम्हां संघे गल्ला करदअ त लागअ द और पबित्र शास्त्र का अर्थ समझाऊअ, ता इहय ता लागअ त कि आरा ईयां गल्ला लागी शुणीं-शुणीं दी?"<sup>33</sup> और तियां नढैऊरे उज्जुए और राची भितरी पुजै तियां येरुशलेमे। तिन्नें भाळै कि प्रभूए गैराह चेलै और होर साथी तै तिधी कठा हुए दै।<sup>34</sup> तियां तै लागे दै बोलदै कि, "प्रभू हुअ सञ्जी जिऊंदअ और शिमोना का बी शुझूअ।"<sup>35</sup> तैबै तिन्नें बी तिन्नां का बाता हूई दी गल्ला खोजी और इहय बी खोजअ कि रोटी खांदी बारी हाम्हें किय करै बछैणअ।

### यीशू चेलै का धेछणअ

(मत्ती 28:16-20; मरकुस 16:14-18; यूहन्ना 20:19-23; प्रेरित 1:6-8)

36 तियां तै इन्नां गल्ला करदई लागे दै कि प्रभू यीशू खहळुअ आप्पू तिन्नां बिचै और तिन्नां लै बोलअ कि, "तम्हां लोळी शांती हूई।"<sup>37</sup> पर तियां सोभ उरै, हँछुए और तिन्नें समझअ कि हाम्हां का धेछुअ भूत।<sup>38</sup> प्रभू तिन्नां लै बोलअ कि, "तम्हें किलहै हँछुए और थारे मनै किलहै आसा शक।<sup>39</sup> मेरै हाथा और मेरै पैरा भाळा, कि हूँ आसा सहई; मूँह छूँआ, किलहैकि आत्मां दी निं हाडी मास हंदअ जुंण हाडी मासा तम्हें मुखा भाळा।"

40 इहय बोली करै प्रभू तिन्नां का आपणें हाथ पैर रहेऊरे।<sup>41</sup> जांऊं तिन्नां खुशीए मारै निसअ भरोसअ हई और तियां हुए रैहैन-टैन, ता प्रभू तिन्नां का पुछअ कि, "तम्हां का खाणां लै बी आसा किजै?"<sup>42</sup> तिन्नें दैनअ भूजी दी माहछलीए एक टांक।<sup>43</sup> और प्रभू यीशू मसीह तिन्नां सहनै ढाकी और खाई।<sup>44</sup> तेखअ प्रभू तिन्नां लै बोलअ, "ईयां आसा मेरी तियां गल्ला जुंण मरें तम्हां संघे रही करै तम्हां का खोजी ती कि, अह आसा जरूरी कि जेतरी बी गल्ला, मूसा नबीए व्यवस्था और भबिशयाबगते भजनं कताबा दी मेरै बारै जुंण गल्ला लिखी दी आसा, तियां पूरी होए।"

45 तैबै प्रभू पबित्र शास्त्र समझणा लै तिन्नें बुधी खोलही।<sup>46</sup> प्रभू तिन्नां लै बोलअ, "इहय आसा लिखअ द कि मसीह भोगणअ दुख और चिऊथे धैळै हणअ मरी करै जिऊंदअ,<sup>47</sup> और येरुशलेमा ओरी सोभी जाती बिचै हणअ मन फिराव और पाप क्षमा करनेओ परचार तेऊए नाऊंरें।<sup>48</sup> तम्हें आसा इन्नां सोभी गले गुआह।<sup>49</sup> और भाळा, जुंण प्रतिज्ञा मेरै बाप्पू की दी आसा, सह उतारनिं मूँह तम्हां लै और जेभै तैणीं तम्हें स्वर्गा का सामर्थ निं भेटे, तेभै तैणीं रहै एसाई नगरी।"

### यीशूओ स्वर्गा लै नाशणअ

(मरकुस 16:19,20; प्रेरित 1:9-11)

50 तेखअ निर्यें प्रभू यीशू तियां सोभ बेतनियाह तैणीं बागै और आपणें हाथ चकी करै दैनी तिन्नां लै आशीष।<sup>51</sup> और आशीष दैदी-दैदी हूअ तिन्नां का अलग और तिन्नें आच्छी सहनै चकअ प्रभू यीशू स्वर्गा लै।<sup>52</sup> और तिन्नें प्रभू सेटा माथअ टेकअ और बडी खुशी संघे फिरै येरुशलेमा लै बापस <sup>53</sup> और धैळ हूआ तै तियां मांदरै कठा और करा तै परमेश्वरे स्तुती।

# यूहन्ना

## भूमिका

यूहन्ना लिखे दै सुसमाचारा दी आसा यीशू परमेश्वरे अनंत शब्दे रूपे पेश किय द, जूणी "देहधारी हई करै हाम्हां बिचै डेरअ पाअ।" एसा कताबा दी आसा अह कथन सपष्ट कि अह सुसमाचारा आसा एते तैणी लिखअ द कि एता पहळणें आळै इहय विश्वास करे कि यीशूई आसा प्रतिज्ञा किय द उध्दारकर्ता और परमेश्वरो पुत्र, और तिन्नां यीशू दी विश्वास करनै करै जीवन भेटी सके (20:31)।

भूमिका दी आसा यीशू परमेश्वरे अनंत वचनें रूपे दर्शाऊअ द। तेता बाद आसा सुसमचारे पैहलै भागा दी सात आश्चर्यकमें या चिन्हें बारै वर्णन किय द। तेता करै हआ इहय प्रगट कि यीशू आसा प्रतिज्ञा किय द उध्दारकर्ता अर्थात परमेश्वरो पुत्र। दुजअ भाग आसा उपदेश। इन्नां दी आसा अह गल्ल समझाइऊई दी कि इन्नां आश्चर्यकमें किजै अर्थ आसा। एऊ भागा दी आसा इहय बी खोजअ द कि किहय करै किय कई लोगे यीशू दी विश्वास और तेउए चेलै बणें, जैकि होरी लोगे किय बिरोध और विश्वास करना लै किय नकार। 13-17 धैऊआ आसा तेसा राचीए बारै जसा राची यीशू ढाकअ, यीशूए आपणें चेलै संघे घनिष्ट सहभागीता, क्रूसा दी मरनें का पैहली बैळी चेलै त्यार करनै और तिन्नां लै होंसळै दैणें आळै यीशूए वचनों बाढै वर्णन। आखरी धैऊआ दी आसा यीशूए ढाकणें बारै, मकहमें बारै, क्रूसा दी मारनें, दाबी डाहणें, मरी करै जिऊंदै हणें और जिऊंदै हणें का बाद चेलै दी प्रगट हणें बारै वर्णन।

यूहन्ना दैआ मसीहा बाती अनंतजिऊणें दाने बारै जोर। अह आसा एक इहय दान जुण मैची शुरु हआ और अह भेता तिन्नां जुण यीशू मार्ग, सच्चाई और जिन्दगीए रूपे ग्रहण करा। यहून्नं खास गल्ल आसा एथ एही कि आत्मिक चिज्ञा दर्शाऊणें लै आसा तेऊ संसारे जिन्दगीए हर धैलै इस्तेमाल हणेंआळी आम चिज्ञा प्रतीके रूपे प्रयोग की दी, जिहय कि - पाणी, रोटी, ज्योति, फुआल और तेऊए भेडा, और बेल और तेते फळ।

रूप-रेखा

भूमिका 1:1-18

यूहन्ना बपतिस्में दैणें आळअ और यीशूए शुरुआती चेलै 1:19-51

यीशूए जनसेऊआ 2:1-12:50

यरुशलेमें आखरी बगते थोळै धैळै 13:1-19:42

प्रभूओ मरी करै जिऊंदै हणअ और तेऊओ धेछणअ 20:1-31

नचोळ : गलील देश भी धेछणअ 21:1-25

## बाणी किय देहधारण

1 सोभी का पैहलै थीय शब्द, ता सह शब्द थिय परमेश्वरा संघे, और शब्द ई थीय परमेश्वर, 2 सह थीय शुरु दी परमेश्वरा संघे। 3 सोभै गल्ला बणीं तेताई करै, और जुण चिज्ञा बी बणीं, तिन्नां मांझें निं एक बी चीज तेता बाझी बणीं। 4 तेऊ दी थी जिन्दगी; ता सह जिन्दगी थिय मांझूं लै दिउअ। 5 दिउअ चमका न्हैरे दी; पर न्हैरे निं सह हाथे ढाकअ आथी।

6 एक मांझू आअ, सह त परमेश्वर भेजअ द, तेऊ नांअ त यहून्ना। 7 सह आअ ग्वाही दैदअ कि सह तेउ दिउए ग्वाही दैई सके; ताकि सोभ जणहै तेऊ करै विश्वास करे। 8 आप्पू निं सह दिउअ थिय; पर सह त तेउ दिउए ग्वाही दैन्दअ आअ द।

9 सच्चअ दिउअ जुण सोभी मांझूं लै प्रैशअ दैई सका; सह थिय संसारा दी एच्छणें आळअ। 10 सह थिय एऊई संसारै; और सारअ संसार आसा बणअ द तेऊ करै, पर एसा दुनियां निं सह बच्छेणअ आथी। 11 सह आअ आपणें घरै; पर जुण तेउए आपणें थिये, तिन्नें निं सह मन्नअ। 12 पर जुणीं बी सह मन्नअ, तिन्नां लै दैनअ तेऊ परमेश्वरे शोहरू हणेओ हक; मतलब जुण तेऊए नांउआं दी विश्वास करा। 13 तियां नां ता खुना करै, नां ता देहीए इछा करै, नां ता मांझूए इछा करै, पर तिनों जल्म आसा परमेश्वरे इछा करै हुअ द।

14 शब्दे लई मनुष्या देही और दैया, सच्चाई दी भहूई करै पाअ हाम्हां बिचै डेरअ, हाम्हें लोगे भाळी तेऊए एही महिमा, जेही पिता परमेश्वरे एकलौतै शोहरूए महिमां। 15 यहून्ना बी दैनी तेऊए बारै ग्वाही और हाका लाई करै बोलअ कि, "अह आसा सहैई जसरै बारै मएँ बोलअ थिय कि मूह बाद एच्छणअ एक इहय; जुण मुखा बडअ आसा और जुण मुखा बी पैहलै थिय। 16 किलहैकि तेऊए बेअन्त दैया करै भेटअ हाम्हां अनुग्रह ई अनुग्रह और भलाई ई भलाई। 17 इहय करै व्यवस्था ता भेटी हाम्हां मूसा नबी बाती पर

दैआ और सच्चाई पुजी प्रभू यीशू मसीह करै। 18 परमेश्वर निं आझं तैणीं कोही भाळअ, पर एकलौतअ शोहरू जुण बाप्पूए भोसळै आसा, तेऊ कीई तेऊए बारै ईयां सारी गल्ला प्रगट।

## यूहन्ना बपतिस्में दैणें आळए ग्वाही

(मत्ती 3:1-12; मरकुसा 1:1-8; लूका 3:1-18)

19 यहून्नं ग्वाही आसा एही, जांऊं यहूदी येरुशलेमा का याजक और लेबी यहून्ना सेटा लै इहय पूछदै छाडै कि, "तूह कुण आसा?" 20 तैबै यहून्ना मनीं अह गल और एसा गल्ला लै निं नकार किय, पर तेऊ बोलअ इहय कि, "हूँ निं मसीह आथी।" 21 तैबै तिन्नें यहून्ना का पूछअ, "जे तूह मसीह नाई आथी, तै तूह आसा कुण? तै तूह एलिया नबी आसा?" यहून्ना बोलअ, "हूँ नी आथी" तै के तूह भबिषयाबाणी करनै आळअ आसा? ता यहून्ना दैनअ तिन्नां लै जबाब कि हूँ निं इन्नां मांझें कोहै बी आथी। 22 तैबै तिन्नें यहून्ना का पुछअ कि तै तूह आसा कुण? हाम्हां लागा तिन्नां लै जबाब दैणअ जुणीं हाम्हें भेजै दै आसा कि तूह आपणें बारै किजै बोला? 23 तैबै यहून्ना बोलअ, "जिहअ याशयाह भबिषयाबाणीं करनै आळै बोलअ द आसा कि, "हूँ आसा बणें उजाळ जैगा दी एकी हाका लागे आळैओ बोल कि तम्हें करा प्रभूओ रसतअ सिधअ।"

24 ईयां तै फरीसिए तरफा का भेजै दै। 25 तैबै तिन्नें यहून्ना का सुआल पुछअ कि "जे तूह मसीह बी नाई आथी, ना ता एलिया आथी, और ना ता तूह भबिषयाबाणीं करनै आळअ आथी, तै तूह बपतिस्में (जलदीक्षा) दैदअ किजू आसा लागअ द? 26 यहून्ना तिन्नां लै उतर दैनअ कि "हूँ ता दैआ पाणीं करै बपतिस्मअ; पर तम्हां बिचै आसा एक मांझू खळअ जहा तम्हें नाई जाणदै। 27 मतलब जुण मूह बाद एच्छणें आळअ आसा, हूँ निं तेउए बूटे तसमें खोलणें जोगी बी आथी। 28 ईयां गल्ला हुई ज़रदण नदी पार बेतनियाह दी; जिधी यहून्ना बपतिस्मअ दैआ त।

### परमेश्वरो मिम्मूं

29 दुजै धैळै यूहन्ना प्रभू यीशू मसीह आप्पू बाखा एच्छदअ भाळी करै बोलअ, "भाळा, अह आसा परमेश्वरो मिम्मूं, जुंण एऊ संसारे सारै पाप चकी नियां। 30 अह आसा सहैई जसरे बारै मंरें बोलअ त कि एक मांहु एच्छणअ मूँह पिछू, जुंण मुखा बडअ आसा किल्हैकि सह आसा त मुखा पैहलै। 31 और मूँह नि तेऊए बच्छेण थी, तैहीता हूँ पाणिंए बपतिसमें दैदी-दैदी आअ कि सह लोळी ईजराईला दी प्रगट हुआ। 32 और यूहन्ना दैनी अह ग्वाही कि 'मंरें भाळी पबित्र आत्मां कबूतरे रूपे सरगा का एछदी और सह बेठी ठीक यीशू परेंदें। 33 मूँह ता नि एऊए बच्छेण आथी ती, पर जुंणी हूँ पाणिंए बपतिसमें दैदअ भेजअ, तेऊ परमेश्वरै बोलअ मुखा इहय कि जसा परेंदें तूह आत्मां होथे और बेशदी भाळे, सहैई आसा पबित्र आत्मां करै बपतिसमें दैगें आळअ। 34 आज्ञा भाळअ मंरें आपणीं आछी, और आज्ञा आसा हूँ एसा गल्लो गुआह कि अहैई आसा परमेश्वरो पुत्र॥

### यीशू पैहलै चेलै

35 दुजै धैळै बी तै यूहन्ना और तएऊए चेलै मांझै दूई जहणें खह्लुए दै। 36 और यूहन्ना यिशू नाशदअ भाळी करै बोलअ, "भाळा, 'अह आसा परमेश्वरो मिम्मूं'। 37 एसा गल्ला शूणीं लागै तियां यहुन्नै दूई चेलै यीशू पिछू हांढदें। 38 यीशू मसीह तियां आप्पू पिछू एच्छदें भाळी करै तिन्नां का पुछअ, 'तमहें कसा लोळा?' तैबै तिन्नां प्रभू लै बोलअ, 'हे गुरु, तूह किधी रहा?' प्रभू बोलअ, 'चाला हांढदें लागा, तमहां का जाणअ आप्पू धेछुई'। 39 तैबै भाळी तिन्नां प्रभूए रहणें जैगा, और तेसा धैळी रहै तियां तेऊई सघा; ईयां गल्ला हुई दपहरा का पैहलै। 40 तिन्नां दुई मांझै जुंण यहुन्नै गल्ला शूणीं करै प्रभू यीशू पिछू आए, एक त शिमोन पतरसो भाई आन्दरिआस। 41 तेऊ बोलअ आपणें सके भाई सेटा लै नाशी करै कि हाम्हां गअ खरिष्ट भेटी (मतलब मसीह भेटअ)। 42 तेऊ आणअ सह भाऊ यीशू मसीह सेटा लै नियं; तेऊ हेरी करै प्रभू यीशू मसीह बोलअ कि तूह आसा यहुन्नो शोहरू शमोन, ताल्हे बोळणअ कैफा (पतरस)।

### फिलिप्पुस और नतनएल शददों

43 फिलिप्पुस त आन्दरिआस और पतरसे नगर बैतसैदो रहणें आळअ। 44 फिलिप्पुस त आन्दरिआस और पतरसे नगर बैतसैदो रहणें आळअ। 45 फिलिप्पुसै नतनेला सेटा नाशी करै बोलअ कि जसरे बारै मूसा नबी व्यवस्था दी बोलअ, और भबिशयाबाणीं करनें आळै भबिशयाबाणीं आसा की दी, सह गअ हाम्हां भेटी, सह आसा यसुफो शोहरू यीशू नासरी। 46 नतनेलै तेऊ लै बोलअ, 'नासरता का कै कोई राम्बली चीज बी निखळी सका?' फिलिप्पुसै बोलअ, 'चाल आप्पू भाळ।' 47 प्रभू यीशू मसीह नतनेल आप्पू बाखा लै एच्छदअ भाळी बोलअ, 'भाळा, अह आसा सच्चअ ईजराईली; एऊ दी नि कोई बी कपट आथी। 48 नतनेलै प्रभू यीशू लै बोलअ, 'तंरें किहअ करै बछेणअ हूँ?' प्रभू यीशू तेऊ लै उत्तर दैनअ, 'फिलिप्पुसै शदअ तूह बादा का, तेता का पैहलै हेरअ त मंरें तूह अंजीरे बूटा गोधै भाळी। 49 तैबै नतनेलै बोलअ, 'हे गुरु, तूहैई आसा परमेश्वरो पुत्र और तूह ई आसा ईजराईलो माहा राजअ। 50 प्रभू यीशू तेऊ लै बोलअ, 'मंरें बोलअ कि तूह भाळअ मंरें अंजीरे बूटा गोधै, तै किय तंरें विश्वास? अह नि किछ बी आथी, ताह भाळणें एता का बडै-बडै काम।' 51 तेखअ तेऊ बोलअ, 'हूँ आसा लागअ द तमहां का सच्ची-सच्ची बोलदअ कि तमहां भाळणअ सबरग खुलअ द और परमेश्वरो सर्बादूत हेरनअ तमहां मांहुए शोहरू परेंदें उतरदअ और उडै नाशदअ।'

### गलीले काना गराऊंरें पैहलअ चमत्कार

2 तेखअ चिउथे धैळै थिय गलीले काना गराऊंरें कसरअ बैह, प्रभू यीशूए आम्मां बी थी तिधी बैहा लै नाठी दी; 2 ता प्रभू यीशू मसीह और तेऊए चेलै लै बी थिय बैहा लै छांदअ। 3 जांऊं बरातू लै दाखरसे कार्मी पळी, ता प्रभू यीशूए आम्मां बोलअ, 'घरा आळै का निं दाखरस रहअ।' 4 प्रभू यीशू

बोलअ तेसा लै इहय, 'हे स्त्री मूँह ताह संघे किजै काम आसा? मैची नि मेरअ बगत आई।' 5 तैबै प्रभू यीशूए आम्मां नोकर चाकरा लै बोलअ कि जिहअ-जिहअ अह तमहां लै करना लै बोले, तिहअ-तिहअ करै। 6 तिधी थियै यहुदीए हाथा-पैरा धोणेंए रबाजे साबै पाथरे छ: घळे डाहै दै, जेथ भितरी दुई-दुई, चअन-चअन मंअण एच्छा त। 7 यीशू तिन्नां लै बोलअ, 'इन्नां घळै दी भरा पाणीं।' तिन्नां भरै तियां घळै टिरा बहूदें। 8 तैबै यीशू बोलअ, 'एबै नियां एता का काढी करै शैहण गराई सेटा।' और तिन्नां बी किय तिहअ ई। 9 जांऊं शैहण गराई सह पाणी चाखअ, सह थिय दाखरस गअ द बणीं, पर तेउका निं पतअ थिय कि अह किधा का आणअ, पर तिन्नां नोकर चाकरा का थिय थोघ जुंणीं सह पाणीं काढअ त। तैबै शैहण गराई लाळअ शादअ और तेऊलै बोलअ, 10 'हरेक आदमीं दैआ पैहलै बधिया दाखरस, और जांऊं लोग झुटी करै रजा, तांऊ दैआ सह फिकअ जिहअ; पर तंरें डाहअ दा सोभी का बधिया दाखरस मैची तैणीं चकी!' 11 प्रभू यीशू किय गलीले काना गराऊंरें अह पैहलअ चिन्ह रहैऊई करै आपणअ गुणगान प्रगट और तेउए चेलै बी हुअ तेउ परेंदें विश्वास।

12 एता बाद यीशूए आम्मां, भाई और तेउए चेलै नाठै कफरनहूमा लै और थोळै धैळै रहै तियां तिधी।

### मांदरा का बपारी बागै काढणें

(मत्ती 21:12,13; मरकुस 11:15-17; लूका 19:45, 46)

13 यहुदीए फसहे जाचा (फसह पर्व) ती नेळ और प्रभू यीशू नाठअ येरुशलेमां लै। 14 और तेऊ भाळअ मांदरें बल्द, भेडा-बाकरी, कबूतरा बेचदें ढबे धेल्लै ओही-पोही दैन्दै बपारी बेठे दै। 15 प्रभू यीशू मसीह राशीओ छिऊंअ बणांअ और भेडा-बाकरी, कबूतर, बल्द दळाउरें बागा लै, तिन्नां ढबे धेले छिंयें और तिन्नां थहळी पाई ढोळी। 16 कबूतरा आळै लै बोलअ कि इन्नां काढा इधा का पोही, मेरें बाप्पूओ घर निं बपारीओ आडअ बणांआ। 17 तैबै तेऊए चेलै आद फिरी कि पबित्र शास्त्रा दी आसा लिखअ द कि 'तेरें घरे धुना शोटणअ हूँ खाई।'

18 एसा गल्ला भाळी यहुदी प्रभू यीशू लै बोलअ, 'तूह इहय करी करै हाम्हां का कुंण जिहै चिन्हां रहैऊदअ आसा लागअ द? 19 प्रभू यीशू मसीह उत्तर दैनअ, 'एऊ मांदरा पा ढोळी, मूँह करनअ अह चिउथे धैळै खळअ। 20 यहुदी बोलअ, 'एऊ मांदरा बणांआ लै आसा लागै दी छयाळी साला, ताह कै अह चीयै धैळै लै करनअ खळअ? 21 पर प्रभू यीशू मसीह बोलअ आपणीं देही लै मांदर, पर तिन्नां निं अह गल समझी। 22 तैहीता जेभै प्रभू यीशू मरी करै चिउथे धैलै जिऊंदअ हुआ, तेभै फिरी तेउए चेलै बी आद कि अह गल बोली ती तेऊ, और तैबै किय तिन्नां पबित्र शास्त्र और यीशूए गल्ला दी विश्वास।

### यीशू हेरा मांहुए मनां जाणीं

23 जधू प्रभू यीशू मसीह फसह पर्व लै येरुशलेमें त, कई लोगें किय तिन्नां चिन्ह चमतकारा भाळी तेऊए नांऊआ दी विश्वास। 24 पर प्रभू यीशू निं आपणें आप तिन्नां भरोसै रही, किल्हैकि तेऊका थिय तिन्नां सोभियो थोघ। 25 तिन्नां का निं तेऊ कोई मतलब थिय कि मांहुए बारै कोई ग्वाही दैए, तेऊ का थिय आप्पू थोघ कि मांहुए मनै किजै आसा?

### यीशू और नीकुदेमुस

3 फरीसी बिचै थिय एक निकूदिमुस नांओ मांहु, और सह थिय यहुदिओ सरधार। 2 सह आअ राची प्रभू यीशू सेटा और तेऊ बोलअ, 'हे प्रभू, हामहें जाणा कि तूह आसा परमेश्वरै हाम्हां लै गुरू छाडअ द, इहय करै जुंण चिन्ह चमतकार तूह करा, जै कसा संघे परमेश्वर नाई होए तै निं सह करी सकदअ। 3 प्रभू यीशू तेऊ लै उत्तर दैनअ कि 'हूँ खोजा ताखा सच्ची-सच्ची इहय, जै कोई नऊंरें सिरें का जल्म नाई लए, सह निं परमेश्वरो राज भाळी सकदअ। 4 निकूदिमुसै प्रभू लै बोलअ, 'मांहु जै बुढळअ गअ हई, ता सह तेखअ नऊंरें जल्म किहअ करै सका लई? तेऊ कै आपणीं मांए पेटै भी लागणअ नाशणअ?' 5 प्रभू यीशू उत्तर दैनअ, 'हूँ खोजा ताखा सच्ची-सच्ची कि जै कोई मांहु, पाणीं और आत्मां करै जल्म ना लए, सह निं परमेश्वरै राजा दी

नाशी सकदअ। 6 इहय करै कि जुंण शरीरा का निखळअ (जल्मअ) सह आसा शरीर, और जुंण आत्मां का जल्मअ, सह आसा आत्मा। 7 रहैन निं हरे कि मंरे किजै बोलअ, कि ताह लागणअ 'नऊंरे सिरै का जल्म लणअ जरूरी।' 8 बागरी जेथ बाखा नाशणअ चाहा तेथ बाखा नाशा, ताखा शुणिआ तेते सिधी छेळ, पर ताखा निं पतअ कि सह किधा का एछा और सह किधा लै नाशा? जुंण बी आत्मां का जल्मअ सह आसा इहयई।" 9 निकूदिमुसै उत्तर दैनअ, "ईयां गल्ला किहअ करै सका हई?" 10 इहय शुणीं करै प्रभू यीशू तेऊ लै बोलअ, "इजराईलियो गुरु हई करै बी तूह इन्नां गल्ला निं समझदअ? 11 हूँ खोजा ताखा सच्ची-सच्ची कि हाम्हें जुंण जाणअ द हआ तेता बोला, और जुंण भाळअ द हआ तेते दैआ हाम्हें ग्वाही, पर तमहें निं म्हारी ग्वाही मंदे आथी। 12 जेभै मंरे तमहां का एसा धरतीए गल्ला खोजी, तमहें निं तिन्नां परंदै विश्वास करदै, पर जै हूँ तमहां का सबर्गे गल्ला खोजूँ, तै तमहां किहअ करै करनअ विश्वास? 13 सबर्गे निं कोहै उखळअ, पर सहई सका उखळी जुंण सबर्गा का होथअ, मतलब जुंण माहूँओ शोहरू जुंण सबर्गे आसा। 14 जिहअ मूसा नबी जंगलै सांप उछटै दी चकअ, ठीक तिहअई माहूँओ शोहरू बी आसा उछटै दी चकणअ जरूरी। 15 ताकि जुंण बी विश्वास करे तेऊ भेटणीं कधी ना खतम हणै आळी जिंदगी (अनंत जिऊण)।

16 किल्हैकि परमेश्वरै किय संसारा संघे इहय प्रेम कि आपणअ एकलौतअ शोहरू बी दैनअ, ताकि जुंण बी तेऊ दी विश्वास करे, सह निं लोळी बरैबाद हुअ, पर (अनंत जिऊण) कधी ना खतम हणै आळी जिंदगी लोळी तेऊ भेटी। 17 परमेश्वरै निं आपणअ शोहरू संसारा लै सजा दैदअ भेजी, पर सह भेजअ एते तैणीं कि संसारा तेऊ करै मोक्ष भेटे। 18 जुंण तेऊ परंदै विश्वास करा, तेऊ निं सजा भेटणीं, पर जुंण तेऊ दी विश्वास नाई करा, तेउ दी गअ दोष इहय करै लागी कि तेऊ नि परमेश्वरै एकलौतै शोहरू दी विश्वास किय। 19 सजा देणैओ कारण आसा इहय कि प्रैशअ आअ संसारा दी और माहूँ की प्रैशै छाडी न्हैरै संघे जादी झूरी, और तिन्नें तै काम ई बुरै। 20 किल्हैकि जुंण बुरअ करा, सह डाहा प्रैशै संघे दुशमणी, और जुंण प्रैशै नेळ नाई एच्छा, इहय निं हआ कि तेऊए कामो दोष लागणअ तेऊ परंदै। 21 पर जुंण सच्चाई दी चला, सह एच्छा प्रैशै नेळ, ताकि तेऊए काम प्रगट हई सके कि तियां आसा परमेश्वरै मरजी दी कियै दै।

### यीशूए बारै यूहन्नै ग्वाही

22 एता बाद प्रभू यीशू और तेऊए चेलै आरे यहूदिया देशै; और सह लागअ तिन्नां संघे बपतिस्मै दैदअ। 23 यहून्ना बपतिस्मै देणै आळअ बी शालेमा नेळ एनोन नाऊंरै जैगा दी दैआ त बपतिस्मअ, किल्हैकि तिधी थिय खासअ पाणीं और लोग लआ तै तिधी एच्छी करे बपतिस्मअ। 24 तेभै तैणीं निं यहून्ना जेहलखानै दी पाई थिय। 25 तिधी हुअ यहून्ने चेलै शुधीकरणा पिछू यहूदी लोग संघे बाद-बिबाद। 26 तिन्नें यहून्ना सेटा एछी करै पुछअ, "हे गुरु, जुंण आदर्मी जरदण नदी पार ताह संघे थिय, जसरी तंरे एही ग्वाही दैनी कि भाळा, अह दैआ बपतिस्मअ और सोभ एछा एऊ सेटा लै।" 27 यहून्ना तिन्नां लै उत्तर दैनअ, "जेभै तैणीं माहूँ लै सबर्गा का नाई दैए, 'तेभै तैणीं निं तेऊ किछै भेटी सकदअ।' 28 तमहें ता आप्पै आसा मेरै गुआह कि हूँ नि मसीह आथी, पर हूँ आसा तेऊ आजू भेजअ द।" 29 जसरी लाळी आसा, सह आसा लाळअ, पर जुंण तेऊ लाळेओ साथी तेऊ संघे खळअ आसा, सह शुणां तेऊए और तेऊए गल्ला शुणीं हआ खुश; एबै हुई मेरी बी अह खुशी पूरी। 30 अह आसा जरूरी कि सह लोळी बढअ और हूँ लोळी घटअ।

31 जुंण उपरा का एछा सह आसा सोभी का उत्तम, जुंण धरती का एछा, सह आसा धरतीओ; और सह बोला धरतीए गल्ला। जुंण सबर्गा का एछा, सह आसा सोभी का परंदै। 32 सह दैआ तेतेई ग्वाही, जुंण बी तेऊ भाळअ और शुणअ, पर कोई बी तेउए ग्वाही निं मंदअ। 33 पर जूणीं तेऊए ग्वाही मनीं, सह ला एसा गल्ला दी मोहर कि परमेश्वर आसा सच्चअ। 34 किल्हैकि जुंण परमेश्वरै आसा भेजअ द, सह खोजा परमेश्वरै गल्ला; किल्हैकि सह निं आत्मां नापी-नापीकरै दैदअ। 35 बाप्पू करा शोहरू संघे प्रेम और तेऊ आसा सोभै गल्ला तेऊए हाथै दैनी दी। 36 जुंण परमेश्वरै शोहरू दी विश्वास करे, तेऊ भेटणअ

अनंत (सदाकालो) जिऊण; पर जुंण शोहरू नाई मंदअ, सह निं तेऊ जिऊणा भाळी सकदअ, पर तेऊ परंदै रहा परमेश्वरो क्रोध।

### यीशू और सामरी बेटळी

4 जाऊ प्रभू यीशू मसीह जाणअ कि फरिसी शुणीं ईयां गल्ला कि यीशू बणाओ यहून्ना का बी जादैं चेलै; और तिन्नां लै बपतिस्मअ बी दैआ, 2 (यीशू मसीहे चेलै दैआ तै बपतिस्मअ, आप्पू निं सह बपतिस्मअ दैदअ त)। 3 तैबै प्रभू नाठअ यहूदिया छाडी गलील देशा लै। 4 तेऊ थिय सामरिया नगरी बाती नाशणअ जरूरी। 5 इहय करै सह सुखार नाऊंए सामरीए एकी नगरी पुजअ, अह गरांअ आसा तेसा जैगा जुंण याकुबै आपणै शोहरू युसुफा लै दैनी थी। 6 याकुबो कुंअ बी आसा त तिधी; प्रभू यीशू लाम्मै सफरा का थकी करै पुजअ संघा तेऊ कुरे सेटा बेटअ तिधी, ईयां गल्ला हुई धैळीए छऊए घांटे।

7 तेतरी आई एक सामरी बेटळी तेऊ कुरे दी पाणीं भरदी, प्रभू यीशू तेसा लै बोलअ कि मुल्है बी पणैऊ पाणीं। 8 प्रभू यीशूए चेलै तै तेसा नगरी नाठै दै खाणा लै रोटी लंदै। 9 सामरी बेटळी प्रभू यीशू लै बोलअ, "तूह यहूदी (ऊंची ज्ञातीओ) हई करै बी मूह सामरी (होच्छी ज्ञातीए) बेटळी का पाणीं किल्है मांगा? ( किल्हैकि यहूदी डाहा तै सामरी संघे बडी भारी छूँआं-छूत )। 10 प्रभू यीशू तेसा लै उत्तर दैनअ, "जे तूह परमेश्वरै बरदाना जाणदी, और इहय बी जाणदी कि अह जुंण बोला कि 'मुखा पणैऊ', तै मांगदी तूह तेऊ का, और सह पणैऊदअ ताखा जिऊणैओ पाणीं।" 11 तेसा बेटळी बोलअ, "हे प्रभू ताखा पाणीं भरना लै ता किछै निं आथी, और कुंअ आसा दुघअ; तै ताखा जिऊणैओ पाणीं किधा का आअ?" 12 तूह कै म्हारै दाद बाबा याकुबा का बडअ आसा, जुंणीं हाम्हां लै अह कुंअ दैनअ, संघा एऊई कुंए का आप्पू बी झुटअ, आपणै शोहरू का बी पणैऊअ और आपणै डागै-धणा का बी पणैऊअ। 13 प्रभू यीशू तेसा लै उत्तर दैनअ, "जुंण एऊ पाणीं झुटे, तेउ एछणीं भी चिशै, 14 पर जुंण तेऊ पाणीं झुटे, जुंण मूह दैणअ, तेऊ निं अनंतकाल तैणीं चिशै एछणीं। होर ता होर, जुंण पाणीं मूह तेऊ लै दैणअ, तेते निखळणीं तेऊ दी एही सोबळ, सह रहणीं अनंतकाल तैणीं बगदी लागी।" 15 तेसा बेटळी प्रभू यीशू लै बोलअ, "हे प्रभू तेऊ पाणीं दै मुल्है बी, मूह नि लोळी कधी चिशै आई, नाई लोळी मूह पाणीं भरना लै एतरअ दूर पळअ एछणअ।

16 प्रभू यीशू तेसा लै बोलअ, "नाश आपणै लाळै आण शादी।" 17 तैबै तेसा बेटळी बोलअ कि "मेरअ निं लाळअ आथी।" इहय शुणीं प्रभू यीशू बोलअ कि "तंए बोलअ सच्ची कि तेरअ निं लाळअ आथी। 18 किल्हैकि तंए हेरे पांज घर बसी, जहा संघे तूह आझ्काल्ला रहा, सबी निं तेरअ लाळअ आथी; अह बोली तंए सच्ची गल।" 19 बेटळी बोलअ, "हे प्रभू मुखा जाणिआ इहय कि तूह आसा भबिष्याबाणीं करनै आळअ। 20 म्हारै बाब-दादैं की एसा धारा दी परमेश्वरै पुजा- गाजा; और तूह बोला इहय कि परमेश्वरै भजन करनै जैगा आसा येरुशलैमै?" 21 प्रभू यीशू तेसा लै बोलअ, "हे नारी, मेरी गल्लो विश्वास कर कि इहय बगत एछणअ, ना ता तमहां एसा धारा दी परमेश्वरो भजन करनअ, ना येरुशलैमै। 22 तमहें करा तेउओ भजन जसा नाई जाणदैं, और हाम्हें करा तेउओ भजन जसा हाम्हें जाणा; किल्हैकि मोक्ष आसा यहूदी का ई। 23 आजू एछणअ इहय बगत, बल्कि आझ्काल्ला बी आसा, सच्चै भगता करनअ परमेश्वरो भजन आत्मां और सच्चाई करै, परमेश्वर लोळा आप्पू लै ईहैई भजन करनै आळै। 24 परमेश्वर आसा आत्मां, और जरूरी आसा कि तेऊए भजन करनै आळै लोळी आत्मां और सच्चाई दी भजन किय।" 25 तेसा बेटळी प्रभू लै बोलअ, "हूँ जाणा कि मसीह जुंण माहा मरध आसा सह आसा एछणीं आळअ, जेभै सह एछणअ, तेभै खोजणीं तेऊ हाम्हां का सोभै गल्ला।" 26 प्रभू यीशू तेसा लै बोलअ, "हूँ जुंण ताह संघे गल्ला करदअ आसा लागअ द हूँ आसा सहई।"

### चेले बापसी

27 तेतरी गारे प्रभूए चेलै बी पुजी, तियां हुए रहैन कि सह आसा लागअ द तेसा बेटळी संघे गल्ला करदअ, पर तिन्नें नि इहय पुछअ कि तूह किजै चाहा

और एसा संघै किल्है आसा लागअ द गल्ला करदअ।<sup>28</sup> तेसा बेटळी आपणअ घळअ छाडअ तिधी और आप्पु नाठी सोभी लोगा का खोजदी नगरी लै,<sup>29</sup> एछा, एकी मांहु भाळा, जुंणी सोभ गल्ला खोजी जुंण मंए आपणी ज़िंदगी दी की, हेरा, अह मसीह किन्नी आसा? <sup>30</sup> इहअ शुणी आरे नगरी का बड़े भारी लोग प्रभू सेटा लै। <sup>31</sup> तेतरी प्रभूए चेलै बोलअ, “हे प्रभू, रोटी लअ खाई।” <sup>32</sup> पर प्रभू तिन्ना लै बोलअ, “मुखा आसा खाणा लै एही रोटी ज़सा तम्हां का थोघ निं आथी।” <sup>33</sup> चेलै लागै आप्पु बिचै गल्ला करदै कि, “एऊ लै रोटी कै कुंणी आणी हेरी?” <sup>34</sup> प्रभू तिन्ना लै बोलअ, “मेरी रोटी आसा ईयां कि आपणै भेजणे आळेए साबै चल्, और तेऊओ काम पूरअ करूं।” <sup>35</sup> “तम्हें कै ज़ाणदै निं आथी कि फसल कटाई लै आसा मैची चार भिनें बाकी? <sup>36</sup> लऊणै आळै भेटा मज़दूरी, और अनंत ज़िऊणा लै डाहा फळ कठा करी; ताकि बऊणै और काटणै आळै दुही लै नंद होए।” <sup>37</sup> “एता लै आसा अह कहाबत कि बऊणै आळअ आसा होर और काटणै आळअ आसा होर।” <sup>38</sup> “मरे भेजै तम्हें तेऊ खेचा लऊंदै जेथ थारी कोई मेन्थ निं आथी लागी दी, सह आसा होरी की दी और तम्हें आसा हुए दै तेसा मेन्था का फसले हेसैदार।”

### सामरी ज़ातीए लोगो विश्वास करनअ

<sup>39</sup> नगरीए कई सामरी लोगे किय तेसा बेटळी खोजी दी गल्ला परदैं विश्वास, जुंणी अह ग्वाही दैनीं ती कि एऊ खोजी तियां सोभ गल्ला जुंण मंए आपणी ज़िंदगी की दी आसा। <sup>40</sup> तिन्ना सामरी प्रभू यीशू मसीह सेटा एछी करै अरज की कि हाम्हां सेटा दै रहणै; प्रभू यीशू रहअ तेखअ दुई धैळै तैणीं तिधी। <sup>41</sup> प्रभूए बचना शुणी किय होरी बी कई लोगे विश्वास। <sup>42</sup> तेसा बेटळी लै तिन्ना बोलअ, “हाम्हें नी सीधअ तेरै बोळणै करै विश्वास किय, पर हाम्हें हेरअ आप्पु शुणी और आप्पु भाळी कि अहैई आसा सच्ची एसा दुनियां बचाउणै आळअ। <sup>43</sup> दुई धैळै बाद नाठअ सह तिधा का गलील देशा लै। <sup>44</sup> किल्हैकि प्रभू यीशू त आप्पु बोलअ द कि एक भबिशयाबगते निं आपणै घरे ईजत हन्दी। <sup>45</sup> ज़ाऊं प्रभू गलील पुजअ, ता गलीली आरे बडी खुशी-खुशी मिलदै; किल्हैकि जेतरे काम तेऊ येरुशलमे जाचा दी किये तै, तियां काम भाळै तै तिन्ना बी, किल्हैकि तियां बी तै येरुशलमे जाचा लै आरे दै।

### राज कर्मचारीओ शोहरू ठीक करनअ

<sup>46</sup> प्रभू आअ भी तेखअ गलीले काना लै ज़िधी तेऊ पणीओ दाखरस बणांअ त तिधी आअ एक राजेओ अफसर, तेऊओ शोहरू त कफरनूमै गराऊंए बमार हुअ द। <sup>47</sup> सबी इन्नां गल्ला शुणी कि प्रभू आसा आअ द यहूदिया का गलीला लै, तेउ शददअ आअ कि मूह संघै चाल और मेरै शोहरू कर बमारी का ठीक; किल्हैकि तेउओ शोहरू त मरनेए तैरी दी। <sup>48</sup> प्रभू तेऊ लै बोलअ, “जेभै तैणीं तम्हें चिन्ह और बड़ै-बड़ै चमतकार नाई भाळे, तभै तैणीं निं तम्हां कधि विश्वास करनअ।” <sup>49</sup> राजे अफसरै बोलअ, “हे प्रभू, मेरै शोहरू मरने का पैहलै चाल तूह मूह संघै।” <sup>50</sup> प्रभू बोलअ, “नाश, तेरअ शोहरू आसा ज़िऊंदअ।” सह प्रभूए गल्ला दी विश्वास करी करै नाठअ घरा लै। <sup>51</sup> सह आधी बाता पुजअ ई थिय कि तेऊए नोकर पुजै तेउ सेटा और तिन्ना अह खबर पजेळी कि तेरअ शोहरू आसा ज़िऊंदअ। <sup>52</sup> तेऊ तिन्ना का पुछअ कि कसा घळी हुअ सह रांबळअ? तिन्ना बोलअ कि हिज सातुए घांटे उतरअ तेउओ ज़अर। <sup>53</sup> तैबै तेऊ हेरअ समझी कि अह हुअ तेसाई घळी, जेसा घळी प्रभू तेऊ लै बोलअ कि तेरअ शोहरू आसा ज़िऊंदअ, और तेऊए सारै घरानै किय प्रभू दी विश्वास। <sup>54</sup> अह थिय प्रभू यीशुओ दुजअ चमतकार जुंण तेऊ यहूदिया का एछी करै गलील पुजी किय।

### उत्ती सासा ओर्हीओ रोगी ठीक करनअ

**5** इन्नां गल्ला बाद हुअ यहूदीओ एक पर्व और प्रभू यीशू नाठअ येरुश्लेमा लै। <sup>2</sup> येरुश्लेमाँ आसा भेड़ परऊली सेटा एक कुंड (सअर), तेता लै बोला इबरानिं बोली दी 'बेतसैदा' तेते आसा पांज कोफरी बणीं दी। <sup>3</sup> एता फेर रहा तै कई आंधै, लँगलै, शुके दै आंगा आळे (पाणीं खदमाऊंदै न्हैळै) लाम्मै पळी। <sup>4</sup> तिधी होथा त साईती दी परमेश्वरो स्वर्गदूत सरा भितरी पाणीं खदमाऊंदअ; जेबै पाणीं खदमाईआ, तभै जुंण सोभी का पैहलै पाणीं दी पेशे,

सह हआ त बमारी का ठीक; चाए सह कोई बी बमारी होए। <sup>5</sup> तिधी थिय एक मांहु जुंण ठती साला ओर्ही त तिधी बमार पळअ द। <sup>6</sup> प्रभू भाळअ सह तिधी और तेऊ का गअ थोघ लागी कि अह आसा खासी साला ओर्ही एसा जुनी दी पळअ द, तेऊका पुछअ, “कै तूह ठीक हणअ चाहा?” <sup>7</sup> तैबै तेऊ बमारै बोलअ, “हे प्रभू, मूखा निं कोहै आदमी आथी, जुंण मूह चकी करै पाणीं दी पाई सका, जेभै पाणीं खदमाईआ, जेभै तैणीं घिसरदी-घिसरदी हूँ पुजा, तेता का पैहलै जा कुंण होर सरै पेशी और हूँ हआ भाळअ?” <sup>8</sup> प्रभू तेऊ लै बोलअ, “उझू, और आपणै इन्नां खिथळै गोदळै चकी लाग हांददअ।” <sup>9</sup> सह आदमी उझूअ नडैउए खळअ और सह लागअ हांददअ फिरदअ।

<sup>10</sup> सह थी सबते धैळी (एसा धैळी निं यहूदी परमेश्वरे आराधणा का सुआई होर किछ काम करदै तै)। तैहीता यहूदी, जुंण बमारी का ठीक हुअ त, तेऊ लै बोलअ कि आझू आसा सबते धैळी और तेरे ईयां खिथळै गोदळै चकणै नी ठीक आथी। <sup>11</sup> तेऊ तिन्ना लै उतर दैनअ, “जुंणी हूँ ठीक किय, तेऊ बोलअ मुल्है इहय कि आपणै खिथळै-गोदळै चक और हांददअ लाग।” <sup>12</sup> तिन्ना तेऊ का पुछअ, “सह कुंण आसा जुंणीं ताल्है इहय बोलअ कि खिथळै-गोदळै चकी लाग हांददअ?” <sup>13</sup> पर जुंण सह बमारी का ठीक हुअ त, तेऊ का निं थोघै थिय कि सह कुंण आसा, तिधी थियै खास्सै लोग और प्रभू गअ त तिधा का नाशी। <sup>14</sup> एता बाद भेटअ प्रभू यीशू सह मांदरै, तैबै प्रभू तेऊ लै बोलअ, “भाळ तूह आसा गअ द एबै बमारी का ठीक हई, हेरे, एबै नी भीई पाप करी, इहय निं हआ कि ताह परदैं पळा होर बी बडी बमारी।” <sup>15</sup> तैबै तेऊ तिधा का नाशी करै सोभी यहूदी का खोजअ कि जुंणीं हूँ बमारी का ठीक किय, सह आसा यीशू मसीह। <sup>16</sup> एते बजहा लागै यहूदी यीशू तंग करदै, किल्हैकि सह करा त इन्नां ईहै कामां सबते धैळी। <sup>17</sup> एसा गल्ला परदैं प्रभू यीशू तिन्ना लै बोलअ, “मेरअ बाब करा मैची तैणीं काम और हूँबी करा।” <sup>18</sup> इहय करै यहूदी प्रभू यीशू मारने सकीमा करदै कि सह एकी बाखा ता सबते धैळीओ बधान चोळा, और दुजी बाखा बोला इहय कि परमेश्वर आसा एऊओ बाब, और आपणै आप समझा परमेश्वरा बराबर।

### शोहरूओ अधिकार

<sup>19</sup> एसा गल्ला शुंणी प्रभू यीशू तिन्ना लै बोलअ, “हूँ खोजा तम्हां का सच्ची, कि शोहरू निं आपणै आप किछै करी सकदअ, पर सह भाळा आपणै बाप्पु करदै, जुंण-जुंण काम तेउओ बाब करा, शोहरू बी करा तिन्नां तेसाई रिती।” <sup>20</sup> “किल्हैकि बाब डाहा आपणै शोहरू संघै झूरी और जुंण काम सह आप्पु करा, तिन्नां रहैउआ सह शोहरू का बी; और तेउ रहैऊणै इन्नां का बी बड़ै काम ताकि तम्हां अचंभअ होए।” <sup>21</sup> “ज़िहअ बाब मूरे दै चका और ज़िऊंदै करा, तिहअई शोहरू बी ज़सा चाहा, तिन्नां करा ज़िऊंदै।” <sup>22</sup> “बाब निं कोहीओ भलअ बुरअ भाळदअ, पर सोभीए भलै बुरै भाळणैओ काम आसा हेरअ द शोहरू का सबाळी। <sup>23</sup> एते तैणीं कि ज़िहअ सोभ लोग बाप्पुओ आदर मान करा, तिहअई शोहरूओ बी करे, जुंण शोहरूओ आदरमान नाई करदअ, सह निं बाबो बी जुंणी सह भेजअ द आसा, तेउओ आदरमान करदअ।” <sup>24</sup> “हूँ बोला तम्हां लै सच्ची-सच्ची कि जुंण मेरअ बचन शुणीं करै मेरै भेजणै आळै दी विश्वास करा, अनंत ज़िऊण आसा तेऊओ, और तेऊ लै निं सज़ा हणीं, पर सह मुकअ मौता पार करी करै ज़िऊणा लै नाशी।”

<sup>25</sup> “हूँ खोजा तम्हां का सच्ची-सच्ची कि इहय बगत आसा एभै, और इहय ही हणअ कि मुंए दै शुळणअ परमेश्वरो शबद, और शुणीं करै हणै तियां ज़िऊंदै।” <sup>26</sup> “जेऊ सबै बाप्पु आप्पु दी ज़िन्दगी डाहा, तेऊई साबै आसा तेऊ आपणै शोहरू लै बी आप्पु दी ज़िन्दगी डाहणेओ हक (अधीकार) दैनअ द। <sup>27</sup> ईधी तैणीं कि तेऊ लै आसा न्याय करनेओ (भलै बुरै भाळणैओ) बी अधिकार दैनअ द।” <sup>28</sup> “एसा गल्ला शुणीं तम्हें रहैन नि हआ, मैची एछणअ इहय बगत बी, जेतरे घोरी दाबे दै आसा, तेउओ शबद शुणीं करै निखळणै बागा लै। <sup>29</sup> जुंणीं भलाई की दी होए, तियां ज़िंदगी ज़िऊणै तैणीं ज़िऊंदै, और जुंणीं बुराई होए की दी, तियां हणै नरकै सज़ा खाणै तैणीं ज़िऊंदै।”

### यीशूए बारै ग्वाही

30 "हूँ नि आपणै आप किछ करी सकदअ, हूँ जिहअ शुणा तिहअई न्याय करा, मेरअ न्याय आसा सन्नअ तै कि हूँ नि आपणी ईछा चाहंदअ पर आपणै भेजणै आळै ईछा चाहा।" 31 "जै हूँ आपणी ग्वाही आपणै दैऊं, ता मेरी ग्वाही नि सच्ची हणी, 32 एक होर आसा जुण मेरी ग्वाही दैआ, सह आसा सच्ची।" 33 "तम्हें बझैळअ यहूना पुछणै और तेऊ दैनी सच्चाईए ग्वाही।" 34 "पर हूँ नि आपणै बारै माहुए ग्वाही चाहंदअ; तैबी खोजी मरे ईयां गला एते तैणी कि तम्हां लोळी मोक्ष भेटओ।" 35 "सह जुण जळदअ और चमकदअ दिऊअ थिय; तम्हां लागअ तेऊए प्रैशै दी रहणअ बधिया, 36 पर मुखा आसा एही ग्वाही जुण यहूने ग्वाही का बी बडी आसा, जुण काम पिता परमेश्वरै पूरा करना लै मुखा सभाळअ द आसा, मतलब जुण काम हूँ करा, तियां आसा मेरै गुआह कि पिता परमेश्वरै आसा हूँ भेजअ द; 37 और पिता परमेश्वरै जुणी हूँ भेजअ द आसा, तेऊई दैनी मेरी ग्वाही; तम्हें नां ता तेऊओ शबद शुणअ और नां ता तेऊओ रूप आथी भाळअ द, 38 ना तम्हें तेउए बचना मनै चकी डाहदै, किलहैकि जुण तेऊ भेजअ द आसा; तेऊ परदै नी विश्वास करदै।" 39 "तम्हें लोळा पबित्र शास्त्रा दी, इहय समझी कि अनंत जिऊण भेटणअ तम्हां, और अह आसा सहई जुण मेरी ग्वाही दैआ।" 40 "पर तैबी बी नि तम्हें जिन्दगी पाणां लै मूँह सेटा एछणअ चाहंदै।" 41 "हूँ नि माहुँ का आदरमान चाहंदअ।" 42 "पर हूँ ज्ञाणा तम्हां कि तम्हां दी नि परमेश्वरो प्रेम आथी।" 43 "हूँ आसा आपणै पिता परमेश्वरै नांऊरे आअ द, पर तम्हें नी मूँह मंदै आथी; जै कुण आपणै नांऊआ करै एछा, सह हेरनअ तम्हां मनी।" 44 "तम्हें चाहा एकी दुजे का आदरमान, पर जुण आदरमान पबित्र परमेश्वरा का एछा, तेऊ नि चाहंदै, ना कोई गल्लो विश्वास करदै।" 45 "इहय नि समझा कि मूँह लागअ बापू सन्ननै तम्हां लै कोई दोश; तम्हां परदै दोशा लागै आळअ आसा सहई जहा परदै तम्हें भरोसअ डाहा।" 46 "किलहैकि जै तम्हें मूसा नबीओ शुणदै, तै करनअ त तम्हां मेरअ बी विश्वास, इहय करै कि तेऊ आसा मेरै बारै लिखअ द। 47 पर जै तम्हें तेउए लिखी दी गला दी विश्वास नाई करदै, तै मेरी गला दी किहअ करै लाअ तम्हें विश्वास करी।"

### पांजा हजारा लोगा का रोटी खैऊणीं

(मत्ती 14:13-21; मरकुस 6:30-44; लूका 9:10-17)

6 इन्नां गला हणै का बाद प्रभू यीशू मसीह गलीले तिबरिआस दरैउआ पार नाठअ; 2 और बड़ै भारी लोग लागै तेऊ पिछू हांददै; किलहैकि जुण चिन्ह चमतकार सह बमारी आळै लै रहेऊआ त, तियां नाशा तै तेता भाळै। 3 तैबै यीशू धारटी परंदा लै नाठअ और आपणै चेलै संघै तिधी बेठअ। 4 और यहूदीओ फसैओ पर्व थिय नेळ।

5 प्रभू यीशू भाळअ कि तेऊ सेटा लै आसा लागै दै बड़ै भारी लोग एछदै, तैबै प्रभू आपणै चेलै फिलिप्पुसा लै बोलअ कि "हाम्हां एतरे लोगा लै रोटी किधा का आळणी लई?" 6 अह गल बोली ती प्रभू तिन्नां परखणा लै, पर प्रभू ज्ञाणा त आपणै कि तेऊ कै लागा करनअ। 7 फिलिप्पुसै प्रभू लै उतर दैनअ कि "दुई शौआ दिनारे (तेऊ देशे ढबै नांअ) रोटी बी जै लई आणै, तियां बी नि इन्नां लोगा लै बांडी करै छणीं-छणीं एछणी।" 8 चेलै बिचै शिमोन पतरसे भाई आंदरिआसै बोलअ, 9 "इधी आसा एकी लान्हें का पांज जौए रोटी और दूई माहछली; पर एतरे लोगा लै तियां कै चाली हई?" 10 प्रभू यीशू तिन्नां लै बोलअ कि "सोभी लोगा बशैळा घेहळी दी।" तेसा जैगा त बेशणा लै बधिया घाह, तैबै तियां लोग गिणती दी तै कोई पांज हजार बेठै। 11 प्रभू रोटी आपणै हाथे ढाकी और धन्यवाद करी करै बेठै दै लोगा लै बांडी और माहछली बी जेतरी तियां चाहा तै बांडी। 12 जांऊं लोग खाई करै रजे, ता आपणै चेलै लै बोलअ प्रभू इहय कि "बची दी रोटी करा कठा, ढेका नि शोटी।" 13 चेलै जांऊं रोटी कठा की, तिन्नां पांजा रोटी का; जुण खाणै आळै का बची, तेते भरुए बाराह चठै। 14 तैबै जुण अह रहैन करनै आळअ काम प्रभू किय, एता भाळी लोगै बोलअ इहय कि "जुण भविष्य खोजणै आळअ संसारा दी एछणै आळअ थिय, सह आसा पाकै दी अहई।"

15 जांऊं यीशू का पतअ चलअ कि लोग चाहा तेऊ राजै बणाणैए तैणी ढाकणअ, ता सह नाठअ एकै जहूअ जोता लै।

### यीशूओ पाणी परदै हांदणअ

(मत्ती 14:22-33; मरकुस 6:45-52)

16 जांऊं साह पळी ता तेऊए चेलै नाठै दरैऊए कनारै, 17 और किशती परदै बेशी करै लागै दरैउआ पार कफरनहूमा लै नाशदै, तैबै गअ त पटी नहरअ हई और प्रभू नि त तिन्नां सेटा पुजअ आथी। 18 दरैऊए आअ आंधी तूफान और दरैउआ का लागी बडी-बडी छाली उझदी। 19 जांऊं तियां किशती खळोऊदी चार पांज मील दरैऊआ बिचै पुजे, तिन्नां का धेछुअ प्रभू यीशू मसीह दरैउआ बिचै पाणी परदै हांददअ और किशती बाखा लै एछदअ, ता तियां डरै। 20 पर प्रभू यीशू तिन्नां लै बोलअ कि "हूँ आसा; डरा नी आथी।" 21 तैबै तियां तेऊ किशती दी बशैळणा लै हुए त्यार और नढैऊए पुजी किशती तेसा जैगा जिधा लै तियां चालै तै।

### लोगो यीशू लोळणअ

22 दुजे धैळै तियां लोग जुण दरैउआ पार थियै, तिन्ने एकी किशती छाडी नि तिधी होर कोई किशती थी और तेसा किशती दी नाठै प्रभू चेलै और प्रभू नि तेथ नाठअ; 23 (तैबी होच्छी-होच्छी किशती तिबरिआसा का तिधा लै आई, जिधी तिन्ने धन्यावाद करनै का बाद रोटी खाई ती।) 24 तैबै तिन्ने हजारों लोगै हेरअ कि ना ता ईधी यीशू आथी; न ता तेऊए चेलै, ता तियां बी होच्छी-होच्छी किशती दी बेशी करै प्रभू यीशू लोळै कफरनहूम पुजै।

### यीशू जिवन और रोटी

25 और दरैऊआ पार पुजी करै तिन्ने प्रभू यीशू का पुछअ कि हे प्रभू, "तूह ईधा लै केभै आअ?" 26 प्रभू यीशू तिन्नां लै उतर दैनअ, "हूँ खोजा तम्हां लै सच्ची-सच्ची कि तम्हें नि मूँह चिन्ह चमतकारा हेरनै तैणी लोळदै पर तम्हें लोळा मूँह रोटी खाई आपणै पेटा रजैऊणै तैणी।" 27 "नाश हणै आळी रोटी लै नि मैन्थ करा, पर तेसा रोटी लै करा मैन्थ जुण अनंत जिऊणा तैणी रहा, जुण माहुए शोहरू तम्हां लै दैणी; किलहैकि पिता परमेश्वरै आसा तेऊ दी ई मोहर लाई दी।" 28 तिन्ने प्रभू का पुछअ, "परमेश्वरे कामां करना लै हाम्हां कै लागणअ करनअ?" 29 प्रभू तिन्नां लै बोलअ, "परमेश्वरो काम आसा अह कि जुण तेउ भेजअ द आसा, तेऊ दी करा भरोसअ।" 30 तैबै तिन्ने प्रभू लै बोलअ, "तूह कुण जिहअ चिन्ह रहैऊआ कि हाम्हें तेता भाळी ताह परदै भरोसअ करी सके, और कुण जिहअ काम रहैउआ?" 31 "म्हारै बाब दादै जंगलै मन्नअ (परमेश्वरै शोटी ती सरगा का खाणा लै रोटी), शास्त्रा दी आसा लिखअ द कि परमेश्वरै दैनी तिन्नां लै सबर्गा का रोटी।" 32 प्रभू यीशू तिन्नां लै बोलअ, "हूँ खोजा तम्हां का सच्ची-सच्ची कि मूसा नि तम्हां लै सबर्गा का रोटी दैनी, पर मेरअ पिता परमेश्वर दैआ तम्हां लै सबर्गा का रोटी।" 33 "किलहैकि परमेश्वरे रोटी आसा सहई जुण सवर्गा होथी करै संसारा लै जिंदगी दान दैआ।" 34 तैबै तिन्ने प्रभू लै बोलअ, "हे प्रभू, एहा रोटी कर हाम्हां लै धैळ दैई।" 35 प्रभू यीशू तिन्नां लै बोलअ, "हूँ आसा जिंदगी दैणै आळी रोटी, जुण मूँह सेटा एछे; सह नि कधि भुखअ रहणअ, और जुण मूँह परदै भरोसअ करे, सह नि कधि नचिशअ रहणअ," 36 पर हूँ बोला तम्हां लै कि "तम्हें हेरअ हूँ भाळी बी, पर तजी बी नि तम्हें विश्वास करदै।" 37 "जसा पिता परमेश्वर मुल्ह दैए, सह एछणअ मूँह सेटा लै, तेऊ नि हूँ कधि बागै काढदअ।" 38 "किलहैकि हूँ नि आपणी इच्छा पूरी करदअ, पर तेऊए इच्छा पूरी करदअ आसा आअ द धरती दी जुणी हूँ भेजअ द आसा।" 39 "मेरै भेजणै आळैए इच्छा आसा एही कि जुण बी तेऊ मुल्ह दैनअ द आसा तेता का नि मेरै लोळी कोहै शोतुअ, पर तेऊ अंतीए धैळी भी जिऊंदअ करी सकूं।" 40 "और मेरै भेजणै आळैए इच्छा आसा एही कि जुण शोहरू भाळै, और तेऊ दी भरोसअ करे, तेऊ लोळी भेटअ अनंत जिऊण; और मूँह करनअ सह परळए आखरी धैळी भी जिऊंदअ।"

41 इन्नां गला शुणीं लागै यहूदी खाखा दी बड़बड़ करदै, किलहैकि तेऊ बोलअ त इहय कि "जुण रोटी सबर्गा का उतरी सह आसा हूँ।" 42 और तियां

लागै बोलदैं कि "अह यूसुफो शोहरू यीशू निं आथी? एऊए आम्मां बाप्पू कै हाम्हें ज्ञानदैं निं आथी? तै किल्है बोला अह इहय कि हूँ आसा सबर्गा का उतरअ द।" 43 प्रभू यीशू बोलअ तिन्नां लै इहय कि, "आप्पू बिचै निं लागा बडबड करदैं।" 44 "मूँह सेटा निं तांऊं तैणीं कोहै एछी सकदअ, जांऊं तैणीं पिता परमेश्वर, जुंणीं हूँ भेजअ द आसा, खींची नाई आणे; और मूँह करनअ सह अंतीए धैळी भी जिऊंदअ।" 45 "भबिष्याबाणी करनै आळै आसा इहय लिखअ द कि, तियां सोभ हणें परमात्मां सखाउए दै, जुंणीं पिता परमेश्वरा का सिखअ द और शुणअ द आसा सह एछा मूँह सेटा लै।" 46 "इहय नि आथी कि हर कोई आसा पिता परमेश्वर भाळअ द, पर पिता परमेश्वर आसा तेऊई भाळअ द जुंण पिता परमेश्वर तरफा का आसा।" 47 "हूँ खोजा तम्हां का सच्ची-सच्ची कि जुंण विश्वास करा, अनंत जिउण आसा तेऊओ ई।" 48 "जिंदगीए रोटी आसा हूँ।" 49 थारे बाब दादैं खाअ जंगलै 'मन्नअ' और तियां मूँए। 50 अह आसा सह रोटी जुंण सबर्गा का उतरी दी आसा, ताकि माहूँ तेता का खाई करै नां मरे। 51 "जिन्दगी दैणै आळी रोटी जुंण सबर्गा का उतरी दी आसा, सह आसा हूँ।" "और जुंण बी एसा रोटी का खाए, सह रहणअ हमेशा जिऊंदअ और जुंण रोटी मूँह संसारे जिंदगी लै दैणीं, सह हणअ मेरअ मास।"

52 एसा गल्ला शुणी यहुदी पळअ आप्पू बिचै झगळअ कि अह आदमी किल्है सका हाम्हां लै आपणअ मास खाणां लै दैई? 53 प्रभू यीशू तिन्नां लै बोलअ, "हूँ खोजा तम्हां का सच्ची-सच्ची कि जेभै तैणीं तम्हें माहूँए शोहरूओ मास नां खाए और तेऊओ लोहू न झूटे, तेभै तैणीं निं जिंदगी आथी।" 54 जुंण मेरअ मास खा और लोहू झुटा, अनंत जिऊण आसा तेऊओ, और अंत धैळै करनअ मूँह सह जिऊंदअ। 55 किल्हैकि मेरअ मास आसा खाणें चीज और मेरअ लोहू आसा झूटणें चीज।" 56 "जुंण मेरअ मास खा और मेरअ लोहू झुटा, सह रहा मूँह संघे बणीं और हूँ रहा तेऊदी।" 57 "जिहअ जिऊंदै पिता परमेश्वरै हूँ भेजअ द आसा, और तेऊए कारण आसा हूँ जिऊंदअ, तिहअई तेऊ हूँ खाणअ और सह रहणअ मेरै कारण जिऊंदअ।" 58 "जुंण रोटी सबर्गा का उतरी दी आसा, सह निं बाब दादैं खाअ द मन्नअ आथी कि खाई करै मूँए, जुंण एसा रोटी खाए सह रहणअ हमेशा जिऊंदअ।" 59 ईयां गल्ला बोली प्रभू यीशू मसीह कफरनूमै एकी आराधना करने जैगा दी लोगा लै उपदेश दैंदी बारी।

### अनंतजिऊणें वचन

60 तैहीता तेऊए चेलै बिचै कई जह्ने इहय शुणीं करै बोलअ कि "अह गल निं मनणें जोगी आथी, एसा गल्ला कुंण सका शुणीं?" 61 प्रभू यीशू हेरअ ज्ञाणीं कि मेरै चेलै आसा लागै दै एसा गल्ला पिछू आप्पू बिचै बडबड करदैं, तैबै तेऊ तिन्नां का पुछअ, "तम्हां कै एसा गल्ला करै ठोहळ लागी?" 62 "जै तम्हें माहूँए शोहरू, जिधी सह पैहलै थिय, तिधा लै उझै नाशदअ भाळे, तै किजै हणअ?" 63 "आत्मां आसा जिंदगी दैणै आळी, शरीरा करै निं कोई लाभ, जुंण गल्ला मंए तम्हां का बोली तियां आसा आत्मां और जिंदगी बी।" 64 "पर तम्हां बिचै आसा कई ईहै जुंण भरोसअ निं करदैं।" प्रभू यीशू का थिय पैहलै ई पतअ कि कुंण-कुंण विश्वास नाई करदैं और कसा दैणअ तेऊलै धोखअ। 65 तेऊ तिन्नां लै बोलअ, "तैहीता हूँ तम्हां लै बोला कि जेभै तैणीं कसा पिता परमेश्वरा का बरदान नाई भेटे, तेभै तैणीं निं सह मूँह सेटा एछी सकदअ।"

### पतरसो विश्वास

66 एता बाद तेऊए कई चेलै फिरै पिछू और तेता बाद निं तियां तेऊ संघा नाठै। 67 तैबै प्रभू यीशू आपणै बाराह चेलै लै बोलअ, "तम्हें बी कै नाशणअ चाहा?" 68 तैबै शिमोन पतरसै प्रभू लै उतर दैनअ, "हे प्रभू, हाम्हें कसा सेटा लै चालै नाशी? अनंत जिऊणें गल्ला आसा ताह सेटा ई।" 69 "हाम्हें आसा विश्वास किय द और हाम्हें इहय बी आसा हेरअ द ज्ञाणीं कि पबित्र परमेश्वरो पबित्र मसीह आसा तूहैई।" 70 प्रभू तिन्नां लै उतर दैनअ, "कै मंए तम्हें बाराह कै बाराह नि आथी छोटै दै? तैबी तम्हां बिचै आसा एक जह्णअ शैतान।" 71 अह गल बोली तेऊ शमोन इसकरोतिए शोहरू यहुदा लै, किल्हैकि अहैई थिय तिन्नां बाराह चेलै बिचै धोखे दैणै आळअ।

### यीशू और तेऊए भाई

7 इन्नां गल्ला हणें का बाद प्रभू यीशू रहअ गलील ई घुंमदअ लागी, यहुदी चाहा तै प्रभू यीशू मारनअ, तै निं सह यहुदिया लै नाठअ। 2 और यहुदिए मंडपो पर्व (मंडपे जाचा) त नेळ, 3 एते तैणीं बोलअ तेऊए भाई इहय कि, "ईधा का नाश यहुदिया लै, कि जुंण काम तूह करा, ताकि तेरै चेलै बी भाळे। 4 किल्हैकि इहय नि कोहै हंदअ जुंण लुकी करै काम करा और मशूर नी हणअ चाहंदअ; जुंण काम तूह करा तिन्नां कर दुनियां दी प्रगट।" 5 किल्हैकि तेऊए भाई बी नाई तै तेऊ परदैं विश्वास करदैं। 6 तिन्नां लै प्रभू उतर दैनअ, "मेरअ बगत निं मैची आअ, अह सारअ बगत आसा थारअ।" 7 "अह संसार निं तम्हां संघे दुशमणी डाही सकदअ, पर मूँह संघे डाहा दुशमणी, इहय करै कि हूँ दैआ तेऊए खलाफ ग्वाही कि एऊए काम आसा बुरै।" 8 "तम्हें नाशा पर्बा लै, हूँ नि एऊ पर्बा लै तै नाशदअ कि मेरअ बगत नि मैची पूरअ हुई।" 9 तिन्नां का एही गल्ला करी रह सह गलील ई।

### झोंपळीए पर्बा दी यीशू

10 पर जांऊं तेऊए भाई पर्बा लै नाठै, ता सह आप्पू बी चुप-चुपै पर्बा लै नाठअ, पर प्रगटअ निं नाठअ। 11 ता यहुदी लागै पुछदैं कि सह किधी आसा? 12 और लोगा बिचै लागी चोरी छुपै यीशूए बारै कई गल्ला हंदी; कई लागै बोलदैं कि सह आसा भलअ आदमी और कई बोलअ इहय कि सह भरमाऊअ लोगा। 13 तैबी यहुदिए उरै निं कोही बी एते बारै खुल्ही करै गल्ला की।

### पर्बा दी यीशूओ उपदेश

14 जांऊं पर्वे आधै धैळै बितै, और प्रभू यीशू लागअ मांदरै पुजी उपदेशा दैंदअ। 15 एता भाळी यहुदी रहैन हई करै बोलअ कि एऊ बिणहीं पट्ळै एतरी बिदआ किधा का आई? 16 प्रभू यीशू तिन्नां लै उतर दैनअ कि "मेरअ उपदेश निं मेरअ आथी पर अह आसा मरै भेजणें आळैओ।" 17 "जै कोई तेऊए ईछादी चलणअ चाहे, तेऊ हेरनअ अह उपदेश समझी, कि अह परमेश्वरा का आसा कि मेरअ आपणअ आसा?" 18 "जुंण आप्पू बाखा किजै बोला, सह चाहा करनी आपणी बडाई; पर जुंण आपणै भेजणें आळैए बडाई करनअ चाहा, सह हआ सन्नअ, और तेऊ दी निं कोई पाप बुराई हन्दी।" 19 "मुसा कै तम्हां लै बधान नी दैनअ थीय? तैबी तम्हें सोभ तेसा बिधी दी नि चलदैं। तम्हें मूँह मारनअ किल्है चाहा?" 20 लोगै यीशू लै उतर दैनअ, कि "ताह दी आसा दुष्ट आत्मा, तूह कुंणी आसा लाअ द मारी?" 21 प्रभू यीशू तिन्नां लै उतर दैनअ, "मंए किय एक काम, और तम्हें हआ तेता लै रहैन, 22 तैहीता मूसा तम्हां लै खतनै करने आज्ञा आसा दैनी दी, (अह निं आथी मूसा नबीए कारण, पर अह आसा बाब दादैं ओहीओ रबाज), और माहूँओ खतनअ करा तम्हें सबते धैळी! 23 जै सबते धैळी करा आदमीओ खतनअ, तै कि मुसा नबीए आज्ञा निं लोळी टळी, तै तम्हें मुहलै एसा गल्लो दोष किल्है ला कि सबते धैळी किय एक बमार आदमी पूरी तरह ठीक?" 24 "मुँहा भाळी न्याय निं करा, पर धर्मा दी रही करै करा न्याय।"

### कै यीशू ई आसा मसीह ?

25 तैबै कई येरुशलेमा दी रहणै आळै आप्पू बिचै गल्ला करदैं लागै कि "अह सहैई नि आथी, जहा मारना लै लोळै आसा लागै दै? 26 पर भाळा, अह आसा लागअ द खुलैआम गल्ला करदअ! एऊ का निं कुंण खोजदअ बी आथी, इहय बी हई सका कि तिन्नां मारनै आळै लोगै हरी होए सच्चाई जाणीं कि, अहैई आसा मसीह। 27 पर एऊ ता जाणा हाम्हें कि अह किधा का आसा, पर जेभै मसीह एछणअ, तेभै निं कोही का पतअ हणअ कि सह किधा का आसा।" 28 "तैबै प्रभू यीशू मांदरै उपदेशा दैंदी जौरै-जौरै बोलअ, "तम्हें ता मूँह जाणां, और इहय बी जाणां कि हूँ किधा का आसा; हूँ निं आपणै आप आई, पर जुंण मेरअ भेजणें आळअ आसा, सह आसा सन्नअ, तेऊ निं तम्हें जाणदैं।" 29 "पर हूँ जाणा तेऊ, किल्हैकि हूँ आसा तेऊ बाखा, और तेऊई आसा हूँ भेजअ द।" 30 एसा गल्ला परदैं चाहा तै तियां तेऊ ढाकणअ, पर कोही बी तेऊ लै हाथ निं लाअ, किल्हैकि तेऊओ बगत निं मैची आअ त।



31 तेतरै लोगा बिचै किय कई लोगे विश्वास, और बोलदै लागै कि, "मसीह जेभै एछणअ, तेऊ के एता का जादै चिन्ह चमतकार रहैऊणै, जुंण एऊ रहैऊए?"

### यीशू ढाकणें कोशिश

32 फरीसी शुणै चुप-चुपै यीशूए बारे लोग इन्नां गल्ला करदै, और माहायाजकै और फरीसी भेजे प्रभू यीशू ढाकणा लै सपाही। 33 एसा गल्ला परदै प्रभू यीशू बोलअ, "हूँ आसा थोळी घळी तम्हां संघे, और तेखअ नाशणअ मूँह आपणै भेजणै आळ सेटा बापस।" 34 "तम्हें लागणै मूँह लोळै पर तम्हां नि हूँ भेटणअ आथी, और जिधी हूँ आसा, तिधी नि तम्हें एछी सकदै।" 35 यहूदी आप्पू बिचै गल्ला करदै लागै कि अह इहय बी किधा लै नाशणअ, कि अह नि हाम्हां भेटी चालअ, अह तिन्नां युनानी सेटा लै किनी नाशणअ जुंण तित्तर-बित्तर हई करै रहा, और तिन्नां लै बी दैणअ होए एऊ उपदेश? 36 अह कै गल बोली एऊ, कि तम्हें हणै मूँह लोळै, और तम्हां नि हूँ भेटणअ आथी, और जिधी हूँ आसा तिधी नि तम्हें एछी सकदै?

### जीवन-पाणीए गाडा

37 तेखअ पर्वे (जाचे) आखरी धैळै, जुंण सोभी का बडअ धैळअ आसा, प्रभू यीशू खळअ हुअ, और जोरै-जोरै लोगा लै बोलअ, "जै कुंण नचीशअ होए, सह एछा मूँह सेटा झूटदअ।" 38 "जिहअ पबित्र शास्त्रा दी लिखअ द आसा कि जुंण मूँह परदैए विश्वास करे, तेऊए दिला का बगणीं जिउणें पाणिणै गाडा।" 39 प्रभू यीशू बोलअ त अह बचन पबित्र आत्में बारै दी, जुंण विश्वास करनै आळै लै एछणै आळी थी। किल्लहैकि पबित्र आत्मा नि अजी तैणीं आई थिय, तै कि प्रभू यीशू नि मैची तैणीं आपणी महिमा दी पुजी त।

40 तैबै लोगा बिचा का इन्नां गल्ला शुणी बोलअ कई इहय कि अह आसा सच्ची सहैई भबिष्याबाणी करणें आळअ। 41 और होरी बोलअ इहय कि अह आसा मसीह, पर कई बोलअ इहय कि किल्लहै? मसीह कै गलीला देशा का एछणअ? 42 "पबित्र शास्त्रा दी इहय नि आथी लिखअ द कि मसीह एछणअ दाऊदे खानदानी का और बेतलेहम नाऊंए गराऊंआ का, जिधी दाऊद रहा थिय?" 43 एसा गल्ला लै पळी लोगा बिचै फूट। 44 तिन्नां बिचै कई लोग चाहा तै यीशू ढाकणअ, पर कोई बी तेऊ दी हाथ नि लाअ।

### यहूदी मुखियैओ विश्वास नि करनअ

45 तैबै सपाही माहायाजका और फरीसी सेटा आए और तिन्नां सपाही का पुछअ कि तम्हें किल्लहै नि सह ढाकी आणअ? 46 सपाही तिन्नां लै बोलअ कि 'एऊ जेही गल्ला नि आझ ॰ तैणीं कोही बी आदमी की।' 47 फरीसी तिन्नां लै बोलअ कि तम्हें बी किन्नी गुए तेऊए चकरै पळी? 48 सरदारा (अफसरा), फरीसी मांझै कसा एकी बी आसा तेऊ दी विश्वास? 49 पर इयां जुंण बधान नाई जाणदै, इयां आसा श्रापा दी। 50 निकुदिमुसै (जुंण पैहलै प्रभू यीशू सेटा लै आअ त और सबी थिय तिन्नां बिचै तिधी) तिन्नां लै बोलअ, 51 "म्हारअ बधान कै कसा आदमी, जेभै तैणी पैहलै तेऊए शुणी करै समझी न लए कि सह कै करा, दोषी बणांआ?" 52 तिन्नां तेऊ लै उतर दैनअ, "तूबी गलीला आसा? लोळ और भाळ कि गलीला का नि कोई मसीह प्रगट हणअ।"

53 तेखअ नाटै सोभ जळै आपणै-आपणै घरा लै।

### कंजरी बेटळी लै माफी

8 पर प्रभू यीशू नाठअ जैतूने धारा लै। 2 दुजै धैळै दोती आअ प्रभू यीशू मसीह मांदरा लै; और सोभ लोग आए तेऊ सेटा लै, और सह लागअ बेशी करै तिन्नां लै उपदेशा दैदअ। 3 तैबै शास्त्री और फरीसी आणीं तेऊ सेटा लै एक बेटळी ढाकी, सह ती कंजरी बेटळी, और तिन्नां ढाकी सह मोकै दी, तैबै तिन्नां सह बिचो-बीच खळी की और प्रभू यीशू लै बोलअ, 4 "हे गुरु, अह बेटळी ढाकी हाम्हें मोकै दी कंजरीदी। 5 व्यवस्था (बधान) दी आसा मूसा हाम्हां लै बोलअ द कि एही बेटळी लै लागा पाथरो ढो दैणअ, एबै, तै तेरी एसा बेटळीए बारे किजै राय आसा?" 6 अह गल बोली तिन्नां तेऊ परखणा लै ताकि तेऊ दी किजै ना किजै दोष काढी सके, पर प्रभू रहअ उटी बाखा गुंठी करै धरनीं किजू लिखदअ लागी। 7 जाऊं तियां पुछदै ई लागै, ता यीशू

फिरअ तिन्नां लै समुखअ, और बोलअ कि, "तम्हां बिचै जुंण पापी नाई आथी, सह बाहा एसा बेटळी लै सोभी का पैहलै पाथरै।" 8 संघा तेखअ लागअ भी गुंठी करै धरनीं लिखदअ। 9 इहय शुणीं करै तियां बडे का होछै तैणीं लागै हाढदै; और प्रभू यीशू मसीह रहअ तिधी एकै जळअ, और सह बेटळी रही तिधी खटळुई। 10 प्रभू यीशू तेसा बेटळी लै बोलअ, "हे नारी, तियां केसी नाटै? ताल्लै सजा कोही नि दैनी?" 11 तेसा बोलअ, हे प्रभू कोही नि दैनी। तैबै प्रभू तेसा लै बोलअ, "हूँबी नि ताल्लै कोई सजा दैदअ, नाश, पर भी नि पाप करी।"

### यीशू संसारा लै दीऊअ

12 तैबै भी प्रभू यीशू लोगा लै बोलअ, "संसारा लै दिऊअ आसा हूँ, जुंण मूँह पिछू एछे सह नि न्हैरै दी रहणअ, पर तेऊ भेटणअ जिंदगीओ प्रेशअ।" 13 फरीसी तेऊ लै बोलअ कि तूह दैआ आपणी ग्वाही आप्पै, तेरी ग्वाही नि ठिक आथी। 14 यीशू तिन्नां लै उतर दैनअ, "हूँ दैआ आपणी ग्वाही आप्पै, तैबी बी आसा मेरी ग्वाही ठीक, किल्लहैकि मुखा आसा थोघ कि हूँ किधा का आसा आअ द; और किधा लै नाशणअ? पर तम्हें नि जाणदै कि किधा का आए और किधा लै नाशणै?" 15 'तम्हें करा शरीरे साबै न्याय, और हूँ नि कोहिओ न्याय करदअ।' 16 "जै हूँ न्याय करू बी, तैबी आसा मेरअ न्याय सच्चअ, किल्लहैकि हूँ नि एकै आथी, मूँह संघे आसा पिता परमेश्वर जुणीं हूँ भेजअ द आसा।" 17 "और थारै बधाना दी बी आसा लिखअ द कि मिलीकरै दई आदमीए ग्वाही हआ ठीक।" 18 "एक ता दैआ हूँ आप्पै ग्वाही, और दुजअ दैआ पिता ग्वाही, जुणीं हूँ भेजअ द आसा।" 19 तिन्नां तेऊ लै बोलअ, "तेरअ पिता किधी आसा?" यीशू तिन्नां लै बोलअ, "जै तम्हें मूँह बछैणदै, तै बछैळणअ त तम्हां मेरअ बाब (पिता) बी।" 20 इयां गल्ला बोली तेऊ मांदरे भडारै उपदेश दैदी बारी, पर कोही नि सह ढाकअ आथी, किल्लहैकि तेऊओ बगत नि मैची आई त।

### आपणें बारै यीशूए बोल

21 तैबै तेऊ भी तिन्नां लै बोलअ, "मूँह ता नाशणअ आपणी बाता, पर तम्हें हणै मूँह लोळै, और तम्हें हणै आपणें पापा दी मरदै, और जिधी हूँ नाशा, तिधी नि तम्हें एछी सकदै।" 22 एसा गल्ला परदै यहूदी बोलअ, 'एऊ कै आपणें आप मरनअ, जुंण अह इहय बोला कि जिधा लै हूँ नाशा, तिधा लै नि तम्हें एछी सकदै?' 23 तेऊ तिन्नां लै बोलअ, "तम्हें आसा तोरलै, हूँ आसा उपरळअ, तम्हें आसा एऊ संसारे, हूँ नि एऊ संसारा आथी।" 24 "तैहीता मंरे तम्हां लै बोलअ कि तम्हें रहणै आपणें पापा दी मरदै; किल्लहैकि जै तम्हें विश्वास नाई करे कि हूँ आसा सहैई, ता तै मरनै तम्हें आपणें पापा दी।" 25 तिन्नां तेऊ लै बोलअ, 'तूह कुंण आसा?' यीशू तिन्नां लै बोलअ, "सहैई आसा जुंण हूँ शुरु ओही तम्हां का खोजदी आआ।" 26 "थारै बारै आसा मूँह कई गल्ला सोचणा बचरणं लै, पर मेरअ भेजणै आळअ आसा सच्चअ, हूँ खोजा एसा दुनिआ तिन्नां गल्ला, जुंण मंरे तेऊका शुणी दी आसा।" 27 तियां नि एसा गल्ला समझै कि अह आसा लागअ द पिता परमेश्वर बारै बोलदअ। 28 तैबै यीशू मसीह बोलअ, "जेभै तम्हां मांझूओ शोहरू उछटै दी छडाऊणअ, तेभै लागणअ तम्हां का थोघ कि हूँ आसा सहैई, और हूँ नि आपणीं तैणी किछे करदअ, पर जिहअ हूँ बाप्पू सखाऊअ, हूँ बोला तिन्नां गल्ला।" 29 "और मेरअ भेजणै आळअ आसा मूँह संघे, तेऊ नि हूँ कल्ही आथी डाहअ द, किल्लहैकि हूँ करा हमेशा तिन्नां कामां जुंण तेऊ लोभा।" 30 प्रभू यीशू त इन्नां गल्ला बोलदअ ई लागअ द कि कई लोगे किय तेऊ दी विश्वास।

### सचाई देणीं तम्हां लै आज्ञादी

31 तैबै यीशू तिन्नां यहूदी, जुणीं तेउए गल्ला दी विश्वास किय, तिन्नां लै बोलअ, "जै तम्हें मेरै बचना दी बणीं रहे, तै हणै तम्हें मेरै चेलै।" 32 "तै समझणीं तम्हां सचाई और सचाई देणीं तम्हां लै आज्ञादी।" 33 तिन्नां तेऊ लै उतर दैनअ, "हाम्हें आसा अब्राहमे खानदानी का; और हाम्हें नि कधि कसरै गुलाम हुए आथी, तै तूह इहय कै बोला कि तम्हें हणै आज्ञाद?"



34 यीशू तिन्नां लै बोलअ, "हूँ बोला तम्हां का सच्ची-सच्ची कि जुंण कोई पाप करा, सह आसा पापो गुलाम।" 35 "और दास निं कबलअ घरै रंहदअ, पर शोहरू रहा कबलअ।" 36 "जै पुत्र तम्हां लै आजादी दैए, तै हणै तम्हें सच्ची आजाद।" 37 "हूँ जाणा कि तम्हें आसा अब्राहमे लुआद, पर तैबी मेरे बचना लै निं थारै दिलै जैगा आथी, तैहीता तम्हें मूँह मारनअ चाहा।" 38 "हूँ करा तिहअई जुंण मंए आपणै बाप्पू संघे भाळअ द आसा, और तम्हें बी करा तिहअई जुंण तम्हें आपणै बाबा का भाळअ द आसा।"

39 तिन्नां तेऊ लै उतर दैनअ, कि म्हारअ बाब आसा अब्राहम, तैबै यीशू तिन्नां लै बोलअ कि "जै तम्हें अब्राहमे आसा, तै करदै तम्हें अब्राहमा जिहअ काम बी।" 40 "पर ऐबै चाहा तम्हें ईहै आदमी मारनअ, जुंणीं तम्हां का सच्चाईओ बचन खोजअ, जुंण तेऊ परमेश्वरा का शुणअ, इहय ता कधू अब्राहमे नाई किय? 41 तम्हें करा आपणै बाबा जिहअ काम।" तैबै तिन्नां तेउ लै बोलअ कि "हाम्हें निं आथी झट्टै डैउरे दै, म्हारअ आसा एकै बाब, मतलब परमेश्वर।" 42 यीशू तिन्नां लै बोलअ, "जै परमेश्वर थारअ बाब हंदअ, तै डाहणीं ती तम्हां मूँह संघे झूरी, किल्हैकि हूँ आसा परमेश्वरा का निखळी करै आअ द, हूँ निं आप्पै आथी आअ द पर हूँ आसा तेऊ भेजअ द।" 43 "तम्हें मेरी गल्ला किल्है निं समझदै? तै कि मेरअ बचन निं शुणीं सकदै।" 44 "तम्हें आसा आपणै बाबा शैताने शोहरू, और आपणै बाबे ईछा चाहा तम्हें पूरी करनअ। सह आसा शुरु का ई हत्या करनै आळअ, और सच्चाई दी निं आथी रहअ द, किल्हैकि सच्चाई निं तेऊ दी आथी, जुंण सह झूठ बोला, सह बोला आपणै सुआबा का ई, किल्हैकि सह आसा झूठअ ईधी तैणीं कि सह आसा झूठै-झूठैओ बाब।" 45 "पर हूँ जुंण सच्च बोला, तैहीता तम्हें मेरी गल्ला विश्वास निं करदै।" 46 "तम्हां मांझै कुण सका मुल्है पापी बोली? और जै हूँ सच्च बोला, तै तम्हें मेरी गल्ला विश्वास किल्है निं करदै?" 47 "जुंण परमेश्वरो आसा, सह शुणां परमेश्वरे गल्ला, तम्हें निं तै शुणदै कि तम्हें निं परमेश्वरे आथी।"

### यीशू और अब्राहम

48 इहय शुणीं यहूदी तेऊ लै बोलअ, तैहीता हाम्हें ताल्है ठीक ई बोला कि तूह आसा सामरी और ताह भितरी आसा दुष्टआत्मा? 49 यीशू तिन्नां लै उतर दैनअ, "मुखा दुष्टआत्मां ता निं आथी, पर हूँ करा आपणै पिता परमेश्वरो आदरमान, और तम्हें करा मेरी बेईज्जती।" 50 "पर हूँ निं आपणअ आदरमान, गुणगान चाहंदअ, पर हां, एक आसा, और सह एसा गल्ला न्याय बी करा।" 51 "हूँ लागअ दा तम्हां लै सच्ची-सच्ची बोलदअ, जै कुंण मेरी गल्ला शुणै, तेऊ नि कधि मौत भाळणी।" 52 यहूदी तेउ लै बोलअ कि ऐबै हेरअ हाम्हें जाणीं कि ताह दी आसा दुष्टआत्मा, अब्राहम मुंअ, नबी भविश्याबगता मूंए, और तूह बोला कि जुंण तेरी गल्ला मनै सह नि अनंत काल तैणीं मरनअ आथी। 53 म्हारअ बाब अब्राहम मुंअ, तूह कै तेऊ का बी बडअ आसा? और नबी भविश्याबाणीं करनै आळै बी मुंए, तूह आपणै आप कै समझा? 54 यीशू तिन्नां लै उतर दैनअ, "जै हूँ आप्पै आपणअ गुणगान करूँ, सह गुणगान निं किछै हणीं, पर मेरै गुणगाना करदअ आसा मेरअ बाब जहा लै तम्हें आपणअ परमेश्वर बोला।" 55 "और तम्हें ता निं सह जाणअ आथी, पर हूँ जाणा तेऊ; जै हूँ इहय बोलूँ कि हूँ निं तेऊ जाणदअ, तै हणअ हूँ तम्हां जिहअ झूठअ, पर हूँ जाणा तेऊ और तेऊओ शुणा मना बी।" 56 "थारअ बाब अब्राहम, मूँह भाळणेए आशा दी त मगन, और तेऊ भाळअ और नंद बी पाई।" 57 यहूदी तेऊ लै बोलअ, "मैची निं तूह पजाहा सालो बी हूअ, और तैबी बोला तूह इहय कि तंए भाळअ अब्राहम।" 58 यीशू तिन्नां लै बोलअ, "हूँ बोला तम्हां लै सच्ची-सच्ची कि हूँ त अब्राहमा का बी पैहलै।" 59 एसा गल्ला शुणीं चकै तिन्नां यीशू मारना लै पाथर, पर यीशू निखळअ मांदरा का बागै।

### जल्मां ओहीए काणें लै नेत्रदान

9 तिधा का नाशदी बारी भाऊअ प्रभू यीशु एक आदमी जुंण जल्मा ओही काणअ थिय; 2 और तेउए चेलै यीशू का पुछअ, "हे गुरु, कुंणीं आसा किय द पाप कि अह आंधअ जल्मअ, एक काणै माह्लूँ, कि एऊए आम्मां बाप्पू?" 3 प्रभू यीशू तिन्नां लै उतर दैनअ कि, "नां ता एऊ पाप किय, ना ता एऊए मां बाबै, पर अह हुअ एते तैणीं कि परमेश्वरो काम एऊ दी प्रगट

होए।" 4 "जुंणीं हूँ भेजअ द आसा, तेऊओ काम आसा धैळी ई धैळी करनअ जरूरी, सह राच आसा एछणै आळी, तेथ निं कोहै काम करी सकदअ।" 5 "जेभै तैणीं हूँ एऊ संसारा दी आसा, तेभै तैणीं आसा हूँ संसारा लै प्रैशअ।" 6 इहय बोली करै तेऊ धरनीं थुकअ और थुका करै मुछअ माटअ, और सह माटअ तेउ काणैए आच्छी लाई करै बोलअ, 7 "नाश, शिलोहे सरा (कुंड) दी धो, (जेतो अर्थ हआ भेजअ द) तेउ बी तिहअई किय, सरा दी मूँह धोअ और सह आअ शरैछी आच्छी बापस। 8 तैबै तेउ ओरी-पोरी रहणै आळै जुंणीं सह काणअ पैहलै भाळअ द थिय, तिन्नां बोलअ कि अह सह काणअ निं आथी जुंण एसी बाती भिखा मांगदअ हआ थिय? 9 कई बोलअ इहय कि अह आसा सहैई; और कई बोलअ इहय कि अह निं आथी, पर अह आसा तेऊ जिहअ हेरनअ, पर तेऊ जुंण काणअ थिय, तेऊ बोलअ आप्पै कि हूँ आसा। 10 तैबै तियां लोग तेऊ पुछदै लागै कि, ताखा किहअ करै लागअ धेछदअ? 11 तेऊ तिन्नां लै उतर दैनअ, "एकी यीशू नांऊए एकी आदमी मुछअ माटअ, और सह लाअ मेरी आच्छी, संघा बोलअ मुल्है कि शिलोहा लै नाश और धो, ता हंबी नाठअ और धोई करै लागअ मुखा धेछदअ।" 12 तिन्नां तेऊ का पुछअ, कि सह किधी आसा? तेऊ बोलअ कि मुखा निं थोघै।

### चंगाईए बारै फरीसीए हेर-भाळ करनीं

13 लोगे नियं सह फरिसी सेटा लै जुंण पैहलै काणअ थिय। 14 जहा धैळी यीशू माटअ मुछी करै तेऊए आच्छी दी लाअ सह थिय सबतो धैळअ। 15 फरीसी तेऊ का पुछअ, "तेरी आच्छी किहअ करै खुल्ही?" तेऊ तिन्नां का खोजअ कि तेऊ लाअ मेरी आच्छी माटअ और मंए धोअ और ऐबै लागअ मुखा धेछदअ। 16 एसा गल्ला शुणीं बोलअ फरिसी इहय कि अह आदमी निं परमेश्वरो आथी, किल्हैकि अह निं सबते धैळी मंदअ आथी। तैबै तिन्नां होरी बोलअ इहय कि पापी आदमी किधी सका ईहै चिन्ह, चमतकार रहैऊई? और एसा गल्ला दी पळी तिन्नां बिचै फूट। 17 तिन्नां तेऊ काणै का भी पुछअ कि तेऊ जुंणीं तेरी आच्छी खोल्ही, तूह तेऊए बारै कै बोला? काणै बोलअ इहय कि सह आसा भविष्याबाणीं करनै आळअ।

18 पर यहूदी निं बशबास हुअ कि अह थिय पैहलै काणअ, और ऐबै लागअ अह भाळअ, जसरी आच्छी खुल्ही ती, जेभै तैणीं तिन्नां तेऊए मां बाबा का निं पुछअ, 19 कि अह कै थारअ शोहरू आसा, जसा लै तम्हें बोलअ कि अह थिय पैहलै जल्मा ओही काणअ? ता, ऐबै किहअ करै लागअ अह भाळअ? 20 तेऊए मां बाबै उतर दैनअ कि, हाम्हें जाणा कि अह आसा म्हारअ शोहरू और अह त जल्मा ओही काणअ। 21 पर हाम्हां का निं इहय थोघ आथी कि अह किहअ करै लागअ भाळअ, और नां हाम्हां का इहय थोघ आथी कि एऊए आच्छी कुंणी खोल्ही; अह आसा आप्पै सैणअ, एऊई का पुछा, अह सका आपणै बारै आप्पै खोजी। 22 एही गल्ला की तेऊए आम्मां बाप्पू तै कि तिन्नां लागा ती यहूदी का डअर। किल्हैकि यहूदी त एकअ हेरअ द करी कि जुंण बी यीशू लै मसीह बोले, सह निं मांदरै छाडणअ। 23 तैहीता तेऊए आम्मां-बाप्पू इहय बोलअ कि अह आसा सैणअ एउई का पुछा।

24 तैबै तिन्नां दुजी बारी सह काणअ शदअ, और बोलअ कि, परमेश्वरो भजन कर, हाम्हां का आसा थोघ कि सह आदमी आसा पापी। 25 तेऊ तिन्नां लै उतर दैनअ, "हूँ निं एसा गल्ला जाणदअ कि सह पापी आसा की नाई, पर एसा गल्ला जाणा हूँ जरूर कि हूँ थिय पैहलै काणअ और ऐबै लागअ मुखा धेछदअ।" 26 तिन्नां पुछअ तेऊका इहय भी कि तेऊ ताह संघे कै किय? तेरी आच्छी किहअ करै खोल्ही? 27 तेऊ तिन्नां लै बोलअ, "मंए हेरअ तम्हां का खोजी और तम्हें हेरअ शुणीं, ऐबै दुजी बारी किजू लै चाहा शुळणअ? तम्हें बी तेऊए चेलै किन्नी चाहा बळणअ?" 28 तैबै लागै तियां तेऊलै गाळी दैन्दै कि तुहैई आसा तेउओ चेलअ, हाम्हें आसा मूसा नबीए चेलै। 29 हाम्हें जाणा कि परमेश्वरै की मुसा संघे गल्ला, पर एऊ आदमीं निं हाम्हें जाणदै कि अह किधो आसा। 30 काणै तिन्नां लै उतर दैनअ, "अह ता रहैनीए गल आसा, कि तम्हें निं जाणदै कि सह किधो आसा, तैबी खोल्ही तेऊ मेरी आच्छी।" 31 "हाम्हें जाणा कि परमेश्वर निं पापिए शुणदअ, पर जै कुंण परमेश्वरो भगत होए और तेऊए ईछा दी चले, ता सह शुणां तेऊओ।" 32 संसारे शुरुआता ओहीं निं कधि शुणअ कि जल्मा ओहीए काणैए आच्छी खोल्ही होए कुंणीं। 33 जै सह

आदमी परमेश्वरो नाई आथी, तै निं सह सकदअ त किछ करी।" 34 तिन्नै तेऊलै बोलअ कि तूह ता आसा घणै पापा दी हुअ द, तंरै कै लारे हाम्हें सखाऊई? और तिन्नै काढअ सह बागा लै।

### आत्मिक अंधापन

35 प्रभू यीशू शुणअ कि सह हेरअ तिन्नै बागा लै काढी, और जांऊं तेऊ काणै मांहु का मिलअ और पुछअ, "कै तूह परमेश्वरे शोहरु दी विश्वास करा?" 36 तेऊ उतर दैनअ कि "हे प्रभू, सह कुण आसा कि जहा दी हूँ विश्वास करुं?" 37 यीशू तेऊलै बोलअ, "तंरै आसा सह भाळअ द, सह आसा सहैई जुण ता संघे गला करदअ आसा लागअ द।" 38 तैबै तेऊ बोलअ, "हे प्रभू, हूँ करा विश्वास" और तेऊ टेकअ प्रभू सेटा माथअ। 39 तैबै प्रभू यीशू बोलअ, "हूँ आसा आअ द एऊ संसारा न्याय करदअ, ताकि जुण काणै आसा, तियां भाळे और जसा का धेछिआ, तियां होए काणै।" 40 जुण फरीसी तेऊ संघा थिये, तिन्नै इन्नां गला शुणीं यीशू लै बोलअ कि हाम्हें बी कै काणै आसा? 41 प्रभू यीशू तिन्नां लै बोलअ, "जे तम्हें काणै हंदै ता पापी नाई तै हणै, पर ऐबै बोला कि हाम्हें भाळा, इहय करै रहणअ थारअ पाप बर्णी।"

### फुआल और भेडो दृष्टांत

10 यीशू मसीह बोलअ, "हूँ बोला तमहां का सच्ची-सच्ची कि जुण कोई भडैले दी दुआरा बाती नाई नाशदअ, पर कसा होरी बाता उखळा, सह आसा चोर डाकू।" 2 "पर जुण दुआरा बाती नाशा, सह आसा तिन्नां भेडो फुआल, 3 तेऊ लै दैआ दुआरो चरुकीदार दुआर खोल्ही, और भेडा शुणां तेऊए हाका, और सह शादा तिन्नां नांऊआ लई करै बागा लै।" 4 "भेडा बागा लै काढी करै हांडा सह फुआल तिन्नां आजू-आजू और भेडा चला तेऊ पिछू-पिछू; किलहैकि तियां बछेणा तेऊए बोल।" 5 "पर कसा पराए पिछू निं तियां कधि नाशदी, पर तेऊ का भागा तियां दूर, किलहैकि तियां निं पराएओ बोल बछेणदी।" 6 प्रभू यीशू खोजअ तिन्नां का अह दृष्टांत पर तिन्नै निं अह समझअ कि इयां कै गला बोली।

### यीशू असली फुआल

7 यीशू बोलअ तिन्नां लै भी कि, "हूँ बोला तमहां लै सच्ची-सच्ची कि भेडो दुआर आसा हूँ।" 8 "जेतरे बी मुखा पैहले आए, तियां आसा चोर और डाकू, और भेडा निं तिन्नै बोल शुणीं।" 9 "दुआर आसा हूँ, जे कुण मूँह करै भितरा लै नाशे, तेऊ भेटणअ मोक्ष; और सह रहणअ भितरा बागा लै एछदअ नाशदअ, घाहा पाणीं खांदअ पिंदअ लागी।" 10 "चोर निं किजू होरी कामें एछदअ, सह एछा सिधअ चोरी करदअ, मारदअ और बनाशा करदअ। हूँ आसा आअ द एते तैणीं कि सोभी जिंदगी भेटे, और बोहत करै भेटे।" 11 "असली फुआल आसा हूँ, असली फुआल दैआ भेडे तैणीं आपणीं जान बी।" 12 "जुण मजदूर हआ, सह निं असली फुआल हंदअ, और नां सह मालक हंदअ, जांऊं बराघ एछा, तेऊ भाळी भागा सह भेडा छाडी दूर और बराघ पाआ तिन्नां भेडा खाई और तिन्नां दळाउआ सातै बातै, 13 सह मजदूर भागा तिधा का तै कि सह आसा मजदूर, तेऊ निं भेडो हैळअ फिकर हंदअ।" 14 "असली फुआल आसा हूँ, जिहअ मूँह मेरअ बाब बछेणा, तिहअ बछेणा हूँ तेऊ।" 15 "ठीक इहयई, हूँ बछेणा आपणीं भेडा, और मेरी भेडा बछेणा मूँह, और हूँ दैआ आपणीं भेडा लै जान।" 16 "मेरी आसा होर बी भेडा, जुण एऊ भडैले दी नाई आथी, मूँह आसा तियां झालणीं बी जरूरी। तिन्नां शुळणअ मेरअ बोल, और, तेखअ हणअ मेरी भेडो एकै छुंड, और एकै फुआल।" 17 "तैहीता बाप्पू मूँह संघे झूरी डाहा, कि हूँ दैआ आपणअ प्राण कि, भी बापस लई सकुं।" 18 एता निं कोहै मुखा छडैऊई सकदअ, पर हूँ दैआ एता आप्पै, मूँह आसा एता दैणेओ हक बी और बापस लणेओ हक बी। अह आज्ञा आसा परमेश्वरै मुल्लै दैनी दी।"

19 इन्नां गला पीछू पळी यहुदी आप्पू बिचै भी फुट। 20 तिन्नां बिचै लागै कई लोग बोलदैं कि एऊ दी आसा दुष्टात्मा, एऊ शुणै किजू आसा लागै दै। 21 तिन्नै होरी बोलअ इहय कि दुष्टात्मां आळै आदमीं जेही निं इयां गलाई आथी, दुष्टात्मा कै काणेए खोल्हा आच्छी?

### यहुदीओ विश्वास नाई करनअ

22 हिऊंदो त धैळअ, और येरुशलेमें हुअ येरुशलेमों स्थापना पर्व। 23 और यीशू मसीह त येरुशलेम मांदरै सुलेमाने कबरै दी लागअ द घुमदअ। 24 तैबै यहुदी आए तेऊ फेर और बोलअ कि "ताह केभै तैणीं डाहणै हाम्हें दुबिधा दी, जै तूह मसीह आसा, तै बोल हाम्हें का सिधअ कि हूँ आसा।" 25 यीशू दैनअ तिन्नां लै उतर, "कि मंरै हेरअ तमहां का बोली, और तमहें निं विश्वास करदैं, जुण काम हूँ आपणै बापुए नांऊएँ करा, तियां आसा मेरै गुआह।" 26 "पर तमहें निं तै विश्वास करदैं, किलहैकि, तमहें निं मेरी भेडा जेदरा का आथी।" 27 "मेरी भेडा शुणां मेरै बोल, और हूँ बछेणां तिन्नां, और तियां हांडा मूँह पिछू-पिछू। 28 और हूँ दैआ तिन्नां लै अनंत जिऊण, और तिन्नां निं मेरै हाथा का कोहै छडैऊई सकदअ। 29 मेरअ बाप्पू, जुणीं तियां मुल्लै दैनीं दी आसा, सह आसा सोभी का बडअ, और तेऊए हाथा का निं कोहै तिन्नां छडैऊई सकदअ।" 30 "हूँ और बाप्पू आसा एकै।" 31 यहुदी चकै प्रभू यीशू लै पाथरै बाहणा लै पाथर। 32 एता भाळी प्रभू यीशू तिन्नां लै बोलअ, "मंरै कियै आपणै बाप्पूए तरफा का बडै भारी काम, इन्नां मांझै कसा कामां पिछू लाई तमहें मुल्लै पाथरै बाही?" 33 यहुदी तेऊ लै उतर दैनअ, "भलै कामां पिछू निं हाम्हें ताल्लै पाथरै बाहदैं, तंरै की परममशबरे निंदा इहय करै कि तूह बणां आपणै आप परमेश्वर।" 34 यीशू तिन्नां लै उतर दैनअ, "थारै बधाना दी कै लिखअ द निं आथी कि, "हूँ बोला, तमहें आसा ईश्वर।" 35 "जे तेऊ तिन्नां लै ईश्वर बोलअ; जसा सेटा परमेश्वर पुजअ (और पबित्र शास्त्रे गल निं छुपी सकदी), 36 तै जुण पिता परमेश्वरै पबित्र बणाई करै धरती दी भेजअ, तमहें बोला तेऊलै कि तूह करा परमेश्वरे निंदा, तैहीता मंरै बोलअ कि हूँ आसा परमेश्वरो पुत्र।" 37 "जे हूँ बापुओ काम नाई करदअ, तै निं मूँह परदैं विश्वास करणेए जरूरत आथी, 38 पर जै हूँ तेऊए काम करा, तै तमहें चाए मेरअ विश्वास करा, चाए न करा, पर इन्नां कामों विश्वास ता करा, ताकि तमहें का थोघ लागे और समझ एछे कि बाप्पू आसा मूँह दी और हूँ आसा बाप्पू दी।" 39 तैबै तिन्नै तेऊ ढाकणैए कोशिश की पर सह निं तिन्नै हाथे आआ।

40 तेखअ नाठअ सह जरदण नदी पार एकी जैगा लै, और सह रहअ तिधी, जिधी पैहलै बपतिसमअ दैआ थिय। 41 और कई लोगे बोलअ तेऊ सेटा एछी करै कि यहुना ता निं कोई बी चिन्ह रहैऊअ पर जुण बी तेऊ यीशुए बारै बोलअ, सह थिय सच 42 और कई लोगे किय तिधी प्रभू यीशू दी विश्वास।

### लाजरै मौत

11 मरिअम और मारथा ती दुई बैहणी, तिन्नै नगरी एक बेतनिया नांऊएँ गरांऊएँ त एक लाजर नांओ आदमीं बमार। 2 अह ती सही मरियम, जुणीं किमती खुशबूदार इन्नां करै प्रभूए पैर धोए तै और आपणै मूंडे शराळा करै प्रभू यीशुए पैर धोए तै, सह बमार लाजर त तेसरअ सकअ भाई। 3 तेऊए बैहणीं दैनअ प्रभू यीशू लै फैळअ कि "हे प्रभू, जहा संघे तूह बडी भारी झूरी डाहा, सह आसा बमार।" 4 एसा गला शुणीं प्रभू यीशू बोलअ, "अह बमारी निं मौता लै आथी पर अह आसा परमेश्वरे गुणगाना हणा लै, कि तेऊ करै परमेश्वरे शोहरुओ गुणगान हई सके।"

5 प्रभू यीशू डाहा त दुई बैहणीं मारथा मरिअम और तिन्नै भाई लाजरा संघे बडी झूरी। 6 जांऊं तेऊ शुणअ, कि लाजर आसा बमार, ता सह जिधी थिय; सह रहअ दुई धैळै तिधी। 7 एता बाद तेऊ आपणै चेलै लै बोलअ कि चाला हाम्हें नाशणअ ऐबै यहुदिया लै। 8 चेलै प्रभू लै बोलअ, "कि हे प्रभू, मैची ता यहुदी चाहा ताह पाथरा करै मारनअ, तजी बी तूह तिधा लै चालअ?" 9 यीशू तिन्नां लै उतर दैनअ, "धैळिए कै बाराह घांटे निं हंदै? जै कुण धैळी हांटे, तेउ निं ठोहळ लागदी किलहैकि तेऊका धेछिआ संसारो प्रैशअ, 10 पर जै कुण राची हांटे, तेऊ लागी ठोहळ किलहैकि राची हआ न्हैरअ।" 11 यीशू तिन्नां का इयां गला बोली, और तेता बाद चेलै लै बोलअ कि म्हारअ दोस्त गअ सुती, हूँ चालअ नाशी तेऊ झैऊंदअ। 12 तैबै चेलै तेऊलै बोलअ, "हे प्रभू, जै सह सुती गअ, कै सह बरणअ?" 13 प्रभू यीशु बोलअ त तिन्नां लै इहय कि लाजर गअ मरी, पर तियां समझै कि प्रभू बोलअ इहय कि सह आसा निंजा सुतअ द। 14 तैबै प्रभू यीशू तिन्नां लै साफ-साफ बोलअ, "कि लाजर गअ मरी,

15 और हूँ आसा तम्हां संघे खुश कि हूँ आसा तम्हां संघे ईधी, ताकि तम्हें विश्वास करी सके, पर ऐबे चाला, हांम्हां नाशणअ तेऊ सेटा लै।" 16 तैभै थोमा, जसा लै दिदमुस बोला, आपणै साथी चेलै लै बोलअ, "चाला हांम्हां बी हुअ एऊ संघे मरदै नाशणअ।"

### यीशू पुनरुत्थान और जिबन

17 जांऊं तियां तिधी पुजै ता, यीशू मसीह का पतअ चलअ कि लाजरा हुए घोरी दाबी चार धैळै। 18 सह थिय बेतलेहम, येरुशलैमा का कोई दूई मील दूर। 19 और बड़ै भारी यहूदी तै तिधी मारथा मरिअमा सेटा चिजदै आऐ दै। 20 मारथा प्रभू यीशूए खबर शुणी आई बाता तैणी मिलदी, पर मरिअम रही घरै। 21 मारथा प्रभू यीशू लै बोलअ, "हे प्रभू, जै तूह इधी हंदअ, तै नाई त मेरअ भाई कधि मरदअ, 22 पर ऐबे बी आसा मूँह भरोसअ कि जुंण बी तूह परमेश्वरा का मांगे, सह दैणअ परमेश्वरा तालहै।" 23 प्रभू यीशू बोलअ तेसा लै, कि "हैळअ नि करै, तेरअ भाई हणअ जिऊंदअ।" 24 मारथा तेऊ लै बोलअ कि, 'मुखा आसा थोघ कि पुनरुत्थाने बगती करनअ ताह सह जिऊंदअ।' 25 प्रभू यीशू तेसा लै बोलअ, "पुनरुत्थान और जिंदगी आसा हूँ आप्पै, जै कुंण मूँह परदै विश्वास करे, सह जै मरी बी जाए, सह हणअ भीई जिऊंदअ। 26 पर जुंण जिऊंदअ आसा और मूँह परदै विश्वास करा, सह नि अनंतकाल तैणी मरदअ, के तूह एसा गल्ला दी विश्वास करा?" 27 तेसा बोलअ, "हां प्रभू हूँ करा एसा गल्ला दी विश्वास कि परमेश्वरो पुत्र मसीह जुंण एऊ संसारा दी एछणै आळअ थिय, सह आसा तूहैई।"

### यीशू पाई लेरा

28 इहय बोली करै सह नाठी और आपणै बैहणी का चुप-चुपै बोलअ कि गुरूजी आसा ईधी, सह शादा ताह पोही। 29 इहय शुणी करै सह तेभी पुजी प्रभू यीशू सेटा। 30 (प्रभू यीशू नि मैची गरांऊए पुजी थिय, पर सह थिय तिधी मैची जिधी तेऊ मारथा भेटी थी।) 31 तिन्नै यहूदी, जुंण पांडा भितरी तिन्ना लै सुख शांती दैन्दै आऐ दै थियै, तिन्नै ज्ञाणअ कि मरिअम नाठी हणी लेरदी, तिधा लै जिधी लाजर दाबअ द आसा, और तियां बी लागै तेसा पिछू हांडदै। 32 जांऊं मरिअम तिधी पुजी, जिधी प्रभू यीशू थिय, तिधी पुजधी तेसा प्रभू यीशू सेटा माथअ टेकअ और पैरा दी उटी बाखा लेरदी-लेरदी बोलअ, "हे प्रभू, जै तूह इधी हंदअ, तै नाई त मेरअ भाई मरदअ।" 33 तैबै प्रभू मरिअमा और यहूदी लै जुंण तेसा पिछू आऐ तै, तिन्ना लेरदै भाळी हुअ आपणै मनै दुखी, और गळ घुघळै भरी बोलअ कि "तम्हें सह किधी आसा डाहअ द?" 34 तिन्नै बोलअ, "हे प्रभू चाल, आप्पै भाळ।" 35 प्रभू यीशूए आच्छी का लागै आशू बगदै। 36 तैबै यहूदी आप्पै बिचै बोलदै लागै कि भाळा अह तेऊ संघा केतरी झूरी डाहा त। 37 पर तिन्ना बिचै कई लोगे बोलअ इहय बी कि 'अह जुंण काणै लै आच्छी दैदअ फिरा, इहय बी नि करी सकअ कि सह मांळू नाई मरदअ।'

### लाजर जिऊंदअ करनअ

38 बडअ भारी दुखी हई करै पुजअ यीशू तेसा जैगा, जिधी लाजर दाबअ द त। सह ती एक जुहळ और एकी बडै पथरा करै त जुहळीओ मोहरअ बंद किय द। 39 प्रभू यीशू तिन्नालै बोलअ कि "एऊ पाथरा बदळा पोही", तैबै मारथा बोलअ कि "हे प्रभू, तेऊका हणी ऐबे बास शळैह लागीदी, आझां गुरे तेऊ मरी चार धैळै हई।" 40 प्रभू यीशू तेसा लै बोलअ, "मरे ताखा किजै बोलअ त कि जै तूह विश्वास करे ता तै भाळणीं ताह परमेश्वरे महिमां।" 41 तैबै तिन्नै सह पाथर बदळअ पोही और प्रभू यीशू आच्छी सरगा बाखा लै करी बोलअ कि, "हे पिता परमेश्वर, हूँ करा तालहै धन्याबाद कि त्पे हेरी मेरी शूणी, 42 मुखा त थोघ कि तूह शुणा हर बगत मेरी, पर इहय बोलअ म्पे तै कि जुंण ईयां लोग फेर फिरदै आसा, ईयां बी विश्वास करे कि तंरे आसा हूँ भेजअ द।" 43 इहय बोली करै तेऊ जोरै हाक पाई कि "हे लाजर, बागा लै निखळ।" 44 जुंण लाजर मरी गअ थिय, सह निखळअ बागा लै, तेऊओ शरीर त मरगे कापळै करै पळेदूअ द और तेऊओ मुंह त कुआया करै बंद। तैबै तिन्ना लै प्रभू यीशू बोलअ "एऊ खोला पोही और एऊ दैआ नाशणै।"

### यीशूए खलाफ षडयंत्र

(मत्ती 26:1-5; मरकुस 14:1,2; लूका 22:1,2)

45 तैबै कई यहूदी जुंण तिधी मरिअमां सेटा लै आऐ दै थियै तिन्नै एऊ चमतकारा भाळी किय तिन्नां मांझै किय कई तेऊ दी विश्वास। 46 और तिन्नां बिचै कई जळै फरीसी सेटा नाशी दैनअ एऊ कामां समाचार। 47 इहय शुणी याजकै और माहायाजकै कठा हई करै एक सभा की, और बोलअ कि "हांम्हें के करा, अह मांळू ता बडै चिन्ह चमतकार रहैऊआ?" 48 जै हांम्हें एऊलै एही ई छूट दैन्दै रहे, ता सोभी करनअ तेउ परदै विश्वास, और रोमीं करनअ म्हारी जैगा और देशा दी कबजअ। 49 तैबै तिन्नां बिचै काईफा जुंण तेसा साला माहायाजक थिय, तेऊ बोलअ, "तम्हें नि किछ जाणदै, 50 और ना इहय सोचदै कि तम्हां लै आसा अह भलअ कि म्हारे लोगा लै एक मांळू मरे, सारी ज्ञाती ता नाश ना होए।" 51 सह गल नि तेऊ आप्पू बाखा बोली, पर तेसा साला माहायाजक हणैए नातै की भबिष्यबाणी, कि यीशू मरनअ तेसा ज्ञाती लै, 52 ना कि सिधअ तेसा ज्ञाती लै, पर एते तैणीं बी कि परमेश्वरे छिगुऐ दै बच्चै बी कठा करे। 53 और तेसा ई धैळी ओही लागै तियां यीशू मारने जोगा करदै।

54 तैहीता तथा पोही नि यीशू तिन्नां बिचै प्रगतअ नाठअ, पर तिधा का जंगला नेळ देशै एकी ईफराईम नांऊए नगरी लै नाठअ और आपणै चेलै संघे लागअ तिधी रहदअ।

55 और यहूदीओ फसह पर्व थिय नेळ, और सराजा का बी नाठै कई लोग येरुशलैम तेऊ पर्व लै ताकि आपणै आप शुध करी सके। 56 ता तियां लागै यीशू लोळै और मांदरै खळै हई बोलदै कि तम्हें के समझा? कि सह पर्व लै एछणअ कि नाई? 57 फरीसी और माहायाजकै बी त सोभी का इहय बोली डाहअ द कि, जै कसा का यीशू धेछिए, तै खोजै हांम्हां का, हांम्हां ढाकणअ सह॥

### यीशूए पैरै इत्र तरैळणअ

(मत्ती 26:6-13; मरकुस 14:3-9)

12 तेखअ प्रभू यीशू मसीह फसहे पर्व का छहा धैळै पैहलै बेतनियाह लै आअ, जिधी लाजर थिय, जुंण प्रभू मरी करै किय त जिऊंदअ। 2 तिधी तिन्नै प्रभू लै रोटी बनाई, मार्था सेऊआ टैहली करदी और लाजर बी थिय तिन्नां बिचै रोटी खांदअ बेठअ द जुंण यीशू संघे रोटी खांदै तै बेठै, 3 तैबै मरिअमै आधअ सेर जटामांसीओ खुशबूदार इत्रा करै प्रभूए पैर धोए ओर आपणै मुंडे शराळा करै दुशै प्रभूए पैर, और इत्रे खुशबू भरुई सारै घरै और सारअ घर हुअ खुशबूदार। 4 पर तिन्नां चेलै बिचै यहूदा इसकरोती जुंणी यीशू पकड़ाऊणै आळअ त, तेऊ बोलअ, 5 'अह इत्र चिई शए दनारै बेची करै कंगाळा लै किलहै नि दैनअ?' 6 तेऊ नि अह गल तै बोली कि तेऊ थी कंगाळो फिकर, तेऊ बोली अह तै सह त चोर। तेऊ का रहा ती ढबे थैली, और तेता का करा त सह चोरी। 7 यीशू बोलअ, "तेऊ दै मेरी दाबणै धैळी तैणीं एकै रहणै, 8 कंगाळ रहणै तम्हां संघे कबलै पर हूँ नि तम्हां संघे कबलअ रहणअ।"

### लाजरे खलाफ षडयंत्र

9 यहूदी बिचै जुंण आम लोग जुंण यीशूए बारै किछ नि बोलदै तै, तिन्नां का गअ थोघ लागी कि सह आसा तिधी, तियां नि सिधै यीशूए तैणीं तिधा लै भाळै आऐ पर तियां आऐ तैबी कि लाजर भाळणअ जुंण यीशू मरी करै जिऊंदअ किय त। 10 माहायाजकै दैनअ इहय हुकम कि लाजरा बी पा एबे मारी 11 किलहैकि तेऊए बजहा नाठै कई यहूदी और तिन्नै किय प्रभू यीशू दी विश्वास।

### येरुश्लैमै विजय प्रवेश

(मत्ती 21:1-11, मरकुस 11:1-11; लूका 19:28-40)

12 दुजै धैळै बडै भारी लोगे जुंण येरुशलैमे पर्व लै आऐ थियै, इहय शुणी कि प्रभू यीशू आसा लागअ द येरुशलैमे लै एछदअ, 13 तिन्नै खजुरे शाळ्टी

आणीं और प्रभू यीशू सेटा लै नाठे शदान्, और जोरै-जोरै लागै बोलदै, होशान्ना, होशान्ना, धन्य इस्त्राएले राजै लै जुंण परमेश्वर नांऊंए एच्छा।

14 तैबै यीशू मसीह एक गाधैए बच्चअ भेटअ और सह बेटअ तेऊ परदै।

15 जिहअ पबित्र शास्त्रा दी लिखअ द आसा कि

“हे सिओनें बेटी,

उरै नि आथी,

भाळ, तेरअ राजअ आसा लागअ द

गाधैए बच्चै परदै बेशी एच्छदअ।”

16 तेऊए चेलै नि पैहलै इयां गल्ला समझी ती, पर जैबै यीशू मसीह महीमा दी प्रगट हूअ, तैबै तिन्नां आद फिरी कि इयां गल्ला आसा यीशू मसीहे बारै शास्त्रा दी लिखी दी, और लोगै किय तेउ संघे इहय बर्ताअ। 17 तबै छुंडा बिचा का लोगै जुंण तेभै तेऊ संघे थिये, एही ग्वाही दैनी कि यीशू शादअ लाजर जुहळी दी दाबअ द लाजर बागा लै, और मुंए दै बिचा का किय जिऊंदअ। 18 एऊई कारणे आरे तै लोग यीशू मसीह सेटा मिलदै, किल्हैकि तिन्नें शुणअ त कि यीशू किय अह चमत्कार। 19 तैबै फरीसी आप्पू बिचै गल्ला लागै कि, सोचा ता सही आरो, थारै नि किछ हई सकदअ, भाळा, सारी दुनियां चाली तेऊ पिछू हई।

### यूनानीं लोगो यीशू लोळै लागणअ

20 जुंण लोग तेऊ पर्बा लै भजन करदै आरे दै थिये, तिन्नां बिचै थिये कई यूनानी बी। 21 तिन्नें गलीले बैतसेदा गरांऊंए रहणें आळै फिलिप्पुसा सेटा नाशी करै अरज की, कि “हे शीरीमान हाम्हे चहा प्रभू यीशू सेटा मिळणअ।” 22 फिलिप्पुसै बोली इयां गल्ला आपणें साथी आंदरिआसा का, और तियां दुई बोलअ प्रभू यीशू का। 23 एसा गल्ला शुणी प्रभू यीशू तिन्नां का बोलअ, “सह बगत गअ एच्छी कि मांछूए शोहरूओ गुणगान हो। 24 हूँ खोजा तम्हां का सच्ची-सच्ची कि, जेभै तैणीं गिंहुंओ दाणअ खेचै दी पळी करै नाई मरदअ, तेभै तैणीं रहा सह एकै पर जांऊं सह मरा, तेखअ लागा तेथ कई दाणें।” 25 “जुंण आपणें प्राणां का प्रेम करा, सह खोआ तेता; पर जुंण एऊ संसारै आपणें प्राणां का प्रेम नाई करदअ, सह डाहा अनंत जिऊणां तैणीं तेता सभाळी।” 26 जै कुंण मेरी सेऊआ करा, सह लागै मुँह पिछू हांडदअ; और जिधी हूँ आसा, तिधी हणअ मेरअ सेऊआकार बी। जै कुंण मेरी सेऊआ करे; तेऊ भेटणअ बाप्पू परमेश्वरा का आदरमान।

### क्रूसे मौतो संकेत

27 “एबै लागअ मेरअ जिऊ घबरांदअ, इहय करै मंरे कै लाअ तम्हां लै बोली? पर हूँ पुजअ द एतेई तैणीं एऊ बगता दी।” 28 “हे पिता, आपणें नांऊंए महिमा कर,” तैबै एक आकाशबाणीं हई, कि मंरे आसा हेरी दी एऊए महिमा करी, और आजू बी रहणअ करदअ।” 29 जुंण तिधी खट्खट्टे दै लोग शुणें तै लागै दै, तिन्नें बोलअ कि गुळूबिजळू लागअ, और कई बोलअ कि स्वर्गदूतै कीई एऊ संघे गल्ला। 30 एता लै प्रभू यीशू बोलअ कि अह शब्द निं मुल्है आई पर अह आसा तम्हां लै। 31 एबै हणअ एसा दुनिओ न्याय, एसा दुनिआ दी कबजै करनै आळअ काढणअ एबै बागा लै। 32 जै मुँह एसा दुनियां का उझै चके, तै निंणै मुँह सोभ आप्पू सेटा लै।” 33 इहय बोली करै की तेऊ अह गल प्रगट कि सह केही मौता मरनअ। 34 एसा गल्ला शुणीं लोगै तेउ लै बोलअ, कि हाम्हे आसा बधाना दी अह गल शुणीं दी कि मसीह रहणअ हमेशा जिऊंदअ, पर तै तूह किल्है बोला कि मांछूओ शोहरू आसा उछटै दी छडाऊणअ जरूरी? 35 अह मांछूओ शोहरू कुंण आसा? प्रभू यीशू तिन्नां लै बोलअ, “दिऊअ आसा थोळी घळी तम्हां सेटा, जेभै तैणीं दिऊअ तम्हां सेटा आसा, तेभै तैणीं लागा हांडद; इहय निं हआ कि तम्हें रहा न्हैरे दी, जुंण न्हैरे दी हांडा, तेऊ का नि इहय पतअ हंदअ कि केसी नाशणअ।” 36 जेभै तैणीं दिऊअ तम्हां संघे आसा, दीऊएओ विश्वास करा ताकि तम्हें दिउए लुआद बणीं सके।

### यहूदीओ विश्वास नाई करनै दी टेकी रहणअ

इन्नां गल्ला बोली करै लागअ यीशू मसीह हांडदअ और तिन्नें नजरा का रहअ दूर ई। 37 और तेऊ रहैऊए तिन्नां का कई चिन्ह पर तैबी बी नि तिन्नें विश्वास किय। 38 तै बी कि याशायाह भबिष्याबकतो सह बचन पुरअ हो कि,

“हे प्रभू म्हारै गल्लो भरोसअ कुंणीं किय? और प्रभूए बाहो बल कसा दी हुअ प्रगट?” 39 याशायाह बोलअ भी कि तियां नि इहय करै विश्वास करी सकै कि,

40 “तेऊ की तिन्नें आच्छी कांणीं और तिनों मन किय काठअ, इहय निं होए कि तियां भाळे और मना का समझे, और तियां बदळे और हूँ करूँ तिन्नां चांगअ।” 41 याशायाह बोली इयां गल्ला तैबै जांऊं तेऊ प्रभूए महिमा भाळी। 42 तैबी कई सरकारी अफसरै किय यीशू दी विश्वास पर फरिसीए कारण निं तियां प्रगट मंदै थिये, ताकि इहय ना हो कि तिन्नां तियां अराधना घरा का बागै ना काढे। 43 किल्हैकि मांछूए तरीफ करनी लागा ती तिन्नां परमेश्वर तरीफा का ज़ादी प्यारी।

### यीशूए वचन : न्याये आधार

44 प्रभू यीशू बोलअ तिन्नां लै जोरै-जोरै कि, “जुंण मुँह परदै विश्वास करा, सह निं मुँह परदै पर सह करा मेरै भेजणें आळैओ विश्वास। 45 और “जुंण मुँह भाळा, सह भाळा मेरै भेजणें आळै।” 46 हूँ आसा आअ द एऊ संसारै दिऊअ बणीं, ताकि जुंण मुँह दी विश्वास करे, सह न्हैरे दी ना रहे।” 47 “जै कुंण मेरी गल्ला शुणीं करै नाई मने, तेऊलै बी निं हूँ दोष लांदअ, किल्हैकि हूँ निं संसारा लै दोषा लांदअ आथी आअ द, पर हूँ आअ द संसारा बचाऊंदअ।” 48 “जुंण मुँह तुछ समझा, और मेरी गल्ला नाई मंदअ, तेऊ लै दोषा लागें आळअ आसा मेरअ बोल, जुंण मंरे बोलअ, तेऊ करै लागणअ आखरी बगती तेऊ लै दोष। 49 किल्हैकि मंरे निं आप्पू बाखा गल्ला की, पर पिता जुणीं हूँ भेजअ द आसा, तेऊ आसा मुल्है आज्ञा दैनीं दी कि के बोळणअ? और के खोजणअ? 50 और हूँ ज़ाणा कि तेऊए आज्ञा आसा अनंत जिऊण; तैहीता हूँ बोला कि, जिहअई पिता परमेश्वरै मुखा खोजअ, तिहअई मंरे बोलअ।”

### यीशूए चले पैर धोणें

13 फसहे पर्बा का पैहलै जांऊं यीशू का थोघ लागअ कि मेरी गई सह घळी एच्छी कि एबै एऊ संसारा छाडी लागणअ नाशणअ पिता सेटा लै बापस, प्रभू यीशू किय आखरी तैणीं तिहअई प्रेम जिहअ सह पैहलै करा त। 2 ता, जांऊं शैतान, यहूदा इसकरोतीए मनें मुकअ त इहय पाई कि यीशू मसीह बड़ैळणअ ढाकणें, तैबै बैळी खाणें बगती; 3 प्रभू यीशू का गअ थोघ लागी कि पिता परमेश्वरै की सोभ गल्ला मेरे हाथे और हूँ आसा परमेश्वरा सेटा का आअ द और मुँह लागा एबै परमेश्वरा सेटा लै बापस नाशणअ, 4 रोटी खाणें का उझअ खळअ और आपणीं घेरी का झिकळै खोलै, और गाचू बाह्ण आपणीं कुछी। 5 तैबै डबरु दी पाणीं भरी लागअ चले पैरा धोदअ और जुंण गाचू कुछी बाह्ण अ द त, तेता करै लागअ तिन्नें खूरा टुशदअ। 6 जांऊं सह शिमान पतरसा सेटा पुजअ, तेऊ बोलअ, “हे प्रभू, तरे कै मेरै पैर लाए धोई?” 7 प्रभू यीशू मसीह तेऊ लै उतर दैनअ, “जुंण हूँ एभै करा, मैची निं ताह एते समझ आथी, पर एता बाद जाणअ तूह समझी।” 8 पतरसै बोलअ, “हूँ निं दैदअ कधि ताह आपणें पैर धोणें।” इहय शुणीं प्रभू यीशू उतर दैनअ, “जै हूँ तरे पैर नाई धोऊं ता तै निं मुँह संघे तेरअ कोई हेसअ आथी।” 9 इहय शुणीं पतरसै बोलअ, “हे प्रभू, तै धो मुँह खूरा संघे मेरे हाथा मुंहा संघी।” 10 यीशू तेऊ लै बोलअ, “जुंण न्हैऊई आसा गअ द, तेऊ निं हाथा का सुआई होर धोणें जरूरत आथी, सह आसा बिलकुल साफ। तम्हें बी आसा साफ पर सोभै निं आथी।” 11 तेऊ का थिय थोघ कि सह कसा बड़ैळणअ ढाकणें, तैहीता तेऊ इहय बोलअ कि तम्हें निं सोभै साफ आथी।

12 जांऊं सह तिन्नें खूर धोई मुकअ, और झिकळै बाह्ण करै भी तिन्नां बिचै बेटअ, तैबै तिन्नां लै बोलदअ लागअ, “तम्हें एसा गल्ला समझै बी कि मंरे तम्हा संघे कै किय?” 13 “तम्हें बोला मुल्है गुरु और प्रभू, एसा गल्ला बोला तम्हें ठीक, किल्हैकि हूँ आसा, 14 जै मंरे गुरु और प्रभू हई करै बी थारै खूर धोए, ठीक ईहैई लागा तम्हां बी एकी दूजेए खूर धोणै।” 15 “किल्हैकि मंरे रहैऊअ

तम्हां का करी करै, कि जिहअ मंऐ तम्हां संघै किय, तिहअ करा तम्हें बी, 16 हूँ बोला तम्हां लै सच्ची-सच्ची कि दास निं आपणें मालक का बडअ हंदअ, ना भेजअ द भेजणै आळै का बडअ हंदअ।" 17 "तम्हें जाणा इत्रां गल्ला, पर धन्य हणें तम्हें तै, जै तिन्नां गल्ला दी चले (मने)।" 18 हूँ निं तम्हां सोभीए बारै आथी बोलदअ लागअ द, जुंण मंऐ चुनी आसा हेरै दै, पर अह आसा तै कि, पबित्र शास्त्रो इहय लिखअ द पुरअ होए कि, "जुंण मेरी रोटी खा, तेऊ चकी मुल्है लात।" 19 "एसा गल्ला हणें का आसा लागअ द हूँ तम्हां का पैहलै बोलदअ, ताकि जेभे अह गल होए, तेता बाद करे तम्हें विश्वास कि हूँ आसा सहैई।" 20 हूँ बोला तम्हां का सच्ची-सच्ची की, "जुंण मेरै भेजैदौओ सुआगत करा, सह करा मेरअ सुआगत, और जुंण मेरअ सुआगत करा, सह करा मेरै भेजणै आळैओ सुआगत।"

### विश्वासघात हणें बाखा शारअ

(मत्ती 26:20-25; मरकुस 14:17-21; लूका 22:21-23)

21 इत्रां गल्ला बोलदी भरुऐ यीशू भितरा का आत्मां दी गळ-घुघळे, और बोलअ कि, "हूँ बोला तम्हां का सच्ची-सच्ची इहय कि तम्हां बिचै आसा एक इहय जसा हूँ ढाकणें बझैळणअ।" 22 चलेए मने पळअ इहय बैहम कि अह हाम्हां मांझै कसा लै आसा लागअ द बोलदअ? और तियां लागै एकी दुजेए मूँह भाळै। 23 तेऊए चेलै बिचै एकी जुंण यीशू संघै बडअ प्रेम डाहा त, सह त प्रभू यीशूए हिका बाका लै ढूळी करै बेटअ द, 24 तैबै शिमोन पतरसै तेऊ बाखा शारअ करी करै पुछअ कि अह कसरै बारै आसा लागअ द बोलदअ? 25 तैबै तेऊ तिहअई करै प्रभू यीशूए हीका बाखा ढूळी करै पुछअ, "हे प्रभू, 'सह कुंण आसा?' यीशू उतर दैनअ, 'जसा लै मूँह रोटीओ म्हार डबेऊई करै दैणअ, सहैई आसा।' 26 तेखअ दैनअ तेऊ रोटीओ म्हार डबेऊई करै शमोने शोहरु यहूदा इसकरोती लै। 27 ता, म्हारा ढाकधी बसअ तेऊ दी शैतान, तैबै प्रभू यीशू तेऊ लै बोलअ, 'जुंण तंऐ करी आसा लाअ द, तेऊ कर छेकै।' 28 पर तिधी बेटै दै निं कोही बी अह गल समझी कि यीशू अह गल तेऊ लै किल्है बोली। 29 यहूदा का हआ तै ढबेए थैली, इहय करै कई समझअ इहय कि यीशू बोलअ तेऊले कि जुंण जिजा हाम्हां पर्वा मनाऊंगा लै लोळी, तिन्नां आण हाटी का लई, या इहय कि भुखे नचिशै लै एछ किजै दैई। 30 तैबै सह नडैऊए रोटीए म्हारा लई नाठअ राची बागा लै।

### नंऊई आज्ञा

31 जाऊं सह बागा लै नाठअ, तैबै प्रभू यीशू मसीह बोलअ, "ऐबै हुई मांझूए शोहरुए महिमा और परमेश्वर महिमा हुई तेऊ दी।" 32 "तेखअ परमेश्वरा बी करनीं आपणें मनें तेऊए महिमा एभी।" 33 "हे लान्हैओ, हूँ आसा थोळी घळी तम्हां सेटा, तेखअ हणें तम्हें मूँह लोळै, और जिहअ मंऐ यहूदी का बोलअ कि जिधा लै हूँ नाशणअ तिधी निं तम्हें एछी सकदै, और तिहअई बोला हूँ ऐबै तम्हां लै।" 34 "ऐबै दैणीं मूँह तम्हां लै एक नंऊई आज्ञा, कि "एकि दुर्ज संघै डाहा झूरी, जेही मंऐ तम्हां लै झूरी की तेही झूरी करा तम्हें एकी दुर्ज लै, 35 जै तम्हें आप्पू बिचै झूरी डाहे, तेता करै बछैळणें तम्हें कि तम्हें आसा मेरै चेलै।"

### पतरसे नाई करनं बारै शारअ

(मत्ती 26:31-35; मरकुस 14:27-31; लूका 22:31-34)

36 शिमोन पतरसै प्रभू लै बोलअ, "हे प्रभू, तूह किधा लै चालअ नाशी?" प्रभू यीशू तेऊ लै उतर दैनअ, "जिधा लै हूँ नाशणअ तिधा लै निं तूह मूँह पिछू एभी एछी सकदअ, पर एता बाद एछणअ तूह मूँह पिछू।" 37 पतरसै बोलअ, हे प्रभू, "हूँ ताह पिछू एभी किल्है निं एछी सकदअ? हूँ सका तेरी तैणीं आपणीं जान बी दैई।" 38 यीशू बोलअ, "तूह कै मेरी तैणीं आपणीं जान बी सका दैई? हूँ बोला ताल्है सच्ची-सच्ची कि दोती मुर्गै बाशणें का पैहलै करनअ ताह मूँह बछैळणा का नाई।"

### परमेश्वरा सेटा पुजणेंओ रसतअ

14 "तम्हें निं हैळअ करी, तम्हें करा परमेश्वरो विश्वास, मूँह परदै बी डाहा विश्वास, 2 मेरै बाप्पूए घरै आसा रहणा लै बडी भारी जैगा, जै

नाई हंदी, तै हेरनअ त मूँह तम्हां लै बोली, हूँ आसा चालअ द तम्हां लै जैगा बणादअ नाशी। 3 जाऊं मूँह तम्हां लै जैगा बणाई हेरनी, तेखअ एछणअ मूँह बापस फिरी और तम्हें बी निणें मूँह आप्पू संघै, ताकि जिधी हूँ रहूं तिधी तम्हें बी तिधी रही सके।" 4 "तम्हां का आसा थोघ कि हूँ किधा लै नाशणअ, तिधा लै नाशणओ रसतअ बी हेरा तम्हें ज़ाणी।" 5 थोमा तेऊ लै बोलअ, "हे प्रभू, हाम्हां का नि थोघै कि तूह किधा लै नाशणअ, ता बातो थोघ किहअ करै चालअ हाम्हां का लागी?" 6 प्रभू यीशू तेऊ लै बोलअ, "मार्ग, सचचाई और जिदगी आसा हूँ, मूँह बिणहीं निं बाप्पू सेटा कोहै पुजी सकदअ।" 7 "जै तम्हें हूँ बछैणअ हंदअ, तै बछैळणअ त तम्हां मेरअ बाब बी, और एभा पोही बछैणा तम्हें और भाळी बी हेरअ।" 8 फिलिप्पुसै यीशू लै बोलअ, "हे प्रभू, बाप्पू रहैऊ हाम्हां का, और अहैई आसा हाम्हां लै बडी गल।" 9 यीशू तेऊ लै बोलअ, "हे फिलिप्पुस, एतरे धैळै ओही आसा हूँ तम्हां संघै, और तूह कै मूँह बछैणदअ निं आथी? जुणीं हूँ भाळअ, तेऊ भाळअ बाप्पू, तूह इहय किल्है बोला कि बाप्पू निं हाम्हें भाळी।" 10 तूह कै विश्वास निं करदअ कि हूँ आसा बाप्पू दी और बाप्पू आसा मूँह दी? इत्रां गल्ला जुंण हूँ तम्हां का बोला; इत्रां निं हूँ आप्पू बाखा बोलदअ, पर बाप्पू करा मूँह दी रही करै आपणें काम।" 11 "मेरी एसा गल्लो भरोसअ करा कि हूँ आसा बाप्पू दी और बाप्पू आसा मूँह दी, इहय नाई ता मेरै कामां भाळी करा भरोसअ।" 12 "हूँ बोला तम्हां का सच्ची-सच्ची कि जुंण मूँह दी विश्वास करा, तेऊ करनै तियां सारै काम जुंण हूँ करा, इयां ता हुऐ पर तेऊ करनै एता का बी बडै-बडै काम, किल्हैकि हूँ चालअ ऐबै बाप्पू सेटा लै नाशी।" 13 "और जिहअ बी तम्हें मेरै नांऊए मांगे, मूँह दैणअ तम्हां लै तिहअ ई, ताकि शोहरु करै बाप्पूओ गुणगान होए।" 14 "जै तम्हें मुखा मेरै नांऊए मांगे, मूँह करनअ सह।

### पबित्त आत्मं प्रतिज्ञा

15 जै तम्हें मूँह संघे झूरी डाहा, तै मनणीं तम्हां मेरी आज्ञा बी, 16 और मूँह करनी बाप्पू का अरज कि तम्हां लै भेज एक होर मददगार, जुंण कबलअ तम्हां संघे रहे, 17 मतलब सचाईओ आत्मां, तेऊ निं संसार मनी सकदअ, किल्हैकि सह निं तिन्नां का धेछदअ और ना ता तियां बछैणदै आथी, सह आत्मां हणअ तम्हां दी और तम्हें बछैणा तेऊ और सह रहा तम्हां संघै।" 18 "हूँ नि कधि तम्हां अनाथ छाडदअ, हूँ रहणअ आप्पे तम्हां संघै।" 19 "थोळी घळी बाद निं अह दुनियां मूँह भाळी सकदी पर तम्हें सका मूँह भाळी इहय करै कि हूँ आसा जिऊंदअ और तम्हें बी रहणें जिऊंदै, 20 तेसा धैळी ज़ाहळणअ तम्हां कि हूँ आसा बाप्पू दी, और तम्हें आसा मूँह दी, और हूँ आसा तम्हां दी।" 21 "जसा का मेरी आज्ञा आसा, और जुंण तिन्नां मना, सहैई डाहा मूँह संघे सच्ची झूरी और तेऊ संघे डाहणीं मेरै बाप्पू बी झूरी और मूँबी डाहणीं तेऊ संघे झूरी और मूँह हणअ आप्पू तेऊ दी प्रगट। 22 यहूदा (जुंण इसकरोती नाई आथी) यीशू लै बोलअ, "हे प्रभू, इहय किजै हुअ कि तूह चाहा हणअ हाम्हां दी प्रगट और दुनियां दी निं चाहंदअ?" 23 प्रभू यीशू तेऊ लै बोलअ, "जै कुंण मूँह संघे झूरी डाहा, तै मनणीं तेऊ मेरी आज्ञा, और मेरै बाप्पू बी करनी तेऊ संघे झूरी और हाम्हां एछणअ तेऊ सेटा लै और तेऊ संघे बसणअ।" 24 "जुंण मूँह संघे झूरी निं करदअ, सह निं मेरी आज्ञा मंदअ। जुंण बचन तम्हें शुणा, सह निं मेरअ आथी पर सह आसा मेरै बाप्पूओ, जुणीं हूँ भेजअ द आसा,

25 इयां सोभ गल्ला खोजी मंऐ तम्हां का तम्हां बिचै रही करै।" 26 "पर मददगार, पबित्रात्मा जुंण बाप्पू मेरै नांऊए तम्हां लै भेजणअ, तेऊ सखाऊणीं तम्हां का सोभै गल्ला और जुंण गल्ला मंऐ तम्हां का खोजी दी आसा, तेऊ फरेऊणीं तिन्नां सोभी गले तम्हां का आद।" 27 हूँ दैऊं तम्हां लै शांती, जिहअ संसार हैळअ फिकर दैआ, तिहअ निं हूँ तम्हां लै दैदअ, मूँह दैणीं तम्हां लै आपणीं शांती ताकि थारअ मन ना घबराए; ना डरे।" 28 "तम्हें शुणअ मुखा इहय कि हूँ चालअ नाशी और तम्हां सेटा लै एछणअ बापस फिरी, जै तम्हें मूँह संघे झूरी डाहदै, तै हणें तै तम्हें एसा गल्ला शुणी खुशी कि हूँ चालअ बाप्पू सेटा लै नाशी, किल्हैकि बाप्पू आसा मुखा बडअ। 29 और मेरै हेरअ एता हणें का पैहलै तम्हां का खोजी, जेभै सह हई जाए तेभै करनअ तम्हां भरोसअ।" 30 "ऐबै निं मूँह तम्हां संघे खासी गल्ला करनी, किल्हैकि एसा

दुनियाँ सरदार गूअ एछी, और मुखा निं तेऊओ किछे आथी 31 पर अह हणअ तै कि दुनियाँ का थोघ लागे कि हूँ डाहा बापू संघे झूरी, और जिहअ बापू मुल्हे डेअ करा, हूँ करा, हूँ करा तिहअई। उझिआ, चाला इधा का।”

### यीशू सच्चवी बेल

15 “सच्चवी बेल आसा हूँ, और मेरअ बापू आसा जिमिंदार।” 2 “जुंण डाळी मूँह दी आसा, और फळ नाई दैदी, सह पाणीं तेऊ काटी। और जुंण डाळी फळा दैदी होए, तेते करनी तेऊ छांग ताकि होर बी ज़ादी फसल होए।” 3 जुंण मंरे बचन तम्हां का बोलअ, तेता करै आसा तम्हें शुधा। 4 “तम्हें रहा मूँह दी टेकी, और हूँ रहूँ तम्हां दी, जेही शाह्ण्टी बेला दी टेकी नां रहे, तै निं सह आपणैआप फळ दैई सकदी। ठिक तिहअई जै तम्हें मूँह दी टेकी नाई रहे, तै निं तम्हें फळ दैई सकदै।” 5 “हूँ आसा अंगूरे बेल, तम्हें आसा शाह्ण्टी, जुंण मूँह दी टेकी रहा, और बेला दी आसा, तेथ लागा जबरदस्त फसल, किल्हैकि मुखा जुदै हई करै निं तम्हें किछे करी सकदै।” 6 “जै कुंण मूँह दी टेकी नाई रहे, ता सह शोटणअ धरना लै जेही शुकी दी शाह्ण्टी शोटा और लोग नियाँ तिन्नां झाळी करै आगी ज़ाळणा लै और तियाँ दझा आगी जैदरी।” 7 “जै तम्हें मूँह दी टेकी रहे और मेरी गल्ला बी तम्हां दी टेकी रहे, तै तम्हें जुंण बी मांगे सह भेटणअ तम्हां।” 8 “मेरै बापूओ गुणगान हआ एता करै कि जै तम्हां दी खासी फसल लागे और तैही हणै तम्हें मेरै चेलै। 9 जेही बापू मूँह संघे झूरी की तेही झूरी की मंरे तम्हां संघे, मेरी झूरी दी रहा टेकी। 10 जै तम्हां मेरी आज्ञा मने, तै रहणें तम्हें मेरै प्यारा दी टेकी, जेही मंरे आपणै बापुए आज्ञा मनीं और तेऊए प्रेमा दी रहा टेकी। 11 “मंरे बोली तम्हां का ईयां गल्ला एते तैणीं कि मेरी खुशी तम्हां दी बणीं रहे और थारी खुशी पूरी होए।

12 “मेरी आज्ञा आसा अह कि, “जेही झूरी मंरे तम्हां लै की, तेही झूरी करा तम्हें आपू मांझै एकी दुजै संघे।” 13 “एता का बडअ प्रेम निं कोहीओ आथी कि कोई आपणै दोस्ता लै ज्ञान दैए।” 14 “जै तम्हें जिहअ हूँ बोला तिहअई करे, तै आसा तम्हें मेरै दोस्त। 15 एभा पोर्ही निं हूँ तम्हां लै दास बोलदअ, किल्हैकि दास नि ज़ाणदअ कि तेऊओ सुआमी के करा, पर मंरे बोलअ तम्हां लै दोस्त इहय करै कि मंरे जुंण गल्ला आपणै बापू का शुणीं, तियाँ खोजी मंरे सोभ तम्हां का।” 16 “तम्हें निं हूँ चुनअ पर मंरे चुनै तम्हें और एते तैणी डाहै कि तम्हें फळ दैई सके और थारअ फळ कबलअ रहे कि तम्हें मेरै नाऊंए पिता का ज़ो कुछ बी मांगे, सह तम्हां लै दैए। 17 ईयां गल्ला बोली मंरे तम्हां लै तै कि तम्हें एकी दुजै संघे झूरी करे।”

### संसारे जीद

18 जै दुनियाँ तम्हां संघे जीद करे, तै ज़ाणै तम्हें कि तेऊ की मूँह संघे पैहलै दुशमणी। 19 “जै तम्हें एऊ संसारे हंदै, तै करनी ती संसारा तम्हां लै झूरी, पर तम्हें आसा हेरै दै संसारा का जुदै चुनिं तैहीता अह संसार तम्हां संघे जीद डाहा।” 20 “जुंण गल मंरे तम्हां का बोली थी कि दास निं आपणै सुआमी का बडअ हंदअ, तेसा गल्ला डाहा आद कि जै तिन्नें मुल्हे दुख दैनअ, तै तम्हां लै बी दैणअ तिन्नां दुख। जै तिन्नें मेरी गल निं मनीं तै थारी गल किधा का लाई मनीं।” 21 “पर ईयां गल्ला करनीं तिन्नां मेरै नाऊंए कारण तम्हां संघे, किल्है कि तियाँ निं मेरै भेजणै आळै ज़ाणदै आथी। 22 जै हूँ नाई एछदअ और तिन्नां संघे गल्ला नाई करदअ, तै निं तिन्नां लै कोई पाप दोष लागणअ त, पर एबै निं तिन्नां का कोई भानअ आथी।” 23 “जुंण मूँह संघे जीद डाहा, सह डाहा मेरै बापू संघे बी जीद।” 24 “जै हूँ तिन्नां बिचै इहै काम नाई करदअ जुंण आज्ञा तैणीं होरी कोही निं कियै, तै निं तिन्नां लै किछ पाप दोष लागणअ त, पर एबै आसा हेरअ द तिन्नें हूँ और मेरअ बाब दुहै भाळी और दुही संधी संघे की तिन्नें जीद।” 25 अह हुअ तै कि शास्त्रा दी लिखअ द अह बचन पुरअ होए कि, “जुंण तिन्नें बिधी दी लिखअ द आसा, तिन्नें की बिणां कोई कारणे मूँह संघे जीद।” 26 “पर जेभै सह मददगार एछणअ, जुंण मूँह तम्हां सेटा लै भेजणअ, सच्चाईओ आत्मा जुंण बापूए तरफा का एछा, तेऊ दैणीं तैभै मेरी ग्वाही 27 और तम्हें बी आसा मेरै गुआह जुंण शुरु का मूँह संघे आसा रहै दै।।

16 ईयां गल्ला बोली मंरे तम्हां लै एते तैणीं कि तम्हां ठोहळ ना लागे, 2 तिन्नां काढणै तम्हें परमेश्वरे भजन करने ज़ेगा का बागै, एतरअ ता हुअ, “आजू इहय बी बगत एछणअ कि जुंण कोई तम्हां मारे तेऊ समझणअ आपणै आप इहय कि हूँ आसा लागअ द परमेश्वरे सेऊआ करदअ। 3 इहय करनअ तिन्नां तै कि तिन्नें नां ता पिता परमेश्वर आथी बछेणअ द और नां ता तियाँ मूँह बछेणदै।” 4 “पर ईयां गल्ला खोजी मंरे तै कि जेभै इहय बगत एछे, तैभै लोळी तम्हां आद फिरी कि मंरे हेरअ त तम्हां का पैहलै ई खोजी,

### पबित्र आत्मै काम

“शुरु दी निं मंरे तम्हा का ईयां गल्ला एते तैणीं खोजी कि हूँ थिय आपू तम्हां संघे।” 5 “एबै चालअ हूँ आपणै भेजणै आळै सेटा लै नाशी, तम्हां मांझै निं कोहै मूँह पुछदअ कि तूह किधा लै चालअ? 6 जुंण मंरे ईयां गल्ला तम्हां का खोजी एता करै भरुअ थारअ मन दुख शोगा करै, 7 तैबी खोजा हूँ तम्हां का सच्चाई आसा एही कि, मेरअ नाशणअ आसा तम्हां लै भलअ, जै हूँ नाई नाशूँ, तै सह मददगार निं तम्हां सेटा लै एछणअ। पर ज़ाऊं हूँ नाशणअ, तेता बाद भेजणअ मूँह सह तम्हां सेटा लै 8 और तेऊ भाळणअ एछी करै संसारो पाप धर्म और एतो नाप-तोल करनअ तेऊ आपू।” 9 पापे बारै न्याय करनअ तेऊ तै कि तियाँ निं मूँह दी विश्वास करदै, 10 धर्म बारै करनअ तै कि हूँ नाशणअ बापू सेटा लै और तम्हें निं मूँह भी भाळी सकदै, 11 न्याये बारै करनअ तै कि एऊ संसारे सरदारा लै आसा हेरअ द दोष लाई।

12 “मूँह बोळणी ती तम्हां लै होर बी गल्ला, पर तम्हें निं एभै तिन्नां सेहन करी सकदै, 13 पर जेभै सच्चाईओ आत्मां एछणअ, तेऊ खोजणीं तम्हां का सारी सच्चाईए बात, किल्हैकि तेऊ निं आपणी बाखा कोई गल बोळणीं, पर जुंण तेऊ शुळणीं, तियाँई गल्ला तेऊ बोळणीं और आजू हणै आळी सारी गल्ला खोजणीं तेऊ तम्हां का।” 14 तेऊ करनअ मेरअ गुणगान, किल्हैकि तेऊ खोजणीं मेरी गल्ला ई तम्हां का। 15 “जुंण किछ बापूओ आसा, सह आसा सोभ मेरअ। तैहीता मंरे तम्हां का बोलअ कि तेऊ खोजणीं तम्हां का मेरी ई गल्ला का।”

### दुख बधळणअ सुखा दी

16 “थोळी घळी निं हूँ तम्हां का धेछणअ आथी, और थोळी घळी बाद धेछणअ हूँ तम्हां का भी, किल्हैकि हूँ नाशणअ बापू सेटा लै।” 17 तैबै कई चेलै आपू बिचै गल्ला करदै लागै कि “अह इहय कै बोला कि थोळी घळी निं हूँ धेछणअ और थोळी घळी बाद धेछणअ? तै कि हूँ नाशणअ बापू सेटा लै?” 18 तैबै तिन्नें बोलअ, “अह जुंण थोळी घळी अह बोला, अह कै गल आसा? हाम्हां का निं पतअ चली अह कै बोला?” 19 यीशू हेरअ ज़ाणीं कि तियाँ चाह़ा मुखा पुछणअ, तैबै तेऊ तिन्नां लै बोलअ, “आपू बिचै तम्हें मेरी एसा गल्ला पुछ-ताछ करदै आसा लागै दै कि, अह किजै बोलअ कि थोळी घळी निं हूँ तम्हां का धेछणअ और थोळी घळी बाद धेछणअ तम्हां का हूँ भी?” 20 “हूँ बोला तम्हां का सच्चाई आसा अह कि तम्हें लेरनै हीक पटाकी और तम्हां जैदरी पळणअ शोग, पर एऊ संसारा मनाऊंणी खुशी। पर थारअ शोग बदळणअ खुशी दी।” 21 “ज़ाऊं बेटळी सुणैए दाह लाग़ा, तैभै पळा तैसा लै शोग, किल्हैकि तैभै हआ तेसा लै दुखा तकलिफे घळी आई दी, पर ज़ाऊं सह बच्चै लै जल्म दैई हेरा, एसा गले खुशी कि एकी माहू लअ संसारा दी जल्म, तेसा दुखा सांगटे घळी निं सह आद करदी।” 22 “तम्हां बी आसा एभै शोग, पर हूँ एछणअ तम्हां सेटा लै भी, और थारै मनें हणीं खुशी, और तेसा खुशी निं तम्हां का कोहै छडैऊई सकदअ। 23 तेसा धैळी निं तम्हां मुखा किछे पुछणअ; हूँ खोजा तम्हां का सच्चाई कि जै तम्हें बापू का किजै मांगे, मेरै नाऊंए दैणअ तेऊ तम्हां लै।” 24 “मैची तैणीं निं तम्हें मेरै नाऊंए किछे मांगअ आथी, जै तम्हें मांगे, सह तम्हां भेटणअ बी ताकि थारी खुशी पुरी होए।”

### संसारा परदै जीद

25 “मंरे बोली ईयां गल्ला तम्हां का दृशंतांता करै, पर आजू एछणअ इहय बगत कि मूँह निं तम्हां का दृशंतांता बोली करै गल्ला खोजणीं, पर बापूए बारै खोजणअ मूँह तम्हां का खुल्ली करै। 26 तेसा धैळी मांगणअ तम्हां मेरै नाऊंआ

दी और तेभै निं मूँह इहय बोळणीं कि हूँ करूँ बाप्पू का तम्हां लै अरज।  
27 किल्हैकि बाप्पू आसा आप्पू बी थारी बड़ी भारी झूरी कि तम्हें आसा डाही  
दी मूँह संघे झूरी और एसा गल्लो विश्वास बी किय कि हूँ आसा बाप्पू का  
निखळी करै संसारा दी आअ द, 28 “हूँ आसा बाप्पू का निखळी करै संसारा  
दी आअ द, और बाप्पूई सेटा नाशणअ मूँह बापस।”

29 तेऊए चेलै तेऊलै बोलअ, “भाळ ऐबै लागअ तूह खुल्ली करै बोलदअ,  
ऐबै निं तूह कोई दृशटांता दी बोलदअ, 30 ऐबै गई हाम्हां पाके दी ठीक-ठाक  
समझ एछी कि तूह जाणा सोभै गल्ला, और ताह निं किछे जरूरत आथी कि  
कोई आदमी ताखा पुछे, एसा गल्ला करै करा हाम्हें भरोसअ कि तूह आसा  
परमेश्वरा का निखळअ द।” 31 इहय शुंणीं यीशू बोलअ, “तम्हां कै एभै हुअ  
भरोसअ? 32 हेरा, सह घळी एछणी, ईंधी तैणीं कि सह गई एछी कि तम्हें  
भागणै तिच्छर-बिच्छर हई करै आपणीं-आपणीं बाता, और हूँ डाहणअ तम्हां  
कल्ही शोटी, तैबी बी निं हूँ कल्ही आथी, किल्हैकि बाप्पू आसा मूँह संघा।  
33 ईयां गल्ला बोली मंरे तम्हां का तै कि तम्हां मूँह दी शांती भेटे, संसारा दी  
हआ तम्हां भारी कशट, पर ढेठ डाहै, मंरे हेरअ संसार ज़िती।”

### आप्पू लै यीशूए माहायाजकीय प्राथणं

17 प्रभू यीशू ईयां गल्ला बोली और सरगा बाखा लै आच्छी करी करै  
बोलअ, “हे पिता, सह घळी गई एछी, आपणै शोहरूए महिमां कर  
कि शोहरू बी तेरी महिमां करी सके। 2 किल्हैकि तंरे दैनअ तेऊलै सोभी  
प्राणींओ अधिकार कि जुण तंरे तेऊलै दैनै, तिन्नां लै सह अनंत ज़िऊण दैई  
सके। 3 और अनंत ज़िऊण अह कि तियां ताह सन्नै परमेश्वरा और यीशू जुण  
तंरे भेजअ द आसा तेऊ बछैणीं सके।” 4 “जुण काम तंरे मुल्है करना लै  
दैनअ थिय, सह काम पूरअ करी किय मंरे धरती दी तेरअ गुणगान। 5 “ऐबै हे  
मेरै बाप्पू तूह कर आप्पू संघे मेरी महिमा तेसा महिमा करै, जुण एऊ संसारा  
बणाणें का पैहलै शुरुआता दी मेरी ताह संघे थी।

### आपणें चेलै लै

6 जुण तंरे एऊ संसारा दी माहू मुल्है दैनै तै, तिन्नां दी हेरअ मंरे तेरअ  
नांअ प्रगत करी। तियां थिये ताह संघे और तंरे दैनै तियां मुल्है, और तिन्नें  
हेरअ तेरअ बचन मनी। 7 ऐबै हेरअ तिन्नें समझी कि जुण किछ बी तंरे मुल्है  
दैनअ, सह आसा तेरी तरफा का।” 8 “किल्हैकि जुण गल्ला तंरे मुखा पजैळी,  
मंरे पजैळी तियां तिन्नां का और तिन्नें बी हेरी मनीं तियां और अह सच्चाई बी  
हेरी ज़ाणीं कि हूँ आसा ताखा निखळअ द, और एसा गल्लो बी हेरअ विश्वास  
करी कि हूँ आसा तंरे भेजअ द।” 9 “हूँ करा तिन्नां लै ताखा अरज और  
संसारा लै अरज निं हूँ आझं करदअ, पर हूँ करा तिन्नां लै ही अरज जुण  
तंरे मुल्है दैनै दै आसा, किल्हैकि तियां आसा तैरे।” 10 “और जुण बी मेरअ  
आसा, सह आसा सोभ तेरअ और जुण तेरअ आसा सह आसा मेरअ। और  
एता करै हुई मेरी महिमा प्रगत।” 11 “आजू निं हूँ एऊ संसारे रहणअ, पर ईयां  
रहणें एऊई संसारे। हूँ चालअ ऐबै ताह सेटा लै एछी, हे पबित्र पिता, आपणें  
तेऊ नांऊआ करै जुण तंरे मुल्है दैनअ द आसा, बचाऊ इन्नां कि ईयां बी  
हाम्हां ज़िहै एक हई सके।” 12 “जेभै हूँ तिन्नां संघे थिय, तेभै बचाउए तियां मंरे  
तेरै नांऊआं करै जुण तंरे मुल्है आसा दैनअ द, मंरे की तिन्नें हेर सभाळ,  
और एकी बिनाशे शोहरू छाडी निं होर कोहे नाश हुअ, सह हुअ तै कि पबित्र  
शास्त्रै लिखअ द बचन पूरअ होए।” 13 “पर ऐबै चालअ हूँ ताह सेटा लै एछी,  
और इन्नां गल्ला बोला हूँ संसारा दी कि मेरी खुशी लोळी तिन्नां आप्पू दी पूरी  
भेटी। 14 मंरे हेरी तेरी गल्ला तिन्नां सेटा पजैळी और संसारे की तिन्नां लै  
नफरत, किल्हैकि ज़िहअ हूँ एऊ संसारो नांई आथी, तिहैई तियां बी निं  
आथी एऊ संसारे। 15 ऐबै निं हूँ ताह सेटा एही अरज करदअ कि तूह चक  
तिन्नां एऊ संसारा का, पर हूँ करा एही अरज कि तिन्नां डाहे तेऊ दृष्टा का  
बचाऊई।” 16 “ज़िहअ हूँ एऊ संसारो नांई आथी, तिहैई तियां बी निं आथी  
एऊ संसारे। 17 तेरअ बचन आसा सच्चाई, तिन्नां कर सच्चाई करै पबित्र।”  
18 “ज़िहअ, तंरे हूँ संसारा लै भेजअ, तिहैई भेजै मंरे तियां संसारा दी, 19 और  
तिन्नां लै करा हूँ आप्पू पबित्र ताकि तियां बी सच्चाई करै पबित्र होए।”

### सोभी विश्वासी लै

20 “हूँ निं सिधी इन्नां लै ताह सेटा अरज करदअ, पर तिन्नां लै बी करा  
अरज जुण ईने गल्ला शुणीं करै मूँह दी विश्वास करे। 21 तियां सोभ लोळी एक  
हुए, ज़िहअ हूँ ताह दी आसा, तिहैई लोळी तियां हाम्हां दी हुए, एते तैणीं कि  
अह संसार विश्वास करे कि तंरे आसा हूँ भेजअ द।” 22 “और सह महिमा जुण  
तंरे मुल्है दैनी दी आसा, सह आसा दैनी दी मंरे तिन्नां लै कि तियां लोळी  
तिहै एक हुए ज़िहै हाम्हें एक आसा, 23 हूँ तिन्नां दी और तूह मूँह दी; कि तियां  
सिध हई करै एक हई सके, और एसा गल्ला संसार जाणें कि तंरे आसा हूँ  
भेजअ द, और जेही झूरी तंरे मुल्है की तेही की तंरे तिन्नां लै बी।” 24 “हे मेरै  
बाप्पू, हूँ चाहा इहय कि जुण तंरे मुल्है दैनै दै आसा, जेसा जैगा हूँ आसा,  
तियां लोळी मूँह आप्पू संघा तिधी हुए तेऊ गुणगाना भाळै जुण तंरे मेरअ  
किय, किल्हैकि तंरे की एऊ संसारे उत्पति का पैहलै ओही मूँह संघे झूरी।”  
25 “हे धर्मी बाप्पू, संसारे निं हूँ बछैणीं, पर हूँ बछैणा ताह और इन्नें बी हेरअ  
बछैणीं कि तंरे आसा हूँ भेजअ द। 26 मंरे खोजअ तेरअ नांअ तिन्नां का और  
आजू बी रहणअ मूँह खोजदै लागी कि जुण झूरी ताह मूँह संघे थी, सह  
तिन्नां दी रहे और हूँ बी रहे तिन्नां दी।”

### यीशू ढाकणअ

(मत्ती 26:47-56; मरकुस 14:43-50; लूका 22:47-53)

18 प्रभू यीशू इन्नां गल्ला बोली करै आपणें चेलै संघे नाठअ किदोन नाळा  
पार बाखा लै, तिधी थिय एक बगीचअ, यीशू और तेऊए चेलै नाठै  
तेऊ बगीचै दी। 2 और यहूदा जुणीं सह ढाकणें त लाअ द बज्जैळी, तेऊ का  
बी थिय एसा जैगो थोघ, किल्हैकि यीशू और तेऊए चेलै रहा तै तिधा लै एछदै  
लागी। 3 तैबै यहूदा पळटण लई और माहायाजक और फरिसिए तरफा का  
पैदै लई, मसालें और दिऊए करै आअ शस्त्र पाई तिधी। 4 तैबै प्रभू यीशू हेरी  
तियां गल्ला ज़ाणीं जुण तेऊ लै हणें आळी ती, सह तिन्नां सेटा लै आअ और  
तिन्नां लै बोलअ, “तम्हें कसा लोळै आसा लागै दै?” 5 तिन्नें तेऊ लै बोलअ,  
“हाम्हें लोळा यीशू नासरी?” यीशू मसीह बोलअ कि “हूँ आसा सह” यहूदा  
इसकरोती बी त तिधी। 6 प्रभू यीशू मसीह इहय बोलदी कि “हूँ आसा”, तियां  
फिरै पिछू और बधलुए माटे परंदै। 7 तैबै प्रभू यीशू पुछअ भी कि “तम्हें कसा  
लोळै आसा लागै दै?” 8 तिन्नें बोलअ भी तिहअ ई कि यीशू नासरी, यीशू  
मसीह तिन्नां लै उतर दैनअ कि “मंरे हेरअ तम्हां का बोली कि हूँ ई आसा  
सह”, जै तम्हें मूँह लोळै आसा लागै दै, तै इन्नां होरी दैआ नाशणै।” 9 अह हुअ  
तै कि सह बचन पुरअ होए जुण तेऊ बोलअ त कि, “जुण तंरे मुल्है दैनै दै  
आसा तिन्नां मांझें निं मंरे एक बी गुंआऊअ।” 10 शिमोन पतरसा का थी  
तलबार, तेऊ सह काढी और तेता करै माहायाजके एकी सेबका लै बाही  
और तेऊओ दैहणअ कान शोटअ धरनीं। तेऊ दासा नांअ त मलखुस।  
11 तैबै यीशू प्रभू पतरसा लै बोलअ, “आपणीं तलबार डाह काठी भितरी, जुण  
कटोरअ बाप्पू मुल्है दैनअ, सह कै मूँह झुटणअ निं आथी?” यीशू मसीह  
लाअ तेऊओ कान धरना का बापस और सह हुअ पैहलै ज़िहअ ठिक-ठाक।

### हन्ना सहानें यीशू

12 तैबै तिन्नें सपाही, सुबैदारै और यहूदिए पैदै प्रभू यीशू मसीह ढाकअ और  
राशी करै बाहअ 13 और पैहलै नियं तिन्नें सह हन्ना सेटा लै, सह थिय काईफा  
तेसा साले माहायाजको शहरअ। 14 अह त सहैई काईफा जुणीं यहूदी लै  
सलाह दैनी ती कि हाम्हां लै आसा एकी आदमीओ मरनअ जरूरी।

### पतरसो नकार करनअ

(मत्ती 26:69, 70; मरकुस 14:66-68; लूका 22:55-57)

15 शिमोन पतरस और एक होर चेलअ बी नाठै प्रभू यीशू मसीह पिछू-पिछू,  
और अह चेलअ त माहायाजके बछेणअ द और यीशू पिछू नाठअ  
माहायाजके आंगणा तैणीं, 16 पर पतरस रहअ दुआरे काछा खट्ठूई, तैबै सह  
दुजअ चेलअ त माहायाजको भेतू बछेणू, सह आअ बागा लै और दुआरपाला  
का बोली करै नियं तेऊ पतरस भितरा लै। 17 तेसा दासी जुण तिधी



दुआरपालण थी, तेसा पतरसा लै बोलअ, “तूह कै एऊ मांछूऐ चेलै मांझै आसा?” पतरसै बोलअ “नाई हूँ नि आथी।” 18 नोकर चाकर और पैदै तै तांडै दी आगी जाळी करै फेर बैठै दै नैथदै और पतरस बी लागअ तिन्नां बिचै खहळूई नैथदअ।

### माहायाजका करै यीशू का पुछ-ताछ

(मत्ती 26:59-66; मरकुस 14:55-64; लूका 22:66-71)

19 तैबै माहायाजकै प्रभू यीशू का तेऊए उपदेशा और तेऊए चलेए बारै पुछअ। 20 यीशू तिन्नां लै जबाब दैनअ कि, “मंऐ की संसारा का खूह्नी करै गल्ला, मंऐ सभा दी और आराधना घरा दी जिधी यहूदी कठा हआ, दैनै उपदेश और चोरी करै नि किछे किय। 21 तूह मूँह किलहै पुछा? तिन्नां शुळणें आळै पुछ कि मंऐ तिन्नां का कै खोजअ? तियां जाणा कि मंऐ किजै बोलअ?” 22 जांऊं यीशू मसीह इहय बोलअ ता तेऊ सेटा जुंण पैदै खहळूऐ दै थियै तिन्नां बिचा का बाही एकी यीशू लै चैंडै और बोलअ कि, “तूह माहायाजका संघे एही गल्ला करा?” 23 यीशू मसीह तेऊ लै बोलअ, “जै मंऐ बुरअ बोलअ, तेसा बुराईए दै ग्वाही, जै मंऐ भलअ बोलअ, तै तंऐ मुलहै चैंडै किलहै बाही?” 24 हन्ना भेजअ सह बाह्नि करै कार्दफा माहायाजका सेटा लै।

### पतरसो दुजी बारी नकार करनअ

(मत्ती 26:69, 70; मरकुस 14:66-68; लूका 22:58-62)

25 शिमोन पतरस त खहळूअ द नैथदअ, तेबै तिन्नां तेऊ लै बोलअ, “तूह बी आसा एऊओ चेलअ भाळी? पतरसै बोलअ, “नां-नां हूँ नि आथी।” 26 माहायाजके नोकरा चाकरा बिचै एक जुंण तेऊए टबरा बाखा थिय, जसरअ कान पतरसै काटअ त, तेऊ बोलअ, “तूह मंऐ एऊ संघे बगिन्ने दी नि भाळअ आथी?” 27 पतरसै किय भी तेऊ लै नाई और नडैऊऐ मुर्गअ बी बाशअ।

### पिलातुसे सहनै यीशू

(मत्ती 27:1,2,11-14; मरकुस 15:1-5; लूका 23:1-5)

28 और यीशू मसीह तिन्नां कार्दफा सेटा का दोती दोथी कचैहरी लै नियं। आप्पु नि तियां भितरा लै नाठै ताकि तिन्नां जुठ-प्रिठ नां लागे और फसेओ भोज खाई सके। 29 तैबै पिलातुस तिन्नां सेटा बागा लै निखळअ और बोलअ, “तम्हें एऊ मांछू लै किजी गल्लो दोष ला?” 30 तिन्नां तेऊ लै उतर दैनअ, “जै अह मांछू कूकरमीं नि हंदअ, तै नाई तै हाम्हेँ एऊ तैरे हाथे दैन्दै तै।” 31 पिलातुस तिन्नां लै बोलअ, “तम्हें करा एऊओ न्याय आप्पु आपणीं बिधिए साबै।” यहूदी तेऊ लै बोलअ, “हाम्हां लै नि अह हक आथी दैनअ द कि कसा लै मौत दैई सके।” 32 अह हुअ तै कि, यीशू मसीहे सह गल पुरी हई सके, जुंण तेऊ बोली ती कि, तेऊए मौत किहअ करै हणीं।

33 तैबै पिलातुस कचैहरी भितरा लै नाठअ और यीशू मसीह भितरा लै शादी करै पुछअ कि, “तूह यहूदियो राजअ आसा?” 34 यीशू तेऊ लै जबाब दैनअ, “अह गल तंऐ आपणीं बाखा बोली कि मेरै बारै होरी खोजी ताखा?” 35 पिलातुस उतर दैनअ, “हूँ कै यहूदी आसा? माहायाजकै और तेरी जातीए लोगे दैनअ तूह मेरै हाथे, तंऐ एतरे जोगी किजै किय?” 36 यीशू तेऊ लै उतर दैनअ, “मेरअ राज नि एऊ संसारे आथी, जै मेरअ राज एऊ संसारो हंदअ, तै झगळणै तै मेरै चेलै एता पिछू और यहूदीए हाथे नि हूँ कधी एछणअ त, पर मेरअ राज नि इधो आथी।” 37 पिलातुस यीशू लै बोलअ, “तूह बोला कि हूँ आसा राजअ, मंऐ आसा लअ द एते तैणीं जल्म, और संसारा लै आसा आअ द एते तैणीं कि सच्चाईए ग्वाही दैऊं, जुंण सच्चाईओ आसा सह शुणां मेरी गल्ला, 38 अह सच्चाई कै आसा?”

### सजाए मौते आज्ञा

(मत्ती 27:15-31; मरकुस 15:6-20; लूका 23:13-25)

और इहय बोली करै पिलातुस यहूदी सेटा लै नाठअ और तिन्नां लै बोलअ, “मुखा नि एऊ दी किछे दोष जाहदअ। 39 पर थारअ आसा अह रबाज कि हूँ सका फसह पबे धैळी तम्हां लै एकी मांछू नरदोश करी छाडी, तम्हें इहय

चाहा कि यहूदीए राजे छाडूं हूँ थारी तैणीं?” 40 तैबै तिन्नां भी झांशा तरुंगा काढी बोलअ, “एऊ नि छाडी पर जै तूह छाडणअ ई छाडणअ ता तै छाड बरअब्बा।” बरअब्बा थिय एक खुनि डाकु।

### 19

इहय करै बझैले पिलातुस सपाही का यीशू लै कोळै बाहणें। 2 और तिन्नां सपाही बणांअ गुंदी करै एक झरीलै कोडेओ मुकट लाअ तेऊए मुंडै और तेऊ का भनैऊऐ बैजणीं रांगे झिकळै, 3 तेखअ तेऊ सेटा एछी करै लागै तेऊए मजाका करदै कि हे यहूदिए राजैआ, नमस्ते, संघा लागै तेउ लै चैंडै बाहदै। 4 पिलातुस आअ तेखअ भी बागा लै और तिन्नां लै बोलअ, “भाळा, मंऐ लाअ सह तम्हां सेटा लै भी आपणीं, ताकि तम्हें जाणीं सके कि तेऊ दी नि किछे दोष आथी।” 5 तैबै तिन्नां यीशू मुंडै कोडेओ मुकुट, घेरी दी बैजणीं रांगे झिकळै बाहअ द तिधी आणअ, और पिलातुस तिन्नां लै बोलअ, भाळा, एऊ आदमी? 6 जैबै तिन्नां माहायाजकै और पैदै मसीह भाळअ ता तिन्नां झांशा करिगा काढी बोलअ कि, “एऊ छड़ाऊआ कूसा दी”, तैबै पिलातुस तिन्नां लै बोलअ कि “तम्हें ई छड़ाऊआ एऊ कूसा दी, पर मुखा नि एऊ दी किछे दोष धेछदअ।” 7 यहूदी तेऊ लै उतर दैनअ, “म्हारअ बी आसा एक बधान, तेऊ बधाने साबै आसा अह मारनै लाईक, किलहैकि अह बोला आप्पु लै परमेश्वरो पुत्र।” 8 जांऊं पिलातुस अह गल शूणीं ता सह डरअ होर बी, 9 और तेखअ नाठअ सह कचैहरी भितरा लै और यीशू का पुछअ, “तूह किधो आसा?” पर यीशू नि कोई जबाब दैनअ। 10 पिलातुस यीशू लै बोलअ, “तूह मुखा किलहै नि बोलदअ? मुखा आसा सारै अधिकार, ताह हूँ छाडी बी सका और ताह हूँ कूसा दी बी सका छड़ाऊई।” 11 यीशू तेऊ लै उतर दैनअ, “तै नि मूँह दी तेरअ किछे अधिकार हणअ त, जै तालहै उपरा का नाई भेटदअ, तैहीता जुंणीं हूँ तैरे हाथे दैनअ, तेऊओ पाप आसा खासअ।”

12 एसा गल्ला शूणीं पिलातुस चाहा त यीशू छाडणअ पर यहूदी बडअ हालअ-गोल्लअ पाई बोलअ कि जै तूह एऊ छाडे, तै समझणअ हाम्हां कि तेरअ साथ नि माहाराजै कैसरा संघे आथी, जुंण बी आपणै आप राजअ बणांअ तेऊ लागा कैसरा सहनै खहळणअ।” 13 इन्नां गल्ला शूणीं पिलातुस यीशू बागा लै काढअ जिधी चऊरअ थिय, जेता लै इबरानी बोली दी गब्तअ बोला, और न्याय आसना दी आप्पु बेठअ। 14 एसा धैळी ती फसह पबे तैरी लागी दी ईयां आसा धैळीए छऊऐ घांटे गल्ला, तबै पिलातुस यहूदी लै बोलअ, “भाळा, अहई आसा थारअ राजअ।” 15 पर तिन्नां पाअ हालअ-गोल्लअ कि “निऊ, निऊ कूसा दी छड़ाऊ एऊ।” पिलातुस तिन्नां लै बोलअ, “हूँ थारै राजै कूसा दी छड़ाऊ?” माहायाजकै बोलअ, कैसरा छाडी नि म्हारअ कोहै राजअ आथी। 16 एता बाद दैनअ पिलातुस यीशू मसीह तिन्नां हाथे कूसा दी छड़ाऊई मारना लै।

### कूसा दी छड़ाऊणअ

(मत्ती 27:32-44; मरकुस 15:21-32; लूका 23:26-43)

17 तैबै तिन्नां यीशू मसीह निंअ और यीशू मसीह आपणअ कूसा आपणीं कान्हा चकअ तेसा जैगा तैणीं, जिधा लै खोपळीए जैगा बोला, और इबरानी बोली दी बोला तै तिधा लै गुलगुतअ। 18 तिधी तिन्नां यीशू मसीह और तेऊ संघे दूई आदमी होर (जुंण डाकू तै) कूसा दी छड़ाऊऐ, एक दैहणै और एक बाऊऐ और तिन्नां बिचै छड़ाऊअ प्रभू यीशू। 19 पिलातुस एक यीशूए दोषे चिठी लिखी करै कूसा दी टोकी, तेथ थिय लिखअ द कि “यीशू मसीह यहूदियो राजअ।” 20 अह दोषे चिठी पढळी कई यहूदी, किलहैकि सह जैगा जिधी यीशू कूसा दी छड़ाऊअ, सह थी नगरी नेळ और सह चिठी थी यूनानी, लतीनी और इबरानी बोली दी लिखी दी। 21 तैबै यहूदिए कई माहायाजकै पिलातुसा सेटा नाशी करै बोलअ कि, “यहूदियो राजअ नि लिख, पर इहय लिख कि तेऊ बोलअ इहय कि हूँ आसा यहूदियो राजअ।” 22 पिलातुस उतर दैनअ, “जुंण मंऐ लिखी हेरअ, सह हेरअ मंऐ लिखी।”

23 जांऊं सपाही यीशू मसीह कूसा दी छड़ाऊई मुकै, तिन्नां किये यीशूए झिकळेए चार भाग और हर सपाही बांडणां लै कुरतअ बी ढाकअ पर कुरतअ त उपरा का तोळ तैणीं बिणा जोळै उपरा का तोळ तैणीं बूणअ द, तेता भाळी तिन्नां बोलअ कि अह नि हाम्हां धेळणअ आथी पर एते पाणीं हाम्हां परची, और जसरी परची एछे, तेऊओ हणअ अह कुरतअ। 24 तिन्नां सपाही किय



तिहअई। अह हुअ तै कि पबित्र शास्त्रे लिखी दी गल पूरी हो कि तिन्नं बांडे मेरे झिकळे और मेरे झिकळे लै पाई परची।

25 यीशू मसीहे आम्मां, तेसरी बैहण, और कळोपासे लाळी मरिअम मगदिलणीं ती तिधी कूसी सेटा खट्ळई दी। 26 जांऊं यीशू मसीह आपणीं आम्मां और आपणअ चेलअ जसा संघे यीशू झूरी करा त, तिधी खळे भाळै, यीशू आपणीं आम्मां लै बोलअ, “हे नारी, भाळ, अह आसा तेरअ शोहरु।” 27 तेखअ यीशू तेऊ चेलै लै बोलअ, “अह आसा तेरी आम्मां।” और तेऊ चेलै निई तेभी सह आपणै घरा लै।

### यीशू मौत

(मत्ती 27:45-56; मरकुस 15:33-41; लूका 23:44-59)

28 एता बाद यीशू मसीह जांऊं जाणअ कि सोभ गल्ला गई ऐबे हई, यीशू बोलअ कि “हूँ आसा नचिशअ” इहय हुअ तै कि पबित्र शास्त्रा दी लिखी दी गल्ला पूरी होए। 29 तिधी थिय एक सिरकै करै भरअ दा हांडअ, तिन्नं सिरकै दी भेरुअ द चुशू बरछे दी लाअ और सह दैनअ प्रभू यीशू खारखा। 30 यीशू मसीह सिरकअ चुशअ और बोलअ कि “पूरअ हुअ” और मुंडकी ढोळी शोटे प्राण।

### बरछे करै बिन्हणअ

31 और सह त फसह पबे तैरीओ धैळअ, तेते तैणीं यहूदी पिलातुसा का अरज की कि तिन्नं जांघा पा चोळी और तिन्नां काढा कूसा का धरनीं ताकि सबते धैळी तियां कूसी दी न रहे, किल्हैकि सबते धैळी ती बडी धैळी। 32 तैबे सपाही तिन्नां दूई डाकूरे जांघा चोळी जुंण यीशू मसीह संघे कूसी दी छडाऊए तै। 33 पर जांऊं तियां यीशू मसीह सेटा एछी करै भाळअ कि यीशू आसा गअ द मरी, तिन्नं निं प्रभू यीशू जांघा चोळी। 34 पर तिन्नां सपाही बिचे एकी बाही कुछी बरछे करै और बरछे बाहं दी निखळअ तिधा का लोहू और पाणीं। 35 जुंणीं अह भाळअ, तेऊ आसा ग्वाही दैनी दी और तेऊए ग्वाही आसा सच्ची; और सह जाणा कि सह बोला सच्चअ कि तम्हें बी करा विश्वास। 36 ईयां गल्ला हुई तै कि पबित्र शास्त्रे लिखी दी अह गल हुई पूरी कि “तेऊए निं कोहै हाडकै चोळै।” 37 शास्त्रा दी एकी होरी जैगा बी आसा लिखअ द कि, “जहा सह बिहणअ, तिन्नां बी भाळणअ तेऊए मुँहै।”

### यीशू दाबी डाहणअ

(मत्ती 27:57-61; मरकुस 15:42-47; लूका 23:50-56)

38 एता बाद अरमतिआ गराऊंए युसफ नांऊंए एकी मांळू, जुंण यीशू मसीहो चेलअ त, (पर यहूदिए डरै निं सह बोलदअ कि हूँ आसा यीशूओ चेलअ) तेऊ पिलातुसा का अरज की कि यीशूए लाहस दे मुँह निंगै। और पिलातुसे तेऊलै जाजत दैनी, और तेऊ निं यीशूए लाहस। 39 निकुदिमस जुंण यीशू सेटा लै पैहलै राची आअ त, तेऊ आणअ पजाह सेर खुशबूदार गंधरस यीशूए लाहसा दी मळणा लै। 40 तैबे तिन्नं यीशूए लाहस चकी और यहूदिए दाबणें रिति रबाजे साबै खुशबूदार गंधरस मळी करै मरगे कापळै दी पळेटअ। 41 और तेसा जैगा जिधी यीशू कूसी दी मारअ त, तिधी त एक बाग और तेऊ बागा दी ती एक न्ऊंई कब्र (मरी करै दाबणे जुहळ), जेथ कोहै बी निं दाबअ त 42 यहूदिए फसह पबे तैरीए धैळी हणें कारण डाही तिन्नं यीशूए लाहस तेसा कब्रा दी किल्हैकि सह ती सोभी का नेळ।

### खाली कब्र

(मत्ती 28:1-8; मरकुस 16:1-8; लूका 24:1-12)

20 हबते पैहली धैळी मरिअम मगदिलणीं दोती-दोथी धुमधुमे न्हैरै नाठी कब्रा सेटा और कब्रे मुंहाणें दी लाअ द पाथर भाळअ बदळअ द। 2 एता भाळी सह तुहरी पतरसा और तेऊ दुजै चेलै सेटा लै, जसरी यीशू झूरी लागा ती, और तिन्नां सेटा एछी करै बोलअ, “तिन्नं नियं प्रभू कब्रा का काढी और हाम्हां का नि थोघे कि ऐबे किधि आसा सह डाह द?” 3 तैबे पतरस और सह दुजअ चेलअ तुहरे कब्रा सेटा लै, 4 और तियां तै दुहै संघा-संघा तुहरद लैगै द पर सह दुजअ चेलअ निखळअ आजू और कब्रा दी पुजअ पैहलै,

5 और तेऊ भाळै लाहसे झिकळे दूरा का झुकी करै और सह निं भितरा लै नाठअ। 6 तैबे शिमोन पतरस तेऊ पिछू-पिछू पुजअ और कब्रा भितरा लै नाशी करै भाळै कि तिधी आसा सिधै झिकळे। 7 और जुंण शाटअ तेऊए मुंडे पळेटअ द थिय, सबी थिय सह निं तिधी थीइ, पर सह थिय दुजी जैगा जुदअ जिहअ चफळी डाहअ द। 8 तैबे सह दुजअ चेलअ बी आअ कब्रा भितरा लै जुंण पैहलै पुजअ त, इहय भाळी तेऊ बी हुअ भरोसअ। 9 तियां निं मैची तैणीं पबित्र शास्त्रे एसा गल्ला समझै कि “तेऊ हणअ त मरी करै जिऊंदै।” 10 एता बाद नाठै ईयां चेलै घरा लै फिरी।

### मरीअम मगदीलणीं लै प्रगत हणअ

(मत्ती 28:9-10; मरकुस 16:9-11)

11 पर मरिअम रही कब्रा बागै खट्ळई लेरदी लागी, और लेरदी-लेरदी लागी कब्रा भितरी भाळी, 12 तेसा का भाळै शेतै चमकदै झिकळे बाहें दै दुई स्बर्गदत जिधी यीशू मसीहे लाहस ती डाही दी, एक शरैहणें और एक पैरा सेटा बैठे दै। 13 तिन्नं तेसा लै बोलअ, “हे नारी, तूह किल्है आसा लागी दी लेरदी? तेसा तिन्नां लै बोलअ, “तिन्नं नियं मेरअ प्रभू ईंधा का चकी, ऐबे मुखा निं थोघे कि तिन्नं सह किधि आसा डाहअ द?” 14 इहय बोली करै जांऊं तेसा पिछू नजर मारी ता पिछू थिय यीशू खट्ळूअ द, पर तेसा निं बछैणीं कि अह आसा प्रभू यीशू। 15 प्रभू यीशू तेसा लै बोलअ, “हे नारी, तूह किल्है आसा लागी दी लेरदी? तूह कसा लोळी आसा लागी दी?” तेसा माली समझी करै तेऊ का बोलअ, “हे माहाराज, जै तंए सह ईंधा का चकअ, ता तै खोज मुखा कि तंए किधि आसा सह डाहअ द।” 16 यीशू तेसा लै बोलअ, “मरिअम” तेसा भाळअ पिछू और इबरानी दी बोलअ, “रबूनी”, अर्थात गुरु। 17 यीशू तेसा लै बोलअ, “मुँह निं छूणें आथी, हूँ नि मैची बापू सेटा लै उझै नाठअ, पर मेरे तिन्नां भाई सेटा लै नाश और तिन्नां का बोलै कि “हूँ चालअ आपणै बापू और थारै परमेश्वरा सेटा लै उझै नाशी।” 18 मरिअम मनगदिलणीं खोजी ईयां सारी गल्ला चेलै का कि “मरे भाळअ प्रभू यीशू और तेऊ की मुँह संघे ईयां गल्ला-बाता।”

### चेलै लै प्रगत हणअ

(मत्ती 28:16-20; मरकुस 16:14-18; लूका 24:36-49)

19 तेसाई धैळी जुंण हबतेओ पैहलअ धैळअ थिय, सान्हा जिहअ यीशू मसीह खट्ळूअ भितरा बाखा दुआरै जिधी चेलै तै, यहूदिए डरै तै तियां दुआर बंद करी करै भितरी बैठे दै। प्रभू यीशू मसीह तिन्नां सेटा खट्ळूई करै तिन्नां लै बोलअ, “तम्हां सोभी लै शांती होए।” 20 इहय बोली करै तेऊ आपणीं कुछ और आपणै हाथ तेऊ चेलै बाखा करी करै रहैऊरे, तैबे तियां चेलै प्रभू यीशू भाळी हुए बडै भारी खुश। 21 प्रभू यीशू तिन्नां लै बोलअ, “तम्हां सोभी लै शांती होए और जिहअ हूँ बापू भेजअ, तिहअई भेजा हूँ ऐबे तम्हां।” 22 इहय बोली करै तेऊ तिन्नां लै एक फूक मारी और बोलअ, “हूँ जैगा, पबित्र आत्मा।” 23 “जसरै पाप तम्हें माफ करे, तियां हणें माफ हेरै दै करी, और जसरै पाप तम्हें डाहे, तियां रहणै।”

### थोमा लै प्रगत हणअ

24 पर तिन्नां बाराह चेलै बिचा का एक चेलअ जसा नांअ थोमा दिमुस आसा, जेभै यीशू आअ ता तेभै निं सह तिन्नां संघे थिय, 25 जाऊ होरी चेलै तेऊ का खोजअ कि हाम्हें भाळअ प्रभू यीशू, पर तेऊ निं विश्वास हुअ, और तेऊ बोलअ कि, “जांऊं तैणीं हूँ तेऊए हाथे किला करै पळे दै खाड निं भाळूँ, और तिन्नां खाडा दी आपणीं गुंठी निं पाई लऊं, तेभै तैणीं निं हूँ विश्वास करदअ।”

26 तेता का आठा धैळै बाद तै भी चेलै घरा भितरी दुआर बंद करी करै बैठे दै और थोमा बी त तिन्नां संघे, तैबे यीशू मसीह तिन्नां बिचै एछी खट्ळूअ और बोलअ कि “तम्हां लै शांती होए।” 27 तैबे यीशू मसीह थोमा लै बोलअ, “आपणीं गुंठी पा मेरी नथई दी, और बैहम निं करै पर विश्वास कर कि हूँ आसा जिऊंदअ।” 28 इहय शुर्णी थोमा उतर दैनअ, “हे प्रभू, मेरे परमेश्वर”,

29 यीशू तेऊ लै बोलअ, “तंएँ ता किय मूँह दी भाळी हेरी करै विश्वास पर धन्य तिन्नां लै, जुंणीं मूँह बिणा भाळै हेरै विश्वास किय।”

### एसा कताबो उदेश्य

30 प्रभू यीशू मसीह रहेऊए आपणै चेलै का होर बी कई चिन्ह जुंण एसा कताबा दी निं आथी लिखे दै। 31 पर ईयां गल्ला लिखी तै कि तम्हें विश्वास करी सके कि यीशूई आसा परमेश्वरो “पुत्र” “मसीह” और तेऊ दी विश्वास करी करै भेटणीं तम्हां जिंदगी।

### तिबरियस दरैऊए कनारै चेलै लै प्रगट हणअ

21 इन्नां गल्ला हणै का बाद यीशू मसीह तिबरियस दरैऊए कनारै हुअ यीशू मसीह आपणै चेलै सेटा प्रगट, और इहय करै हुअ प्रगट कि, 2 शिमोन पतरस और थोमा जसा लै दिदिमस बोला, और गलीले काना नगरी का तै होर बी, नतनेल और जबदीओ शोहरु और यीशूए चेलै बिचा का बी तै दुई होर चेलै तिधी कठा हुए दै। 3 शिमोन पतरस बोलअ तिन्नां लै कि तम्हें बेशा और हूँ आणुं तम्हां लै माहछली ढाकी। पर तिन्नें बोलअ कि हाम्हेँ बी चालै ताहा संघै। और तियां सोभ जहँ किशती दी बेटै पर सारी राची निं तिन्नां किछ भेटअ।

4 जाऊं राच प्रैशुई, ता प्रभू यीशू खहळूअ दरैऊए कनारै पर तिन्नें नि तजीबी सह बछैणअ कि अह आसा प्रभू यीशू। 5 तेखअ यीशू मसीह तिन्नां लै बोलअ, “लाहँओ, तम्हां का किजै खाणा लै बी आसा?” तिन्नें बोलअ, “किछ निं आथी।” 6 तैबै यीशू मसीह तिन्नां लै बोलअ, “नौए दैहणीं बाखा शोटा जाळ तेथ भेटणीं तम्हां माहछली”, तैबै तिन्नें तिहअई किय। कै हुअ कि तेऊ जाळा दी शाची एतरी माहछली कि जाळ निसअ तिन्नें पाणीं का उझै खिंचुई। 7 इहय करै तेऊ चेलै जहा लै यीशू झूरी करा त, तेऊ पतरसा लै बोलअ, अह ता म्हारअ प्रभू आसा, शिमोन पतरस जाऊ इहय शुणअ कि प्रभू आसा, तेऊ आपणीं कुछी गाचू बाह्वअ किहँकि सह त नांगअ, और तेऊ दैनी दरैऊए छाहळ और सह आअ तैरी करै, 8 पर बाकी चेलै किशती दी बेशी माहछली करै भरै जाळा खिंचदी आए, कनारै का निं तियां कोई दुई शौ हाथा का जादै दूर थियै।

9 जाऊं तियां कनारै पुजै, ता तिन्नें कै भाळअ कि तिधी आसा कोईलेए आग और तेथ परेंदैं आसा माहछली डाही दी। 10 यीशू तिन्नां लै बोलअ, “जुंण माहछली तम्हें एभै ढाकी, तेता बिचा का दैआ, 11 शिमोन पतरस किशती दी उखळअ और बडी-बडी माहछली करै भरुअ टिरा बहँदअ जाळ खींचअ कनारै लै, तेथ साबा का खासी माहछली हई करै बी निं सह जाळ धेळूअ। 12 यीशू तिन्नां लै बोलअ, “एछा, रोटी खा”, पर चेलै बिचै निं कोही इहय पुछणें हिम्मत हुई कि तूह कुंण आसा? 13 यीशू आअ और रोटी और माहछली दैनी तिन्नां लै खाणां लै। 14 अह थिय चिउथी बारी कि यीशू मसीह मरनै का बाद जिऊंदै हई करै दैने चेलै लै दरशण।

### यीशू और पतरस

15 रोटी खाणें का बाद प्रभू यीशू शिमोन पतरसा का बोलअ, “हे शिमोन, यहून्ने शोहरुआ, तूह कै इन्नां का जादी झूरी डाहा मूँह संघे?” पतरस बोलअ, “हां प्रभू, तूह ता एसा गल्ला आपणै जाणां कि हूँ ताह संघे केतरी झूरी डाहा।” यीशू तेऊ लै बोलअ, “मेरै मिम्मू छेलू चराऊ।” 16 यीशू मसीह पतरसा लै दुजी बारी भी पुछअ कि, “हे शिमोन यहून्ने शोहरुआ, तूह मूँह संघे बेघै झूरी डाहा? तेऊ उतर दैनअ, “हां प्रभू, तूह जाणा आपणै कि हूँ डाहा झूरी तालहै।” यीशू तेऊ लै बोलअ, “मेरी भेडे रखुआळी कर।” 17 चिउथी बारी तेऊ भी पतरसा लै बोलअ, “हे शिमोन यहून्ने शोहरुआ, तूह मूँह संघे बेघै झूरी डाहा? पतरस हुअ बडअ दुखी कि तेऊ बोलअ चिउथी बारी, कि तूह मूँह संघे झूरी करा? तैबै तेऊ बोलअ, “हे प्रभू, “तूह जाणा सोभै गल्ला, ताखा आसा पतअ कि हूँ ता संघे केतरी झूरी करा, तैबै यीशू तेऊ लै बोलअ, “मेरी भेडा चराऊ।” 18 और यीशू तेऊ लै बोलअ, “हूँ खोजा ताखा सच्चाई कि जेभै तूह जुआन थिय, तेभै बाह्व त तूह आपणअ नाळअ आपणै और तूह जिधी चाहा त तिधा लै नाशा त घुंमदअ फिरदअ, पर जाऊं बुढळअ हणअ तेभै करनै ताह आपणै हाथ लाम्मँ और तेरअ नाळअ बाह्वणअ होरी, और जिधा लै तूह नाई बी चाहंदअ तिधा लै निणअ तूह तिन्नां।” 19 इन्नां गल्ला बोली खोजअ तेऊ इहय कि पतरसा केही मौता मरी करै परमेश्वर महिमा करनी, और इहय बोली करै तेऊ लै बोलअ, “मूँह पिछू एछ”।

### यीशू और तेऊओ प्यारअ चेलअ

20 पतरस भाळअ पिछू सह चेलअ एछदअ जहा संघे यीशू मसीह झूरी डाहा त, जुंणीं प्रभू यीशू का रोटी खांदी बारी झुकी करै इहय पुछअ त कि ताह ढाकणै बझैळदअ कुण आसा? 21 तेऊ भाळी पतरस यीशू लै बोलअ, प्रभू, “एउओ कै हाल हणअ?” 22 यीशू मसीह तेऊ लै बोलअ, “जै हूँ इहय चाहूँ कि मूँह एछणै तैणीं सह न्हैळअ रहे लागी, एते ताहा कै पळी? 23 इहय करै फैली तिन्नां बिचै अह गल कि यीशूओ सह चेलअ निं मरनअ आथी। तजीबी यीशू मसीह निं इहय बोली थिय कि सह निं मरनअ आथी, पर तेऊ बोलअ त इहय कि जै हूँ चाहूँ कि मूँह एछणै तैणीं सह न्हैळअ रहे लागी, एते ताहा कै पळी?

### नचोळ

24 अह आसा सहई चेलअ जुंण इन्नां गले ग्वाही दैआ और जुंणीं ईयां गल्ला लिखी दी आसा, और हाम्हेँ जाणा कि तेऊए ग्वाही आसा सच्ची।

25 होर बी आसा बडैभारी काम जुंण यीशू मसीह किए, जै तियां एक, एक करी करै सोभ लिखै हंदै, ता हूँ समझा इहय कि तेते हणीं ती एतरी कताबा कि पूरै संसारै बी निं चाली ती अक्की॥

# प्रेरित

## भूमिका

प्रेरिते काम कताबा आसा लूका लिखै दै सुसमाचारा का आजूए गल्लो वर्णण। एतो खास मकसद आसा इहय खोजणअ कि यीशूए शुरुआती विश्वास करनै आळै चेलै पवित्रात्मं साबै हांढदी यीशूए बारै सुसमाचार “यरुशलेम, सारै यहूदिया, सामरिया और पृथुईए कूणें तैणीं” (1:8) किहय करै फणांऊंअ। अह आसा मसीही आन्दोलनो विवरण जेते शुरुआत हूई यहूदी लोगो बिचै और बढदी-बढदी बणअ पूरै संसारे लोगो विश्वास। लिखणें आळअ डाहा एसा गल्लो बी धैन कि एसा कताबा पढळणें आळै इहय बी निहचअ होए कि मसीही लोग नाई तै रोमी राजा विद्रोही राजनितिक शक्ति आथी, और मसीही विश्वास थिय यहूदी धर्मा पूरै करनै आळअ।

प्रेरिते काम कताबा सका चीई बाखा बांडी, जुण एसा चिजा लागतार बढदै रहैऊआ जेथ यीशू मसीहे सुसमाचारो प्रचार हुअ और कलिसीया स्थापना हूई : 1) यीशूए स्वर्गें नाशणें का बाद यरुशलेमें मसीही आंदोलने शुरुआत; 2) पलीस्तीने होरी हिस्से दी एतो प्रसार; 3) भूमध्यसागरे देशै एतो प्रसार। प्रेरिते कामें एक खास महत्वपूर्ण गल्ल आस अह कि पवित्रात्मं क्रियाशीलता। सह होथा पिन्तेकुस्ते धैळी यरुशलेमें कठा हूए दै विश्वासी परेंदें बडी शगती संघे, और एसा कताबा दी खोजी घटणें बगती किय कलिसीया और अगुएओ मार्गदर्शन और तिन्ना लै सामर्थ बी दैआ। प्रेरिते कामां दी दैनें दै कई उपदेशा दी आसा शुरुआती मसीही संदेशो सार पेश किय द और एथ दी खोजी दी घटणां करा विश्वासीए जिन्दगी दी और कलिसिये भूमिका दी एऊ संदेशो सामर्था प्रगट।

### रूप-रेखा

ग्वाही दैणा लै त्यारी 1:1-26

(क) यीशूए आखरी आज्ञा और प्रतिज्ञा 1:1-14

(ख) यहूदो जैगा दूजअ चेलअ 1:15-26

यरुशलेमें ग्वाही 2:1-8:3

यहूदिया और सामरिया दी ग्वाही 8:4-12:25

पौलुसे सेऊआ काम 13:1-28:3

(क) पैहली प्रचार-यात्रा 13:1-14:28

(ख) यरुशलेमें सम्मेलन 15:1-35

(ग) दुजी प्रचार-यात्रा 15:36-18:22

(घ) चिऊथी प्रचार-यात्रा 18:23-21:16

(ड) यरुशलेम, कैसरीया और रोम कैद पौलुस 21:17-28:31

## भेत-बड्डेण

1 हे थियुफिलुस, मंणें लिखी ती तालहै पैहली कताब तिन्नां गले बारै, जुण प्रभू यीशू शुरु दी किय और करदअ और सखाऊंदअ रहअ। 2 तेसा धैळी तैणीं, जसा धैळी तियां प्रेरित (चेलै) जुण तेऊ चुनै तै, सह तिन्नं सद्धानै पबित्र आत्मां करै आज्ञा दैई उझै नाई चकअ। 3 प्रभू यीशू दुख भोगणें का बाद बड्डै पाकै सबूता संघे आपणें आप जिऊंदअ रहैऊअ; और चाहळी धैळै तैणीं रहअ सह तिन्नां संघे और परमेश्वरे राईसीए गल्ला करदअ लागी। 4 और तिन्नां सेटा मिली करै दैनी तिन्नां लै आज्ञा कि येरुशलेमा निं छाडी, पर बाप्पूए तेसा प्रतिज्ञा पूरी हणें तैणीं रहै न्हैळै लागी, जसराँ बारै तम्हां का मंणें खोजअ द आसा। 5 किल्लहैकि यहूना ता दैनअ पाणीं करै बपतिस्मअ; पर थोळै धैळै बाद हणअ थारअ बपतिस्मअ पबित्र आत्मां करै।

## यीशूओ स्वर्गारोहण

6 ता तिन्नं सोभी कठा हूई करै प्रभू का पुछअ कि “हे प्रभू, ताह कै इस्त्राएला लै एभी दैणअ राज फरेऊई? 7 प्रभू तिन्नां लै बोलअ, “ तिन्नां ऋतु और बगता जाणनैओ काम निं थारअ आथी जेतो अधिकार पिता परमेश्वरै आप्पू का आसा डाअ द। 8 पर जेभै पबित्र आत्मां तम्हां दी एछे, तेभै भेटणीं तम्हां सामर्थ; और येरुशलेम और सारै यहूदिया और सामरिया दी और धरतिए कूणें तैणीं हणें तम्हें मेरै गुआह। 9 इहय बोली करै प्रभू तिन्नं हेरदी-हेरदी चकअ उझै और बादळै चोरअ सह तिन्नं आच्छी का दूर। 10 प्रभू नाशदी बारी

तै तियां सोभ लागै दै सरगा बाखा लै भाळै, और दूई दूत शेतै झिकळै बाह्वै दै तिन्नां सेटा लै आए और खटळूए। 11 तिन्नं दूतै तिन्नां लै बोलअ, “हे गलीली माहुँओ, तम्हें इधी खटळुई करै किल्लहै आसा लागै दै सरगा बाखा लै भाळै? अहैई यीशू जुण तम्हां सेटा का स्वर्गा लै चकअ, जिहअ करै तम्हें अह स्वर्गा लै नाशदअ भाळअ, तिहअई एछणअ अह बापस।”

## यहूदा इसकरोतीए जैगा मतियाह लै पदवी भेटणीं

12 तैबै तियां जैतून नांऊंएँ धारा का जुण येरुशेमा नेळ एकी सबते धैळी दूर थी, तिधा का फिरै बापस तियां येरुशलेमा लै। 13 और जांऊं तियां येरुशलेमै पुजै और तियां रहै तिधी घरे परेंधळी मजला एकी टाहळै। तिधी तै पतरस, यहूना, याकुब, आंदरिआस, फिलिप्पुस, थोमा, बरतुलमै, मत्ती, हलफुईओ शोहरू याकुब, शिमोन जेलोतेस और याकुबो शोहरू यहूदा। 14 इयां सोभै तै कई बेटळी और प्रभू यीशूए आम्मां मरिअम और तेऊए भाई संघा एक मन हूई करै प्राथणां करदै लागै दै।

15 और तिन्नाई धैळै पतरस तिन्नां सोभी भाई बिचै जुण कोई एक शौ बिह जळै तै, खळअ उझुई करै बोलदअ लागअ, 16 “हे भाईयो, अह थिय जरूरी कि पबित्र शास्त्रा दी लिखअ द पूरअ होए, जुण पबित्र आत्मां दाऊदे मुँहा का पैहलै ई यहूदे बारै जुण प्रभू यीशू पकळाऊणें आळै मांझै मुखिय थिय, बोली। 17 किल्लहैकि सह ता गिणअ हाम्हां बिचै, और सेबकाई लै बी हुअ साझू। 18 तेऊ अधर्म कामां करै एक खेच मोलै लअ; और तेऊए हुअ उटअ मूड और खळी जांघा और तेऊओ पेट फुटअ, और सारी आंजा निखळी बागै।

19 और एसा गल्लो थोघ लागअ येरुशलमेमें रहणें आळें सोभी लोगा का, इधी तैणीं कि तेऊ खेचा लें बोला तिन्नै बोली दी "हकळदमअ" अर्थात खुर्नी खेच। 20 किल्हैकि भजन सहिता दी आसा लिखअ द कि 'तेऊए घर लोळी जुआळुअ, और तेथ निं लोळी कोहै बसअ,' तेऊए पदबी लोळी कसा होरी भेटी। 21 तै, जेतरें धैळें प्रभू यीशू हाम्हां संघे एछदअ-नाशदअ रह, अर्थात, यूहन्नै बपतिस्मा देणें ओही प्रभूए स्वर्णें नाशणें तैणीं जुंण लोग हर बगत हाम्हां संघे रहै, 22 सहैई गल आसा अह कि तिन्नाई बिचा का एक आदमीं हाम्हां संघे प्रभूए जिऊंदै हणेंओ गुआह होए। 23 तैबे तिन्नै दूई जळें खळै कीयै, एक युसुफ; जसा लें बरसबा बोला और तेऊओ पळणांआ आसा युसतुस और दुजअ किय खळअ मतिंयाह। 24 तेखअ तिन्नै सोभी एही प्राथणां की कि हे प्रभू तूह जुंण सोभीए मना जाणां, एसा गल्ला कर प्रगट कि इन्नां दूई मांझै तंणें कुण आसा चुनअ द, 25 कि सह एसा सेबकाई और प्रेरिताईओ पद लई सके; जसा यहूदा छडी करै आपणीं जैगा लें नाठअ। 26 तेबे तिन्नै सोभी तिन्नां दूहीए नाऊंणें परची पाई और परची निखळी मतिंयाहे नाऊंणें, और सह गिळुअ तेखअ तिन्नां गैरा चेलै संघे बाहरूअ चेलअ।

### पवित्र आत्मों एछणअ

2 जाऊं पितेकुस्ते धैळी आई, ता तियां सोभ तै हुऐ दै एकी जैगा कठा। 2 और हेरा हेरी सरगा का एक दिशा बागरी जेही छेळ हुई और जेरू घरै तियां बेठै दै थीयै, सारअ घरअ बहजेरूअ। 3 और तिन्नां का धेछुई आगी जेही जिभा फुटदी और तियां जिभा आई तिन्नां हरेकी परंदै। 4 और तियां सोभ भरुऐ पवित्र आत्मों करै, और जेही सामर्थ तिन्नां लें आत्मों बोळणें दैनीं, तिहैई लागै तियां होरी-होरी बोली बोलदै।

5 और सरगा हेठै हर जाती का रहा तै भगत यहूदिए येरुशलमेमा दी। 6 जाऊं सह बडी छेळ हुई ता ओरी-पोरी का आएँ बडै भारी लोग और तिधी हूई बडी भीड कठा और लोग हैछुऐ, किल्हैकि तिन्नां शुंक्षिया त हरेकी का इहय कि ईयां आसा लागै दै म्हारी ई बोली दी गल्ला करदै। 7 और तियां हुऐ रहैन-परशैन और तियां लागै बोलदै कि हेरा, ईयां जुंण बोलदै आसा लागै दै, ईयां गलीली निं आथी? 8 तै किल्है लागी हाम्हां मांझै हरेकी का आपणीं जल्म भूमिए बोली शुंक्षुदी। 9 हाम्हें जुंण पारथी, मेदी, एलामी, मेसोपुटामियां, हिंदूस्तानी, यहूदिया, कम्पदुकिआ, पुंतुस, आसिआ, 10 फ्रूगिआ, पंफुलिआ, मिसर, लिबुआ देशा का जुंण कुरेना नेळ आसा, इन्नां सोभी देशे रहणें आळें और रोमीं प्रवासी, और कै यहूदी और कै यहूदी धर्म मनणें आळें, क्रेती और अरबी बी आसा। 11 पर आपणीं-आपणीं भाषा बोली दी आसा लागै दै इन्नां का परमेश्वरे बडै-बडै कामें चरचा शुणदै। 12 और तियां सोभ हुऐ रहैन और हैछुई करै लागै एकी दुजै का बोलदै कि "अह किजै लागअ दा हंदअ" 13 पर कई किय ठठअ मजाक कि इन्नां आसा शराब लागी दी।

### पतरसो भाषण

14 तैबे पतरस तिन्नां गैरा चेलै संघे खळअ उझुअ और ज़ोरै-ज़ोरै लागअ बोलदअ कि "हे यहूदियो, और येरुशलमेमा नगरी रहणेंआळेंओ, एसा गल्ला लूआ समझी और कान लाई शुणां मेरी गल्ला। 15 जिहअ तम्हें सोचा की ईयां आसा नशै दी, ईयां निं नशै दी आथी किल्हैकि एभै ता मैची सुरज निखळअ, 16 पर अह गल आसा सह जुंण योएल नबी बोली दी,

17 कि परमेश्वर बोला इहय कि अंते धैळी हणअ इहय कि, मूँह पाणीं आपणीं आत्मों माळुं दी और थारी शोहरी और शोहरू करनी भबिशयाबाणीं और थारै जुआना और बुजुर्गा भाळणें सुपनै।

18 तिन्नां धैळै पाणीं मूँ आपणें दास और दासी लें बी पवित्र आत्मों और तिन्नां बी करनीं भबिशयाबाणीं।

19 और उझै सरगै करनै मूँह अदभुत काम और ऊंधै धरती दी करनै चिन्ह, अर्थात मूँह रहैऊणें लोहू, आग और धूँएँ बादळ।

20 प्रभूए महान और सिध धैळै एछणें का पैहलै हणअ सुरज न्हैरअ और जोथ हणीं खुना जेही।

21 और जुंण कोई बी प्रभूओ नांअ लए, तेऊ भेटणअ उद्धार।

22 हे इस्त्राएलियो, इन्नां गल्ला शुणा कि नासरी त एक माळुं जसरअ परमेश्वर का हणेंए प्रमाण आसा सामर्थे काम और नोखै काम और चिन्हां करे प्रगट; जुंण परमेश्वरै तम्हां बिचै करी तेऊ करै रहैऊए; जुंण तम्हें आप्पै भाळै। 23 सहैई जाऊं परमेश्वरे इछा और होनहार जानें साबै ढाकअ और तम्हें अधर्मिए हाथै कूसा दी लटकाऊई करै मारअ। 24 पर सहैई छडेऊअ परमेश्वरै मौते शांघळी लोहै का और सह किय जिऊंदअ; किल्हैकि अह गल ती अनहोणीं कि सह मौते बशै रहंदअ। 25 किल्हैकि दाऊद लिखा तेऊए बारै इहय कि,

हूँ रहअ हमेशा प्रभू आपणें सहनै भाळअ लागी, किल्हैकि सह आसा मेरी दैहणीं बाखा ताकि हूँ फिशळू नाई।

26 एता करै भरुअ मेरअ मन आनंदा दी और मेरी जिभ हुई मगन और मेरअ शरीर बी रहणअ आशा दी बसी।

27 किल्हैकि ताह निं मेरै प्राण अधोलोका दी छाडणें, और ना ता आपणें पबित्र जना शळणें दैणअ।

28 तंणें खोजअ मुखा जिदगीओ रसतअ, और ताह भरनअ हूँ आपणें दर्शणा करै खुशी दी।

29 हे भाईयो, हूँ सका तेऊ कुलपति दाऊदे बारै शाह डाही करै बोली कि सह ता नाठाअ मरी और तेऊए क्रिआ करम बी हुऐ और तेऊए कब्र आसा आज्ञा तैणीं बी हाम्हां सेटा पळी दी। 30 सह त भबिशयाबगता और तेऊ का त थोघ कि परमेश्वरै दैनें दा तेऊ लें कऊलें बचन कि मूँह बशैळणअ तेरी ई खानदानी का एक आदमीं तेरै सिंहासणा दी। 31 तेऊ हेरअ त सह होनहार पैहलैई का भाळी और मसीहे जिऊंदै हणें बारै की भबिशयाबाणीं कि नां ता तेऊओ प्राण अधोलोकै छाडअ और ना तेऊए देह शळी। 32 अहैई यीशू किय परमेश्वरै जिऊंदअ जसरै हाम्हें सोभ गुआह आसा। 33 इहय करै परमेश्वरै दैहणें हाथा का सोभी का बडअ पद पाई करै, और पिता का सह पबित्र आत्मों पाई करै जसरी प्रतिज्ञा की ती, सह तरैळी तेऊ हाम्हां दी जुंण तम्हें भाळा और शुणां। 34 किल्हैकि दाऊद ता निं स्वर्णें उखळअ; पर आप्पै बोला सह इहय कि प्रभू बोलअ मेरे प्रभू का इहय कि

35 "मेरै दैहणें बेश, जेभै तैणीं कि हूँ तेरै बैरी तेरे पैरा हेठे चूकी निं बणाऊं"। 36 इसराइलो सारअ घरानअ लए ऐबै एसा गल्ला समझी कि जुंण यीशू तम्हें कूसा दी मारअ, सह बणांअ परमेश्वरै प्रभू बी और मसीह बी।

37 तैबे शुळणें आळे दिल छेदुऐ और तियां पतरस और होरी प्रेरिता का पुछदै लागै कि हे भाईयो, ऐबै तै हाम्हें किजै करमै? 38 पतरसै तिन्नां लें बोलअ, आपणें मन बदळा और तम्हां मांझै हरेक आपणें-आपणें पाप माफी लें प्रभू यीशूए नाऊंआ दी लूआ बपतिस्मअ, तै भेटणअ तम्हां पबित्र आत्मों दान। 39 किल्हैकि अह प्रतिज्ञा आसा तम्हां लें, थारी आदा लुआदा लें और तिन्नां सोभी दूर-दूर रहणें आळें लोगा लें बी आसा जसा प्रभू म्हारअ परमेश्वर पिता आप्पू सेटा लें शादे। 40 तेऊ होरी गल्ला दी बी ग्वाही दैई करै समझाऊए कि आपणें आप रहै टेढी ज़ाती का बची। 41 और जुंण तेऊओ बचन ग्रहण किय, तिन्नै लूअ बपतिस्मअ और तेसाई धैळी मिले लगभग चून हज़ार लोग तिन्नां संघे। 42 तेखअ तियां सोभ लागै प्रेरिता का शिक्षा लंदै, संगती, प्रभू भोजा करदै और प्राथणां दी रहै लौलीन।

### विश्वासीए संगत

43 ता सोभी लोगा दी पळी ड़अर, और बडै भारी अदभुत काम और चिन्ह हूआ तै प्रेरिता करै प्रगट, 44 और तियां सोभ विश्वास करनै आळें रहा तै कठा, और तिन्नै सोभ चिजा बी हूआ ती कठा। 45 और तियां आपणीं-आपणीं सम्पती और समान बेची-बेची करै जेही जसरी ज़रूरत हूआ ती तेही करा तै बांडी। 46 और हर धैलै हूआ तै तियां मांदरै कठा और घरै-घरै प्रभू भोजा करदी आनंद और भलै मनै खा तै रोटी। 47 ता तियां सोभ करा तै परमेश्वरै स्तुती और सोभ लोग तै तिन्नां करै खुश और जसरअ उद्धार हूआ त, तिन्नां मलाऊआ त हर धैळै प्रभू तिन्नां संघे।

### लैंगळअ भिखारी ठीक करनअ

3 पतरस और यहूना चिऊथे पहरै प्राथणां करने बगती तै लागै दै मांदरा लै नाशदें। 2 और लोग तै लागै दै एकी जल्मा ओहीए लैंगळे चकी आणदें। तेऊ डाहा तै तियां धैळ मांदरे तेसा प्रऊळी आजू; जसा लै सुंदर प्रऊळ बोला तै; तिधी बशैळी कि सह एछदें नाशदें लोगा का भीख मांगे। 3 जांऊं तेऊ लैंगळे पतरस और यहूना मांदरा लै नाशदें भाळें, और तिन्नां का लागअ भिखा मांगदअ। 4 पतरसै यहूना संघे तेऊ लैंगळे बाखा धैना संघे भाळी करै बोलअ, “हाम्हां बाखा लै भाळ”, 5 और सह लागअ एसा आशा तिन्नां बाखा लै टकटकी करै भाळअ कि इनै लाअ मुल्है किजै दैई। 6 तैबै पतरसै बोलअ कि “सुन्नअ चन्दी ता नि मुखा आथी; पर जुण मुखा आसा, सह लाअ मंरें ताल्है दैई: “प्रभू यीशू मसीह नासरीए नांऊंरें हांड-फिर।” 7 और पतरसै तेऊओ दैहणअ हाथ ढाकअ और सह झैऊअ खळअ और नढैऊए तेऊए जाहूँ और पैरा दी आअ बल और 8 सह हुअ छाहळ दैई खळअ और सह लागअ हांडदअ-फिरदअ और सह लागअ छाहळ दैदअ और तुहरदअ और परमेश्वरे स्तुति करदअ और तिन्नां संघे नाठअ मांदरा भितरा लै। 9 तैबै होरी लोगे सह हांडदअ फिरदअ भाळी करै और परमेश्वरे स्तुति भाळी 10 सह बछैणअ कि अह आसा सहैई जुण मांदरे सुंदर प्रऊळी आजू बेठी करै भीख मांगा त; और तेऊ चमतकारा भाळी जुण तेऊ लैंगळे लै हुअ; सोभ हुए रहैन।

### मांदरै पतरसो उपदेश

11 मांदरै जांऊं सह लैंगळअ; पतरस और यहूना का ढाखुअ द त, ता सोभ लोग आए तिधी सुलैमाने ओसरें सेटा जसा लै सुलैमानो बोला तै; तिन्नां सेटा लै आए सोभ तुहरी करै। 12 इहय भाळी करै पतरसै तिन्नां लोगा लै बोलअ, “हे इस्त्राएलीओ, तम्हें किल्है हूआ एऊ आदमी भाळी रहैन? और हाम्हां बाखा लै किल्है आसा लागै दै इहय करै भाळें कि जिहअ हाम्हेंई किय अह आपणीं शगती और भगती करै हांडदअ फिरदअ? 13 “अब्राहम, इसहाक और याकुबो परमेश्वर, म्हारै बाब दादे परमेश्वरै की आपणें सेबक यीशूए महिमा, जुण तम्हें ढाकअ और जांऊं पीलातुसै तेऊ छाडणेंओ बचार किय, ता तेभै किय तम्हें तेऊ सहनै तेऊ लै नाई। 14 तम्हें किय तेऊ पबित्र और धर्मी लै नाई, और एही अरज की, कि एकी हत्यारै पापी छाडा जेहला का यीशूए बदळें तम्हां लै पोही। 15 और तम्हें पाअ जिदगी बणाणें आळअ मारी, जुण परमेश्वरै मूंरें दै बिचा का जिऊंदअ किय और एसा गले आसा हाम्हें गुआह। 16 और तेऊए हीं नांऊंरें, तेऊ विश्वास करै जुण तेऊए नांऊंरें आसा, एऊ आदमीं जसा तम्हें भाळा और बछैणा बी; दैनी सामर्थ; और ठीक तेऊई विश्वासै जुण यीशू करै आसा, तेऊ किय अह माहूँ तम्हां सोभी सहनै बिलकुल ठिक-ठाक हांडदअ फिरदअ।

17 और हे भाईयो, मुखा आसा थोघ कि अह काम किय तम्हें नांसमझी दी और तिहअई किय थारै मुखिए, सरदारै बी। 18 पर जुण गला परमेश्वरै भबिश्याबगते मुंहा का पैहलैई का बोली ती कि मसीहा भोगणअ दुख; और तियां गला की तेऊ एसा रिती पूरी। 19 तैहीता मन बदळा और बापस फिरा कि थारै पाप मिटी जाए, और प्रभू सहनै नूंऊंरें हणेंए धैळें एछे। 20 और सह तेऊ यीशू भेजे जुण तम्हां लै पैहलैई का मसीह ठहराऊअ द आसा। 21 अह आसा जरूरी कि सह स्वर्गें तेभै तैणीं रहे, जेभै तैणीं कि सह सोभी गला सुधारी निं सके; जसरी चरचा परमेश्वरै आपणें पबित्र भबिश्याबगते खाखा का आसा बोली दी, जुण संसारे उत्पति ओहीं एछदें आए। 22 जिहअ कि मुसा नबी बोलअ कि प्रभू परमेश्वरा झैऊणअ थारै भाई बंधा बिचा का तम्हां लै मूँह जिहअ एक भविष्यवक्ता, सह जुण बी तम्हां लै बोले, तेऊए शुणें। 23 पर तियां सोभ जुण तेऊए नाई शुणें तियां करनै तिन्नां लोगा बिचा का नाश। 24 और शमुएला ओहीं तेऊका बाद आळें जेतरे बी भबिश्याबगता गला की, तिन्नां सोभी दैनअ इन्नां धैळेंओ संदेशअ। 25 तम्हें आसा भबिश्याबगते संताना और बाईदे साझू, जुण परमेश्वरै थारै बाब दादे संघा बाईदअ किय। जधू परमेश्वरै अब्राहमा का बोलअ कि, “तैरै बंशा करै पाणीं पृथूईए सारै घरानै आशीष।”

26 परमेश्वरै आपणअ सेबक झैऊअ और सोभी का पैहलै भेजअ सह तम्हां सेटा लै कि तम्हें हरेक बुराई का दूर हई करै प्रभू का आशीष पाए।

### माहासभा सहनै पतरस और यहूना

4 जांऊं तियां लोगा का इहय बोलदैई तै लागै दै ता मांदरे सरदार और सदुकी आए तिन्नां चिकदै तुहरी करै। 2 किल्हैकि तिन्नां आई तिन्नां लै रोशै कि तियां तै लागै दै लोगा सखाऊंदै और प्रभू यीशूओ उदाहरण दैई-दैई करै मरी करै जिऊंदै हणें प्रचारा करदें। 3 और तिन्नां तियां ढाकें और दुजै धैळें तैणीं डाहै तियां तिन्नां जेहला दी पाई किल्हैकि तेभै गई ती सान्ह पळी। 4 पर बचन शुळणें आळें कई लोगे किय विश्वास और तिन्नां गिणती हुई बढी करै लगभग पांज हाजारा तैणीं।

5 दुजे धैळें हुअ इहय कि तिन्नां सरदार, बुजुर्ग और शास्त्री 6 और माहायाजक हना और कैफा, यहूना, सिकंदर और जेतरे बी माहायाजके घराने का तै; तियां हुए सोभ येरुशलमेम कटा। 7 और तियां किये बिचै खळें और तिन्नां का लागै पुछदै कि अह काम तम्हें कसरी शगती करै और कसरे नांऊंरें किय? 8 तैबै पतरसै पबित्र आत्मां दी भरुई करै तिन्नां लै बोलअ, 9 “हे लोगो, सरदारो और बुजुर्गो, एऊ कमजोर लैंगळे आदमीं संघे जुण भलाई हुई, जै आझू हाम्हां का एते बारै पुछ-ताछ आसा लाई दी करी, कि अह किल्है और किहय करै हुअ राबळअ; 10 ता तै लूआ तम्हें सोभ और सारै इस्त्राएली शुणीं प्रभू यीशू मसीह नासरीए नांऊंरें जुण तम्हें कूसा दी लटकाऊअ, और सह किय परमेश्वरै मरी करै जिऊंदअ और तेऊए शगती करै और तेऊए नांऊंरें हुअ अह माहूँ जुण तम्हां सहनै ठीक-ठाक खटळुअ द आसा, राबळअ। 11 अह आसा सहैई पाथर जुण तम्हें राज मिस्त्री नकाम्मअ समझअ और सह हुअ कुणीए सिरैओ पाथर। 12 और कसा होरी करै निं मोक्ष आथी; किल्हैकि स्वर्गा हेठै माहूँ दी नि होर कोहै नांअ आथी दैनअ द जसा करै मोक्ष भेटी सके।

13 जैबै तिन्नां पतरस और यहूनां साहस भाळअ, और इहय थोघ लागअ कि ईयां आसा नपहळ और आम आदमीं, ता तियां हुए रहैन; और तेखअ तिन्नां बछैणें कि ईयां आसा यीशू संघे रहै दै। 14 और सह आदमीं जुण ठीक हुअ त, तेऊ तिन्नां संघे खटळुए दै भाळी करै निं तियां तिन्नां बिरोधा दी किछै करी सके। 15 पर तिन्नां तेसा सभा का बागें नाशणें आज्ञा दैई करै लागै तियां आप्पू बिचै बचारा करदें कि, 16 इन्नां माहूँ संघे कै करनअ? किल्हैकि येरुश्लेमेम रहणें आळें सोभी का गूअ थोघ लागी कि इन्नां करै हेरअ एक प्रसिध चिन्ह रहैऊई और हाम्हें बी निं एसा गला लै नकार करी सकदें। 17 पर एते तैणीं कि अह गल निं लोळी लोगा बिचै खासी फैली, हाम्हां डरेऊणें धमकाऊणें ईयां ताकि एऊ नांऊंआ करै ईयां भी कसा माहूँ संघे एते बारै गला नाई करे। 18 और तैबै तिन्नां तियां शादें और चतैनगी दैई करै बोलअ कि यीशूए नांऊंरें निं किछ बोली और नां कसा सखाऊई। 19 पर पतरस और यहूना उत्तर दैनअ कि तम्हेंई करा एसा गला फैसलअ कि परमेश्वरा नेळ रहणअ आसा भलअ कि परमेश्वरा का बढी करै हाम्हें थारी गला मनूं। 20 किल्हैकि इहय ता हाम्हां का हई निं सकदअ कि जुण हाम्हें भाळअ और शुणअ, तेऊ हाम्हें होरी का नाई खोजे। 21 तैबै तिन्नां तियां धमकी दैई करै छाडें, किल्हैकि लोगे कारण निं तिन्नां सजा दैणा लै कोई दाऊ पेच भेटअ; और तै कि जुण सह घटणा हुई ती तेता करै करा तै सोभ लोग परमेश्वरै बड़ाई। 22 किल्हैकि सह आदमीं जसा दी चंगाईओ चिन्ह रैऊअ त, सह त चाहळी साला का बी बडी अमरो।

### सोभी विश्वासीए प्राथणां

23 तियां तिधा का छुटी करै आपणें साथी सेटा पुजै बापस और जुण बी माहायाजक और पुरनिर्णें तिन्नां का बोलअ सह शणाऊअ तिन्नां तिन्नां का। 24 इहय शुणीं करै तिन्नां सोभी एक चित हई करै परमेश्वरा लै जोरै-जोरै बोलअ, हे मालक, तूह आसा सहैई जुणीं स्वर्ग और धरती और समुद्र और जुण तेथ दी आसा बणाए। 25 तंरें पबित्र आत्मां करै आपणें सेबका म्हारै दादे दाऊदे मुखा का बोलअ

‘कि होरी ज्ञाती हुलळ किल्है मचाऊअ? और देशे लोगे किल्है सोची कजेही बेकार गला?’

26 प्रभू और तेऊए मसीहे बिरोधा दी खट्छुए धरतीए राजै, और हाकम हूए एकी जैगा कठा। 27 किल्लहैकि सञ्जी तेरें सेबक यीशूए खलाफ जसरअ तंए अभिषेक किय, हेरोदेस और पुन्तियुस पिलातुस बी हूए होरी ज्ञाती और इस्त्राएली संघे एसा नगरी कठा कि 28 जुंण किछ पैहलैई का तेरी सामर्थ और मती करै सोचअ त तिहअई करे। 29 एबै हे प्रभू तिन्नं धमकी भाळ, और आपनं हाम्हां तेरें दासा लै दै इहय बरदान कि तेरें बचना बडै हैअ हिम्मत बाहिनं करै शणांऊरे 30 और चंगाई दैणा लै बढाऊ तूह आपणें हाथा आजू; कि चिन्ह और चमतकार तेरें पवित्र सेबक यीशूए नांऊए हाम्हें करे। 31 जांऊं तियां प्राथणा करी मुकै ता सह जैगा जिधी तियां कठा तै हूए दै तिधी हुई जेही जाजरी और सह जैगा हिली और तियां सोभ भहूए पवित्र आत्मां करै और परमेश्वरे बचना रहै हैऊआ संघे शणांऊंदै लागी।

### बिश्वासीओ कठा मिलीकरै जिन्दगी

32 और विश्वास करनै आळी मंडळी ती एक चित और एकी मनै, इधी तैणीं कि कोई बी आपणीं सम्पती नि आपणीं बोलदअ त; पर तिन्नं ती सोभै गल्ला एकी दुजै लै कठा। 33 और प्रेरित बडी सामर्था संघे प्रभू यीशूए जिऊइ उज्जणें ग्वाही रहै दैन्दै लागी और तिन्नां सोभी लै त बडअ भारी गूण-जश। 34 और तिन्नां मांझें नि कोहै गरीब त आथी, किल्लहैकि जसा का जैगा जिम्मी या घर बार तै, तियां तिन्नां बेची-बेची करै बिकी चिजे किम्मत आणा तै और तेता डाहा तै प्रेरिते चरणें। 35 और जेही-जेही जसरी जरूरत हुआ ती तिहअ-तिहअ करा तै तियां सोभी लै बांडी। 36 और युसुफ नांओ त एक साईप्रसा का एक लेवी; जसरअ नांओ प्रेरितै बरनबास अर्थात् शांतिओ पुत्र त डाहअ द, 37 तेऊ का ती धख जिम्मी जैगा और तेऊ सह बेची और तेते किम्मत जुंण भेटी सह डाही तेऊ प्रेरिते चरणें।

### हनन्याह और सफीरा

5 और हनन्याह नांओ बी त एक मांहुं और तेऊए बेटळी सफीरा बी बेची आपणीं जिम्मी। 2 और तेता बेची करै जुंण किम्मत भेटी, तेता का डाही धख आपू का चोरी और एसा गल्ला जाणां ती तेऊए लाळी बी और तेतो एक भाग आपणीं करै तिन्नं प्रेरिते चरणा आजू डाहअ। 3 पर पतरसै तेऊ लै बोलअ, हे हनन्याह, शैतानें तेरें मनै अह गल किल्लहै पाई कि तूह पवित्र आत्मां का झुठअ बोले, कि जिम्मीए किम्मता का तूह धख चोरी डाहे? 4 जेभै तैणीं सह ताह सेटा ती, सह कै तेरी नि थी? जांऊं सह बिकी गई ती; तेभै बी कै सह तेरें बशै नि थी? तंए एही गल किल्लहै बचारी आपणें मनै? तंए नि मांहुं का पर तंए बोलअ परमेश्वरा का झुठअ। 5 इन्नां गल्ला शुंणदी, हनन्याय पळअ धरनीं और तेऊ शोटै प्राण; और सोभी शुळणें आळै हेल्लुए। 6 और तेखअ कई जुआनं तेऊए खाट बणाई और बागै निई करै किय तेऊओ क्रिया-करमा। 7 लगभग चिई घांटे बाद तेऊए लाळी जुंण किछ हुअ त इन्नां गल्ला का नजाण तिधी भितरा लै आई। 8 तैबै पतरसै तेसा का पुछअ, "मुखा खोज कि सह जिम्मी तम्हें तेतरी बेची ती? तेसा बोलअ कि हां, सह बेची तेतरी किम्मता दी। 9 पतरसै बोलअ कि अह कै गल आसा कि तम्हें दूई आसा किय द प्रभूए आत्मां परखणा लै एकअ? भाळ तेरें मरधे क्रिया-करमा करनै आळै आसा दुआरै खट्छुए दै और तुबी निणीं इन्नां बागा लै। 10 सह पळी नडैऊरे धरनीं और तेसा बी शोटै प्राण, और तिन्नं जुआनं भितरी एछी करै भाळी कि सह गई मरी और तिन्नं बी बागै निई करै किय तेसरै लाळै संघे तेसो बी क्रिया-करमा। 11 इन्नां गला शुळणें आळै और सारी कलीसिया दी पळअ हेळअ।

### चिन्ह और अदभुत काम

12 और प्रेरिते हाथे हुआ तै कई चिन्ह और चमतकार लोगा बिचै, और तियां सोभै हुआ तै सुलैमानें ओसारै (चाऊळी) दी कठा। 13 पर होरी मांझें नि कसा एही हिम्मत हंती ती कि तिन्नां बिचै नाशे, तैबी बी लोग करा तै तिन्नं बडी भारी बडाई। 14 और विश्वास करनै आळै बडै भारी बेटळी और मरध रहै प्रभूए कलीसिया दी होर बी जादै एछदै लागी। 15 इधी तैणीं कि लोग आणां तै बमारा आदमीं खाट और खटोलै दी चकी करै और बाता डाहा तै सताऊई कि जेभै पतरस एछे और तेऊए छैली तिन्नां परंदै पळे और तियां ठीक होए।

16 और येरुशलैमा ओरी-पोरीए नगरी का बी लोग बडै भारी बमारा और अशुध आत्मां शाचै दै आणीं करै हुआ तै कठा और तिन्नां सोभी दैआ तै प्रेरित राम्बळै करी।

### प्रेरित कैदखानें दी पाणें

17 तैबै माहायाजक और तिन्नं सोभ साथी जुंण सदुकिए पंथे तै; तियां जिधूए तिन्नां लै। 18 और तिन्नं प्रेरित ढाकै और तियां पाए जेहला दी बंद करी। 19 पर राची परमेश्वरो एक स्वर्गदूत आअ और जेहलो दूआर खोलहअ और तियां काढै बागा लै और बोलअ कि 20 "नाशा, और मादरे खट्छुई करै, एसा जिंदगीए सोभी गल्ला खोजा लोगा का।" 21 तियां इन्नां गल्ला शुणीं करै राच भेदी नाठै मांदरा लै और लागै उपदेशा दैन्दै;

पर माहायाजक और तेऊए साथी माहासभा दी एछी करै इस्त्राएलिय बुजुर्ग कठा कियै और जेहल खानें लै फैळअ भेजअ कि तिन्नां आणां माहासभा लै। 22 पर तिन्नां सपाही नि तियां जेहला दी भेटै और बापस फिरी करै फैळअ दैनअ कि, 23 "हाम्हें भाळअ जेहल खानअ बडै पहरै पाई आसा बंद किय द और शणें आसा लाए दै, पहरा आसा दुआरै खट्छुए दै पर जांऊं हाम्हें खोलअ ता भितरी नि कोहै भेटअ!" 24 जांऊं मांदरे सरदारै और माहायाजकै ईयां गल्ला शुणीं ता तिन्नां पळअ बडअ हैळअ फिकर कि तिन्नां कै हुअ होए? 25 तेतरी कुणीं एछी करै बोलअ कि हेरा, जुंण तम्हें जेहला दी तै बंद डाहै दै करी, तियां आसा मांदरै खट्छुई करै लागै दै लोगा लै उपदेशा दैन्दै। 26 तैबै तिन्नं सरदार और सपाही भेजी करै तियां आणें, पर जबरदस्ती खिची करै नि तिन्नं आणीं किल्लहैकि तियां डरा तै लोगा का कि, लोग नि तिन्नां लै पाथरो ढो दैआ।

27 और तिन्नं आणें; संघा तियां माहासभा दी खळै कियै और माहायाजकै तिन्नां पुछअ, 28 "हाम्हें कै तम्हें पैहलै नि समझाऊरे तै कि तम्हें नि यीशूए नांऊंए उपदेशा दैई? तैबी बी बजेरअ तम्हें उपदेशा दैई करै देश और तेऊ आदमिंओ खुन तम्हें म्हारै कैळै चाहा आळणअ?" 29 तैबै पतरसै और होरी प्रेरितै उत्तर दैनअ कि "मांहुं का बढकर परमेश्वरे आज्ञा पालन करनअ आसा कर्तव्य और कर्म। 30 म्हारै बाब-दादे परमेश्वरै किय मसीह यीशू जिऊंदअ जुंण तम्हें क्रूसा दी लटकाऊई करै मारअ त। 31 सहैई बणांअ परमेश्वरै प्रभू और मोक्ष दैणें आळअ और आपणें दैहणें हाथा करै बणांअ सह सोभी का उछटअ ताकि इस्त्राएली लै मना बदळणें शगती और पापा लै माफी दैई सके। 32 और हाम्हें आसा इन्नां गले गुआह, और पवित्र आत्मां बी जुंण परमेश्वरै तिन्नां लै आसा दैनी दी जुंण तेऊए आज्ञा मना।"

33 इहय शुणीं करै तियां मनं जळै और तियां चले चाहै तिन्नं मारनै। 34 पर गमलिले नांओ एक फरीसी जुंण व्यवस्थापक और तेऊओ करा तै सोभ लोग आदरमान, न्यालय दी खट्छुई करै तिन्नां प्रेरिता थोळी घळी बागै करनं आज्ञा दैनीं। 35 तैबै तेऊ बोलअ, "हे इस्त्राएलियो, जुंण बी तम्हें इन्नां मांहुं संघे करनअ चाहा, तेता करै हेरे सोची समझी करै। 36 किल्लहैकि इन्नां धैळै का पैहलै उद्युअ त थिऊदास इहय बोली करै कि हूंबी आसा किजै; और कोई चार शौ आदमीं हूए तेऊ संघे और सह पाअ मारी; और जेतरे लोग तेऊ मना तै, तियां छिगूए ओरी-पोरी और तियां बी मुकै। 37 एता बाद नांओ लिखाईए धैळै यहूदा गलीली बी उझूअ, और धख लोग बी फरेऊए तेऊ आपू बाखा, पर सह बी हुअ नाश और जेतरे लोग तेऊ पिछू तै; तियां बी नाठै ओरी-पोरी। 38 एबै बोला हूं तम्हां लै इहय कि इन्नां आदमी का रहा दूर और इन्नां का नि किछै मतलब डाहा; किल्लहैकि जै अह धर्म या काम मांहुं तरफा का होए; ता तै हणअ अह एकी धैळै खतम, 39 पर जै अह परमेश्वरा का आसा, तै नि तम्हें इन्नां काधि मटाऊई सकदै, किधी इहय नि हुआ कि तम्हें बणा परमेश्वरा संघे लळाई लळदै।

40 तैबै तिन्नं सोभी तेऊए गल्ला मनी; प्रेरित शादें और तियां चिके और इहय बोली करै छाडै कि यीशूए नांऊंआ दी नि भी गल्ला करी। 41 तियां एसा गल्ला का खुश हुई करै माहासभा का नाठै कि हाम्हें प्रभूए नांऊंए बरै और बेईजती सैहणें जोगी ता हूए। 42 इहय करै रहै तियां धैळ मांदरै और घरै-घरै लागी ईहै उपदेशा दैन्दै कि प्रभू यीशू आसा मसीह और तेऊए सुसमाचारा शणाऊणें का नि रुकै आथी।

## सात सेबक चुनौतियाँ

6 तिन्नां धैळें ज़ांऊं विश्वासी चेलें बडै भारी खास्सै हुऐ, ता यूनानी बोली बोलणें आळें इब्रानी बोली बोलणें आळें लै लागे बोलदें कि हर धैळें निं सेवकाई दी म्हारी बिधबा बेटळीओ धैन खेळ हंदअ। 2 तैबै तियां बाराह चेलें आप्पू मांझें कठा हुऐ और बोलअ कि अह गल निं ठीक हणीं कि हाम्हें परमेश्वरे बचना छाडी खेऊंदै-पणेंऊंदै रहे लागी। 3 तैहीता हे भाईयो, आप्पू बिचा का चुना सात सुनाम माळूं जुंण पबित्र आत्मां और बुधी दी परिपूर्ण होए, ताकि तियां एऊ कामां काजा करे। 4 पर हाम्हां रहणअ प्राथणां और बचने सेबकाई दी लागी। 5 अह गल लागी सारी मंडळी बधिया और तिन्नां स्तिफनुस नांओ एक पुरश जुंण विश्वास और पबित्र आत्मां दी परिपूर्ण त, और फिलिप्पुस, प्रखरुस, नीकानोर, तिमान, परमिनास और अन्ताकिया रहणें आळअ निकूलाऊस जुंण यहूदी मत्ता दी आअ त, तियां चुनै। 6 और तिन्नां तियां प्रेरिते सहनै खळें किये और प्राथणां करी करै तिन्नां परेंदै हाथ डाहै।

7 और परमेश्वरो बचन लागअ फैळदअ और येरुशलेमें हुई चले गिणती बडी भारी; याजको एक बडअ समाज हुअ एऊ मत्ता मनणें आळअ।

## स्तिफनुस कैद करनअ

8 स्तिफनुस अनग्रहा और सामर्था दी भरुई करै लोगा बिचै रहैऊआ त बडै-बडै अदभुत काम और चिन्ह। 9 तैबै तेऊ आराधनालै दी जसा लै लिबरतिने बोला तै, और कुरेनी, सिक्दरिआ, किलकिआ और आसिया का कई लोग उझई करै लागे स्तिफनुसा संघे बाद-बिबाद करदें। 10 पर तेऊ ज्ञान और आत्मां का जसा करै सह गला करा त; तियां नि तेऊओ सहनअ करी सकदें तै। 11 एता लै तिन्नां कई लोग उकसाऊए जुंण इहय बोलदें लागे कि हाम्हें शुणीं मुसा और परमेश्वरे बिरोधा दी निंदा और चुगलीए गला। 12 और लोग, बुजुर्गा और शास्त्री भडकाऊई करै तिन्नां लै चहळें और सह नियं तिन्नां माहासभा लै। 13 और तेऊ लै किये झुठै गुआह खळें, जुणीं इहय बोलअ कि अह माळूं निंसअ एसा पबित्र जैगा और कानूने खलाफ बोलणअ छाडी। 14 किल्हैकि हाम्हें शुणअ अह इहय बोलदअ कि यीशू नासरी पाणीं अह जैगा ढोळी, और तियां रबाज पाणें तेऊ बदळी जुंण मुसा आसा हाम्हां लै दैनै दै। 15 तैबै तिन्नां सोभी लोगे जुंण माहासभा दी बेटें दै थियै, स्तिफनुसा बाखा भाळअ, तेऊओ चेहरअ त स्वर्गदूता जिहअ हुअ द।

## स्तिफनुसो भाषण

7 तैबै माहायाजके बोलअ कि ईयां गला एही ई आसा? 2 तेऊ बोलअ, हे भाईयो, पितरो, शुणां, म्हारअ बाब दादअ अब्राहम हारान देशे बसणें का पैहलें जधू मेसूपोटामिआ दी थिय, तधू दैनअ तेजोमय परमेश्वरै तेऊ लै दर्शण। 3 और तेऊ लै बोलअ कि तूह आपणें देश और आपणें परिवारा का निखळी करै तेऊ देशा लै नाश जुंण मूँह ताखा रहैऊणअ। 4 तैबै सह कसदिए देशा का निखळी करै हारान देशा लै आअ तेऊए बाप्पू मरनै का बाद परमेश्वरे सह तिधा का आणीं करै एऊ देशा दी बसाऊअ जसा दी आज्ञा काला तमहें आसा बरसै दै। 5 और तेऊ निं किछ जैदात भेटी, बरन पैरा डाहणें बराबर जैगा बी निं तेऊ लै दैनी, पर प्रतिज्ञा की कि मूँह करनअ अह देश ताह बाद तैरै आजू बंशेए हाथै; पर तेऊए निं तैभै तैणीं कोई बी आद लुआद थी। 6 परमेश्वरै बोलअ इहय कि तेरी संताने लोग हणें पराए देशे परदेसी, और तिन्नां डाहणें तियां गुलाम बणाई, और चऊ शौआ साला तैणीं दैणअ तिन्नां लै दुख। 7 तेखअ बोलअ परमेश्वरै इहय कि जसा ज़ातीए तियां गुलाम हणें, तिन्नां लै दैणअ मूँह दंड; और तेता बाद करनीं तिन्नां तिधा का निखळी करै एऊ देशे मेरी सेऊआ। 8 और प्रभू तेऊ संघे खतने बाचा बाही, और एसाई दशा दी हुअ इसहाक पैदा; और आतूए धैळें किये तेऊओ खतनअ, इसहाका का हुअ याकुब और याकुबा का हुऐ बाराह कुलपति पैदा,

9 और तिन्नां कुलपती डाही युसुफा संघे ज़ीद और सह पाअ मिसर देशा लै नाशणें आळें हाथे बेची, पर परमेश्वर त तेऊ संघा। 10 और युसुफ तेऊए सोभी क्लेशा का छडैऊअ और मिसर देशे राजे फिरोना सेटा अनुग्रह और बुधी दैनी और सह तेऊ सारै मिसर देशे और आपणें सारै घरानेओ हाकम

बणांअ। 11 तैबै मिसर और कनान देशे अकाल पळअ; जेता करै भारी क्लेश हुअ और म्हारै बाब दादें निं रोटी निसी ती भेटी। 12 पर याकुबै इहय शुणीं करै कि मिसर देशे आसा नाज, और म्हारै बाब दादें भेजे पैहली बारी मिसरा लै। 13 और दुजी बारी हुअ युसुफ आपणें भाई लै प्रगत और तैबै चली फिरोना का युसुफे ज़ाती पतअ। 14 तैबै युसुफे आपणअ बाप्पू याकुब और आपणें सारै टब्बर जुंण गिणती दी पझतर आदर्मी थियै; शादें। 15 तैबै याकुब मिसर देशा लै नाठअ और तिधी सह म्हारै बाब दादें मूरें, 16 और तियां पजैळें शकेम और तिधी किये तिन्नां क्रिया-करम, जुंण जिम्मी इबराहिमें चन्दी दैई करै शकेमें हमारे शोहरू का मोलै लई दी थी।

17 पर ज़ांऊं तेसा प्रतिज्ञा पूरै हणेंओ बगत आअ जुंण परमेश्वरै आबराहमा संघे की ती, ता मिसर देशे इस्त्राएली बडै और तियां हुऐ गिणती दी खास्सै। 18 ज़ांऊं मिसर देशे दुजअ राजअ हुअ, ता सह निं युसुफा जाणदअ त 19 और तेऊ की म्हारी ज़ाती संघे चलाकी और म्हारै बाब दादें लै दैनअ कष्ट कि तिन्नां पळें आपणें शोहरू शोटणें और तियां निं जिऊंदै रहे। 20 और तेऊ जमानें हुअ मुसा पैदा; सह थिय परमेश्वरे नजेरा दी बडअ भारी सुंदर त; और सह रह चिइ भीनै आपणें बाप्पू घरै; 21 ज़ांऊं सह पाणीं दी शोटअ ता फिरोने शोहरी चकअ सह और आपणअ शोहरू बणाई करै पाळअ। 22 और मूसा का फळाऊई मिसरीए सारी बिद्या, इहय करै त सह गला और कामां दी सामर्थी।

23 ज़ांऊं सह चाहळी सालो हुअ ता तेऊए मनै आई एही कि हूँ नाशूँ आपणें इस्त्राएली भाई सेटा मिलदअ, 24 और तेऊ एकी माळूं लै अन्याय हन्दै भाळी सह बचाऊअ और मिसरी मारी करै लअ तेऊ इस्त्राएली भाईयो बदळअ। 25 तेऊ सोचअ कि मेरै इन्नां भाई समझणअ कि परमेश्वरा करनअ मेरै हाथे इनो छुटकारअ, पर तिन्नां निं समझअ। 26 दुजे धैळें ज़ांऊं तियां आप्पू बिचै झगछुऐ ता सह आअ तिधी और तिन्नां लागअ आप्पू मांझें मिली-जुली करै रहणा लै समझाऊंदअ कि हे पुरुशो, तमहें ता आप्पू मांझें भाई-भाई आसा, एकी दुजे संघे किल्है आसा लागे दै झगळदें? 27 पर जुंण आपणें पडोसी संघे अन्याय करदअ त लागअ द तेऊ सह इहय बोली करै किये दूर कि तूह कुणीं बणांअ हाम्हां परेंदै हाकम? 28 तंए के जिहअ हिज एक मिसरी मारअ, तिहअ हुंबी लाअ मारी? 29 एसा गला शुणीं करै मुसा तिधा का भागअ और सह लागअ मिदिआन देशे परदेसी हुई करै रहंदअ और तिधी हुऐ तेऊए दुई शोहरू।

30 ज़ांऊं पूरै चाहळी बरश बिनै ता परमेश्वरै तेउलै सीनै परबते जंगलै एकी जळदें झाखळा दी दैनै दरशण। 31 मूसा तेऊ दरशणा पाई हुअ रहैन और तेता भाळअ नाठअ नेळ, तैबै परमेश्वरै ईहै बोल शुळुए 32 कि "हूँ आसा तैरै बाब दादें, इबराहिम, इसहाक और याकुबो परमेश्वर; तैबै मुसा झिळअ कांबअ और इधी तैणीं कि तेऊ निं तेऊ भाळणें हिम्मत रही।" 33 तैबै प्रभू तेऊ लै बोलअ, "आपणें खूरा का खोल इन्नां कराबटू पोर्ही किल्हैकि जसा जैगा तूह खहळुअ द आसा, सह भूर्मी आसा पबित्र। 34 मंए हेरी आपणें लगे बुरी दशा मिसर देशे भाळी और तिन्नां धका और लेरनअ हेरअ मंए शुणीं; तैहीता हूँ तिन्नां छडैऊंदअ आसा होथअ द, एबै तूह ऐछ, मूँह भेजणअ तूह मिसर देशा लै।

35 जसा मुसा लै तिन्नां इहय बोली करै किये त नाई कि तूह कुणीं बणांअ हाम्हां परेंदै हाकम; सहैई बणांअ परमेश्वरे छडैऊणें आळअ हाकम, और स्वर्ग दूता करै जसा झाकळा दी दरशण हुऐ, सह भेजअ। 36 एऊई मांझूं मिसर और लालसमूंदर जंगलै चाहळी साला तैणीं अदभुत काम और चिन्ह रहैऊई करै आणें तियां काढी। 37 अह आसा सहैई मूसा जुणीं इस्त्राएली लै बोलअ कि परमेश्वरा झैऊणअ थारै भाई बिचा का मूँह जिहअ एक भबिशयाबगता। 38 अह आसा सहैई जुणीं जंगलै कलीसिया बिचै तेऊ स्वर्गदूता संघे सीनै परबता दी तेऊ का गला की और म्हारै बाब दादें संघे थीय और तेऊई भेटै जिऊंदै बचन कि हाम्हां सेटा लै पजैळें। 39 पर म्हारै बाब दादें निं तेऊए मनणीं चाही, पर उल्टै फरेऊए आपणें मन मिसरा बाखा लै; 40 और हारूणा लै बोलअ कि हाम्हां लै बणांआ इहय देबतअ कि जुंण हाम्हां आजू चले; किल्हैकि अह मूसा जुणीं हाम्हें मिसर देशा का छडैऊई आणें, हाम्हां का निं थोघे कि कें हुअ? 41 तिन्नां धैळें तिन्नां एक सुनेओ बाछू बणांअ और तेऊए मुरती सहनै चढाऊई बळी; और आपणें हाथे कामां दी लागे मगन हंदै।



42 तैहीता परमेश्वर आपणअ मूँह तिन्नां का फरेऊअ और तियां छाडै कि सरगे ग्रहा पुजे; जिहअ भबिशयाबाणी करनै आळे कताबा दी लिखअ द आसा कि

"हे इस्त्राएले घराने, तम्हें कै जंगलै

अन्न बळी और पशू बळी

मुल्हैई रहै चढाऊदें लागी?

43 और तम्हें फिरा तै मोलेके ताम्बू और रफाने देबते तारै लै;

अर्थात्, तिन्नां आकारा लै

जुण तम्हें माथे टेकणा लै बणांएँ दै तै,

तैही, मूँह बसाऊणें तम्हें बाबूला का आजू निई करै।

44 साक्षीओ ताम्बू त जंगलै म्हारै बाब दादे बिचै; जिहअ तेऊ बोलअ त, जुणीं मुसा का बोलअ कि जुण तंएँ भाळअ, तेते साबै बणां एऊ। 45 सहैई ताम्बू आणअ म्हारै बाब दादे पराणें जमाने का यहोशू संघे इधा लै बी, जेऊ समें तिन्नें तिन्नां होरी ज्ञाती दी अधिकार पाअ, जुण परमेश्वरै म्हारै बाब दादेए सहनने का दूर किये; और सह रह दाऊदे जमाने तैणीं। 46 तेऊ लै की परमेश्वरै किरपा; तैही की तेऊ अरज कि मूँह बणाणअ याकुबे परमेश्वरा लै निबास स्थान। 47 पर सुलैमाने बणांअ परमेश्वरा लै घर। 48 पर परमप्रधान परमेश्वरै नि हाथा करै बणांएँ दै घरा दी रहंदअ, जिहअ कि भबिशयाबगता आसा बोलअ द;

49 कि "प्रभू बोला इहय कि स्वर्ग आसा मेरअ सिंहासन और

पृथूई आसा मेरै पैरा हेठे चऊकी,

मुल्है तम्हें किहय घर बणाणअ? और मुल्है बेशणा लै कुण जैगा हर्णी?

50 ईयां चिजा कै मेरै हाथे नि आथी बणाई दी?

51 हे हठीलै, और मनं और कानें टऊणें लोगो, तम्हें करा हर बगत पबित्रात्मां सहनअ। जिहअ थारै बाब दादे करा तै, तम्हें बी करा तिहअई। 52 भबिशयाबगता मांझै कसा लै नि थारै बाब दादे कशट दैनअ? और तिन्नें तेऊ धर्मीएँ एछणें पराणें जमाने ओही संदेशे दैणेंआळै पाए मारी और ऐबे हुए तम्हें बी तेऊएँ ढाकणें आळै और मारने आळै। 53 तम्हें स्वर्गदूतै बणाई दी व्यवस्था ता पाई, पर तेतो पाळण नि किय।

### स्तिफनुस पाथरा करै मारनअ

54 इन्नां गल्ला शुणीं करै तियां जळै और तेऊलै लागै दांदा किल्लदै। 55 पर तेऊ पबित्र आत्मां करै भरुई स्वर्गा बाखा भाळअ और परमेश्वरे महिमा की और प्रभू यीशू धेछुअ तेऊ का परमेश्वरे देहणीं पाशळी खहळुअ द; 56 और तेऊ बोलअ, "भाळा, मुखा आसा लागअ द स्वर्ग खुल्लअ द और माणूंओ शोहरू परमेश्वरे देहणीं बाखा खहळुअ द धेछदअ। 57 तैबै तिन्नें जोरै-जोरै लैळा पाई करै किये आपणें कान बंद और एक चित हई करै तेऊ लै पळै चिकदै चुटी। 58 और सह नगरी का बागै काढअ और तेऊलै लागै सोभ पाथरे ढोआ दैन्दै और तिन्नें गुआहै डाहै आपणें झिकळै शाऊल नांऊएँ एकी मर्धे पैरा सेटा खोल्ही; 59 और तियां सोभ रहै स्तिफनुसा लै पाथरै बांहदै लागी और सह रहअ इहय बोली करै प्राथणां करदअ लागी कि हे प्रभू यीशू, मेरी आत्मां कर ग्रहण 60 और तेखअ तेऊ जाहूँ टेकी करै जोरै बोलअ, "हे प्रभू, एऊ पापा नि इन्नां लै लाई; और इहय बोली करै शोटै तेऊ प्राण, शाऊल नांओ माळूँ बी त तेऊ मारना लै सैहमत।

### कलीसिया संघें अत्याचार

8 तेसाई धैळी हुअ येरुशलेमें कलीसिया लै बडअ भाई उपद्रभ और प्रेरिता छाडी होर सोभ हुए यहुदिआ और सामरिया देशा लै तित्तर-बित्तर। 2 और विश्वासी भगतै स्तिफनुस डाहअ कब्रा दी और तेऊलै लागै लेरद-पकारद। 3 और शाऊल त कलीसिया लै खतम करदअ लागअ द और घरै-घरै पेशी करै त भगत मरधा और बेटळी घिशी-तळिगी करै लागअ द जेहला दी पांदअ।

### सामरिया दी फिलिप्पुसो प्रचार

4 जुण तित्तर-बित्तर हुए तियां जेसी बी नाठै तियां नाठै सुसमाचारा शणाऊदी। 5 और फिलिप्पुस सामरिया नगरी नाशी करै लोगा बिचै मसीहे

प्रचारा करदअ लागअ। 6 और जुण गल्ला फिलिप्पुसै बोली, तिन्नां गल्ला शुणीं लोगै जुण सह चिन्ह रैऊआ त तिन्नां भाळी करै लोगै एक चित-मन लाअ। 7 किल्लहै किई का निखळै भूत-प्रेत लैळा पकारा पाई बागा लै और बडै भारी झोलेएँ बमारी आळै, और लैंगळै हुए राम्बळै। 8 और तेसा नगरी हूअ बडअ आनंद।

### शमोन जादू करनै आळअ

9 एता का पैहलै त तेसा नगरी एक शमोन नांओ एक माळूँ जुण जादू टोणें करी करै सामरिए लोगा करा त रहैन और आपणें आप खोजा त लोगा का की हूँ आसा कोई महान पूरश। 10 और सोभै होछे का बडै तैणीं तेऊ मनीं करै बोला तै इहय कि अह माळूँ आसा परमेश्वरे एक शगती, जसा लै महान बोला। 11 तेऊ तै तियां बडै भारी धैळै ओही आपणें जादू टोणें करै डाहै दै रहैन करी; तैहीता तेऊ तियां बडै भारी मना तै। 12 पर जांऊं तिन्नें फिलिप्पुसे प्रतीति की जुण परमेश्वरे राईसीओ सुसमाचार शणांऊआ त, ता कै लोग, कै मरध, कै बेटळी, सोभै लागै बपतिस्मै लंदै। 13 तैबै शमोनै आप्पू बी विश्वास किय और बपतिस्मअ लई करै लागअ फिलिप्पुसा संघे रहंदअ और सह हूआ त चिन्ह और बडै-बडै सामर्थे कामां और चमत्कारा भाळी करै रहैन।

### सामरिया दी पतरस और यूहन्ना

14 जांऊं प्रेरितै जुण येरुशलेमें थिये तिन्नें शुणअ कि सामरिया नगरी हेरअ परमेश्वरो बचन मनीं, तैबै तिन्नें पतरस और यूहन्ना तिन्नां सेटा लै भजै। 15 और तिन्नें की तिन्नां लै प्रार्थणा कि पबित्रात्मां करै भरीए। 16 किल्लहैकि पबित्र आत्मां नि मैची तैणीं तिन्नां कोही दी उतरअ त, तिन्नें लअ त मैची तैणीं सिधअ प्रभू यीशूएँ नांऊंएँ बपतिस्मअ। 17 तैबै तिन्नें तिन्नां परंदै हाथ लाए और तिन्नां दी उतरी पबित्र आत्मां। 18 जांऊं शमोनै भाळअ कि प्रेरिते हाथा लागे करै एछा पबित्र आत्मां, ता तेऊ तिन्नां सेटा ढबै आणीं करै बोलअ कि 19 "एऊ अधिकारा दैआ तम्हें मुल्है बी; कि जसा परंदै हूँ हाथ डाहूँ, तेऊ लोळी पबित्र आत्मां भेटी।" 20 पतरसै तेऊ लै बोलअ, "तेरै ढबै लोळी ताह संघे नाश हुए किल्लहैकि तंएँ किय परमेश्वरो दान ढबै करै मोल लणेंओ बचार। 21 एसा गल्ला दी नाई ता तेरअ हेस्सअ आथी और नाई बांडअ; किल्लहैकि तेरअ मन नि परमेश्वरा सहनने सिधअ आथी। 22 तैहीता तूह एसा बुराई का आपणअ मन फरेऊ और प्रभू का कर प्राथणां, हई सका कि तेरै मनो बचार माफ होए। 23 किल्लहैकि मुखा आसा लागअ द तूह धेछदअ कि तूह आसा पित जिहअ कळुअ और अधर्म बंधना दी पळअ द। 24 शमोनै उत्तर दैनअ कि तम्हें करा मुल्है प्राथणां कि जुण गल्ला तम्हें बोली; तिन्नां मांझै नि कोहै लोळी मुल्है हई बिती।

25 तैबै तियां ग्वाही दैई करै और प्रभूओ बचन शणांऊई करै फिरै येरुशलेमा लै बापस और सामरिए कई गरांऊंआं बाती नाठै बचना शणांऊंदी।

### फिलिप्पुस और कूश देशो आधिकारी

26 तेखअ प्रभुएँ एकी स्वर्गदूतै फिलिप्पुसा लै बोलअ, "उझूँ और दखणा बाखा लै तेसा बाता नाश; जुण येरुशलेमा का गाजा लै नाशा, अह आसा रेगीस्तानी बात। 27 सह उझूँ और नाठअ, और हेरा, कूश देशो एक आदमी त लागअ द एछदअ जुण खोजा और कूशिएँ राणींओ कंदाकेओ मंत्री और भडारी थिय सह त परमेश्वरे भजना करदअ येरुशलेमा लै आअ द; 28 और सह त आपणें रथा दी बेटअ द, और याशायाह नबीएँ कताबा पहळदी त सह लागअ द बापस नाशदअ। 29 तैबै पबित्र आत्मां फिलिप्पुसा का बोलअ कि एऊ नेळ नाश और एऊएँ रथा संघा-संघा चल। 30 फिलिप्पुसै तेऊ बाखा तुहरी करै सह याशायाह भबिशयाबगते कताबा फहळदअ शुणअ और तेऊ का पुछअ, कि तूह जुण पहळा, तेता तूह समझा बी कि नाई? 31 तेऊ उत्तर दैनअ, "जेभै तैणीं मूँह कुण नाई समझाऊएँ, ता तेभै तैणीं किधी चालअ हूँ समझी? तैबै तेऊ फिलिप्पुसा का अरज की कि मूँह संघे बेश मेरै रथा दी। 32 पबित्र शास्त्रो जुण पाठ सह पहळदअ त लागअ द; सह त अह कि सह नियं मंमनै जिहअ



मारना लै,  
 और जिहअ मेंमनअ आपणें ऊन कातणें आळै सेटा  
 चुपचाप रहा,  
 तिहअई तेऊ बी निं आपणअ मुँह खोलहअ।  
 33 तेऊए दीन हणें का बी तेऊओ न्याय निं हई बोलअ,  
 और तेऊ ज़मानें लगे गल्ला  
 कसा करनी,  
 किल्हैकि पृथुई का तेऊओ प्राण  
 चकअ उझै।

34 एता लै खोजै फिलिप्पुसा का बोलअ, “हूँ करा ताह सेटा अरज कि मुखा  
 खोज इहय कि अह भबिशयाबागता कसरै बारै आसा लागअ द बोलदअ;  
 आपणें, या कसा होरिए बारै दी?” 35 तैबै फिलिप्पुसै आपणअ मुँह खोलअ,  
 और एऊई शास्त्रा का शुरु करी करै तेऊ का प्रभू यीशू मसीहो सुसमाचार  
 शणांऊअ। 36 बाता हांडदी-हांडदी पुजै तियां एही जैगा जिधी पाणीं थीय। तैबै  
 खोजा बोलअ, “भाळ, इधी आसा पाणीं बी, ऐबै मूल्है बपतिस्मं लणा लै कै  
 रूकाबट आसा?” 37 फिलिप्पुसै तेऊ लै बोलअ, “जै तूह सारै मना का  
 विश्वास करा, ता तै सका हई। तेऊ उत्तर दैनअ कि हूँ करा एसा गल्लो विश्वास  
 कि मसीह आसा परमेश्वरो पुत्र। 38 तैबै तेऊ रथा खळै करने आज्ञा दैनीं और  
 फिलिप्पुस और खोजा दुहै पाणीं दी उत्तरै और तेऊ दैनअ तेऊलै  
 बपतिस्मअ। 39 जांऊं तियां पाणीं का उझै निखळै ता प्रभूए आत्मां चकअ  
 फिलिप्पुस उझै और तेऊ खोजा निं सह तेखअ भी भाळी, और सह नाठअ  
 आनंद खुशी दी आपणीं बाता और 40 फिलिप्पुस निखळअ अशदोद नगरी  
 और जेभै तैणीं केसरीआ निं पुजअ तेभै तैणीं रह सह नगरी-नगरी सुसमाचार  
 शणांऊदअ लागी।

**शाऊलो दिल बधळणअ**  
 (प्रेरिते काम 22:6-16; 26:12-18)

9 ता शाउल त मैची तैणीं जुंण प्रभूए चेलै धमकाउणें और तिन्नां मारनं  
 धुना दी मगन, सह माहायाजका सेटा लै नाठअ; 2 और तेऊ दमिशके  
 आराधनाले नांऊआ दी एऊ अधिकारा दैणें चिठी मांगी कि कै मरध, कै  
 बटळी, जसा बी सह एऊ पंथा दी भाळै, तियां आळणें ढाकी येरुशलेमा लै।  
 3 पर हांडदी-हांडदी जांऊं सह दमिशका नेळ पुजअ, ता एका एक तेऊ चूऊ  
 बाखा सरगा का बिजळी चमकी 4 ता बधळुअ धरती दी, और तेऊका शुळुअ  
 इहय शब्द कि हे शाऊल, हे शाऊल, तूह मुल्है दुखा दैदअ किल्है आसा  
 लागअ द? 5 शाऊलै पुछअ कि हे प्रभू, तूह कुण आसा? तेऊ बोलअ, “हूँ  
 आसा यीशू जसा लै तूह दुख दैआ।” 6 पर ऐबै तूह उझू और नगरी लै नाश  
 और जुंण ताह करनअ, सह हेरनअ ताखा खोजी। 7 जुंण आदमीं शाऊला  
 संघे तै, तियां रहै चुप्पी, किल्हैकि तियां शब्द ता शुणां तै पर तिन्नां का  
 धेछदअ निं त तिधी कोहै! 8 तैबै शाउल धरना का उझूअ पर जांऊं आच्छी  
 खोल्ही ता तेऊ का निं किछै धेछुअ और तिन्नें होरी नियं सह हाथा ढाकी करै  
 दमिशका लै। 9 और सह रह चीई धैळै तैणीं काणअ, और तेऊ ना किछै खाअ  
 न किजै झूटअ।

10 दमिशके त एक हनन्याह नांओं एक प्रभू यीशूओ चेलअ, तेऊ लै प्रभू  
 दर्शन दैनें और बोलअ, “हे हनन्याह !” तेऊ बोलअ, हां प्रभू। 11 तैबै प्रभू  
 तेऊ लै बोलअ, “उझू और तेसा गळी दी नाश, जसा लै सिधी गळी बोला,  
 और यहूदा नांऊंरे माळुंघं घरै आसा शाऊल नांओं एक तारसी, पुछी लारे;  
 किल्हैकि भाळ सह आसा लागअ द प्राथणां करदअ। 12 और तेऊ भाळअ  
 दर्शना दी हनन्याह नांओं एक मरध भितरालै एछदअ और तेऊ परदै हाथा  
 डाहंदअ ताकि तेऊ का भीई धेछदअ लागे 13 हनन्याह उत्तर दैनअ, कि हे  
 प्रभू, “मंऐ आसा एऊ आदमीए बारै कई लोगा का शुणअ द कि एऊ आसा  
 येरुशलेमं तैरे पबित्र लोगा संघे बड़ी-बड़ी बुराई की दी। 14 और इधी बी  
 आसा एऊ लै माहायाजका का अधिकार भेटअ द कि जुंण लोग तेरअ नांअ  
 लए, तिन्नां बाहै।” 15 पर प्रभू तेऊ लै बोलअ, “तूह नाश, किल्हैकि अह  
 आसा मंऐ होरी ज्ञाती लै, राजे माहाराजे और इस्त्राएली सद्धनं मेरे नांऊआ  
 प्रगट करना लै मेरअ चुनअ द पात्र। 16 और मुँह खोजणअ तेऊका कि मेरे  
 नांऊआ लै ताह किहअ-किहअ दुख लागणअ भोगणअ। 17 तैबै हनन्याह

तिधा का उझूअ और तेऊ घरा लै नाठअ संघा शाऊला दी आपणअ हाथ  
 लाई करै तेऊलै बोलअ, हे शाऊल, प्रभू, अर्थात यीशू जुंण ताह तेसा बाता,  
 जसा बाता तूह आअ, ताखा धेछुअ त, तेऊई भेजअ हूँ कि ताखा लोळी भी  
 धेछदअ लागअ और तूह लोळी पबित्र आत्मां करै भरुअ। 18 और नदैऊरे  
 तेऊए आच्छी का उतरै जिहै तरोळै और तेऊ का लागअ धेछदअ और सह  
 उझूअ और तेऊ लए बपतिस्मअ, तेखअ खाई तेऊ रोटी ता 19 तैबै जाई  
 करै आअ तेउ बल।

**दमिशक नगरी शाऊलो प्रचार**

सह रहअ कई धैळै तैणीं तिन्नां चेलै संघे जुंण दमिशक दी थियै। 20 तेखअ  
 शाऊल नदैऊरे आराधनालै दी प्रभू यीशूए प्रचारा करदअ लागअ कि यीशूई  
 आसा परमेश्वरो पुत्र। 21 ता सोभै शुंळणें आळै हुए रहैन और तियां लागै बोलदै  
 कि, अह सहई आदमीं निं आधी; जुंण येरुश्लेमे तिन्नां नाश करा त जुंण प्रभू  
 यीशूओ नांअ जपा तै, और इधा लै बी त अह तैही आअ द कि तियां निणें  
 बाह्नि करै माहायाजका सेटा लै? 22 पर शाऊल हुअ होर बी सामर्थी; और  
 एसा गल्लो प्रमाण दैई-दैईकरै कि यीशूई आसा मसीह, दमिशका दी रहणें आळै  
 यहूदिओ किय मुँह बंद।

23 जांऊं खास्से धैळै बितै ता यहूदी मिले आपू मांझै कि शाऊल पाणअ  
 हाम्हा मारी। 24 पर तिन्नें चाल गई शाऊला का थोघ लागी; तिन्नें पाअ राची  
 धैळी शाऊला मारना लै पहरअ, 25 पर राची शाऊले चेलै सह टोकरै दी  
 बशीळअ और नगरीए दुआली बाती लटकाऊई करै थुआळअ उंधै और सह  
 काढअ बागा लै।

**येरुश्लेमें शाऊल**

26 येरुश्लेमें पुजी करै की चेलै सेटा मिलणें शाऊलै कोशिश; पर तियां  
 सोभै डरा तै तेऊ का, किल्हैकि तिन्नां नि इहय भरोसअ ई हंदअ त कि अह  
 बी आसा ऐबै प्रभू यीशूओ चेलअ। 27 पर बरनबास नाओए प्रभूए एकी चेलै  
 नियं सह आपू संघे प्रेरिता सेटा लै और तिन्नां का सोभै गल्ला खोजी कि  
 किहय करै शाऊलै बाता प्रभू यीशू मसीह भाळअ और एऊ संघे की गल्ला;  
 और एता बाद दमिशके केही हिम्मत संघे किय प्रभूओ प्रचार। 28 तैबै रहअ  
 तिन्नां संघे एछदअ-नाशदअ लागी। 29 और बेधडक हई करै किय प्रभूए नाओं  
 प्रचार; और यूनानी बोली बोळणें आळै यहूदी संघे की गल्ला-बाता और बाद-  
 बिबाद, पर तियां रहै तेऊ मारी पाणें तरिके सोचदै लागी। 30 इहय थोघ लागी  
 करै होरी भाई सह कैसरिया लै आणअ और तिधा का भेजअ सह तरसुसा  
 लै।

31 इहय करै सारै यहूदिया, गलील और सामरिया दी भेटी कलीसिया  
 शांती, और तियां रहै बढदै लागी; और तियां प्रभूए डरा दी और पबित्र आत्मं  
 शांती दी रहा ती आजू हांडदी और बढदी लागी।

**लुदा और याफा नगरी दी पतरस**

32 और इहय हुअ कि पतरस हर जैगा हांडदी-फिरदी तिन्नां पबित्र लोगा  
 सेटा बी पुजअ जुंण लुदा नगरी रहा तै। 33 तिधी भेटअ तेऊ अनिआस नांओं  
 दरगे बमारीआळअ माळू जुंण आठा साला ओर्ही बिस्तरै त पळअ द।  
 34 पतरसै तेऊ लै बोलअ, हे अनिआस! यीशू मसीह किय तूह ऐबै ठीक,  
 उझू आपणअ बिस्तरअ चक। तैबै सह नदैऊए खळअ उझूअ। 35 इहय करै  
 लुदा और शारोने रहणें आळै फिरै सोभ प्रभू बाखा लै।

36 याफा दी ती तबिता, अर्थात-दोरकास नाओए एक विश्वासण रहा ती,  
 सह करा ती कई भले काम और दान दैआ ती। 37 तिन्नांई धैळै सह हई बमार  
 और मुँह, और तिन्नें बी डाही सह नैहैऊई धोई करै पांडा। 38 तै कि लुदा  
 नगरी ती याफा नेळ, चेलै इहय शुणीं करै कि पतरस आसा तिधी। तिन्नें दूई  
 आदमीं भेजे और अरज की कि एभी एछ हाम्हां सेटा लै। 39 तैबै पतरस तिन्नां  
 संघे नाठअ और जांऊं तिधी पुजअ और तिन्नें नियं सह पांडा लै और सोभ  
 बिधबा बेटळी ती लेरदी लागी दी और तियां खहळुई पतरसा सेटा और जुंण  
 झिकळै टाहै तेसा तिन्नां संघे रहंदी बणाए तै तिन्नां रहैऊंदी लागी। 40 तैबै  
 पतरसै तियां सोभ बागा लै काढै और ज़ाहू दी बेशी करै प्राथणां की और

लाहशा बाखा भाळी करै बोलअ कि, "हे तबीता, उझू, तैबै तेसा आच्छी खोल्ही और पतरसा भाळी करै उझूई। 41 पतरसै हाथ दैई करै सह खळी झैऊई और तियां पबित्र लोग और बिधबा शादी और सह तिन्नां का जिऊंकी होशा-बाशा दी रहैऊई। 42 अह गल फैली सारै याफा देश और कई किय प्रभू दी विश्वास। 43 और पतरस याफा दी कसा शिमोन नांऊए चाम्भळैए बपारा करनै आळै सेटा रह कई धैळै तैणीं।

### कुरनेलियुसे पतरसा शदाणूं भेजणें

10 कैसरिआ देश त कुरनेलियुस नांओं एक आदमी, सह त इतालनी नांओं फौजे पळटणों सुबैदार। 2 सह त धर्मी भगत और आपणें सारै घराने संघी रहा त सह परमेश्वरे उरा हेतै, और यहूदी लोग लै दैआ त सह बडअ भारी दान और हर बगत करा त सह परमेश्वरा सेटा प्राथणां। 3 तेऊ धैळीए चिऊथे पहरा नेळ दर्शन पाई स्पष्ट रूप भाळअ कि स्वर्गदूत आअ तेऊ सेटा भितरा लै और तेऊ बोलअ कि हे कुरनेलियुस, 4 तेऊ भाळअ बडे धैन लाई करै और हैळुई करै बोलअ कि हे प्रभू, किजै बोला? स्वर्गदूत बोलअ, तेरी प्राथणां और तेरै दान पुजै परमेश्वरा सेटा, 5 और याफा लै भेज आदमी और शमोन श्वाद जसा लै पतरस बोला। 6 सह आसा, शमोन चांभळेए धांधे करनै आळै सेटा पाहुणअ जसरअ घर समुंदरे कनारै आसा। 7 जेभै सह स्वर्गदूत जुंणीं तेऊ संघे गल्ला की ती, सह नाठअ, ता तेऊ दुई सेबक जुंण तेऊ सेटा रहा तै तिन्नां मांझै एक भगत सपाही शादअ। 8 और तिन्नां का सोभै गल्ला खोजी करै याफा लै भेजै।

### पतरसो दर्शन

9 दुजी धैळी ज्रांऊं तियां हांढदी-हांढदी नगरी नेळ पुजै ता दपहरा नेळ त पतरस प्राथणां दी बेटअ द। 10 और तेऊ ती भुखे बी लागी दी और सह निं किछ खाणअ च्राहंदअ त; पर ज्रांऊं तियां रोटी बणांदै तै लागै दै; ता पतरसा निं सुध-बुधे ई रही। 11 और तेऊ का धेछुअ कि सरग आसा खुल्हअ द, और एक बडअ तराणअ एक बडी चादरा जिहअ तेते चऊ कुणीं का आसा राशी करै लटकअ द उतरअ धरती बाखा लै। 12 तेऊ तराणें दी आसा सोभी प्रकारे चऊ ज्रांघा हांढदै, रिणों आलै जीब जन्तू और चेलू पखिरु। 13 और तेऊ का एक बडअ जौरै शब्द शुळुअ कि हे पतरस, उझू इन्नां मार और खा। 14 पर पतरसै बोलअ, नाई प्रभू, हू निं कधि खांदअ; किल्हैकि मंरें निं कधि अपबित्र और अशुध चिजा खाई। 15 तेखअ तेऊ का दुजी बारी इहय शब्द शुळुअ कि जुंण परमेश्वरै शुध किय द आसा, तेता लै निं तूह अशुध बोले। 16 और चिइ बारी हुअ इहयई, एता बाद सह तराणअ नडैऊए चकअ स्वर्गा लै उझै।

17 पतरस त आपणें मनै दुबिधा दी कि अह दर्शन मंरें जुंण भाळअ, एतो कै मतलब आसा? ता हेरा, तिधी आये तियां दुई आदमी जुंण कुरनलिऊसै भेजै तै, तिन्नें शिमोनं घरों पतअ पुछी करै पुजै तियां तिधी दुआरे डेहळा सेटा। 18 और तिन्नें लाई बागा का हाका कि, शमोन, जसा लै पतरस बोला, सह इधी आसा पाहुणअ? 19 पतरस त लागअ द तेऊ दर्शणें बारै सोचदअ ई कि पबित्र आत्मा तेऊ लै बोलअ कि भाळ चऊन आदमी आसा ताह लोळै लागै दै। 20 "उझू और उंधे नाश और चुपचुपै लाग तिन्नां पिछू हांढदअ, किल्हैकि तियां आसा मंरें भेजै दै।" 21 तैबै पतरस तिन्नां सेटा लै आअ और तिन्नां आदमी का बोलअ कि जसा लोळै तम्हें आसा लागै दै, सह आसा हूँ ई; तम्हें किजू कामें आसा आये दै? 22 तिन्नें बोलअ कि हाम्हें आसा भेजै दै कुरनेलियुस सुबैदारै, सह आसा धर्मी और परमेश्वरे उरा हेतै रहणें आळअ और सारी यहूदी ज्राती दी आसा तेऊओ भलअ नांअ, तेऊ लै बोलअ एकी पबित्र स्वर्गदूत कि पतरसा शाद आपणें घरा लै और तेऊ का शुणें बचन। 23 तैबै पतरस तियां भितरा लै शाद और तिन्नें पाहुणचारी की।

### कुरनेलियुसे घरे पतरस

दुजै धैळै नाठअ सह तिन्नां संघे याफा नगरी लै और याफा नगरीए भाई मांझै हुए कई तेऊ संघा। 24 दुजै धैळै तियां कैसरिआ पुजै और कुरनेलियुस त आपणें टबरा और साथी भाई संघे न्हैळअ लागअ द। 25 ज्रांऊं पतरस

भितरा लै त लागअ द एछदअ ता कुरनलिऊसै आअ तेऊ सेटा लै मिलदअ और तेऊए पैरै टेकअ माथअ। 26 पर पतरसै बोलअ तेऊ लै इहय कि खळअ उझू, हूँबी ता आदमी ई आसा। 27 और तेऊ संघे गल्ला करदी नाठअ सह भितरा लै और तिधी हुए बडे भारी लोग कठा। 28 पतरसै तिन्नां लै बोलअ, कि तम्हा का आसा एसा गल्लो थोघ कि होरी ज्रातीए संघा रहणअ या तिन्नां सेटा नाशणअ हुआ यहूदी लै अधर्म, पर परमेश्वरै खोजअ मुखा इहय कि कोही माळू लै निं लागी अपबित्र और अशुध बोलदै। 29 तैहीता ज्रांऊं तम्हें हूँ शादअ, ता हूँ लागअ चुपचुपै हांढदअ; पर एबै पुछा हूँ कि तम्हें हूँ इधी किजू कामें शादअ?

30 कुरनेलियुसै बोलअ, कि आज्ञा हुए पूरै चार धैळै कि हूँ त चिऊथे पहरे लागअ द प्राथणां करदअ, और एक आदमी चमकिलै झिकळै बाही आअ और मूँह सल्लनै खटळूअ। 31 और सह लागअ मुल्है इहय बोलदअ कि हे कुरनेलियुस, तेरी प्राथणां हेरी शुणीं और तेरै दान गूए परमेश्वरा सेटा पुजी, 32 तूह भेज कसा याफा लै शमोन जसा पतरस बोला, और सह आसा समुंदरे कनारै चांभळेए बपारा करनै आळैए घरै पाहुणअ। 33 तेखअ भेजै मंरें नडैऊए ताह सेटा लै लोग और अह हुई बडी बधिया गल कि तम्हें आये, और एबै आसा हाम्हें सोभै इधी परमेश्वरे सल्लनै, ताकि जुंण तारखा परमेश्वरै खोजअ द आसा, तेता शुणीं सके।

### पतरसो उपदेश

34 तैबै पतरसै बोलअ एबै हूअ मूँह पूरअ भरोसअ कि परमेश्वर निं कोहि संघे भेदभाव करदअ, 35 बरन हर ज्राती दी जुंण तेऊए उरा हेतै रहा, और धर्म काम करा, सह आसा तेऊ पसंद। 36 जुंण बचन तेऊ इस्त्राएली सेटा भेजअ, जै कि तेऊ यीशू मसीह करै जुंण सोभियो प्रभू आसा, शांतिओ सुसमाचार शणांऊंअ। 37 तेसा गल्लो आसा तम्हां का थोघ कि जुंण यहूने बपतिस्मं प्रचारा बाद शुरू हुई और सारै यहूदिया देश फैली कि 38 परमेश्वरै किहय करै किय यीशू नासरीओ पबित्र आत्मां और सामर्था करै अभिषेक। सह रह भलाई करदअ और जुंण शैताने बरैबाद तै किये दै तिन्नां आबाद करदअ। किल्हैकि परमेश्वर त तेऊ संघा। 39 और हाम्हें आसा तिन्नां कामें गुआह जुंण तेऊ यहूदिया देश और येरुशलेमै बी किये और तिन्नें मारअ सह काठा दी लटकाऊई करै। 40 पर सह किय परमेश्वरै चिऊथे धैळै जिऊंदअ, और प्रगट बी किय। 41 सोभी लोग का निं पर तिन्नां ग्वाही का जुंण परमेश्वरै पैहलैई का चुने दै तै, अर्थात- हाम्हें, जुंण तेऊए जिऊंदै हणें का बाद तेऊ संघे खांदै-पिंदै बेटै। 42 और तेऊ दैनी हाम्हां लै एही आज्ञा कि लोग बित्रै करा प्रचार और एसा गले दैआ ग्वाही कि जुंण परमेश्वरै जिऊंदै और मूँरैदो न्यायी बणांअ, सह आसा अहैई। 43 तेऊए दैआ सोभै भविष्यवागता ग्वाही कि जुंण कोई तेऊ दी विश्वास करे, तेऊ भेटणीं तेऊए नाओंआ करै पाप क्षमा।

### होरी ज्रातीए लोग परदै पवित्रात्मां एछणअ

44 पतरस त इन्नां गल्ला करदअ ई लागअ द कि पबित्र आत्मां उतरअ तिन्नां सोभी शुळणै आळै परदै, 45 और जेतरे खतना किये दै विश्वासी पतरसा संघे आये दै थिये, तियां हुए रहैण कि होरी ज्राती लै बी दैनअ पबित्र आत्मां दान! 46 किल्हैकि तिन्नें शुणें तियां भांति-भांतिए बोली बोलदै और परमेश्वरे बडाई करदै। 47 एता लै पतरसै बोलअ, एबै कै इन्नां कुण पाणीं का रोकी सका कि ईयां बपतिस्मअ निं लूए; जुंणीं हाम्हां जिहअ ई पबित्र आत्मां दान पाअ? 48 और तेऊ आज्ञा दैनी कि इन्नां लै दैआ यीशू मसीहे नांऊंरै बपतिस्मअ। तैबै तिन्नें पतरसा लै अरज की कि थोळै धैळै दै तूह हाम्हा संघे रहणें।

### पतरसो आपणें कामें बारै खोजणअ

11 प्रेरितै और होरी भाई जुंण यहूदिया दी थिये, तिन्नें बी शुणअ कि होरी ज्रातीए लोगै बी मनअ परमेश्वरो बचन; 2 1. और ज्रांऊं पतरस येरुशलेमं बापस पुजअ ता खतनं किये दै लोग लागै तेऊ संघे हठळदै कि 3 तंरें खतनै नाई किये दै लोग सेटा खाअ-पिअ? 4 तैबै पतरसै तिन्नां का शुरु का सारी गल्ला खोजी कि 5 हूँ त लागअ द याफा नगरी प्राथणां करदअ, और

बेहोश हुई करै भाळअ एक दर्शन कि एक तराणअ बडी चादरा जिहअ, चऊ कुणै का लटकाउअ द सरगा का मूँह सेटा लै आअ। 6 जांऊं मंएँ धैन दैनअ कि तेथ तै धरतिए चऊ पाऊए हांडणै आळै पशू और बणै पशू, रिंगणै आळै जंतू और चेलू पखिरू। 7 और मंएँ इहय शब्द शुणअ कि हे पतरस, उझू इन्ना मार और खा। 8 मंएँ बोलअ इहय कि नाई प्रभू, मंएँ नि अपबित्र और अशुध चिजा आझू तैणीं मुँहै लाई। 9 एते जबाबा दी सरगा का दुजी बारी शब्द शुळुअ कि 'जुण परमेश्वरै शुध किय, तेऊ लै नि तूह अशुध बोलै'। 10 चिई बारी हुअ इहय ई; एता बाद खिचअ सह तराणअ उजै सरगा लै। 11 और नढैऊए चून आदर्मी कैसरीआ का तै मूँह सेटा लै भेजै दै तेऊ घरा लै जिधी हूँ पाहुणअ त। तियां खट्ठुए दुआरा बागै। 12 तैबै पबित्र आत्मां बोलअ मुल्है तिन्नां पिछू चुप-चुपै नाशणा लै; और छः भाई आए होर बी मूँह संघे और हाम्हें नाठै तेऊ आदमीए घरा लै। 13 तेऊ खोजअ मुखा इहय कि तेऊ भाळअ एक स्वर्गदूत आपणै घरे खट्ठुअ द और तेऊ दुतै बोलअ इहय कि याफा का शाद शमीना जसा लै पतरस बोला। 14 तेऊ खोजणीं तम्हां का एही गल्ला, जसा करै ताह और तेरै घरानै मोक्ष भेटणअ। 15 जांऊं हूँ तिन्नां संघे गल्ला बाता लागअ ता तिन्नां लै उतरअ पबित्र आत्मां तिहअई करै; जिहअ करै हाम्हां लै आअ त। 16 तैबै आअ मूँह प्रभूओ सह बचन आद जुण तेऊ बोलअ त कि यहून्ना ता दैनअ पाणीं करै बपतिस्मअ; पर तम्हां भेटणअ पबित्र आत्मां करै बपतिस्मअ। 17 ऐबै जै परमेश्वरै तिन्नां लै बी दान दैनअ, जुण हाम्हां प्रभू यीशू मसीह दी विश्वास करी करै भेटअ, तै हूँ कुण त कि परमेश्वरा रोकी सका त? 18 इहय शुणीं करै हुए तियां चुपचाप और परमेश्वरे बडाई करी करै लागै बोलदै कि एबै ता परमेश्वरै होरी जाती लै बी दैनअ जिंदगी पाणां लै मन फिराईओ दान।

### अन्ताकिये कलीसिया

19 तियां सोभ लोग तेऊ शोग क्लेशे मारै जुण स्तिफनुसा करै पळअ त, गूए तै तित्तर बित्तर हई, तियां फिरदी-फिरदी फिनाके, कुप्रुस और अन्ताकिया पुजै, पर यहूदी छाडी नि तियां होरी कोही लै बचन शणांऊंदै तै। 20 पर तिन्नां मांझै तै कई कुप्रुसी और कुरेनी जुण अन्ताकिया एछी करै यूनानी लै बी प्रभू यीशूए सुसमाचारा शणांऊंदै लागै। 21 और प्रभूओ हाथ त तिन्नां परंदै और बडै भारी लोग फिरै विश्वास करी करै प्रभू बाखा लै। 22 तैबै तिन्नें चरचा येरुशलेमे कलीसिया का बी पुजी और तिन्नें भेजअ बरनबास अन्ताकिया लै। 23 सह तिधी पुजअ और परमेश्वरो गूण-जश भाळी करै हुअ सह खुश और सोभी लै इहय संदेश दैनअ कि मन लाई करै रहा प्रभूए चरणै। 24 किलहैकि बरनबास त एक भलअ आदर्मी और पबित्र आत्मां करै त परिपूर्ण; ता बडै भारी लोग आए प्रभू दी। 25 तैबै सह शाऊला लोळअ तरसुसा लै नाठअ। 26 और जांऊं तिन्नां का मिलअ ता सह आणअ अन्ताकिया लै। और इहय हुअ कि तियां रहै एकी साला तैणीं कलीसिया संघे मिलदै और कई लोगा लै उपदेशा दैन्दै, और प्रभू यीशू मसीहे चेलै लै बोलअ सोभी का पैहलै अन्ताकिया "मसीही"

27 तिन्नां धैळै कई भविश्याबगता येरुशलेमा का अन्ताकिया आए। 28 तिन्नां मांझै अगबुस नाओए एकी खळै हई करै पबित्र आत्मै प्रेरणा करै इहय खोजअ कि सारै संसारा दी पळणअ नकाळ, और सह नकाळ पळअ क्लौडिउसै जमानै। 29 तैबै चेलै इहय फैसलअ किय कि हरेक आपणीं-आपणीं पूजी का यहूदिया दी रहणै आळै भाईए सेऊआ लै किछ भेजा 30 और तिन्नें किय तिहअई और बरनबास और शाऊले हाथै प्राचीना सेटा भेजै ढबै धेल्लै।

### पतरसो जेहलखानै का छुटण

12 तेऊ जमानै लाअ हेरोदेस राजै कई विश्वासी भाई लै दुखा दैणा लै हाथ। 2 तेऊ पाअ यहून्नां भाई याकुब तलबारा करै मारी। 3 और जांऊं हेरअ कि यहूदी लोग हूआ एता करै खुशी; ता तेऊ ढाकअ पतरस बी; तियां तै अखमीरी रोटिए धैळै, 4 और तेऊ पाअ सह जेहला दी बंद करी, और बागै डाहै परहै लै चऊ बाखा चार-चार सपाही लाई, इहय सोची कि फसह बाद निणअ सह लोगा सहनै। 5 जेहला बागै त पतरसा लै परहअ पाअ द और सोभै विश्वासी भाई तै मिली करै प्राथणां दी लौलीन हुए दै।

6 जांऊं हेरोदेसे सह समनै लाअ त नि ता तेसाई राची त पतरस दुई शांघळी करै बाह्णअ द और दुई सपाही बिचै सुतअ द और पहरी तै राची दुआरै परहै दैन्दै लागै दै। 7 हेरा, तिधी आअ एक स्वर्गदूत और सह तिधी खट्ठुअ और तेसा खुडी चमकअ प्रेशअ और तेऊ पतरसे कुछी हाथा करै बाही और सह झैऊअ और तेऊलै बोलअ कि उझू, छेकअ कर, और तेऊए हाथै बाहिं दी शांघळी पळी धरनीं। 8 तैबै स्वर्ग दूतै तेऊ लै बोलअ कि गाची बाह्ण और आपणै बूट बी बाह्ण। पतरसै किय तिहअई। तेखअ दूतै बोलअ कि आपणै झिकळै बाहिं करै एछ मूँह पिछू। 9 सह तिधा का निखळअ और लागअ तेऊ पिछू हांडदअ; पर तेऊ का नि इहय थोघ बी त कि जुण अह दूत करदअ आसा लागअ द; अह सच्ची आसा कि नाई, और तेऊ समझअ कि हूँ आसा सुपनै भाळअ लागअ द? 10 तैबै तियां दुजै परहै निखळी करै पुजै लोहै परअऊळी सेटा, जुण नगरी बाखा त, सह खुली तिन्नां लै आपणै आप और तियां नाठै एकी गळीं बाती और तेतरी नाठअ स्वर्गदूत तेऊ छाडी करै। 11 तैबै पतरसै होशा दी एछी करै बोलअ कि, ऐबै गूअ मुखा थोघ लागी कि प्रभू छाडअ मुल्है हेरोदेस राजै हाथा का छडैऊणा लै स्वर्गदूत और यहूदिए सारी आशा की खतम।

12 और इहय सोची करै सह यहून्ने आममां मरिअमे घरा लै आअ, जसा लै मरकुस बोला, तिधी तै खास्सै जळै बैठै दै प्राथणां करदै। 13 जांऊं तेऊ दुआरै टक-टक किय ता एक रुदे नाओए दासी आई शूणीं। 14 पतरसे हाक शूणीं करै सह बडी खुशी-खुशी भितरा लै टुहरी और खुशिए मारै बिसरुई सह दुआरा खोळणै बी और तेसा खोजअ सोभी का कि पतरस आसा दुआरै खट्ठुअ द। 15 तिन्नें होरी बोलअ तेसा लै कि तूह हुई पागल, पर तेसा बोलअ होर बी विश्वासा संघे कि पतरस ई आसा। पर होरी बोलअ इहय कि तेऊओ स्वर्गदूत हणअ। 16 पर पतरस रहअ दुआरा टोकदअ लागी, जांऊं तिन्नें दुआर खोलअ ता तियां हुए रहैन परशेन। 17 तैबै पतरसै तिन्नां लै हाथा करै शारअ किय कि चुप्पी रहा और तिन्नां का खोजअ कि प्रभू किहय करै काढअ हूँ जेहला का बागै। और तेखअ बोलअ तेऊ इहय कि याकुब और होरी भाई का बी खोजै एसा गल्ला। और एता बाद पतरस तिधा का नाठअ दुजी जैगा लै।

18 दोती दोथी हुई सपाही बिचै बडी हलचल कि पतरस केसी नाठअ! 19 जांऊं हेरोदेस तेऊ लोळअ लागअ ता तेऊ नि सह भेटअ; तैबै तेऊ पहरीए जाच पड़ताळ की और तियां पाए मारी; और सह रह यहूदिया छाडी कैसरिआ दी।

### राजै हेरोदेसे मौत

20 हेरोदेस राजअ त सुर और सैदा देशे लोगा का नराज; ता तियां एक मन हई करै तेऊ सेटा आए और बलास्तुसा जुण राजेओ करमचारी त, मनैऊँई करै चाहअ मेल मलाप करनअ किलहैकि राजे देशा करै हूआ त तिन्नें देशो पाळण-पोशण। 21 और राजै बोलै दै धैळै हेरोदेस हारशंगार करी करै सिंहासणा दी बेटअ और तिन्नां लै लागअ ब्याख्यान करदअ। 22 और लोगै पुकारी एही गल कि अह ता मांळूओ नि अह आसा परमेश्वरो शब्द। 23 और तेसाई बगती प्रभूए स्वर्गदूत आअ और हेरोदेस पाअ मारी; किलहैकि तेऊ नि परमेश्वरे महिमा की और सह मूँअ कीळै पळी करै।

24 पर परमेश्वरो बचन लागअ बढदअ और फैलदअ

25 जांऊं बरनबास और शाऊल आपणीं सेऊआ पूरी करी मुकै, ता यहून्ना, जसा लै मरकुस बोला, तेऊ संघा आणीं करै फिरै येरुशलेमा लै बापस।

### बरनबास और शाऊल भेजणै

13 अन्ताकिया कलीसिया दी थियै कई भविश्याबगता और उपदेशक, अर्थात-बरनबास और शमोन जसा लै नीगर बोला; और लुकियुस करेनी, देशे चौथाईए राजै हेरोदेसो दुधभाई मनाहेम और शाऊल। 2 जांऊं तियां ब्रता डाही करै प्रभूए उपासना करदै तै लागै दै, ता पबित्र आत्मां बोलअ, "मुल्है करा बरनबास और शाऊला मेरै तेऊ कामां लै जुदै जसा लै मंएँ तियां शाद दै आसा।"

### पौलुसे पैहली प्रचार यात्रा

3 तैबे तिन्नें उपबास और प्राथणां करी करै तिन्नां दी हाथ डाहै और तियां कियै बिदा। 4 तियां भेजे पबित्रात्मां सलुकिआ लै और तिधा का जहाजा दी बेशी करै नाठै तियां कुपुसा लै। 5 और सलमिसै पुजी करै परमेश्वरो बचन यहूदिए आराधनालै दी शणांऊअ; और यहूना त तिन्नो सेऊआ चाकरी करदअ। 6 और तेऊ सारै टापू का हंदी तियां पुजै पाफुस। तिधी भेटअ तिन्नां बार-यीशू नांओं एक यहूदी जादू टोणै करदअ और सह त झूठअ भबिशयाबगता। 7 सह त सिरगिउस पौलुस सुबै संघा, जुंण बुधिमान आदमीं त; और सह चाहा त बरनबास और शाऊला आपू सेटा शादी करै परमेश्वरो बचन शुळणअ। 8 पर इलिमास टोन्है, किल्हैकि, अह आसा तेऊए नांओं अर्थ, किय बिरोध, और सह रह हाकिमा विश्वासा करनै का रोकदअ लागी। 9 तैबे शाऊलै, जसरअ नांअ पौलुस बी आसा, पबित्र आत्मां करै भरुई तेऊलै टकटकी लाई करै बोलअ कि 10 "हे सारै कपट और चलाकी करै भरुए दै शैताने शोहरुआ, सकल धर्म बैरीआ, तंणें प्रभूओ सिधअ रसतअ टेढअ करनअ लाअ छाडी कि नाई? 11 एबै भाळ, प्रभूओ हाथ आसा ताह परेदें लागअ द; और तूह रहणअ थोळै धैळै काणअ और ताखा निं सुरज धेछणअ: तैबे नढैऊए तेऊए आच्छी हुई कार्णीं और तेऊ का धेछुअ न्हैरअ और सह लागअ ओही-पोही ठणाकदअ कि तेऊओ कुण हाथ ढाके। 12 तैबे सुबै प्रभूए उपदेशा शुणीं हूअ रहैण और जुंण तिधी हुअ त तेता भाळी करै किय विश्वास।

### पिसदिये अन्ताकिया दी

13 पौलुस और तेऊए साथी पाफुसा का जहाज खोळी करै पुजै पंफुलिआ देशे पिरगा और यहूना नाठअ तिन्नां छाडी करै येरुशलेमा लै बापस फिरी। 14 और पिरगा का आजू नाशी करै पुजै तियां पिसदिआ देशे अन्ताकिया और सबते धैळी तियां आराधनालै दी नाशी बेटै। 15 तिधी व्यवस्था और भबिशयाबगते कताबा पढळणै बाद सरदारै तिन्नां लै बोलअ कि भाईयो, जै लोगा लै उपदेश दैणां लै थारै मनै किजै आसा ता तै बोला। 16 तैबे पौलुसै खळै उड्डई करै हाथा करै शारअ करी करै बोलअ कि हे इस्त्राएलीओ और परमेश्वरा का डरनै आळैओ, शुणां। 17 इन्नां इस्त्राएली लोगे परमेश्वरै म्हारै दाद बाब चुनै और जधू ईयां मिसर देशे परदेसी हुई करै रहा तै, ता तिन्नें की बडी भारी तरक्की; और आपणीं बलबंत भुजा करै आणै तिधा का छडैऊई। 18 और चाहळी साला तैणीं रह सह तिन्नें जंगलै सेहंदअ लागी। 19 और कनान देशे साता ज्ञातीओ नाश करी करै तिन्नें देश कोई साढे चार शौआ साला लै दैनअ इन्नां लै रहणा लै। 20 एता बाद तेऊ सामुएल भबिशयाबगता तैणीं बणांणै न्यायी। 21 एता बाद मांगअ तिन्नें एक राजअ, तैबे परमेश्वरै चाहळी साला तैणीं बिन्धामीन गोत्रा का दैनअ तिन्नां लै एक माळू किशो शोहरु शाऊल तिन्नां लै राजअ बणांणै। 22 तेखअ कीय सह दूर और तेऊ बाद बणांणै दाऊद राजअ; जसरै बारै तेऊ ग्वाही दैनी कि मूँह आसा गुअ द आपणै मना मताबक एक माळू यिथैओ शोहरु दाऊद भेटै। तेऊई करनी मेरी इछा पूरी। 23 और तेऊए ई खानदानी का परमेश्वरै आपणीं प्रतिज्ञा जुंण की ती तेते साबै इस्त्राएला सेटा एक मोक्ष दैणै आळअ भेजअ, अर्थात यीशू मसीह। 24 जसा एछणै का पैहलै यहूना सोभी इस्त्राएली लै मना बदळणैओ बपतिस्मैओ प्रचार किय। 25 जांऊं यहूना आपणीं फेरी पूरै करनै आळअ त, ता तेऊ बोलअ इहय कि तम्हें मूँह किजै समझा? हूँ निं सह आथी! हेरा, मूँह बाद आसा एक एछणै आळअ, हूँ निं तेऊए पैरे जुती खोळणै लाईक बी आथी।

26 हे भाईयो, तम्हें जुंण इबराहिमे संताना आसा, और तम्हें जुंण परमेश्वरा का डरा, तम्हां सेटा आसा हेरअ द सह उदधारो बचन भेजी। 27 किल्हैकि येरुशलेमां दी रहणै आळै और सरदारै निं सह बछेणअ, और भबिशयाबगते गल्ला निं समझी जुंण हर सातुए धैळै पढळी करा, इहय करै तेऊ लै दोश लाई की तियां गल्ला पूरी। 28 तिन्नां निं मारनै जोगी तेऊ दी किछै दोष भेटअ, तैबी बी की तिन्नें पिलातुसा का अरज कि एऊ पा मारी। 29 और जांऊं तिन्नें तेऊए बारै लिखी दी गल्ला पूरी की, ता सह तिन्नें कूसा का थुआळी डाहअ कबरा दी

बंद करी। 30 पर परमेश्वरै किय सह मूँणें दै बिचा का जिऊंदअ। 31 और सह रहअ तिन्नां संघे खास्सै धैळै तैणीं खांदअ-पिंदअ और धेछदअ लागी जुंण गलीला का तेऊ संघे आए दै थिये; लोगा सहनै आसा एबै तियां बी तेऊए गुआह। 32 और हाम्हेँ शणांऊआ तम्हां का तेसा प्रतिज्ञे बारै, जुंण म्हारै बाब दादै का की थी; सुसमाचार। 33 कि परमेश्वरै प्रभू यीशू जिऊंदै करी करै, सहैई प्रतिज्ञा म्हारी संताना लै पूरी की, जिहअ भजना दी बी आसा लिखअ द कि

'तूह आसा मेरअ पुत्र,  
आझ् ई आसा किय द तूह मंणें पैदा'।

34 और तेऊए एसा रिती मूँणें दै का जिऊंदै करने बारै बी कि सह निं कधि लोळी शळअ, तेऊ आसा बोलअ द इहय कि  
'मूँह करनी दाऊद पबित्र और अटळ किरपा  
तम्हां लै'।

35 तैहीता तेऊ एकी होरी भजना दी बी आसा बोलअ द कि 'ताह निं आपणें पबित्र जना शळणें दैणअ'।

36 किल्हैकि दाऊद ता परमेश्वरे इच्छा दी आपणें जमाने सेऊआ करी करै मूँअ और आपणें बाब दादै सेटा लै नाठअ और शळअ बी। 37 पर जुंण परमेश्वरै जिऊंदअ किय, सह निं चिजअ-शळअ आथी। 38 तैहीता हे भाईयो, एसा गल्ला लुए तम्हें समझी कि एऊई करै भेटा तम्हां पाप क्षमा करनेओ सुसमाचार। 39 और जसा गल्ला करै मूसा नबिए व्यवस्था करै निर्दोश निं हूई सकदें तै, तिन्नां सोभी का एक विश्वास करनै आळअ हूआ यीशू करै निर्दोश। 40 एते तैणीं रहा चतैन, इहय निं हूआ कि जुंण भबिशयाबगते कताबा दी आअ द आसा सह तम्हां परेदें बी एछे कि,

41 'हे निन्दा करनेआळैओ,  
भाळा, और झशकिया,  
और खतम हूआ।

किल्हैकि मूँह करनअ थारै धैळै  
इहय काम,

इहय काम कि जै तम्हें तेते चरचा शुणें,  
ता तम्हें निं कधि तेतो

भरोसअ करनअ।

42 तिन्नें बागै निखळदा ई लोगे की तिन्नां का अरज कि आगलै हबलै शणांऊणें हाम्हां का इन्नां गल्ला भी। 43 और जांऊं सभा उड्डई ता यहूदी और यहूदी मत्ता दी आए दै मांझै कई हुए बरनबास और पौलुसा पिछू; और तिन्नें तिन्नां का गल्ला करी करै समझाऊए कि परमेश्वरे गुण-जशा दी रहा बणीं।

### पौलुसा करै होरी ज्ञाती बिचै प्रचार शुरू करनअ

44 आगलै हबलै नगरीए सोभ लोग हुए परमेश्वरे बचना शुणें कठा। 45 पर यहूदी तिन्नां खास्सै लोगे फुंडा भाळी जळै दिला का और निंदा करदी लागै पौलुसे गले बिरोधा दी बोलदें। 46 तैबे पौलुस और बरनबासै नडर हूई करै बोलअ, अह थिय जरूरी कि परमेश्वरो बचन शणांऊणअ पैहलै तम्हां का; पर जै तम्हें तेऊ दूर करा और आपणें आप अनंतजिऊणा जोगी नाई बणां, ता भाळा, हाम्हां फिरनअ होरी ज्ञाती बाखा लै। 47 किल्हैकि प्रभू आसा दैनी दी हाम्हां लै अह आज्ञा कि

'मंणें आसा तम्हें होरी ज्ञाती लै ज्योती  
बणांई दी,

ताकि पृथुईए कूणै-कूणै तैणीं मोक्षे  
दूआर होए।

48 इहय शुणीं करै हुए होरी ज्ञातीए खुशी, और तियां लागै परमेश्वरे बचने बडाई करदें और जेतरे अनंत जिऊणा लै चुनै तै तिन्नें किय सोभी विश्वास। 49 तैबे लागअ प्रभूओ बचन सारै देशै फैलदअ। 50 पर यहूदी खानदानी बेटळी, भगत और नगरीए बडै लोग उकसाऊए और पौलुस और बरनबासा लै उपद्रभ करी करै काढै तियां तिधा का बागै। 51 तैबे तियां तिन्नें सहनै पैरा का धूळअ तुळकी करै नाठै इकुनियुमा लै 52 और चेलै रहै आनंद और पबित्र आत्मां करै परिपूर्ण हंदै लागी।

### इकुनियुमें पौलुस और बरनबास

**14** इकुनियुमें हुअ इहय कि तियां नाठै यहूदिए आराधनालै लै संघा-संघा, और तिन्नै की एही गल्ला कि यहूदी और यहूनानि बिचै किय कई लोगे विश्वास। 2 पर जसा नाई मनणअ त, तिन्नै यहूदी उकसाऊरे होरी जातीए लोग तिन्नां भाईए खलाफ, और कई बगाळे किये। 3 और तियां रहै कई धैळै तैणीं तिधी और प्रभूए भरोसै बडी हिम्मता संघे लागै बचना शणाऊंदै। और प्रभू बी दैआ त तिन्नै हाथै बडै-बडै चिन्ह रहैऊई करै और अद्भुत नोखै काम करी करै गूण-जशे बचने ग्वाही। 4 पर नगरीए लोगा बिचै पळी फूट, और इहय करै कई हुए यहूदी बाखा लै और कई हुए प्रेरिता बाखा लै। 5 पर जाऊं होरी जातीए लोग और यहूदी तिन्नां लै बुराई करना लै और तिन्नां लै पाथरे ढोआ दैणा लै यहूदी और तिन्नै सरदारा संघी आये। 6 ता तिन्नां का गअ एसा गल्लो थोघ लागी, और तियां भागै लूकाऊनिए लुस्त्रा और दिरबे नगरी लै और ओरी-पोरीए देशा लै। 7 और तिधी रहै सुसमाचार शणाऊंदै लागी।

### लुस्त्रा और दिरबे दी

8 लुस्त्रा नगरी त एक आदमी बेटअ द सह त जल्मां ओर्ही लैगळअ और तेऊए नि हांडदअ त और आपणीं जिंदगी निं सह किधि हांडअ-फिरअ त। 9 सह त पौलुसा लागअ द गल्ला करदैं शुणअ और पौलुसै भाळअ तेऊ बाखा लै टकटकी लाई करै कि एऊ आसा ठीक हणैओ विश्वास। 10 और पौलुसै जोरै बोलअ कि आपणें पैरा दी खटळू सिधअ, तैबे सह छाहळ दैई करै लागअ हांडदअ-फिरदअ। 11 लोगे पौलुसे एऊ चमत्कारा भाळी करै लूकाऊनिए बोली दी बोलअ कि देबते होथे हाम्हां बिचा लै। 12 और तिन्नै बोलअ बरनबास लै, ज्यूस और पौलुसा लै हिरमेस देबतअ किलहैकि सह त गल्ला करना लै मुखिअ। 13 और ज्यूस देबतेए मांदरे पज्रैरे जुण तेसा नगरी सहनै त, तेऊ एक मिम्मू और फूलै हार नगरीए प्रऊळी सेटा आणें तिन्नां लै बळी चढाऊणा लै। 14 पर जाऊं बरनबास और पौलुस प्रेरिता का इहय थोघ लागअ ता तिन्नै आपणें झिकळै धैळै और लोगा बिचा लै तुहरै संघा तिन्नै जोरै-जोरै बोलअ इहय कि हे लोगो, तम्हें अह किजै लाअ करी? 15 हाम्हें बी आसा तम्हां जिहै ई दुखा-सुखा भोगणें आळै आदमीं, और तम्हां का शणाऊंआ सुसमाचार कि तम्हें इन्नां बेकार जिजा का जुदै हई करै जिऊंदै परमेश्वरा बाखा लै फिरा, जुणीं सरग, धरती, समुंदर और जुण बी तेथ दी आसा, सोभै गल्ला बणाई। 16 तेऊ दैनअ आझा का पैहलै जमानें सोभी जाती आपणीं-आपणीं बाता हांडणें। 17 तैबी बी निं सह आप्पू गुआह बिणहीं रहअ; पर भलाई रहअ करदअ लागी और सरगा का पाणीं बरशाऊंदअ, फळै फळूटे ऋतू दैदअ और थारै मना रहअ रोटी-पाणीं करै बडी खुशी दी भरदअ लागी। 18 और इहय बोली करै बी तिन्नै तियां बडी मुशकळ जाई करै बळी करनै का रोकै कि तिन्नां लै बळी निं करा।

19 पर कई यहूदी अन्ताकिया और इकुनिअम का एछी करै तियां लोग किये आप्पू बाखा लै और पौलुसा लै दैनअ पाथरो ढो और तिन्नै मूँअ द समझी करै नियं सह घिशी करै नगरी बागा लै। 20 पर जाऊं होर चेलै आये और तेऊ फेर खटळुए, ता सह उझुअ खळअ और तेखअ नाठअ नगरी भितरा लै; ता दुजै धैळै नाठअ बरनबासा संघे दिरबे लै।

### सीरिया देशे अन्ताकिया लै बापस फिरनअ

21 और तियां तेसा नगरीए लोगा लै सुसमाचार शणाऊंई करै, कई चेलै बणाई करै लुस्त्रा और इकुनिअम बाती फिरै अन्ताकिया लै बापस। 22 और तियां रहै चेलैए मना स्थिर करदैं उपदेशा दैन्दै कि हाम्हां लागणअ बडै क्लेश भोगी करै परमेश्वरे राजा दी नाशणअ। 23 तेखअ बणाणें तिन्नै हरेक कलीसिया दी तिन्नां लै मुखियै, और उपबासा संघे प्राथणा करी करै सबाळै तियां प्रभूए हाथे जहा दी तिन्नै विश्वास किय त।

24 तेखअ पुजै तियां पिसदिआ बाती हांडदी पंफुलिआ। 25 तिधा का पिरगा नगरी बचन शणाऊंई करै पुजै तियां अटालिआ; 26 ता; तिधा का बेटै तियां जहाजा दी और अन्ताकिया लै आये जिधा का तियां तेऊ कामां लै जुण

परमेश्वरे गूण-जशा दी तिन्ना का सभाळअ त और जुण तिन्नै पूरअ किय त। 27 तिधी पुजी करै तिन्नै कलीसिया कठा की और तिन्नां सोभी का सोभ गल्ला खोजी कि तिन्नां संघे हई करै परमेश्वरै किहै-किहै बडै-बडै काम कियै और होरी जाती लै बी खोलअ विश्वासा करना लै दुआर 28 तेखअ रहै तियां चेलै संघे खास्सै धैळै तिधी।

### येरुश्लेमें सभा

**15** तेखअ आये कई लोग यहूदिया का और तियां लागै विश्वासी भाई लै इहय सखाऊंदै कि जै मूसा नबीए रिती रबाजे साबै थारअ खतनअ नाई होए ता तै निं तम्हें मोक्ष भेटी सकदअ। 2 जाऊं पौलुस और बरनबासो तिन्नां संघे बडअ भारी झगळअ और बाद-बिबाद हुअ, ता इहय फैसलअ हुअ कि पौलुस, बरनबास और हामा मांझै कई होर भाई एसा गले बारै फैसलै लै नाशा येरुशलेमा लै प्रेरिता और प्राचीना सेटा लै। 3 तैबे मंडळी तियां बिदा किये और दूर तैणीं दैनै छाडी। तेखअ तियां फिनाकै और सामरिया बाती होरी जातीए मना बदळणें समाचार नाठै शणाऊंदी और सोभी भाई लै दैनअ बडअ आनंद। 4 जाऊं तियां येरुशलेमै पुजै ता कलीसिया, प्रेरित और प्राचीन तिन्नां संघे बडी भारी खुशी संघे मिलै। और तिन्नै बी खोजअ कि परमेश्वरै तिन्नां संघे रही करै किहै-किहै काम किये। 5 पर फरीसिए पंथा का जुण विश्वासा दी आये तै, तिन्नां बिचा का कई बोलअ इहय कि, तिन्नां लै खतनै करने और मूसा नबीए व्यवस्था मनणें आज्ञा चाहिए दैणीं।

6 तैबे प्रेरित और प्राचीन एसा गले बारै बचारा करदैं हुए कठा। 7 खास्सै हठळणें का बाद पतरसै खळै ऊझुई करै तिन्नां सोभी लै बोलअ, हे भाईयो, तम्हां का आसा थोघ कि खास्सै धैळै एतेसा गल्ला बिती कि परमेश्वरै चुनअ हूँ तम्हां बिचा का कि मेरै मुंहां का होर जाती बी सुसमाचार शुणीं करै विश्वास करे। 8 और मनै गल्ला परखणेंआळै परमेश्वरै तिन्नां लै बी हाम्हांई जेही पबित्र आत्मां दैई करै तिन्नै ग्वाही दैनीं। 9 और विश्वासा करै तिन्नै मन शुध करी करै हाम्हां और तिन्नां दी निं किछै भेद डाहअ। 10 ता एबै किलहै आसा तम्हें लागै दै परमेश्वरा परखदै? कि चेलैए कैळै पाणअ इहय जूँ कि जसा ना म्हारै बाब दादैं चकी सकै और ना हाम्हें चकी सकदैं। 11 पर हाँ, म्हारअ आसा इहय प्रण कि जेसा रिती तिन्नां प्रभूए क्रिपा दी उद्धार पाणअ, तेसाई रिती पाणअ हाम्हां बी।

12 जाऊं सारी सभा चुपचाप हई करै बरनबास और पौलुसे गल्ला शुणदी लागी कि परमेश्वरै तिन्नां करै होरी जाती दी किहै-किहै चिन्ह और अद्भुत काम कीये। 13 जाऊं तियां चुप हूए ता याकुब लागअ बोलदअ इहय कि 14 हे भाईयो, मेरी गल्ला शुणां, शमोने बोलअ इहय कि परमेश्वरै पैहलै-पैहल होरी जाती लै केही किरपा दृष्टि की कि तिन्नां बिचा का आपणें नाओआ लै लोगा बणाणें। 15 एता संघे मिला भबिशयाबगते ईयां गल्ला; जिहअ शास्त्रा दी लिखअ द आसा कि

16 एता बाद चकणअ मूँह भी दाऊदो दूळअ द डेरअ और तेऊए दुळै दै घरे मेट करनै मूँह दबारै खळै।

17 तैहीता कि बचै दै माळूँ, अर्थात जुण होर जाती बी जुण मेरै नाओए आसा, तियां बी प्रभू लोळे।

18 अह बोला सहैई प्रभू जुण संसारे उत्पति का इन्नां गल्लो समाचारा आसा दैदअ लागअ द। 19 तै आसा मेरअ बचार इहय कि होरी जाती का बी जुण लोग परमेश्वरा बाखा लै फिरा, तिन्नां लै निं दुख दैआ। 20 पर तिन्नां लै भेजा इहय लिखी करै कि, तियां मुरतिए अशुधता, भ्यबिचार और मरोकै दै मासा और लोहू का रहा दूर। 21 किहैल्कि पराणें जमाने ओर्ही नगरी-नगरी मूसा नबिए व्यवस्था आये प्रचार करदी और हर सातुए धैळै पट्टा इन्नां आराधनालै दी।

### होरी जातीए विश्वासी लै चिठी

22 तैबे सारी कलीसिया संघी प्रेरित और प्राचीना बी लागी अह गल बधिया कि आप्पू बिचा का चुना कई आदमीं, अर्थात- यहूदा जसा लै बरस्बा बोला और सिलासा, जुण होरी भाई मांझै मुखियै तै, तिन्नां भेजा पौलुस और बरनबासा संघे अन्ताकिया लै। 23 और तिन्नै हाथे भेजअ इहय लिखी कि

अन्ताकिया, सुरिआ और किलकिया दी रहणें आळे भाईयो जुंण होरी ज़ाती का आसा, प्रेरित और प्राचीन भाईए तरफा का नमस्कार! 24 हाम्हेँ शुणअ इहय कि हाम्हा मांझै कई तिधी एही करै झूँकए तम्हेँ आपणीं गल्ला करै, और थारै मन उल्टाऊए तिन्नै, पर हाम्हेँ निं तिन्नां लै एसा गल्ला करनै आज्ञा देनीं ती। 25 तैहीता ऐबै हाम्हेँ एक मन हई करै ठीक-ठाक समझअ कि चुनै दै माळू, संघा भेजै हाम्हेँ आपणें प्यारै बरनबास और शाऊल तम्हां सेटा लै। 26 ईयां दूई आदमीं आसा ईहै जुंणीं आपणें प्राण बी म्हारै प्रभू यीशू मसीहे नांओआ लै खातरै दी पाए। 27 और हाम्हेँ भेजै यहूदा और सीलास बी, और तिन्नां हेरनिं सारी गल्ला आपणें मूहा का बी तम्हां का खोजी। 28 पबित्रात्मां, और हाम्हां लागी एही ठीक कि ज़रूरी गल्ला छाडी निं तम्हां लै होर किछे बोझ पाणअ, 29 कि तम्हेँ मुरती सहनै बळी किये, और खूना का, और मरोकी करै मारै दै मासा का और भ्यभिचारा का रहै दूर। इन्नां सोभी गल्ला का जै तम्हेँ दूर रहे, तै हणअ थारअ भलअ। और होर आजू तम्हां सोभी लै शुभकामना।

30 तेखअ तियां बिदा हई करै अन्ताकिया पुजै, और सभा कठा करी करै चिठी पढळी। 31 और तियां हुए पढळी करै उपदेश गल्ला शुणीं बडे भारी खुश। 32 और यहूदा और सिलास तै आपू बी भविश्याबगता, तिन्नै बी कई गल्ला करै चेलै किये स्थिर। 33 तैबै तियां थोळै धैळै तिधी रही करै तिन्नां भाई का बडी शांती दी बिदा हुए कि आपणें भेजणें आळे सेटा नाशे। 34 पर सिलासा लागअ तिधी रहणअ शोभलअ। 35 ता पौलुस और बरनबास रहै अन्ताकिया दी और होर बी कई लोगा संघे रहै प्रभूए बचना बांडदै और सुसमाचारा शणांऊदै लागी।

### पौलुसे दुजी प्रचार-यात्रा पौलुस और बरनबासा बिचै मतभेद

36 थोळे धैळै बाद पौलुसै बरनबासा लै बोलअ कि जसा-जसा नगरी हाम्हेँ परमेश्वरो बचन लोगा का शणांऊअ द आसा, चाला, हाम्हां एछणीं तिन्नां भाईए हेर सभाळ करी कि तियां किहै आसा? 37 तैबै बरनबासै यहूना जसा लै मरकुस बोला, संघा निणेंओ बचार किय 38 पर पौलुसै किय नाई किलहैकि किलहै कि सह हुअ त पिछली बारी पंफुलिया दी जुदअ और कामाले निं तिन्नां संघे नाठअ त। 39 और तिन्नां बिचै हई एही दूई गल्ला कि तियां हुए आप्पूई मांझै जुदै। तैबै बरनबास नाठअ मरकुसा संघा निई करै जहाजा दी कुप्रुसा लै, 40 पर पौलुसै चुनअ सिलास और होरी भाई का परमेश्वरे हाथे सभाळी करै चलअ 41 और पौलुस कलीसिया स्थिर करदी, सुरिआ और किलकिया बाती हांडदी निखळअ।

### पौलुसो तिमूथियुस संघा नीणअ

16 तेखअ नाठअ सह दिरबे लुस्त्रा लै बी, और भाळा, तिधी त एक तिमूथियुस नांओ एक चेलअ, सह त एकी विश्वासी यहूदिनिओ चेलअ पर तेऊओ बाब त युनानी। 2 तेऊओ त लुस्त्रा और इकुनिउमें सोभी भाई बिचै भलअ नांअ। 3 पौलुसै चाहअ इहय कि अह निणअ मूह आपू संघे और जुंण यहूदी लोग तिन्नां जैगा थिये; तिन्नै तैणीं किय पौलुसै तिमूथियुसो खतनअ; किलहैकि तिन्नां का बी त थोघ कि एउओ बाब आसा युनानी। 4 और नगरी-नगरी नाशदी तियां तिन्नां बिधी बधाना जुंण येरुशलैमा का प्रेरितै और प्राचीनै ज़रूरी समझै तै तिन्नां मनणा लै रहा तै तियां पजैळदै लागी। 5 इहय करै रही कलीसिया स्थिर हंदी लागी और गिणती दी रही हर धैळै बढदी लागी।

### त्रोआसै पौलुसो दर्शन

6 और तियां फूगिआ और गल्लातिआ देशा बाती नाठै और पबित्र आत्मां किय तिन्नां लै एशीआ दी बचन शणांऊणा लै नाई। 7 और तियां मुसिआ नेळ पुजै और तिन्नै चाहअ बितूनिया लै नाशणअ पर प्रभू यीशूए आत्मां निं तिन्नां तिधा लै नाशणें दैनअ। 8 तैबै तियां मुसिआ बाती हंदी नाठै ता तियां पुजै त्रोआसा। 9 और पौलुसै भाळअ राची एक दर्शन कि एक मकिदुनिआ आदमीं खहळूअ और तेऊ अरज करी करै बोलअ पारा बाखा उतरी करै एछ मकिदुनिआ लै और म्हारी मदद कर। 10 और तेऊए दर्शना हेरदी चाहअ

हाम्हेँ तेभी मकिदुनिआ लै नाशणअ, ईहअ सोची करै कि परमेश्वरै आसा हाम्हेँ सुसमाचारा शणांऊदै शादै दै।

### फिलिप्पी देशै; लुदिया नांऊए बेटळीओ दिल बदळणअ

11 तैहीता, त्रोआसा का जहाज खोलही करै हाम्हेँ सिधै सुमात्रा और दुजै धैळै पुजै निआपुलिस। 12 तिधा का पुजै हाम्हेँ फिलिपी जुंण मकिदुनिया देशे बडी नगरी आसा और रोमीए बस्ती आसा। और हाम्हेँ रहे तेसा नगरी थोळै धैळै। 13 सबते धैळी नाठै हाम्हेँ नगरी बागै नदीए कनारै इहय समझी करै कि तिधी भेटणीं हाम्हां शांत प्राथणा करनै जैगा; और तिधी पुजी करै बेठै और तिधी जुंण बेटळी कठा ती हई दी तिन्नां संघे लागै गल्ला करदै। 14 और लुदिया नांओए थुआथिरा नगरीए बेंजणीं रांगे झिकळै बेचणें आळी एक भगत बेटळी ती शुणीं लागी दी और प्रभू तेसरअ मन खोलहअ ताकि पौलुसे गल्ला दी मन लाए। 15 और ज़ांऊ तेसा पूरै घराने संघी बपतिस्मअ लअ ता तेसा की अरज कि जै तम्हेँ मूह प्रभूए विश्वासण समझा ता तै रहा तम्हेँ मेरै घरै। और तेसा नियें हाम्हेँ मनैऊंई।

### पौलुस और सीलास जेहलखानें दी

16 ज़ांऊ हाम्हेँ प्राथणा करनै जैगा लै तै नाशदै लागै दै; ता तिधी भेटी हाम्हां एक दासी और तेसा दी ती भाबी बोळणें आळी दुष्टात्मां; और भाबी बोली करै खटा ती सह कई ढबै आपणें मालका लै। 17 सह लागी हाम्हां और पौलुसा पिछू एछी करै लैळा लांदी कि ईयां आसा माळू आसा परमप्रधान परमेश्वरे दास, जुंण हाम्हां का उद्दारे कथैआ शणांऊआ। 18 सह रही कई धैळै तैणीं इहय ई करदी लागी, पर पौलुस हुअ बडअ भारी दुखी, और मूह फरेऊई करै तेसा आत्मा लै बोलअ, "हू बोला तालहै यीशूए नांऊए कि एसा का निकळ पोही!" और सह आत्मा निखळी तेभी पोही।

19 ज़ांऊ तेसरै मालकै भाळी कि म्हारी कमाईए आशा हई ऐबै खतम, ता तिन्नै पौलुस और सीलास ढाके और तियां आणें चफे दी प्रधाना सहनै लै खिंची करै। 20 और तिन्नै फौजदारीए हाकमा सेटा नाशी करै बोलअ, "ईयां लोग जुंण यहूदी आसा, इन्नै लाअ म्हारी नगरी बडअ उळटफेर करी। 21 और एही गल्ला लाई इन्नै खोजी कि तियां ग्रहण करनीं या मनणीं आसा रोमीं लै बुरी। 22 ज़ांऊ भीळै लोग तिन्नां लै कठा हई करै चिकदै आए ता हाकमै तिन्नै झिकळै धेळै और तिन्नां लै देनीं बैता करै चिकणें आज्ञा। 23 और बडे भारी बेंत बाही करै पाए तियां जेहला दी बंद करी, और दरोगे लै दैनअ हुकम कि इनो डाहै धैन। 24 और दरोगे बी एही आज्ञा शुणीं करै डाहै तियां भितरली खुडी बंद करी और तिन्नै पैर डाहै काठा दी टोकी।

### पौलुस और सीलासो जेहलखानें का छुटणअ

25 आधी राचीए बगती पौलुस और सिलास तै लागै दै प्राथणां करदी भजनां गांदै और तियां होर कैदी तै शुणें लागै दै। 26 हेरा-हेरी हई तिधी जाजरी और इधी तैणीं कि जेहले आथरी हिली-चुकी, और नढेऊए दुआर खुलहै और सारै बंधन बी खुलहै। 27 और दरोगअ उझुअ खळअ, और जेहले दुआर खुलहै भाळी करै तेऊ सोचअ इहय कि तियां कैदी भागै, ता तेऊ तलबार काढी और आपणें आप चाहअ तेऊ मरनअ। 28 पर पौलुसै जोरै हाक पाई बोलअ कि आपू लै निं किछ करी, हाम्हेँ सोभै आसा इधी। 29 तैबै तेऊ लाटू शादअ और सह नाठअ भितरा लै और झिळदी-कांबदी पौलुस और सिलासे पैरै पळअ। 30 और तियां आणें तेऊ बागा लै और बोलअ, हे सहाबो, मोक्षा पाणां लै हूँ कै करूँ? 31 तिन्नै बोलअ, प्रभू यीशू मसीह दी कर विश्वास, तै भेटणअ ताह और तेरै घराने उद्धार। 32 और तिन्नै तेऊलै और तेऊए सारै घराने का प्रभूओ बचन शणांऊअ। 33 और राची तेसाई घळी तेऊ तियां नियें और तिन्नै ज़खम धोए और पौलुसै दैनअ तिन्नां लै बपतिस्मअ। 34 और तेऊ तियां आपणें घरै निई करै तिन्नां का रोटी पाणीं खैऊई-पणेंऊंई और सारै घराने संघी परमेश्वरा दी विश्वास करी करै भेटअ तिन्नां बडअ भारी आनंद।

35 ज़ांऊ दुजी धैळी हई ता, हाकमै आपणें सपाहीए हाथे फैळअ भेजअ कि तिन्नां माळू छाडा पोही। 36 दरोगे खोजी ईयां गल्ला पौलुसा का कि हाकमै देनीं तम्हां छाडणें आज्ञा और ऐबै नाशा तम्हेँ राम्बळै करै। 37 पर पौलुसै तेऊ लै

बोलअ, तिन्नै हाम्हां लै जुंण रोमीं माह्णु आसा, बिणां कोई दोषै हाम्हेँ सोभी लोगा सहनैँ चिकैँ और जेहला दी बी पाए, ऐबै बोला कि चुपचुपै नाशा? इहय निं हंदअ, पर तिन्नां बोला इहय कि आप्पे एछा इधा लै और तेखअ नियां हाम्हां बागा लै। 38 तिन्नैँ सपाही बी खोजी सारी गल्ला हाकमा सेटा, और तियां इहय शुर्णी करै कि ईयां आसा रोमीं तियां डरै। 39 और तिन्नैँ आप्पे एछी करै तियां मनैँऊरें, और बागै निं करै की एही अरज कि एसा नगरी का नाशा दूर 40 तियां जेहला का निखळी करै लुदिए घरा लै नाठै, और होरी भाई सेटा मिली करै तिन्नैँ तिन्नां लै शांती दैनी, और तेखअ लागै तियां तिधा का हांडदै।

### थिस्लुनीके नगरी दी

17 तेखअ तियां अम्फिपुलिस और अपूलोनिआ बाती थिस्सलुनके नगरी आए, और तिधी त यहूदिओ एक आराधनालय। 2 और पौलुस आपणीं रितीए साबै तिन्नां सेटा लै नाठअ, और चिई हबतै तैणीं किय तिन्नां संघे पवित्र शास्त्रा का बाद-बिबाद। 3 और तिन्नां का तेतो अर्थ खोल्ही-खोल्ही करै समझाऊअ कि मसीहो दुख भोगणअ, और मरी करै जिऊंदै हणअ त जरूरी, और अहैई यीशू, जसरी हूँ तम्हां का कथैया शणांऊआ, अह आसा मसीह। 4 तिन्नां मांझैँ कइ, और भगत यूनानी मांझैँ कइ, और बडी भारी खानदानिं बेटळी मनअ प्रभू यीशू मसीह, और तियां पौलुस और सीलासा संघे मिलै। 5 पर यहूदी जिदें मारै बजारू लोगा मांझैँ कइ दुष्ट लोग कियै आप्पू संघा और भीड़ लाई करै लागै सारी नगरी हाल्लै-गोल्लै करदें, और यासोनें घरै हामलअ करी करै चाहअ सह बागा लै काढणअ। 6 सह निं तिन्नां तिधी भेटअ और तियां नाठै झांशा-तरंगा काढदी और इहय बोलदी कि यासोनें होरी साथी भाई आणा नगरे हाकमा सेटा लै खिची कि ईयां लोग जुंणीं संसार उल्टअ पुल्टअ किय, ईयां आए इधी बी। 7 और यासोनें डाहैँ तियां आपणैँ घरै और ईयां बोला इहय कि यीशू आसा राजअ, और कैसरे कानूना मनणा लै करा तियां बिरोध। 8 और तिन्नैँ लोगा और नगरीए हाकमा का एही गल्ला खोजी तियां बी ड़ैऊरे। 9 और तिन्नैँ यासोन और बाकी लोगे मुचलकै भरै और तियां छाडै।

### बिरीया नगरी दी

10 और होरी भाई राची भितरी तेभी पौलुस और सिलास भेजैँ बिरीया लै और तियां तिधी पुजी करै नाठै यहूदिओ आराधनालै लै। 11 ईयां लोग थियै थिस्लुनिके यहूदी का भलै और तिन्नैँ बडी लालसा करै बचन मनअ और धैळ रहै तियां शास्त्रा दी लोळै लागी कि ईयां गल्ला सच्ची आसा कि नाई। 12 ता तिन्नां बिचैँ कइ, और यूनानी खानदानी बेटळी मांझैँ, और मरधा मांझैँ किय कइ विश्वास। 13 पर ज़ांऊ थिस्लुनिके यहूदी का थोघ लागअ कि पौलुस आसा लागअ द बिरीया दी बी प्रचारा करदअ, ता तियां आए तिधी बी लोगा उकसाऊंदै और हाल्लै-गोल्लै करदें। 14 तैबै होरी भाई पौलुस तेभी तिधा का बिदा किय कि समुंदरे कनारै नाश, पर सिलास और तिमथियुस रहै तिधी। 15 पौलुसा संघणैँ आळै पजैळअ सह अथेने तैणीं, और सिलास और तिमथियुसा लै इहय बोली करै हुऐ बिदा कि मूँह सेटा लै एछे छेकै।

### एथेस नगरी दी

16 ज़ांऊ पौलुस अथेने दी तिन्नां न्हैळअ त लागअ द, ता नगरिए मुरती भाळी ता तेऊओ दिल जळअ। 17 ता पौलुस आराधनालै दी यहूदी और भगता का चफै दी जुंण लोग भेटा तै तिन्नां संघे करा त सह हर धैळै बाद-बिबाद। 18 तैबै इपिकूरी और स्तोईकी पंडता मांझैँ लागै कइ तेऊ संघे तर्क बितर्क करदें, और कइ बोलअ इहय कि अह बकबादी कै बोळणअ चाहा? पर होरी बोलअ इहय कि अह ज़ाळिआ हाम्हां का कसा होरी देबतेओ प्रचारा करनै आळअ। किल्हैकि पौलुस करा त यीशू और पुनरुथाने सुसमाचारो प्रचार। 19 तैबै तिन्नैँ सह आप्पू संघे अरियुपगुसा परेंदा लै नियं और तेऊ का पुछअ, कि हाम्हेँ कै एसा गल्ला ज़ाणीं सका कि जुंण तंरें अह नऊंऊअ मत आसा आणअ द, अह कै आसा? 20 किल्हैकि तूह शणांऊआ हाम्हां का नोखी गल्ला, और तैहीता हाम्हेँ समझणअ चाहा कि एतो कै अर्थ आसा? 21 तिन्नैँ बोलअ तै कि सोबै अथेनी और परदेसी जुंण तिधी रहा तै तियां निं

नऊंई-नऊंई गल्ला शुळणैँ और बोळणैँ का सुआई होर किछू कामां दी बगत गुजारदें तै।

### आरियुगपगुसे सभा दी पौलुसो भाषण

22 तैबै पौलुसे अरियुगपगुसे बिचैँ खहळुई करै बोलअ, “हे अथेने लोगो, हूँ आसा लागअ द भाळअ कि तम्हेँ आसा हर गल्ला दी देबतै मनणैँ आळै। 23 किल्हैकि हूँ त लागअ द हॉडदी-फिरदी थारी पुजणैँ चिजा भाळअ, ता मुखा धेछुई एक एही बेदी, जसा दी इहय आसा लिखअ द कि “अनज़ाणैँ परमेश्वरा लै।” ता जसा तम्हेँ बिणां ज़ाणैँ भाळैँ पुजा, हूँ शणांऊआ तम्हां का तेऊओ समाचार। 24 जुंणीं परमेश्वरैँ पृथुई और तेते सोभैँ चिजा बणाई, सह स्वर्गो और पृथुईओ मालक हई करै हाथा करै बणाएँ दै मांदरा दी निं रहंदअ। 25 ना किजी चिजे लाळचैँ आदमीए हाथैँ सेऊआ कराऊंदअ, किल्हैकि सह दैआ आप्पूई सोभीलैँ जिदगी, शाह और सोभैँ गल्ला। 26 तेऊ बणाई एकी मूळा का संसारो सोभैँ जाती सारी धरती दी रहणा लै; और तेऊए बणाएँ दै बगत और रहणैँ जैगा आसा तैही बाही दी। 27 कि परमेश्वरा लोळै, कधि तेऊ टटोळी करै पाए, पर तैबी बी निं सह हाम्हां कोही का दूर आथी। 28 किल्हैकि हाम्हेँ रहा तेऊदी ही जिऊंदै और हांडद-फिरदें और खळैँ टेकी; जिहअ थारैँ कइ कबि बी आसा बोलअ द कि हाम्हेँ आसा तेऊए ई बंश। 29 ता परमेश्वरैँ बंश हई करै हाम्हां अह समझणअ आसा गलत कि ईशबर आसा सूनें-रूपैँ और पाथरा दी, जुंण माह्णूए कारीगीरी और कल्पणा करी करै आसा बणाएँ दै। 30 तैहिता परमेश्वरैँ निं म्हारी नासमझीए वगता दी धैँन दैनअ पर ऐबैँ दैआ सह सोभी माह्णू लै मना बदळणैँ आज्ञा। 31 किल्हैकि तेऊ आसा एक धैळी एही डाही दी जैथ परमेश्वरा तेऊ माह्णू करै धर्मा दी सारैँ संसारो न्याय करनअ जुंण तेऊ चुनअ द आसा, और सह किय मरी करै बी जिऊंदअ और इहय करी करै की तेऊ अह गल सोभी लै प्रमाणित।

32 मरैँ हुऐ दैओ पुनरुथान शुर्णीं करै लागै कइ लोग हासदें ठठैँ करदें, और कइ बोलअ इहय कि एसा गल्ला शुणूँ हाम्हेँ ताखा केभैँ दुजी बारी। 33 एता भाळी करै पौलुस तिधा का निखळअ। 34 पर कइ माह्णू हुऐ पौलुसा पिछू और विश्वास किय, जसा दी दियुनुसियुस अरियुपगी तै, और दमरिस नाओँ एक बेटळी बी ती, और तिन्नां संघे तै होर बी कइ लोग।

### कुरिन्थुस नगरी दी

18 एता बाद आअ पौलुस अथेनें छाडी कुरिंथा लै, 2 और तिधी एकी अकबिला नांओँ यहूदी का मिलअ तेऊए ज़ल्म त पुंतुसा का; और तेऊए लाळी; प्रिस्किला संघे आअ त सह कुरिंथा लै अतालिआ का नऊंऊअ, किल्हैकि क्लौडिउसैँ दैनीं ती सोभी यहूदी लै रोमा का नाशणैँ आज्ञा। पौलुस नाठअ तिन्नां सेटा लै। 3 पौलुस और तिन्नां त एकी रंगो बपारा करनेओ धांधअ, तैहीता पौलुस तिन्नां संघे रहअ, और तियां लागै कामां करदें, तिन्नां धांधअ त ताम्बू, तरपाला बणाणैँओ। 4 और पौलुस नाशा त हर सबते धैळै बाद-बिबाद करदअ आराधनाळैँ लै और यहूदी और यूनानीं बी समझाऊआ त।

5 ज़ांऊ सिलास और तिमथियुस मकिदुनिआ लै आए, ता पौलुस बचन शणांऊणैँ धुना दी रही करै यहूदी लै दैआ त ग्वाही कि यीशू आसा मसीह। 6 पर ज़ांऊ तियां बिरोध और निंदा करदें लागै, ता तेऊ आपणैँ झिकळैँ दुहळकी करै तिन्नां लै बोलअ कि थारअ खून लोळी थारैँ कैळैँ पळअ, हूँ आसा एता का निर्दोष, ऐबैँ नाशणअ मूँह होरी जाती सेटा लै। 7 और तिधा का पौलुस तितुस युस्तुस नाओँए एकी परमेश्वरैँ भगते घरा लै आअ, जसरअ घर आराधनालैँ नेळ त। 8 तैबैँ आराधनाले सरदार क्रिस्पुसैँ आपणैँ सारैँ घरानैँ संघी प्रभू दी विश्वास किय और कइ कुरिंथी बी बणैँ विश्वासी और बपतिस्मअ ल्अ। 9 और प्रभू राची दर्शणां दी पौलुसा लै बोलअ, डरैँ निं आथी, खोजदअ रह लागी, और चुप्पी निं रही। 10 किल्हैकि हूँ आसा ता संघा, और कोहैँ निं ताल्लैँ हानिं करी सकदअ, किल्हैकि नगरी दी आसा मरैँ बडैँ भारी लोग। 11 इहय करै पौलुस रहअ तिन्नां बिचैँ बचन शणांऊंदअ और सखाऊंदअ डेडी साला तैणीं।



12 जधू गल्लियो तेऊ देशो हाकम थिय, ता यहूदी लोगे किय एकअ और तियां आए पौलुसा संघे चिखदै और सह तिन्नै न्याय आसना सहनै आणअ और लागे बोलदै कि 13 "अह समझाऊआ लोगा का इहय कि परमेश्वरे आराधना करनी एक साबै, जुंण व्यवस्था का बिलकुल उल्टी आसा। 14 ज़ांऊं पौलुसै किजै बोली लाअ त ता गल्लियो यहूदी लै बोलअ, हे यहूदीओ, जै अह अन्याय या बुरी गल हंदी, तै ता त ठीक की हूँ शुणदअ थारी। 15 पर अह बाद-बिबाद आसा शब्द, नांओआ और थारै देशे व्यवस्था बारै, एसा गल्ला ज़ाणां तम्हैई, हूँ निं एसा गल्लो न्याई चाहंदअ बळणअ। 16 और तेऊ काढै तियां न्याय आसना का पोर्ही। 17 तैबै सोभी आराधनालेओ सरदार सोस्थिनेस ढाकअ और न्याय आसने सहनै चिकअ, पर गल्लिओ निं इन्नां गले किछै चिंता की।

### अन्ताकिया लै बापस फिरनअ

18 और पौलुस रह खास्सै धैळै तिधी, और होरी भाई का बिदा हई करै किखिअ एछी करै आपणअ मुंडन किय किल्हैकि तेऊ ती तेते मन्नत मनी दी और तिधा का ज़हाजा दी बेशी करै नाठअ सुरिआ लै ओर तेऊ संघे तै प्रिस्किला और अकबिल्ला बी। 19 और पौलुसै इफिसुसै पुजी करै तियां छाडे तिधी और आप्पू आराधनालै दी नाशी करै लागअ बाद-बिबाद करदअ। 20 ज़ांऊं तिन्नै पौलुसा सेटा अरज़ की कि हाम्हां सेटा रह थोळै धैळै होर बी ता पौलुस निं मनअ। 21 पर इहय बोली करै हुअ तिन्नां का बिदा कि, जै परमेश्वर चाहे ता तै एछणअ हूँ तम्हां सेटा लै फिरी। 22 तैबै पौलुस इफिसुसा का झाङ्ग खोल्ही करै चलअ और कैसरीआ उतरी करै येरुशलेमा लै नाठअ और कलीसिया लै नमस्कार करी करै आअ अन्ताकिया लै।

### पौलुसे चिऊथी प्रचार यात्रा

23 तेखअ थोळै धैळै तिधी रही करै तिधा का चलअ और एकी बाखा गल्लातिआ और फ्रुगिआ दी नाशी करै चेलै स्थिर करदअ लागअ।

### इफिसुस नगरी दी अपुल्लोस

24 अपुल्लोस नाओं एक यहूदी जुंण सिकंदरीआ दी पैदा हुअ द त, सह त बडअ बिदुआन पुरुश और पबित्र शास्त्रा ज़ाणां त सह भली भांती। सह इफिसुसै आअ। 25 तेऊ ती प्रभुए रसते शिक्षा भेटी दी और सह खोजा त मन लाई करै प्रभू यीशूए बारै ठीक-ठीक, और सखाऊआ बी त, पर सह ज़ाणां त सिधी यहून्नै बपतिस्म गले बारै। 26 सह लागअ आराधनालै दी नडर हई करै बोलदअ, पर प्रिस्किला और अकबिल्ला तेऊए गल्ला शुणीं करै आणअ सह आपणै आगू लै और परमेश्वरे गल्ला खोजी तेऊ का भी ठीक-ठीक। 27 और ज़ांऊं तेऊ फैसलअ किय कि पारा बाखा उतरी करै अखाया लै नाशणअ ता होरी भाई हैअ विश्वास दैई करै तिधे चेलै लै लिखअ कि एक संघे मिलै शोभलै करै। और तेऊ तिधी पुजी करै तिन्नै बड़ी भारी मदद की, जुंणीं गुणा-जशा दी विश्वास किय त 28 किल्हैकि सह दैआ त पबित्र शास्त्रा का प्रमाण कि यीशू मसीह ही आसा मसीह, और सह बडअ प्रबल हई करै करा त यहूदी सोभी सहनै निरुत्तर।

### इफिसुस नगरी दी पौलुस

19 जेभे अपुल्लोस कुरिंथे थिय, ता पौलुस आअ उपरी सारै देशा हांडी इफिसुसा लै और कई चेलै भाळी 2 तिन्नां लै बोलअ कि तम्हां विश्वास करदी पबित्रात्मै भरपूरी बी हई? तिन्नै बोलअ इहय कि हाम्हें निं पबित्र आत्मां किजै आसा इहय बी शुणअ। 3 पौलुसै तिन्नां लै बोलअ, तै तम्हां कसरअ बपतिस्मअ ल्अ? तिन्नै बोलअ कि यहून्नो बपतिस्मअ। 4 तैबै पौलुसै तियां समझाऊए की यहून्ना दैनअ इहय बोली करै मना बदळणैओ बपतिस्मअ कि जुंण मूँह बाद ऐछणै आळअ आसा, अर्थात प्रभू यीशू दी करै विश्वास। 5 और इहय शुणीं करै तिन्नै प्रभू यीशूए नाओए बपतिस्मअ किय। 6 और ज़ांऊं पौलुसै तिन्नां दी हाथ डाहै ता तिन्नां लै आअ पबित्रात्मां और तियां लागै कई बोली बोलदै और भबिशयाबाणीं करदै। 7 इयां सोभै तै कोई बाराह आदर्मी।

8 और पौलुस आराधनालै दी नाशी करै चिई भिने तैणीं रहअ नडर हई करै बोलदअ लागी और परमेश्वरे राजे बारै बिबादा करदअ और समझाऊंदअ लागी। 9 पर ज़ांऊं कई लोगे कठोर हई करै तेऊए नाई शुणीं और लोगे सहनै लागै इहय बी बोलदै कि एकओ रसतअ आसा बूरअ, ता पौलुसै तिन्नां छाडी करै चेलै कियै जुदै और हर धैळै करा त तरनुसे पाठशाला दी बाद-बिबाद। 10 दुई साला तैणीं रहअ इहय ई हंदअ लागी, इधी तैणीं कि आसिए रहणै आळै कै यहूदी, कै यहूनानिं, सोभी शुणअ प्रभूओ बचन।

11 और परमेश्वर रहेऊआ त पौलुसै हाथै सामर्थे नोखै-नोखै काम। 12 इधी तैणीं कि रमाल और गाची नियां तै लोग तेऊए शरीरा का छुंआऊंई करै और तिन्नां पा तै बमारा परंदै और तिन्नै बमारी ह्आ ती ठीक, और भूत परेत भागा तै दूर। 13 पर कई यहूदी जुंण झाळ-फूक और तंत्र-मंत्र करदै फिरा तै तियां बी लागै तै इहय करदै कि जसा दी भूत परेत होए तिन्नां लै प्रभू यीशूओ नांओ लई करै इहय बोली करै मारा तै फूक कि जसा यीशूओ प्रचार पौलुस करा, तेऊए नांओएँ दैआ हूँ ताल्है कसम कि दूर हअ। 14 और रिक्वा नाओएँ एकी यहूदी माहायाजके तै सात शोहरू, और तियां बी करा तै इहय ई। 15 पर दुष्टात्मां दैनअ तिन्नां लै जबाब कि, यीशू बी ज़ाणा हूँ, और पौलुसा बी बछेणां हूँ; पर तम्हें कुंण आसा? 16 और तेऊ आदर्मी जसा दी दुष्टात्मा ती, तेऊ लंभै तियां ईहै कि तियां कियै आपणै बशे ओर इहय उपद्रब किय तिन्नां लै कि तियां निखळै नांगे और मूँड माथे भळाकी तेऊ घरा का तुहरै। 17 और एसा गल्लो थोघ लागअ इफिसुसा दी रहणै आळै यूनानी और यहूदी सोभी का, तियां डरै और सोभ लागै तियां प्रभू यीशूए बडाई करदै। 18 और तिन्नै किय विश्वास बी, और तिन्नां मांझै कई एछी करै आपणै काम मनै और प्रगट बी कियै। 19 और ज़ादू करनै आळै कई आपणीं बही पोथी कठा की और सोभी सहनै ज़ाळी; ज़ांऊं तिन्नै किम्मता ज़ोळी ता तियां ती कोई पज़ाह हज़ारे। 20 इहय करै प्रभूओ बचन बडै बला संघे बढदअ और फैलदअ लागअ और प्रबल हंदअ।

21 ज़ांऊं इयां गल्ला हई मुकी, ता पौलुसै आत्मां दी ठानी एही कि मकिदुनिआ और अखाया बाती हांड दैई नाशणअ मूँह येरुशलेमा लै, और तेऊ इहय बोलअ कि तिधी नाशी करै आसा मूँह रोम बी भाळणअ जरूरी। 22 ता पौलुसै आपणीं सेऊआ करनै आळै मांझै तिमथियुस और इरास्तुस मकिदुनियां भेजी करै आप्पू रहअ थोळै धैळै आसिआ।

### इफिसुसै उपद्रब

23 और तिन्नां धैळै हुअ पंथे बारै बडअ भारी हालअ-गोल्लअ। 24 किल्हैकि तिन्नां धैळै देमेत्रिउस नाओं एक सनार अरतिमिसे देबिए चन्दीए देहुरे बणांई करै दलाऊआ त कारीगीरा लै बडअ भारी काम। 25 तेऊ तिन्नां लै और एही चिजे कारीगीरा कठा करी करै बोलअ कि हे माहूँओ, तम्हां का आसा थोघ कि एक कामां करी करै भेटा हाम्हां खासअ धन। 26 और तम्हें भाळा बी, और शुणां बी कि सिधअ इफिसुसै ई निं, पर सारै आसिआ दी पौलुसै बडै भारी लोग इहय बोली करै समझाऊए और भरमाऊए कि जुंण हाथे कारीगीरी आसा, सह निं इश्वर आथी। 27 और हाम्हां निं ऐबै सिधी एसा गले डअर आथी कि म्हारअ ढबै खटणैओ धांधअ हणअ खतम, पर डअर आसा एही बी कि म्हारी महान देबी अरतिमिसो देहुरअ बी समझणअ लोगा तुछ, जसा सारअ आसीआ और संसार पुजा ओर एतो निं कोई महत्व ई हणअ।

28 और तियां इहय शुणीं करै गुस्सै करै भरुए और लैळा-करिंगा पाई लागै बोलदै कि इफिसिए देबी अरतिमिस आसा महान। 29 और सारी नगरी मचअ बडअ भारी हालअ-गोल्लअ और तिन्नै लोगे गयुस और अरिस्तरकुस मकिदुनीं जुंण पौलुसे संघी-साथी तै तियां ढाकै और एकचित हई करै रंगशाला दी तुहरै। 30 ज़ांऊं पौलुसै लोगा सेटा लै भितरा लै नाशणअ चाहअ ता होरी चेलै निं तेऊ नाशणै दैनीं। 31 और आसिए हाकमा मांझै बी पौलुसै कई दोस्तै तेऊ लै फैळअ भेजअ और एही अरज की कि रंगशाला लै नाशी करै निं खातरै दी पळी। 32 इहय करै कोई लाई केही लैळा, और कोई केही, किल्हैकि सभा दी ती लागी दी कई गडबडी हंदी, और कई लोगा का निं इहय थोघ बी थिय आथी कि हाम्हें इधी कठा किल्है आसा हुरे दै। 33 तैबै तिन्नै सिकंदर जुंण यहूदी खळअ किय त, लोगा सहनै खळअ किय। और सिकंदर चाहा त



लोगा लै हाथा करै शारअ दैई उत्तर दैणअ, 34 पर जांऊं तिन्नां का थोघ लागअ कि अह आसा यहूदी, ता तियां सोभ एकी आबाजा दी कोई दूई घांटे तैणीं रहै लैळा लांदै लागीं कि "इफिसिए देबी अरतिमिस आसा महान" 35 तैबे नगरीए मंत्री लोगा शांत करी करै बोलअ, हे इफिसिओ, इहय कुंण निं जाणां कि अह इफिसिए सारी नगरी आसा म्हारी बडी देबी अरतिमिस देहूरै, और ज्यूस देबते तरफा का पळी दी मुरतीए टैहलुए। 36 जै कि इन्नां गल्लो खंडन निं हई सकदअ, ता तै आसा इहय ई ठीक कि तम्हें रहा चुपी और बिणा सोचै-बचारै निं किछै करा। 37 किल्हैकि तम्हें जुंण ईयां माहू ढाकी आसा आणै दै, ईयां ना ता देहुरै लुटणै आळै आथी, और ना म्हारी देबीए निंदा करदै। 38 जै देमेत्रियुस और तेऊए साथी कारिगीरा कसा संघे बिबाद आसा, ता तेता लै आसा कचैहरी खुल्ही दी, और हाकम बी आसा, और तियां सका एकी दुजैओ दोष खोजी। 39 पर जै तम्हें किजू होरी गले बारै चाहा पुछणअ ता तेतो फंसलअ हणअ सभा दी। 40 किल्हैकि आझाँके एऊ उपद्रभे बारै सका हाम्हां लै बी दोष लागी, किल्हैकि एतो निं कोई कारण ई आथी और हाम्हें निं एसा भीड़ा कठा हणैओ बी कोई जबाब दैई सकदै 41 और इहय बोली करै की तेऊ सभा बिदा।

### मकिदुनिया, यूनान और त्रोआसै पौलुस

20 जांऊं हालअ-गोलअ मुकअ, ता पौलुसै आपणै चेलै शादी करै समझाऊरै, और तिन्नां का बिदा हई करै चलअ मकिदुनिआ लै। 2 और तेऊ सारै देशे हांड दैई करै और तिन्नां सोभी चेलै खास्सअ समझाऊई करै आअ युनाना लै। 3 जांऊं चिइ भिनै तिधी रही करै सह जहाजा दी बेशी करै सुरिआ बाखा लै नाशणै आळअ त, ता यहूदी रहै तेऊलै मारना लै ताखुई, और तैही की तेऊ एही सलाह कि मकिदुनिआ हई करै फिरनअ बापस। 4 बिरिया नगरीए पुरुसो शोहरू सोपत्रुस और थिस्सलूनिकिओ कअरिस्तकुस और सिकुन्दुस और आसिओ तुखिकुस और त्रुफिमस आए तेऊ संघे आसीआ तैणीं। 5 तियां रहै आजू नाशी करै त्रोआस हाम्हां न्हैळै लागी। 6 और हाम्हें अखमीरी रोटिए धैळै बाअ फिलिपी का जहाजा दी बेशी करै पांजुए धैळै पुजै तिन्नां सेटा त्रोआस और साता धैळै रहै तिधी।

### त्रोआसै यूतुखुस जिऊंदअ करनअ

7 हबते पैहली धैळी जांऊं हाम्हें प्रभू भोजा लै कठा हुरे, तैबे पौलुसै जुंण दुजै धैळै नाशी त चालअ द, तिन्नां का गल्ला की और आधी राची तैणीं रहअ गल्ला करदअ लागी। 8 जसा आटळू हाम्हें बेठै दै थियै तेथ तै बडै भारी लाटू लागै दै जळदै। 9 और यूतुखुस नाओ एक जुआन त ताकि दी बेठअ द और तेऊ ती निंजा करै ऊंधी लागी दी, और जांऊं पौलुस देर तैणीं गल्ला करदअ रहअ ता तेऊ आअ निंजो झलारअ और चिऊथी मजला का पळअ सह खोळै लै और सह चकअ मूँअ द धरना का। 10 पर पौलुस उंधै होथी करै म्हळैछूअ तेऊदी और गळै लाई करै बोलअ की डरा निं आथी अह निं मूँअ, एऊओ शाह आसा एऊई दी। 11 और उझै नाशी करै प्रभू भोज किय और खाई करै, जेतरी देर तैणीं तिन्नां संघे गल्ला करदअ त लागअ द, तेतरी गई राच भैई और पौलुस लागअ हांडदअ। 12 और तिन्नां आणअ सह शोहरू जिऊंदअ, और बडी भारी शांती हई।

### त्रोआसा का मिलेतुस टापूए यात्रा

13 हाम्हें पैहलै तेऊ जहाजा दी बेशी करै अस्सुसा लै नाशणै बचारा दी आजू नाठै कि तिधा का पौलुस बशौणअ, किल्हैकि तेऊ बोलअ त इहय कि तिधी तैणीं नाशणअ तेऊ पैदल। 14 जांऊं पौलुस अस्सुसै भेटअ ता हाम्हें सह जहाजा दी बशौणअ और पुजै मितुलेनै। 15 और तिधा का जहाज खोल्ही करै हाम्हें दुजै धैळै पुजै खियुसा सहनै, और आगलै धैळै पुजै सामुसै और तेखअ तिधा का दुजै धैळै पुजै मिलातुसै। 16 किल्हैकि पौलुसै ती इफिसूसा बाती नाशणै ठानि दी कि इहय निं हआ कि आसिआ दी तेऊ देर पळै, किल्हैकि तेऊ हआ त छेकअ लागअ द कि हई सके ता पैंतिकुस्ते धैळै काटणै तेऊ येरुश्लेमे।

### इफिसुसे प्राचीना लै उपदेश

17 और तेऊ मिलेतुसा का इफिसूसा लै फैळअ भेजअ और कलीसिए प्राचीन शादै। 18 जांऊं तियां तेऊ सेटा लै आए ता तिन्नां का तेऊ बोलअ कि तम्हां का आसा थोघ कि पैहलै ई धैळै जधू हूँ आसिया पुजअ, हूँ हर बगत तम्हां संघे किहअ रहअ। 19 अर्थात बडै दीन मना संघे, और आशू बहाऊई-बहाऊई करै तिन्नां परिक्षा दी जुंण यहूदिए साजिशा करै मूँह परदै आई ती; हूँ रहअ प्रभूए सेऊआ करदअ ई लागी। 20 और जुंण-जुंण गल्ला थारी भलाईए ती, तिन्नां खोजणै और लोगे सहनै घरै-घरै सखाऊणै का निं झिजकअ। 21 पर यहूदी और यहूनानी सहनै रहअ ग्वाही दैदअ लागी कि परमेश्वर बाखा आपणअ मन फरेऊणअ और म्हारै प्रभू यीशू मसीहा दी लागा विश्वास करनअ। 22 और ऐभै भाळा, हूँ चालअ आत्मा दी बाहुई करै येरुशलेमा लै नाशी, और मुखा निं थोघे कि तिधी मूँह संघे कै बितणअ? 23 मुखा आसा सिधअ इहय थोघ कि पबित्र आत्मां हर नगरी दी ग्वाही दैई करै बोला मुल्है इहय कि ताल्है आसा दुख क्लेश त्यार। 24 पर हूँ निं आपणै प्राणा किछै समझदअ कि प्यार करू, पर इहय कि आपणीं तुहर और सबकाई पूरी करू, जुंण मंए परमेश्वरे किरपे सुसमाचारे ग्वाही दैणा लै प्रभू का पाई दी आसा। 25 पर ऐभै भाळा, मुखा आसा थोघ कि तम्हां सोभी जसा का हूँ परमेश्वरे राजा प्रचार किय, ऐबै निं एता बाद तम्हां मेरअ मूँह भी भाळणीं। 26 तैहीता हूँ तम्हां लै आझाँकी धैळी ग्वाही दैई करै बोला कि, हूँ आसा सोभीए लोहू का निर्दोष। 27 किल्हैकि हूँ निं परमेश्वरे सारी इछा तम्हां लै पूरी रिती करै खोजणै का निं झिजकअ। 28 इहय करै आपणीं और आपणै पूरे छुडे करै हेर सबाळ; जसा दी पबित्र आत्मां तम्हें मुखिरे आसा बणाणै दै। कि तम्हें करै परमेश्वरे कलीसिए रखबाली, जुंण तेऊ आपणै खुना करै मोल आसा लई दी। 29 मूखा इहय बी आसा थोघ कि मूँह नाशी करै एछणै धेळणै चिरनै आळै भेडिरे तम्हां लै, तिन्नां निं छुंड बी छाडणअ। 30 और थारै ई बिचा का उझणै किछ ईहै लोग बी कि तिन्नां चेलै आप्पू पिछू खिंचणा लै करनी टेडी मेडी गल्ला। 31 एता लै रहै जागदै, और एसा गल्ला डाहै आद कि मंए आसा चिइ साला तैणीं राची धैळी लेरा लाई-लाईकरै एकी-एकी लै चतैन्गी दैनीं दी। 32 और ऐबै लाए मंए तम्हां का परमेश्वर और तेऊए बचन सबाळी जुंण थारी तरक्की सका करी, और सोभी पबित्रा दी साझी मिरास दैई सका। 33 मंए निं कोहिए सुन्नै-चन्दिओ लाळच किय। 34 तम्हां का आसा थोघ कि मेरै इन्नै हाथै की मेरी और मेरै होरी साथीए जरूरता पूरी। 35 मंए रहैऊई तम्हां का सोभै गल्ला करी करै, कि इहय करै मँन्थ करी सबाळणै कमजोर। और प्रभू यीशूए गल्ला आद डाहणीं आसा जरूरी कि तेऊ आसा बोलअ द आपणै मुहा का कि लणै का आसा दैणअ भलअ। 36 इहय बोली करै तेऊ जाहूँ टेकै ओर तिन्नां सोभी लै की कठा प्राथणां। 37 तैबे तिन्नां सोभी लाई लेरा और पौलुसे गळै म्हळैछूई करै लागै तियां तेऊ लै चुंजी-माक्की दैन्दै। 38 तिन्नां हूअ खासतर एसा गल्ला दुख जुंण तेऊ बोलअ त कि तम्हां निं मेरअ मूँह ऐबै भी भाळणअ, और तिन्नां दैनअ सह जहाजा तैणीं संघी।

### पौलुसो येरुश्लेमा लै नाशणअ

21 जांऊं हाम्हां तिन्नां का बिदा हई करै जहाज खोल्हअ, ता सिधै रसतै हाम्हें कोस पुजै और दुजै धैळै रुदुस और तिधा का पुजै पतरा। 2 और एक जहाज भेटअ हाम्हां फिनाकै लै नाशदअ और तेता दी बेशी करै सह खोल्हअ। 3 जांऊं कुपुस धेछूअ ता सह छाडअ हाम्हें बाँऊई बाखा, और सुरिआ लै नाशी करै उतरै हाम्हें सुर; किल्हैकि तिधी उतारनअ त जहाजा बोझ। 4 और चेलै का मिली करै हाम्हें रहै तिधी साता धैळै, तिन्नां आत्मां का शुणीं करै पौलुसा लै बोलअ कि येरुशलेमे निं नाशी। 5 जांऊं तियां धैळै पूरे हुरे ता हाम्हें तिधा का चलै, और बेटळी माठै संघी दैनै हाम्हें नगरी बागै पजैळी और हाम्हें समुंदरे कनारै जाहूँ टेकी करै प्राथणां की। 6 तैबै एकी दुजै का बिदा हई करै, हाम्हें ता उखळै जहाजा दी और तियां नाठै आपणै-आपणै घरा लै।

7 जांऊं हाम्हेँ सूरा का जलयात्रा पूरी करी करे पतुलिमयिस पुजे, और विश्वासी भाई लै नमस्कार करी करे तिन्नां संघे एकी धैले रहे। 8 दुजेँ धैले हाम्हेँ तिधा का आरे कैसरिया लै, और फिलिप्पुस सुसमाचार प्रचार करनै आळे घरे जुंणं तिन्नां साता सेऊआकारा मांझे एक थिय, हाम्हेँ रहे तेऊए घरे। 9 तेऊए ती चार कुंआरी शोहरी जुंण भविश्याबाणी करा ती। 10 जांऊं हाम्हेँ तिधी खास्से धैले रही मुकै, ता एक अगबुस नांओं भविश्याबागता यहूदिया का आआ। 11 तेऊ हाम्हा सेटा लै एही करे पौलुसो पटुकअ चकअ और आपणें हाथ पैर बाहिन करे बोलअ कि पबित्र आत्मां बोला इहय कि जसरअ अह पटुकअ आसा, सह बाहणअ येरुशलेमें यहूदी इहयई करे, और सह दैणअ तिन्नां होरी जातीए हाथै। 12 जांऊं हाम्हेँ इयां गल्ला शुणीं ता हाम्हेँ सोभी बोला पौलुसा लै इहय कि येरुशलेमां लै निं नाशी। 13 पर पौलुसै उत्तर दैनअ कि तंम्है किलहै लाअ इहय करी कि रोकी करे लाअ मेरअ मन चोळी। हूँ आसा प्रभू यीशूए नाओए येरुशलेमें, नां सिधअ बाहणा लै पर मरना लै बी तैर। 14 जांऊं तिन्ने गल तेऊ नाई मन्नी ता इहय बोली करे हुरे तियां चुप्पी कि प्रभूए इछा लोळी पूरी हुई।

15 और तिन्नां धैले बाद हाम्हां आपणें बोझळे बाहिन करे चलै येरुशलेमा लै। 16 कैसरिया का बी कई चेलै आरे हाम्हां संघे, और मनसोन नाओए कुपुसो एक पराणअ चेलअ बी आणअ हाम्हेँ आप्पु संघा कि हाम्हेँ तेऊ संघा रहे।

### पौलुसे याकुबा संघे मुलाकात

17 जांऊं हाम्हेँ येरुशलेम पुजे ता विश्वासी भाई हाम्हां संघे बड़े आनंद और खुशी दी मिले। 18 दुजेँ धैले पौलुसै निंयें हाम्हेँ याकुबा सेटा लै, तिधी तै सोभै प्राचीन कथा हुरे दै। 19 तैबै तेऊ तिन्नां लै नमस्कार करी करे जुंण-जुंण काम परमेश्वरै तेऊए सेबकाई दी होरी जाती बिचै किये, तियां खोजे एक-एक करी करे तिन्नां सोभी का। 20 तिन्नेही इहय शुणीं करे परमेश्वर महिमा की तेखअ तेऊ लै बोलअ, "हे भाई, तूह भाळा कि, यहूदी बिचा का कई हजार लोगे किय विश्वास: और तिन्नें सोभी आसा भबस्था लै धुन लाई दी। 21 और तिन्नां का आसा तेरे बारे सखाऊअ द कि तंए आसा होरी जाती बिचै रहणें आळे यहूदी का मुसा का फिरना लै सखाऊअ द, और इहय बोला कि नां ता आपणें शोहरुओ खतनअ करा और नां तिन्नां रिती दी चला; ता एबै किजै करनअ? 22 और लोगा का जाणअ पतअ लागी कि तूह आसा आअ द। 23 तैहीता जिहअ हाम्हेँ तालहै करना लै बोला, तिहअ कर, हाम्हां सेटा आसा इधी चार आदमीं जुंणीं मन्नत आसा मनी दी। 24 तिन्नां संघा निई करे कर आप्पु शुध और तिन्नां लै कर खरचअ कि तियां आपणअ मुंडन करे; तैबै लागणअ सोभी का थोघ कि जुंण गल्ला तेरे बारे बोली दी आसा, तियां आसा झुठी, पर तूह आप्पु बी मना व्यवस्था और तिन्नां दी चला बी। 25 पर तिन्नां होरी जातीए बारे जुंणीं विश्वास किय, हाम्हेँ आसा इहय फैसलअ करी करे तिन्नां लै लिखी भेजअ द कि तियां मुरती सहनै बळी कीयें दै मासा और खुना का और गळा का मरोकें दै मासा का और भ्यभिचारा का रहे दूर। 26 तैबै पौलुस दुजेँ धैले तिन्नां आदमीं निई करे और शुध हई करे मांदरा लै नाठअ, और खोजअ कि शुध हणें धैली अर्थात-तिन्नां मांझे हरेकी लै चढाबै चढाऊणें धैले केभै हणें पूरे।

### मांदरै पौलुस ढाकणअ

27 जांऊं सात धैले पूरे हणें आळे थिये, ता आसिए यहूदी पौलुस मांदरै भाळी करे एही हाका-लैळा पाई करे तिन्नें सह ढाकअ कि 28 हे इस्त्राएलियो, मदद करा; अह आसा सहैई आदमीं, जुंण लोगा लै व्यवस्था का दूर रहणा लै और एसा जैगे बिरोधा दी हर जैगा लोगा का सखाऊआ, इधी तैणीं कि यूनानी बी मांदरा लै आणीं करे एऊ किय पबित्र स्थान बी अपबित्र। 29 तिन्नें भाळअ त तेता का पैहलै त्रुफिमस इफिसी तेऊ संघे नगरी दी, और तियां समझा तै कि पौलुसै आणअ सह मांदरा लै। 30 तैबै सारै दी कोलाहल मचअ, और सोभ लोग आरे तुहरी करे और तिधी हुरे कठा, और तिन्नें पौलुस ढाकी करे आणअ नगरी बागा लै और परौऊळ की नढैऊए बंद। 31 जांऊं तिन्नें सह मारी लाअ त पाई, ता पळटणे सरदारा का लागअ थोघ कि सारै येरुशलेमा दी आसा कोलाहल मचअ द। 32 तैबै सह नढैऊए आपणें सपाही और

सुबैदारा लई तिन्नां सेटा लै तुहरी करे आअ, और तिन्नें बी पळटणें सरदारा और सपाही भाळी करे तिन्नें पौलुस मारनै चिकणें का चकअ उझे। 33 तैबै पळटणें सरदारै सेटा एही करे सह ढाकअ और दूई शांघळी करे की बान्हणें आज्ञा। 34 पर भीड़ा बिचा का लागे कोई किछ बोलदे और कोई किछ लैळा लांदे, और हाल्लै-गोल्लै बिचै निं सह किछ सच्चाई समझी सकअ। और तेऊ दैनीं तिन्नां गहळा लै निंणें आज्ञा। 35 जांऊं सह शिहळी दी पुजअ, ता इहय हुअ कि तिधी लोगे भीळ हणें और तिन्नें हंगामें बजहा दी पळअ सपाही पौलुस चकी निणअ। 36 किलहैकि लोगे भीळ ती पिछू का इहय बोलदी लागी दी कि एऊओ करा अंत।

37 जांऊं तियां पौलुसा गहळा दी पजैळणें ई आळे थिये ता पौलुसै पळटणें सरदारा का बोलअ; के मुल्है आज्ञा आसा कि ताखा किजै बोलूं? तेऊ बोलअ कि तूह कै यूनानी जाणां? 38 तूह कै सह मिसरी निं आधी जुंणीं किछ धैले पैहलें बद्रोही बणाई करे चार हजार कटारबंद लोग जंगला लै निरे? 39 पौलुसै बोलअ, हूँ आसा तरसुसो यहूदी! किलकिआ मशूर नगरीओ आसा हूँ रहणेंआळअ, हूँ करा तालहै अरज कि मूह दै इन्नां लोगा संघे गल्ला करनै। 40 जांऊं तेऊ आज्ञा दैनीं ता, पौलुसै शिहळी दी खट्खुई करे लोगा लै शारअ किय और तियां जांऊं चुफुए, ता सह इब्रानी भाषा दी बोलदअ लागअ कि

### लोगे भीड़ा बिचै पौलुसो भाषण

22 हे भाईयो, और पितरो, मेरअ जबाब शुणां, जुंण मंएँ एबै तम्हां सहनै बोली लाअ।

2 तियां इहय शुणीं करे कि अह आसा लागअ द हाम्हां संघे इब्रानी दी बोलदअ, तियां हुरे होर बी चुप्पी। तैबै तेऊ बोलअ:

3 हूँ आसा यहूदी माळूं, मेरअ जल्म आसा हुअ द किलकिआ तरसुसै, पर एसा नगरी गमलिअले चरणें लई मंएँ शिक्षा-दीक्षा, और बाब दादे व्यवस्था आसा मुखा राम्बळै करे सखाऊई दी। हूँ त परमेश्वरा लै एही धुना लाई बैठअ द जिहै आज्ञा तम्हें आसा। 4 मंएँ मरध और बेटळी सोभै बाहिन-बाहिन करे एऊ पंथे लोगा लै आसा दैनअ द मंएँ बडअ भारी कष्ट और इन्नां मांझे कई मारी बी पाए। 5 एसा गले आसा माहायाजक और पुरनिंएँ गुआह; कि तिन्नां मांझे कई भाईए नांऊएँ चिठी लई करे त लागअ द दमिश्का लै नाशदअ कि तिधी बी जुंण होए, तियां आळणें बाहिन करे येरुशलेमा लै ताकि तिन्नां लै दंड दई सके।

### आपणें दिला बधळणेंओ बर्णन

(प्रेरिते काम 9:1-19; 26:12-18)

6 जांऊं हूँ हांढदी-हांढदी दमिश्का नेळ पुजअ, ता इहय हुअ कि दुजेँ पहरै एकाएक बडी ज्योती सरगा का मेरै चऊर पासै चमकी। 7 ता हूँ बधळुअ धरनीं, और इहय शब्द शृणअ कि हे शाऊल, हे शाऊल, तूह किलहै दैआ मुल्है दुख? मंएँ दैनअ उत्तर कि हे प्रभू तूह कुंण आसा? 8 तेऊ बोलअ इहय कि हूँ आसा यीशू नासरी, जसा लै तूह दुख दैआ? 9 ता मेरै तिन्नें होरी साथी सह ज्यति ता भाळी पर तेऊओ शब्द निं शृणअ। 10 तैबै मंएँ बोलअ कि हे प्रभू, तै हूँ कै करूं? प्रभू मुखा बोलअ कि, खळअ उझू और दमिश्का लै नाश, जुंण ताह करनअ सह हेरनअ तारखा खोजी। 11 जांऊं हूँ तेसा ज्योतिए तेजा करे कांणअ हुअ ता हूँ आपणें तिन्नां साथीए हाथ ढाकी करे पुजअ दमिश्क।

12 और हन्नयाह नाओं व्यवस्था दी चलणें आळअ एक भगत माळूं जुंण तिधी रहणेंआळे यहूदी बिचै सुनाम आसा, सह आअ मूह सेटा लै। 13 और मूह सेटा खट्खुई करे तेऊ बोलअ कि हे शाऊल, भी लाग आच्छी का भाळअ, और नढैऊए मेरी आच्छी खुल्ही और मुखा लागअ सह धेछदअ। 14 तैबै तेऊ बोलअ कि म्हारे बाब दादे परमेश्वरै आसा तूह एते तैणीं चुनअ द कि तूह एऊए इछा जाणें और तूह तेऊ धर्मी भाळे और तेऊए मूहें बचन शुणें। 15 किलहैकि तूह हणअ तेऊए तरफा का सोभी माळूंए सहनै तिन्नां गल्लो गुआह जुंण तंएँ भाळी और शुणीं दी आसा। 16 एबै किलहै लाई तंएँ देर करी? खळअ उझू और बपतिस्मअ लअ और तेऊओ नांओं लई करे धो आपणें पाप।

### होरी जाती बिचै प्रचारा करनेओ आव्हान

17 जांऊं हूँ भी येरुशलेम में एही करै मांदरै प्राथणा करदअ त लागअ द, ता हूँ हुअ बेहोश।<sup>18</sup> और प्रभू बोलअ मेरे बारे इहय कि; झटपटै निखळअ येरुशलेमा का एभी किल्हैकि तिन्नां निं तेरै बारे तेरी ग्वाही मनणी।<sup>19</sup> पर मंएँ बोलअ कि हे प्रभू, तिन्नां का ता थोघ आसा कि हूँ तेरै विश्वासी किहै पा जेहला दी और जैगै-जैगै किहै चिका-मारा त।<sup>20</sup> और जधू तेरै गुआह स्तिफानुसे खूना बहाऊंदै तै लागै दै, हूँ बी त तेभै तिधी खहळुअ द, और एसा गल्ला दी त सैहमत, और तेऊ मारने आळेए, झिकळै बी तै मुखा।<sup>21</sup> और प्रभू मुखा बोलअ कि पोही नाश, किल्हैकि मूँह भेजणअ तूह होरी जाती सेटा दूर-दूर तैणी।

<sup>22</sup> तियां लोग एसा गल्ला तैणीं ता रहै शृणुदै लागी पर एसा गल्ला शुणीं करै तिन्नें जोरै-जोरै लैळा लाई बोलअ कि ईहै आदमिओ करा अंत, एऊओ जिऊंदअ रहणअ निं ठीक आथी।<sup>23</sup> जांऊं तियां लैळा लांदै झिकळै धेळदै और धूळै माटै झैऊंदै लागै, <sup>24</sup> ता पळटणें सुबेदारै बोलअ, कि एऊ नियां गहळा लै, और कोळै बाही करै करा पूछताछ, ताकि मुखा बी लोळी थोघ लागअ कि ईयां लोग किल्है आसा लागै दै एऊए बिरोधा दी ईहै लैळा लांदै।<sup>25</sup> जांऊं पौलुस तिन्नें राशी करै बाहअ, तैबै पौलुसै तेऊ सुबेदारा लै जुण तिधी खहळुअ द त; तेऊ लै बोलअ, अह कै सही आसा कि तम्हें एकी रोमीं माहूँ लै, और सह बी बिणां कोई दोषै चिका कोळै करै? <sup>26</sup> सुबेदारै इहय शुणीं करै पळटणें सरदारा का बोलअ कि तंएँ अह कै आसा लाअ द करी? अह ता रोमीं आसा। <sup>27</sup> तैबै पळटणें सरदारै पौलुसा सेटा नाशी करै पुछअ कि मुखा खोज कि तूह कै रोमीं आसा? पौलुसै बोलअ कि हां। <sup>28</sup> इहय शुणीं करै पळटणें सरदारै बोलअ कि मूँह आसा रोमीं हणैओ पद बडै भारी ढबै दैई करै भेटअ द! पौलुसै बोलअ कि हूँ आसा जल्माई का रोमीं। <sup>29</sup> तैबै जुणीं तेऊए पुछताछ ती लाई दी करी, तियां हटै नडैऊए तेऊ सेटा का दूर, और पळटणें सरदार बी, इहय थोघ लागी करै कि अह आसा रोमीं, मंएँ आसा अह बाहअ द, सह डरअ।

### माहासभा सहनै पौलुस

<sup>30</sup> दुजै धैळै सह ठीक-ठीक पतअ करनें इछा दी कि यहूदी तेऊलै किल्है ला दोष, तेऊए शांघळी लोहै खोळै, और माहायाजक और सारी सभा लै दैनीं कठा हणें आज्ञा और पौलुस तिन्नें उंधै नियां और तिन्नां सहनै किय खळअ।

**23** पौलुसै माहासभा बाखा टकटकी लाई करै भाळअ और बोलअ, हे भाईयो, मंएँ आसा आज्ञा तैणीं बिलकुल सचै तरिकै दी जिंदगी बताऊई दी।<sup>2</sup> हन्नयाह माहायाजकै दैनअ तिन्नां लै तेऊए मूँहें चैंडै बाहणेंओ हुकम जुण पौलुसा सेटा खहळुए दै तै। <sup>3</sup> तैबै पौलुसै तेऊलै बोलअ, हे चुनै लेसी दी भित, परमेश्वरा मारनअ तूह; तूह आसा व्यवस्थे साबै मेरै फंसले करदअ बेठअ द, और तेखअ किल्है दैआ तूह व्यवस्थे खलाफ मुह्लै चैंडै बाहणें आज्ञा? <sup>4</sup> जुण तिधी नेळ खहळुए दै तै, तिन्नें बोलअ पौलुसा लै रोशा संघे कि तूह परमेश्वरे माहायाजका लै बुरअ बोला? <sup>5</sup> पौलुसै बोलअ, हे भाईयो, मुखा निं थोघै त कि अह आसा माहायाजक, किल्हैकि शास्त्रा दी आसा लिखअ द कि आपणें लोगे प्रधाना लै निं बूरअ बोली।

<sup>6</sup> तैबै जांऊं पौलुसा का थोघ लागअ कि सभा दी केतरै फरीसी और केतरै सदुकी आसा, तेऊ जोरै हाक पाई बोलअ, हे भाईयो, हूँ आसा फरीसी और फरीसिए खानदानी का, मूँएँ दै और मूँएँ दैए आशादी और पुनरुथाने बारे आसा लागअ द मेरअ मुकदमअ हंदअ। <sup>7</sup> जांऊं पौलुसै अह गल बोली ता फरीसी और सदुकी बिचै पळअ झगळअ और सभा दी पळी फूट। <sup>8</sup> किल्हैकि सदुकिओ आसा त इहय मनणअ कि ना ता पुनरुथान आथी और ना स्वर्गदूत और ना आत्मां आथी; पर फरीसी मना तै इन्नां सोभी गल्ला। <sup>9</sup> तैबै मचअ बडअ हाहअ-गोहअ और कई शास्त्री तै फरीसीए दला का, तियां खळै उझुई करै इहय बोली करै लागै झगळदै कि हाम्हां का निं एऊ माहूँ दी किछे बुराई धेछदी, जै कुणीं आत्मां और स्वर्गदूता संघे गल्ला की ता तै किजै हुअ? <sup>10</sup> जांऊं खासअ झगळअ हुअ, ता पळटणें सरदारै एसा डरै कि ईयां निं करा

पौलुसे टुकळै-टुकळै मारी करै, ता तेऊ आज्ञा दैनीं कि पौलुसा काढा इन्नां बिचा का जोरा-जोरी बागै और एऊ नियां गहळा लै।

<sup>11</sup> और तेसाई राची प्रभू पौलुसा सेटा खळै हई करै बोलअ कि, हे पौलुस हँळअ निं करी, किल्हैकि जेही ग्वाही तंएँ मेरी येरुशलेम में दैनीं, तेही पळणीं ता रोम नाशी करै बी दैणीं।

### पौलुसे हत्या करनेओ षडयंत्र

<sup>12</sup> जांऊं दुजै धैळै यहूदी किय एकअ और कसम खाई कि जेभै तैणीं हाम्हां पौलुसा मारी निं मुके, तेभै तैणीं हाम्हां खाए पिए ता हाम्हां लै आसा लानत। <sup>13</sup> जुणीं कसम खाई ती तियां तै च्वाहळी जहूँ का बी जादै। <sup>14</sup> तिन्नें माहायाजका और पुरनिए सेटा नाशी करै बोलअ कि, हाम्हां आसा एही ठानी दी कि, जांऊं तैणीं हाम्हां पौलुसा मारी निं पाए, तेभै तैणीं हाम्हां किजै चाखे बी ता हाम्हां लै आसा लानता परेंदै लानत। <sup>15</sup> तैहीता एबै माहासभा संघी पळटणें सरदारा समझाऊआ इहय कि तेऊ भेजा तम्हां सेटा लै कि तम्हां शाची तेऊए बारे ठीक-ठीक जांच पड़ताळ करनीं, और हाम्हां हणें तेऊ इधी तम्हां सेटा पुजणें का पैहलै ई मारना लै तारखुई रहै दै।

<sup>16</sup> और पौलुसै भाणजू शृणुअ कि ईयां आसा पौलुसा मारनेए ताका, ता तेऊ गहळै नाशी करै दैनअ पौलुसा लै अह संदेशअ। <sup>17</sup> पौलुसै सुबेदारा मांझै एक आपू सेटा लै शादी करै बोलअ कि एऊ जुआना निंआ पळटणें सरदारा सेटा लै, अह चाहा किजै खोजणअ। <sup>18</sup> तेऊ बी सह पळटणें सरदारा सेटा लै निंअ और सरदारा का बोलअ कि, पौलुस कैदी की मूँह शादी करै एही अरज कि अह जुआन चाहा पळटणें सरदारा का किजै खोजणअ, एऊ निंऊं तेऊ सेटा लै। <sup>19</sup> पळटणें सरदारै तेऊओ हाथ ढाकी करै सह जुदअ जिहअ निंई करै पुछअ कि तूह किजै चाहा मुखा खोजणअ? <sup>20</sup> तैबै तैऊ पूरी गल्ला खोजी कि यहूदी आसा एकअ किय द तियां चाहा कि ताखा बोळणअ तिन्नां इहय कि, काल्ला आण पौलुसा माहासभा लै; जाळणअ कि तूह चाहा तेऊए ठीक-ठीक जांच पड़ताळ करनीं। <sup>21</sup> पर तिन्नें गल्ला निं मनीं, किल्हैकि तिन्नां मांझै आसा च्वाहळी का बी जादै लोग पौलुसा बातो-बात मारने ताका रहै दै। तिन्नें आसा एही ठानी दी कि जेभै तैणीं पौलुसा मारी निं छेके, तेभै तैणीं खाए-पिए, ता हाम्हां लै आसा लानत, और तियां आसा एभै तैर और तेरै बोला न्हैळै लागै दै। <sup>22</sup> तैबै पळटणें सरदारै सह जुआना इहय बोली भेजअ कि एसा गल्ला निं कोही का खोजी जुण तंएँ मुखा खोजी।

### पौलुस फेलिक्स सेटा लै भेजणअ

<sup>23</sup> और तेऊ दूई सुबेदार शादें और तिन्नां लै बोलअ कि दूई शौ सपाही, सत्तर शंआरी, और दूई शौ फौजी डाहा राची भितरी कैसरिआ लै नाशणां लै तैर करी। <sup>24</sup> और पौलुसे शंआरी लै डाहा घोळै तैर करी कि सह पजैळणअ फेलिक्स हाकमा सेटा सही सलामत। <sup>25</sup> तेऊ एही एक चिठी बी लिखी,

<sup>26</sup> माहाप्रतापी फेलिक्स हाकमा लै क्वौदियस लुसियासो नमस्कार, <sup>27</sup> अह माहूँ लाअ त यहूदी ढाकी करै मारी, पर जांऊं मुखा इहय थोघ लागअ कि अह आसा रोमीं, ता पळटण निंई करै आणअ मंएँ छडैऊई। <sup>28</sup> और मंएँ की इहय पतअ करनें बडी भारी कोशिश कि तियां एऊ लै किजै दोष ला, तै नियां मंएँ तिन्नें माहासभा लै। <sup>29</sup> तिधी लागअ मुखा थोघ कि तियां लाआ तिन्नें व्यवस्थे बिबादे बारे एऊलै दोष, पर मारनें और बाहणें जोगी दोष निं मुखा एऊदी किछे धेछदअ। <sup>30</sup> और जांऊं मुखा कुणीं इहय खोजअ कि तिन्नें आसा अह लाअ द मारी, ता मंएँ भेजअ नडैऊए अह ताह सेटा लै, और मंएँ आसा एऊलै दोशा लागें आळै लै बी आज्ञा दैनीं की ताह सेटा नाशी करै सारी गल्ला, जुण बी तिन्नां बोळणअ होए।

<sup>31</sup> तैबै जेही सपाही लै आज्ञा दैनीं ती, तिहैई तिन्नें पौलुस नियां और तियां पुजै राची भितरी अतिपत्रिस। <sup>32</sup> और दुजै धैळै तियां शुआरी, सपाही तेऊ निणा लै संघा भेजी करै आपू पुजै गहूँ बापस। <sup>33</sup> तिन्नें बी कैसरिआ पुजी करै हाकमा सेटा चिठी पजैळी और पौलुस बी किय तेऊ सेटा खळअ। <sup>34</sup> तेऊ चिठी पहळी करै पुछअ कि अह कसा प्रदेशो आसा? <sup>35</sup> और जांऊं तेऊ का इहय थोघ गअ लागी कि अह आसा किलकिया प्रदेशो ई, ता तेऊ

पौलुसा लै बोलअ, जेभै तेरै जिदी बी एछे, तेभै करनअ मूँह तेरअ मुकदमअ, और तेरु दैनी हेरोदेसे किल्लै दी पौलुसा पहरै दी डाहणें आजा।

### हाकम फेलिक्सा सहनै पौलुस

24 पांजा धैलै बाद हन्याह माहायाजक कई पुरनिऐ और तिरतुल्लुस नांओए कहा बकीला संघा लई आअ और तिन्नै हाकमे सहनै पौलुसो दोष खोजअ। 2 जांऊं पौलुस शादअ ता तिरतुल्लुस बकील तेरु लै दोषा लांदअ लागअ कि हे माहाप्रतापी फेलिक्स, ताह करै भेटा हाम्हां बडअ गर्ब और तेरै प्रबन्धा करै सुधरा एसा जातीए कई बुराई। 3 ताह और तेरै कानूना मना हाम्हें हर जैगा और हर प्रकारा दी धन्याबाद करी। 4 पर हे माहाराज, ताल्लै निं हाम्हें खासअ दुख दैणअ चाहंदै, हूँ करा ताह सेटा अरज कि किरपा करी करै म्हारी दूई गल्ला शुण, 5 किल्लैकि हाम्हें भाळअ अह आदर्मी उपद्रभ और सारै संसारे यहूदी बिचै बलबै करनै आळअ और नासरीए कुपंथो अह मुखिअ। 6 ऐऊ लाअ त म्हारअ मांदर अशुध करी और तै ढाकअ हाम्हें अह। हाम्हां ता दैणअ त आपणीं व्यवस्थे साबै एऊ लै दंड, 7 पर पळटणें सरदारै लुसिआसै छडैऊअ अह जबरदस्ती म्हारै हाथा का पोही और 8 जिदी लै दैनीं ताह सेटा एछणें ज्ञाजत की इन्नां सोभी गल्ला, जेते बारै हाम्हें इन्नां दोषा एऊ दी ला, ताखा लागणअ आप्पै एऊ पूछी- जाच करै थोघ। 9 यहूदी बी तेरुओ साथ दैई करै बोलअ कि, सत्री किय एऊ इहयई।

### पौलुसो जबाबी उत्तर

10 जांऊं हाकमें पौलुसा लै बोळणा लै शारअ किय ता पौलुसै उत्तर दैनअ, "मुखा जांऊं इहय थोघ लागअ कि तूह करा कई साला ओही एसा जातीओ न्याय, बडै आनंदा दी लाअ मंऐ एसा गल्लो उत्तर दैई। 11 तूह सका आप्पै समझी कि जेभै हूँ येरुश्लेमै परमेश्वर भजना करदअ आअ ता मूँह निं मैची बाराह धैलै का उझै हुऐ; 12 और इन्नां नां भाळअ हूँ मांदरै, नां सभा घरा दी और नां नगरी दी कसा संघे हठळदअ और नां लोगा कठा करदअ? 13 नां ईयां इन्नां गल्ला, जसा गल्लो ईयां मुल्लै दोष ला, सत्री साबत करी सकदै। 14 पर हूँ मना ताह सहनै एसा गल्ला कि जेरु पंथा लै ईयां कुपंथ बोला, तेसाई रिती करा हूँ आपणें बाब दादे परमेश्वर सेऊआ, और जुंण गल्ला व्यवस्था और भबिश्वाबाणीं करनै आळैए ग्रंथा दी आसा लिखी दी, तिन्नां सोभी हूँ मना बी। 15 और परमेश्वरा का डाहा हूँ आशा, जुंण तियां आप्पु बी डाहा कि धर्मी और अधर्मी हणें भी जिऊंदै। 16 और हूँ करा आप्पु बी एही कोशिश कि परमेश्वर और लोगा बाखा लोळी मेरअ बिबेक निर्दोष रहअ। 17 कई साला बाद आअ त हूँ आपणें लोगा लै दान दक्षणा पजैळदअ और भेटा चढाऊंदअ। 18 तिन्नै हूँ मांदरा दी शुध हालता दी और, एकै जळ्हा, कोई दौं फसादा करदअ निं भेटअ। हां, आसिआ का थियै किछ यहूदी तिधी; पर तिन्नां बी त ठीक इहय कि, 19 जै तिन्नां मेरै खलाफ कोई आसा बी, तै सका तै तियां इधी ताह सहनै मुल्लै दोष लाई। 20 या खोजे ईयां आप्पै कि जेभै हूँ माहासभा सहनै खळअ किय त, तेभै इन्नां मुंह दी कै अपराध भाळअ? 21 एसा एकी गल्ला छाडी जुंण मंऐ तिन्नां सहनै खळै हई करै पुकारी कि मरी करै जिऊंदै हणैए बारै आसा आजा तम्हां सहनै मेरअ मुकदमअ लागअ द हंदअ।

22 फेलिक्से जुंण एऊ पंथे सारी गल्ला ठीक-ठाक जाणा त, तियां टाळै तेरु इहय बोली करै कि जेभै तैणीं पळटणों सरदार लुसियास एछे, तेभै हणअ थारी गल्लो फँसलअ। 23 और सुबैदारा लै आजा दैनीं कि पौलुसा लै निं कोई तंगी तकलिफी दैई और एऊए रखुआळी करै बडै सुखा संघे, और एऊए साथी भाई मांझै जुंण बी एऊए सेऊआ टैहली लै एछे, तिन्नां निं रोकी।

### फेलिक्स और दुसिल्ला सहनै पौलुस

24 और कई धैलै बाद फेलिक्स आपणीं लाळी दुसिल्ला जुंण यहूदीणीं ती, तेसा संघा लई आअ और पौलुस शादी करै विश्वास बारै जुंण यीशू मसीह दी आसा, तियां गल्ला शुणीं। 25 और जांऊं पौलुस धर्म, संयम और हणें आळै न्याये बारै चरचा करा त, ता फेलिक्से भयमान हई करै उत्तर दैनअ कि, एभै ता नाश, और जेभै भी मूँह मोकअ भेटे ता तेभै शादू हूँ ताह। 26 तेरु ती

पौलुसा का किछ ढबै भेटणें आशा बी, तैहीता भी-भी शादी करै करा त तेरु संघे गल्ला। 27 पर जांऊं दूई साला बिती, ता पुरकियस फेस्तुस फेलिक्से जैगा दी आअ; और फेलिक्से यहूदी खुश करनै तैणीं पौलुस डाहअ बंधुअ कैदी ही बणाई।

### पौलुसे माहाराजे दुहाई दैणीं

25 फेस्तिस तिन्नां राज्य दी पुजी करै नाठअ चिड धैलै बाद येरुशलेमां लै। 2 तैबै माहायाजकै, यहुदिए बडै लोगै तेरुए सहनै पौलुसे गल्ला छेळी 3 और तेरु का अरज करी करै पौलुसे बिरोधा दी की एही मांग कि तेरु शाद येरुशलेमा लै। किल्लैकि तियां चाहा तै पौलुसा बातो-बात मारनअ। 4 फेस्तुसै उत्तर दैनअ कि पौलुस आसा कैसरिआ दी पहरै दी, मूँह डेऊणअ आप्पै छेकै तिधा लै। 5 तेखअ बोलअ इहय कि तम्हां बिचै जुंण बडै अधिकार डाहा, तियां बी चाला संघा, जै तेरु माळू किजै गलत काम किय द आसा, तै सका तम्हें तेरुलै सहनै दोष लाई।

6 और तिन्नां बिचै कोई आठा दसा धैलै रही करै आअ कैसरिआ लै और दुजै धैलै न्याय गादी दी बेशी करै दैनअ पौलुसा आळणेंओ हुकम। 7 जांऊं सह आअ ता यहूदी बी तै येरुशलेमा का आए दै, तिन्नै ओरी-पोरी खट्ठूई करै बडै भारी दोष लाए, जेते तियां कोई प्रमाण बी नि दैई सकदै तै। 8 पर पौलुसै उत्तर दैनअ कि मंऐ निं यहुदिए व्यवस्था और मांदरो, और ना राजे कैसरो कोई अपराध किय। 9 तैबै फेस्तुसै यहूदी खुश करने इछा दी पौलुसा लै उत्तर दैनअ कि, तूह कै इहय चाहा कि येरुशलेमै नाशी करै तिधी मेरै सहनै तेतै मकदमैओ फँसलअ होए? 10 पौलुसै उत्तर दैनअ, हूँ आसा राजे कैसरे न्याय आसने सहनै खट्ठुअ द, मेरै मकदमैओ फँसलअ लोळी इधी हुआ। जिहअ कि ताखा बी आसा थोघ कि मंऐ निं यहूदी लै किछै अपराध किय। 11 जै हूँ अपराधी आसा बी, और जै हूँ मारनै जोगी आसा, तैबी बी निं हूँ मरनै का मुकरदअ; पर जहा गल्लो ईयां मुल्लै दोषा लांदे आसा लागे दै, जै तिन्नां मांझै कोई बी गल सच निखळे, तैबी बी निं तूह मूँह तिन्नै हाथे सभाळी सकदअ, हूँ दैआ राजे कैसरे दुहाई। 12 तैबै फेस्तुसै मंत्रीए सभा संघे गल्ला करी उत्तर दैनअ कि तंऐ दैनीं कैसरे दुहाई, तूह नाशणअ एबै कैसरा सेटा लै।

### राजे अग्रिप्या सहनै पौलुस

13 और थोळै धैलै बाद अग्रिप्या राजअ और बिरनिके कैसरिआ एछी करै फेस्तुसा का मुलाकात की। 14 और तिन्नै खाससै धैलै तिधी रहणें का बाद, फेस्तुसै पौलुसे कथैआ राजे का खोजी कि एक माळू आसा जुंण फेलिक्से इधी बंधुअ आसा छाडअ द। 15 जधू हूँ येरुशलेमै थिय, ता माहायाजक और यहुदिए पुरनिऐ की तेरुए गल्ला, तियां चाहा कि तेरु लै दैआ दंडा दैणीं आजा। 16 पर मंऐ दैनअ तिन्नां लै जबाब कि रोमिं निं एही रिती आथी कि कुंण आदर्मी सबाळणअ सजा दैणां लै, जेभै तैणीं कि दोषी आपणें मुकदमै करनै आळै सहनै खळै हई करै जबाबा दैणेंओ मोकअ नां भेटे। 17 ता जांऊं तियां कठा हुऐ ता मंऐ निं देरी की और दुजै धैलै न्याय आसना दी बेशी करै तेउ आदर्मी शादणें आजा दैनी। 18 जांऊं तेरुए दी मुकदमै करनै आळै खळै हुऐ ता तिन्नै बी निं तेतरी बुरी गल्लो दोष लाई जिहअ हूँ समझा त। 19 पर आपणे मत, और यीशू नांओए कोई आदर्मिंए बारै जुंण मूँअ त और अह पौलुस खोजा तेरु जिऊंदै, एसा गल्लो बिबाद करा तै ईयां। 20 हूँ त इहय झारखुअ द कि इन्नां गल्लो पतअ किहअ करै लाऊं? तैहीता मंऐ एऊ का पुछअ कि तूह येरुशलेमा लै चालअ कि तिधी इन्नां गल्लो फँसलअ होए? 21 पर जांऊं पौलुसै दोहाई दैनी कि मेरअ फँसलअ लोळी माहाराजाधिराजे सेटा हुआ ता मंऐ दैनी आजा कि जेभै तैणीं हूँ एऊ कैसर राजे सेटा निं पजैळू, तेभै तैणीं करा एऊए रखवाळी। 22 तैबै अग्रिप्या राजे फेस्तुसा का बोलअ, हूँबी चाह तेरु मांळूए शुळणअ कि सह कै बोला? फेस्तुसै बोलअ कि काला शुणें तूह भाळै।

23 दुजै धैलै जांऊं अग्रिप्या राजअ और बिरनिके बडी धूमधाम संघे पळटणें सरदारा और नगरीए बडै लोगा संघे दरबार पुजे; ता फेस्तुसै आजा दैनी कि पौलुस आणा ओही। 24 फेस्तुसै बोलअ हे माहाराजा अग्रिप्या, और इधी हाम्हां संघे सोभी माळूओ, तम्हें भाळा एऊ माळू, जसरे बारै सारै यहूदी

यरुशलेम में और इधी बी लैळा, लाई-लाई करे मुखा अरज की कि अह जिऊंदअ डाहणअ नि ठीक आथी। 25 पर मुखा गअ थोघ लागी कि एऊ नि इहय किछै किय कि एऊ पा मारी; और जै कि एऊ आप्पेई माहाराजै कैसरे दुहाई दैनी ता मंरें आसा बणांअ द एऊ भेजणेंओ मन। 26 पर मूँह नि एऊए बारै किजै खास गल निंसी भेटी कि आपणें मालक सेटा लै किजै लिखूं? तैहीता मंरें तम्हां सन्नै, बिशेष करै माहाराजै अग्रिप्पा सन्नै आणअ कि जाच-पडताळ करनै का बाद मूँह किजै लिखणा लै भेते। 27 किल्हैकि बंधुअ कैदी भेजणअ और, जुंण दोष तेऊ दी आसा, तियां नि खोजै, अह गल जार्होआ मुखा बेकार।

### अग्रिप्पा राजै सन्नै पौलुसे सफाई देणी

26 अग्रिप्पा राजै पौलुसा लै बोलअ, कि आपणें बारै बोळणें आसा ताल्है जाजत। तैबै पौलुसे हाथ आजू बढाऊई करै उत्तर दैनअ कि, 2 हे राजा अग्रिप्पा, जेतरी गल्लो यहूदी मुल्है दोष लाआ, आज्ञा ताह सन्नै उत्तर दैणअ समझा हूँ आप्पू धन्य। 3 खासतर तै कि तूह करा आप्पे जाणीं यहूदिए बभारा और इने बिबादा, ता मेरी आसा ताह सेटा एही अरज कि मेरी गल्ला शुणें धीर धरी करै। 4 जिहअ मेरअ चाल-चलन शुरू का ही आपणीं जाती बिचै येरुशलेमै थिय, तेतो आसा इन्ना यहूदी का बी थोघ। 5 जै तियां ग्वाही देणीं चाहे ता तियां बछेणां मूँह शुरू का कि हूँ फरीसी हई करै धर्मं सोभी खरे पंथा दी हूँ चलअ। 6 और एबै तेसा प्रतिज्ञे आशा दी जुंण परमेश्वरै म्हारै बाब दादें का की ती, आसा मेरअ मुकदमअ लागअ द चलदअ। 7 तेसाई प्रतिज्ञे पूरी हणें आशा दी, म्हारै बाराह गोत्र सारै मनै राची धैळी आसा आए दै परमेश्वरै सेऊआ करदी। हे राजा, एसाई आशा डाहणें बारै ला यहूदी मुल्है दोष। 8 जै कि परमेश्वरै किए मूरें दै बी जिऊंदै, ता तम्हें एसा गल्ला किल्है नि विश्वास जोगी समझदे?

9 मंरें बी सोचअ त इहय कि यीशू नासरीए बिरोधा करी तेऊए खलाफ लागा मूँह बडअ किछ करनअ। 10 और मंरें येरुशलेमै इहय किय बी। एतरअ तैणीं कि माहायाजका का अधिकार पाई करै कई पबित्र लोग पाए मंरें जेहला दी, और जाऊं तिन्ना मारी पा तै, तैबी बी दैआ त हूँ तिन्ने बिरोधा दी सैहमती। 11 इहय करै हर आराधनालै दी हूँ तिन्ना लै कशट दैई करै यीशूए करबाऊआ त निंदा, इधी तैणीं कि गुस्से मारै हुअ त हूँ इहय पागल कि बागै नगरी नाशी करै बी करा त हूँ तिन्ना लै तकलीफ दैई।

### आपणें दिल परिवर्तन हणेंओ वर्णन

(प्रेरिते काम 9:1-19; 22:6-16)

12 एसाई धुना दी जाऊं हूँ माहायाजका का अधिकार लई करै त हूँ लागअ द दमिशका लै नाशदअ। 13 ता हे राजा, बाता हांडदी दपहरो बगत त, मंरें सरगा का सुरजा का बी तेज एक ज्योती आप्पू और आप्पू संघा हांडणें आळै साथी चऊ फेर चमकदी भाळी। 14 ता जाऊं हाम्हें सोभै धरनीं पळै, ता मुखा शुंहुअ इब्रानी भाषा दी कि मुल्है बोलअ इहय शब्द कि, हे शाऊल, हे शाऊल, तूह किल्है दैआ मुल्है दुख? तिछै दी लात बाहणीं आसा ताल्है मुशकळ। 15 मंरें बोलअ इहय कि हे प्रभू तूह कुंण आसा? प्रभू बोलअ इहय कि हूँ आसा यीशू; जसा लै तूह दुख दैआ। 16 पर तूह उझू आपणीं जांघा खळअ, किल्हैकि मंरें आसा दैनअ द ताल्है एते तैणीं दर्शण कि, तूह बणाणअ मूँह तिन्ना गल्ला दी सेबक और गुआह; जुंण तंरें भाळी दी आसा, और तिन्ना गल्लो बी जसा लै मूँह ताल्है दर्शण देणें। 17 और मूँह रहणअ ता तेरें लोग का और होरी जाती का बचाऊंदै लागी; जसा सेटा लै तूह मंरें एबै भेजी आसा लाअ द कि 18 तूह तिन्ने आच्छी खोले कि न्हैरै का प्रैशै बाखा लै, और शैताने गुलामी का परमेश्वरा बाखा लै फिरे: कि पापा लै माफी, और तिन्ना लोगा संघें जुंण मूँह दी विश्वास करी करै पबित्र आसा कियै दै मिले।

19 तै हे राजा अग्रिप्पा, मंरें निं तेऊ स्वर्गें दर्शणें गल्ला शूर्णीं करै नशूर्णीं किई। 20 पर पैहलै दमिशक और तेखअ येरुशलेमै रहणेंआळै लै, तेखअ यहूदिए सारै देश और होरी जातीए लोगा रहअ समझाऊंदअ लागी कि मन बढा और परमेश्वरा बाखा फिरी करै मन फरेऊणें जोगी काम करा। 21 इन्ना

गले बजहा यहूदी रहै मूँह ढाकी करै मारनं कोशिशा लागी। 22 परमेश्वरै सहायता करै आसा हूँ आज्ञा तैणीं जिऊंदअ, और होछे बडै सोभी सन्नै दैआ हूँ एसा ग्वाही और इन्ना गल्ला छाडी नि हूँ होर किछै बोलदअ, जुंण मुसा और भविष्यवक्ता बी आसा बोली दी कि हणें आळी आसा कि 23 मसीह लागणअ दुख भोगणअ और सह सोभी का पैहलै मरी करै जिऊंदअ हई, म्हारै लोगा बिचै और होरी जाती बिचै करनअ तेऊ ज्योतिओ प्रचार।

24 जाऊं पौलुस इहय करै जबाबा दैदअ त लागअ द, ता फेस्तुसै जोरै हाक पाई बोलअ, हे पौलुस तूह आसा पागल, खासी बिद्या करै हुअ तूह पागल। 25 पर पौलुसै बोलअ, हे माहाप्रतापी फेस्तुस, हूँ नि पागल आथी पर हूँ खोजा सद्दाई और बुधिए गल्ला। 26 राजअ बी, जसा सन्नै हूँ नडरअ हई करै आसा बोलदअ लागअ द, इन्ना गल्ला जाणां, मूँह आसा एसा गल्लो भरोसअ कि इन्ना गल्ला मांझै नि कोहै आथी एऊ का बी छुपी दी, किल्हैकि अह घटना नि किधी एकी कूर्णी आथी हुई दी। 27 हे राजा अग्रिप्पा, तूह कै भविष्यागतो भरोसअ करा? हां, मुखा आसा थोघ कि तूह मना, 28 तैबै अग्रिप्पा पौलुसा लै बोलअ, धख जिहअ समझाऊई करै कै मूबी तूह मसीही चाहा बणाणअ? 29 पौलुसै बोलअ, परमेश्वरा का आसा मेरी प्राथणां कि, कै थोळै दी और कै खाससै दी, सिधअ तूह ही नि, पर जेतरे लोग आज्ञा मेरी गल्ला शुणंदै आसा लागै दै, सोभ इन्ना बंधना छाडी करै लोळी मूँह जिहै हुरे।

30 तैबै राजअ, हाकिम, बिरनिके और तिन्ना संघे बेशणें आळै उझूए खळै; 31 और जुदै-जुदै नाशी करै लागे आप्पू बिचै बोलदै कि अह मांहुँ इहय ता किछै नि करा, जुंण बाहणें और मारनं जोगी आसा। 32 अग्रिप्पा फेस्तुसा का बोलअ कि जै अह कैसरे दुहाई नाई दैदअ, तै सका त अह छुटी।

### पौलुसे रोम देशे यात्रा: क्रेतै तैणीं

27 जाऊं इहय फेंसलअ हुअ कि हाम्हें जहाजा दी इटालिया लै नाशा, ता तिन्ने पौलुस और होर बी कई कैदी बी युलियुस नाओए औगुस्तुसे पळटणें एकी सुबेदारै हाथै सभाळै। 2 और अद्रमुतियमे जहाजा दी जुंण आसिआ कनारै जैगा का नाशणें आळअ त, तेथ दी बेशी करै हाम्हें खोलअ। और एक अरिस्तर्खुस नाओए एक थिस्तुनिकिओ एक मकिदुनी त हाम्हां संघा। 3 दुजै धैळै पाअ हाम्हें सैदा दी लंगर और युलियुसै पौलुसा लै क्रिपा कि तेऊ दैनअ आपणें साथी भाई सेटा नाशणें कि तेऊओ आदर सत्कार करे। 4 तिधा का जहाज खोल्ही करै हाम्हें उल्टी बागरी चलणें बजह चलै कुपुस टापुए आडा दी। 5 और किलकिआ और पंफूलिआ नेळ समुंदरा बाती नाशी करै हाम्हें लुसिए मूरा उतरै। 6 तिधी भेटअ सुबेदारा सिंकंदरिओ एक जहाज इटालिया लै नाशदअ, और तेऊ बशैळै हाम्हें तेथ परैदै। 7 और जाऊं हाम्हें खाससै धैळै तैणीं सुलै-सुलै हांडदी बडी मुशकळ करै कनिदुसा सन्नै पुजे, इहय हूअ तै कि बागरी निसी हाम्हां आजू बढणें दैई ती, और हाम्हें सलमोने सन्नै का हई करै क्रेते आडा दी चलै। 8 और तेते कनारै-कनारै बडी मुशकळता दी चली करै शुभ लंगरबारी एकी जैगा दी पुजै, तिधा का ती लसया नगरी नेळ।

9 जाऊं खाससै धैळै बिलै, और पाणिए सफरा दी हुआ ती कठणाई तै कि उपबासे धैळी गई ती बिली, ता पौलुसै तियां समझाऊरे, 10 कि हे सज्जनो, मुखा जाळिंआ इहय कि एसा यात्रा दी आसा बडी भारी हानि और बिपत्ती एछणें आळी, सिधी माले हानि नि तम्हें समझी पर जहाजे और प्राणें बी आसा हानि हणेंआळी। 11 पर सुबेदारै मनी पौलुसे गल्ला का बढकर जहाजे मांझी और मालकए। 12 और सह बंजर जैगा नाई ती सरदी काटणा लै ठीक बी आथी, तैहीता सोभी किय इहय बचार कि तिधा का जहाज खोल्ही करै जै केऊ साबै हई सके, फिनिक्स पुजी करै सरदी काटे। अह क्रेते बंजर जैगा आसा ती एक जहाजो आडअ जेतो मोहरअ दखण-पछम और उत्तर पछमा बाखा खुल्हा त।

### समुंदरै तुफान

13 जाऊं दखणी हाऊआ बगदी लागी ता इहय समझी करै कि म्हारअ मतलब हुअ पूरअ, तिधा का लंगर चकअ और कनारै-कनारै नाठै क्रेतै सेटा बाती। 14 पर थोळी देर बाद तिधा का एक बडी आंधी दिश बागर उझूई, जसा

लैं युरूकूलीन बोला। 15 ज़ांऊं सह ज़हाज़ा दी लागी, ता ज़हाज़ा निं हाऊआ बागरी सहनै खट्ठुई सकअ, और हाम्हें दैनअ तेऊ आपणें साबे बगणें, और इहय ई करै रहै बगदै लागी। 16 तैबै कौदा नांओए एकी होछै जिहै टापूए आडा दी बगदी-बगदी बडी मुशकळ जाए की हाम्हें आपणीं डोंगी बशा दी। 17 मल्लाहै सह चकी करै कई तरिके करी करै ज़हाज़ा हेठै बाह्नी, और सुरतिसे चोर रेता दी टेकणें डरे पाल और समान उतारी करै चलै बगदै ई। 18 ज़ांऊं हाम्हें आंधी तुफाना दी बडै भारी झलारै और धाकै खाए ता दुजै धैळै लागै तियां आपणें ज़हाज़े समाना पाणीं जैंदरी शोटदें, 19 और चिऊथे धैळै मुकै तियां आपणें हाथै ज़हाज़ो साज़-समान शोटी। 20 और कई धैळै तैणीं नां ता सुरज धेछुअ और नां ता तारै धेछुए, और बडी भारी दिशबागर ती चलदी लागी दी, और आखर हुई म्हारी बचणें आशा बी खतम।

21 ज़ांऊं तियां खास्से धैळै भुक्खै रही मुकै, ता पौलुसै तिन्नां बिचै खळअ हई करै बोलअ, हे लोगो, हूअ ता लोळी ती इहय कि तम्हें मेरी गल्ला शुणदें और क्रेतै का नां ज़हाज़ खोलदें और नां अह बिपत्ती और हानि हंदी। 22 पर ऐबै समझाऊआ हूँ तम्हां कि डेट डाहा, किल्हैकि तम्हां मांझै निं कोहिए प्राणें हानिं हणीं पर ज़हाज़ नि बची सकदअ। 23 किल्हैकि परमेश्वर, जसरअ हूँ आसा, और जसरी हूँ सेऊआ करा, तेऊए स्वर्गदूतै हिज राची मूँह सेटा एछी करै बोलअ कि 24 "हे पौलुस, डरै निं आथी; ताह लागा कैसरे सहनै खळणअ जरूरी, और भाळ, परमेश्वरै दैनै सोभ तालहै जुण ताह संघे यात्रा करदें आसा लागै दै। 25 तैहीता हे सज्जनो, डेट डाहा; किल्हैकि हूँ करा परमेश्वरा दी भरोसअ, कि जिहअ मुखा खोजअ द आसा, तिहअ ई हणअ। 26 पर हाम्हां लागणअ कसा टापू दी नाशी रहणअ।

### ज़हाज़ो चुटणअ

27 ज़ांऊं चौदुई राच हुई, हाम्हें लागै अद्रिआ समुंदरै ठणाखदें, ता आधी राची मल्लाहै अटकल लाई करै समझअ कि हाम्हें पुजै कसा देशा नेळ। 28 और थालैओ पतअ करी करै तिन्नां कोई बिह पुरसअ डुघअ पाणीं भाळअ और थोळअ आजू नाशी करै तिन्नां भी तिन्नां थाह लोळी ता कोई पंदरा पुरसअ नापअ। 29 तैबै तिन्नां पथरीली जैगा पळणेंए डरै तिन्नां ज़हाज़े पिछलै चार लंगर पाए, और तेखअ रहै राची भैणें आशा दी। 30 पर ज़ांऊं मल्लाहै ज़हाज़ा का भागणअ चाहा तै, और तियां आजू का लंगर पाणें बहाने दी समुंदरै डोंगी थुआळी। 31 तैबै पौलुसै सुबेदार और सपाही का बोलअ कि जै ईयां ज़हाज़ा दी नाई रहै ता तम्हें निं कोहै बची सकदें। 32 तैबै सपाही राशै काटी करै डोंगी शोटी दूर।

33 ज़ांऊं राच भैणेंआळी ती, ता पौलुसे इहय बोली करै, सोभै रोटी खाणा लै समझाऊए कि आजू हूए चौदा धैळै, तम्हें रहै आस लाई भुखै, और किछै रोटी निं खाई। 34 तैहीता हूँ समझाऊआ तम्हां का इहय कि धख-धख खा, ज़ेता करै तम्हें बची सका, हैळअ निं करा, तम्हां मांझै निं कसरै मुंडो बाळ बी बांकअ हणअ। 35 और इहय बोली करै पौलुसै रोटी चोळी करै परमेश्वरो धन्यबाद किय और चोळी करै दैनी सोभी लै खाणा लै। 36 तैबै तियां सोभ लागै हैऊइ बतैऊई खांदें। 37 हाम्हें सोभै तै ज़हाज़ा दी दूई शौ छतर आदमी। 38 ज़ांऊं तियां सोभै ज़है रोटी खाई मुकै ता तियां लागै गिहूँ बोरी समुंदरै फैंकी करै ज़हाज़ा हळकै करदें।

39 ज़ांऊं ठीक राच प्रैशुई ता सह देश निं तिन्नां बछेणअ, पर एक खाट्ठी धेछुई; तेतो त चौरस कनारअ, और इहय बचार किय कि जै हई सके ता इधी टकेळणअ हाम्हां ज़हाज़। 40 तैबै तिन्नां लंगर खोल्ही करै समुंदरै छाडै और पतबारा खोल्ही करै बागरी सहनै आघलअ पाल चढाऊई करै लागै कनारै बाखा लै हांददें। 41 पर तिन्नां टकेळअ ज़हाज़ दूई समुंदरै कठा हणेंए जैगा दी; और गळही लै लागी ठेस और सह शाची तिधी और आजू-पिछू निसी सिकी, पर पिछली छालीए जोरा करै लागी चुटदी। 42 तैबै सपाही किय इहय बचार कि बंधुए कैदी पाणें मारी, इहय निं हआ कि कोई तैरी करै निखळी भागे। 43 पर सुबेदारै पौलुसा बचाऊणें इछा दी इहय करना लै किय नाई, और इहय बोलअ कि जुण तैरी सका, सह निखळा पैहलै छाहळ दैई करै कनारै 44 और बाकी कोई निखळा पाटरै दी, और कोई ज़हाज़े जिजाबस्तिए सहारै, इहय करै सोभ पुजै शुकी भूमीं दी सही सलामत बची।

### माल्टा दूवीपा दी पौलुस

28 ज़ांऊं हाम्हें सोभै बचै, ता तैबै लागअ हाम्हां का थोघ कि एऊ टापू लै बोला मिलिते टापू। 2 और तिन्नां जंगली लोगे की हाम्हां लै नोखी किरपा; किल्हैकि सरदीओ भिनअ त बरशदअ लागअ द और ठाडै शेळै दी तिन्नां हाम्हां सोभी लै आग ज़ाळी और हाम्हें डाहै आपू सेटा। 3 ज़ांऊं पौलुसै झुको बरिडअ झाळी करै आगिए घैनै दी पाअ, ता एक सांप आगिए गरमीं करै निखळअ और सह पळेदुअ पौलुसे हाथै। 4 ज़ांऊं तिन्नां जंगली सांप तेऊए हाथै लटकअ द भाळअ, ता तियां आपू बिचै लागै गल्ला करदें लागै और बोलअ कि अह आसा सच्ची हत्यारअ, अह समुंदरा का ता बचअ पर तैबी बी परमेश्वरै न्याय निं एऊ बचणें दैनअ। 5 तैबै पौलुसै सह सांप शोटअ आगी जैंदरी, और तेऊ निं किछै हानि हुई। 6 पर तियां रहै न्हैळै लागी कि अह शुआणअ-धुआणअ और एकदम बधळणअ धरनीं और तेखअ शोटणें एऊ प्राण। पर ज़ांऊं तियां खास्सी घळी भाळै रहै लागी; और भाळअ कि तेऊओ निं किछ बी बिगळअ ता तिन्नां किय होर बचार कि अह आसा कोई देबतअ।

7 तेसा जैगा ओरी-पोरी ती पुबलियस नांओए तेऊ टापूए प्रधाने जिम्मीं, तेऊ हाम्हें आपणें घरा लै निई करै चिइ धैळै की बडै प्यारा दी म्हारी पाहुणचारी। 8 पुबलियसो बाब त जौरा और आव लोहूओ रोगी बिस्तरै दी पळअ द, पौलुसै तेऊए घरै नाशी करै की तेऊलै प्राथणां, और तेऊ दी हाथ लाई करै किय सह रांबळअ। 9 ज़ांऊं इहय हुअ ता तेऊ टापू दी होर बमार बी आरे सोभ और तियां बी कियै रांबळै। 10 और तिन्नां सोभी की म्हारी इज्जत पत, और ज़ांऊं हाम्हें तिधा का चलदें लागै ता जुण किछ बी हाम्हां जरूरत ती, तिन्नां डाही तियां सोभै गल्ला ज़हाज़ा दी।

### माल्टा दूवीपा का रोम देशा बाखा लै

11 चीइ भिनै बाद हाम्हें सिकंदरीए एकी ज़हाज़ा दी बेटै और चलै, सह ज़हाज़ त तेऊ टापू दी पूरी सरदी रुकअ द और तेऊओ चिन्ह त दियुसकूरी। 12 सुरकुसै हाम्हें लंगर पाई चिइ धैळै रहै तिधी 13 तिधा का आरे हाम्हें घुमीं करै रेगियुम और एकी धैळै बाद चली दकखन हाऊआ और तैबै पुजै दुजै धैळै पुतियुली। 14 तिधी हाम्हें होरी विश्वासी भाई का मिलै और तिन्नां बोळणें दी रहै हाम्हें एकी हबतै तिधी, और इहय करै तिधा का चलै हाम्हें रोमा लै। 15 तिधा का विश्वासी भाई म्हारअ समाचार शुणीं करै अप्पियुसे चपे चिइ सराए तैणीं आरे हाम्हां मिलदें, तिन्नां भाळी किय पौलुसै परमेश्वरो धन्याबाद, और हैअ-विश्वास दैनअ।

16 ज़ांऊं हाम्हें रोम पुजै, ता पौलुसा लै भेटी तेऊ सपाही संघे जुदें जिहै एकी रहणें आज्ञा जुण तेऊए रखवाली करा त।

### रोम देशै पौलुस

17 चिइ धैळै बाद तेऊ यहूदिए बडै लोग शादें और ज़ांऊं तियां कठा हुए ता तिन्नां का बोलअ, हे भाईयो, मरें निं आपणें लोगा और आपणें बाब दादे बभारे खलाफ किछे किय, तैबी बी बंधूअ कैदी हई करै सभाळअ हूँ येरुशलैमा का रोमिए हाथै। 18 तिन्नां चाहअ हूँ मेरी जाच-पडताळ करी करै छाडणअ बी, किल्हैकि मूलहै निं मौता दैणें जोगी किछे दोष थिय। 19 पर ज़ांऊं यहूदी एते बिरोधा दी बोलदें लागै ता तै पळी मूँह कैसरे दुहाई दैणीं, एते तैणीं निं कि मूँह शाचअ आपणें लोगा लै दोष लाणअ त। 20 तैहीता मरें तम्हें शादें दै आसा कि तम्हां का मिलूं और गल्ला बाता करूं; किल्हैकि इस्त्राएले आशा लै आसा हूँ इन्नां शांघळी लोहै दी बाहअ द। 21 तिन्नां पौलुसा लै बोलअ, नां हाम्हां तैरै बारै यहूदी का चिठी पतरी भेटी, नां होरी भाई मांझै तैरै बारै किजै खोजअ और नां बूरअ बोलअ। 22 सह चाहा हाम्हें तारखा शुळणअ, किल्हैकि हाम्हां का आसा थोघ कि हर जैगा बोला एऊ मते बारै लोग बिरोधा दी गल्ला।

23 तैबै तिन्नां तेऊलै एक धैळी काढी और बडै भारी लोग हुए तेऊ सेटा कठा। और पौलुस परमेश्वरै राजे ग्वाही दैदी, और मूसा और भबिश्याबगते कताबा का प्रभू यीशूए बारै समझाऊंदी दोती का उडै तैणीं रह खोजदअ लागी। 24 तैबै कई तियां गल्ला मनी, और कई निं मनी। 25 तैबै तियां आपू बिचै एक मत्त निं हई सकै, ता पौलुसे एसा गले बोळणें दी तिधा का नाटै कि

पबित्रात्मां आसा याशयाह भविश्याबगते कताबा दी थारै बाब दादै का ठीक ई बोलअ द कि, डेऊ इन्नां लोगा लै बोल कि

<sup>26</sup> तम्हें शृणदै ता रहणै, पर नाई समझणै, भाळै ता रहणै, पर नाई भुझी सकदै।

<sup>27</sup> किल्हैकि इन्नां लोगो मन आसा मोटअ; और इने कान आसा गरकै हुऐ दै, और इनै आसा आपणीं आच्छी बंद डाही दी करी। इहय निं ह्आ कि तियां आपणीं आच्छी का भाळे, और काना का शृणै, और मना का समझे, और मूँह बाखा फिरे और हूँ तिन्नां चांगै करुं! <sup>28</sup> तै तम्हें समझा, कि परमेश्वरे

एऊ उद्दारे कथेया भेजी होरी जाती सेटा लै और तिन्नां शृंळणी बी। <sup>29</sup> ज्जांऊं पौलुसै इहय बोलअ ता यहूदी लागै आप्पू बिचै बिबादा करदै और तिधा का नाठै।

<sup>30</sup> और पौलुस पूरै दूई साला तैणीं रहअ आपणै कराऊरे दैई करै घरा दी <sup>31</sup> और जुंण तेऊ सेटा एछा तै, सह रहअ तिन्नां संघै मिलदअ लागी और बिणा रोक-टोक और नडर हई करै परमेश्वरे राजो रहअ प्रचार करदअ लागी और प्रभू यीशू मसीहे गल्ला सखाऊंदअ लागी।

# रोमियों

## भूमिका

रोमिए नांऊएँ पौलुस प्रेरिते एसा चिठीओ मकसद थिय इहय कि रोम देशे कलीसिया सेटा नाशणा लै रसतअ त्यार होए, जेते योजना पौलुसै बणाई ती डाही दी। तेऊए योजना ती एही कि थोळै धैळै करनअ त तेऊ तिधे मसीही संघे रही करै काम, तेखअ नाशणअ त तेऊ तिन्ने सहायता करै स्पेन देशा लै। पौलुसै लिखी अह चिठी मसीही विश्वासे आपणें ज्ञान और मसीही विश्वासीए जिन्दगी दी व्यवहारिक मलावटा समझणें तैणीं। एसा कताबा दी भेता हाम्हां पौलुसे संदेशो पूरै विस्तारा संघे विवरण।

रोमा देशे कलीसिए लोगो आदर-सत्कार करी करै और तिन्नां लै आपणीं प्राथणें बारै खोजणें का बाद करा पौलुस एसा पत्रीए मूल विषये बारै वर्णण :  
“किल्हैकि तेथ (सुसमाचारा दी) हआ परमेश्वरे धार्मिकता विश्वासा करै और विश्वासा लै प्रगट” (1:17)।

पौलुस समझाऊआ आजू एऊ मूल विषय बडै विस्तारा संघे। पूरी मनुष्या जाती, यहूदी और अन्य जाती आसा दूही परमेश्वरा संघे मेल-मलाप करनं जरूरत, किल्हैकि सोभ आसा एक बराबर पापे गुलाम। यीशू मसीह दी विश्वासा करै ई हआ परमेश्वरा संघे मेल-मलाप। तेखअ करा पौलुस मसीहा संघे नंऊई जिन्दगीओ वर्णण जुण परमेश्वरा संघे एऊ नंऊएँ रिश्तेओ परिणाम हआ। विश्वासीओ हआ परमेश्वरा संघे मेल-मलाप और परमेश्वरो आत्मा दैआ तेऊलै पाप और मौते गुलामी का आज्ञादी। अध्याय 5-8 दी करा पौलुस विश्वासीए जिन्दगी दी परमेश्वरे व्यवस्थो उदेश्य और परमेश्वरे आत्मं सामर्था परैदै वचारा। तेखअ जुझिया प्रेरित एऊ सुआला दी कि पूरी मनुष्या जाती लै परमेश्वरे योजना यहूदी और अन्यजाती दी ठीक-ठाक किहय करै वेशा। सह पुजा एऊ नचोळा दी कि यहूदी लोगो यीशू नाई मनणअ बी आसा परमेश्वरे तेसा योजनो एक भाग जुण पूरी मनुष्या जाती यीशू मसीह दी परमेश्वरे दैया भितरी आळणा लै बणाई; और तेऊओ विश्वास आसा इहय बी कि यहूदी नि सदा चालै इहै रही कि तियां यीशू नाई मनं। आखरी दी लिखा पौलुस इहय कि मसीही जिन्दगी केही लागी जिऊणीं, खासकर दुजे संघे प्रेम-प्यारो सबध डाहंदी। सह लआ इन्नां चिजा परमेश्वरे सेऊआ, राज, और एकी दुजेए प्रति मसीहीए जिम्मैबारी और विवेके सुआले रूपै। सह करा चिठीए समाप्ती आपणें व्यक्तिगत संदेशा और परमेश्वरे स्तुति संघे।

रूप-रेखा

भूमिका और मूल विषय 1:1-17

माळूं लै उध्दार (मोक्ष) जरूरत 1:18-3:20

उध्दारा लै परमेश्वरो रसतअ 3:21-4:25

मसीह दी नंऊई जिन्दगी 5:1-8:39

परमेश्वरे योजना दी इस्त्राएल 9:1-11:36

मसीही चाल-चलण 12:1-15:13

नचोळ और व्यक्तिगत आदर-सत्कार 15:14-16:27

## आदर-सत्कार

1 पौलुसे तरफा का, जुण यीशू मसीहो दास आसा, और जुण प्रेरित हणा लै शादअ द आसा, और परमेश्वरे सुसमाचारा लै जुदअ आसा किय द, 2 जसरी तेऊ पैहलै ई का भविष्यदक्ते संघे पवित्र शास्त्रा दी, 3 आपणें शोहरू और म्हारै प्रभू यीशू मसीहे बारै कसम प्रतिज्ञा आसा ती की दी; जुण शरीरे भावा का दाऊदे खानदाना का पैदा हुअ, 4 पर सह हुअ पबित्र आत्मं भावा दी मुंएँ दै मांझै जिऊंदै हणेंए बजहा बणअ सामर्था संघे परमेश्वरो शोहरू। 5 और जसा दी विश्वास करी करै हाम्हां अनुग्रह और प्रेरिताई भेटी कि तेऊए नांऊएँ कारण सोभी जातीए लोग तेऊ मनं। 6 जेता मांझै तम्हें बी यीशू मसीहे हणां लै आसा शाद दै।

7 तिन्नां सोभी ऐ नांओँ, जुण रोमा देशा दी परमेश्वरै प्यारै आसा, और जुण शुध हणा लै आसा शाद दै; म्हारै पिता परमेश्वर और प्रभू यीशू मसीहे तरफा का लोळी तम्हां सोभी लै अनुग्रह और शान्ती भेटदी रही।

## धन्यवादे प्राथणां

8 पैहलै करा हूँ तम्हां सोभी लै यीशू मसीहा करै, आपणें परमेश्वरा लै धन्यवाद, किल्हैकि थारै विश्वासे चर्चा आसा लागी दी सारै दैशै हंदी। 9 परमेश्वर जसरी सेऊआ हूँ आपणीं आत्मा करै, तेऊए शोहरू सुसमाचारे वारै दी करा, सहैई आसा एसा गला लै मेरअ गुआह कि हूँ किहअ करै करा तम्हां धैळ याद। 10 और धैळ करा हूँ आपणीं प्राथणां दी अरज कि किहअ

करै तम्हां सेटा लै एछणां लै मेरी यात्रा लोळी परमेश्वरे इछा दी सफल हूई। 11 किल्हैकि मेरअ दिल आसा तम्हां संघे मिलणा लै तळफदअ लागअ द, कि हूँ तम्हां लै आत्मिक बरदान दैई सकूं ताकि तम्हें विश्वासा दी मजबूत होए। 12 मतलब इहय कि जेभै हूँ तम्हां बिचे हूई करै तेऊ विश्वासा करै शांती पाऊं जुण मुखा और तम्हां का आसा। 13 हे भाईयो, हूँ नी चाहंदअ की तम्हें, एसा गला का नजाण रहे कि मंएँ चाहअ कई बारी तम्हां सेटा लै एछणअ कि जिहअ मूँह होरी जाती का फल भेटअ; तिहअ मूँह तम्हां दी बी भेटे, पर मैची तैणीं आसा रोकअ द। 14 हूँ आसा यूनानियों और दुजी भाषा आळैओ, बुधिमानों और निरबुधिओ रीणीं। 15 ता हूँ आसा तम्हां लै बी जुण रोम देशे रहा, सुसमाचारा शणांऊंगां लै एकदम तैर।

## सुसमाचारे सामर्थ

16 किल्हैकि हूँ नि सुसमाचारा का शरमदअ, इहय करै कि सह आसा हरेकी विश्वासा करनं आळै लै, पैहलै यहूदी लै तेखअ यूनानीं लै मोक्ष पाणां लै परमेश्वरे सामर्थ। 17 किल्हैकि तेथ हआ परमेश्वरे धार्मिकता विश्वासा करै और विश्वासा लै प्रगट; जिहअ लिखअ द बी आसा कि विश्वासा करै रहणअ धर्मी मांळूं जिऊंदअ।”

## मांळूं जातीओ पाप

18 परमेश्वरो क्रोध ता हआ तिन्नां सोभी लोगै अभक्ति और अधर्मा लै स्वर्गा का प्रकट, जुण सच्चाई अधर्मा करै डाहा दाबी। 19 तैहीता परमेश्वरे बारै आसा



ज्ञान तिन्नें मनैं प्रगट, किल्हैकि परमेश्वरै आसा तिन्नां दी प्रगट किय द। 20 तेऊए गुण जुण धेछदै निं आथी, मतलब तेऊए सनातन शक्तियां और परमेश्वरत्व, और एसा धरती बणाणें बगती ओही भेटा तेऊए कामां दी भाळणां लै, इधी तैणीं कि तियां निं उत्तर दैई सकदै। 21 इहय करै परमेश्वरो थोघ हई करै बी निं तिन्नें परमेश्वरा जोगी बडाई और धन्याबाद किय पर तियां लागा व्यर्थ बचार करदै; इधी तैणीं कि तिनों निर्बुधी मन हुअ न्हैरअ। 22 तियां ग्ए आप्पू लै बडै अकलमंद समझी करै मुख बर्णी, 23 और तिन्नें बदळी अविनाशी परमेश्वरे महिमां, नाशवान आदमी, चेलू पखीरु, और चऊ जांघा हाण्डणै आळै, और रींगणै आळै जीबे मुर्ती बराबर।

24 तैहीता तियां परमेश्वरै बी तिन्नें मनैं चाहना करनें साबै दैनें अशुधता लै छाडी, ताकि तियां आप्पू मांझे आपणीं देहीओ निरादर करे। 25 किल्हैकि तिन्नें बणाई परमेश्वरे सच्चाई बदळी करै झूठी; और तिन्नें की परमेश्वरे बणाई दी चिजे पुजा गाजा और सेउआ ना कि तेऊए सेऊआ की जुण सृजणहार सोभी बणाणें आळअ आसा और जुण सदा धन्य आसा। आमीन॥

26 तैहीता परमेश्वरै तियां नीच कामनें बशै दैनें छाडी; इधी तैणीं कि तिन्नें बेटळी बी आपणअ बदळअ आपणअ बभार जुण तेऊ असली स्वभाबा का उल्टअ आसा। 27 तिहैई मरध बी आसा आपणीं बेटळी संघै आपणें असली स्वभाबा छाडी करै लागै दै कामांतुर हई करै जळदै। मरध मरधा संघै बेईजती आळअ काम करी करै भेटअ तिन्नां आपणें भ्रमों ठीक फल।

28 जांऊं तिन्नें परमेश्वर बछैळणअ नाई चाहअ, ता परमेश्वरै बी छाडै तियां तिन्नें नकाम्मै मनां संघै कि तियां रहे उल्टै कामां करदै लागी। 29 इहय करै तियां सोभी प्रकारे अधर्म, दुषटता, लोभ, बैरभाव करै भरुए और डाह, हत्या, झगळै, छल, इर्ष्या करै हुए भरपूर और चुगलखोर। 30 बदनाम करनेंआळै, परमेश्वरे नजरा दी घृणित और होरीए बेईजती करनेंआळै घमंडी, डींगमार, बुरी-बुरी गल्ला बणाणें आळै आपणें आम्यां-बाप्पूए गल्ला नाई शुळणें आळै। 31 निर्बुधी, विश्वासघाती, शूरी-शराबी और नर्दई। 32 तियां ता परमेश्वरे एही बिधी जाणां कि ईहै कामां करनें आळै आसा मौते सजा जोगी, तैबी बी तियां न सिधअ आप्पू इहय काम करा पर होरी करनें आळै करै बी ह्आ तियां खुश।

### परमेश्वरो न्याय

2 हे दोषा लागें आळैआ, तूह चापे कोहै बी किल्है ना होए, तूह आसा निरुतर; जसा गल्ला दी तूह होरी लै दोष ला, तेसाई गल्ला दी हणअ तूबी दोषी, और जसा दोषा तूह ला, तूह करा आप्पू बी तेऊई कामां। 2 हाम्हें जाणा कि ईहै कामां करनें आळै लै दैआ परमेश्वर ठीक-ठीक सजा दैणै आजा। 3 और हे माळ्हा, तूह जुण इन्नां ईहै कामां करनें आळै लै दोष ला, और आप्पू बी करा तिहैई काम, तूह इहय बी जाणा कि तूह कै परमेश्वरै सजा का बचणअ? 4 कै तूह तेऊए करुणा, और सहनशीलता, और धीरज रूपी धना तुछ समझा? तूह इहय निं समझदअ कि परमेश्वरै करुणा सखाऊआ ताखा मन फरेऊणअ? 5 पर तूह आपणें कठोर और सख्त मनैं बजहा, तेऊए क्रोधे धैळी लै, जसा धैळी परमेश्वरा सच्चअ न्याय करनअ, तैहा धैळी लै आसा क्रोधा आणदअ लागअ द। 6 तेऊ दैणअ सोभी लै तिन्नें कामां भाळी करै तिन्नांलै बदळअ; 7 और जुण (सुकर्म) शोभलै कामां दी टेकी रहे, और महिमां, आदर और अमर जिऊणें लोळ-तोपा करदअ होए, तिन्नां लै दैणअ तेऊ अमर जिऊण; 8 और जुण विवादा करणें आळअ होए, और सच्चाई नाई मन्दअ, और अधर्मा मना, तिन्नें ता हणअ होर बी सत्यनाश। 9 संकट और क्लेश एछणअ तिन्नां सोभी आदमीं लै, जुण बुरै काम करा, पैहळै यहूदी परदै, तेखअ यूनानी परदै; 10 पर महिमां, आदर और कल्याण हणअ सोभियो, जुण भलै काम करा, पैहलै यहूदी और तेखअ यूनानीओ। 11 किल्हैकि परमेश्वर निं कोहिओ पक्ष लंदअ।

12 जूणी बिण्ही व्यवस्था पाई पाप कीए, तियां हणें व्यवस्था बिण्हीं नष्ट; और जुणी व्यवस्था भेटी करै बी पाप कीए, तिन्नां लै भेटणीं व्यवस्थे ई साबै सजा; 13 किल्हैकि परमेश्वरा सेटा निं व्यवस्था शुळणें आळै धर्मी आथी, पर तियां हणें धर्मीं जुण परमेश्वरे व्यवस्था दी चले। 14 तेखअ होरी जातीए लोग; जसा का व्यवस्था नाई आथी, तियां चला आपणें स्वभाबाई का व्यवस्था दी।

तिन्नां सेटा व्यवस्था नाई हणें का बी आसा तियां आप्पू लै आप्पैई व्यवस्था। 15 तियां भाळा व्यवस्थे गल्ला आपणें दिला दी लिखी दी और तिन्नें विवेक बी दैआ ग्वाही और तिन्नें हैळअ-फिकर बी ला आप्पू बिचै दोश, कि ठहराऊआ तिन्नां निर्दोश। 16 जसा धैळी परमेश्वरा मेरै सुसमाचारे साबै प्रभू यीशू मसीह करै माळ्हुए गुप्त गल्लो न्याय करनअ।

### यहूदी और व्यवस्था

17 जै कुण यहूदी आसा और व्यवस्था दी भरोसअ डाहा, और परमेश्वरे बारै दी घमंड करा, 18 और तेऊए ईछा जाणां और व्यवस्थे शिक्षा पाई करै उत्तम-उत्तम गल्ला संघै झूरी डाहणीं जाणां; 19 और आप्पू दी भरोसअ डाहा कि हूँ आसा काणैओ अगुअ और न्हैरै दी पळै दै लोगा लै प्रेशअ 20 और बुधिमाना सखाऊणें आळअ और शोहरू-माटैओ उपदेशक, और ज्ञान और सच्चाईओ नमूनअ जुण व्यवस्था दी आसा, तियां आसा मुँह भेटी दी। 21 तै किजै तूह सिधअ होरी का सखाऊआ, आपणें आप्पू का निं सखाऊंदअ? तूह कै चोरी नाई करनेओ उपदेश दैआ? और आप्पू करा तूह चोरी? 22 तूह जुण इहय बोला कि भ्यबिचार निं करनअ, तूह आप्पूई करा भ्यबिचार? तूह जुण मुर्ती का घृणां करा, और आप्पूई लूटा तूह मांदरा बी? 23 तूह जुण व्यवस्थे बारै दी घमंड करा, तूह कै व्यवस्था नाई मनीं करै परमेश्वरो अनादर निं करदअ? 24 किल्हैकि थारी बजहा ह्आ होरी जाती बिचै बी परमेश्वरे निंदा, जिहअ लिखअ द बी आसा कि

25 “जै तूह व्यवस्था दी चले ता तै आसा तेऊ खतनें करनेओ बी फाईदअ, पर जै तूह व्यवस्था नाई मनें ता तै हुअ तेरअ खतनअ करनअ खतनें नाई करनें बराबर। 26 जै बिण्हीं खतनेंओ माळ्हु व्यवस्थे बिधी-बधाना मनें, ता सह कै बिणां खतनें दशा दी खतनें बराबरअ निं गिळणअ? 27 जुण माळ्हु जातीए कारण बिण्हीं खतनें रहअ; जै सह व्यवस्था पूरअ करे, तै कै ताह जसा लिखअ बी भेटअ और खतनअ बी किय और व्यवस्था नाई मंदअ, तूह दोशी निं ठहराऊणअ? 28 किल्हैकि यहूदी निं सह आथी जुण प्रगटअ आसा और नां सह खतनअ आथी जुण देही दी आसा। 29 पर यहूदी आसा सहेई जुण मना का आसा; और खतनअ आसा सहेई जुण दिला और आत्मां दी आसा, न कि लिखअ द। ईहै आदमीए प्रशंसा निं माळ्हुए तरफा का हंदी पर तेऊए प्रशंसा ह्आ परमेश्वरे तरफा का।

3 एक साबै यहूदी हणैए किजै बडाई, और खतनें करनेंओ कै फायदअ? 2 हर प्रकारे किजै ना किजै। पैहलै ता इहय कि परमेश्वरे बचन सबाळै तिन्नां का 3 जै किछ धोखे दैणें आळै नीखळे बी ता तै किजै हुअ? तिन्नें धोखे दैणें करै कै परमेश्वरे सच्चाई बेकार हणीं? 4 इहय निं कधि हणअ। पर परमेश्वर आसा सच्चअ, और हर आदमी हणअ झुठअ, जिहअ लिखअ द आसा, “ कि जेता करै तूह आपणी गल्ला दी धर्मी हणअ, और न्याय करनें बगती तूह जय पाए।” 5 जै म्हारअ अधर्म परमेश्वरै धार्मिकता ठहराऊआ, ता हाम्हां कै बोळणअ? इहय कि जहा परमेश्वरा रोश (क्रोध) ऐछा, सह आसा अन्यायी? (ऐहा गल्ला आसा हूँ आदमीए रीती दी लागअ द बोलदअ)। 6 पर इहय निं हई सकदअ, तेखअ परमेश्वरा एसा दुनिओ फैसलअ किहअ करै करनअ? 7 जै मेरै पापा और अधर्म बजहा, परमेश्वरै सच्चाई और महिमो पतअ लागा, ता मुँह पापी समझी करै किल्है ह्आ सजा? 8 और हाम्हां किल्है निं करनीं बुराई कि भलाई निखळे, जै हाम्हां परदै ऐऊई दोशा ला बी, और कई बोला इहय कि इनों आसा इहय ई बोळणअ पर ईहै दोशी ठहराऊणें आसा ठीक।

### कोहै निं धर्मी आथी

9 तै किजै हुअ? तै कै हाम्हें तिन्नां का बधिया आसा? कधि निं, किल्हैकि हाम्हें आसा मुकै दै यहूदी और यूनानी दुही लै इहय दोश लाई कि तियां सोभै आसा पापे बशा का। 10 जिहअ लिखअ द आसा कि “कोहै निं धर्मी आथी; एक बी निं”।

11 “कोहै निं समझदार आथी, कोहै निं परमेश्वरा लोळणें आळअ आथी।

12 सोभ आसा ग्ए दै भटकी, सोभै कै सोभै आसा ग्ए दै नकाम्मै बर्णी, कोहै निं आथी भलाई करनें आळअ, एक बी निं आथी।

13 तिनों गअळ आसा खुल्ही दी कब्रा; तिन्नैई किय आपणीं जिभा करै छळ, तिन्नै होठै आसा सांपो बिष।

14 तिन्नै खाखा आसा श्रापा और कळ्ळूई चिजा करै भरुई दी।

15 तिन्नै पैर आसा खूनां बहाऊणा लै फुर्तिलै।

16 तिन्नै बाता आसा बनाश और क्लेश।

17 तिन्नां का निं राम्बळी बातो थोघेई आथी।

18 तिन्नै आच्छी सहनै निं परमेश्वरे डअर आथी।”

19 हाम्हां का आसा थोघ कि बबस्था जुंण बी बोला सह बोला तिन्नां का जुंण व्यवस्थे अधीन आसा। एते तैणीं कि हरेक खाखा लोळी बंद हूई और संसार परमेश्वरे दंडा जोगी होए। 20 किल्हैकि व्यवस्थे कामां करै निं कोहै बी प्राणीं धर्मी हूई सकदअ, इहय करै कि व्यवस्था करै हआ सिधी पापे बछेण।

### विश्वासा करै धार्मिकता

21 पर एबे आसा हूई दी बिणा व्यवस्था करै परमेश्वरे धार्मिकता प्रगट, जेते ग्वाही भविष्यवक्ता और व्यवस्था दैआ। 22 अर्थात- परमेश्वरे सह धार्मिकता जुंण प्रभू यीशू मसीह दी विश्वास करी करै सोभी विश्वास करनै आळै लै आसा; किल्है कि किल्है भेद निं आथी। 23 किल्हैकि सोभी आसा पाप किय द और परमेश्वरे महिमा का आसा दूर। 24 पर तेऊए दैया दी तेऊ छुटकारै करै जुंण मसीह दी आसा, तेता करै आसा मुफ्त धर्मी बणाए दै। 25 सह बणांअ परमेश्वरै तेऊए लोहूए बजहा इहय प्राश्नित जुंण विश्वासा करनै करै काम करनअ शुरू करा। कि जुंण पाप पैहलै किये और जसरी परमेश्वरै आपणीं सैहनशीलता करै आनाकानी की; तेते बारै सह आपणीं धार्मिकता प्रगट करे। 26 इहय कि तेभी तेऊए धार्मिकता प्रगट होए कि जेता करै सह आप्णु धर्मी होए और जुंण यीशू दी विश्वास करे तेऊओ बी होए धर्मी बणांणै आळअ।

27 तै घमंड करनअ किधी रहअ? तेते निं जैगाई आथी; कसा व्यवस्थे बजहा? कै करमै व्यवस्था करै? नाई, पर विश्वासे व्यवस्थे बजहा। 28 इहय करै पुजै हाम्हां एऊ नचोळा दी कि माळ्ळु बणां व्यवस्थे कामां बौर विश्वासा करै धर्मी। 29 कै परमेश्वर सिधअ यहूदिओ आसा? कै होरी ज्ञातीओ निं आथी? हां, सह आसा होरी ज्ञातीओ बी। 30 किल्हैकि परमेश्वर आसा एकै, जुंण खतनै आळै विश्वासा करै और बिणहीं खतनै आळै बी बणांणै तेऊ विश्वासा करै धर्मी। 31 तै कै व्यवस्था हाम्हां विश्वासा करै व्यार्थ बोला? कधि निं; बल्कि व्यवस्था करा मजबूत पै।

### अब्राहमो उदाहरण

4 तै हाम्हां किजै बोळण म्हारै शरीरे बाबा अब्राहमा किजै भेटअ? 2 जै अब्राहम कामै बजहा धर्मी हंदअ, तै हणीं तेऊ लै घमंडा करनै जैगा पर परमेश्वरा नेळ निं हणअ त। 3 पवित्रशास्त्र कै बोला? “इहय कि अब्राहमै किय परमेश्वरा दी विश्वास, और सह गिळ्ळूई तेऊ लै धार्मिकता।” 4 कामां करनै आळै लै मजदूरी दैणी, तेता लै निं दान बोलदै, सह हआ तिन्नो हक। 5 पर जुंण काम नाई करदअ, और भक्तिहीने धर्मी ठहराऊणै आळै दी विश्वास करा, तेऊओ गिळ्ळुआ विश्वास तेऊ लै धार्मिकता। 6 जहा आदमी परमेश्वर बिणहीं कामै ई धर्मी ठहराऊआ, तेऊ लै बोला दाऊद भी धन्य;

7 “धन्य आसा तियां जसरे अधर्म काम माफ हुऐ, और जसरे पाप दाबै।

8 धन्य आसा सह आदमी जहा परमेश्वर पापी निं ठहराऊदअ आथी।”

9 तै अह धन्य बोळणअ कै सिधअ खतनै आळै लै आसा? या बिणही खतनै आळै लै बी आसा? हाम्हां माळा इहय कि अब्राहमा लै गिळ्ळुअ तेऊओ विश्वास ई धार्मिकता। 10 तै सह किल्है गिळ्ळुअ धार्मिकता? खतने दशा दी या बिणही खतने दशा दी? अह निं खतने दशा दी गिळ्ळुअ पर अह गिळ्ळुअ बिणही खतने दशा दी। 11 तेऊ खतनेओ चिन्ह बी भेटअ कि तेसा विश्वासे धार्मिकता दी छाप लागे जुंण तेऊ बिणहीं खतने दशा दी थिय डाहअ द, जेता करै सह तिन्नां सोभीओ बाब बी होए जुंण बिना खतने दशा दी विश्वास करा, ताकि तियां बी धर्मी होए। 12 और सह तिन्नां खतनै आळैओ बाब बी होए जुंण ना सिधै खतनै किये दै आसा; पर म्हारै तेऊ पिता अब्राहमं तेऊ विश्वासे ग्ला दी बी ग्ला जुंण तेऊ बिणां खतने दशा दी आसा किय द।

### विश्वासा करै प्रतिज्ञा भेटणीं

13 किल्हैकि अह प्रतिज्ञा कि संसारो हणअ एक वारिस, ना अब्राहम लै, ना तेऊए खानदानी लै व्यवस्था करै भेटी, ती पर विश्वासे धार्मिकता करै भेटी।

14 किल्हैकि जै व्यवस्था आळै वारिस आसा, ता तै हुअ विश्वास व्यर्थ और प्रतिज्ञा हुई निश्फल। 15 व्यवस्था पजेरा क्रोध और जिधी व्यवस्था निं आथी, तिधी निं तेतो बरोघ बी आथी।

16 ऐऊई कारणे भेटा सह विश्वासा करै कि अनुग्रहे रीती दी होए कि प्रतिज्ञा सोभी वंशा लै मजबूत होए ना कि सिधअ तेऊलै जुंण व्यवस्था आळअ आसा, बल्कि तिन्नां लै बी जुंण अबरामां जिहै विश्वासा डाहणै आळै आसा, सहैई ता हाम्हां सोभीओ बाब आसा। 17 (जिहअ लिखअ द आसा कि “मंए बणांअ तूह खासी ज्ञातीओ बाब”) तेऊ परमेश्वरा सहनै जहा दी तेऊ विश्वास किय; ‘जुंण मूंए दै जिऊंदै करा, जुंण ग्ला आथी ई निं तिन्नै लआ सह इहय नांअ कि जाळणअ तियां आसा’। 18 तेऊ किय निराशा दी बी आशा डाही करै विश्वास, एते तैणीं कि तेऊ बचने साबै कि तेरअ वंश हणअ इहय कि सह खासी ज्ञातीओ बाब होए। 19 और सह जुंण एकी शौआ सालो थिय, आपणै मूंए दै जिहै शरीरा और आपणीं बेटळी सारे गर्भे मूंई दी जेही दशा ज्ञाणींकरै बी निं सह विश्वासा दी कमजोर हुअ। 20 नां तेऊ अविनाशी हूई करै परमेश्वरे प्रतिज्ञा दी शक किय, पर तेऊ की विश्वासा दी मजबूत रही करै परमेश्वरे महिमा। 21 तेऊ समझअ ठीक इहय कि जेसा गले तेऊ परमेश्वरै प्रतिज्ञा आसा की दी; सह आसा तेसा पूरी करना लै बी सामर्थी। 22 ऐऊई कारणे गिळ्ळूई अह तेऊ लै धार्मिकता। 23 और अह बचन कि विश्वास गिळ्ळुअ तेऊ लै धार्मिकता, अह निं सिधअ तेऊ लै आथी लिखअ द, 24 बल्कि अह आसा हाम्हां लै बी जसा विश्वास धार्मिकता गिळ्ळणअ। अर्थात हाम्हां लै जुंण तेऊ दी विश्वास डाहा; जुंणीं म्हारअ प्रभू यीशू मसीह मरी करै जिऊंदअ किय। 25 सह ढाकअ म्हारै अपराधा लै, और म्हारै धर्मी हणां लै जिऊंदअ बी किय।

### परमेश्वरा संघे मेल

5 जै हाम्हां विश्वासा संघे धर्मी आसा हुऐ दै, ता हाम्हां लागा आपणै प्रभू यीशू मसीह करै परमेश्वरा संघे मेल डाहणअ, 2 तेऊए ही बजहा आसा हाम्हां अह विश्वास और अनुग्रह, भेटअ द, और म्हारी भी हुई परमेश्वरा संघे पहुँच, और परमेश्वरै महिमै आशा दी बी करा घमण्ड। 3 सिधअ इहय ई निं, हाम्हां लागा बुरै बगता दी बी परमेश्वरे महिमो घमण्ड करनअ, इहय ज्ञाणी करै कि बुरै बगता संघे धीरज, 4 और धीरजा संघे बुरै बगता का खरै उतरनै करै हआ आशा पैदा, 5 और आशा संघे निं शरम हदी, किल्हैकि जुंण पवित्रआत्मां हाम्हां लै आसा दैनअ द, तेता संघे आसा परमेश्वरै हाम्हां लै म्हारै मना दी आपणअ प्रेम (प्यार) बी पाअ द।

6 जेभै हाम्हां (निर्बल) कमजोर थीयै, ता ठीक तेऊई बगतै मूंअ यीशू मसीह हाम्हां पापी लै। 7 कोई धर्मी आदमी लै ता मरा हेरु, केतरी कठण गल आसा, पर हई सका कि कोई आदमी भले आदमी लै जान दैणै कोशिश करे बी, 8 पर परमेश्वर करा हाम्हां संघे ऐतरअ प्यार कि जेभै हाम्हां पापी थियै ता यीशू मसीह बहाऊअ हाम्हां लै आपणअ पवित्र खून, और आपणी जान दैनी। 9 और एऊ साबै जै हाम्हां तेऊए खूना करै धर्मी हुऐ, ता तेखअ हाम्हां यीशू मसीहे बजहा किल्है निं परमेश्वरै क्रोधा का बचणै? 10 किल्हैकि जै हाम्हां पापी लै परमेश्वरे शोहरु आपणी जान दैनी, तैही हुअ म्हारअ परमेश्वरा संघे मेल, और तेऊ संघे मेल और तेऊए जीऊणणै बजहा भेटणअ हाम्हां मोक्ष। 11 एतरअ ई निं पर एबै करा हाम्हां आपणै प्रभू यीशू मसीहा करै जसरी बजहा म्हारअ मेल परमेश्वरा संघे हुअ, हाम्हां हआ परमेश्वरा दी आनंदित।

### आदमा करै मौत-मसीह करै जिन्दगी

12 पवित्र शास्त्रा दी आसा लिखअ द कि, जिहअ एकी आदमीए बजहा एसा दुनियां दी पाप आअ, और पापे बजहा आई मौत, और ईहैई करै फैली मौत सारै आदमी लै, किल्हैकि सोभी किय पाप। 13 व्यवस्था दैणै तैणीं, पाप दुनियां दी ता थिय, पर जिधी व्यवस्था निं हंदी ती, तिधी किय पाप, ता सह निं पाप गिळ्ळुअ त। 14 आदमां ओही मूसा तैणीं किय मौतै तिन्नां लोगा परदै

बी राज, तिन्नें सह आदम बी जुंण तेऊ ऐछणे आळैओ बी आसा त चिन्ह, तेऊ आदमा जिहअ पाप नि किय।

15 पर जेही अपराधे दशा आसा, तेही नि अनुग्रहे बरदाने आथी, किल्हैकि जै एकी माळूँ अपराधा करै बडै भारी लोग मुँरै, ता तै परमेश्वरे दैया जुंण दान एकी माळूँ अर्थात- यीशू मसीहे दैया करै हूँ बडै भारी लोगा दी, जरूर हूँ सह अधिकारि करै। 16 जिहअ ऐकी आदमीए पापा करनेओ नतीजअ हुअ, तिहअ ई नि दाने दशा हूँ, किल्हैकि ऐकीए बजहा हुअ सजा दैणैओ फँसलअ, पर खास्सै अपराधे बजहा ई हुअ इहय बरदान प्रकट, ताकि लोग धर्मी होए। 17 जेभै ऐकी आदमीए अपराधे बजहा मौतै सोभी लोगा परदै राज किय, ता तियां लोग जुंणी धर्मरूपी, बरदान अनुग्रह बडअ भारी पाअ, ता तिन्नां ऐकी आदमी मतलब (अर्थात) यीशू मसीहा संघे अनन्त जिऊणों राज बी करनअ।

18 जिहअ एक अपराध सोभी आदमी लै सजा भोगणैओ कारण हुअ, तिहअ ई एक धर्मो काम बी हुअ सोभी आदमी लै जिबना दैणां लै धर्मी हणैओ कारण। 19 जेही ऐकी आदमी आज्ञा नाई मनी, और तेऊए बजहा हूँ सारै लोग पापी, तिहैई ऐकी आदमीए ई आज्ञा मनणै आळै हणै धर्मी। 20 व्यवस्था आई बिचै कि अपराध हआ बडैभारी, पर जिधी पाप खासअ हुअ, तिधी हुअ अनुग्रह तैता का भी जादअ 21 जिहअ पापै मौत फलाऊई, और आपणअ राज चलाऊअ, तिहअई हणअ म्हारै प्रभू यीशू मसीहो अनुग्रह कि अनंत जिऊणा लै धर्मी बणी करै करे राज।

### पापा लै मूँअ द: मसीहा लै जिऊंदअ

6 तै हाम्हां किजै बोळणअ? कै हाम्हां पाप करदै रहणअ लागी? कि तै अनुग्रह खासअ होए? 2 इहय नि कधि करनअ, जै हाम्हां पापा लै मरी ग्ए, ता आजू किल्है बताऊणी हाम्हां तेथ दी जिदगी? 3 कै तम्हें नी जाणदै कि हाम्हें जुंणी यीशू मसीहे नांओरें बपतिस्मअ आसा लअ द, सह आसा तेऊए मौतो बपतिस्मअ लअ द। 4 ता हाम्हें बी तेऊ संघे मौतो बपतिस्मअ लई करै दाबै (गाडे गए), जिहअ यीशू मसीह परमेश्वरै महीमा संघे मरी करै जिऊंदअ हुअ, तिहअई हणअ हाम्हां लै बी।

5 जै हाम्हें भी यीशूए मौते समानता दी आसा तेऊ संघे आसा, ता जरूर हणै हाम्हें बी तेऊए जीऊई ऊङ्गणें बाद तेऊ संघे। 6 किल्हैकि हाम्हां का आसा थोघ कि म्हारअ पराणअ स्वभाव चढ़ाऊअ तेऊ संघे कूसा दी ताकि अह पापो शरीर ढेका लै शोटणां होए, ताकि हाम्हें आजू लै पापे ग्लाम नां रहे बणी। 7 किल्हैकि जुंण मरी ग्अ, सह हूँ पापा का छुटी करै धर्मी। 8 और जै हाम्हें मसीहा संघे मुँरै, ता म्हारअ बिश्वास आसा इहय कि हाम्हें मसीहा संघे जिऊणै बी। 9 किल्हैकि हाम्हां का आसा थोघ कि मसीह नि मरी करै जिऊंदअ हई करै भी मरनअ, तेऊ परदै नि भी मौतो राज हणअ।

10 किल्हैकि सह जुंण मरी ग्अ सह मुँअ पापा लै एकी ई बारी, पर जुंण जिऊंदअ आसा, सह आसा परमेश्वरा लै जिऊंदअ। 11 इहय ई तम्हें भी आपू समझा पापा लै मुँरै दै, पर परमेश्वरा लै समझा मसीह यीशू दी जिऊंदै।

12 ताकि पाप थारै मरनहार शरीरा दी राज ना करे कि तम्हें तेऊ लालसे अधीन होए। 13 और नां आपणै आंगा अधरमें हथियार हणा लै पापा लै सभाळा, पर आपणै आपू मुँरै दै मांझा का जिऊंदै समझी करै सभाळा परमेश्वरा लै और आपणै आंगा सभाळा धर्म हथियार बणाई करै परमेश्वरा का। 14 तै नि तम्हां परदै पापो राज हणअ, किल्हैकि तम्हें नि व्यवस्थे अधीन आथी पर तम्हें आसा अनुग्रहे अधीन।

### धार्मिकते दास

15 तै किजै हुअ? कै हाम्हें एते तैणीं करनअ पाप कि हाम्हें नि व्यवस्थे अधीन आथी पर हाम्हें आसा अनुग्रहे अधीन? इहय नि कधि करनअ। 16 कै तम्हां का थोघे नि आथी कि जसरी आज्ञा मनणा लै तम्हें आपणै आपू ग्लामा जिहै सभाळा, तम्हें आसा तेऊए ई दास, चापे पापे; जेतो अंत मौत आसा, चापे आज्ञा मनणें; जेतो अंत धार्मिकता आसा। 17 पर परमेश्वरो आसा धन्यबाद कि तम्हें जुंण पापे ग्लाम थियै, तैबी बी हुए मना का तेऊ उपदेशा मनणै आळै जेतै सात्रै दी तम्हें ढाळै तै; 18 और पापा का छड़ैऊई करै हूँ

धर्म दास। 19 हूँ बोला थारी शरीरे कमजोरीए कारण माळूँए रीती दी कि जिहै तम्हें आपणै अंग कुकर्मा लै अशुधता लै कुकर्म दास बणाई करै सभाळै तै, तिहैई ऐबै सभाळा इन्नां आपणै आंगा पबित्रता लै धर्म दास बणाई करै।

20 जेभै तम्हें पापे ग्लाम थियै, तेभै तै तम्हें धर्म तरफा का आज्ञाद। 21 ऐबै जिना ग्लाम करै तम्हें शरमिंदै हआ, एता करै तधू तम्हां किजै फल भेटा तऽ? 22 किल्हैकि इनां अंत ता मौत आसा, पर ऐबै पापा का आज्ञाद हई करै और परमेश्वरे दास बणी करै भेटअ तम्हां फल जेता करै पबित्रता भेटा और एतो अंत आसा अनंत जिऊण। 23 किल्हैकि पापे मजदूरी आसा मौत, पर परमेश्वरो बरदान आसा म्हारै प्रभू यीशू मसीह दी अनंतजिऊण।

### शादीशुधा जिन्दगीओ दृष्टांत

7 हे भाईयो कै तम्हें नी जाणदै कि, हूँ इन्नां व्यवस्था जाळणै आळै लै बोला, कि जेभै तैणीं आदमी जीऊंदअ रहा, तेभै तैणीं करा व्यवस्था तेऊ परदै राज? 2 किल्हैकि जहा बेटळीए शादी हआ हुई दी, सह हआ व्यवस्थे साबै आपणै लाळैए (पति) जीऊंदी जानी तेऊ संघे बंधी दी, पर जै तेसरअ लाळअ मरी ग्अ, ता सह हआ आपणै लाळैए व्यवस्था का आज्ञाद। 3 तैहीता, सह जै आपणै लाळैए जीऊंदी जानी कसा होरी मर्धा संघे बैह करा, ता सह बेटळी करा भ्यभिचार, पर जै तेसरअ लाळअ मरी ग्अ ता सह हआ तेऊए व्यवस्था का आज्ञाद, और जै सह कसा होरी मर्धा संघे भी शादी करे ता सह नि भ्यभिचारणी हणी। 4 तिहअई, हे मेरे भाईयो, तम्हें बी आसा मसीहे शरीरा संघे व्यवस्था लै मुँरै दै, कि तेऊ दुजेए होए जुंण मुँरै दै मांझै जीऊंदअ हुअ। ताकि हाम्हें परमेश्वरा लै फल आणै। 5 किल्हैकि जेभै हाम्हें ऐऊ शरीरे गुलाम आसा तै, ता पापे बडी भारी अभिलाशा, जुंण ऐसा व्यवस्था संघे थियै, सह करा ती म्हारै ऐऊ शरीरा दी मौत पैदा करना लै म्हारै आंगा-आंगा दी काम। 6 पर जसरी बंधना दी हाम्हें आसा तै, तेऊ लै हुए हाम्हें मरी करै हाम्हें ईहै आज्ञाद कि लिखी दी पराणी रिती परदै नि, बल्कि आत्म नऊई रीती परदै करा सेऊआ।

### व्यवस्था और पाप

7 ता हाम्हें किजै बोलमै? कि व्यवस्था पाप आसा? इहय नि आथी, व्यवस्था बिणहीं मूँह पापे बछैण किहअ करै हणी ती, जै व्यवस्था नाई बोलदी कि लाळच नि करनअ, तै नि मुखा लाळचे बारे थोघ हणअ त। 8 पर पापे किय मोकअ भाळी करै आज्ञा संघे मूँह दी सोभी प्रकारओ लाळच पैदा, किल्हैकि व्यवस्था बिणहीं आसा पाप मुल्दअ। 9 हूँ ता पैहलै व्यवस्था बिणहीं जिऊंदअ थिय, पर जांऊं आज्ञा आई, ता पाप हुअ जिऊंदअ, और हूँ मूँअ। 10 और सहैई आज्ञा जुंण मुल्है जिऊणा लै थी, सह हुई मुल्है मौते कारण। 11 किल्हैकि पापे बहकाऊअ हूँ मोकअ भाळी करै आज्ञा का और तेताई करै हूँ मारी बी पाअ।

12 तैहीता व्यवस्था आसा पबित्र और आज्ञा बी आसा बधिया और ठीक। 13 तै किजै जुंण सह बधिया थी, मुल्है मौत बणी? कधि नि! पर पाप हुअ तेसा बधिया चिजा करै मुल्है मौत पैदा करनै आळअ कि तेतो पाप हणअ प्रगट होए और आज्ञा करै पाप खास्सअ पापमय होए।

### माळूँओ आन्तर्द्वन्द्व

14 किल्हैकि हाम्हें जाणां कि व्यवस्था आसा आत्मिक, पर हूँ आसा शारीरिक और पापे हाथे बिकअ द। 15 और जुंण हूँ करा तेता नि जाणदअ किल्हैकि जुंण हूँ चाहा तेता नि करदअ, पर जेतो का मूँह चिहळ लागा हूँ करा तेऊई कामा। 16 तै जै हूँ तेताई करा जुंण हूँ नाई चाहंदअ, तै मना हूँ कि व्यवस्था आसा भली। 17 तै एही दशा दी नि तेता करनै आळअ हूँ आथी पर तेता करनै आळअ आसा पाप जुंण मूँह दी बसअ द आसा। 18 किल्हैकि हूँ जाणां कि मूँह दी अर्थात मेरै शरीरा दी नि कोई बी राम्बळी चीज बास करदी, मूँह दी ईछा ता आसा पर भलै काम नि मेरै भलै हंदै। 19 किल्हैकि जसा भलै कामे हूँ इछा करा तेऊ ता नि करदअ पर जसा बुराईए इछा हूँ नाई करदअ तेता करा हूँ। 20 पर जै हूँ तेताई करा जेतै हूँ इछा नाई करदअ, ता तै नि तेता

करनें आळअ हूँ रहअ पर तेता करनें आळअ आसा पाप जुंण मूह दी आसा बसअ द।

21 तै भेटा मूह अह व्यवस्था कि जाऊं हूँ भलाई करनें ईछा करा तेभै एछा बुराई मूह सेटा, 22 किल्हैकि भितरे मुनष्यत्वा का ता रहा हूँ परमेश्वरे व्यवस्था करै खुश, 23 पर आपणें आंगा का धेछिआ मुखा दुजै प्रकारे व्यवस्था जुंण मेरी बिधिए व्यवस्था का लड़ाई करा और सह पा मूह पापे व्यवस्थे बंधना दी जुंण मेरें आंगा दी आसा। 24 हूँ किहअ अभागअ माळू आसा! हूँ एसा मौते देही का कसा छडैऊणअ? 25 हूँ करा आपणें प्रभू यीशू मसीह करै परमेश्वरो धन्यवाद, कि हूँ आपणी बुधी का ता करा परमेश्वरे बबस्थो पर शरीरा का करा पापे बबस्थो सेबन।

### पवित्रात्मां करै जिन्दगी

8 ऐबै जुंण यीशू मसीह दी विश्वास करा, तिन्नां लै निं सजा हणी। तियां निं शरीरे साबै, बल्कि तियां हांडा आत्में साबै। 2 किल्हैकि जिऊणें आत्में व्यवस्था किय हूँ मसीह यीशू दी पापे और मौते व्यवस्था का आजाद। 3 किल्हैकि जुंण काम व्यवस्था शरीरे कमजोर हणें बजाह नाई करी सकी, सह काम किय परमेश्वरें, अर्थात आपणें ई शोहरू पापमय शरीरे समानता दी और पापे बळीदान हणा लै भेज्जी करै शरीरा दी पापा लै सजा देणें आज्ञा दैनी। 4 और तैहीता, जुंण सह व्यवस्थे बिधी हांम्हं दी, जुंण शरीरे अनुसार निं बल्कि आत्में साबै चला, ताकि सह पूरी हुई होए। 5 शरीरे ईछा दी चलणें आळअ आदमी लाआ शरीरे ही गल्ला दी मन, पर आत्मिक आदमी लाआ आत्मिक गल्ला दी मन। 6 शरीरा दी मन लाणअ ता आसा मौत, पर आत्मां दी मन लाणअ आसा अमर जिऊण और शान्ती। 7 किल्हैकि शरीरा दी मन लाणअ आसा परमेश्वरा संघे ज़ीद डाहणीं किल्हैकि नां ता सह परमेश्वरे व्यवस्थे अधीन आथी और नां हुई सकदअ। 8 और जुंण शरीरे ईछा दी चला, तियां निं परमेश्वरा खुश करी सकदै।

9 पर जै कि तम्हां दी परमेश्वरे पवित्र आत्मां वास करा, तै निं तम्हें शरीरे दशा दी आथी पर तम्हें आसा आत्मिक दशा दी। जै कसा दी मसीहो आत्मां नाई आथी, तै निं सह मसीहो जन आथी। 10 जै मसीह तम्हां दी आसा, तै आसा देह पापे कारण मूई दी; पर आत्मां आसा धर्म कारण जिऊंदी। 11 जै परमेश्वरे आत्मां, जुंणी यीशू मसीह मरी करै जिऊंदअ किय, जै तम्हां दी वी बसी दी होए, ता थारअ मरनहार शरीर बी करनअ परमेश्वरा आपणी आत्मां करै जिऊंदअ जुंण तम्हां दी बस्सी दी आसा।

12 तैहीता हे मेरें भाईयो, हांम्हें निं ऐऊ नशवर (खत्म हणें आलै शरीरे) कर्जदार आथी, कि हांम्हां लागा ऐऊई शरीरे अनुसार धैळी काटणी। 13 शुणां, जै तम्हें ऐऊ आपणें शरीरे साबै धैळी काटे, ता तम्हें मरनै, पर जै तम्हें आत्में साबै आपणी देहीए कामां-काजा मारी पाए, तै रहणें तम्हें जिऊंदै। 14 तैहीता जेतरे बी लोग परमेश्वरे आत्में चलाए चला, तियांई आसा परमेश्वरे शोहरू। 15 किल्हैकि तम्हां लै नी गुलामीए आत्मां आथी भेटी दी, कि तम्हें भी डरे, पर पवित्र आत्मां आसा भेटी दी, जसा करै हांम्हें, हे अब्बा, हे पिता बोली करै पुकारा। 16 पवित्र आत्मां दैआ आप्पैई म्हारी आत्मां संघे ग्वाही कि हांम्हें आसा परमेश्वरे लुआद; 17 और जै हांम्हें तेऊए लुआद आसा, ता तै हणें हांम्हें वारिस बी, जै हांम्हें तेऊ संघे दुःख (कष्ट) सैहे दै आसा, ता हांम्हां तेऊ संघे महिमा और शान्ती बी भेटणी।

### पिछू प्रगत हणेंआळी महिमा

18 हूँ ता समझा इहय कि, ऐऊ बगते ईयां दुःख और क्लेश निं तेसा महिमा सहनै जुंण हांम्हां लै प्रकट हणें आळी आसा, तेता सेटा किछ भी आथी। 19 किल्हैकि अह दुनियां आसा बडी आशा दी, परमेश्वरे शोहरू प्रगत हणें न्हैळी-भाळी ढागी दी। 20 किल्हैकि अह दुनियां निं आपणी ईछा करै आथी, बल्कि अधीन करनें आळैए तरफा का बेकारीए अधीन एसा आशा दी की दी। 21 कि दुनियां बी विनाश करनें आळैए गुलामी का आजाद होए, ताकि परमेश्वरें शोहरूए महिमें आजादी भेटे। 22 हांम्हें जाणा कि सारी दुनियां आसा ऐभै तैणीं दुःख दर्दा दी पळी दी और तळफदी लागी दी, 23 सिधअ इहयई निं, हांम्हें बी जसा का आत्मां पैहलअ फळ आसा, आप्पूई आसा तियां लागे दै

धकदक और गोद नाशणा लै अर्थात आपणी देहीए छुटकारे लै आशा दी बेठे दै। 24 एसा करै ता म्हारअ उध्दार हुअ; पर जहा चिजे आशा हा, और जाऊं सहनै शुझीआ, ता तेखअ तेते आशा किधी रही? मतलब जुंण चीज जसा भेटी गई, ता तेऊ तेतै कै आशा डाहणीं? 25 पर जहा चीजा हांम्हें नाई भाळदै, और जै तेतै हांम्हें आशा डाहा, ता तै रहा हांम्हें धीर धरी करै तेता न्हैळै-भाळै लागी।

26 ऐऊई तरिके परमेश्वरे आत्मां बी करा म्हारी कमजोरी (दुर्बलता) दी सहायता; किल्हैकि हांम्हें निं जाणदै कि प्रार्थना किहअ करै लागा करनीं, पर आत्मां करा आपणें आप हांम्हां लै एही हिक्की-सळीकी अरज जुंण म्हारें बोळनै का बागै आसा; 27 और मना परखणें आळअ परमेश्वर जाणा की म्हारें मना दी कै ईछा आसा? किल्हैकि सह करा पवित्र और भलै लोगा लै परमेश्वरे ईछा संघे हांम्हां लै अरज।

28 हांम्हें जाणा कि जुंण लोग परमेश्वरा संघे प्यार (प्रेम) करा, तिन्नां लै करा सोभ गल्ला भलाई पैदा; अर्थात तियां ही जुंण परमेश्वरें आपणी ईछा संघे शादें दै आसा। 29 जुंण तेऊ पैहलै का जाणें दै आसा, तियां आसा तेऊ पैहलैई का टाळै दै, कि तियां तेऊए पुत्रे रूपा दी होए, ताकि सह खास्सै भाई मांझें पैहलअ पुत्र होए। 30 तेखअ जुंण तेऊ तियां पैहलै का ही टाळै (छांटै) दै आसा, तियां आसा शादें दै बी, और जुंण शादें दै बी आसा, तियां आसा धर्मी बी ठहराऊरे दै, और जुंण धर्मी ठहराऊरे दै बी आसा तिन्नां लै आसा महिमा बी दैनी दी।

### परमेश्वरो प्रेम

31 ऐबै हांम्हां इन्नां गले बारे दी कै बोळणअ? जै परमेश्वर हांम्हां संघे आसा, ता तै कुंण सका म्हारअ बिरोधी हुई? 32 जुंणी आपणअ प्यारअ शोहरू बी निं डाहअ पर सह दैनअ हांम्हां सोभी लै, सह तेऊ संघे हांम्हां लै सोभै गल्ला किल्है निं दैई सकदअ? 33 परमेश्वरे चुनै दै लोगा लै कुंण सका दोश लाई? सह आसा परमेश्वर जुंणी तियां धर्मी आसा बणांरें दै। 34 तेखअ कुंण आसा जहा (दण्ड) सजा दैणए आज्ञा दैणी? एक यीशू मसीह ई आसा जुंण मरी करै जिऊंदअ हुअ, और परमेश्वरे दैहणीं बाखा बी आसा बेठअ द, और हांम्हां लै सह अरज बी करा। 35 कुंण सका हांम्हां परमेश्वरे प्रेम प्यारा का जुदें करी? कै क्लेश, या संकट, या उपद्रब, या नकाळ, या नंगाई, या खातरें, या तलवार? 36 जिहअ लिखअ द आसा, "कि तेरी तैणीं करा हांम्हां लोग सारी धैळी घात, हांम्हें आसा लोगे काटणेंए भेडा जिहै गिणें दै।" 37 पर इन्नां सोभी गल्ला दी आसा हांम्हें तेऊ करै जुंणी हांम्हां संघे प्रेम किय, जीतणें का बी खास्सै। 38 किल्हैकि हूँ जाणा कि, नां मौत, नां जीवन, नां स्वर्गदूत, नां प्रधानतां, नां वर्तमान, नां भविष्य, नां सामर्थ, नां ऊंचाई, 39 नां गहराई, और नां कोई होर दुनियां हांम्हां परमेश्वरें प्यारा का, जुंण म्हारें प्रभू यीशू मसीहा दी आसा, जुदें निं करी सकदै।

### परमेश्वर और तेऊए चूँनै दै लोग

9 हूँ बोला मसीह दी सच्चअ, हूँ नी झुठअ बोलदअ, और मेरअ बिबेक बी दैआ पवित्र आत्मां दी ग्वाही, 2 कि मूह आसा बडअ दुःख, और मेरअ मन रहा कबललअ दुखी, 3 किल्हैकि हूँ चाहा त इहय कि, मेरे सोभी भाई लै, जुंण शरीरा का मेरें परिवार आसा, आप्पू ही हणअ त मसीह दी शापित। 4 तियां आसा इस्राएली, लेपालकपन, और हक, और महिमा, वाचाएँ, व्यवस्था, उपासना, और प्रण आसा तिन्नेई। 5 पितर बी आसा तिन्नेई, और मसीह बी आसा शरीरे भावा का तिन्नां मांझें ई हुअ द। सोभी लै आसा परम प्रधान परमेश्वर जुगा-जुगा लै धन्य।आमीन।

6 पर इहय निं आथी कि परमेश्वरो बचन टळअ, तैहीता जुंण इस्राएलीए वंश आसा, तियां सारें नी इस्राएली आथी; 7 और ना तियां अब्राहमें वंश हणेंए बजहा सारें परमेश्वरें शोहरू हुए, (पर लिखअ द आसा कि) "इसहाकाई का हणअ तेरअ वंश।" 8 मतलब ऐऊ शरीरे लुआद (संतान) परमेश्वरें संतान निं, पर प्रतिज्ञे संतान गिह्किआ वंशा दी। 9 किल्हैकि प्रतिज्ञे वचन आसा अह कि, "हूँ ऐछणअ ऐऊ बगते साबै और सारो हणअ शोहरू।" 10 और सीधअ इहय ई निं, जेभै इसहाके लाळी रिबका पैरभारी ती, 11 और मैची तैणीं नां ता तिन्ने

शोहरू जलमें तै और नां तिन्नै किजै भलअ या बुरअ किय त कि तेऊ बोलअ इहय कि जेठअ हणअ कान्हेओ दास। 12 इहय करै परमेश्वर मनसा आसा तेऊए छोटणें साबै कर्म साबै निं आथी, पर शादणें आळै दी लोळी बणी रही। 13 जिहअ लिखअ द आसा, “कि मरें किय याकूबा संघे प्रेम और एसाव समझअ कपैरअ।”

14 ता हान्हें कै बोळणअ? इहय कि, परमेश्वर आसा बुरै करनै आळअ? कधि निं, 15 परमेश्वरै मुसा लै बोलअ, “हूँ जहा लै बी दैया करनीं चाहूँ, तेऊ लै करनीं मूँह दैया, और जहा लै मूँह क्रिया करनीं चाहूँ, तेऊ लै करनीं मूँ क्रिया।” 16 अह ना ता चाहणें आळैए, और ना तुहरनै आळैए, पर अह आसा तेऊ दया करनै आळैए परमेश्वर गल। 17 किल्हैकि पवित्रशास्त्रा दी आसा फिरोना लै बोलअ द कि, “मरें आसा तूह ऐतै तैणीं खळअ कीय द कि, ताह दी हुंह आपणीं सामर्थ रहैऊ, और मेरै नाओ प्रचार सारी पृथूई दी होए। 18 तैहीता परमेश्वर जहा चाहा तेऊई दी करा दैया, और जहा कठोर करनअ चहा तेऊ करा कठोर।

### परमेश्वरो क्रोध और तेऊए दैया

19 और ताह बोळणअ मुखा, “सह तेखअ दोष किल्है ला? कुंण सका तेऊए इच्छो सहनअ करी?” 20 परमेश्वरै बोलअ, शुण मांहुंआ, तूह कुंण आसा और किजै चीज आसा, जुंण परमेश्वरा संघे फीरा बराबरी करदअ? “कै मुरती आप्पै तेऊ मुरती बणाणें आळै संघे गल्ला करी सका?” 21 खमारा कै माटै दी हक निं आथी कि सह एकी लोदे का एक भाण्डअ पाणीं डाहणां लै, और एक भाण्डअ सका शणैओआं डाहणां लै बणाई? 22 ता तेखअ कै आसा रहैनिंए गल आसा कि, परमेश्वरै आपणें क्रोधा रहैऊणा लै और आपणीं सामर्थ प्रगट करनै ईछा करै क्रोधे भांडै जुंण बिनाशा लै तैर कियै तै, बड़े धीर धरी करै सैही। 23 और दैया करनै भाण्डे दी, जुंण तेऊ महिंमा लै पैहलैई का बणाएँ दै आसा तै, तेथ आपणीं महिंमां धन प्रकट करनै इछा की? 24 अर्थात् परमेश्वरै निं सीधै ईयांई आथी शादें दै, तेऊ आसा होर लोग बी शादें दै। 25 जिहअ तेऊ होशे कताबा दी बी आसा बोलअ द कि, “जुंण मेरी परजा निं आथी ती, तिन्नां लै बोळणअ मूँह आपणीं परजा जसा संघे मूँह झूरी नाई ती आथी तिन्नां संघे करनीं मूँह झूरी। 26 और इहय हणअ कि जहा जैगा दी तिन्नां लै इहय बोलअ त कि, तन्हें निं मेरै लोग आथी, तेसाई जैगा दी हणै तियां लोग परमेश्वरै लुआद।”

27 और यशायाह बी आसा इस्त्राएले बारै दी बोलअ द, “इस्त्राएले शोहरू चाए समुदरे रते कणा बराबर किल्है निं होए, तै बी बचणें तिन्नां मांझै थोळैई। 28 किल्हैकि प्रभू करनीं पृथूई दी आपणअ बचन पूरअ करी करै धार्मिकता छेकै सिध। 29 जिहअ याशायाह पैहलै बी बोलअ त कि जै सैनाओ परमेश्वर हाम्हां लै किछ वंश नाई छाडदअ, तै हणें तै हणें तै हाम्हें सदोमा और अमोरा जिहै। 30 तै हाम्हें किजै बोलमै? इहय कि होरी जातीए निं धार्मिकते लोळ-तोप करदें तै, तिन्नां भेटी धार्मिकता’ अर्थात् सह धार्मिकता जुंण विश्वासा करै आसा। 31 पर इस्त्राएली जुंण धर्म व्यवस्थे लोळ-तोप करा तै तियां निं तेसा व्यवस्था तैणीं पुजै। 32 किजू लै? एते तैणीं कि विश्वासा करै निं आथी, पर जाळणअ तियां करा तै कर्मा करै तेते लोळ-तोप और तिन्नां लागीं तेऊ ठोहळा लागणें पाथरा करै ठोहळ। 33 जिहअ लिखअ द बी आसा कि भाळा, सिय्योनें लाअ मरें एक ठेसै लगणेंओ आळअ पाथर और ठोहळा लागनैं जान डाही; जुंण तेता दी विश्वासा करै सह निं शरमिंदअ हणअ।

10 हे भाईयो, मेरै दिला मने ईछा और परमेश्वरा का आसा तिन्नां लै मेरी एही अरज कि तिन्नां लोळी मोक्ष भेटअ। 2 किल्हैकि हूँ दैआ तिन्नै ग्वाही कि तियां रहा परमेश्वर धुना दी, पर बुधिमानिं संघे निं डाहंदै। 3 किल्हैकि तियां परमेश्वर धार्मिकता का नजाण हई करै आपणीं धार्मिकता सथापना कोशिश दी निं तियां परमेश्वर धार्मिकता दी अधीन हुऐ। 4 किल्हैकि हरेक विश्वासा करनै आळै लै आसा धार्मिकते साबै मसीहे बबस्थो अंत।

### मोक्ष (उध्दार) आसा सोभी लै

5 किल्हैकि मूसा नबी आसा इहय लिखअ द कि जुंण मांहुं तेसा धार्मिकता दी चला जुंण व्यवस्था दी आसा, सह रहणअ ततेई तैणीं जिऊदअ। 6 पर

जुंण धार्मिकता विश्वासा करै आसा, सह बोला इहय कि “तूह आपणें मने इहय निं बोली कि स्वर्गें कुंण उखळणअ? (अर्थात् मसीहा थुआळणा लै!) 7 या उंधै दुधे दी कसा होथणअ? (अर्थात् मसीहा मरी करै जिऊदें करी करै उझै आळणां लै!) 8 पर व्यवस्था किजै बोला? इहय कि बचन आसा ताह सेटा, सह आसा तेरै मूँहें और तेरै मनें। अह आसा सहैई विश्वासो बचन, जुंण हान्हें प्रचार करा। 9 कि जै तूह आपणीं खाखा का यीशू प्रभू मनीं करै अंगीकार करे और आपणें मनें विश्वास करे कि परमेश्वरै किय सह मरी करै जिऊदअ, तै भेटणअ ताह पाकै दी मोक्ष। 10 किल्हैकि धार्मिकता लै लागा मना का विश्वास करनअ और मोक्षा पाणां लै लागा मूँहा का अंगीकार करनअ। 11 किल्हैकि पबित्र शास्त्र बोला इहय कि “जुंण बी तेऊदी विश्वास करे सह निं शरमिंदअ हणअ।” 12 यहूदी और यूनानी दी निं किछै भेद आथी, इहय करै कि सह आसा सोभीओ प्रभू और आपणें सोभी नाऊंआं लणें आळै लै आसा सह उदार। 13 किल्हैकि जुंण बी प्रभूओ नांअ लए तेऊ भेटणअ उद्धार(मोक्ष)।

14 तेखअ जेथ दी तिन्नै विश्वास नाई किय, तेऊओ नांअ किल्है लाअ तिन्नै लई? और जसरी नाई शुणीं, तेऊदी किल्है लाअ विश्वास करी? 15 और प्रचार करनै आळै बगैर किल्है शुळणअ? और जै कुंण भेजे निं तै किल्है करनअ प्रचार? जिहअ लिखअ द आसा कि तिन्नै पैर किहै सुआबनै आसा जुंण शोभली गल्लो सुसमचार शणांऊआ। 16 पर सोभी निं सुसमाचारा दी कान लाअ; याशायाह बोला इहय कि हे प्रभू कुंणीं किय म्हारै समचारो भरोसअ? 17 ता विश्वास हआ शुणीं करै और शुळणअ लागा मसीहे बचना का।

18 पर हूँ बोला कि तिन्नै कै शुणअ निं आथी? तिन्नै शुणअ ता ठीक जिहअ लिखअ द बी आसा कि “तिन्नै स्वर सारी पृथूई दी और तिन्नै वचन पुजै संसारे कुंण तैणीं। 19 तेखअ बोला हूँ इहय कि इस्त्राएली कै जाणदें निं तै? पैहलै ता मूसा बोला इहय कि “मूँह पजेरनिं तिन्नां करै थारै मनें जळण जुंण जाती निं आथी, मूँह फरेऊणीं एकी अकळू जाती करै तम्हां लै रिस।” 20 तेखअ बोला याशायाह बड़े हैऊआ करै कि “जुंण मूँह नाई लोळदें तै तिन्नां गअ हूँ भेटी, और जुंण मूँह पुछदें बी नाई तै तिन्नां दी हुअ हूँ प्रगट। 21 पर इस्त्राएले बारै बोला सह इहय कि “हूँ रहअ सारी धैळी एकी आज्ञा नां मनणेंआळी और बिबाद करनै आळी परजा बाखा हाथ पसारी।

### इस्त्राएला लै परमेश्वर दैया

11 तैहीता हूँ इहय बोला कि, परमेश्वर कै आपणी परजा छाडी आसा हेरी दी? नां, हूँबी ता इस्त्राएली आसा; अब्राहमों वंश और बिन्यामीने गोत्रा मांझै। 2 परमेश्वरै निं आपणीं परजा त्यागी, जहा सह पैहलैई जाणा, कै तम्हें नी जाणदें कि पवित्रशास्त्रा दी एलियाहे कथैया दी किजै बोला कि सह करा इस्त्राएले बिरोधा दी परमेश्वरा का अरज? 3 “कि हे प्रभू, तिन्नै किय तेरै भविष्यवक्ता लै घात और तेरी बेदी पाई ढोळी-पोछी; और हूँ बचअ एकैई कल्ही, और तियां आसा मूँह मारना लै लोळै भी लागै दै।” 4 पर परमेश्वरा का तेऊ कै जबाब भेटअ? “कि मरें आसा आपू लै सात हजार मर्ध डाहै दै, जुंणी तेऊ बाल देवतै सेटा आपणै घुटणें निं टेकै।” 5 एऊई साबै एऊ बगतै बी अनुग्रह करै चुनै दै केतरै लोग आसा बाकी? 6 जै अह अनुग्रह करै आसा हुअ द तै निं कर्मा करै आथी, नाई ता अनुग्रह निं तै अनुग्रह रहअ।

7 तै परिणांम किजै हुअ? इहय कि इस्त्राएली जेता लोळै तै लागै दै अह निं तिन्नां भेटअ और बाकी लोग किए काटै। 8 जिहअ लिखअ द आसा कि परमेश्वरै आसा तियां आझकी धैळी भारी निंजा दी पाएँ दै और एही आच्छी देंनीं कि तियां नाई भाळे और ईहै कान देंनीं कि नाई शुणे। 9 और दाऊद बोला इहय कि तिन्नै रोटी लोळी तिन्नां लै जाळ, फंदअ, ठोहळ और सजा हई।

10 तिन्नै आच्छी लोळी न्हैरअ धेछूअ ताकि तियां नाई भाळे, तूह डाह कबली तिन्नै पिटी कुंगळी करी।

11 हूँ बोला कि तिन्नै कै एते तैणीं खाई ठोहळ कि तियां धरनीं बधळिए? कधि निं, पर तिन्नै बधळणें बजहा भेटअ होरी जाती लै उद्धार ताकि तिन्नां

जळण होए। 12 जै तिन्नां गिरनअ बधळणअ संसारा लै धन और संपत्तीओ कारण हुअ ता तिन्नां भरपूरी करै केतरअ निं हणअ।

### होरी ज्ञातीयो उध्दार : कलमा लागेंओ उदाहरण

13 हूँ बोला तम्हां होरी ज्ञाती लै इन्नां गल्ला कि जै हूँ होरी ज्ञाती लै प्रेरित आसा, तै करा हूँ आपणीं सेऊआ चाकरीए बड़ाई। 14 ताकि केऊ साबे हूँ आपणें टबरा का जळण कराऊई करै तिन्नां मांझै कईओ उध्दार कराऊं। 15 किल्हैकि जै तिनों त्यागणअ संसारे मेल-जोळ हणेंओ कारण बणअ, तै कै तिनों ग्रहण हणअ मूणें दै मांझा का जिऊंदै हणें बराबर निं हणअ? 16 जै भेंटो पैहलअ पेळअ पबित्र बणांअ ता तै आसा पूरअ मुछअ द पिठअ बी पबित्र, और जै जळा पबित्र आसा तै आसा तियां डाळी बी एही ई।

17 और जै एक डाळी चोळी पाई और तूह किय जंगली जलपाई तेथ कलम ता एबै हुअ जलपाईए चिकनाईओ भागी। 18 ता डाळी दी घमंड निं करी और जै तूह घमंड करे बी, तै डाहै आद कि तूह निं जलैळै सभाळदअ पर जलैळै सभाळा ताह। 19 तेखअ बोळणअ ताह इहय कि डाळी चोळी तै कि हूँ तेथ कलम होए। 20 तियां ता विश्वास नाईं करे बजहा चोळी पर तूह रहा विश्वासा करै बणीं इहय करै घमंडी निं हई। 21 किल्हैकि परमेश्वरै जै असली डाळी निं छाडी ता तेऊ निं तूह बी लाअ छाडी। 22 इहयकरै परमेश्वरे किरपा और सख्ती भाळ, जुण गिरै तिन्नां लै सख्ती, पर ताल्है किरपा। जै तूह तेथ दी बणीं नां रहे तै पाणअ तूह बी तेता का काटी। 23 और तियां बी जै विश्वास करे तै लाणें तियां भी तेथै कलम किल्हैकि परमेश्वर सका भी कलम लाई। 24 किल्हैकि जै तूह जलपाई का जुण असली रूपै जंगली आसा काटि पाअ और जंगली हणें का उल्टअ राम्बळी जलपाई दी लाअ तै जुण ईयां असली डाळी आसा आपणीं ई जलपाई दी किल्है निं लागीं कलम।

### सारै इस्त्राएलो उध्दार

25 हे भाईयो किधी इहय निं हूआ कि तम्हें समझे आपणें आप बुधीमान, तैहीता हूँ इहय चाहंदअ निं कि तम्हें एऊ भेदा का नजाण रहे कि जेभै तैणीं होरी ज्ञातीए पूरी तरहा प्रवेश निं करी हेरे तेभै तैणीं रहणअ इस्त्राएलो एक भाग इहयई काठअ बणीं। 26 और एऊ साबै भेटणअ सारै इस्त्राएला मोक्ष जिहअ लिखअ द आसा कि छुटकारै दैणेंआळअ एछणअ सुय्योना का और अभक्ती करनीं तेऊ याकूबा का दूर। 27 और तिन्नां संघे हणीं मेरी अहैई बाचा कि मूँह करनै तिन्नां पाप दूर। 28 सुसमाचारे भावा का ता आसा तियां तम्हां लै परमेश्वरे बैरी पर चुनै दै भावा का आसा तियां बाब-दादे वजहा प्यारै। 29 किल्हैकि परमेश्वर निं आपणें बरदाना और बुलाहटा का पिछू हटदअ। 30 किल्हैकि जेही पैहलै तम्हें परमेश्वरे आज्ञा नाईं मनीं पर एभै हूई तिन्नां आज्ञा मनणें करै तम्हां लै दैया। 31 तिहअई तिन्नां बी निं एभै आज्ञा मनीं कि तम्हां लै जुण दैया हूआ एता करै तिन्नां लै बी दैया होए। 32 किल्हैकि परमेश्वरै डाहै सोभै आज्ञा नां मनणें आळै बंदी बणाईं ताकि सह सोभी लै दैया करे।

### परमेश्वरे स्तुति

33 आहा ! परमेश्वरो धन और बुधी और ज्ञान कै गंभीर आसा तेऊए बचाव किहै अथाह आसा तेऊए रसतै किहै सिधै आसा!

34 प्रभूए बुधी कुंणीं समझी? या तेऊओ मंत्री कुंण हुअ?

35 या तेऊलै पैहलै किजै कुंणीं दैनअ जेतो बदळअ तेऊ लै दैणअ लागे।

36 किल्हैकि तेऊए तरफा का, तेऊई करै और तेऊलै ई आसा सोभै गल्ला, तेऊए महिमा लोळी जुगै-जुगै हंदी रही। आमीन

### परमेश्वरे सेऊआ चाकरीए जिन्दगी

12 हे भाईयो, हूँ तम्हां का परमेश्वरै दैआ आद फरेऊई करै अरज करा, कि आपणें शरीरा जीऊंदै, और पवित्र, और परमेश्वरै पसंदो बलिदान चढाऊआ। अ ही आसा थारी आत्मिक सेऊआ। 2 एऊ संसारा जिहै निं बणां; थारै मना बदळणें संघे लोळी थारअ चाल चळन बी ठीक हुअ, जेता संघे तम्हें परमेश्वरे भली और भावती और सिध इछा रहा अनुभव करी करै लोळै लागी।

3 किल्हैकि हूँ आसा तेऊ अनुग्रहे कारण जुण मूँह भेटअ द आसा, हूँ बोला तम्हां सोबी लै इहय कि जिहअ समझणअ चाहिए तेता का बदकर निं आपणें आप समझी। पर जिहअ परमेश्वरै हरेकी लै तेऊए विश्वासे परिणामें साबै बांडी आसा दैनअ द तिहअई समझै सुबुधी संघे आपणें आप्पू। 4 किल्हैकि जेही म्हारी एसा एकी देही दी कई आंग आसा, और सोबी आंगो निं एकी रांगो काम आथी, 5 तिहअई हाम्हें जुण खास्सै आसा, मसीहा दी एक देह हई करै आसा आप्पू मांझै एकी दुजेए आंग। 6 जै तेसा दैया करै जुण हाम्हां लै हुई हाम्हां आसा होरी-होरी रांगे बरदान भेटै दै। ता जसा लै भविश्यबाणीं करनैओ बरदान भेटअ सह रहै विश्वासे परिणामें साबै भविश्यबाणीं करदअ लागी। 7 जै सेऊआ करनैओ बरदान भेटअ ता तै रहै सेऊआ करदै लागी। जै कुंण सखाऊणें आळअ आसा, सह रहै सखाऊंदअ लागी। 8 जुण उपदेशक आसा, सह रहै उपदेशा दैदअ लागी। दान दैणें आळअ दैए दिल खोल्ही करै दान। जुण अगुआई करा सह करै उत्साह दी अगुआई, जुण दैया करा सह करै बडै हर्षा संघे दैया।

9 प्रेम लोळी निष्कपट हुअ, बुराई का करै घृणां और भलाई दी रहा लागी। 10 भाईचारे प्रेमा करा डाह एकी दुजै लै दैया, आप्पू मांझै आदरमान करना लै बढा एकी दुजै का। 11 आळसी निं हणअ कामां-काजा रहणअ करदै लागी, आत्मिक गल्ला दी रहा भरुई और प्रभूए सेऊआ रहा करदै लागी। 12 आशा दी रहा खुश और क्लेशा दी रहा मजबूत और प्राथणां दी रहा हर बगत लागी। 13 पबित्र लोगा जेही जरूरत होए तेता लै करनीं तिन्नां मदद, और पाहूणचारी रहा करदै लागी।

14 आपणें दुखा दैणें आळै दै दैआ आशीश; आशीश दैणीं श्राप निं दैणअ। 15 आनंद करनै आळै संघे करा आनंद और लेरनै आळै संघे ला लेरा। 16 आप्पू मांझै डाहा एकै जिहअ मन, घमंडी निं हणअ पर दीन दुखी संघे डाहा संगती आपणीं आच्छी बुधिमान निं हणअ। 17 बुराईए बदळै निं कोही संघे बुराई करा, तिन्नां गले फिकर करा जुण गल्ला सोभी लोगा नेळ भली आसा। 18 जिधी तैणीं हई सका तम्हें करै सोभी लोगा संघे मेल-जोळ डाहणें कोशिश। 19 हे प्रियो, आपणअ बदळअ निं लई, पर क्रोधा लै दैआ मोकअ। किल्हैकि इहय आसा लिखअ द कि बदळअ लणअ आसा मेरअ काम, प्रभू बोला इहय कि मूँह लणअ बदळअ आप्पू। 20 पर जै तेरअ दुशमण भुखअ बी होए; ता तेऊआ का खैऊए रोटी, जै सह नचिशअ होए ता तेऊ का पणेंऊरे पाणीं। किल्हैकि इहय करी करै लाणें ता तेऊए मूँडे आगीए कोईलेए ढेर। 21 बुराई का निं हारा, पर भलाई करी करै पा बुराई दी जीत।

### राईसीए प्रती कर्तव्य

13 हरेक मांझू रहै प्रधान अधिकारीए अधीन, किल्हैकि इहय निं कोहै अधिकार आथी जुण परमेश्वरे तरफा का नाईं आथी। जुण अधिकार आसा तियां आसा परमेश्वरैई दैनै दै। 2 इहय करै जुण कोई बी अधिकारो बिरोध करा, सह करा परमेश्वरे बिधीओ सहनअ, और सहनं करनै आळै भेटणीं सजा। 3 किल्हैकि हाकम निं भलै कामां लै आथी पर बुरै कामां लै आसा डरा रहैऊणा लै। जै तूह हाकमां का नडर चाहा रहणअ ता तै कर भलै काम और तै हणीं तेऊए तरफा का तेरी सराहणा। 4 किल्हैकि सह आसा तेरी भलाई लै परमेश्वरो सेबक। पर जै तूह बुराई करे, ता तै डर, किल्हैकि तेऊ निं तलबार खेळणां लै आथी ढाकी दी, सह आसा परमेश्वरो सेबक कि तेऊए क्रोधे साबै बुरै कामां करनै आळै लै सजा दैए। 5 तैहीता अधीन रहणअ निं सिधअ क्रोधे डरै जरूरी आथी डरा का बी आसा जरूरी, बल्कि म्हारअ विवेक बी दैआ एते ग्वाही। 6 तैहीता कारअ बी दैआ, किल्हैकि तियां आसा परमेश्वरे सेबक और एऊ कामां दी रहै हर बगत लागी। 7 इहय करै करनअ हरेकीओ हक दैई, जसा कारअ लोळी, तेऊलै दैआ कारअ, जहा चंदअ लोळी तेऊलै दैआ चंदअ। जहा का डरनअ लागा, तेऊका डरा, जसरअ आदर-मान करनअ तेऊओ करा आदर-मान।

### एकी दुजेए प्रती कर्तव्य

8 आप्पू मांझै प्रेमा का छाडी निं होरी किछि चिजे कर्जदार हई; किल्हैकि जुण दुजै लै प्रेम करा तेऊई की व्यवस्था पूरी। 9 किल्हैकि भ्यभिचार निं

करनअ, हत्या निं करनीं, चोरी निं करनीं, लाञ्छ निं करनअ। इन्नां छाडी कोई होर बी आजा आसा होए ता सोभियो नचोळ भेटा एसा गल्ला दी कि आपणें पडोसी संघे करै आप्पु जिहअ प्रेम। 10 प्रेम निं पडोसीए किछै बुराई करदअ, तैहीता प्रेम डाहणअ करा व्यवस्था पूरअ।

11 एऊ बगता बछैणीं करा इहयई करी, एते तैणीं कि ऐबै गई तम्हां का निंजा का जागणें घळी पुजी। किल्हैकि जेऊ बगतै हांम्हें विश्वास किय त तेऊ बगते साबै आसा ऐबै म्हारअ उद्धार नेळ। 12 राच गई ऐबै खासी बिती, दोत आसा हणें आळी। इहय करै ऐबै अंधकारे कामां त्यागी करै बाह्वां ऐबै ज्योतीए हथियार। 13 जिहअ धैळी ठीक हआ, तेही ई लागा हांम्हां सिधी चाल चलणीं; ना कि हासी-मखूळल, शूर-शराब, भ्यभिवार, लुचपना दी और झगळै डाह दी। 14 बल्कि प्रभू मसीहा बाह्वा और शरीरे अभिलाषा पूरै करनं उपाय करदें निं रहा लागी।

### आपणें भाई लै निं दोष लाई

14 जुण विश्वासा दी कमजोर आसा तेऊ निंयां आपणीं संगती दी, पर तेऊए शंका दी विवाद करनै तैणीं निं निंयां। 2 ऐकी आसा विश्वास कि सब किछ खाणंआ आसा ठीक, पर जुण विश्वासा दी कमजोर आसा, सह खा शाग सबजी ई। 3 खाणें आळअ निं, तेऊ नाई खाणें आळै नकाम्मअ समझी, और जुण किजै नाई खांदअ आथी, सह निं तेऊ खाणें आळै लै दोष लाई; किल्हैकि परमेश्वरें आसा सबी मनअ द। 4 तूह कूण हआ जुण दूजें सेवका लै दोष ला? तेऊओ विश्वास करनअ या नाई करनअ, तेऊअ मालक ई जाणा; सह रहणअ विश्वासा दी टेकी, किल्हैकि प्रभू सका तेऊ विश्वासा दी टकैळी।

5 कोई ता ऐकी धैळी दुजी धैळी का जादी मना, ता कोए समझा सोभी धैळी एक बराबर। सोभै जळै बचारा आपणें ही मना दी। 6 जुण कसा धैळी मना, ता सह मना प्रभू लै, और जुण खा, सह भी खाआ प्रभू लै, किल्हैकि सह करा परमेश्वरो धन्यावाद, और जुण नाई खांदअ, सह निं प्रभू लै खांदअ, बल्कि परमेश्वरो धन्यावाद करा। 7 किल्हैकि हांम्हां मांझै न कोए आप्पु लै जिउंदअ, और न कोए आपणी तैणीं मरदअ आथी। 8 हांम्हें जै जिउंदै आसा ता प्रभू लै आसा जिउंदै; और जै हांम्हें मरा, ता प्रभू लै मरा; हांम्हें जिउंआ, चाहै मरा, हांम्हें आसा प्रभुए ई। 9 किल्हैकि मसीह मुओं तै ही, और तैही उच्चुअ जिउई, ताकि सह मुंए दै और जिउंदै दुहिओ प्रभू होए।

10 तूह आपणें भाई लै दोष किल्है ला? और तूह आपणें भाई किल्है समझा तुछ? हांम्हां लागणअ सोभी परमेश्वरें सहनै खळअ हणअ, जेभै तेऊ सोभीओ फँसलअ करनअ। 11 किल्हैकि पवित्र शास्त्रा दी आसा लिखअ द कि, “प्रभू बोला इहय कि हुँह खा आपणीं जिन्दगीए कसम कि हर एक जन पळनअ मेरै चरणें, और सोभीए जीभा दी हणअ परमेश्वरो ई नांआ।” 12 तैहीता हांम्हां सोभी बी लागणअ परमेश्वरा सहनै आपणअ-आपणअ लेखअ जोखअ दैणअ।

### आपणें भाईए बरैबाद हणेंओ कारण निं बर्णी

13 ता, ऐबै निं हांम्हां आजू पोही ऐकी दुजै लै दोष लाणअ, पर तम्हें करा इहय प्रण कि आपणें भाईए सहनै निं इहय कोई काम करी जेता करै तेरै भाई ओहळ लागे। 14 ऐबै लागअ मुखा थोघ और प्रभू यीशू मसीहा दी खुल्ही मेरी आच्छी, कि कोहै बी चीज निं आपणें आप्पु दी अशुध्द आथी, पर जुण तैहा अशुध्द समझा तेऊ लै आसा सह अशुध्द। 15 जै तेरअ भाई तेरै खाणें पीणें बजहा उदास होए, ता तै निं तूह परमेश्वरे रिती दी चलदअ आथी, जेते तैणीं मसीहें आपणीं जान दैनी, आपणें भाई तूह आपणें खाणें पीणें बजहा निं नाश करी। 16 जुण तम्हां लै भलअ आसा, तेऊए निंदा निं लोळी हुई। 17 किल्हैकि परमेश्वरो राज निं खाणअ-पीणअ आथी, पर धर्म और मेल-जोल और सह मजअ आसा जुण पवित्र आत्मा संघे हआ। 18 जुण एऊ ढंगे मसीहें सेऊआ करा, सह हआ परमेश्वरा बडअ पसंद और आदमी मांझै हआ गळा लागे जोगी। 19 और हांम्हां लागा तिंयांई गल्ला लागीं और तेऊई कामां दी लागी रहणअ, जेता करै सोभी संघे मेल-जोल और सोभीओ सुधार हआ। 20 खाणेंए तैणीं निं परमेश्वरो काम खराब करी। सोभ किछ ता आसा शुध्द,

पर जहा तेऊ खाणेंए बजहा करै ओहळ लागे, तेऊ आदमीं लै आसा गळत। 21 भलअ ता आसा इहय कि नां तूह (शीखा) मांस खाई, और नां शराब झुटी, और न इहय काम करी जेता करै तेरै भाई ओहळ लागे। 22 तेरअ जुण विश्वास आसा, तेऊ डाहा परमेश्वरे सहनै मना भितरी। धन्य आसा सह जुण आपणीं गल्ला दी, जसा सह ठीक समझा, और आपणें आप सह दोषी नी मदअ आथी। 23 पर जुण शक करी करै खा, सह गअ सजा जोगी हई, किल्हैकि सह निं विश्वासा संघे खांदअ आथी; और जुण विश्वासा दी नाई आथी, सह हआ पापा दी।

### दुजेए करनीं उन्नती

15 हांम्हें जुण सेठ हआ, हांम्हां लागा गरीबा आदमीए मदद करनीं, और तिन्ने गरीबी लागा सैहणीं, ना कि आपणें आप्पु ई खुश करदें रहणअ लागी। 2 हांम्हां लागा सोभी आपणें गरांओंआं (पडोसीए) आळै सहायता करनी ताकि तेऊए तरक्की हआ। 3 प्रभू यीशू बी निं आपणें शरीरा खुश करनं कोशिश की, पर जिहअ लिखअ द आसा कि; “तेरै निन्दा करनं आळैए निन्दा पळी मूह परदें।” 4 जेतरी बी गल्ला पैहलै का लिखी दी आसा, तिंयां आसा म्हारी शिक्षे तैणीं लिखी दी कि हांम्हें पवित्रशास्त्रा संघे धीरज और प्रोत्साहना संघे आशा डाही सके। 5 धीरज और शान्तीए मालक परमेश्वरें लोळी तम्हां लै इहय बरदान दैनअ कि मसीह यीशूए साबै लोळी तम्हें आप्पु मांझै एक मन रहै। 6 ताकि तम्हें एकी मना, और एकी स्वरा संघे म्हारे प्रभू यीशू मसीहें पिता परमेश्वरे स्तुति करी सके।

### सुसमाचार आसा सोभी लै

7 जिहअ यीशू मसीह बी परमेश्वरे महिमें तैणीं तम्हें ग्रहण आसा किए दै, तिहैई करा तम्हें भी एकी दुजे ग्रहण। 8 तैहीता हुँ तम्हां लै बोला कि जुण (कसम) प्रतिज्ञा थारै दादू बाबा लै आसा ती दैनी दी, तिन्नां बणाई डाहणें तैणीं बणअ यीशू मसीह सच्चाईओ प्रमाण दैणें तैणीं खतनें कीए दै लोगो सेवक; 9 और होरी जातीए लोगो बी करनीं दैया करनं बजहा परमेश्वरे स्तुति; जिहअ लिखअ द आसा कि, “मूह करनअ जाती-जाती दी तेरअ धन्यावाद, और तेरै नांओए गाणें भजन।” 10 तेखअ आसा इहय बोलअ द कि, “हे जाती-जातीए सोभी लोगो, तेऊए परजा संघे मनाऊंआं खुशी और आनन्द।” 11 और तेखअ इहय बी आसा बोलअ द कि, हे जाती-जातीए सोभी लोगो, प्रभुए स्तुति और आराधना करा; और हे राज्य-राज्य सोभी लोगो, परमेश्वरा सराहा।” 12 और तेखअ बोला यशायाह, “यिश्शे हणीं एक (जळ) जड प्रकट, और होरी जातीओ एक हाकम हणें तैणीं उझणअ, और तेऊ परदें डाहणीं होरी जातीए लोगो आशा।” 13 परमेश्वर जुण आशा दैणें आळअ आसा, तम्हें जै विश्वास डाहे, ता तम्हें दैणें सोभी प्रकारें आनन्द और शान्ती करै भरी, ताकि पवित्र आत्में शगती संघे थारी आशा बढदी रहे।

### हिम्मता संघे लिखणेंओ कारण

14 हे भाईयो, हुँ जाणा थारै बारै पाक्के दी कि तम्हें आसा आप्पु बी भलाई करै भरुएदें और इश्चरीय ज्ञाना दी आसा तम्हें भरपूर और एकी दुजे सका सखाऊई फळाऊई। 15 तैबी मंए तम्हां लै किधी-किधी आद फरेऊणें तैणीं आसा बडी हिम्मता डाही लिखअ द। अह हुअ तेऊ अनुग्रहे बजहा जुण परमेश्वरें मुल्है आसा दैनअ द, 16 कि हुँ होरी जाती लै प्रभू यीशू मसीहो सेवक हई करै परमेश्वरे सुसमाचारे सेऊआ याजका जेही करी सकूं, जेता करै होरी जातीओ चढाऊणअ जाळणअ कि पवित्रआत्मा संघे पवित्र बर्णी करै लोळी ग्रहण किय। 17 तैहीता तिन्नां गले बारै जुण परमेश्वरा संघे रीशतअ डाहा, ता हुँ सका यीशू मसीहा दी विश्वास करी करै तेऊए बडाई करी। 18 तिन्नां गल्ला छाडी मूह होरी गल्ला करनं निं हिम्मत ई आथी, जुण यीशू मसीह होरी जातीए अधीनता लै वचन, और कर्म मूह करै कियै, 19 और चिन्ह चमत्कार, और नोखें काम, शक्ति और पवित्र आत्में सामर्था करै मेरै शरीरा संघे किए; ऐतरअ ई निं, मंए यरुशलेमा का ओही चहू कनारै इल्लुरिकुमा तैणीं किय यीशू मसीहो प्रचार। 20 पर मेरें मनें आसा एही चाह कि जिधी-जिधी यीशू मसीहो नांअ नाई पूजअ आथी, तिधी-तिधी खोजणअ यीशू मसीहो सुसमाचार, इहय निं



हआ कि हूँ होरीए आथरी दी आपणअ घर बणाऊँ। 21 पर ज़िहअ लिखअ द आसा तिहअई लोळी हुअ, “जहा सेटा तेऊओ सुसमचार नाई पूजअ, तिन्नाई भाळणअ सह, और जुणी सह नाई शुणअ तियांई समझणै।”

### रोम यात्रा करने पौलुसे योजना

22 तैहीता हूँ तम्हां सेटा लै ऐछणें का रहअ कई बेरी रुकी। 23 पर ऐबे इन्नां देशा दी मेरै कामां करना लै निं रही कोऐ जैगा, और खासी साला ओही ती मूँह तम्हां सेटा लै ऐछणें शौक। 24 और ज़ेभै हूँ स्पेन देशा लै नाशणअ, ता तेभै नाशणअ मूँह तम्हां बाती एछी करै, मूँह आसा आशा कि तेऊ सफरा दी हणी तम्हां संघे मेरी जरूर मुलाकात, और जेभै थारी संगता दी रही करै मेरअ जीऊ भरीए ता, तेभै दैरे तम्हें मूँह आजू जिहै पजैळी। 25 पर ऐभै आसा हूँ पवित्र लोगे सेऊआ करदअ यरुशलैमा लै चालअ द। 26 किल्हैकि मकिदुनिए और अखाये लोगा लागअ इहय ठीक कि यरुशलैमें पवित्र लोगा बिचै गरीब लोगा लै करनअ थोळअ चंदअ कठा। 27 पर तिन्नां बधीया ता लागअ, पर तियां आसा तै तिन्नें कर्जदार बी, किल्हैकि जै होरी जातीए लोग तिन्नें आत्मिक गल्ला दी भागी हुऐ, ता तिन्नां लै बी आसा ठीक कि शारीरे गल्ला दी तिन्नें सेऊआ करे। 28 और तैहीता हूँ ऐऊ कामां पूरे करै और तिन्नां लै ऐऊ चंदै सभाळी करै नाशणअ तम्हां बाती एछी करै स्पेना देशा लै। 29 और हूँ जाणा कि जेभै हूँ तम्हां सेटा लै ऐछणअ ता हूँ एछणअ मसीहे पूरी आशीशा संघे।

30 हे भाईयो, म्हारै प्रभू यीशूए पवित्रआत्मां और प्रेम आद फरेऊई करै करा हूँ तम्हां का अरज कि मेरी तैणीं रहा परमेश्वरा सेटा प्राथणां करदै मगन। 31 ताकि हूँ यहूदिए अविश्वासा का बची रहूँ, और मेरी सह सेऊआ जुण यरुशलैमा लै आसा, सह लोळी पवित्र लोगा भांऊई; 32 और हूँ परमेश्वरे मरजी दी तम्हां सेटा एछी करै बड़ै आनंदा दी बिश्राम करुं। 33 शान्तीओ परमेश्वर लोळी तम्हां संघे कबलअ रहअ। आमीन।

### व्यक्तिगत आदर-सत्कार

16 हूँ करा तम्हां का फीबे तैणीं अरज कि, जुण म्हारी बैहण और किखिया कलीसिए सेवक आसा, 2 पवित्र लोगा चाहिए कि तेसा करा प्रभू दी ग्रहण; और जहा कोई गल्ला तेसा थारी जरूरत होए, ता तेसरी करा सहायता, किल्हैकि तेसा बी आसा बड़ैभारी लोगे सहायता की दी, और मेरी बी आसा सहायता की दी।

3 प्रिस्किला और अक्विला, जुण यीशू मसीहा दी मेरै सहकर्मी आसा तिन्नां लै मेरअ नमस्कार और राजी-बाजी। 4 तिन्नें पाए तै मेरै प्राणें तैणीं आपणें प्राण बी खातरै दी; सीधअ हूँ निं बल्कि होरी जातीए सारी कलीसिया बी करा तिन्नां धन्यावाद। 5 तैहा कलीसिया लै बी नमस्कार जुण तिन्नें घरा दी आसा। मेरै प्यारै इपैनितुसा लै, जुण यीशू मसीहा लै आसिया दी पैहलअ फळ आसा, तेऊ लै बी राजी-बाजी और नमस्कार। 6 मरियमा लै बी नमस्कार जुणी तम्हां लै बडी मँथ की। 7 अन्दुनीकुस और यूनियास जुण मेरै टबर आसा, और तियां मूँह संघे कैद बी हुऐ तै, और प्रेरिता दी आसा तिन्नां नांअ,

और मुखा पैहलै हुऐ तै तियां मसीही विश्वासी, तिन्नां लै बी राजी-बाजी और नमस्कार। 8 अम्पलियातुसा लै जुण प्रभू दी विश्वासा करने आळै मांझै मेरअ सोभी का पैरअ आसा, तेऊ लै बी राजी-बाजी और नमस्कार। 9 उरबानुसा लै जुण मसीहा दी म्हारअ साथी आसा, और मेरै पैरे इस्तखुसा लै बी नमस्कार। 10 अपिल्लेसा लै जुण मसीहा दी खरअ उतरअ, तेऊ लै भी नमस्कार। 11 अरिस्तुबुलुसै घरा आळै लै बी राजी-बाजी और नमस्कार। 12 टबरा हेरोदियोना लै बी राजी-बाजी और नमस्कार। नरकिस्सुसै घरानै लोगा लै जुण प्रभुए विश्वासी आसा, तिन्नां लै बी राजी-बाजी और नमस्कार। 12 त्रूफना और त्रूफोसा लै जुण प्रभुए कामां दी बडी मैहनत करा तिन्नां लै बी राजी-बाजी और नमस्कार। प्रिय पिरसिस लै, जुणी प्रभू दी बडी मँथ की, तिन्नां लै बी राजी-बाजी और नमस्कार। 13 रुफुस जुण प्रभू चुनअ द आसा, और तेऊए आम्मां जुण मेरी भी आम्मां आसा, तिन्नां दुही लै बी राजी-बाजी और नमस्कार। 14 असुकितुस और फिलगोन और हिमैस और पत्रुवास और हिमैस और तेऊ संघे सोभी भाई लै राजी-बाजी और नमस्कार। 15 फिलुलुगुस और यूलिया और नेर्युस और तैऊए बैहण, और उलुम्पास और तेऊ संघे सोभी पवित्र लोगा लै राजी-बाजी और नमस्कार। 16 आपू मांझै पवित्र चुम्बना संघे करा नमस्कार। तम्हां लै मसीहे सारी कलीसिए तरफा का राजी-बाजी और नमस्कार।

### आखरी नर्देश

17 ऐबे हे भाईयो, हूँ करा तम्हां का अरज कि जुण लोग तैहा शिक्षे बीच, जुण तम्हें पाई दी आसा, और तेथ जुण फूट पाणें कोशिश करे, तिन्नां का रहे दूर। 18 ईयां ईहै लोग निं म्हारै यीशू मसीहे आधी, बल्कि ईयां करा आपणे पेटे सेऊआ; और मिठी-मिठी गल्ला करै ठगा ईयां भोळै-भाळै लोग। 19 थारी आज्ञा मनणें गल्ला आसा सोभी लोगा दी फैली दी, तैहीता हूँ थारै बारै दी नंद करा, पर हूँ चाहा कि तम्हें भलाई लै बुद्धिमान, और बुराई लै रहा भोळै बणीं। 20 शान्तीए परमेश्वरा जैटणअ शैतान थारै पैरा हेठै छेकै ई। म्हारै प्रभू यीशू मसीहो अनुग्रह लोळी तम्हां दी हंदअ रहअ।

21 मेरअ साथी तिमथियुसो और टबरो लूकियुस और यासोन और सोसिपत्रुसो तम्हां लै नमस्कार। 22 मूँह ऐहा पत्री लिखणें आळै तिरतियुसो बी प्रभू दी तम्हां लै नमस्कार। 23 गयुस जुण मेरी और कलीसिए पहुणाई करनै आळअ आसा, तेऊओ बी नमस्कार। 24 ईरास्तुस जुण नगरीओ भण्डारी आसा, और भाई क्वारतुसो भी तम्हां लै नमस्कार।

### परमेश्वरे स्तुती

25 ऐबे जुण तम्हां लै मेरै सुसमाचार अर्थात यीशू मसीहे संदेश प्रचारै अनुसार स्थिर करी सका, तेऊ भेदे दीऊए प्रैशे साबै जुण सनातना का लुकी रहअ, 26 पर ऐबे प्रकट हई करै सनातन परमेश्वरे आज्ञा संघे और भविष्याबगते कतावा संघे सोभी का आसा खोजी हेरअ द, ताकि तियां विश्वासा संघे आज्ञा मनणें आळै होए। 27 तेऊई ऐकी बुद्धिमान परमेश्वरे, यीशू मसीहा संघे लोळी जुगै-जुगै महिमा हंदी रही। आमीन।



# 1 कुरिन्थियों

## भूमिका

पौलुस की ती कुरिन्थ नगरी कलीसिया स्थापना। तेथ हुई मसीही जिन्दगी और विश्वासे बारे कई समस्या पैदा। तिन्ना समस्या ठीक करने तैणी लिखी ती पौलुस प्रेरितै कुरिन्थिए नांऊए अह पैहली चिठी। तेऊ ज़मानें त कुरिन्थ यूनान देशो एक अन्तर्राष्ट्रीय नगर। जुण रोम राजे ज़मानें अखाया राईसीए राजधानी थी। अह त तेऊ ज़मानें भरपूर बपार, ठाठ-बाठ कला संस्कृति और कई धर्मा लै मशूर। पर अह त आपणी कंजरेई जिहै बुरै कामां लै बदनाम। प्रेरिते चिन्ता करने गला ती खासकर कलीसिया दी गुटवाजी, बुरै काम, कंजरेई, बैह शादी, विवेके बारे सुआल, कलीसियाई प्रबन्ध, पवित्रात्में दान और पुनरुत्थान। पौलुस खोजा आपणी घोर अन्तरदृष्टी कि सुसमाचारा करै इन्ना सुआलो समाधान किहय करै सका हई। अध्याय 13 दी खोजा पौलुस आपणी घोर अन्तरदृष्टी का इहय कि परमेश्वरा का भेटै दै बरदाना का सोभी का उत्तम आसा प्रेम। अह आसा एसा कताबो मशूर धैअ।

रूप-रेखा

भूमिका 1:1-9

कलीसिया दी दलबंदी 1:10-4:21

नैतिका और पारिवारिक जिन्दगी 5:1-7:40

मसीही और मूर्तिपुजा करनेआळै 8:1-11:1

कलीसियाई जिन्दगी और आराधना 11:2-14:40

मसीह यीशू और विश्वासीओ पुनरुत्थान 15:1-58

यहूदिए मसीही लै दान 16:1-4

व्यक्तिगत गल्ल और नचोळ 16:5-24

## आदर-सत्कार

1 पौलुस तरफा का जुंण परमेश्वरै मरजी दी यीशू मसीहो प्रेरित हणां लै शादअ द आसा और भाई सोस्थिनेसे तरफा का, 2 परमेश्वरे तेसा कलीसिये नांऊए जुंण कुरिन्थुस दी आसा, मतलब तिन्ने नांऊए जुंण यीशू मसीह दी पवित्र आसा तै किए दै, तियां पवित्र हणां लै आसा शाद दै; और तिन्नां सोभीए नांऊए बी जुंण हर जैगा का म्हारै और आपणै प्रभू यीशू मसीहे नांऊए प्राथणां करा। 3 म्हारै पिता परमेश्वर और प्रभू यीशू मसीहे तरफा का लोळी तम्हां लै महान दैया और शान्ती भेटदी रही।

## मसीह दी आशीषा

4 हूँ करा थारै बारै परमेश्वरो सदा धन्यावाद, कि परमेश्वरे महान दैया हुई तम्हां लै यीशू मसीहा दी रही करै। 5 एही कि यीशू मसीहा दी आसा तम्हें हर चिजा दी सारी गल्ला-बाता करने और सारै ज्ञाना दी सेठ बणाए दै, 6 कि जेही यीशू मसीहे ग्वाही तम्हां सोभी बिचै पाक्की निखळी। 7 कोही बी बरदाने नि तम्हां लै कमी आथी डाही दी, और म्हारै प्रभू यीशू मसीहे प्रकट हणा लै हआ तम्हें न्हैळै-भाळै लागै दै 8 तेऊ करने तम्हें पाकै बी, ताकि तम्हें म्हारै प्रभू यीशू मसीहे ऐछणें धैळी बी बेकसूर हई सके। 9 जुंणी तम्हें आपणै शोहरू प्रभू यीशू मसीहा संघे रहणां लै शाद दै आसा, सह परमेश्वर आसा सच्चअ।

## कलीसिया दी फूट

10 हे भाईयो, हूँ करा तम्हां का यीशू मसीहे नांओए अरज कि तम्हें सोभ बोला ऐकैई गल, और तम्हां बिचै नि लोळी झगळअ हुअ, बल्कि एक ई मन और एक ही वचार डाहा। 11 किल्हैकि हे मेरै भाईयो, खळोए घरा आळै खोजअ मुखा कि तम्हां बिचै आसा लागै दै झगळै हंदै। 12 मेरै बोळणेंओ मतलब आसा इहय कि, तम्हां मांझै कोए ता बोला आप्पू लै "पौलुसो, कोए अपुल्लोसो, ता कोए कैफैओ, ता कोए खोजा मसीहो। 13 कै मसीह तम्हां लै बांदूअ द आसा ऐ? कै पौलुस पाअ त थारी तैणी क्रुसा दी? कै तम्हां लै

पौलुसे नांऊआ दी आसा बपतिस्मअ भेटअ द? 14 हूँ करा परमेश्वरो धन्यावाद कि क्रिस्पुसा और गयुसा छाडी नि मंए तम्हां मांझै कोही लै बी बपतिस्मअ दैनअ आथी। 15 किधी इहय नि हआ कि कोए बोले तम्हां लै इहय कि तम्हां आसा मेरै नांओ बपतिस्मअ भेटअ द। 16 और हाँ, मंए आसा स्तिफनुसे घरा आळै लै बी बपतिस्मअ दैनअ द, इन्नां का लाऊआ नि हूँ जाणदअ कि मंए कसा होरी लै बी आसा होए बपतिस्मअ दैनअ द। 17 प्रभू यीशू मसीह नि हूँ बपतिस्मै दैनअ आथी भेजअ द, बल्कि सुसमाचारा शणाऊदअ आसा छाडअ द, और अह बी नि सीधअ कि शब्द शणाऊई करैई ज्ञान खोजणअ, इहय नि हआ कि यीशू मसीह क्रुसा परदै चढाऊणअ हआ व्यर्थ।

## मसीह आसा परमेश्वरो ज्ञान और सामर्थ

18 किल्हैकि क्रुसे कथैया आसा मरणे आळै लै बेकदरी, पर हांम्हां मोक्षा पाणे आळै लै आसा परमेश्वरे सामर्थ। 19 किल्हैकि पवित्र शास्त्रा दी आसा लिखअ द कि, "जुंण आप्पू लै बडअ भारी ज्ञानी समझा, मूँह करनअ तेऊओ ज्ञान बेकार, और जुंण आप्पू लै बडअ भारी समझकार समझा तेऊए समझ बी करनी बेकार।" 20 तेखअ किधी रहअ सह ज्ञाना आळअ? और किधी रहअ स शास्त्री? और किधी रहअ सह ऐऊ संसारो बिबादी? ता तेखअ ईहै करै ऐऊ संसारो ज्ञान मूर्ख नि हुअ? 21 किल्हैकि जै परमेश्वरो ज्ञान ज्ञाणी करै बी संसारै परमेश्वरे बारै नाई जाणअ आथी, ता परमेश्वरा लागअ इहय बधिया कि ऐऊ प्रचारै मुखता संघे विश्वासा करने आळै लै ई दैऊँ मोक्ष। 22 यहूदी ता मांगा चिन्ह, और यूनानी हआ ज्ञाना लोळै लागै दै; 23 पर हांम्हें ता तेऊ क्रुसा दी चढाउए दै मसीहो प्रचार करा, जुंण यहूदी लै ठोहळा लागणें बजहा, और होरी लै आसा मुखता। 24 पर जुंण तेऊ आप्पू सेटा लै आसा शाद दै, चाए यहूदी, चाए यूनानी, तिन्नां सेटा आसा यीशू मसीहे सामर्थ और परमेश्वरो ज्ञान। 25 किल्हैकि परमेश्वरे आसा मुखता भी संसारै जैनी शास्त्री का जादी, और परमेश्वरे कमजोरी भी आसा आदमीएँ जोरा का बी जादी।

26 हे भाईयो, आप्पू शदपों बारै ता सोचा कि नां ता शरीरा का जादैं ज्ञानी आथी शदैं दै, और नां बड़ै जोरा आळै आथी शदैं दै, और न जादैं कुलीन आथी शदैं दै। 27 पर परमेश्वरै आसा एऊ संसारे मुख चुनै दै, कि तिन्नां ज्ञानी शास्त्री लोळी शरम हुई, और परमेश्वरै आसा हेरै दै एऊ संसारे कमजोर आदमी चुनिं, ताकि तिन्नां जोरा आळै लोळी शरम हुई; 28 परमेश्वरै आसा तियां बी शदैं दै जुंण नाई हणें बराबर आसा, एऊ संसारे नीच, और तुच्छ लोग, ताकि जुंण तियां आसा तियां बेकार होए। 29 और ताकि कोए बी प्राणी परमेश्वरा सहनै घमण्ड निं करी सकै। 30 पर तेऊए ई तरफा का आसा तम्हें यीशू मसीह दी, जुंण परमेश्वरै तरफा का हांम्हां लै ज्ञान आसा, मतलब धर्म, और पवित्रता, और छुटकारा; 31 ताकि जिहअ लिखअ द आसा, तिहअ ई होए, "और जुंण घमण्ड करे, सीधअ प्रभू दी ई घमण्ड करे।"

### कूसित मसीहे बारै संदेश

2 हे मेरै भाईयो, जेभै हूँ परमेश्वरै भेदा शणाऊंदअ तम्हां सेटा लै आअ, ता शब्दा या ज्ञाने उत्तमता करै निं हूँ तम्हां सेटा लै आअ। 2 किल्हैकि मैं त हेरअ द इहय प्रण करी कि तम्हां बिचै निं मूँह यीशू मसीह छाडी होर कोहीए गल खोजणी आथी। 3 हूँ रहअ डरदी-डरदी और कांबदी-कांबदी तम्हां संघे; 4 मेरै वचना और मेरै प्रचार दी निं ज्ञानें शोभली-शोभली लळ्याओणै आळी गल्ला आथी, पर तेथ आसा त आत्मा और शक्तिओ (प्रमाण) उतर। 5 ऐते तैणी कि थारअ विश्वास निं माहूँए गल्ला परेंदैं लोळी हुअ बल्कि परमेश्वरै सामर्था परेंदैं लोळी हुअ।

### परमेश्वरो ज्ञान

6 तैबी शणाऊंअ हांम्हें (सिध्द) लोगा और जाणकार लोगा दी आपणअ ज्ञान, पर एऊ संसारो ज्ञान निं, जुंण नाश हणें आळै और हाकमों आसा; 7 पर हांम्हें खोजा परमेश्वरै तेऊ छीपै दै ज्ञाने बारै, जुंण परमेश्वरै हांम्हां लै पैहलैई का म्हारी महिमा लै आसा बणांअ द। 8 जुंण एऊ संसारे हाकमा मांझै कोही बी निं जाणअ, और जै तियां जाणदैं, ता तै निं तियां तेजोमय प्रभू कूसा दी चढाऊंदैं तै, 9 पर जिहअ लिखअ द आसा कि "जुंण गल्ला आच्छी निं भाळी, और कारनै निं शुंणी, और जुंण गल्ला माहूँए दमागाई दी निं पळी, तियांई गल्ला आसा जुंण प्रभू आपणै प्यारा डाहणै आळै लै आसा बणाई दी।" 10 पर परमेश्वरै की तियां आपणी आत्मा करै हांम्हां दी प्रगट, किल्हैकि आत्मां जाणा सारी गल्ला और परमेश्वरै गुप्त गले बारै बी। 11 माहूँ मांझै कुंण सका मांहणूए गले बारै जाणी, सीधी तेऊए आत्मां, जुंण तेऊ दी आसा? तिहअई निं परमेश्वरै गले बारै बी कोहै जाणदअ आथी, सीधी परमेश्वरै आत्मा ई जाणा। 12 पर हांम्हें निं संसारे आत्मा आथी पाई दी बल्कि परमेश्वरै सह आत्मा आसा पाई दी जुंण परमेश्वरै हांम्हां लै दैनी दी आसा, ताकि हांम्हें तिन्नां गल्ला जाणीं सके जुंण परमेश्वरै हांम्हां लै दैनी दी आसा। 13 जिना गल्ला हांम्हें माहूँए सखाऊए दै जेना का निं शणाऊंदैं, पर आत्मां सखाऊई दी गल्ला शणाऊंआ, आत्मिक गल्ला दी मलाऊई करै। 14 पर शरीरा दी मन लाणें आळै आदमी निं परमेश्वरै आत्में गल्ला दी चली सकदअ, किल्हैकि ईयां गल्ला आसा तेऊ संसारिक आदमी लै नकाम्मी, और नां सह इन्नां गल्ला जाणीं सकदअ, किल्हैकि तिन्नां गल्लो पतअ लागा पवित्र आत्मा करै ई। 15 आत्मिक आदमीं परखा सोभी गल्ला, पर तेऊ आदमीं निं कोहै परखी सकदअ। 16 "किल्हैकि प्रभुए मनं बारै कुंणी जाणअ, कि तेऊ कुंण सखाऊए?" पर हांम्हां सेटा आसा यीशू मसीहो मन।

### कलीसिया दी गुटबन्दीए भर्त्सना

3 हे मेरै भाईयो, हूँ निं तम्हां संघे एऊ तरिके गल्ला करी सकअ, जेही आत्मिक लोगा संघे हआ, पर जिहै शरीरिक लोगा संघे, और तिन्नां संघे जुंण यीशू मसीहे विश्वासा दी मैची शोहरू आसा। 2 मणें पणैऊंअ तम्हां का दुध, पर नाज निं खैऊअ; किल्हैकि तम्हें निं नाज खाई सकदैं तै; पर तम्हें निं मैची बी नाज खाई सकदैं आथी, 3 किल्हैकि तम्हें आसा मैची बी शरीरिक आदमी, और जेभै तैणी थारै मना दी, झगळै, और निंदा, और चोरी जेही गल्ला आसा, ता तै कै तम्हें शरीरिक आदमी निं आथी? 4 किल्हैकि जेभै

तम्हें इहय बोला कि, "हूँ आसा पौलुसो," और दुजअ बोला कि, "हूँ आसा अपुल्लोसो," ता तेखअ तम्हें आदमी निं आथी?"

5 अपुल्लोस कै आसा? और पौलुस कै आसा? सिधै सेवक, जसरी बजहा तम्हें विश्वास किय, और जिहअ प्रभू सोभी लै दैनअ। 6 मणें लाअ पौधअ, और अपुल्लोसै पाअ तेऊ पौधै दी पाणी, पर परमेश्वरै कीय सह बडअ। 7 तैहीता नां ता सह पौधै लाणें आळअ किछ आथी, और नां सह तेथ पाणी पाणै आळअ किछ आथी, पर सह परमेश्वर ई आसा सोभ किछ जुंण तेता बढाऊणें आळअ आसा। 8 लाणें आळअ, और पाणीं दैणै आळअ, तियां आसा दुहै बराबर, पर हर आदमीं भेटणीं आपणें कामें साबै मजदूरी। 9 किल्हैकि हांम्हें आसा परमेश्वरा संघा कामां करनं आळै; और तम्हें आसा परमेश्वरै फसल और परमेश्वरै रचना।

10 परमेश्वरै तेऊ अनुग्रहे तरिके संघे, जुंण मुल्है आसा दैनअ द, और मणें (बुधिमान) जाणकार राज मिस्त्री जेही मैद बणाई, और दुजै बशैळअ तेथ परेंदैं रदअ। पर हर आदमीं रहै चतैन कि तेऊ तेथ किहअ रदअ बशैळणअ।

11 और तैहा मैदा छाडी, जुंण तेथअ पळी दी आसा, सह आसा यीशू मसीह, और दुजी मैदा निं कोहै खळीं ई सकदअ। 12 और जै ऐहा मैदा परेंदैं कुण, सुनै, या चांदीए, और मैहणै पाथर या काठ या घाहो रदअ डाहे, 13 ता हर ऐकी आदमींए काम होंणें प्रगट; किल्हैकि तेहा धैळी खोजणें सोभी का तिन्नें काम और तियां हणें आगी संघे प्रगट, और तैहा आगी परखणें सोभीए काम कि किहै आसा। 14 जसरै काम तैहा आगी का बचे, ता तेऊ भेटणीं तैतै मजदूरी। 15 और जै कसरै काम तैहा आगी दी जळै, ता तेऊ लागणअ घाटअ खाणअ; पर आप्पू जाणअ सह बची पर बचणअ जळदी-जळदी।

16 कै तम्हें निं जाणदैं कि तम्हें आसा परमेश्वरै मांदर, और परमेश्वरै आत्मां करा तम्हां दी बसेरअ? 17 और जै कुंण परमेश्वरै मांदरा नष्ट करे, ता परमेश्वरा करनअ सह बी नष्ट; किल्हैकि परमेश्वरो मांदर आसा पवित्र और तियां आसा तम्हें।

18 कोहै बी निं आप्पू लै धोखअ दैई। और जै तम्हां मांझै कुंण एऊ संसारो दी आप्पू लै बडअ भारी ज्ञानी समझै, ता तै बणें मुख ताकि ज्ञानी बणीं सके। 19 किल्हैकि एऊ संसारो ज्ञान आसा परमेश्वरा लै मुखता, जिहअ पवित्र शास्त्रा दी लिखअ द आसा, कि "सह दैआ तिन्नां ज्ञानी-शास्त्रीए चुस्ति दी तिन्नां ही फसाऊई," 20 और तेखअ, "प्रभू हेरा तिन्नां ज्ञानी शास्त्रीए बचारे बारै जाणीं, कि तियां आसा गलत।" 21 ऐतै तैणी बोला, कि आदमी परेंदैं निं घमण्ड करी, किल्हैकि सोभ किछ आसा थारअ ई; 22 कै पौलुस, कै अपुल्लोस, कै कैफा, कै जगत, और कै जीऊणअ, कै मरणअ, कै आझ, ता कै काल्ला, सब किछ आसा थारअ 23 और तम्हें आसा यीशू मसीहे, और मसीह आसा परमेश्वरो।

### मसीह और प्रेरित

4 आदमीं लोळी हांम्हें मसीहे सेऊआ करनं आळै और परमेश्वरै तिन्नां गुप्त भेदे भण्डारी समझै। 2 तेखअ लोळी तेऊ भण्डारी दी अह गल शुद्धई कि सह विश्वासा करनं जोगी आसा कि नाई आथी। 3 पर मेरी नजरा दी आसा अह बडी होच्छी गल कि तम्हां माहूँओ कोई न्यायी मूँह परखे, पर हूँ निं आप्पू बी आपणीं परख करदअ; 4 किल्हैकि मुखा निं आप्पू दी कोही बी गला दी खोट धेछदी, पर ईहै करै निं हूँ निदोष हई सकदअ, किल्हैकि मूँह परखणें आळअ आसा मेरअ प्रभू। 5 ऐते तैणी आसा इहय कि, जेभै तैणीं प्रभू निं ऐछे, तेभै तैणीं निं कोही बी गल्लो फँसलअ करी; तेऊई रहैऊणीं न्हैरैए गल्ला प्रेशै दी, और मनां भीतरे बचार करनं प्रगट, तेभै हणीं परमेश्वरै तरफा का सोभीए प्रशंसा।

6 हे भाईयो, मणें की ईयां गल्ला तम्हां लै आपणीं और अपुल्लोसे चर्चा फेरै-घेरै करै, ताकि तम्हें हांम्हां का डाहे शीखळी कि, लिखै का आजू निं बढणअ आथी, और ऐकी दुजेए तरफदारी, और विरोधा दी निं घमण्ड करी।

7 किल्हैकि ताह दी, और दुजै आदमीं दी कुंण डाहा फरक? और ताह सेटा किजै आसा जुंण ताह होरी का निं भेटअ, जै कि सह तेऊ दुजै का आसा भेटअ द, तै किल्है करा ईहअ घमण्ड कि ज़ाळणअ कि तंणें निं कोही का मांगअ?

8 और तम्हें ता गए रज़ी, और साहकार बणीं, तम्हें किय हांमहां बिणहीं राज, पर भलअ हणअ त इहय कि हांमहें बी तम्हां संघे राज करदें। 9 मेरी समझा दी आसा कि परमेश्वर आसा हांमहें प्रेरित सोभी बाद तिन्नां लोगा जिहै बणाएँ दै जहा लै मौतें आज्ञा आसा हुई दी; किल्हैकि हांमहें आसा एऊ संसारा दी स्वर्गदूता, और मांहुं लै मजाक बणें दै। 10 हांमहें आसा मसीहा लै मुख, पर तम्हें आसा मसीहा दी बुद्धिमान; हांमहें आसा कमजोर, और तम्हें आसा जोरा आळै। थारी हआ ईजत-पत, और म्हारी नी हंदी किछै। 11 हांमहें आसा आझः तैणीं भुख्खै नचिशै, और नांगे, मारा खांदे लागे दै; 12 और आपणें हाथे ई जोरा जांहाणां करै करा काम। लोग बोला हांमहा लै बुरअ-बुरअ, और हांमहें दैआ तिन्नां लै आशीष; तियां करा हांमहां परदें जुलम, और हांमहें करा सैही। 13 तियां करा बदनंम, और हांमहें करा प्रार्थना(अरज)। हांमहें आसा आझः तैणीं एऊ संसारो शणेंअ और सोभी चीजे शणेंऊआ जिहै समझै दै।

### चतैनी

14 मंरें नि ईयां गल्ला तम्हां बेइजत करनें तैणीं आथी लिखी दी, पर आपणें प्यारै शोहरू समझी करै आसा तम्हां का लागअ द खोजदअ। 15 किल्हैकि जै मसीहा दी तम्हां का सखाऊणें आळै दस हजार बी हंदै, तैबी बी नि थारै आत्मिक बाब खास्सै आथी; और यीशू मसीहे सुसमाचारा दैणें करै हुअ हूँ थारअ आत्मिक बाब। 16 एते तैणीं करा हूँ तम्हां का अरज, कि मूँह जेही चाल चला(मूँह जिहै काम करा)। 17 एते तैणीं कि मंरें आसा तीमुथियुस, जुण प्रभू दी विश्वासा करणें आळै मांझै मेरअ सोभी का पैरअ आसा, सह तम्हां सेटा लै भेजअ द। तेऊ फरेऊणअ तम्हां का मेरअ मसीह दी (चाल चळण) चरित आद, जिहअ हूँ हर जैगा, और हर ऐकी कलिसिया दी प्रचार करा। 18 कोए ता ईहै सराहुए दै आसा कि, जाळणअ इन्नां नि मेरी जरूत ई आथी। 19 पर प्रभू जै चाहे तै एछणअ मूँह तम्हां सेटा लै छेकै, और तिन्नां सराहुए दै आदमीए गल्ला नि बल्कि, तिन्नें शगती जाणदअ। 20 किल्हैकि परमेश्वरो राज नि गल्ला दी आथी, बल्कि सामर्थ और शगती दी आसा। 21 तम्हें कै चाहा? कि हूँ तम्हां सेटा लै शोतै पाई ऐछुँ, कि झीणें और प्यारे आत्मा संघे?

### कलीसिया दी कंजरी गला

5 इहय लागअ शुळणां लै ऐछदअ कि तम्हें लाअ व्यभिचार करी, इहय व्यभिचार जुण होरी जाती बिचै बी नि इहय हंदअ, कि शोहरू डाही आपणें बाबे लाळी आप्पू लै। 2 तम्हें नि तेऊ ईहै कामां करनें आळै आप्पू बिचा का काढेदें आथी, तेतो दुख (शोक) ता नि तम्हां हंदअ ई आथी, पर तम्हें करा तेतो घमण्ड। 3 हूँ शरीरा का ता आसा त तम्हां का दूर, पर आत्मा दी ता आसा तम्हां संघे, और जिहअ जाल्हीआं त कि ईहै कामां करनें आळै बारै आसा हेरी दी मंरें अह आज्ञा देई, 4 जेभै तम्हें और मेरी आत्मां, म्हारै प्रभू यीशू मसीहे सामर्था संघे कठा होए, ता इहय आदमीं म्हारै प्रभू यीशू मसीहे नाओंआं संघे, 5 दैणअ एऊ शरीरा नाश हणें तैणीं शताना सेटा लै, ताकि तेऊए आत्मां प्रभू यीशूए धेळी मोक्ष भेटी सके।

6 थारअ घमंड करनें नि ठीक आथी, कै तम्हें इहय नि जाणदें आथी कि थोळअ जिहअ सजेळअ सका सारै मुछे दै पीठै सजेळअ बणाई। 7 पराणै सजेळै फेंका पोही, और आपणें आप्पू करा साफ, और नऊँरें मुछेदें पीठै जिहै बणां, ताकि तम्हें बिणहीं सजेळे हआ। किल्हैकि म्हारअ बी आसा फसह जुण यीशू मसीह आसा, कुरबान हुअ द। 8 ऐछा हांमहां मनाओणअ पब, और मौज करनीं, नां तेऊ पराणें सजेळे संघे, और नां बुरै कामां संघे, नां दुष्टते खमीरा संघे, पर सीधी सच्चाई और बिणहीं सजेळे रोटी संघे।

9 मंरें आसा तम्हां लै आपणी चिठी दी लिखअ द कि, भ्यभिचारा करनें आळै आदमीए साथ नि करी आथी। 10 हूँ नि इहय बोला कि, तम्हें एऊ संसारे व्यभिचारी, या लाळची, या बुरै करनें आळै, और मूर्ति पूजणें आळैए नि साथ ई करी, जै तम्हें इहय करे तै लागणअ तम्हां एऊ संसारा का निखळण ई। 11 पर मेरअ बोळणेंओ मतलब आसा इहय कि, जै कुण तम्हां बिचै विश्वासी भाई हई करै बी, भ्यभिचारी, लाळची, या मूर्ति पूजणें आळै, या गाळी गळोच बकणें आळै, पियकड, या बुरै करनें आळै होए, ता तिन्नें साथ नि करी आथी, इन्नां ईहै आदमीं संघे नि रोटी बी खाई। 12 किल्हैकि मूँह

बाघलैओ फेंसलअ करनेंओ किजै फायदअ? कै तम्हें भीतरा आळैओ फेंसलअ नि करदें? 13 पर बाघलैओ फेंसलअ करा परमेश्वर और तम्हें काढा ऐऊ कुकर्मि आप्पू बीचा का पोही।

### मसीह दी झगळै

6 कै तम्हां मांझै कहा का आसा हैअ कि, जेभै कहा दुजे संघे झगळअ हुअ और, फेंसलै करदें पवित्र लोगा छाडी नाठै बाघलै अधर्मी लोगा सेटा लै? 2 कै तम्हें नि जाणदें आथी कि पवित्र लोगा करनें एऊ संसारो फेंसलअ? कै तम्हें होछे-होछे झगळैओ फेंसलै करनें जोगी बी नि आथी? 3 कै तम्हें नि जाणदें कि हांमहां ई करनें स्वर्गदूतो फेंसलअ बी? तै कै हांमहां संसारिक गल्लो फेंसलअ नि करनें आथी? 4 जै तम्हां संसारिक गल्लो फेंसलअ करनें होए, ता तम्हें तियां आदमीं फेंसलै करदें बशैळनै जहा आदमीं कलिसिया दी किछ भी नि समझदें आथी? 5 मंरें लाई अह गल तम्हां लै तै बोली ताकि तम्हां शरम ऐछे, कि सच्ची तम्हां मांझै एक बी आदमीं नि बुद्धिमान आथी, जुण आपणें भाईयो फेंसलअ करी सके? 6 तम्हां विश्वासी भाई-भाई दी हआ दाऊअ-दालत, और सह बी तिन्नें सहनै, जुण अविश्वासी आसा।

7 पर सच्ची आसा तम्हां दी अह बडअ दोष कि तम्हें करा आप्पूई मांझै झगळै। तम्हें जुल्मा सैहंदै किल्है नि आथी? और आपणअ घाटअ किल्है नी सहंदें आथी? 8 पर तम्हें ता आप्पूई करा गळत और आप्पू लै हानि पजैळा और सह बी आपणें भाई लै। 9 कै तम्हें नि जाणदें आथी कि, बुरै करनें आळै लोग नि परमेश्वरे राज्ये वारिस बी हणें आथी? धोखअ नि खाई भाळै, जुण ईयां ईहै लोग हणें, जिहै वैश्यगामी, मुतिपुजा करनें आळै, होरीए बेटळी डाहणें आळै, लुचचै, पुरुषगामी, 10 चोर, लोभी लाळची, पियकड, गाळी बकणें आळै, बुरै कामां करनें आळै, परमेश्वरे राज्ये वारिस नि हणें आथी। 11 और तम्हां मांझै केतरै आसा तै ईहै ई, पर तम्हें प्रभू यीशू मसीहे नाऊंआं संघे, और म्हारै परमेश्वरे आत्मां संघे धोए, और पवित्र और धर्मी हुए।

### देह आसा परमेश्वरे महिमा लै

12 ईयां सारी चिजा मुल्है ठीक ता आसा, पर सोभै चिजा फायदे नि आथी; सोभै चिजा मुल्है ठीक ता आसा, पर मूँह नि कोही बी गले अधीन हणअ आथी, जेता करै मेरअ घाटअ हआ। 13 रोटी आसा पेटे तैणीं, और पेट आसा रोटीए तैणीं, पर परमेश्वरा करनीं ईयां दुहै गल्ला नाश। अह शरीर नि भ्यभिचारा करना लै आथी, अह आसा प्रभुए तैणीं, और प्रभू आसा शरीरे तैणीं। 14 परमेश्वरै किय आपणीं सामर्था करै प्रभू जिऊंदअ, और हांमहें बी करनें तेऊ जिऊंदै। 15 कै तम्हें नि जाणदें कि थारअ शरीरा आसा मसीहे अंग? तै तेखअ हूँ मसीहे अंग पाई, तेहा वैश्यो अंग बणाऊं? बिलकुल बी नि। 16 कै तम्हें नि जाणदें कि जुण वैश्या संघे रहा, सह हआ तेहा संघे जिहअ एक शरीर? किल्हैकि लिखअ द आसा कि, "तियां दुई हणें एक तना।" 17 और जुण प्रभुए साथ करा, सह हणअ प्रभू संघे एक आत्मां। 18 भ्यभिचारा का रहा बची, और जुण पाप आदमी होर करा, तियां आसा शरीरा का बागै, पर भ्यभिचारा करनें आळअ आदमी करा आपणें ई शरीरे खलाफ पाप। 19 कै तम्हें नि जाणदें कि थारअ शरीर आसा पवित्र आत्मां मांदर, और जुण तम्हां दी आसा बसअ द और तम्हां आसा परमेश्वरा का भेटअ द; और तेखअ तम्हें तेऊए आपणें नि आथी? 20 किल्हैकि तम्हें आसा किम्मत देई करै प्रभू लूए दै, तै बोला हूँ तम्हां लै कि ऐऊ आपणें शरीरा करै करा परमेश्वरे महिमा।

### बैहे बारै सुआल

7 तिन्नां गले बारै जुण तम्हां लै लिखी, अह गल आसा ठीक कि पराई स्त्री नि लोळी मर्धे छुँहीं। 2 पर भ्यभिचार नि लोळी बेटळी बी कीय, और नां लोळी मर्धे कीय, भ्यभिचारे डरा का लोळी सोभी मर्धे लोळी आपणीं-आपणीं लाळी हुई, और सोभी बेटळीए लोळी आपणें-आपणें लाळै हुए। 3 लाळी लोळी आपणें लाळैओ हक पुरअ कीय, और लाळै लोळी आपणीं लाळीओ हक पुरअ कीय। 4 लाळी लै नि आपणीं देही दी हक आथी, पर तेसरी देहा दी आसा तेसरै लाळैओ हक; और तिहअई आसा लाळै लै बी कि

तेऊ लै बी निं आपणीं देही दी हक आथी, तेऊए देही दी आसा तेऊए लाळीओ हक। 5 तम्हें निं ऐकी दुजै का जुदै रही; पर सिधअ थोळै बगता लै, आप्पू मांझै सैहमती दी सका जुदै हई, ताकि प्राथणां करना लै किछ बगत भेटी सके, और तेखअ रहै भी संघा, इहय निं हआ कि थारै असंयमें बजहा ऐछे शतान तम्हां परखदअ। 6 पर जुण हूँ तम्हां लै बोला, अह आसा सीधी मेरी मरजी, अह निं मेरअ हुकम आथी। 7 हूँ चाहा त इहय कि जिहअ हूँ आसा, तिहई लोळी तै सोभ आदमीं हुरे; पर हर आदमीं लै आसा परमेश्वर जुदअ-जुदअ बरदान दैनअ द, कोई लै कोई रंगो, ता कोई लै कोई रंगो।

8 पर हूँ बोला तिन्नां लै जुंणी बैह निं आथी किय द, और जुंण विधवा बेटळी आसा, तिन्नां लै आसा इहयई रहणअ ठीक, जिहअ हूँ आसा। 9 पर जै तियां संयम निं करी सकदै, ता तै लागा तिन्नां बैह करनअ, किल्हैकि बैह करनअ आसा कंझरनै हणै का बितअ।

10 और जसरअ बैह हई आसा गअ द, तिन्नां लै निं हूँ बोलदअ आथी, तिन्नां लै दैआ प्रभू आप्पेई आज्ञा कि, लाळी निं आपणीं लाळै का दूर रही 11 और जै तियां जुदै बी होए, ता तेखअ लोळी तियां बिणां बैह किए रहै, और नाई ता लोळी तै सोभी आपणीं लालै संघे मेळ-जोळ कीय, और नां लाळै लोळी आपणीं लाळी छाडी।

12 और होरी का निं प्रभू बोलदअ पर हूँ बोला, कि जै कसा भाईए लाळी विश्वास निं करदी होए, और तेऊ संघे रहणां लै आसा होए सह खुश, ता सह निं तैहा छाडी। 13 और जै कसरअ लाळअ विश्वास निं करदअ होए, और तैहा संघे रहणां लै आसा सह खुश, ता सह निं तेऊ छाडी। 14 और इहय लाळअ जुंण विश्वास निं करदअ आथी, ता सह हआ तैहा आपणीं लाळीए बजहा पवित्र ठहराऊअ द; और ऐही लाळी जुंण विश्वास निं करदी होए, ता सह हआ तेऊ लाळे बजहा पवित्र ठहराऊई दी; और जै इहय निं हंदअ त ता तै हणै तै थारै शोहरू माठै अपवित्र, पर ऐबै आसा पवित्र। 15 पर जै कुंण मर्ध विश्वास निं करदअ, और अलग रहा होए, ता तेऊ दै अलग रहणै, ऐही स्थिति निं कोहै भाई बैहण बंधना दी आथी। परमेश्वर आसा हाम्हें मीळद-जुळद शदै दै। 16 शुण स्त्रीए, तूह कै जाणा कि तूह कै आपणीं लाळैओ मोक्ष सका कराऊई? और शुंण मर्धा, तूह कै जाणा कि तूह आपणीं लाळीओ मोक्ष कराऊई सका?

### परमेश्वर शदणें साबै हांदा

17 जिहअ प्रभू सोभी लै आसा बांडअ द, और जिहै प्रभू सोभै आसा शदै दै, तियां रहा तिहई तेथ चलदै लागी। हूँ बोला सोभी कलिसीया दी इहयई। 18 जुंण खतनअ किय द शदअ द होए, सह निं बिणहीं खतनैओ बणीं। और जुंण बिणहीं खतनै आसा शदअ द, सह निं खतनअ कराऊई। 19 नां खतनअ करनै आळअ किछ आथी, और नां सह बिणहीं खतनैओ किछ आथी, पर परमेश्वर आज्ञा मनणीं ई आसा सोभ किछ। 20 हर एक आदमीं जेही बी स्थिति दी शदअ द होए, सह ऐछे तिहअई। 21 जै तूह गुलामीं स्थिति शदअ द होए, ता चिंता निं करी; पर जै तूह गुलामीं का आज्ञाद हई सका ता तूह कर तिहअ ई। 22 किल्हैकि जुंणीं आदमीं गुलामीं स्थिति दी प्रभू दी विश्वास आसा कीय द, सह आसा प्रभू आज्ञाद कीय द। और तिहअ ई जुंण आज्ञाद हई करै आसा शदअ द, सह आसा प्रभू यीशू मसीहो गुलाम। 23 तम्हें आसा किम्मत दैई करै लरे दै, तम्हें आदमीं गुलाम नी बणीं आथी। 24 हे भाईयो जुंण जेही स्थिति दी शदअ द आसा, सह रहै तिहअ ई परमेश्वर विश्वासा दी बणीं।

### कुंआरी शोहरी और विधवा बेटळी

25 कुंआरी शोहरी बारै निं मूह प्रभू का कोहै आज्ञा भेटी आथी, पर विश्वासा जोगी हणै लै जेही दैया प्रभू मुल्है की, तिहई करै दैआ हूँ सम्मति। 26 मेरी समझा आसा अह ठीक कि आज्ञा काळा दुख मुसीबते बजहा आदमीं जिहअ आसा तिहअ ई रहै। 27 जै तेरी लाळी आसा ता तैहा का जुदै हणैए कोशिश निं करी; और जै तारखा लाळी नाई आथी, ता लाळी लोळदअ निं लागी। 28 पर जै तूह शादी बी करे, ता तैबी निं किछे पाप आथी; और जै कुंआरीओ बैह हणअ बी निं पाप आथी, पर इन्नां ईहै हणअ शारीरिक दुःख, और हूँ चाहा ऐता का बचाऊणअ। 29 हे भाईयो हूँ बोला इहय कि अह बगत

आसा कम कीय द, और इहय आसा कि जहा का लाळी आसा, तियां समझा इहय कि हाम्हां का निं आथी; 30 और लेरनै आळै लोळी इहय जाणअ इयां निं लेरदै आथी; और जुंण खुश आसा, तियां समझा इहय कि खुश निं आथी; और किम्मता लणै आळअ समझै इहय कि, हाम्हां का निं कीछ बी आथी। 31 और ऐऊ संसारा संघे बभारा करनै आळै लोळी ईहै कि तियां ऐऊ संसारे न होए; किल्हैकि ऐऊ संसारे रिती रबाज रहा बदळदै।

32 और हूँ चाहा त इहय कि, तम्हां निं कोई फिकर लोळी हुई। बिणहीं शादीए मर्धा रहा प्रभुए गल्लो फीकर, कि प्रभू किहअ करै डाहणअ खुश। 33 और जुंण हआ शादी शुधा आदमीं, तेऊ हआ संसारे गल्लो फीकर कि आपणीं लाळी किहअ करै डाहूँ खुश। 34 शादी शुधा बेटळी, और बिणहीं शादीए बेटळी दी बी आसा भेद; बीह्नीं शादीए बेटळी रहा प्रभुए फीकरा दी तै कि, हूँ लोळी ती शरीरा का बी पवित्र रही और आत्मा का बी पवित्र रही, पर सह शादी शुधा बेटळी रहा संसारे फीकरा दी कि मूह त आपणअ लाळअ खुश डाहणअ। 35 हूँ बोला इन्नां गल्ला थारै ई फायदै लै, ना कि तम्हां फसाऊणा लै, पर ऐतै तैणीं कि जुंण काम शोभा दैआ ताकि तम्हें तिहअ ई काम करा, और तम्हें एक चित हई करै रहे प्रभू भगती दी लागी।

36 जै कुंण इहय समझे कि मरें लाअ तेसा आपणीं कुंआरी शोहरीओ हक मारी जसरी जुआनिं ढळी आसा चाली दी, और जै जरूरत बी होए ता, जिहअ चाहे तिहअ ई करै, ऐथ निं किछे पाप आथी, ता सह दैरे शादी हणै। 37 पर जै जुंण मना का अटल मजबूत रहे, और तेऊ शादीए जरूरत नाई होए, और सह आपणीं इछा दी रोक डाहा होए, और आपणीं मना दी पाकी बान्है कि मूह निं आपणीं शोहरीए शादी करनीं आथी, ता सह करा ठीक। 38 और जै कुंण शादी करा होए, सबी करा ठीक और जै कुंण शादी नाई भी करदअ होए सबी करा ठीक।

39 जेभै तैणीं कहा बेटळीओ लाळअ जिऊंदअ हआ, ता तेभै तैणीं आसा सह तेऊ का बंधी दी; पर जै तेसरअ लाळअ मरी जाए ता तेखअ सका सह बेटळी जहा संघे चाहे तेऊ संघे शादी करी, पर सीधी प्रभू दी। 40 पर जै जेही सह आसा होए, और तेही ई रहे ता मेरै बचारा दी आसा सह होर भी बधिया, और धन्य; और हूँ जाणा बी कि परमेश्वर आत्मां आसा मुखा बी बसी दी।

### मुर्ति दी चढाऊई दी खाणें चिजा

8 एबै मुर्तिए सहनै बळी की दी चिजे बारै खोजुं हूँ— हाम्हें जाणा इहय कि हाम्हां सोभी का आसा ज्ञान। पर ज्ञाना संघे हआ घमण्ड पैदा, और प्यारा संघे हआ तरकी। 2 जै कुंण इहय समझे कि हूँ हेरा जाणी, पर इहय निं तेऊ पतअ आथी कि जिहअ तेऊ जाणअ लोळी त, तिहअ निं सह मैची तैणीं जाणदअ आथी। 3 पर परमेश्वर बछेणां तेऊ आदमी, जुंण परमेश्वरा संघे प्यार करा।

4 एबै लाअ मरें तम्हां का मुर्तिए सहनै बळी की दी चिजे बारै खोजी कि हाम्हां का आसा थोघ कि मुर्ति निं ऐऊ संसारा दी किछे चीज आथी, और ऐकि छाड्ही नी होर कोहै परमेश्वर आथी। 5 सरगै और जमीना दी खोजा खाससै परमेश्वर, 6 तैबी आसा हाम्हां लै ऐकैई परमेश्वर; मतलब पिता जुंणी सोभै चिजा आसा बणाई दी, और हाम्हें आसा तेऊई लै। और एक ई आसा प्रभू, मतलब यीशू मसीह, जसा करै इयां सोभ चिजा हुई, और हाम्हें बी आसा तेऊए ई बजहा।

7 पर सोभी का निं अह ज्ञान आथी, पर कोए ता खाआ मैची तैणीं बी मुर्ति सेटा चढाऊई दी चिजा किजै खास समझी करै, और तिन्नां मुर्ति ई मना आपणअ प्रभू और तिन्नां विवेक हआ कमजोर हणै बजहा अशुधा। 8 रोटी निं हाम्हा परमेश्वरा सेटा पजैळदी। और जै हाम्हें रोटी नाई बी खाए, तैबी निं म्हारअ किछे घाटअ हणअ आथी, और खाई करै निं किछे नफअ चालअ हई। 9 पर चतैन रहा; किधी इहय निं लोळी हुआ कि, थारी अह अजादी तिन्नां कमजोरा आदमी लै टोहळे बजहा हआ। 10 किल्हैकि जै कुंण ताह ज्ञानी मुर्तिए मांदरै रोटीं खांदअ भाळे और सह भाळणै आळअ विश्वासा दी कमजोर होए, तै तेऊबी कै मुर्ति सहनै बळी की दी चिजा खाणेंओ साहस निं हणअ? 11 ईहै करै ता सह भाई जुंण विश्वासा दी कम आसा, और जसरी तैणीं यीशू आपणीं ज्ञान दैनीं, सह भाई बी हणअ नाश। 12 इन्नां ईहै कामां करी करै करा

तम्हें, तिन्नां भाईए खलाफ अपराध, और तिन्नें कमजोर बुधि हणेंए बजहा हआ तियां विश्वासा दी कम, और ईहै करै करा तम्हें यीशू मसीहे खलाफ बी अपराध।<sup>13</sup> जै मेरै भाई मेरै खाणेंए बजहा ठोहळ लागे ता हूँ नि कधि शिखा खाऊँ, और नां मूँह आपणें भाई लै ठोहळो कारण बळणअ आथी।

### प्रेरिते अधिकार और कर्तव्य

9 हूँ कै आजाद नि आथी? और हूँ कै प्रेरित नि आथी? कै मरें यीशू मसीह जुंण म्हारअ प्रभू आसा सह भाळअ नि आथी? तम्हें कै मरें नि आथी प्रभू दी बणांएँ दै? 2 हूँ होरी लै प्रेरित बेशक नां होए पर तम्हां लै ता आसा; किल्हैकि तम्हें आसा प्रभू दी मेरी प्रेरीताईए छाप।

3 जुंण मूँ परखा, तिन्नां लै आसा मेरअ अहैई उत्तर। 4 कै हांम्हां लै खाणें-पीणेंओ अह हक नि आथी? 5 कै हांम्हां लै अह हक नि आथी कि, कहा विश्वासी बेहणें शादी करी तेहा संघे फिरे, और जिहै ईयां होर प्रभुए भाई और कैफे करा? 6 कि सिधअ मुल्है और बरनबासा ई लै नि आथी, कि हांम्हें दैआ कमाई करनी छाडी। 7 कुंण करा आपणें घरा का खाई करै सपाहीओ काम? और कुंण नि सेओए बगीचे लाई करै तेतो फळ खांदअ आथी? और कुंण नि गाऊई घाची करै तेतो दुध झुटदअ आथी?

8 हूँ कै इन्नां गला आदमीए ई रिती दी बोला? 9 व्यवस्था बी कै इहयई नि बोलदी आथी? किल्हैकि मूसा नबीए व्यवस्था दी आसा लिखअ द कि, "हळे जुंढे दै हांढदैं बळदो मूँह नि बान्हीं आथी।" परमेश्वर कै सिधअ बळदोई फिकर करा? 10 कि खास करके म्हारी फिकर करा? हाँ हांम्हां ई लै आसा लिखअ द, किल्हैकि ठीक आसा इहय कि जुंढणें आळअ जुंढे आशा संघे, और दौवनै आळअ दौवै हेसेदार हणेंए आशा दी। 11 हांम्हें ता थारी तैणीं आत्मिक चिजा बऊई, तै अह कै बडी गल आसा कि हांम्हें थारी शरीरिक चिजे फसल काटे? 12 जै होरीओ तम्हां दी हक आसा, तै म्हारअ कै अह हक तेता का जादअ नि आथी? पर हांम्हें नि एसा गला हक जताऊअ हांम्हें रहै सोभ किछ सैहंदै, ताकि म्हारी बजहा मसीहे सुसमाचारा दी कोई रुकाबत नां होए। 13 तम्हें कै जाणदैं नि कि जुंण मांदरै सेऊआ करा, तियां खाआ मांदरा ई का, और जुंण वेदीए सेऊआ करा, तियां हआ तैहा वेदीए हकदार? 14 इहयई आसा प्रभू बी बोलअ द कि जुंण लोग सुसमाचार शणाऊणें आळै आसा तिन्नें जिऊण आसा सुसमाचारा ई का।

15 पर मरें नि ऐता मांझै एक गल बी की, और मरें नि ईयां गला ती आथी लिखी दी कि मेरी तैणीं लोळी इहय कीय, जै कुंण मेरै घमंडा व्यर्थ ठहराऊए, ता तै आसा मेरअ मरणअ ई ठीक। 16 जै हूँ सुसमाचार शणाऊँ, ता अह नि मुल्है किछे घमंडे गल आथी, किल्हैकि अह काम ता मुल्है जरूरी आसा, जै हूँ सुसमाचार नि शणाऊँ, ता तै आसा मुल्है लानत। 17 किल्हैकि जै हूँ आपणों मरजी करै करा ता मूँह भेता तेते मजदूरी और जै आपणों मरजी करै नि करदअ, ता तैबी आसा भडारा आळअ बणाअ द। 18 ता मेरी मजदूरी कुंण जह्नीं आसा? अह कि सुसमाचारा शणाऊणें लै दैऊँ मसीह सुसमाचार संत मंत करी, ऐतरअ कि जुंण सुसमाचारा दी मेरअ हक आसा, तेता बी नि हूँ आपणें कामां दी पूरअ आणू?

19 सोभी का आजाद (स्वतंत्र) हणें का बाद बी रहअ हूँ सोभीओ गुलाम बणीं करै, ताकि हूँ खाससै आदमीं तीणीं सकूँ। 20 हूँ बणअ तिन्नां यहूदी लै यहूदी, ताकि हूँ तिन्नां यहूदी आणी सकूँ। और जुंण व्यवस्थे गुलाम आसा तै तिन्नां लै हूँ बबस्थो गुलाम नाई हई करै बी बणअ हूँ तिन्नें तैणीं व्यवस्थो गुलाम, ताकि हूँ तिन्नां व्यवस्था का बापस आणीं सकूँ। 21 हूँ जुंण परमेश्वर व्यवस्था का हीन नि बल्कि, परमेश्वर बबस्थो गुलाम आसा, पर हूँ तिन्नें तैणीं जुंण परमेश्वर व्यवस्था दी नाई आथी तै, हूँबी बणअ तिन्नां जिहअ ताकि हूँ तिन्नां बी परमेश्वर विश्वासा दी आणीं सकूँ। 22 हूँ बणअ कमजोरा आदमीं लै कमजोर आदमीं, ताकि तिन्नां बी हूँ विश्वासा दी आणीं सकूँ, हूँ बणअ सोभी आदमीं लै सब किछ, कि किछू बी तरिके करै हूँ एकी लै बी उधदार कराऊई सकूँ। 23 मरें आसा लाअ द अह सभ किछ सुसमाचारे तैणीं करी, ताकि हूँबी तिन्नां होरी संघे तेतो साथी बणू।

### मसीही तुहर

24 तम्हां का थोघ बी आसा कि नाई, जेभै तुहरा दी तुहरा सोभ तुहरनै आळै, पर नांम नियां ऐकै ही आदमी? तम्हें तुहरा तिहैई ताकि जीतीं सके। 25 सोभ पैहलवान करा सोभी चीजो फरेज, ताकि तियां तेऊ मुरझाऊणें आळै मुकटा जीतीं सके, पर हांम्हें करा तेऊ मुकटे तैणीं मँथ जुंण कधी नी मुरझाऊणें आळअ आथी। 26 तैहीता हूँ बी तुहरा एऊई तरिके करै, पर बिणहीं लक्ष्य नि हूँ तुहरदअ, हूँबी हआ एऊ तरिके नशाणें लांदअ लागअ द, पर तेऊ जिहअ नि जुंण बिणहीं नशाणें हआ नशाणें लांदअ लागअ द। 27 पर हूँ करा आपणों देहा आपणें बशा दी; किधी इहय नि हआ कि हूँ हआ लागअ द होरी लै प्रचारा करदअ और आप्पू हआ हूँ गलत।

### इस्त्राएले बितै जमानें का चतैनगी

10 हे भाईयो हूँ नि चाहंदअ कि तम्हें एसा गला का नजाण रहे कि म्हारै सारै बाब-दादै रहा तै बादळा हेठै, और तियां गृए सोभ समुंदरा बिची पार टपी; 2 और तिन्नें सोभी लअ बादळा दी और समुंदरा दी मुसा नबीओ बपतिस्मअ; 3 और तिन्नें सोभी खाई ऐकैई आत्मिक रोटी; 4 और सोभी जह्नें झुटअ ऐकैई आत्मिक पाणी, किल्हैकि तियां झुटा तै तेसा आत्मिक चट्टाना का, जुंण तिन्नां संघे चला और सह चट्टान आसा ती यीशू मसीह। 5 पर परमेश्वर नि तिन्नां मांझै कई का खुश हुअ आथी, और तैही हुए तियां जंगला दी खतम।

6 ईयां गला हुई हांम्हां लै सीख लणा लै, कि जिहअ इनै लाळच किय, तिहअ नि हांम्हां बी लागदअ बुरी चिजो लाळच करनअ; 7 और नां तम्हें मुतिए पुजा करनै आळै बणीं, जिहै तिन्नां मांझै बी बणें तै, जिहअ पवित्रशास्त्रा दी लिखअ द आसा कि, "लोग उझुए खांदै-पिंदै और नाचदैं-खेलदैं।" 8 और ना तम्हें भ्यभिचार करी, जिहअ तिन्नां मांझै बी कइए कीय; और तियां मूँएँ एकी धैळी भितरी तरेई हज्जार आदमीं। 9 और नां प्रभू परखदैं लागी, और जिहै तियां बी परखदैं लागें तै, और तियां कीए तै सापां (कीळै) संघे खतम। 10 और नां तम्हें कळकळांदै लागी, और जिहै तियां भी कळकळाऊए तै, ता तियां दैनै तै तिन्नें खतम करनै आळै खतम करी। 11 पर ईयां सोभै गला, जुंण तिन्नां लै पळी, तियां पळी दुशटांते रिती संघे, पर ईयां आसा चतैनगीए तैणीं हांम्हां लै तेभै तैणीं लिखी दी जेभै तैणीं एऊ संसारो अंत नि होए। 12 और जुंण इहय जाणा कि हूँ आसा बिलकुल सिधअ टेकअ द, सह डाहै धैन, किधी इहय नि हआ कि तूह पळा ढेका। 13 तम्हें नि ऐही मुसीबता दी पळी आथी जेता आदमीं सैही ई नि सकदअ। परमेश्वर आसा सचअ, जेतरी मुसीबत तम्हें सैही सका, तेता का जादी मुसीबत नि दैदअ तम्हां परदैं पळणें, बल्कि मुसीबता करा सह कम, ताकि तम्हें तैहा मसीबता सैही सका।

### मुति पुजे खलाफ चतैनगी

14 और हे मेरै भाईयो, मुतिपुजा नि करी, तेता का बी रहै तम्हें बचदैं। 15 हूँ समझा तम्हां बुध्दिमान और तम्हां लै बोला, कि जुंण हूँ बोला, तेता करा परखी। 16 सह धन्यबादो कटोरअ, जहा लै हांम्हें धन्याबाद करा, कै सह यीशू मसीहे लोहूए सहभागिता नि आथी? और जहा रोटी हांम्हें चोळा, कै सह यीशू मसीहे देहीए साझ नि आथी? 17 और तैही, जै एक ई रोटी आसा, ता तै हांम्हें जुंण खाससै आसा हांम्हें बी आसा एक ई देह, किल्हैकि हांम्हें आसा सोभ तैहा एकी ई रोटीए साझैदरा। 18 जुंण शरीरा का ता ईस्त्राएली आसा तिन्नां भाळा; कै बलिदानां खाणें आळै वेदीए साझ नि आथी? 19 ता तेखअ हूँ कै बोला? इहय कि मुतिं दी चढाऊअ द बलिदान आसा किजै, कि मुतिं आसा किजै? 20 पर नां, इहय आसा कि जुंण होरी जातीए लोग जुंण बलिदान करा, तियां नि परमेश्वरा लै करदैं आथी, पर तियां करा दुशटात्मं लै, और तियां नि जाणदैं आथी कि हांम्हें आसा दुशटात्मं साझू (साथी)। 21 तम्हें प्रभुए कटोरै और दुशटात्मं कटोरै दुही मांझै नि झुटी सकदैं। तम्हें प्रभुए थाळू, और शतानें थाळू दुहीए हकदार नि हई सकदैं। 22 कै हांम्हें प्रभू लै रोश फरेऊआ ऐ, हांम्हें कै तेऊका जादैं जोरा आळै आसा?

### सोभै गला परमेश्वरे महिमा लै

23 सोभ चीजा मुल्है ठीक ता आसा, पर सोभै फायदे निं आथी; सोभ चिजा मुल्है ठीक ता आसा, पर सोभी चिजा संघे तरक्की नी आथी।  
24 आपणीं भलाई निं भाळणीं आथी, बल्की दुजेए भलाई भाळणीं। 25 जुंण कसाई सेटा बिका तेऊ लाग़ा खांदे विवेके वजहा निं किछे पुछा?  
26 “किल्हैकि धरती और तेतै भरपूरी आसा प्रभुए।” 27 जै कुंण अबिश्वासी तम्हां लै छंदअ दैए, और तूह नाशै च़ाए; ताह तिधी ताल्है जिहअ खांणें लै दैए ता तूह खाए तेताई, और विवेके बजहा निं किछे पूछी। 28 पर जै ताल्है कुंण इहय बोले, कि अह ता मुर्ति लै बळी की दी चीज आसा, ता तेता निं तूह खाई। 29 मेरअ मतलब मेरी बुद्धि निं, पर तेऊ दुजैओ भलअ, मेरी अजादी दुजे वचारा संघे किल्है लोळी परखी? 30 जै हूँ धन्याबाद संघे साझू हआ, ता जहा दी हूँ धन्याबाद करा तेऊए बजहा मेरी बदनामी किल्है हआ?  
31 ऐतै तैणीं तम्हें च़ाए खाआ, च़ाए पीया, च़ाहै किछ बी करा, पर करा सिधअ सब किछ परमेश्वरे महिमा लै ई। 32 तम्हें नां यहूदीए, और नां यूनानींए लै और ना परमेश्वरे कलीसिया लै तोहळे बजहा बर्णी आथी 33 जिहअ हूँबी सोभी, सभी गला दी खुश डाहा, और आपणअ फायदअ निं, बल्कि हूँ लोळा होरीओ फायदअ ताकि तियां उध्दार पाई सके।

11 तम्हें च़ला मुँह जिहै, जिहअ हूँ मसीहे च़ाला दी च़ला।

### नागें मुँडे परमेश्वरे आराधना निं करनी

2 हे भाईयो, हूँ सराहा तम्हां, ऐतै तैणीं कि तम्हें करा मुँह सोभी गला दी आद; और जुंण रिती रबाज मंए तम्हां का सभाळें दै आसा, तम्हें करा तेतो बी पाळन। 3 पर हूँ च़ाहा कि, तम्हें लआ ज़ाणी कि हर ऐकी मर्धो मूंड आसा यीशू मसीह, और बेटळीओ मूंड आसा मर्ध, और मसीहो मूंड आसा परमेश्वर। 4 जुंण मर्ध आपणअ मूंड दोपी करै प्राथणां या भबिश्वाबाणीं करा, ता सह करा आपणें मूंडे बेईजती। 5 और जुंण बेटळी नागें मुँडे प्राथणां या भबिश्वाबाणीं करा, सह बी करा आपणें मुँडे बेईजती, किल्हैकि सह आसा गंजै हणें बराबर। 6 जै बेटळी धातू निं लाए, ता तैहा लाग़ा आपणें बाळ बी काटणें, जै बेटळी लै बाळ काटणें शरमें गल आसा, ता तै लाग़ा तैहा धातू डाहणअ बाहीं। 7 और हाँ मर्धा निं लाग़दअ आपणअ मूंड बुदरणअ, किल्हैकि सह आसा परमेश्वरो स्वरूप और महिमा; पर बेटळी आसा मर्ध महिमा। 8 किल्हैकि मर्ध निं आथी बेटळी का हुअ द, पर बेटळी आसा मर्धा का हुई दी; 9 और मर्ध निं बेटळी लै बणांअदअ आथी, बल्कि बेटळी आसा मर्धा लै बणाई दी। 10 और स्वर्गदूतै बजहा आसा बेटळी लै इहय ठीक कि सह आपणअ हक आपणें मूंडा दी डाहे। 11 तैबी निं प्रभू दी, नां ता बेटळी बिणहीं मर्ध, और नां मर्धा बिणहीं बेटळी आथी। 12 किल्हैकि जेही बेटळी मर्धा का आसा, तिहअई आसा मर्ध बी आसा बेटळी संघे; पर सोभ चिजा आसा परमेश्वर ई बणाई दी। 13 तम्हें करा आप्पूई बच़ार भाळें, कि बेटळी नागें मुँडे प्राथणां करदी शोभा दैआ कि नाई? 14 तम्हें एही बी निं समझदै आथी कि मरधा लै निं लाम्मैं बाळ ठीक हंदै। 15 पर जै बेटळी लाम्मैं बाळ डाहे, ता तेसरी आसा तेता संघे शान, किल्हैकि बाळ आसा तैहा लै धातु लाणां लै दैनें दै। 16 पर जै कोई विवाद करनअ च़ाहे, ता इहय लए ज़ाणी कि नां म्हारी और नां परमेश्वरै कलीसिए रिती ऐही आथी।

### प्रभू भोजे बारै

(मत्ती 26:26-29; मरकुस 14:22-25; लूका 22:14-20)

17 पर ऐहा आज़ा दैन्दा बारी निं हूँ तम्हां सराहंदअ आथी, ऐतै तैणीं कि थारै कठा हणें करै निंसी भलाई हूई बल्कि उल्टी लागी हानि हंदी। 18 किल्हैकि पैहलै ता मंए इहय शुणअ कि, जेभै तम्हें कलिस्सीया दी कठा हआ, ता तम्हां दी हआ फूट पळी दी, और ऐबे लाग़अ मुँह एसा गला दी किजै विश्वास बी हंदअ। 19 किल्हैकि दलबंदी बी हणीं तम्हां दी ज़रूर, सह हणीं ऐते तैणीं कि जुंण लोग तम्हां बिचै खरै-खरै आसा ताकि तियां प्रगट हई सके। 20 और तम्हें जेभै ऐकी ज़ेगा कठा हआ, ता तम्हें निं ऐऊ प्रभू भोज़ा खाणें तैणीं कठा हंदै आथी, 21 किल्हैकि खाणें बत्तै हेरा तम्हें ऐकी दुजै का पैहलै

आपणअ भोज़ खाई, ता तेखअ इहै करै कोए रहा भुखे, ता कोए हआ खाई-पी मतबालै हुए दै। 22 के खाणें-पीणें लै थारै आपणें घर निं आथी? कि तम्हें एसा परमेश्वरे कलिस्सीया मजाक समझा, और जहा सेटा नाई आथी तिन्नां हआ शरमिंदै करदै आए दै? हूँ तम्हां लै के बोलूँ? के इन्नां गला लै हूँ तम्हां लै शाबाश दैऊँ, और थारी प्रशंसा करूँ? नां, इन्नां गला लै निं हूँ थारी शाबाशी करदअ आथी। 23 किल्हैकि ईयां गला आसा मुखा प्रभू खोजी दी, और मंए तम्हां सेटा बी पजैळी, कि प्रभू जहा राची ढाकअ त, ता तेऊ बी ढाकी ती रोटी हाथै, 24 और परमेश्वरो धन्याबाद करी करै सह रोटी चोळी और बोलअ, कि अह आसा मेरी देह, जुंण तम्हां लै आसा, मेरी आदी लै करै इहय ई।” 25 और तेऊ बियारी पिछू एक कटोरअ बी ढाकअ और बोलअ, “अह कटोरअ आसा मेरै लहु दी नऊँई वाचा: जेभै तम्हें झुटे ता मेरी आदी दी करै इहय ई।” 26 और जेभै तम्हें ऐहा रोटी खाए, और ऐऊ कटोरै झुटे, ता प्रभुए मौतो प्रचार रहै करदै लागी, जेभै तैणीं सह ऐछे नाई। 27 और जै कुंण प्रभुए रोटी गलत ढंगा संघे खाए, और कटोरै का झुटे, ता सह हणअ इहय करी करै प्रभुए देहीओ और लोहूओ दोशदारी। 28 और ऐते तैणीं तम्हें लए आपणें मना भाळी और परखी, तेता बाद खाए तम्हें ऐहा रोटी और कटोरै। 29 किल्हैकि जै कुंण खांदी बेरी प्रभुए देही नाई बछेणें, ता ऐऊ खाणें पीणें बजहा आणां सह आपू लै सजा। 30 ऐतेई बजहा तम्हां मांज्रै कई कमजोर, बमार, और बडै भारी आसा सुती बी गूए दै। 31 जै हांमहें आपणें आप्पू परखदै, ता तै निं हांमहें सजा भेटणी आथी ती। 32 पर प्रभू दैआ हांमहें लै सजा हांमहें सुधारनें तैणीं, कि हांमहें निं लोळी ऐऊ संसारा संघे दोषी हुए।

33 ऐतै तैणीं, हे मेरै भाईयो, जेभै तम्हें खाणें-पीणें तैणीं कठा हआ ता ऐकी दुजै लआ नैहळी 34 और जै कुंण भुखअ होए ता सह लए आपणें घरै रोटी खाई, तै निं थारअ कठा हणअ सजा भोगणें बजहा हणीं। और बाकी गला करनीं मुँह आप्पै एछी करै ठीक।

### आत्मिक बरदान

12 हे भाईयो हूँ निं इहय च़ाहंदअ कि तम्हें इन्नां आत्मिक चिजा का नज़ाण रहे। 2 तम्हां का आसा थोघ बी कि जेभै तम्हें होरी लोग जिहै आसा थिये, ता तम्हां लै जिहअ बोला तै, तधू करा तै तम्हें बी तिन्नां कार्णी और टऊंणीं मुर्ति सेटा तिहअ ई। 3 और तै दैआ हूँ तम्हां लै च़तैनगी कि, जुंण परमेश्वरे आत्मां दी बोला, ता सह निं इहय बोलदअ आथी कि यीशू आसा श्रापित: और नां पबित्रात्मां बिणहीं कुंण इहय बोली सकदअ कि यीशू आसा प्रभू।

4 बरदान आसा कई रंगे, पर आत्मां आसा एकैई; 5 और सेऊआ बी आसा कई रंगे, पर प्रभू आसा एकैई; 6 असरदार काम आसा कई रंगे, पर परमेश्वर आसा एकैई, जुंण सोभी दी हर रंगे असर पैदा करा। 7 पर सोभी लै फायदअ पजैळणां लै दैआ सह सोभी लै आत्मां प्रकाश। 8 किल्हैकि ऐकी भेटा तैहा आत्मां संघे बुद्धिए गला, और दुजै भेटा तेसाई आत्मां करै ज्ञानें गला। 9 कोई भेटा तैहा आत्मां करै विश्वास, ता कोई भेटा तैहाई आत्मां करै बमारा ठीक करनेंओ बरदान। 10 कोई भेटा तैहाई आत्मां करै च़मत्कारा करनेंओ बरदान, और कोई भेटा भविष्यबाणीं करनेंओ बरदान, ता कोई भेटा आत्मां परखणैओ बरदान, और कोई भेटा कई रंगे भाषा-बोली बोळणेंओ बरदान, ता कोई भेटा भाषा-बोली अनुबाद करनेंओ बरदान। 11 पर ईयां सारै असरा करनें आळें काम करा सह एकैई पवित्र आत्मां, और सह जहा लै जिहअ च़ाहा तिहअई दैआ।

### एक देह : अनेक अंग

12 किल्हैकि जेही देह एक आसा और तेतै अंग हआ कई, पर तैहा देहीए कई अंग हई करै बी आसा सह सारी देह मिली करै एकैई देह, और तिहअ ई मसीह बी आसा एकै। 13 किल्हैकि हांमहें सोभ, कै यहूदी, कै यूनानीं, कै दास, कै आज़ाद, हांमहें आसा ऐकी ई आत्मां और देहा संघे बपतिसमअ लअ द, और हांमहें सोभी लै आसा एकै ई आत्मां दैनी दी।

14 ऐतै तैणीं कि देही दी निं सिधअ एकै अंग आथी, तेथ आसा कई अंग। 15 जै पैर इहय बोले कि, “हूँ निं हाथ आथी, तै निं हूँ एसा देहीओ आथी,” तै

कैसे सह सच्ची निं आथी तेसा देहीओ? 16 और जै कान इहय बोले, कि हूँ निं आच्छ आथी, तै निं हूँ देहीओ आथी, सह कै इहय करै सच्ची निं आथी तेसा देहीओ? 17 जै सारी देह आच्छ हंदी ता तै शुंळणअ किधा का त? जै सारी देही कान ई हंदअ ता तै शिंघणअ किधा? 18 पर सच्ची आसा परमेश्वर आपणीं मरजी दी सोभ अंग एक-एक करी करै बणाएँ दे। 19 जै तियां ऐकी ई रंगे अंग हंदै, ता तै किधी हर्णी ती देह? 20 पर ऐबे अंग ता बडै भारी आसा, पर देह आसा ऐके ई। 21 आच्छ निं हाथा लै बोली सकदी कि, "मूँह निं तेरी जरूरत आथी, और नां मुँड पैसा लै सकदअ बोली कि, मूँह निं थारी जरूरत आथी।" 22 पर देहीए तियां अंग जुंण होरी का कमजोर जाकिआं तियां आसा बडै जरूरी; 23 और देहीए जहा अंगा हांमहें इज्जता जोगी निं समझदैं, तिन्नाई आंगे करा हांमहें सोभी का जादी इज्जत; और म्हारै नाई जघणें आळें अंग, तियां हआ होर भी जादैं बीतै, 24 पर तैबी बी निं म्हारै इन्नां शोभलै आंगा किछे मतलब आथी। पर परमेश्वर दैनी देह ऐही बणाई कि, जहा आंगा इज्जते कर्मी ती, तेऊ आंगा भेटी होर बी जादी इज्जत। 25 ताकि देहा दी निं फूट लोळी पळी, और ताकि तियां ऐकी दुजे अंगे फिकर करदैं रहे। 26 तैही आसा कि जै ऐकी अंगा दाह लागी ता, सारै अंगा हआ दाह; और जै ऐकी अंगा खुशी भेटी ता तियां होर अंग बी मनाऊंआं तेते खुशी।

27 और इहयई करै तम्हें सोभ आसा कठा मिलीकरै मसीहे देह, और तेऊए जुदै-जुदै अंग; 28 और परमेश्वर आसा कलिसीया दी जुदै-जुदै आदमीं छांटै दै, (चुनै दै) : पैहलअ आसा प्रेरित, और दुजअ आसा, भविष्यदबगता, और चिअ आसा गुरुजी, और तेखअ समर्थे कामां करनै आळअ, और चांगे करनै आळअ, और दैया करनै आळअ, और प्रबन्धा करनै आळअ, और कई रंगे बोली बोळणें आळअ। 29 ईयां कै सारै प्रेरित आसा? कै सोभ भविष्यदबगता आसा? कै सोभ प्रचारा करनै आळें आसा? कै सोभ समर्थे कामां करनै आळें आसा? 30 कै सोभी चांगे करनैओ बरदान असा भेटअ द? कै सोभ कई रंगे बोली बोळणें आळें आसा? 31 कै सारै अनुबादा करनै आळें आसा? तम्हें रहै बडै-बडै बरदानें धुना दी। पर हूँ खोजूँ तम्हां का होर बी सान रसतअ।

### प्रेम आसा सोभी का उत्तम मार्ग

13 जै हूँ मांळूँ और स्वर्गदूता जेही बोली बोलूँ, और प्यार निं डाहूँ, ता तै आसा हूँ ठण-ठण करदअ पीतळ, और शण-शण करदी पंजेब। 2 और जै हूँ, भविष्यदबार्णीं करनै आळअ बी होए, और सोभी भेदा जाळणें आळअ, और ज्ञाना समझणें आळअ, और जै मूँह ऐतरअ विश्वास बी होए, कि हूँ सका ऐहा धारा बी इधा का हटाऊई, और सोभी लै प्यार निं मेरे दिला दी होए, ता तै निं हूँ किछी कामों आथी। 3 और जै हूँ आपणीं धन दौलत बी गरीबा और कंगाळा लै दैऊँ, और आपणीं शरीर भी जळाऊणां लै दैऊँ, और प्रेम निं मेरे दिला दी कोही लै होए, ता तेतो बी निं मेरअ किछ फायदअ आथी।

4 प्रेम आसा, शाहा डाहणें आळअ, दैया करनै आळअ, और प्रेम निं काहरी निंदा करदअ आथी, प्रेम नी आपणी बडाई करदअ आथी, और नां आप्पू सराहंदअ आथी, 5 और सह निं कोही लै बुरअ करदअ आथी, और सह निं आपणीं भलाई चाहंदअ आथी, और प्रेम निं कोहीओ बुरअ मंदअ आथी। 6 और प्रेम निं बुरै कामां संघे खुश हंदअ आथी, सह हआ सच्चे कामां का खुश। 7 और सह सैहा सोभी गल्ला, और सह डाहा सोभी गले समझ, और सोभी गले डाहा आशा, और सोभी गल्ला दी डाहा सह (शाहा) धीरज।

8 प्रेम निं कधि टळदअ आथी; जै भविष्यदबार्णीं होए ता तियां हर्णीं खत्म; ता भाषा बी हर्णीं खत्म; संघा म्हारअ ज्ञान बी हणअ खत्म। 9 किल्हैकि म्हारअ ज्ञान आसा अधूरअ, और म्हारी भविष्यदबार्णीं बी आसा अधूरी। 10 पर जेभै सह सोभी गल्ला जाणणें आळअ ऐछणअ, ता तियां अधुरै काम बी हर्णें पूरै। 11 और जेभै हूँ शोहरू थिय, ता हूँ बोला ती तेभै शोहरू जिहअ, और शोहरू जिहअ त मेरअ शाह, और शोहरू जेही ती मेरी बुधी, पर जेभै हूँ सैणअ हुअ ता शोहरू जेही गल्ला दैनी मंएँ छाडी। 12 मैची आसा लागअ द हांमहां का शीशे दी धुमधुमअ शुझदअ, पर तेऊ बगतै शुझणअ मुँहा सहनै, ऐऊ बगतै आसा मेरअ ज्ञान अधूरअ, पर तेऊ बगतै बछेळणअ मूँह पूरै ढंगा

करै, जिहअ हूँ बछेळणअ द आसा। 13 पर ऐबे विश्वास, आशा, प्रेम ईयां चिहै आसा स्थाई, पर इन्नां मांझै आसा सोभी का बडअ प्रेम।

### भविष्यदबार्णीं और कई बोली-भाषा

14 प्रेम साबै चलणअ, और धैम मन डाहणअ आत्मिक बरदानां दी लाई खास करके करनीं भविष्यदबार्णीं; 2 किल्हैकि जुंण कई प्रकारे बोली दी बोला, सह निं आप्पू बोलदअ आथी, बल्कि तेऊए मुँहां का करा परमेश्वर गल्ला; तैही निं तेऊए गल्ला हर कोहै समझदैं आथी, किल्हैकि सह बोला गुप्त भेदे गल्ला आत्मां दी रही करै। 3 पर जै कुंण भविष्यदबार्णीं करा, ता सह बोला आदमीं लै तरक्कीए, शान्तीए, और उपदेशे ई गल्ला। 4 और जुंण कई रंगे बोली दी गल्ला बोला, सह करा आपणीं ई तरक्की, पर जुंण करा भविष्यदबार्णीं, सह करा कलीसिये तरक्की। 5 पर हूँ चाहा कि तम्हें कई रंगे बोली बोले, पर ऐता का जादअ चाहा हूँ इहय कि तम्हें करा भविष्यदबार्णीं; किल्हैकि जै कुंण कई अन्यभाषा बोळणें आळअ, कलीसिये तरक्की लै अनुबाद निं करे, ता सह भविष्यदबार्णीं करनै आळअ आसा तेऊ का जादअ।

6 ऐतै तैर्णीं हे मेरे भाईयो, जै हूँ तम्हां सेटा लै एछी करै अन्यभाषा दी गल्ला करूँ, और ज्योती, या ज्ञानें, या भविष्यदबार्णीं, उपदेशे गल्ला तम्हां संघे नाई करूँ, ता मेरअ तम्हां किजै फाईदअ हणअ? 7 इहय करै जै निर्जीव जिजा बी जहा दी आबाज नीखळा, जेही, बैसरी, बीन, जै तिन्नें स्वरा दी बी भेद निं हंदअ, ता तियां किहअ करै बछेळनी ती कि अह आसा बैसरी, ता अह आसा बीन? 8 और जै तुरहीओ शब्द साफ निं हंदअ, ता कहा करनीं जुधा लै तैरी? 9 इहयई आसा, कि जै तम्हें आपणीं जीभा का साफ-साफ नाई बोले, ता जुंण तम्हां बोळणअ सह कुंणीं लाअ समझी? तम्हां लै ता लोगा फुकी गल्ला करनै आळें बोळणअ। 10 दुनियां दी चाहे केतरी ई रंगे बोली-भाषा कील्है निं होए, पर तिन्नां मांझै निं कोहै बी बिर्णीं मतलब हर्णीं आथी। 11 और जै हूँ कहा भाषा-बोलीओ मतलब निं समझूँ, ता तेऊ बोलणे आळें समझणअ हूँ परदेसी। 12 और तै बोला हूँ कि जै तम्हें आत्मिक बरदाना करै भरुएँ दै होए, ता ऐही कोशिश करै कि थारै बरदानें तरक्की (उन्नति) करै लोळी कलीसिये तरक्की हुई।

13 और जै कुंण दुजी बोली दी बोले, ता सह करै प्राथणां (अरज) कि तेतो (मतलब) अनुबाद बी खोजी सकूँ। 14 और जेभै हूँ दुजी बोली दी प्राथणां करा, ता तेभै करा मेरी आत्मां प्राथणां, और मेरी बुधी निं काम करदी आथी। 15 और तै किजै लागा करनअ? मूँह करनीं आत्मां करै बी प्राथणां, और बुधी करै बी करनीं प्राथणां; मूँह आत्मां करै बी गांणअ और बुधी करै बी गांणअ। 16 नाई ता जै तूह आत्मां ई करै धन्याबाद करे, ता तिन्नां जसा ज्ञान निं आथी, ता तिन्नां तैरे धन्याबादा दी किहअ करै बोळणअ आमीन? किल्हैकि तियां ता जाणदैं ई निं आथी कि तूह किजै बोला होए? 17 तूह ता करा होए राँबळै करै धन्याबाद, पर दुजेए तरक्की निं हंदी आथी। 18 हूँ करा आपणै परमेश्वरो धन्याबाद कि हूँ बोला तम्हां सोभी का जादी अन्यभाषा। 19 पर कलिसीया दी अन्यभाषा बोली करै दस हजार गल्ला सखाऊणें का लागा मूँह इहयई बधिया कि हूँ होरी सखाऊणां लै बुधि करै पांज हजार गल्ला ई सखाऊं।

20 हे भाईयो, तम्हें निं समझा दी लान्हें जिहै बर्णीं; तैबी बी बुराई दी रहा तम्हें लान्हें जिहै, पर समझा दी बणां तम्हें सैणें। 21 व्यवस्था दी आसा लिखअ द कि प्रभू बोला इहय कि, "मूँह करनीं अन्यभाषा बोळणें करै और पराई खाखा करै इन्नां लोगा संघे गल्ला; तैबी बी निं इन्नां मेरी शुंळणीं।" 22 और तैही निं अन्यभाषा विश्वास नाई करनै आळें लै आथी, पर विश्वासी लै आसा चिन्ह; और भविष्यदबार्णीं निं अविश्वासी लै आथी, पर विश्वासी लै आसा चिन्ह। 23 एऊ साबै जै कलिसीया ऐकी जैगा कठा होए, और सोभ जहें अन्यभाषा बोलदैं लागे, और नपहळ और विश्वास निं करनै आळें भितरा लै एछे, ता तिन्नां कै तम्हां लै पागल निं बोळणअ? 24 पर जै सोभै भविष्यदबार्णीं करदैं होए लागै दै, और बागा का कुंण नपहळ आदमीं या कुंण अविश्वासी आदमीं एछे ता तिन्नां बणाणअ सह दोषी और परखी बी हेरनअ; 25 और तेऊए मन भेद हर्णें प्रकट, और तेखअ पळणअ सह परमेश्वर चरणें, और तेखअ बोलणअ तेऊ कि सच्ची आसा तम्हां वीचै परमेश्वर।



### परमेश्वरे भगती दी अनुशासन

26 तैहीता हे मेरै भाईयो, किजै लाग़ा करनअं? जेभै तम्हें कठा हआ ता सोभीए दीला दी रहा भजन या उपदेश या अन्यभाषा, या अन्यभाषो अर्थ खोजणअ, और ईयां सारी गल्ला लोळी आत्मिक बढ़ोतरी लै हुई। 27 जे अन्यभाषा दी गल्ला करनीं ई होए, तै लोळी दुई या तेता का खास्सै हुऐ; जे जादे खास्सै होए ता तै बोलै चअन-चअन जळै बारी-बारी करै और एक जळअ करै अनुबाद। 28 और जै अनुबाद करनै आळअ नाई होए ता तै रहै सह अन्यभाषा बोळणै आळअ कलिसीया दी चुप्पी, और आपणै मना ई दी रहै परमेश्वरा दी लीन। 29 भविष्यबगता मांझै बोलै सिधै दुई चअन जळै ई, और बाकी लोग करै तिन्नां वचन शृंगी और परखी। 30 पर जै कसा बेठै दै लोगा मांझै परमेश्वरो आत्मां बोलै ता सह दुजअ बोळणै आळअ रहै तेभै चुप्पी। 31 किल्हैकि तम्हें सका एक-एक भविष्यबाणी करी, ताकि सोभै शिखळुई सके और शान्ती पाई सके। 32 और भविष्यबगते आत्मां हआ भविष्यबगते बशा दी। 33 किल्हैकि परमेश्वर निं गड़बडीओ आथी, सह आसा शान्ती दैणै आळअ परमेश्वर, जिहअ पवित्र लोगे कलिसीया दी हआ। 34 और बेटळी रहै कलिसीया सभा दी चुप, किल्हैकि तिन्नां लै नी कलिसीया दी गल्ला करनै आज्ञा आथी, पर तिन्नां लै आसा अधीन रहणै आज्ञा, और जिहअ व्यवस्था दी लीखअ द आसा। 35 कि जै तियां किजै शीखळणअ चाहे, ता घरै पुछै आपणै-आपणै लाळै ई का, किल्हैकि बेटळी लै निं कलिसीया दी गल्ला करनीं शोभदी। 36 परमेश्वरो वचन कै तम्हां का आसा निखळअ द? कि सिधअ तम्हांई सेटा आसा पुजअ द?

37 जै कुण आदमीं आप्पु लै भविष्यबगता या आत्मिक जन समझे ता, इहय लए ज़ाणी कि जुंण गल्ला हूँ तम्हां लै लिखा, तियां आसा प्रभुऐ आज्ञा। 38 पर जै कुण इहय नाई मनै, ता तेऊ बी निं मनी।

39 ऐबै हे मेरै भाईयो, भविष्यबाणी करदै रहा लागी, और अन्यभाषा बोळणां लै बी निं नांहा करी; 40 पर सारी गल्ला लोळी शालीनता और व्यवस्थित तरिके संघे हुई।

### मसीहो पुनरुत्थान

15 हे भाईयो, ऐबै शणांऊणअ मूँह तम्हां का सहैई सुसमाचार जुंण मंरें तम्हां का पैहलै आसा खोजी हेरअ द, और जुंण तम्हें मनीं बी हेरअ त और जहा दी तम्हें टेकी बी आसा रहै दै। 2 और तेताई करै थारअ मोक्ष बी हणअ, तेऊ सुसमाचारा डाहै आद जुंण मंरें तम्हां का शणांऊणअ त; नाई ता थारअ विश्वास आसा फजूल।

3 एहा ई बजहा मंरें तम्हां का अह गल खोजी, जुंण मूँह सेटा बी पुजी ती, कि पवित्रशास्त्रे वचनं साबै दैनीं यीशू म्हारै पापा लै आपणीं जान। 4 और दाबअ, और पवित्रशास्त्रे साबै हुअ चिपे धैळै जिऊँदअ बी, 5 और तेखअ शुझूअ सह कैफे का और सोभी बारा चेलै का बी शुझूअ। 6 और तेखअ शुझूअ सह पांजा शौआ का भी जादे लोगा का कठा एकी बारी, और तेता मांझै आसा कोऐ मैची बी जिऊँदै, और कोऐ गऐ सुती। 7 और तेखअ शुझूअ सह याकूबा का बी और सोभी प्रेरितै बी भाळअ। 8 तेखअ सोभी का बाद खिरी शुझूअ सह मुखा बी। 9 किल्हैकि हूँ आसा त तिन्नां प्रेरिता मांझै सोभी का होछअ, मतलब हूँ निं प्रेरित बोळणै जोगी बी आथी त, किल्हैकि मंरें आसा त कलिसीया और परमेबरा लै दुख दैनें दै। 10 पर हूँ जुंण किछ बी आसा, सह आसा सिधअ परमेश्वरे अनुग्रह करै और परमेश्वरो अनुग्रह जुंण मल्है हुअ, सह निं बेकार हुअ आथी; पर मंरें किय तिन्नां होरी सोभी का जादअ कश्ट, तैबी निं अह मेरी बजहा करै हुअ, अह हुअ परमेश्वरे दैया करै। 11 और तैही, चाए हूँ करा, चाए तियां करा, हाम्हें करा ऐऊ ई प्रचारा और ऐताई दी किय तम्हें विश्वास बी।

### म्हारअ पुनरुत्थान

12 ऐबै जै मसीहो अह प्रचार हआ कि सह हुअ मरी करै भी जिऊँदअ, ता तम्हां मांझै केतरै बोला इहय कि मुँरें दै निं जिऊँदै हंदै (पुनरुत्थान)आथी? 13 जै मुँरें दै आदमींओ पुनरुत्थान ई नाई आथी, ता तै निं मसीह बी हुअ

जिऊँदअ; 14 और जै मसीह बी जिऊँदअ नाई हुअ आथी, ता म्हारअ प्रचार करनअ बी आसा फजूल, और थारअ विश्वास बी आसा फजूल। 15 ता तै हुऐ हाम्हें परमेश्वरै झुठै गुआह, किल्हैकि हाम्हें ता परमेश्वरे वारै एही गुआही आसा दैनीं दी कि, तेऊ दैनअ मसीह मरी करै जिऊँदअ करी, और जै कि मुँरें दै जिऊँदै निं हंदै। 16 और जै मुँरें दै जिऊँदै नाई हंदै, ता मसीह बी निं जिऊँदअ हणअ त; 17 और जै मसीह जिऊँदै नाई त उझुअ ता थारअ विश्वास करनअ बी आसा फजूल, और तम्हें आसा तै मैची बी पापा दी फसै दै। 18 पर जुंण मसीहा दी सुतै दै बी आसा, तियां बी हुऐ तै नष्ट। 19 जै हाम्हें सिधअ ऐऊई जीवना दी, मसीहा का आशा डाहे, ता हाम्हें आसा सोभी आदमीं का नभागै आदमीं।

20 पर सचीई आसा मसीह मुँरें दै मांझै जिऊँदअ हुअ द, और जुंण सुतै दै आसा, सह आसा तिन्नां मांझै पैहलअ फळ हुअ द। 21 किल्हैकि जै आदमीं संघे एहा दुनिया दी मौत आई, ता आदमींए ई बजहा आअ एऊ संसारा दी पुनरुत्थान बी। 22 जिहै आदमै बजहा सोभै मुँरें तिहै ई यीशू मसीहे ई बजहां आअ एऊ संसारा दी जीवन और सोभै करनै जीऊँदै, 23 पर सोभै आपणीं-आपणीं बारी का: पैहलअ फळ यीशू मसीह, और तेखअ एछणै मसीहा करै तेऊए लोग। 24 ऐता बाद हणअ अंत। तेता बाद तेऊ सारअ हक और सारी प्रधानता, और सामर्थ सारी खत्म करी करै, सभाळअ सारअ राज परमेश्वर पिता सेटा। 25 किल्हैकि जेभै तैणीं तेऊ आपणै बैरी आपणै पैरा हेठै निं पाऐ, तेभै तैणीं रहणअ तेऊ शतानो राज एऊ संसारा दी जरूरी। 26 सोभी का आखरी जुंण बैरी नाश करनअ सह आसा (मौत)। 27 किल्हैकि "परमेश्वरै आसा सोभ किछ तेऊए पैरा हेठै कीय द," पर जेभै सह बोला कि सोभ किछ आसा तेऊए अधीन किय द, ता प्रत्यक्ष आसा कि जुंणीं सोभ किछ तेऊए अधीन करी हेरअ, सह रहा आप्पु तेता का जुदअ। 28 और जेभै सोभ किछ तेऊए अधीन हई जाणअ, ता शोहरु बी हणअ तेऊए अधीन, जुंणीं सोभ किछ तेऊए अधीन कीय, ताकि सोभी दी लोळी परमेश्वर ई सोभ किछ हुअ।

29 नाई ता जुंण लोग मुँरें दै लै बपतिस्मअ दैआ, तिन्नां कै करणअ? और जै मुँरें दै जिऊँदै हंदै ई निं आथी, ता तेखअ किल्है लअ तिन्नें तैणीं बपतिस्मअ? 30 और हाम्हें बी किल्है रहा तेखअ हर बगत मुसीबता दी पळी? 31 हे भाईयो, मूँह आसा तेऊ घमण्डे कसम जुंण हूँ म्हारै प्रभू यीशू दी थारै बारै धैळ करा। 32 कि जै हूँ आदमींए रिती दी इफियुस दी बणै जानबरा करै लळअ ता मूँह किजै नफअ हुअ? जै मुँरें दै जिऊँदै ई निं हणै, "ता ऐछा खाआ-पिआ, मौज करा, किल्हैकि काला ता मरनअ ई आसा।" 33 धोखअ निं खाई, बुरी संगती दी बीगळा हेरे रांबळअ आदमीं बी," 34 धर्म कामां लै ऊझिआ, जागा, और पाप निं करी; किल्हैकि कोऐ आसा ईहै बी जुंण परमेश्वरा नाई जाणदै आथी। हूँ आसा लागअ द तै इन्नां गल्ला बोलदअ ताकि तम्हां शरम ऐछे।

### पुनरुत्थाने देही

35 जेभै कुण इहय बोले कि, मुँरें दै किहअ करै हआ जिऊँदै, और तियां किहै शरीरा दी एछा?" 36 हे मुखो; जेभै तम्हें आपणै खेचै किछ बऊआ, ता जेभै तैणीं सह बेजअ शळअ निं आथी, ता तेभै तैणीं निं तेथ टीप फूटदी आथी। 37 और जुंण तूह बऊआ ता सह तेऊ नाजो शलेफळअ निं आथी, जेता का टीप ई निं फूटणअ आथी, बल्कि तियां हआ नीरी दाणै, चाए तियां दाणै गीहूँए होहै, चाहै छलीए होए, चाहै कोही बी नाजे होए। 38 पर परमेश्वर दैआ आपणीं मर्जी करै तेता लै देह, और सोभी बीजा लै आसा आपणीं-आपणीं देह दैनीं दी। 39 सारै शरीर नी एकी रंगे आथी : आदमींओ शरीर आसा होरी रंगे, और पशुओ शरीर आसा होरी रंगे; और चेलू परखीरुओ शरीर आसा होरी रंगे, और माहछळीओ शरीर आसा होरी रंगे। 40 और स्वर्गीय शरीर आसा, और पार्थीव शरीर बी आसा, पर स्वर्गीय शरीरो तेज आसा होरी रंगे, और पार्थीव शरीरो रंग आसा होरी रंगे। 41 सूरजे चमक आसा होरी रंगे, और ज्योथे चमक आसा होरी रंगे, और तारैए चमक आसा होरी रंगे, एक तारै और दुजै तारैए चमका दी बी आसा फरक।

42 मुँरें दै जिऊँदै उझणअ बी आसा इहय ई। शरीरा दहा नाशवान दशा दी, और अविनाशी रूपा दी जिउआ सह। 43 तेऊ अनादरा करै बऊआ, और सह उझिआ बडै तेजा संघे जिऊँदै, कमजोरी संघे बऊआ और जोरा संघे



उज्झिआ जिऊई 44 स्भाविक देहा बऊआ, और आत्मिक देहा संघे उज्झिआ जीऊई: तैबी स्भाविक देह बी आसा, और आत्मिक देह बी आसा। 45 और इहय ई लिखअ द बी आसा कि, “पैहलअ (मर्ध) आदमी, आदम बणअ जिऊँदअ प्राणी” और आखरी आदम बणअ, जिबना देंगे आळी आत्मां। 46 पर पैहलअ नाई त आत्मिक आथी त, सह त स्भाविक, और तेता बाद हुअ आत्मिक। 47 पैहलअ आदमी आसा त माटैओ; और दुजअ आसा स्वर्गीय आदमी। 48 जिहअ सह माटैओ आसा त, तिहई आसा तियां बी जुंण माटे आसा; और जिहअ सह स्वर्गीय आदमी आसा, तिहई आसा तियां बी जुंण स्वर्गीय आदमी आसा। 49 जिहअ हाम्हें तेऊओ रूप धारण कीय जुंण सह माटैओ आदमी आसा त, तिहअ ई तेऊ स्वर्गीय आदमीओ रूप बी करनअ हाम्हां धारण।

50 हे भाईयो, हूँ बोला इहय कि, हाड मास् और खून निं परमेश्वरै राजे हकदार हणें आथी, और नां नांशवान, अविनाशीओ हकदार हई सकदअ। 51 शुणा, हूँ खोजूँ एक भेदे गल, हाम्हें निं सुतणें आथी, पर सोभे बदलणें, 52 और अह हणअ सिधअ पलभरा दी, मतलब सिधअ आच्छी झपकदै ई, और आखरी तूरही फुकरदा ई। किल्हैकि तूरही बी फुकरनीं और मुंन्दे हणें अविनाशी दशा दी जिऊँदै और हाम्हें बी बदळणें। 53 किल्हैकि जरूरी आसा कि नाशवान शरीर, अविनाशी रूपा दी बदळिए, और ऐऊ मरनै आळै शरीरा बान्हणअ अमर चोळअ। 54 और जेभै ऐऊ नाशवाना शरीरा, अमर हणेंओ चोळअ बान्हणअ, जाऊं एऊ मरणहार शरीरा अमरता बान्हणै तेभै हणअ सह वचन पूरअ, जुंण पवित्रशास्त्रा दी आसा लिखअ द, कि “जिन्दगी घुटी मौत”।

55 हे मौतें तेरी जीत किधी रही? हे मौतें तेरअ डाह किधी रहअ?” 56 मौतो डाह आसा पाप, और पापो जोर आसा व्यवस्था,। 57 पर परमेश्वरो आसा धन्यवाद कि जुंण म्हारै प्रभू यीशू मसीहे बज्हा म्हारी जीत कराऊआ। 58 ऐतै तैणीं बोला हूँ कि, “हे मेरै भाईयो, मजबूत और अटळ रहा, और प्रभुए कामां दी रहा कब्बलै बढदै,

### सोभी विश्वासी लै दान

16 ऐबै खोजूँ तेऊ चंदे बारै जुंण पवित्र लोगा लै करा कठा, और जेही आजा मएँ गल्लातीए कलिसीया लै देंनीं ती, तिहअ ई करा तम्हें बी। 2 हसे पैहलै धैळै करै तम्हें सोभ आदमीं-आपणीं आमदानी भाळी करै थोळअ-थोळअ आप्पू सेटा डाही, ताकि जेभै मूँह ऐछणअ तम्हां निं तेभै लोळी चंदअ कठा करनअ पळअ। 3 और जेभै मूँह ऐछणअ, जहा तम्हें चाहे तियां छाडणें मूँह चिड्डी दैई करै कि थारअ दान पज्जैळा यरुशलैमा दी। 4 और जै मेरअ नाशणअ बी ठीक हुअ, ता तियां बी नाशणें मूँह संघै।

### पौलुसे यात्रा कररनेंओ कार्यक्रम

5 हूँ ऐछणअ मकिदुनिया बाती हई करै, किल्हैकि मूँह नाशणअ मकिदुनियाई बाती। 6 पर हई सका कि तम्हां ही सेटा बी रहूँ, और हींऊँद काटूँ तम्हांई सेटा, ता तेखअ दैरे मूँह पज्जैळी जेथ बाखा लै मूँह नाशणअ होए। 7 किल्हैकि हूँ निं ऐबै बाता तम्हां संघे मिलणअं चाहंदअ आथी; पर मूँह आसा आशा कि जै प्रभू चाहे ता, तै सका हूँ थोळै बगता लै तम्हां संघे रही, 8 पर हूँ रहणअ पिन्तेकुस्ता तैणीं इफियुसा दी, 9 किल्हैकि मुलहै आसा तिधी एक बडअ फायदै आळअ दुआर खुलअ द, और बरोधी बी आसा बडै भारी।

10 जै तिमुथियुस एछी जाए, ता सह लोळी हेरे तम्हां सेटा बिणा कोई डरै-भंगै रहअ; किल्हैकि सह करा मूँहें बराबर प्रभूओ काम। 11 और तम्हें निं तेऊ होछे समझी आथी, पर राम्बळै करै दै तेऊ ओही बाखा लै पज्जैळी, ताकि सह मूँह सेटा लै एछी सके; किल्हैकि मूँह हआ धैळ तेऊ न्हैळअ-भाळअ लागअ द कि सह लोळी सोभी भाई संघे आअ। 12 भाई अपुल्लोसा का आसा मएँ बडी अरज की दी कि तम्हां सेटा लै लोळी भाई संघे आअ; पर तेऊए निं ऐऊ बगतै नांशणें कीछ बी ईच्छा की, पर जेभै तेऊ मौकअ भेटणअ ता तेभै जाणअ सह एछी।

### आखरी आदेश और आदर-सत्कार

13 जागदै रहा विश्वासा दी रहा बर्णी, भलाई रहा करदै लागी, और तागती आळै बणां। 14 जुंण बी काम तम्हें करा तेउ करा प्रैमा संघे।

15 हे भाईयो, तम्हें ज्ञाणा बी तिन्नां स्तिफनुसे घरानै आळै कि तियां आसा अखाये पैहलै फळ, और तियां रहा पवित्र लोगे सेऊआ लै तैर। 16 ऐते तैणीं आसा तम्हां का मेरी अरज कि ईहै लोगे रहा अधीन, और हर तिन्नां सोभी लोगे जुंण ऐऊ कामां दी मैन्थ करा और भागीदारी आसा। 17 हूँ आसा स्तिफनास और फूरतूनातुस और अखइकुसे ऐछणें करै बडअ खुश, किल्हैकि तिन्नां आसा थारी कर्मी घटी पूरी की दी। 18 तिन्नां आसा दैनअ द मेरी और थारी आत्मां लै बडअ आराम, और ईयां ईहै लोगे लागा मनणें।

19 आसिए कलिसीये तरफा का तम्हां लै नमश्कार; अक्विला और प्रिस्कलो, और तिन्नें घरै कलिसीया का बी प्रभू यीशू दी तम्हां लै नमश्कार। 20 और सोभी भाईयो तम्हां लै नमश्कार। पवित्र चुम्बनां संघे करा आप्पू मांझै नमश्कार।

21 मेरअ पौलुसो तम्हां लै आपणै हाथै लीखअ द नमश्कार। 22 जै कुंण प्रभू संघे प्रेम निं डाहे, ता सह आदमीं आसा शापित। म्हारअ प्रभू आसा ऐछणें आळअ, 23 और प्रभू यीशूओ अनुग्रह लोळी तम्हां दी हंदअ रहअ। 24 मेरअ प्रेम आसा प्रभू यीशू दी तम्हां सोभी संघे। आमीन।

## 2 कुरिन्थियों

### भूमिका

जधू कुरिन्थिए नांओं प्रेरत पौलुसे दुजी चिठी लिखी ती तधू नाई तै पौलुस और कुरिन्थिये कलीसिया बिचै सम्बन्धी ठीक आथी। कलीसिए किछ लोगे लाए तै पौलुसा लै सिधै साबै कई गंभीर आरोप, पर पौलुस दशाऊआ मेल-मलाप करने आपणी गहरी चाह और जिहय सह चाह त जाऊं तिहअ हआ, ता तेसा गल्ले आपणें दिला दी बड़ै भारी आनंदा बी करा सह प्रगत।

एसा चिठीए पैहलै भागा दी करा पौलुस कलीसिया संघे आपणें रिशतै दी बचार, और तिन्नां समझाऊआ सह इहय कि किल्है किय तेऊ कलीसिया दी बेईजती और बिरोध करने जिहय काठअ बर्ताअ; और एसा गल्लो आनंद करा सह प्रगत कि तेऊए काठै हणेंओ परिणाम हुआ कलीसिया दी पचताअ और मेल-मलाप। तेखअ करा सह कलीसिया का यहूदिया दी रहणें आळै गरीब विश्वासी मसीही भाई लै दैया-धर्मा दी रही करै दान दैणें अरज। आखरी धैऊआ दी करा पौलुस कुरिन्था दी रहणें आळै किछ लोगे खलाफ आपणी प्रेरिताईओ समर्थण जुणी आप्पू लै आप्पैई असली प्रेरित हणेंओ दर्जअ दैनअ त। और पौलुसा लै ला तै तियां झुठै हणेंओ दोष।

रूप-रेखा

भूमिका 1:1-11

पौलुस और कुरिन्थे कलीसिया 1:12-7:16

यहूदिया रहणें आळै विश्वासी लै दान 8:1-9:15

पौलुसो प्रेरिते रूपे आपणें हको समर्थण 10:1-13:10

### आदर-सत्कार

1 पौलुसे तरफा का जुंण परमेश्वरे इच्छा करै यीशू मसीहो प्रेरित आसा, और भाई तीमुथियुसे तरफा का परमेश्वरे तेसा कलीसिए नांओं जुंण कुरिन्थुस दी आसा, और सारै अखाये सोभी पवित्र लोगे नांओं:

2 म्हारै पिता परमेश्वर और प्रभू यीशू मसीहे तरफा का लोळी तम्हां शान्ती और अनुग्रह भेटदअ रहअ।

### परमेश्वरो धन्याबाद करनअ

3 म्हारै प्रभू यीशू मसीहे परमेश्वरो और बाप्पूओ धन्याबाद, जुंण दैया करने आळअ, और सोभी रंगे शान्ती दैणें आळअ परमेश्वर आसा। 4 सह दैआ म्हारै सोभी दुख सांगटा दी हाम्हां लै शान्ती; ताकि हाम्हां तैहा शान्तीए बजहा जुंण हाम्हां लै परमेश्वर दैआ, तिन्नां लै बी शान्ती दैई सका, जुंण कोए दुख संकटा दी होए। 5 जिहै हाम्हां मसीहे दुखा दी जादैं साझू हआ, तिहैई हआ हाम्हां शान्ती दी बी मसीहा संघे हाम्हां साझू। 6 जै हाम्हां दुख भेटा, ता तियां आसा थारी शान्तीए उध्दारे तैणी; और जै सुख भेटा, ता सबी आसा थारी शान्तीए तैणी, जेते असरा करै तम्हें धीरजा संघे तिन्नां दुख क्लेशा बी सैहा, और जेता हाम्हां बी सैहा। 7 म्हारी आसा थारै बारै दी पाकी अटळ आशा; किल्हैकि हाम्हां ज्ञाणा कि जिहै तम्हें म्हारै दुखा दी साझू आसा, तिहैई आसा शान्ती और सुखा दी बी।

8 हे भाईयो, हाम्हां निं चाहंदे कि, तम्हें रहा म्हारै तेऊ दुखा का नजाण जुंण आसिया दी हाम्हां लै पळअ; हाम्हां दाभुए तै ईहै गरकै बोझै करै जेता हाम्हां चकी ई निं सकदैं तै, और हाम्हां सका तै मरी बी। 9 हाम्हां हेरअ त आपणें मना दी सोचै कि म्हारी मौत गई पुजी, कि हाम्हां आप्पू परंदैं भरोसअ करने का तेऊ परंदैं भरोसअ करे जुण मूए दै बी करा जिऊंदै। 10 तेऊई बचाऊए हाम्हां मौते ऐतरे बडे संकटा का, और तेऊ परंदैं आसा म्हारी आशा कि तेऊ हाम्हां आजू पोर्हो बी। 11 तम्हें बी करा मीली करै प्राथणां करै म्हारी सहायता, कि जुंण बरदान हाम्हां सोभीए बजहा भेटअ, ता तेतै बजहा करा सोभ लोग म्हारी तरफा का धन्याबाद।

### पौलुसे यात्रा करने बणाई दी योजना दी बदलाव

12 हाम्हां करा आपणी सोचै ऐहा ग्वाही दी घमण्ड कि संसारा दी खासकर तम्हां बिचै त म्हारअ चाल-चलण परमेश्वरा जोगी एही पवित्रता और सच्चाई संघे; सह त परमेश्वरे सामर्था संघे; शरीरे ज्ञाना संघे नाई त आथी। 13 हाम्हां नी तम्हां लै होर किछे लिखदैं आथी, सिधअ तेऊई लिखा जहा तम्हें पहळा और मना बी, और मूँह आसा आशा कि तम्हां मनणीं ईयां गल्ला खिरी तैणीं बी। 14 जिहअ तम्हां मांझे कोई मनीं बी आसा हेरअ द कि हाम्हां आसा थारै घमण्डे बजहा, और तिहैई तम्हें बी हणें प्रभू ईशुए धैळी हाम्हां लै घमण्डा करने कारण।

15 ऐऊ ही भरोसे चाहा त हूँ इहय कि पैहलै तम्हां सेटा लै एछू कि तम्हां एक होर दान भेटे; 16 और तम्हां सेटा का ऐछी करै मकिदुनिया लै नाशूँ और तेखअ एछूँ भी मकिदुनिया का तम्हां सेटा लै; और तम्हां दैणअ हूँ यहूदिया बाखा लै थोळी दूर जिहअ पजैळी। 17 और मरें जुंण इच्छा की ती, ता मरें कै तेथ चंचलता रहैऊई? और जुंण हूँ करनअ चाहा, कै हूँ तेऊ शरीरे साबै चाहा करनअ? कि हूँ गल्ला दी हाँ-हाँ बी करुँ और नां-नां भी करुँ? 18 परमेश्वर आसा सच्चअ गुआह, कि म्हारै तेऊ वचन दी जुंण तम्हां लै बोलअ, हाँ और नाई ईयां निं दुहै आथी। 19 किल्हैकि परमेश्वरो शोहरू यीशू मसीह जसरअ हाम्हां करै मतलब मेरै और सिलवानुस और तिमुथियुसा संघे तम्हां बिचै प्रचार हुअ, तेथ निं हाँ और नाई दुहै आथी ती तेथ हूई ती सिधी हाँ ई हाँ। 20 किल्हैकि परमेश्वर जेतरा बी प्रतिज्ञा आसा, ता तियां आसा सारी हाँ ई संघे। और तेऊई करै तियां आमीन बी हुई कि हाम्हां संघे लोळी परमेश्वरे महिमा हुई। 21 जुंण हाम्हां तम्हां संघे प्रभुए विश्वासा दी पाके करा, और जुणीं म्हारअ अभिषेक कीय, सहैई आसा परमेश्वर। 22 जुणीं हाम्हां दी मोहर बी आसा लाई हेरी दी, और बयाने दी आत्मां म्हारै मना दी दैनी दी आसा।

23 हूँ बोला परमेश्वरा साक्षी मनीं करै कि हूँ निं आझूँ तैणीं कुरिन्थुसा लै एते तैणीं आअ आथी त कि मूँह ऐछा ती तम्हां लै बडी दैया। 24 इहय निं आथी कि हाम्हां चाहा विश्वासे बारै तम्हां परंदैं प्रभुता जताऊणीं; पर थारी खुशी दी चाहा हाम्हां सहायक हणअ, किल्हैकि तम्हें रहा विश्वासा ई करै स्थिर।

2 मंरें हेरअ त आपणें मना दी इहय ही सोची कि भी निं तम्हां दुखी करदें ऐछणअ आथी। 2 किल्हैकि जै हूँ तम्हां दुखी करूँ, ता मुल्है खुशी दैणें आळअ कुंण हणअ, कि सीधअ सहैई जुण मंरें दुखी किय? 3 और मंरें आसा तम्हां लै अह ही गल तै लिखी दी, ताकि इहय निं हआ कि मंरें ऐछणें करै, जहा का मूँह खुशी भेटीणी ती तिन्नां का भेटा मूँह दुखी हणअ; किल्हैकि मूँह आसा तम्हां सोभी दी एसा गल्लो भरोसअ कि जुण मूँह खुशी आसा, सहैई आसा तम्हां सोभीए बी। 4 बड़ै दुखा और कळेशा और मना भितरी लेरी-लेरी आसा त मंरें लिखअ द, ऐतै तैणीं निं आथी लिखअ द कि तम्हें लोळी दुखी हुरे, पर ऐते तैणीं आसा लिखअ द कि तम्हें लोळी सह प्रेम समझअ जुण मूँह तम्हां संघे आसा।

### अपराधी लै माफी

5 जै कुंणी दुखी आसा उदास किय द; ता सिधअ हूँ निं दुखी किय, (कि तेऊ संघे कोई सख्ती करुं) बल्कि किछ ना किछ आसा तम्हें सोभ बी दुखी किये दै। 6 ईहै आदमीं लै आसा अह सजा बतेहअ जुण भाई मांझै कई दैनअ। 7 ऐता का बधिया आसा इहय कि ऐऊरे गळती करा माफ, और ऐऊ लै दैआ शांती, और इहय निं लोळी हुअ कि इहय आदमी रहे कबलअ उदासी दी डुबी। 8 ऐतै बज्रहा करा हूँ तम्हां का अरज कि तेऊ लै दैआ आपणें प्रेमों प्रमाण। 9 किल्हैकि मंरें आसा एते तैणीं बी लिखअ द कि तम्हां परखी लऊं कि तम्हें सोभी गल्ला मनणां लै तैर बी आसा कि नाई। 10 जसा तम्हें माफ करा, तेऊ करा हूँबी माफ, किल्हैकि मंरें बी जुण किछ माफ किय, जै किय होए ता सह किय थारै कारण मसीहे जैगाह हई करै माफ। 11 कि शैतानों निं लोळी हाम्हां लै किछे दाव-पेच चलअ, किल्हैकि हाम्हें निं तेऊए चाला का नजाण आथी।

### त्रोआसै पौलुसो व्याकुल हणअ

12 जेभै हूँ मसीहे सुसमाचारा शणांउँदअ त्रोआसा लै आअ, ता प्रभू खोलअ मुल्है एक दुआर, 13 पर मेरें मना नी चैन हुअ आथी, इहय करै कि तिधी निं मुखा आपणअ भाई तितुस शुजुअ; और तैहीता हूँ तिन्नां का विदा हई करै मकिदुनियां लै नाठअ।

### मसीह दी विजय-उत्सव

14 पर परमेश्वरो आसा धन्याबाद कि जुण मसीहा दी सदा ही जीत कराऊआ, और आपणें ज्ञाने सुगन्ध हाम्हां करै हर जैगाह फल्लाऊआ। 15 किल्हैकि हाम्हें आसा परमेश्वरा सेटा, मोक्षा पाणें, और नाश हणें आळें दुही लै यीशू मसीहे खुशबू। 16 कोई लै ता आसा मौता जेही गंध, कई जहँ लै आसा जीऊँणें खुशबू, इन्नां गल्ला जोगी कुंण आसा? 17 हाम्हें निं तिन्नां जिहै आथी जुण परमेश्वरे वचना दी मलाबट करा; पर मना का सच्चै और परमेश्वरे तरफा ई का बोला हाम्हें मसीहा दी परमेश्वरे मजूदगी आपू सेटा समझी करै।

### नऊँए वायदे (वाचा) सेवक

3 हाम्हां कै ऐभै बी आपणीं बड़ाई करदें लागणअ? कि हाम्हां इन्नां होरी लोगा जेही सफारशै चीठी तम्हां सेटा लै आळणीं, या तम्हां का भेटणीं? 2 म्हारी पत्नी आसा तम्हें ई जुण म्हारी हीका दी आसा लिखी दी, और तिन्नां बछेणा सोभै लोग पळ्हा बी। 3 अह आसा शुजदअ कि तम्हें आसा मसीहे पत्नी, जुण हाम्हें सेवका जेही लिखी, ईयां निं सैही करै आथी लिखी दी, पर ईयां गल्ला निं जिऊँदें परमेश्वरे आत्मां करै पाथरे तगती दी आथी, पर ईयां आसा दिला दी मासा रूपी तगती दी लिखी दी।

4 हाम्हें डाहा मसीहा ई करै परमेश्वरा दी इहयई भरोसअ। 5 इहय निं कि हाम्हें आसा आपणें आप एता जोगी; कि आपणीं तरफा का किजू गल्लो बचाव करी सके, पर म्हारी योग्यता आसा परमेश्वरे तरफा का। 6 जुंणीं हाम्हें नऊँई वाचे सेवक हणें जोगी किये, शब्दे सेवक निं बल्कि आत्में सेवक; किल्हैकि शब्दा करै मरा, और आत्मां करै जिऊआ।

7 और जै मौते वाचा जेते आखर पाथरा दी लिखें तै, एतरी तेजस्वी हई कि मूसा नबीए मूँहां का तेजे कारण जुण घटा बी त, इस्त्राएली निं तेऊए मुँहां दी

नजर बी दैई सकदें तै। 8 ता तेखअ अह आत्में वाचा होर बी तेजोमय किल्है निं हणीं? 9 जै सह दोषी बणाणें आळी वाचा तेजस्वी आसा ती, ता अह धर्मी बणाणें आळी वाचा होर बी ज़ादी तेजस्वी किल्है निं हणीं आथी? 10 और जुण तेजोमय आसा त, सह बी तेऊ तेजे बज्रहा जुण तेऊ का ज़ादअ तजोमय आसा त, तै निं किछे तेजोमय हुअ। 11 किल्हैकि जै सह जुण घटदअ रहा त, सह त तेजस्वी, ता तै सह जुण स्थिर रहणअ, ता सह ता होर भी तेजस्वी हणअ?

12 इहय करै बोला हाम्हें ऐतरी आशा और हैअ डाही करै 13 और मूसा जेही निं, जुंणीं आपणें मुँहां दी परदअ आसा त पाअ द, कि इस्त्राएली निं लोळी सह कम हणें आळअ तेज भाळअ। 14 पर तियां हुरे मतिमन्द, किल्हैकि आज़् तैणीं बी आसा तिन्नां लै पराणें नियमा पळ्हा बेरी तिन्नें दिला दी सहैई परदअ पळअ द, पर मसीहा दी उझिआ सह परदअ उझै। 15 आज् तैणीं भी जेभै मूसा नबीए कताबा पळ्हा, ता तिन्नें हीका रहा परदअ पळी। 16 पर जेभै तेऊओ दिल प्रभू बाखा लै फिरनअ, ता तेभै ज़ाणअ सह परदअ उतरी। 17 प्रभू ता आत्मां आसा: और जिधी प्रभुए आत्मां आसा ता तिधी आसा अजादी। 18 पर जेभै म्हारै खुल्है मुँहां का प्रभुओ प्रताप ऐऊ रंगै प्रकट हणअ, कि जिहअ शीशअ। ता प्रभू संघे जुण आत्मां आसा, ता हाम्हें बदळणें तेऊई तेजस्वी रूपा दी कर्णी-कर्णी हई करै।

### माटेए भांडे दी धन

4 ऐते तैणीं जै हाम्हां लै एही दैया हुई कि हाम्हां भेटी ईयां सेऊआ करनीं ता हाम्हें निं हैअ छाडदें। 2 पर हाम्हें आसा दैनै दै गलत काम छाडी, और ना हाम्हें आपणें आप चलाक बणदें आथी, और नां परमेश्वरे वचना दी मलाबट करदें आथी; पर सच्चाई प्रकट करी करै बशैळा हाम्हें परमेश्वरे सहनै हरेकी आदमीए दमागा दी भली गल्ला। 3 जै म्हारै सुसमाचारा दी परदअ आसा पळअ द, ता अह आसा तिन्नां नाश हणें आळें लै पळअ द। 4 और तिन्नां अविश्वासी लै जसरी बुधी ऐऊ संसारे ईश्वरै बंद आसा की दी, ताकि यीशू मसीह जुण परमेश्वरो रूप आसा, तेऊओ तेजोमय ज्योती निं लोळी तिन्नां परदें चमकी। 5 और हाम्हें निं आपू लै प्रचार करदें बल्कि हाम्हें करा यीशू मसीहा लै प्रचार कि सह आसा प्रभू; और आपू लै बोला हाम्हें इहय कि हाम्हें आसा तेऊए बज्रहा थारै सेवक। 6 और परमेश्वर ई आसा जुंणीं इहय बोलअ कि, "न्हैरें का चमकणीं ज्योती," और सहैई चमकी म्हारै दीला दी कि परमेश्वरे महिमें बछेण लोळी यीशू मसीहे मुँहां का चमकी।

7 पर हाम्हां सेटा आसा अह धन माटेए भाण्डे दी डाहअ द, कि अह असीम सामर्थ म्हारी तरफा का निं बल्कि परमेश्वरे तरफा का लोळी हुई। 8 हाम्हां लै चहू तरफा का क्लेश ता पळा, पर संकटा दी निं पळ्दें आथी; निरुपाय ता आसा, पर नराश निं हंदै; 9 हाम्हां दुख ता हआ, पर छाडदें निं आथी; ढेका ता पाआ पर नाश निं हंदै। 10 हाम्हें हआ यीशूए मौता लई हर बगत फिरदें लागें दै कि यीशूओ ज़िबन बी म्हारी देही दी प्रगट होए। 11 किल्हैकि हाम्हें हआ जिऊँदी ज़िता प्रभू यीशूए बज्रहा मौते हाथे सभाळें दै कि यीशूओ ज़िबन बी म्हारै मरणहार शरीरा दी प्रगट होए। 12 और इहय करै पा मौत हाम्हां दी प्रभाव और जीवन तम्हां दी।

13 तैहीता कि हाम्हां दी आसा सहैई विश्वासे आत्मां, (जसरे बारै लिखअ द आसा कि मंरें किय विश्वास तैहीता मेरें बोलुअ) ईहई हाम्हें बी करा विश्वास और हाम्हें बी बोला। 14 किल्हैकि हाम्हां का आसा थोघ कि जुंणी प्रभू यीशू जिऊँदअ किय, तेऊ करनै हाम्हें बी यीशू दी साजू समझीकरै जिऊँदें और तम्हां सहनै करनै पेश। 15 किल्हैकि सोभ चिज़ा आसा तम्हां लै; ताकि अनुग्रह कई करै खासअ हई करै परमेश्वरा लै धन्यबाद बढ़ाए।

16 तैहीता हाम्हें हैअ निं छाडदें; एही ता हआ म्हारअ बाहरी आदमीं नाश, पर तैबी बी रहा म्हारअ भितरलअ आदमीं हर धैळें नऊँअ हंदअ लागी। 17 किल्हैकि घळी-पलो हळकअ जिहअ क्लेश करा हाम्हां लै ज़रूरी अनंत जिऊण और महिमां पैदा। 18 हाम्हें निं हेरी-भाळी दी चिज़ा भाळदें पर हाम्हें भाळा नाई भाळी दी चिज़ा किल्हैकि हेरी-भाळी दी चिज़ा हआ थोळें धैळें लै और नाई भाळी दी चिज़ा रहा सदा बणीं।

### म्हारअ स्वर्गीय घर

5 किल्हैकि हाम्हां का आसा थोघ कि जेभै म्हारअ धरती परेंदो डेरें जिहअ घर ढोळणअ, ता परमेश्वरे तरफा का भेटणअ हाम्हां स्वर्गा दी एक इहय भवन, जुण हाथा करै बणांअ द निं आथी पर सह आसा चिरस्थाई। 2 ऐथ ता हआ हाम्हां धकदै, और बडी चाहना बी हआ कि हाम्हां बाहणअ आपणअ स्वर्गीय घर। 3 ताकि तेता बाह्नीं करै हाम्हां नांगें निं शुझिए। 4 ऐऊ डेरें दी रहा हाम्हां कबल्लै ही बोझा करै दाभूई, किल्हैकि हाम्हां निं चाहदै खोळणअ बल्कि हाम्हां चाहा बाहणअ, ताकि जुण सह मरणहार आसा, जीवना दी डूबी जाए। 5 जुंणी हाम्हां एसाई गल्ला लै त्यार आसा किये दै, सह आसा परमेश्वर, जुंणी हाम्हां लै बयाने दी आत्मां बी आसा देंनीं दी।

6 और हाम्हां डाहा सदा हिमन्त बान्हीं, और हाम्हां का आसा थोघ कि जेभै तैणीं हाम्हां देहा दी रहा, तेभै तैणीं आसा हाम्हां परमेश्वरा का जुदै, 7 किल्हैकि हाम्हां निं रूप भाळी करै चलदै पर हाम्हां चला विश्वासा भाळी करै। 8 तैहीता हाम्हां हैअ विश्वास डाहा और दैही का जुदअ हई करै समझा हाम्हां प्रभू संघे रहणअ होर बी भलअ। 9 ऐतेई बजहा आसा म्हारै मना दी एही उमंग कि चाए हाम्हां संघा रहे या चाए हाम्हां जूदै रहे, पर तेऊ लागा हाम्हां शोभलै।

10 किल्हैकि अह गल आसा जरूरी कि हाम्हां सोभीए हाल लोळी मसीहे न्याय आसनं सद्दैनं खुल्लै, ताकि सोभी आदमीं आपणी-आपणी करनींओ और आपणें भलें बुरैओ बदळअ भेटे जुण तिन्नं आपणीं देहा करै आसा किये दै।

### परमेश्वरा संघे मेल-मलाप

11 इहय करै समझाऊआ हाम्हां प्रभूए डरा हेठै रही करै लोगा बी और म्हारअ हाल आसा परमेश्वरा दी प्रगत; और मेरी आशा आसा एही कि थारें दमागा दी बी लोळी हुअ प्रगत। 12 हाम्हां निं आपणीं बड़ाई थारें सद्दैनं करदै आथी, पर हाम्हां दैआ तम्हां लै आपणें बारे दी घमण्ड करनेओ मौकअ, ताकि तम्हें तिन्नां लै उतर दैई सके जुण मना दी निं पर दखाऊटी गल्ला दी करा घमण्ड। 13 जै हाम्हां बेसुध आसा, ता हाम्हां आसा परमेश्वरा लै, और जै चतैन आसा, ता हाम्हां आसा तम्हां लै। 14 किल्हैकि मसीहो प्यार दैआ हाम्हां मजबूर (विवश) करी; ऐतै तैणीं कि हाम्हां समझा इहय कि जै एक सोभी लै मुंअ ता तै मूँए सोभ। 15 और सह मूँए एते तैणीं सोभी लै कि जुण जिऊंदअ आसा, सह निं आजू पोही आपू लै जिऊई; पर तेऊलै जिऊए जुण तिन्नां लै मूँअ और बादा का हुअ जिऊंदअ।

### मसीह दी नऊई सृष्टी

16 और ऐभा पोही निं हाम्हां कोहै शरीरे साबै समझणें आथी। हाम्हां समझअ त मसीह बी शरीरे साबै, तैबी निं सह ऐभा पोही इहय समझणअ आथी। 17 तै जै जुण कुण मसीहा दी आसा, ता सह आसा नऊई सृष्टी: पराणीं गल्ला गई बिती; भाळा, सोभै गल्ला हुई नऊई। 18 ईयां सोभै गल्ला आसा परमेश्वरे तरफा का, जुंणी मसीहा संघे म्हारअ मेल मलाप किय, और मेल मलापे सेऊआ आसा हाम्हां लै देंनीं दी। 19 अर्थात् परमेश्वरें हेरअ करी मसीहा दी रही करै आपू संघे संसारो बी मेल मलाप, और तिन्नं अपराधो बी निं तिन्नां लै दोष लाअ आथी, और तेऊ आसा हेरअ द अह मेल मलापो वचन हाम्हां का सभाळी।

20 इहय करै आसा हाम्हां मसीहे राजदूत, इहय समझा कि परमेश्वर समझाऊआ हाम्हां बाती, हाम्हां करा मसीहे तरफा का अरज कि परमेश्वरा संघे कर मेल मलाप। 21 जुण पापा का नजाण थिय, सह ई ठहराऊअ तेऊ हाम्हां लै पाप, कि हाम्हां तेऊ दी हई करै परमेश्वरे धार्मिकता बणें।

6 जुण हाम्हां परमेश्वरे भागी आसा, तियां समझा इहय बी कि जुण परमेश्वरो अनुग्रह तम्हां लै हुअ, तेऊ निं ज़ारें दैई नाशणें। 2 किल्हैकि सह ता बोला इहय कि, “आपणीं खुशीए बगतै हेरी मंए तेरी शूर्णी, और उधारे धैळी की मंए तेरी मदद।” भाळा एभै आसा सह खुशीओ धैळअ, और भाळा एभै आसा सह उधारो धैळअ। 3 हाम्हां निं कोही बी गल्ला दी टोहळा खाणां लै मोकअ ई दैन्दै आथी, ताकि म्हारी सेऊआ दी कोई दोष निं एछी

सके। 4 पर हर गल्ला हेरी करै करा परमेश्वरे सेवका जिहै आपणें सदगुणा प्रगत, बड़ै धीर धरी करै, क्लेशा संघे, दळिदरा संघे, दुख मुसीबता संघे, 5 कोड़ै खाणें संघे, कैद हुई करै, हुल्लाडा संघे, मैन्था संघे, बिहुदै रही करै, व्रता करने संघे, 6 और पवित्रा संघे, ज्ञाना संघे, धीरजा संघे, दयालुता संघे, और पवित्र आत्मां संघे, 7 और सच्चै प्यारा संघे, सचाईए वचना संघे, और परमेश्वरे सामर्था संघे, और धार्मिकते हथियारा संघे, जुण उळटै-सुळटै हाथा दी आसा, 8 आदरा और निरादरा संघे, दुर्नाम और सुनामा संघे। ईयां जांळीयां भरमांउणें आळै जिहै, तैबी आसा सच्चै; 9 अनजाणा जिहै ता जांळीयां, तैबी आसा (मशूर) प्रसिध्द; मुँए दै जिहै ता जांळीयां, तैबी आसा जिऊंदै; मारा खाणें जोगी, पर जानी का निं मारी सकदै; 10 शोग मनांऊणें आळै ता जांळीयां, पर सदा रहा मौजा मस्ती मनांऊंदै; और कंगाळा जिहै ता जांळीयां, पर बड़ैभारी लोगा दैआ तियां सेठ बणांई; और तियां आसा ईहै, तिन्नां सेटा जै किछ बी नाई होए, ता तैबी डाहा तियां सोभ किछ।

11 हे कुरिन्थियों हाम्हां की तम्हां संघे खुल्ली करै गल्ला, म्हारअ दिल आसा तम्हां लै खुल्लअ। 12 तम्हां लै निं म्हारै मनां दी किछ बी संकोच आथी, पर थारै ई मनां दी आसा संकोच। 13 आपणें शोहरू समझी करै बोला हूँ तम्हां का इहय कि तम्हें बी दैआ तेऊ बदळै दी आपणअ दिल खोळी।

### इहै जूआं दी निं जुंढिया जुण बराबर निं आथी

14 अविश्वासी (जुण प्रभू यीशू मसीह नाई मंदै) संघे निं मेळ-जोळ आथी, किल्हैकि धर्म और अधर्मां कै मेळ-जोळ हणअ? न्हैरै और प्रैशैए कै संगत? 15 और मसीहो बलियाला संघे कै लगाव? या विश्वासी और अविश्वासीओ आपू मांझै कै नातअ? 16 और मुर्ति संघे परमेश्वरे मांदरो कै सबंध? किल्हैकि हाम्हां ता जिऊंदै परमेश्वरें मांदर आसा, जिहअ परमेश्वरें बोलअ द आसा कि, “मूँह बसणअ तिन्नां दी, और तिन्नां दी करनअ मूँह हाँडी-फीरी करनअ; और हूँ हणअ तिंनो परमेश्वर और तियां हणें मेरै लोग।”

17 तैही बोला प्रभू, “कि तिन्नां बीचा का निखळा और जुदै रहा; और अशुध्द चिजा निं छुँही, ता तै करनं मूँह तम्हें ग्रहण

18 और हूँ हणअ थारअ (बाब) पिता, और तम्हें हणें मेरै शोहरू, शोहरी। और अह आसा सर्वशक्तिमान प्रभू परमेश्वरो वचन।”

7 ऐबै हे प्रियो, जै हाम्हां ईयां प्रतिज्ञा आसा भेटी दी, ता तै एछा, हाम्हां रहैऊणीं आपणीं आत्मां और शरीरे सारी मलिनता साफ करी करै और परमेश्वरे डरा हेठै रही करै पवित्रता।

### पौलुसो आनंद

2 हाम्हां लै दैआ आपणें दिला दी जैघा। हाम्हां निं कोही संघे बुरअ बभार किय, और नां कोहीओ किछ बगाळअ आथी, और नां कुण ठगअ आथी। 3 हूँ निं तम्हां लै तै आथी लागअ द बोलदअ, कि तम्हें लोळी दोषी हुए, किल्हैकि मंए आसा हेरअ द तम्हां लै पैहलै ई बोली, कि तम्हें आसा गये दै म्हारै दिला दी ईहै बसी कि हाम्हां आसा जानी दैणां लै बी त्यार। 4 हूँ आसा लागअ द तम्हां का बड़ै विश्वासा संघे बोलदअ, मूँह आसा तम्हां परेदै बडअ ही गर्ब; हूँ गअ शान्ती संघे भरुई। हूँ रहअ सारै क्लेशा (दुख) दी भरपूर आनंद पळी।

5 किल्हैकि जेभै हाम्हां मकिदुनियां दी आए, तैबी निं म्हारै शरीरा चैन भेटअ आथी, हाम्हां भेटा त चौहू बाखा का दुख; बागें आसा ती लड़ाई लागी दी, और भितरी आसा ती भयकर गल्ला-बाता। 6 तैबी देंनीं दुही लै शान्ती दैणें आळै परमेश्वरें, तीतुसे ऐछणें करै हाम्हां लै शान्ती; 7 और नां सिधअ तेऊए ऐछणें करै, तेऊए तेसा शान्ती करै बी जुण तेऊ तम्हां का भेटी ती। तेऊ शणांऊअ थारी लाळसा, और थारै दुख, और मुल्लै थारै धुनो समाचार हाम्हां का, जेता करै मूँह होर बी आनन्द हुअ। 8 किल्हैकि मंए पाए तम्हें आपणीं चिठी करै शोगा दी, पर तेता का निं हूँ पचताऊंदअ आथी, जिहअ हूँ पैहलै पचताऊआ त, किल्हैकि हूँ भाळा कि तैहा पत्री करै शोग ता हुअ, पर सह आसा त थोळी घळी लै। 9 और ऐबै आसा हूँ खुश, पर ऐतै तैणीं निं आथी कि तम्हां आसा शोग हुअ द, वरनू ऐतै तैणीं कि तम्हें फरेऊअ तेऊ शोगे बजहा आपणअ मन (विश्वास कीय), किल्हैकि थारअ शोग आसा त परमेश्वरे मरजी करै कि म्हारी तरफा का निं लोळी तम्हां किछू गले हानि पुजी। 10 किल्हैकि

परमेश्वर भक्ति करै हआ इहय पचताअ पैदा कि जेतो परिणाम मोक्ष (उध्दार) हआ और तेता करै नि तेखअ पचताऊँदै आथी। और जै संसारो शोग करे ता तेता करै हआ मौत ई पैदा। 11 और भाळा, ऐहा ई गल्ला करै कि तम्हां परमेश्वर भगतीओ शोक हुआ ता तम्हां दी केतरअ उत्साह और प्रत्युत्तर, रिस और डर, और लाळसा, और धुन और दण्डा दैणें वचार हूए पैदा? तम्हें दैनअ सोभी प्रकारे रहैऊई कि तम्हें आसा ऐहा गल्ला का बेकसूर। 12 तेखअ सह जुंण मंए तम्हां सेटा लिखअ त, सह नां मंए तिन्नै बजहा लिखअ जुंणी अन्याय किय, और नां तिन्नै बजहा ज़सा लै अन्याय किय, पर सह किय ऐते तैणी कि जुंण थारअ उत्साह जुंण हाम्हां लै आसा, ताकि परमेश्वर सहनै सह तम्हां दी प्रगत होए। 13 तैहीता हाम्हां शान्ती भेटी।

म्हारी एसा शान्ती करै हुआ तितुसे आनन्दे बजहा होर बी आनन्द, किल्हैकि तेऊओ ज़िऊ आसा हुआ द तम्हां सोभीए बजहा हरअ-भरअ। 14 किल्हैकि जै हूँ तिन्नै सहनै थारै बारै दी किछ घमण्ड रहैऊँ; ता शर्मिदअ नि हुआ, पर जेही हाम्हें तम्हां का सारी गल्ला दैनी ती सच्ची-सच्ची खोजी, तिहअई म्हारअ घमण्ड रहैऊणअ तितुसे सहनै बी निखळअ सच्चअ। 15 जेभै तेऊ तम्हां सोभीए आज्ञाकारी हणअ आद फिरा कि तम्हें किहै मिलै तै तेऊ संघे डरदै-डरदै और काम्बदै-काम्बदै तेऊ संघे, और तेऊओ प्यार बढा तम्हां बाखा लै होर बी जादअ। 16 हूँ आसा बडअ खुश, किल्हैकि मूँह आसा तम्हां परँदै हर गल्लो भरसअ।

### खुल्लै दिलै दान दैणअ

8 ऐबे हे भाइयो, हाम्हा दैणअ तम्हां लै परमेश्वर तेऊ अनुग्रहो समाचार, जुंण मकिदुनिये कलीसिया दी हुआ। 2 कि क्लेशे बड़ी परिक्षा दी तिन्नै बडै आनन्द और बडै दळिदरा दी गई तिन्नै उदारता बड़ीभारी बडी। 3 तिन्नै बारै दी आसा मेरी अह ग्वाही कि तिन्नै दैनअ आपणीं समर्था वरन आपणीं समर्था का बी जादअ। 4 और ऐऊ दाना दी और पवित्र लोगे सेऊआ दी भागी हणें, और अनुग्रहे बारै दी हाम्हां का भी-भी अरज की, 5 और जेही हाम्हें आशा की ती, तिहअई नि वरन तिन्नै प्रभू लै बी परमेश्वर मरजी करै हाम्हें बी आपणें आपू लै दैनै। 6 तैहीता हाम्हें तितुसे भी समझाउअ कि जेहअ तेऊ पैहलै शुरु कीय त, तिहअ ई तम्हां बिचै बी ऐऊ दान दैणें कामां लए पूरअ बी करी। 7 तैहीता जिहअ तम्हें हर गल्ला दी विश्वास, वचन, ज्ञान और सोभी रंगे जतना दी, और तेऊ प्यारा दी जुंण हाम्हां संघे डाहा, तियां बढदै रहा, तिहैई ऐऊ दान दैणें कामां दी बी रहा बढदै।

8 हूँ नि आज्ञे रिती करै बोलदअ, पर हूँ बोला दुजै उत्साहा संघे थारै प्यारे सच्चाई परखणें तैणी। 9 तम्हें म्हारै प्रभू यीशू मसीहे अनुग्रहे बारै ता ज्ञाणा कि, सह सेठ हई करै भी बणअ थारी तैणी कंगाळ, ताकि तेऊए कंगाळ हणें करै तम्हें सेठ होए। 10 एसा गल्ला लै आसा मेरी अहई सलाह; तम्हां लै बधिया, जुंण ऐकी साला का नां ता सिधअ ऐऊई कामां करनै दी, बल्कि एसा गल्ला चाहणें दी बी पैहलै हूए तै, 11 और ऐबे करा तम्हें ऐऊ कामां बी पुरै, जिहै तम्हें मरजी करना लै त्यार आसा तै, तिहैई आपणें-आपणें ढबै धेलेए साबै करा पुरै बी। 12 किल्हैकि जै मन त्यार होए ता दान बी ढाका तेतेई साबै जुंण तेऊ का आसा, ना कि तेते साबै जुंण तेऊ का आथी ई नि। 13 इहय नि आथी कि दुजै लै भेटा आराम और आपू लै भेटआ दुख, 14 पर बराबरीए वचारा संघे लोळी ऐऊ बगत थारी बढत तिन्नै घटी दी काम आई, ताकि तिन्नै बढत बी थारी घटी दी काम एछी सके, ताकि बराबरी होए। 15 जिहअ लिखअ द आसा कि, "जुंणी खासअ ज्ञाळअ, तेऊ लै नि किछ जादअ निखळअ, और जुंणी थोळअ ज्ञाळअ, तेऊ लै नि कीछ घट बी निखळअ।"

### तितुस और तेऊ संघे कामां करनै आळै साथी

16 परमेश्वरो आसा धन्याबाद, जुंणी तम्हां लै सहैई उत्साह तितुसे दिला दी बी पाअ, 17 कि तेऊ म्हारअ समझाऊणेंओ मन, बल्कि बडअ उत्साही हई करै आपणीं इच्छा संघे आसा तम्हां सेटा लै आअ द। 18 हाम्हें आसा तेऊ संघे सह भाई बी भेजअ द ज़सरअ नांओ सुसमाचारे बारै दी सोभी कलीसिया दी आसा फैलअ द; 19 और ऐतरअ ई नि, सह आसा कलीसिया (मंडळी) आळै बणांअ द, कि सह लोळी ऐऊ दानें कामां दी हाम्हां संघे

डेऊअ। हाम्हें करा इन्नां सेऊआ ऐतै तैणहीं, ताकि प्रभुए महिमां और म्हारै मनं त्यारी लोळी प्रगत हुई। 20 और हाम्हें रहा ऐहा गल्ला दी चौकस, कि ऐऊ उदारते कामां काजे बारै दी ज़सरी सेऊआ हाम्हें करा, कोई बी हाम्हां लै दोश नां लाई सके। 21 किल्हैकि जुंण गल्ला प्रभू ई सेटा नि बल्कि आदमी सेटा बी आसा भली, हाम्हें करा तिन्नै चिन्ता। 22 और हाम्हें आसा तेऊ संघे आपणअ भाई बी भेजअ द, जुंण हाम्हें भी-भी परखी करै बड़ी-बड़ी गल्ला दी उत्साहीत भाळअ; पर ऐबै आसा तेऊ तम्हां दी बडअ भरसअ, ऐता करै आसा सह होर बी जादअ ई उत्साही हुआ द। 23 जै कुंण तितुसे बारै दी पूछे, ता सह आसा मेरअ साथी और तम्हां लै मेरअ सहकर्मी; और जै म्हारै भाईए बारै पूछे, ता सह आसा कलीसिया आळैओ भेजअ द और मसीहे महिमा। 24 ऐबै म्हारअ आपणअ प्यार और घमण्ड जुंण थारै बारै दी आसा तेऊ रहैऊआ कलिसेए सहनै सिध करी करै।

### साथी-मसीही लै सहायता

9 ऐबे खोजूँ हूँ तेहा सेऊआ चाकरीए बारै जुंण पवित्र लोगा लै हआ, मूँह नि तम्हां लै लिखणअ ज़रूरी आथी। 2 किल्हैकि हूँ हेरा ज़ाणी थारै मना, जेते बजहा हूँ थारै बारै दी मकिदुनिया दी रहणें आळै लोगा का घमण्ड रहैऊआ कि अखिए लोग आसा एकी साला ओहीँ त्यार हूए दै, और थारै उत्साहे आसा दैनै दै होर लोग बी उभारी। 3 पर मंए आसा तियां भाई ऐते तैणी भेजै दै कि जुंण घमण्ड हाम्हें थारै बारै दी आसा रहैऊअ द, सह नि लोळी ऐहा गल्ला दी व्यर्थ हुआ; पर जिहअ मंए तम्हां लै बोलअ तम्हें रहा तिहैई त्यार, 4 इहय नि लोळी हुआ कि जै कुंण मकिदुनियां दी रहणें आळअ मुँ संघे ऐछे और तम्हें नी त्यार हूए दै होए, ता हई सका कि ऐऊ भरसे बजहा संघे हाम्हें शर्मिदै होए। 5 और तैही समझी मंए तिन्नां सोभी भाई का अरज करनीं ज़रूरी कि तम्हां सेटा लए पैहलै नाशी, और थारी उदारतो फळ ज़सरै बारै दी पैहलै ई आसा त वचन दैनअ द, और त्यार डाहै करी कि अह दबाबा दी नि बल्कि उदारते फळा जिहअ लोळी हुआ।

### दान किहय करै दैणअ

6 पर गल आसा ऐही कि, जुंण थोळअ बऊआ, सह लऊआ बी थोळअ ई, और जुंण खासअ बऊआ सह लऊआ बी खासअ। 7 जेभै तम्हें दान दैआ, ता जिहअ तम्हें मना दी सोचे ता तम्हें करै तिहअ ई दान, कुळकुळाऊई करै नि करी, और नां दबाबा दी, किल्हैकि परमेश्वर करा तिन्नां संघे प्यार जुंण दिला का दान दैआ। 8 परमेश्वरो अनुग्रह सका तम्हां लै सोभी रंगे सुख सुभिदा दैई, जेता करै तम्हां लै हर गल हर बगत जुंण तम्हां ज़रूरी आसा सह तम्हां सेटा रही सके; और हर भलै कामां करना लै सका तम्हां सेटा सोभ किछ हई। 9 और जिहअ लिखअ द आसा कि, "तेऊ दैनअ कंगाळा लै दान तरैळी करै, तेऊओ धर्म रहणअ सदा ही बणीं।" 10 और जुंण बऊणें आळै लै बेजअ दैआ, और खाणां लै रोटी दैआ, तेऊ दैणअ तम्हां लै बेजअ, और तम्हें करनै तेऊ फलवन्त; और तेऊ बढाऊणें थारै धर्म फळ। 11 तम्हें रहा हर गल्ला लै सोभी प्रकारे उदारता लै जुंण हाम्हां करै परमेश्वरो धन्यबाद कराऊआ; धनबान करदै लागी। 12 किल्हैकि ऐहा सेऊआ चाकरी पुरै करनै करै नि सीधी पवित्र लोगे ज़रूरता पूरी हंदी आथी बल्कि लोग बी करा परमेश्वरो धन्याबाद। 13 किल्हैकि ऐहा सेऊआ करै प्रमाण समझी करै, तियां करा परमेश्वर महिमा प्रगत कि तम्हें रहा मसीहे सुसमाचारा मनी करै तेऊए अधीन, और तिन्नां सोभीए मदद करनै दी रहा उदारता प्रकट करदै। 14 और तियां करा तम्हां लै प्राथणां, और थारी लालसा करदै रहा ऐते तैणी कि तम्हां परँदै आसा परमेश्वरो बडअ ई अनुग्रह। 15 परमेश्वरो आसा तेऊ दाना लै धन्याबाद ज़सरअ हाम्हें नि बखान ई करी सकदै।

### पौलुसो अधिकार

10 हूँ आसा सहैई पौलुस जुंण थारै सहनै दीन आसा, पर पिठी पिछू करा तम्हां लै हिमन्त, और हूँ समझाऊआ तम्हां मसीहे नम्रता और कोमलते बजहा; 2 कि हूँ करा ऐही अरज कि थारै सहनै नि मूँह निर्भय हई करै लोळी हिमन्त करणी हुई, जिहअ हूँ कोई लोगा लै जुंण हाम्हां शरीरै

अनुसार चाहणें आळें समझा, हूँ हिमन्त रहैऊणेंओ बच्चार सोचा। 3 किल्हैकि हाम्हें शरीरें साबै ता हांडा फिरा, तैबी निं शरीरे साबै लळदैं आथी।

4 किल्हैकि म्हारै लड़ाईए हथियार निं शरीरिक आथी, पर गह्ला कोटा ढोळणा लै आसा परमेश्वरे तरफा का सामर्थी। 5 इहय करै हाम्हें आपणें खुआबा और हर एक उछटी गला; जुंण परमेश्वरे बछैणें बिरोधा दी उझिआ, तेतो करा हाम्हें खंडन और हरेक भाबना कैद करी करै बणांआ मसीहे आज्ञाकारी। 6 और त्यार रहा कि जेभै थारअ आज्ञापालन पूरअ हई जाए, और तियां जुंण हरेकी रंगै आज्ञा नाई मनणेंओ बदळअ लई सके।

7 तम्हें भाळा तिन्नाई गला जुंण थारी आच्छीए सखनै आसा। और जै कहा आप्पू दी भरोसअ आसा कि हूँ आसा मसीहो, ता सह जाणै इहय बी कि जिहअ सह मसीहो आसा, तिहई आसा हाम्हें बी। 8 किल्हैकि जै हूँ तेऊ हके बारै होर बी घमण्ड रहैऊँ, जुंण प्रभू थारै बगाळणें लै निं पर बणांणा लै आसा हाम्हा लै दैनअ द एता करै निं हूँ शरमिदअ हणअ। 9 एता आसा लागअ द हूँ एते तैणीं बोलदअ ताकि एसा चिठी करै निं लोळी हूँ तम्हं डरैऊणें आळअ हुअ। 10 किल्हैकि तियां बोला कि, “तेऊए पत्री आसा गंभीर और असर करनैं आळी; पर जेभै सह सखनैं हआ, ता तेभै ज़ाह्नीआ सह शरीरा का कमजोर और गला-बाता दी हळकअ।” 11 जुंण इहय बोला, सह डाहै इहय समझी कि जिहअ पिठी पिछुए चिठी दी म्हारै वचन आसा, तिहई हणै थारै सखनै म्हारै काम बी। 12 किल्हैकि हाम्हां निं ऐतरी हिमन्त आथी कि हाम्हें तिन्नां मांझै ऐहै आदमी संघे आप्पू गीणीं और तिन्नां संघे मीली सके जुंण आपणीं सराहणा आप्पू करा, और आपणें आप्पू मांझै नापी-तोली करै एकी दुजै संघे मलान करी करै मुख बणां।

13 हाम्हां ता निं सीऊंआ का बागै कधि घमण्ड करनअ आथी, पर तैहाई सीऊंआ तैणीं करनअ घमण्ड जुंण परमेश्वरें दैनी दी आसा, और तेथ आसा गए दै तम्हें बी एछी, और हाम्हां करनअ तेतेई साबै घमण्ड बी 14 किल्हैकि हाम्हें निं चाहदैं आपणें आप्पू सीऊंआ का बागै बढाऊणअ, जिहअ कि तम्हं तैणीं नां पुजणें दशा दी हआ, बल्कि मसीहो सुसमाचार शुणाऊँदैं आसा गए दै तम्हं तैणीं पूजी। 15 हाम्हें निं आपणीं हदा का जादअ दुजेए मँन्था दी घमण्ड करदैं आथी; पर हाम्हां आसा आशा कि जिहअ-जिहअ थारअ विश्वास बढदअ रहणअ, ता तिहै-तिहैई रहणें हाम्हें आपणीं हदे साबै थारी बजहा होर बी बढदैं, 16 ताकि हाम्हें थारी हदा का बढीकरै सुसमाचार शुणाऊँई, और इहय निं कि हाम्हें दुजेए हदा भितरी करनअ बणें बणांणें कामां दी घमण्ड। 17 पर जुंण घमण्ड करे सह करे सिधअ प्रभू दी। 18 किल्हैकि जुंण आपणी बड़ाई आपी करा, तेउ निं प्रभू ग्रहण करदअ आथी, पर जसरी बड़ाई प्रभू करा, तेऊई करा ग्रहण।

### पौलुस और झुठै प्रेरित

11 जै तम्हें मेरी थोळी जेही मुखता बी सैहंदै, ता किहअ भलअ हणअ त; हाँ मेरी सैहा बी। 2 किल्हैकि हूँ रहअ तम्हं लै ईश्वरे धुनां ऐतै तैणीं लांदअ लागी कि मंणें आसा ऐकी ई आदमी का थारी गला खोजी दी कि तम्हें दैणें पवित्र कुंआरी जुआनीं जिहै मसीहा का सभाळी। 3 पर हूँ डरा कि जेही सांपे आपणी चलाकी करै हव्वा बहकाऊई ती, तेही निं लोळी थारी बी तेऊ मनें सिधाई और पवित्रता जुंण मसीहा संघे लोळी ती हुई, सबी भ्रष्ट की। 4 जै कुंण तम्हं सेटा एछी करै कहा दुजै यीशूओ प्रचार करे, या जसरअ प्रचार हाम्हें नाई किय; और जै कोई होर आत्मां भेटे, जुंण पैहलै निं भेटी ती; या कोई होर सुसमाचार शणाऊँओ जुंण तम्हें पैहलै नाई मनअ त, ता तै हणअ त थारअ सैहणअ ठीक। 5 हूँ ता समझा कि हूँ निं किछू गला दी बड़ै-बड़ै प्रेरिता का कम आथी। 6 जै हूँ बोळणें-चाळणें दी अनाडी ता आसा, ता तैबी निं हूँ ज्ञाना दी पिछू आथी। हाम्हें किय अह हर गला दी हर तरहा तम्हं लै प्रागट।

7 मंणें के ऐहा गला दी किजै पाप किय कि मंणें शणाऊँअ तम्हं लै परमेश्वरो सुसमाचार सैत मँत; और आपणें आप्पू बणअ होछअ ताकि तम्हें बड़ै बणीं सके? 8 मंणें लूटी होर कलीसिया, मतलब मंणें लई तिन्नां का मजदुरी ताकि हूँ थारी सेऊआ करूँ। 9 और जेभै हूँ तम्हं संघे थिय, और जेभै मूँह घटी हुई, ता मंणें निं कोही लै भार पाअ, किल्हैकि होरी मसीह भाई दैनी मेरी

मकिदुनियां का एछी करै मेरी कर्मी पूरी करी; और हूँ निं तम्हं लै आप्पू भार बणअ आथी, और नां बणदअ आथी। 10 जै मसीहे सच्चाई मूँह दी आसा, ता अखाए देशा दी निं हूँ कोही ऐऊ घमण्डा का रोकणअ आथी। 11 किल्है? ऐतै तैणीं कि हूँ कै तम्हं संघे प्रेम करदअ निं आथी? पर परमेश्वर जाणा कि हूँ डाहा तम्हं संघे प्रेम।

12 पर जुंण हूँ करा, मूँह करनअ तिहअ ई कि जुंण लोग दाव-पेच लोळा, तिन्नां निं हूँ दैदअ दाव-पाणें, ताकि जहा गला दी तियां घमण्ड करा, तैहा दी लोळी तियां हाम्हां ई जिहै हुऐ। 13 किल्हैकि ईयां ईहै लोग आसा झूठै प्रेरित, और धोरखै करै कामां करनैं आळै, ईयां हआ मसीहे प्रेरित हणैओ रूप धरनैं आळै झूठै। 14 अह निं किछै रहैण हणेंए गल आथी, किल्हैकि शतान धरा आप्पू बी मसीहे स्वर्ग दूतो रूप बी; 15 और जै तेऊए सेवक बी धर्मा करनैं आळैओ रूप बी बदळे, ता सह निं कोई बड़ी गल आथी, पर तिन्नां अन्त हणअ तिन्ने कामें साबै।

### प्रेरिते रूप पौलुसो दुख भोगणअ

16 हूँ बोला बी कि तम्हें निं मूँह मुख समझी आथी, नाई ता मूँह मुख समझी करै ई मना मेरी और सैहा, ताकि हूँबी थोळअ जिहअ घमण्ड करी सकूँ। 17 इहय बेघडक घमंडा दी बोली करै निं हूँ प्रभूए आज्ञा साबै बोलदअ मानों कि हूँ बोला मुखता संघे। 18 जै ईयां लोग शरीरे साबै घमण्ड करा, ता मुंबी करनअ घमण्ड। 19 तम्हें ता समझदार हई करै बी सैहा आनंदा करै मुखे। 20 किल्हैकि जेभै तम्हं कुंण आपणअ दास बणांआ या खा, या फसाऊआ, या आपणें आप बडअ बणांआ, या थारै मुँहां दी चैडै बाहा, ता तम्हें सैहा तेता बी। 21 मेरअ बोळणअ आसा बेईजतीए तरीकै जिहअ जाळणअ हाम्हें तै तेता लै कमजोर जिहै।

पर जेभै कुंण कोई गला दी हिमन्त करा-ता हूँ बोला मुखता संघे-ता हूँबी करा हिमन्त। 22 कै तियां इब्रानी आसा? हूँ बी आसा; कै तियां इस्त्राएली आसा? हूँबी आसा; कै तियां अब्राहमं वंश आसा? हूँबी आसा; कै सिधै तियांई आसा मसीहे सेबक? 23 (हूँ बोला पागला जिहअ) कि हूँ आसा तिन्नां का जादअ मँन्था करनैं आळअ, और भी-भी कैद हणै दी, और कोडै खाणें दी, और भी-भी मौते मुसीवता दी। 24 पांजा बेरी खाए मंणें यहुदीए हाथै ऊन्ताळी-ऊन्ताळी कोडै। 25 और चिई बेरी खाए मंणें शोडै, और ऐकी बेरी बाही मुलहै पाथरा करै, और चिई बेरी चुटअ झाज जेथ हूँ बेटअ द आसा त; एक राच और एक धैळी काटी मंणें समुद्रा दी। 26 हूँ रहअ कई बेरी सफरा दी, नदीए खातरै दी, और डाकुए खातरै बीच, और आपणीं ज़ातीए खातरै दी, और होरी ज़ातीए खातरै दी, और नगर गराऊँणें खातरै दी; और जंगलै रहअ खातरै दी, और समुंद्रे खातरै दी, और झूठै भाई बिचै रहअ खातरै दी।

27 कष्ट और मँन्था दी; और भी-भी बीहुदैं रहणें दी, और भुखा नचीशा दी; और भी-भी व्रता करनै दी; और टाँडै-शैळै दी; और उघाडै दी रहणें करै। 28 और होरी गला छाडी, जुंण मंणें खोजी निं आथी, सारी कलीसिये फीकर हआ मूँह धैळ दबाऊँदी लागी दी। 29 कसरी कमजोरी करै निं हूँ कमजोर हंदअ आथी? और कसरी ठोह्ला खाणें करै निं मेरअ दिल दुखदअ आथी? 30 जै घमण्ड करनअ जरूरी आसा, ता मूँह करणअ आपणी कमजोरीए गला दी घमण्ड। 31 प्रभू यीशूओ परमेश्वर और पिता परमेश्वरो आसा सदा धन्याबाद, हूँ ज़ाणां कि हूँ निं झुठअ बोलदअ आथी। 32 दमिशका दी अरितास राजेए तरफा का जुंण हाकिम आसा त, तेऊ आसा ती मूँह ढाकणां लै दमिशकिए नगरा दी पहरअ लाअ द, 33 और हूँ उतरअ टोकै दी बेशी करै ताकि बाती शहरपनाहा बाती उंधै तेऊए हाथा का नीखळअ बची।

### पौलुसो दिव्य दर्शन और कमजोरी

12 एही ता निं घमण्ड करनअ मुलहै ठीक आथी, तैबी लागा मूँह घमण्ड करनअ; मूँह करनी प्रभू दैनें दै दर्शणें और प्रकाशणें चरचा। 2 हूँ ज़ाणां मसीहा दी एकी आदमी; चौदा साला हुई कि नां ज़ाणें सह देहा संघे, कि बिणहीं देहै, परमेश्वर ई ज़ाणा; इहय आदमी दैनअ चिरे स्वर्गा तैणीं चकी। 3 हूँ ज़ाणा इहय आदमी ना ज़ाणै सह देहा संघे कि बिणहीं देहै, एसा गला ज़ाणां परमेश्वर ई, 4 कि सह स्वर्गा लै चकअ, और ऐही गला शुणीं जुंण बोलणें

निं आथी; जुंण गल्ला आदमीए मुँहां का ठीक निं आथी। 5 इहै आदमीं परेंदे ता करनअ मूँह घमण्ड, पर आप्पू परेंदे निं हूँ आपणीं कमजोरी छाडी घमण्ड करदअ आथी। 6 किल्हैकि जै हूँ घमण्ड करनअ बी चाहूँ ता मुख निं हणअं, किल्हैकि जै हूँ सचअ बोलूँ, तैबीं रुका हूँ, इहय निं हआ कि जिहै कोई मूँह भाळा, या मूँह शुणां, और मूँह तेता का बी जादअ समझे। 7 ऐते तैणीं कि हूँ निं खास्सै प्रकाशना करै फूलअ लोळी, मेरै शरीरा दी चभेऊअ एक काण्डअ, मतलब शैतानो एक सपाही, ताकि सह मुल्है धमूकै बाहे और हूँ निं फुलअ लोळी। 8 ऐतै बारै की मंएँ प्रभू का चिई बेरी अरज कि अह लोळी मुखा दूर हुआ। 9 पर तेऊ बोलअ कि, “ताल्है आसा मेरअ अनुग्रह ई बतेहअ; किल्हैकि मेरी सामर्थ हआ कमजोरा परेंदे सिध्द।” और तैही करनअ मूँह आपणीं कमजोरी परेंदे बडै आनंदा दी घमण्ड कि यीशू मसीहे सामर्थ लोळी मूँह परेंदे छाया करदी रही। 10 एते बजहा आसा हूँ मसीहा लै कमजोरी दी, और निंदा दी और दळीदरा दी, और उपद्रभा दी, और मुसीबता दी खुश; किल्हैकि जेभै हूँ कमजोर हआ, ता तेऊए नांऊंआं करै हआ हूँ शक्तिशाली।

### कुरिन्थिए विश्वासी लै पौलुसो फिकर करनअ

11 हूँ मुख ता बणअ, पर तम्हें ई किय हूँ इहय करनां लै मजबूर। तम्हा लागा त हूँ हथू सराहणअ पै, किल्हैकि हूँ निं किछ बी आथी त, पर तिन्नां बडै का बडै प्रेरिता का निं हूँ किछी गल्ला दी कम आथी। 12 प्रेरिते लक्षण बी रहैऊए तम्हां बिचै सभै रंगे धीरजा और जिन्हां करै, नोखै कामां और सामर्थ कामां करै। 13 तम्हें कहा जेही गल्ला दी आसा तै होरी कलिसीया का कम, सीधै ऐथ कि मंएँ पाअ तम्हां परेंदे आपणअ भार, मेरै ऐऊ अन्याय करा माफ।

14 भाळा, हूँ आसा तम्हां सेटा लै चिऊथी बारी ऐछणां लै त्यार, और हूँ निं तम्हां परेंदे किछै भार डाहंदअ आथी, किल्हैकि हूँ चाहा तम्हां, थारी धनमाया निं हूँ चाहंदअ आथी किल्हैकि शोहरु निं लागदी मां-बाबा लै धन दौलत कठा करनीं, पर मां-बाबा लागा शोहरु लै करनीं। 15 हूँ करूँ थारी आत्मां लै बडी खुशी करै खर्चअ, बल्कि आप्पू बी हऊँ हूँ खर्चै। कै जेतरअ जादअ हूँ तम्हां संघे प्यार डाहा, तम्हां कै मूँह संघे तेता का कम प्यार डाहणअ? 16 इहय कै हई सका कि मंएँ निं तम्हां परेंदे बोझ पाअ आथी, पर चलाकी करी करै फसाऊए मंएँ तम्हें धोखै देई; 17 जुंण मंएँ तम्हां सेटा लै भेजै, कै मंएँ तिन्नां बाती धोखअ करी करै तम्हां का किजै ल्अ। 18 मंएँ भेजअ तितुस समझाऊई करै तेऊ भाई संघे, तेऊ तितुसै कै तम्हां का छळ-कपट करी करै किजै नियं किन्नीं? कै हाम्हां ऐकी आत्मै चलाए निं चलणअं? और कै एकी रसतै निं हांढणअं?

19 तम्हें समझअ हणअ ऐभै तैणीं इहय कि, हाम्हां आसा लागे दै थारै सहनै आपणीं गले सफाई दैन्दै। हाम्हां बोला परमेश्वरे उपस्थिती दी ज्ञाणीं करै मसीहा दी हई करै, हे प्यारेओ, सोभै गल्ला बोला हाम्हां थारी भढोतरीए तैणीं। 20 किल्हैकि मूँह आसा ऐही डअर कि किधी इहय निं हआ कि जेभै मूँह

ऐछणअ, और जिहै मूँह तम्हें हुए लोळी और तम्हें निं तिहै हआ; और हूँबी जेभै तम्हां नाई लोळी त आअ और हूँ ऐछे तेभै; और तम्हां दी होए झगळे, डाहा, क्रोध, विरोध, ईष्रया, चुगली, अभिमान और बखेळै; 21 और किधी इहय निं हआ कि मेरअ परमेश्वर पा तम्हां सेटा ऐछणां लै मुल्है जोर, और मूँह लागा भी सोभी लै शोक करनअ, जुंणी पैहलै पाप कीए तै, और गंदे काम और भ्यभिचार और लुचैपना करै जुंण तिन्नें किय, मन निं फरेऊअ।

### आखरी चतैनीगी

13 ऐबै ऐछणां मूँह चिऊथी बारी तम्हां सेटा लै और सोभ गल्ला हणीं ऐबै दुई-चिई ग्वाहीए सहनै। 2 जिहअ हूँ तम्हां संघे दुजी बारी थिय, ठीक तिहअ ई ऐबै दूर रही करै तिन्नां लोगा का जुंणी पैहलै पाप किय त और सोभी लोगा लै बोला हूँ पैहलै ई कि जै हूँ भी आअ ता तै निं हूँ छाडी ग्अ। 3 किल्हैकि तम्हें ता चाहा एतो सबूत कि मसीहा बोला मेरै मुँहां का, जुंण तम्हां लै कमजोर निं, पर तम्हां दी सामर्थी आसा। 4 सह कमजोरीए बजहा क्रूसा परेंदे ता छड़ाऊअ, ता तैबी आसा परमेश्वरे सामर्थी करै जिऊँदअ। हाम्हां बी आसा तेऊदी कमजोर पर परमेश्वरै सामर्थी करै हणै जुंण तम्हां लै आसा, तेऊ संघे जिऊँदै।

5 आपणै आप्पू परखा कि हाम्हां विश्वासा दी आसा की नाई आथी। कै तम्हां का आपणै बारै थोघेई निं आथी कि यीशू मसीह आसा हाम्हां दी? नाई ता आसा तम्हें परखा दी नकाम्में निखळै दै। 6 पर मेरी आशा आसा कि तम्हां का जाणअ थोघ लागी कि हाम्हां निं नकाम्में आथी। 7 हाम्हां करा परमेश्वरा का ऐही अरज कि तम्हें निं लोळी किछै बुरअ काम किय, ऐते तैणीं निं कि हाम्हां लोळी राम्बळै शुद्दुए, पर ऐतै तैणीं कि तम्हें लोळी भलाई की, चाहे हाम्हां नकाम्में ई किल्है निं होए। 8 किल्हैकि हाम्हां निं सच्चाईए खलाफ किछ बी करी सकदै, पर सच्चाई लै सका सोभ किछ करी। 9 जेभै हाम्हां कमजोर आसा, और तम्हें आसा शक्तिशाली, ता हाम्हां हआ खुश, और एही अरज करा कि तम्हें लोळी सिध्द हुए। 10 ऐतेई बजहा लिखा हूँ इन्नां गल्ला थारी पिठी पिछू इन्नां गल्ला, कि हाजर हई करै मूँह तेऊ हके साबै जुंण प्रभू बगाळनै लै निं पर बणाणां लै आसा मुल्है दैनअ द, ताकि मूँ काठअ हई करै निं लागे किजै करनअ।

### आदर-सत्कार

11 ऐबै हे मेरै भाईयो, नंद रहा; और सिध्द रहा हंदै लागी; हिमन्त डाहा; और एकै डाहा मन; और मिळी-जुळी रहा। प्रैम-प्यारअ और शान्ती दैणै आळअ परमेश्वर हणअ तम्हां संघे। 12 एकी-दुजै लै करा पवित्र चुम्बना करै नमस्कार राजी-बाजी। 13 सोभ पवित्र लोगे तरफा का तम्हां लै नमस्कार राजी-बाजी। 14 प्रभू यीशू मसीहो अनुग्रह और परमेश्वरो प्यार और पवित्र आत्मां सहयोग लोळी तम्हां सोभी संघे हंदअ रहअ।



# गलातियों

## भूमिका

जाऊं प्रभू यीशूए सुसमाचारो प्रचार-प्रसार गैर यहूदी लोग बिचै लागअ हंदअ ता तिन्ना बिचै हुअ इहय सुआल पैदा कि एक सन्नै मसीही विशवासी हणा लै एकी आदमी मूसा नबीए व्यवस्था मनणी ज़रूरी आसा कि नाई? पौलुस दैआ इहय तर्क बी कि अह निं ज़रूरी आथय कि। सह बोला इहयए कि असली आसा मसीही जिन्दगी दी विश्वास ई एक पाक्की आथरी। विश्वासाई करै बणां सोभी लोगो परमेश्वरा संघै रिशतअ। पर एशिया मानरा दी एक रोमी राज्य, गलातिया दी रहणें आळी कलीसिये लोगे किय पौलुसो बिरोध और इहय दाऊअ किय पेश कि परमेश्वरा संघै सही रिशतै बणाणां लै लागा हरेकी आदमी मूसा नबीए व्यवस्था दी ज़रूरी चलणअ।

गलातिये नांऊंए लिखी ती प्रेरित पौलुसै अह चिठी एते तैणी कि तियां लोग ज़ुण गलत शिक्षा करै भटकै तै; तिन्नां सन्नै विश्वासा और व्यवहारा दी बापस आणीं सके। पौलुस करा एसा चिठीए शुरुआत यीशू मसीहो एक सन्नै प्रेरित हणें आपणें हके समर्थना संघै। सह दैआ एसा गला दी जोर कि सह आसा प्रेरित हणा लै परमेश्वरै ई शादअ द न कि कुणीं माहू; और इहय बी कि तेऊओ मकसद आसा तिन्ना लोग बिचै सुसमाचार प्रचार करनअ ज़ुण यहूदी निं आथी। तेखअ करा सह इहय तर्क पेश कि सिधअ विश्वासा करैई सका लोगो रिशतअ बणीं। आखरी धैऊआ दी दर्शाऊआ पौलुस इहय कि मसीही विश्वासा करै पैदा हुए प्रेम-प्यारा करैई बढा मसीही चाल-चलण स्वभाविक रूपै सारै दी।

रूप-रेखा

भूमिका 1:1-10

प्रेरिते रूपै पौलुसो हक 1:11-2:21

परमेश्वरे अनुग्रहो सुसमाचार 3:1-4:31

मसीही आज्ञादी और जिम्मेबारी 5:1-6:10

नचोळ 6:11-18

## आदर-सत्कार

1 पौलुसे, जुण प्रेरित आसा, सह नां माहूए तरफा का, और नां माहू करै आथी, पर मसीह यीशू और तेऊ परमेश्वरा करै ज़ुणीं सह मरी करै जिऊंदअ किय 2 और सोभी भाईए तरफा का, जुण मूह संघै आसा, गलातिये कलीसिये नांओंए चिठी।

3 परमेश्वर पिता और म्हारै प्रभू यीशू मसीहा का लोळी तम्हां लै अनुग्रह और शांती हन्दी रही। 4 सहैई हुअ आप्पू म्हारै पापा लै बलिदान, ताकि म्हारै पिता परमेश्वर दिला मनं साबै हाम्हां एऊ बुरै संसारा का छड़ैऊरे। 5 तेऊए स्तुती और बड़ाई लोळी जुगै-जुगै हन्दी रही। तथास्तु।

## एता छाडी निं होर सुसमाचार आथी

6 मूह हुआ एसा गले रहैनी कि जुणीं तम्हें मसीहे अनुग्रहा करै शादै, तेऊका लागै तम्हें एतरे छेकै मूह फरेऊई करै होरी प्रकारे सुसमाचारा बाखा झुकदै। 7 पर सह दुजअ सुसमाचार निं आथी ई, पर गल आसा एही कि कई आसा ईहै, जुण तम्हां डरैऊआ, और मसीहे सुसमाचारा चाहा बगाळणअ। 8 पर जै तम्हां लै स्वर्गा का दूत बी तेऊ सुसमाचारा छाडी जुण तम्हां का आसा शणाऊअ द, किजै होर सुसमाचार शणाऊंए, तेऊ लोळी श्राप लागअ। 9 जिहअ हाम्हें पैहलै बी आसा बोली मुकै दै, तिहअ ई बोला हूँ एबै भी, कि तेऊ सुसमाचारा छाडी जुण तम्हें ग्रहण आसा किय द, जै कुण किजै होर सुसमाचार शणाऊआ, तेऊ लोळी श्राप लागअ। एबै हूँ कै माहू मना, या परमेश्वरा? हूँ कै माहू चाहा खुश करनअ?

10 जै हूँ मैची तैणी बी माहू खुश करदअ रहअ हंदअ, ता तै निं हूँ मसीहो दास हंदअ त।

## पौलुस किहअ करै बणअ प्रेरित

11 हे भाईयो हूँ दैआ तम्हां का खोजी कि जुण सुसमाचार मंरें तम्हां का शणाऊअ द आसा, सह निं माहणूं जिहअ आथी। 12 किलहैकि सह निं मुखा

कुणी आदमी पजैळी, और ना हूँ कुणीं सखाऊअ, पर सह भेटअ मूह प्रभू यीशूए प्रैशै करै। 13 यहूदी मत, जुण पैहलै मेरअ चाल-चलण थिय, तम्हें आसा हेरी दी ईयां गला शुणीं कि हूँ करा त परमेश्वरे कलीसिया बडअ भारी तंग और तिन्नां करा त हूँ बरैबाद। 14 और आपणें कई जातीआळै का जुण मेरी आबस्था दी थियै, यहूदी मता दी लागा त बढदअ, और आपणें बाब दादे बभारा दी थिय हूँ बडअ भारी जोशा दी। 15 पर परमेश्वरै जुणीं हूँ मेरी मांए गर्भाई का चुनअ द थिय, तेऊ शादअ हूँ आपणें अनुग्रहा करै, 16 जाऊं तेऊए इछा हूई कि मूह दी आपणें पुत्रा प्रगट करै, कि हूँ होरी जाती लै तेऊओ सुसमाचार शणाऊं, ता मंरें नां मासा का, और ना लोहू का सलाह लई, 17 और नां हूँ येरुशेमा लै तिन्नां सेटा लै नाठअ जुण मुखा पैहलै प्रेरित तै, पर तेभी नाठअ हूँ अरब देशा लै और तिधा का आअ दमिश्क देशा लै बापस।

18 तेखअ विई साला बाद नाठअ हूँ कैफा का मिलदअ येरुशेमा लै और तेऊ सेटा रहअ पंद्रा धेळे तैणीं तिधी। 19 पर प्रभूए भाई याकुबा छाडी निं होरी प्रेरिता का मिलअ। 20 जुण गला हूँ तम्हां लै लिखा, हेरा, परमेश्वरे उपस्थिती समझी करै बोला हूँ कि ईयां गला निं झूठी आथी। 21 एता बाद आअ हूँ सुरीआ और किलकिया देशै। 22 पर यहूदीआ प्रदेसे कलीसिया जुण मसीह दी ती, मेरअ मूह ता नाई त तिन्नां कधि भाळअ द थिय, 23 पर तियां शुणा तै इहय कि जुण हाम्हां पैहलै दुख तकलीफ दैआ थिय, सह शणाऊंआं एबै तेऊइ धर्मो सुसमाचार, जहा सह पैहलै नाश करा त 24 और मेरै बारै करा तै परमेश्वरे महिमा।

## होरी प्रेरिते पौलुसा लै मन्यता दैणीं

2 चौदा साला बाद नाठअ हूँ बरनबासा संघै येरुशेमा लै और तितुस बी नियं संघा। 2 और मेरअ नाशणअ हुअ इशबरीय ज्योती दी, और जुण सुसमाचार हूँ होरी जाती लै प्रचार करा, तियां गला खोजी मंरें सोभै तिन्नां का, पर खोजअ मंरें जुदअ जिहअ हई करै तिन्नांई का जुण तिन्नां मांझै बडै अगूरे तै, ताकि इहय निं हूआ कि मेरी एऊ बगते और आगली दौळ-धूप जांरें नाश। 3 पर तितुस बी जुण मूह संघै थिय और सह यूनानी बी आसा, सह निं

खतनें करने लै मज़बूर किय। 4 पर अह हूअ तिन्नां झुठै भाईए बज़हा करे, जुंण चुप-चुपै हाम्हां बिचै थियै पेठे दै, ताकि जुंण आज़ादी हाम्हां मसीह यीशू दी भेटी दी आसा, तेतो भेद लई करै हाम्हां गुलाम बणाए। 5 तिनां अधीन हणअ निं हाम्हां घळी पलै बी मनअ, एते तैणीं कि सुसमाचारे सच्चाई तम्हां दी बणीं रहे। 6 तेखअ ज़सा लोगा किज़ै समझा तै (तियां चाहे किये बी हंदे, मूँह निं एता का किछै मतलब थिय, परमेश्वर निं कोही लै पक्षपात करदअ) तिन्नां का ज़सा किज़ै समझा बी थियै, मूँह निं तिन्नां का किछै भेटअ। 7 पर एतो उल्टअ ज़ाऊं तिन्नां भाळअ कि ज़िहअ खतनें किये दै लोगा लै सुसमाचारो काम पतरसा का सभाळअ द आसा, तिहअई आसा बिणहीं खतनें आळै लै सुसमाचारा शणांऊंणेओ काम मुखा सभाळअ द। 8 (किल्हैकि जुंणीं पतरसा का खतनें किये दै लोगा बिचै प्रेरिताईओ काम बडै प्रभाबा करै कराऊअ, तेऊई कराऊअ मुखा बी होरी जाती बिचै प्रभाबशाली काम)। 9 और ज़ाऊं तिन्नां का तेऊ अनुग्रहे बारै थोघ लागअ, जुंण मूँह भेटअ त, ता याकुब और कैफा और यहूना, ज़सा कलीसिए थाह्य समझा, हूँ और बरनबास किये आपणअ दैहणअ हाथ दैई करै आप्पू संघा, कि हाम्हां नाशे होरी जाती सेटा लै, और तियां नाशे खतनें किये दै लोगा सेटा लै। 10 सिधअ इहय बोलअ तिन्नां कि कंगाळ, गरीबो करै धैन-खेळ, और एऊ कामां करने थिय हूँ आप्पू बी पैहलैई का कोशिश लागअ द।

### पौलुसै किय कैफो विरोध

11 पर ज़ाऊं कैफा अन्ताकिया लै आअ, ता मंए किय मुंहे तेऊओ सहनअ, किल्हैकि सह त दोषी ठैहरअ द। 12 एते तैणीं कि, याकुबे तरफा का कई लोगा एछणें का पैहलै ता खा पिया त सह होरी जाती बिचै, पर ज़ाऊं तियां आए, ता खतनें कियै दै लोगे डरै मारै हटअ सह दूर और लागअ कनारै लुकदअ। 13 और तेऊ संघे होरी यहूदी बी किय कपट, और इधी तैणीं कि बरनबास बी पळअ तिन्नां कपटा बिचै। 14 पर ज़ाऊं मंए भाळअ कि तियां निं सुसमाचारे सच्चाई दी सिधी चाल चली निसै, ता मंए सोभी सहनै कैफा का बोलअ कि जै तूह यहूदी हई करै बी होरी जाती ज़िहअ चला, और यहूदी ज़िहअ नाई चलदअ, तै तूह होरी जाती लै यहूदी ज़िहअ चलणा लै किल्है बोला?

### विश्वासा करै धर्मी हणअ

15 हाम्हां आसा ज़ल्मा ओहीं यहूदी, और होरी जाती ज़िहै पापी बिचा का निं आथी। 16 तैबी बी इहय समझी करै कि मांहुं निं व्यवस्थे कामां करै धर्मी हंदअ, पर सह हूआ सिधअ प्रभू यीशू मसीह दी विश्वास करी करै धर्मी। हाम्हां किय आप्पू बी प्रभू यीशू दी विश्वास कि हाम्हां निं व्यवस्थे कामां करै धर्मी हणें पर मसीहा दी विश्वास करी करै हुऐ धर्मी; एऊई कारणे व्यवस्थे कामां करै निं कोई बी प्राणीं धर्मी बणदअ। 17 हाम्हां जुंण मसीह दी धर्मी बळणअ चाहा, जै आप्पूई पापी निखळै, तै के मसीह पापो सेबक आसा? कधि निं। 18 किल्हैकि जुंण मंए ढोळी छेकअ, जै तेऊ हूँ भी बणांआ, तै आसा हूँ आप्पू अपराधी। 19 हूँ जुंण व्यवस्था करै व्यवस्था लै मूँअ एते तैणीं कि परमेश्वर लै जिऊंदअ हऊं। 20 हूँ आसा मसीह संघे कूसा दी छड़ाऊअ द, और एबै निं हूँ जिऊंदअ रहअ, पर मसीह आसा मूँह दी जिऊंदअ। और हूँ जुंण शरीरा दी एबै जिऊंदअ आसा, ता हूँ आसा सिधअ तेऊ विश्वासा संघे जिऊंदअ, जुंण परमेश्वरे पुत्रा दी आसा, जुंणीं मुल्है प्रेम किय, और मेरी तैणीं आपणीं जान दैनीं। 21 हूँ निं परमेश्वरे अनुग्रहा लै बेकार बोलदअ, जै व्यवस्था करै धार्मिकता हंदी ता तै हणअ त मसीहो मरनअ बी बेकार।

### व्यवस्था या विश्वास

3 हे निर्बुधि गलातिओ, तम्हें कुंणीं मोहै? ज़ाणनअ कि थारी आच्छी सहनै रहैऊअ प्रभू यीशू कूसा दी। 2 हूँ चाहा तम्हां का सिधअ इहय ज़ाणनअ कि, तम्हां आत्मां व्यवस्थे कामां करी करै, या विश्वासे समाचारा करै भेटी? 3 कै तम्हें इहै निर्बुधि निं आथी कि आत्मै रिती दी शुरू करी करै लाअ शरीरे रिती दी अंत करी? 4 तम्हें कै एतरअ दुख एही चकअ? पर शायद

बेकार निं। 5 जुंण तम्हां लै आत्मां दान करा और तम्हां दी सामर्थे काम करा, सह कै व्यवस्थे कामां करै या विश्वासे सुसमाचारा करै करा इहय?

6 इब्राहीमै ता किय परमेश्वर दी विश्वास और अह गिणुंई तेऊलै धार्मिकता। 7 ता एसा गल्ला लूआ तम्हें समझी कि जुंण विश्वासा करने आळै आसा, तियां आसा इबराहिमे संतान। 8 और पबित्र शास्त्रै पैहलै ही इहय समझी करै कि होरी जातीए हणें विश्वासा ई करै धर्मी, पैहलै ई इबराहिमा लै अह सुसमाचार दैनअ कि ताह दी भेटणीं सोभी जाती आशीष। 9 इहय करै जुंण विश्वास करा, तिन्नां विश्वासी भेटा इबराहिमा संघे आशीष।

10 और जेतरे लोग व्यवस्थे कामां परेंदें भरोसअ डाहा, तियां सोभ आसा श्रापे अधीन। किल्हैकि इहय आसा लिखअ द कि जुंण बी व्यवस्था दी लिखी दी गल्ला दी स्थिर निं रहंदअ सह आसा श्रापित। 11 पर अह गल आसा प्रगट कि व्यवस्था करै निं परमेश्वरा सेटा कोई बी धर्मी बणीं सकदअ, किल्हैकि धर्मी मांहुं रहा विश्वासा करै जिऊंदअ। 12 पर बबस्थो निं विश्वासा संघे किछै रिशतअ आथी; पर जुंण तिन्नां मने, सह रहणअ तिन्ने कारण जिऊंदअ। 13 मसीहै, जुंण हाम्हां लै श्रापित बणअ, हाम्हां मोल लई करै व्यवस्थे श्रापा का छड़ैऊए, किल्हैकि लिखअ द आसा कि जुंण बी काठा दी लटकाऊअ, सह आसा श्रापित। 14 अह इहय हुअ तै कि इबराहिमे आशीष मसीह यीशू करै होरी जातीए लोगा तैणीं पुजे, और हाम्हां विश्वासा करै तेसा आत्मां प्राप्त करे ज़सरी प्रतिज्ञा आसा हई दी।

### व्यवस्था और वाचा

15 हे भाईयो, हूँ बोला मांहुंए रिती इहय कि मांहुं बाहिनै दी बाचा बी जुंण पाकी हूआ, ता तेसा बी निं मांहुं ना ता टाळदअ और नां बढाऊंदअ। 16 तै हे भाईयो, इबराहिमा लै और तेऊए बंशा लै दैनी प्रतिज्ञा, सह निं इहय बोलदअ कि बंशा लै, जिहअ कईए बारै आसा बोलअ द। पर जिहअ एकीए बारै बोला कि मूँह तेरे बंशा लै, सह आसा मसीह। 17 पर हूँ बोला इहय कि जुंण वाचा परमेश्वर पैहलै ई का पाक्की की ती, तेसा बाचा निं व्यवस्था चऊ शौआ तिहा साला बाद बी टाळदी, कि प्रतिज्ञा बेकार होए। 18 किल्हैकि जै मेल व्यवस्था करै हूआ, तै निं प्रतिज्ञे जरूरत ई आथी, पर परमेश्वर आसा हेरी दी इबराहिमा लै प्रतिज्ञा करै ई दैई।

19 तै एबै व्यवस्था किजै रही? सह ता अपराध हणें बज़हा करै बाद का दैनी कि तेसा पोस्ती एछणें तैणीं रहे, ज़सा लै प्रतिज्ञा दैनी ती, और स्वर्गदूता करै एकी बिचौले हाथे की पाक्की। 20 बीचौलअ निं एकीओ हंदअ पर परमेश्वर आसा एकै ई।

### व्यवस्थो उदेश्य

21 तै किजै व्यवस्था परमेश्वरे प्रतिज्ञे बिरोधा दी आसा? कधि नां होए? किल्हैकि जै एही व्यवस्था दैनी हंदी जुंण जिन्दगी दैई सकदी, तै हणीं ती सञ्जी धार्मिकता व्यवस्था करै। 22 पर पबित्र शास्त्रै किये सोभै पापे अधीन, ताकि सह प्रतिज्ञा, ज़सरअ आधार प्रभू यीशू दी विश्वास करनअ आसा, विश्वासा करने आळै लै पूरी होए।

23 पर विश्वास एछणें का पैहलै हूआ ती व्यवस्थे अधीनता दी म्हारी रखबाली। और तेऊ विश्वासा एछणें तैणीं जुंण प्रगट हणेंआळअ थिय, हाम्हां रहै तेते ही बंधना दी। 24 तैहीता व्यवस्था हूई हाम्हां लै मसीहा तैणीं पजैळणें आळी गुरू कि हाम्हां विश्वासा करै धर्मी बणे। 25 पर ज़ाऊं विश्वास एछी मुकअ, ता हांमहें निं तेऊ गुरूए अधीन रहै। 26 किल्हैकि तम्हें सोभै तेऊ विश्वासा करी करै जुंण मसीह यीशू दी आसा, परमेश्वरे संतान बणे। 27 और तम्हा मांझै जेतरे बी मसीह दी बपतिस्मअ लूअ, तिन्ने बाह्यअ मसीह आपणीं घेरी कुरतै जिहअ। 28 एबै नां कोई यहूदी रहअ, नां यूनानी, नां कोई दास, और नां कोई आज़ाद, और नां कोई नर, नां नारी, किल्हैकि तम्हें सोभै आसा मसीहा दी एक 29 और जै तम्हें मसीह आसा, तै आसा तम्हें इबराहिमै बंश और प्रतिज्ञे साबै बारीस बी।

4 हूँ बोला इहय कि बारिस ज़ाऊं तैणीं बालक आसा, एही ता आसा सह हंदअ। 2 पर बाप्पूए सोचै दै बगता तैणीं रहा सह रखबाळै और भड़ारीए बशा

दी। 3 तिहई आसा हाम्हें बी, जेभै तैणीं हाम्हें बालक थिये, तेभै तैणीं रहै हाम्हें संसारे आदी शिक्शे बशा दी रही करै दास बणीं। 4 पर जाऊं बगत पूरअ हुआ, ता परमेश्वर भेजअ आपणअ पुत्र, जुंण स्त्री का आसा जल्मअ द, और व्यवस्थे अधीन हुआ पैदा। 5 ताकि जुंण व्यवस्थे अधीन आसा, तिन्नां मोल लई छडैऊरे, और हाम्हां बी गोद लए दै शोहरू जिहअ हक मिळे। 6 और तन्हें जुंण पुत्र आसा, तैहीता परमेश्वर आपणें पुत्रे आत्मां, जुंण हे अब्बा, हे पिता पुकारा, म्हारै दीला दी भेजी। 7 तैहीता ऐबे नि तन्हें दास रहै, पर ऐबे आसा तन्हें शोहरू, और जै पुत्र हुआ ता तै हुऐ परमेश्वरा करै बारिस बी।

### गलतिए विश्वासीए बारै पौलुसो फिकर

8 तेभै तैणीं तै तन्हें परमेश्वरा नाई जाणीं करै दास ई, जुंण स्वभावाई का नाई तै परमेश्वरे आथी। 9 पर ऐबे जाऊं तन्हें परमेश्वर बछैणीं हेरअ, पर परमेश्वरै बछैणीं तन्हें। ता ऐबे तिन्नां कमजोर नकाम्मीं आदी शिक्शे गल्ला बाखा किलहै फिरा, जसरे तन्हें भी आसा गुलाम चालै दै बणीं? 10 तन्हें मना धैळी, भिनें और नियत बगता और साला। 11 मूह लागा थारै बारै डअर, किधि इहय नां होए कि जुंण मँथ मंऐ तन्हें लै आसा की दी, सह जाएं नाशे।

12 हे भाईयो, हूँ करा तन्हें सेटा अरज कि, तन्हें हआ मूह बराबर, किलहैकि हूँबी आसा तन्हें बराबर; तन्हें नि मेरअ किछे बगाळअ आथी, 13 पर तन्हें का आसा थोघ कि पैहलै-पैहल मंऐ शरीरे कमजोरीए बजह करै शणाऊंअ तन्हें का सुसमाचार। 14 और तन्हें मेरी शरीरे दशा, जुंण तन्हें लै थारी परिक्षा लणैए कारण ती, तुछ निं समझी, नां तेता का घृणां की; और परमेश्वर दूत, और इधी तैणीं की मसीहा बराबर किय हूँ ग्रहण। 15 तै सह थारअ आनंद मनाऊणअ किधी नाठअ? हूँ आसा थारअ गुआह, कि जै हई सकदअ ता तै दँदै तन्हें आपणीं आच्छी बी मुल्है काढी। 16 तै किजै हूँ तन्हें का सच बोळणें बजह हूँ थारअ बैरी हुआ। 17 तियां तन्हें दोस्त ता चाहा बणाणअ पर भली मनसा संघे निं; पर तियां चाहा तन्हें जुदै करणअ, कि तन्हें तिन्नां बणाए दोस्त। 18 पर अह बी आसा ठीक, कि भली गल्ला लै लागा हर बगत दोस्त बणाणें कोशिश करनी, सिधअ तेभै निं कि जेभै हूँ तन्हें संघे रहा। 19 हे मेरे बालको, जेभै तैणीं तन्हें दी मसीहो रूप नां बणीं जाए, तेभै तैणीं लागणीं मूह तन्हें लै तेही दाह सैहणीं जेही एकी मां शोहरू जल्म दँदा हआ। 20 दिल ता करा मेरअ कि ऐबे तन्हें सेटा एछी करै होरी साबै ई बोळ, किलहैकि थारै बारै आसा मूह शक।

### सारा और हाजिरो उदाहरण

21 तन्हें जुंण व्यवस्थे अधीन हणअ चाहा, मुखा बोला, तन्हें कै व्यवस्थे निं शुणदै? 22 इहय आसा लिखअ द कि ईबराहिमे हुऐ शोहरू, एक दासी का और एक तेऊए आजाद लाळी का। 23 पर जुंण दासी का हुआ, सह जल्मअ शरीरिक रिती संघे, और जुंण आजाद बेटळी का हुआ, सह हुआ प्रतिजे साबै। 24 इन्नां गल्ला दी आसा द्रश्टांत, ईयां दूई बेटळी आसा दूई वाचा, एक ता अरबे सीनै धारा परँदे, जेता करै दास पैदा हआ, सह आसा हाजिरी। 25 और हाजिरी मना कि अरब देशो सीनै पहाड़ आसा, और आझ कालकअ येरुश्लेम आसा तेता जिहअ, जुंण आपणें शोहरू माठै संघी गूलामीं दी आसा। 26 और उपरो येरुश्लेम आसा आजाद, सह आसा म्हारी आममां। 27 किलहैकि इहय आसा लिखअ द कि हे बाँझ, तूह जुंण नाई जाणदी, खुशी मनाऊं, ताह जसा सुणें दाह निं हंदी, गळ खोल्ही करै कर जै-जैकार, किलहैकि त्यागी दी बेटळीए संतान आसा सुहागणीं संताना का बी खासी। 28 हे भाईयो, हाम्हां आसा ईसहाका जिहै, प्रतिजे संतान। 29 और जिहअ तेऊ जमाने शरीरे साबै जल्मअ द आत्में साबै जल्में दै तंग करा त, तिहअई हआ ऐबे बी। 30 पर पबित्र शास्त्र किजै बोला? दासी और तेसरै शोहरू काढ पोर्ही, किलहैकि दासीओ शोहरू निं आजाद बेटळीए शोहरू संघे बारिस हणअ। 31 तैहीता हे भाईयो, हाम्हें निं दासिए आथी पर हाम्हें आसा आजाद स्त्रीए संतान।

### आजादी डाहा बचाऊई

5 मसीहै आसा आजादी लै हाम्हें आजाद किये दै, एता दी रहा स्थिर, और गुलामीए जूआं दी निं भी जुंढीआ।

2 भाळा, हूँ पौलुस आसा लागअ द तन्हें का बोलदअ कि, जै तन्हें खतनअ कराऊरे, तै निं तन्हें मसीहा का किछे फाईदअ हणअ। 3 तैबी बी बोला हूँ सोभी खतनै करनै आळे लै कि तै पळणीं तेऊ सारी व्यवस्था मनणीं। 4 तन्हें जुंण व्यवस्था करै धर्मी बणणअ चाहा, तन्हें गुरे मसीहा का जुदै हई और अनुग्रहा का छुटी। 5 किलहैकि आत्में बजहा करै न्हैळा-भाळा, हाम्हें विश्वासा दी आशा की दी चिजा। 6 और मसीह यीशू दी नां खतनअ, और नां बिणहीं खतनेओ किजू कामां आथी, पर सिधअ विश्वासा, जुंण प्रेमा करै विश्वास करा। 7 तन्हें ता राम्बळै करै थिये तुहरदै लागे दै, ऐबे कुणीं रोके तन्हें कि सच्चाई निं मनीं। 8 एही सीख निं थारै शादणें आळे बाखा का आथी। 9 थोळअ जिहअ सजेळअ बणांआ सारै मुछे दै पिठै सजेळअ। 10 हूँ डाहा प्रभू दी थारै बारै भरोसअ कि थारअ निं कोई दुजअ बचार हणअ, पर जुंण तन्हें डरैऊआ सह चाए कोहै बी होए तेउ भेटणीं सजा 11 पर हे भाईयो, जै हूँ मैची तैणीं बी खतनेओ प्रचार करा, तै किलहैकि दैआ मुल्हें लोग कष्ट और क्लेश, तै ता क्रूस टोहळ नाशदी रही। 12 भलअ ता हणअ त इहय कि जुंण तन्हें डावाडोल करा, तिन्नां काटी पांदै।

13 हे भाईयो, तन्हें आसा आजाद हणा लै शादे दै, पर इहय निं हआ कि अह आजादी शारीरिक कामां लै एक मोकअ बणें। पर प्रेमा करै बणांआ एकी दुजे दास। 14 किलहैकि सारी व्यवस्था हआ एसा एकी गल्ला दी पूरी, कि तूह कर आपणें पडोसी संघे आपू जिहअ प्रेम। 15 पर जै तन्हें एकी दुजै दांदा करै काटा और धेळी चिरी करै खा, ता चतैन रहा कि हाम्हें किधी एकी दुजैओ सर्वनाश नां करे।

### पवित्र आत्मां करनै चलणअ

16 पर हूँ बोला कि आत्में साबै चला, तै निं तन्हें शरीरे लालसा कोही रीती पुरी करनी। 17 किलहैकि शरीर करा आत्में बिरोधा दी लालसा, और ईयां आसा एकी दुजे बिरोधी, कि जुंण तन्हें करणअ चाहा, तेता नां करी सके। 18 पर जै तन्हें आत्में चलाए चला, तै निं तन्हें व्यवस्थे अधीन रहै। 19 शरीरे काम आसा प्रगट, अर्थात- भ्यभिचार, गंदे काम, लुचपन, 20 मुर्तिपुजा, जादू टोणअ, बैर, झगळे, ईर्ष्या, क्रोध, बिरोध, फूट, बिधर्म, 21 डाह, मतबालअपन, लीलाक्रीडा, और इन्नां जिहै आसा कई काम, इने बारै बोला हूँ तन्हें लै पैहलै ही, जिहअ मंऐ पैहलै बी खोजी आसा हेरअ द कि ईहै-ईहै कामां करनैआळे निं परमेश्वरे राईसीए बारिस हणें। 22 पर आत्मों फळ आसा प्रेम, आनंद, मेल, धीरज, 23 कृपा, भलाई, विश्वास, नम्रता, सबर, ईहै-ईहै कामें खलाफ निं कोहै व्यवस्था आथी। 24 और जुंण मसीह यीशूए आसा, तिन्नें आसा शरीरे लालसा और अभिलाषा संघी कृसा दी लटकाऊई करै खतम की दी।

25 जै हाम्हें आत्मां करै जिऊंदै आसा, तै आत्में साबै चलणअ बी लागा। 26 हाम्हें घमंडी हई करे नां एकी दुजै छेळे, नां एकी दुजै संघे जिधणअ।

### एकी दुजेए करा मदद

6 हे भाईयो, जै तन्हें कहा मांहुं अपराधा दी ढाके, ता इहय सभाळणअ बडी नम्रता संघे, तन्हें जुंण आत्मिक आसा, और आपणीं बी डाहणीं चौकसी कि तन्हें बी परिक्षा दी नां पळे। 2 तन्हें चके एकी दुजैओ बोझअ, और एऊई साबै करै मसीहे व्यवस्था पूरी। 3 किलहैकि जै कुण किछ नां हणें का बाद बी आपणें आप किजै समझा, तै सह दैआ आपू लै धोखअ। 4 पर हरेक लूआ आपणें-आपणें कामां जाची परखी, तै निं तेऊ दुजे बारै पर आपणें बारै हणअ तेऊ घमंड करनैओ मोकअ। 5 किलहैकि हरेक आदर्मी चकणअ आपणअ ई बोझअ।

6 जुंण बचने शिक्षा पा, सह करै सोभी शोभली चिजा सखाऊणेंआळे भागीदार।

7 धोखअ निं खा, परमेश्वर निं ठठै मजाका दी उड़ाऊणां लै हंदअ, किलहैकि आदर्मी जिहअ बऊआ, तिहअ ई लऊणअ बी तेऊ। 8 किलहैकि जुंण आपणें शरीरा लै बऊआ, तेऊ लऊणअ शरीरा करै बिनाश, और जुंण आत्मां लै बऊआ, तेऊ लऊणअ आत्मां लै अनंतजीऊण। 9 हाम्हां निं भले कामां करना लै हेअ छाडणअ, किलहैकि जै हाम्हें ढीलै नां होए, ता तै हणीं

हाम्हां सही बगतै फसल लऊणा लै। 10 तैहीता, जिधी तैणीं हाम्हां मोकअ भेटे, हाम्हां करनीं सोभी संघै भलाई, खासकर विश्वासी भाई संघै।

### आखरी चतैनगी और आदर-सत्कार

11 भाळा, मंएँ आसा बड़े-बड़े अक्षरा दी आपणें हाथे लिखअ द। 12 जेतरे लोग शारीरिक दखाऊअ करनअ चाहा, तिन्नां पाणअ तम्हां लै खतनै करना लै दबाब, सिधअ एते तैणीं कि तिन्नां कुण मसीहे कुसे बजह कुण तंग नां करे। 13 किल्हैकि, खतनै करनैआळै आप्पु ता निं व्यवस्था दी चलदै, पर थारअ खतनअ चाहा, एते तैणीं कराऊणअ कि थारी शारीरिक दशा दी घमंड करे।

14 पर इहय निं हआ कि, हूँ किजू होरी गला दी घमंड करूँ, सिधअ म्हारै प्रभू यीशूए कूसो, जसा करै संसार मेरी नजरा दी और हूँ संसारे नजरा दी कूसा दी आसा झड़ाऊअ द। 15 किल्हैकि नां खतनअ, और ना खतनै बगैर किछ आसा, पर नऊँई सृष्टी आसा सोभ किछ। 16 और जेतरे एऊ नियमां दी चले, तिन्नां लै और परमेश्वरे ईस्त्राईला दी, शांती और दैआ हंदी रहे॥

17 आजू निं कोहै मुल्है दुख दैई, किल्हैकि हूँ फिरा यीशूए दागा आपणीं देही दी लई।

18 हे भाईयो, म्हारै प्रभू यीशू मसीहो अनुग्रह थारी आत्मा संघै रहे। आमीन॥ तथास्तू॥

# इफिसियों

## भूमिका

प्रेरित पौलुसे इफिसिये नांऊंरें चिठी आसा सोभी का पैहलै एते बारै कि परमेश्वरे योजना कै आसा “कि जो कुछ बी स्वर्गे आसा और जो कुछ बी पृथ्वी दी आसा तेता मसीह दी कठा करे” (1:10)। अह आसा परमेश्वरे लोगा का मांग बी कि तियां मसीह दी एक हई करै मनुष्या जातीए एकता लै एसा महान योजने साबै आपणीं जिनंदगी व्यतीत करे।

इफिसिए पैहलै भागा दी लिखा लिखणेंआळअ एक हणेंए बारै; तेऊ रसते बारै खोजदी जेऊ करै पिता परमेश्वरै आपणें लोगो चुनाव किय कि तिन्नां किहय करै भेटी पुत्र मसीह करै पाप क्षमा और आज्ञाद हुए और किहय करै दैनअ पवित्रात्मा करै परमेश्वरे महान प्रतिज्ञा पूरै हणेंओ होंसळअ। दुजै भागा दी करा सह पहळणें आळै का एही जिनंदगी जिऊणें मांग कि मसीह दी लोळी तिन्नै एकता सामूहिक जिनंदगीए सचाई बणीं।

मसीह दी जुळै दै परमेश्वरे लोगे एकपना दर्शाऊणा लै आसा समझाऊए दै कई उपमा देई करै; जिहय कि : कलीसिया आसा एक देही जेही, जेतो शीश आसा मसीह; या एकी मैहला जेही, जते कुणेंओ पात्थार आसा मसीह; या एकी लाळी जिहअ जसरअ लाळअ आसा मसीह। मसीह दी परमेश्वरे मांग धारणा करै प्रभावित लिखणें आळै भाऊआ करे छुंआ आह चिठी कई महान बड़ी जैगा। हरेक गला दी आसा एथ मसीहे प्रेम, बलिदान, क्षमा, अनूग्रह और सिध्द हणें प्रकाशा दी भाळी दी।

रूप-रेखा

भूमिका 1:1-2

मसीह और कलीसिया 1:3-3:21

मसीह दी नऊई जिनंदगी 4:1-6:20

नचोळ 6:21-24

1 पौलुसे तरफा का जुंण परमेश्वरे इछा करै यीशू मसीहो प्रेरित आसा; तिन्नां सोभी पबित्र और विश्वासी लोगे नांओरें चिठी जुंण इफिसुसै आसा। 2 म्हारै पिता परमेश्वर और प्रभू यीशू मसीहा का लोळी तम्हां लै दैया और शांती भेटदी रही।

### मसीह दी आत्मिक आशीषा

3 म्हारै प्रभू यीशू मसीहे परमेश्वरो आसा धन्याबाद जुंण पिता बी आसा कि तेऊ दैनीं हाम्हां लै मसीह दी स्वर्गीय जैगा दी सोभी प्रकारे आत्मिक आशीषा (किल्हैकि हाम्हां मिलै मसीह संघे)। 4 जिहै तेऊ हाम्हां संसारे उत्तपती का पैहलैई एते तैणीं शादै कि हाम्हां तेऊ नेळ रहीकरै तेऊए झूरी करै पबित्र और धर्मी होए 5 और तेऊ शादै भलै मनै आप्पु लै हाम्हां आपणीं मरजी दी ताकि हाम्हां यीशू मसीह बाती तेऊए गोद लए दै शोहरू होए, 6 ताकि तेऊए तेसा दैया महिमे स्तुति होए, जुंण तेऊए प्यारै शोहरू करै हाम्हां लै मुफ्त दैनीं। 7 हाम्हां भेटअ तेऊदी तेऊए लोहू करै छुटकारअ, अर्थात - अपराधे क्षमा भेटी तेऊए तेसा दैया करै 8 जुंण तेऊ सारै ज्ञान और समझा संघी हाम्हां लै भरी-भरी दैनीं। 9 तेऊ भांऊअ आपणें दिला मनो भेद हाम्हां का खोजणअ जुंण तेऊ आपणें मनै ती ठाळिं दी। 10 परमेश्वरे ती एही योजना कि जेभै ठीक बगत एछे, तेभै जुंण किछ स्वर्गे आसा, और जो कुछ पृथ्वी दी आसा, सोभ किछ मसीह दी कठा करे।

11 तेऊई दी, जसा दी हाम्हां बी तेऊए मनसा जुंण तेऊए आपणीं इछा करै सोभ किछ करा, पैहलै ही चुनी करै मिरास बणें। 12 कि हाम्हां जुंणीं पैहलै ई का मसीहा दी आशा डाही ती, तेऊए महिमा दी स्तुतिए कारण होए। 13 और तेऊई दी तम्हें बी; जांऊ तम्हें सचाईओ बचन शुणअ जुंण थारै उद्धारो सुसमाचार आसा, और जेथ दी तम्हें विश्वास किय, प्रतिज्ञा की दी पबित्रात्में छाप लागी। 14 सह आसा तेऊए मोलै लए दै मांछूए छुटकारै लै म्हारी मिरासो बयानअ, कि तेऊए महिमें स्तुति होए।

### पौलुसे प्राथणां

15 तैहीता हूँबी तेऊ विश्वासो समाचार शुणीं करै जुंण तम्हां लोगा बिचै प्रभू दी आसा, और सोभी पबित्र लोगा दी प्रगट आसा। 16 हूँ नि तम्हां लै धन्यबाद करनअ छाडदअ, और हमेशा करा हूँ तम्हां आपणीं प्राथणां दी आद, 17 कि म्हारै प्रभू यीशूओ परमेश्वर जुंण महिमो पिता आसा, तम्हां आपणीं बछेणां दी, ज्ञान और प्रकाशे आत्मा दए। 18 और थारै मनै आच्छी लोळी ज्योतिर्मय हुई, ताकि तम्हां का थोघ लागे कि तेऊए शादणें केही आशा हुआ, और पबित्र लोगा बिचै तेऊए मिरासे महिमो धन किहअ आसा। 19 और तेऊए सामर्थ हाम्हां बाखा तेऊए शगतीए प्रभावे तेऊ कामें साबै, जुंण विश्वास करा, केतरी महान आसा। 20 जुंण तेऊ मसीहे बारै किय कि प्रभू यीशू मूँरें दै बिचा का जिऊंदअ करी करै स्वर्गीय जैगा दी आपणीं दैहणीं बाखा बशैळअ, 21 सोभी प्रकारे प्रधानता, अधिकार, सामर्थ, प्रभुता और हरेकी नांओआ का परेंदै, जुंण नां सिधअ एऊ लोका दी पर आजू एछणें आळै लोका दी बी सह नांअ लणअ। 22 और सोभ गला की तेऊए पैरा हेठै और सह दैनअ सोभी गला दी शिरोमणीं बणाई करै कलीसिया लै। 23 अह आसा तेऊए देह और तेऊए परिपूर्णता, जुंण सोभी दी और सोभै गला पूरी करा।

### मौता का जिनंदगी बाखा लै

2 और तेऊ किये तम्हें बी जिऊंदै, जुंण आपणें अपराधा और पापा दी मूँरें दै थियै। 2 जेथ दी तम्हें पैहलै एऊ संसारे रिती दी और सरगे अधिकारे हाकम अर्थात तेसा आत्में साबै चला थियै, जुंण आज्ञाकाला बी आज्ञा नांई मनणें आळै बिचै करा काम। 3 एथ दी बताऊआ थियै हाम्हां बी सोभ के सोभ पैहलै आपणें शारीरे लालसा दी धैळी, और शरीर और मनै मनसा करा तै पूरी। और होरी लोगा जिहै तै स्वभावार्थ का क्रोधे संतान। 4 पर परमेश्वर जुंण दैया करनैओ सेठ आसा, आपणें तेऊ महान प्यारे कारण जेता करै तेऊ हाम्हां लै प्रेम किय। 5 जधू हाम्हां अपराधे कारण मूँरें दै थियै, ता हाम्हां किये मसीह संघे जिऊंदै ( अनुग्रह करै ई आसा थारअ उद्धार हुअ द )। 6 और मसीह यीशू दी तेऊ संघे झैऊई करै बशैळै स्वर्गीय जैगा दी तेऊ संघे।

7 कि सह आपणीं क्रिपा करै, जुंण मसीह यीशू दी आसा हाम्हां लै, आजू एछणें आळें बगतै आपणें अनुग्रहो असीम धन रहैऊए। 8 किल्हैकि विश्वासा दी आसा अनुग्रहा करै ही थारअ उद्धार हुअ द, अह नि तम्हां का आथी पर अह आसा परमेश्वरो दान। 9 अह नि आथी कर्म कारण हुअ द, इहय निं होए कि कोई घमंड करे। 10 किल्हैकि हाम्हां आसा तेऊए बणाएँ दै; और मसीह यीशू दी आसा तिन्नां भलै कामां लै सृजै दै जुंण परमेश्वरै पैहलैई आसा हाम्हां लै करना लै त्यार कियै दै।

### मसीह दी एक

11 तैहीता एसा गल्ला डाहा आद कि तम्हें शारीरिक रिती दी आसा होरी जातीए, (और जुण लोग आप्पू लै शरीरा दी हाथा करै कियै दै खतनें करै बोला तिन्नां लै खतनें आळें, और तियां बोला तम्हां लै बिंणा खतनें आळें)। 12 तम्हें लोग थियै तेऊ बगतै मसीहा का जुदैं और एस्त्राइले परजे पदबी का जुदैं कियै दै और प्रतिज्ञे बाचे भागी बी नाई तै आथी, और तम्हें तै आशाहीन और संसारा दी थियै ईश्वरा का दूर। 13 पर एबै जुंण तम्हें दूर थियै, मसीह दी हुए मसीहे लोहू करै नेळ। 14 किल्हैकि सहैई आसा म्हारअ मेल, जुंणी दूहै किए एक, जुंण जुदैं करनैं आळी दुआल बिचै ती, सह पाई ढोळी। 15 और आपणें शरीरा दी बैर, अर्थात्- सह व्यवस्था, जेते आज्ञा, बिधीए रीति दी थी, तियां पाई मटाऊई, कि दूही करै आप्पू दी एक नऊंअ माहू बणाई करी करै मेल कराऊए। 16 और क्रूसा दी सह बैर नाश करी करै एता करै दूहीए एक देह बणाई करै परमेश्वरा का मलाऊए। 17 और तेऊ प्रभू एछी करै, जुंण तम्हें दूर थियै, और जुंण नेळ थियै, दूही का शणांऊअ मेल मलापो सुसमाचार। 18 किल्हैकि तेऊई करै पुजा हाम्हां दानें एक आत्मां दी पिता परमेश्वरा सेटा। 19 तैहीता एबै नि तम्हें परदेशी और मुसाफर रहै, पर एबै हुए पबित्र लोगे साथी और स्वदेशी और परमेश्वरे घराने। 20 और प्रेरित और भविष्यबगते आथरी दी आसा चिणें दै जसरे कुणोंओ पाथर प्रभू यीशू मसीह आप्पै आसा। 21 जेथ दी सारी चणाई संघा मिली करै प्रभू दी एक पबित्र मांदर बणां। 22 जेथ तम्हें बी आसा आत्मां करै परमेश्वरे निबास स्थान हणां लै एकी मेटा दी चिणें दै।

### होरी जाती बिचै पौलुसे सेऊआ

3 तैहीता हूँ पौलुस जुंण तम्हां होरी जाती लै मसीहो बंधुअ आसा; 2 जे तम्हें परमेश्वरे तेऊ प्रबन्धो सुसमाचार शुणअ द होए, जुण तम्हां लै मुखा दैनअ द आसा, 3 अर्थात् - इहय कि सह भेद हूअ मूह दी प्रैशै करै प्रगट, जिहअ मणें पैहलै थोळअ जिहअ लिखी बी आसा हेरअ द। 4 जेता पट्ठी करै तम्हें समझी सका कि हूँ तेऊ मसीहे भेदा किधी तैणीं समझाऊआ। 5 जुंण होरी- होरी बगतै माहूए संताना का इहय निं खोजअ त, जिहअ कि आत्मा करै एबै तेऊए पबित्र प्रेरित और भविष्यवक्ता प्रगट आसा किय द। 6 अर्थात्- इहय कि मसीह यीशू दी सुसमाचारा करै होरी जातीए लोग बी मिरासा दी साझू और एकी देही और प्रतिज्ञे भागीदार आसा।

7 और हूँ बणअ परमेश्वरे अनुग्रहे तेऊ दाने साबै, जुंण सामर्थे प्रभावे साबै मुल्है दैनअ, तेऊ सुसमाचारो सेबक। 8 मुल्है जुंण सोभी पबित्र लोगा का होछे का बी होछअ आसा, हुअ इहय अनुग्रह कि हूँ होरी जाती का मसीहे अगम्य धनो सुसमाचार शणांऊ। 9 और सोभी लै एसा गल्ला प्रकाशित करुं कि तेऊ भेदो प्रबन्ध किजै आसा, जुंण सोभिए सृजणहार परमेश्वरा दी शुरु ओही गुप्त थिय। 10 ताकि एबै कलीसिया करै, परमेश्वरो नाना प्रकारो ज्ञान, तिन्नां प्रधाना और ज्ञानी दी, जुंण स्वर्ग स्थाना दी आसा, प्रगट होए। 11 तेसा सनातन मनसे साबै जुंण तेऊ म्हारै प्रभू यीशू दी पूरी की ती। 12 जेथ दी हाम्हां तेऊ दी विश्वास डाहणें करे हियाब और भरोसे नेळ एछणेंओ आधिकार आसा। 13 तैहीता हूँ अरज करा कि जुंण क्लेश थारी तैणीं मुल्है आसा लागै दै हंदै, तेते कारण निं हिम्मत छाडी, किल्हैकि तेथ आसा थारी महिमां।

### मसीहो प्रेम

14 तैहीता हूँ तेऊ बाप्पू सेटा जाहू टेका, 15 जुंणीं स्वर्ग और पृथूई दी हरेक घरानेओ नांअ डाहअ कि 16 सह आपणीं महिमें दौलते साबै एऊ दाना दैए कि तम्हें तेऊए आत्मा करै आपणें भितरी मनुष्यत्व दी सामर्थ पाई करै बलबंत होए। 17 और विश्वासा करै मसीह थारै दिला दी बसे कि तम्हें प्रेमा दी जलैळिओ और आथरी लाई करै, 18 सोभी पबित्र लोगा संघै मली भांती समझणेंओ शगती पाए; कि सह केतरअ लाम्मअ, केतरअ बिरलअ और सह केतरअ दुघअ आसा। 19 और मसीहे प्रेमों बी तम्हां का थोघ लागे जुंण ज्ञाना का आजू आसा, कि तम्हें परमेश्वरे सारी भरपूरी करै परिपूर्ण होए।

20 एबै जुंण इहय सामर्थी आसा, कि म्हारी बिनती और समझा का सका सह कई जादअ करी, तेसा सामर्थे साबै जुण हाम्हां दी काम करा, 21 कलीसिया दी, और मसीह यीशू दी तेऊए महिमा लोळी तम्हां बिचै पोस्ती दर पोस्ती तैणीं जुगै-जुगै हंदी रही। आमीन॥

### मसीहे देहीए एकता

4 हूँ पौलुस, जुंण प्रभू दी गुलाम आसा, हूँ करा तम्हां लै एही अरज कि जेऊ कामां लै तम्हें शार्दै दै आसा, तेता जोगी चाल चला। 2 अर्थात्- सारी दीनता और नम्रता संघी, और धीर धरी करै बडै प्रेमा संघे सैहा एकी दुजेए। 3 और मेल-मलापे बंधना दी करा आत्मां दी एकता डाहणें कोशिश। 4 एकै आसा देह, और एकै आसा आत्मां; जिहै तम्हें जुंण शार्दै दै थियै, थारी शार्दणेंओ आसा एकैई आशा। 5 एकैई आसा प्रभू, एकै आसा विश्वास और एकैई आसा बपतिस्मअ। 6 और सोभियो आसा एकै परमेश्वर पिता, जुंण सोभी परंदै, सोभी बिचै और सोभी दी आसा। 7 पर हाम्हां सोभी आसा हरेकी लै मसीहे दाने परिणामें साबै अनुग्रह भेटअ द। 8 तैहीता सह इहय बोला कि, सह उखळअ उछटै दी और बंधुआई निं तेऊ बाहिनै और माहू लै दैनै दान। 9 (तेऊए उझै उखळणें करै किजै भेटा, सिधअ अह कि सह होथअ त पृथूईए थाल्लै बी) 10 और जुंण होथअ, अह आसा सहैई, जुंण सारै सरगा का उझै बी उखळअ ताकि सोभी परिपूर्ण करी सके। 11 और तेऊ किए कई भविष्यवक्ता नियुक्त, और कई सुसमाचार शणांऊणें आळें, और कई दैनै रखवालै और उपदेशक नियुक्त करी करै। 12 जेता करै पबित्र लोग सिध होए, और सेऊआ चाकरीओ काम होए, और मसीहे देहीए उन्नति होए। 13 जेभै तैणीं कि हाम्हां सोभै विश्वास, और परमेश्वरे शोहरूप बछेणां दी एक नां होए, और एक सिध माहू नां बणीं जाए और मसीहे पूरै डील-डौला दी नां पुजी मुके, 14 ताकि हाम्हें आजू लै बचै नां रहे, जुंण माहूए ठग बिदआ और चलाकी करै तिन्नें भरमाऊणें आळी युक्ती, और उपदेश और हर गल्ला करै उछाळा और हाम्हां ओही-पोही फरेऊआ। 15 पर प्रेम और सच्चाई दी चलदी, सोभी गल्ला दी तेऊई दी, जुंण म्हारअ मूड आसा, अर्थात् मसीहा दी बढदै रहे। 16 जिहअ करै सारी देह एकी जोळे सहायता करै कठा मिलीकरै और संघा जुळी करै, तेऊ प्रभावे साबै जुंण हरेक हिस्से परिणामा करै हआ, आपणें आप बढाऊआ, कि तेऊए प्रेमा दी तरक्की होए।

### मसीह दी नऊंअ जीवन

17 तैहीता हूँ बोला, और प्रभू दी दैआ हूँ चतैनगी कि जिहै होरी जातीए लोग आपणें मने अनर्थ रिती दी चला, तम्हें निं एबै तिहै चली। 18 किल्हैकि तिन्नें बुधी आसा गई दी न्हैरी हई, और तेते कारण जुंण अज्ञानता तिन्नां दी आसा, और तिन्नें मन काठै हणें बजह आसा तियां परमेश्वरे जिदगी का जुदैं हुए दै। 19 और तियां आसा सुन्न हई करै लुचपना दी लागें दै, कि तियां सोभी प्रकारे गंदे काम आपणीं लालसा करै करे। 20 पर तम्हें आसा मसीहे एही शिक्षा पाई दी, 21 कि तम्हें सच्ची शुणीं दी और जिहअ प्रभू यीशू सच्चअ आसा, तेऊई दी आसा तम्हें सखाऊए दै, 22 कि तम्हें आपणें चालचलणें पराणें मनुष्यादेही जुंण भरमाऊणेंआळी अभिलाषा करै भ्रष्ट हआ, तेऊ खोला तम्हें पोही। 23 और आपणें मने आत्मिक स्वभावा दी बणां एबै नऊंए। 24 और एबै बाह्नां नऊंई मनुष्यादेही, जुंण परमेश्वरे साबै सच्चाई, धार्मिकता और पबित्रता दी सृजी दी आसा।

25 इहय करै झुठअ बोळणअ छाडी करै, हरेक बोला आपणें साथी संघी का सच्चय, किल्हैकि हाम्हें आसा आपू मांझै एकी दुजेए अंग। 26 क्रोध ता करा, पर पाप निं करा, धैळअ उडणें तैणीं निं लोळी थारअ क्रोध रहअ। 27 और नां शैताना लै दैआ मौकअ। 28 चोरी करनैआळअ निं ऐबै भी चोरी करी; पर भलै कामां करना लै लागै आपणें हाथे खटदअ-छपदअ, एते तैणीं कि जै कसा जरूरत होए ता तेभै लोळी तेऊका किजै दैणां लै हुआ। 29 कोई बी गंदी गल्ला निं लोळी थारी खाखा का निखळी, पर जरूरतीए साबै बोळणीं तियांई गल्ला जुंण उन्नती करना लै उत्तम आसा, ताकि शुळणें आळै लै तेता करै अनुग्रह होए। 30 और परमेश्वरे पबित्रात्मां लै निं शोग दैआ, जसा करै तम्हां लै छुटकारे धैळी लै छाप आसा लाई दैनीं दी। 31 सोभी रंगे कळविश, प्रकोप, क्रोध, कलह, निंदा, और बैरभावा संघी लोळी तम्हां का दूर हुई 32 और एकी दुजे लै ह्आ कृपालू, और करुणा करनै आळै, और जिहअ परमेश्वरै मसीहा दी थारै अपराध माफ किये, तिहैई करा तम्हें बी एकी दुजेए अपराध माफ।

### ज्योतिए संतान बणां

5 इहय करै हे प्रियो, बाल बच्चै जिहै चला परमेश्वरे साबै। 2 और प्रेमा दी चला; जिहअ मसीहै बी तम्हां लै प्रेम किय, और हाम्हां लै आप्पूई, म्हारी तैणीं सुखदाई खुशबू लै परमेश्वरा आजू भेंट चढाऊई करै बलिदान हुआ।

3 और जिहअ पबित्र लोगा लै जरूरी आसा, तिहअई निं तम्हें बी व्यभिचार, और कोइ बी प्रकारे अशुध काम या लोभ लाळवे निं चरचा बी करा। 4 और नां निर्लज्जता, नां मूढता, नां ठठै मखुऊले गल्ला बाता, किल्हैकि ईयां गल्ला निं हाम्हां शोभदी, पर थारै मुहा का लोळी धन्यबाद ही शुळुअ। 5 किल्हैकि तम्हां का आसा एसा गल्लो थोघ कि कसा कंजरै और अशुध आदर्मी या लाळची आदर्मीए, जुंण मुर्ती पुजा करनै आळै बराबर आसा, मसीह और पिता परमेश्वरे राईसी दी निं मेल खांदअ। 6 कोई तम्हां लै ब्यर्थ गल्ला लै धोखअ नां दैए, किल्हैकि इना गल्ला करै ई भडका परमेश्वरो क्रोध आज्ञा नांई मनणें आळै लै। 7 और तम्हें निं तिन्नै सैहभागी हुआ। 8 किल्हैकि पैहलै ता थियै तम्हें न्हैरे दी पर ऐबै आसा तम्हें प्रभू दी ज्योती, ता ऐबै चला ज्योतिए संताना जिहै। 9 (किल्हैकि ज्योतिओ फळ आसा सोभी प्रकारे भलाई, धार्मिकता, और सच्चाई)। 10 एसा गल्ला परखा कि प्रभू किजै भांऊआ? 11 और न्हैरेए निष्फल कामें भागी निं ह्आ, पर तिन्नां का रहा दूर। 12 किल्हैकि तिन्नै गुप्त कामें चरचा बी आसा लाज शर्में गल्ला। 13 पर जेतरे कामों खंडन ह्आ तियां सोभ ह्आ ज्योती दी प्रगट, किल्हैकि जुंण सोभै गल्ला प्रगट करा सह आसा ज्योती। 14 तैहीता सह इहय बोला कि हे सुतणें आळै, जागा, और मुल्दै बिचा का हुआ जिऊंदअ; तै चमकणी मसीहै ज्योती तम्हां दी।

15 तैहीता धैन लाई करै शूणा, हेरा कि केही चाल चला; निर्बुधि जिहै निं चला पर बुधिमाना जिहै चला, 16 और एऊ मोकै समझा किम्मती, किल्हैकि धैळै आसा बुरै। 17 तैहीता निर्बुधी निं ह्आ पर धैन लाई समझा, कि प्रभूए इछा किजै आसा? 18 और दाखरसा करै निं मतबालै बणां, किल्हैकि एता करै ह्आ लुचपन। पर आत्मा करै ह्आ तम्हें परिपूर्ण। 19 और आप्पू मांझै रहा भजन, स्तुतिगान और आत्मिक गिहा गांदे लागी, और आपणें-आपणें मनै प्रभूए सहनै रहा गांदे और किर्तण करदें लागी। 20 और सदा करा सोभी गल्ला लै म्हारै प्रभू यीशू मसीहै नांओरें पिता परमेश्वरो धन्यबाद। 21 और मसीहै उरा हेठै रहा एकी दुजे अधीन।

### शादी शुधा मरध और बेटळी

22 हे बेटळीओ, आपणें-आपणें मरधे उअरा हेठै रहा एही कि तम्हें समझै इहय कि प्रभूए उरा हेठै आसा। 23 किल्हैकि मरध आसा बेटळीओ मूंड, जिहअ मसीह कलिसियो मूंड आसा, और आप्पूई आसा देहीओ उद्धारकर्ता। 24 पर जेही कलीसिया मसीहै उरा हेठै आसा, तेही ई रहा सोभै बेटळी बी आपणें-आपणें मरधे अधीन।

25 हे मरधो, आपणें-आपणें लाळी संघे करा झूरी, जिहअ मसीह बी कलीसिया संघे झूरी करीकरै आप्पूई हुआ तिन्नां लै बलिदान। 26 कि तेऊ

बचने साबै पाणीं दी स्नान करी करै शुध हई करै बणें पबित्र। 27 और तेसा एक एही तेजस्वी कलीसिया बणांई करै आप्पू सेटा खळी करे, जेथ दी ना कळंक, ना कोई बोजा, और नां कोई एही बूरी चीज, पर पबित्र और निर्दोष होए। 28 इहयई करै आसा ठीक इहय कि मरध जुंण आपणीं- आपणीं लाळी संघे झूरी डाहा, ता सह डाहा आप्पूई लै झूरी। 29 किल्हैकि कोही निं कधू आपणें शरीरा संघे बैर किय, पर तेते हेरसभाळ और पाळण-पोषण करा, जिहअ मसीह कलीसिया संघा करा तै, 30 कि हाम्हें आसा तेऊए देहिए अंग।

31 तैहीता मांळू आपणें आम्मां बाप्पू छाडी करै आपणीं लाळी संघे रहणअ मिली, और तियां दूहै हणें एक तन 32 अह भेद ता आसा बडअ, पर हूँ बोला मसीह और कलीसिए बारै दी 33 पर तम्हां मांझै करै हरेक जळुअ आपणीं लाळी संघे आप्पू बराबर झूरी, तैहीता मांळू आपणें आम्मां बाप्पू छाडी करै आपणीं लाळी संघे रहणअ मिली, और तियां दूहै हणें एक तन। लाळी बी चाहिए कि आपणें मरधे उरा हेठै रहे।

### मां-बाब और लान्हें

6 हे शोहरुओ, प्रभू दी बणां आपणें आम्मां बाप्पूए आज्ञाकारी, किल्हैकि इहय करनअ ई आसा ठीक। 2 आपणें आम्मां बाप्पूओ आदर कर (अह आसा पैहली आज्ञा, जसा संघे प्रतिज्ञा बी आसा)। 3 कि तेरअ भलअ होए, और तूह धरती दी खास्सै धैळै जिऊंदअ रहे। 4 और हे शोहरु माठै आळैओ, आपणें शोहरु लै निं रिस आणा, पर प्रभूए शिक्षा और चतैनगी दैदी करा तिन्नो पाळण-पोषण।

### स्वामीं और दास

5 हे दासो, जुंण लोग शरीरे साबै थारै मालक आसा, सिधे मनै रहा डरदी-कांबदी जेही तम्हें मसीहै आज्ञा मना, तेही मना तिन्नै बी। 6 और मांळू रहैऊणा लै खुश करनै जेही सेऊआ निं करनीं, पर मसीहै पबित्र दासा जिहअ चलणअ परमेश्वरे इछा दी। 7 और तेसा सेऊआ निं मांळूए सेऊआ समझा, पर प्रभूए सेऊआ समझी करै करा आपणीं इछा संघे। 8 किल्हैकि तम्हां का आसा थोघ कि, जुंण बी शोभलअ काम करे, चाहे सह दास होए, चाहे सह गुलाम होए, तेऊ भेटणअ प्रभू का तिहअई। 9 और हे मालकओ, तम्हें बी करा धमकी दैणीं छाडी करै तिन्नां संघे तिहअ ई बभार, किल्हैकि तम्हां का बी आसा थोघ कि तिन्नो और थारअ आसा दुहीओ मालक स्वर्गै और सह निं कोहिओ पक्ष लंदअ।

### आत्मिक जुधे हथियार

10 हे भाईयो, प्रभू दी और तेऊए शगती दी बणां बलबंत। 11 परमेश्वरे सारै अस्त्र-शस्त्र कशा, ताकि तम्हें शैतानें चाला सहनै खळै रही सके। 12 किल्हैकि म्हारअ अह मल्लजुध निं लोहू और मासा संघे आथी, पर म्हारअ मल्लजुध आसा प्रधाना, अधिकारी और एऊ संसारे अंधकारे हाकमां संघे, और बुराईए आत्मिक सैना संघे जुंण सरगै आसा। 13 तैहीता परमेश्वरे सारै हथियार कशा, ताकि तम्हें बुरै धैळै बी सहनअ करी सके, और सोभै गल्ला पूरी करी करै स्थिर रही सके। 14 ता इहय करै सच्चाई करै आपणीं कमर कशीकरै, धार्मिकते झिलम बाह्नी करै, 15 खूरा दी मेल मलापे सुसमाचारै तयारीए बूट बाह्नी करै, 16 और इना सोभी संघे रहा विश्वासे ढाल लई करै स्थिर, जेता करै तम्हें दुशटे जळद-जळद तैर शेऊई सके। 17 और उद्धारो टोप, और आत्मं तलबार, जुंण परमेश्वरो बचन आसा, तेता ल्आ हाथै। 18 ता, हर बगत और हर प्रकारे रहा प्राथणा, बिनती करदें लागी, और एताई लै रहा जागदें कि सोभी पबित्र लोगा लै रहा लागातार प्राथणां बिनती करदें लागी। 19 और मुल्है बी रहा प्राथणां करदें लागी कि, जेभै हूँ बोले, प्रभू मुल्है इहय प्रबल बचन दैए कि हूँ बडी हिम्मता संघे सुसमाचारो भेद खोजी सकू, जसरी तैणीं हूँ शांघळी लोहै दी कशअ द राजदूत आसा। 20 इहय बी कि जिहअ मूह तेऊए बारै बोळणअ चाहिए तिहअ ई बडै हियाबा संघे बोळूँ।



## आखरी आदर-सत्कार

<sup>21</sup> और तुखिकुस, जुंण प्रिय भाई और प्रभू दी विश्वासयोग्य सेबक आसा, तेऊ खोजणीं तम्हां का सोभै गला, कि तम्हां का बी मेरी दशा पतअ चले कि

हूँ किहअ आसा लागअ द रहंदअ। <sup>22</sup> सह भेजअ मंरें तम्हां सेटा लै तै कि, तम्हां का मेरै हाल चालो थोघ लागे, और सह थारै मना लै शांती दैए।

<sup>23</sup> परमेश्वर पिता और प्रभू यीशू मसीहे तरफा का लोळी सोभी भाई लै शांती और विश्वासा संघै प्यार भेटअ। <sup>24</sup> जुंण म्हारै प्रभू यीशू मसीह संघै सच्चअ प्रेम करा, तिन्नां सोभी लै रहे अनुग्रह हंदअ लागी।

# फिलिप्पियों

## भूमिका

फिलिप्पिये नांऊरें प्रेरित पौलुसे लिखी ती यूरोपे धरती दी स्थापित पैहली कलीसिया लै जेते स्थापना पौलुसे की ती। सह आसा रोमीं प्रान्त मकीदूनिया दी। अह चिठी लिखी ती तेऊ समें जधू प्रेरित पौलुस जेहला दी थिय और जधू सह होरी मसही सेऊआकरनें आळैए बिरोध करनेंए बज्हा परैशान थिय और फिलिप्पिये कलीसिया दी पनपी दी गलत शिक्षा करै दुखी त। तजी बी करा अह चिठी आनंद और निश्चय व्यक्त, तेता सका सिधअ यीशू मसीह दी पौलुसे गहरै विश्वासा करैई समझाऊई।

एसा चिठी लिखणेंओ कारण त तेसा बगती फिलिप्पिये विश्वासी लै तेऊ दाना लै धन्यवाद दैणअ जुण तिन्नै पौलुसे जरूतीए बगती भेजी ती। सह करा एऊ मोकैओ इस्तेमाल तिन्नां लै आश्वासन दैणं लै ताकि तियां तेऊ संघा-संघा आपनणीं बी मुशकळा हदी बी शाह और भरोसअ डाहे। सह करा तिन्नां का आरज कि आपणीं स्वार्थी अभिलाषा और घमंडे बदलै बणां मसीहा जिहें नम्र स्वभावे। सह फरेऊआ तिन्नां का आद कि मसीहा दी आसा तिन्नै जिन्दगी परमेश्वरे आनुग्रहो एक दान जुण तिन्नां विश्वासा करै आसा भेटअ द, न कि यहूदी बिधी-बधाना मनणें करै। सह लिखा तेसा आनंद और शान्तीए बारै जसा परमेश्वर तिन्नां लोगा लै दैआ जुण मसीहा संघे एक हई करै जिन्दगी जिऊआ।

मसीही विश्वास और जिन्दगी दी आनंद, निश्चय, एकता और दृढता दी जोर दैणअ आसा एसा चिठीए खास गल्ल। अह चिठी करा फिलिप्पिये कलीसिये प्रति गहरै प्रेमा पगट।

रूप-रेखा

भूमिका 1:1-11

पौलुसे आपणीं परिस्थिती 1:12-23

मसीह दी जिन्दगी 1:27-2:18

तीमुथियुस और इफ्रूदीतुसा लै योजना 2:19-30

शत्रू और खातरे खलाफ चतैनगी 3:1-4:9

पौलुस और तेऊए फिलिप्पी साथी 4:10-20

नचोळ 4:21-23

1 मसीह यीशूए दास पौलुस और तीमुथियुसे तरफा का सोभी पबित्र लोगे नांओए जुण मसीह यीशू दी फिलिप्पी देशा दी रहा, मुखिरे और सेबका संघी लोळी,

2 म्हारै पिता परमेश्वर और प्रभू यीशू मसीहे तरफा का तम्हां लै अनुग्रह, शांती हंदी रही।

## पौलुसे प्राथणां और धन्यावाद

3 जेभै-जेभै हूँ तम्हां आद करा, तेभै-तेभै करा हूँ तम्हां लै परमेश्वरो धन्यवाद। 4 और जेभै बी तम्हां लै हूँ प्राथणां बिनती करा, ता हूँ करा हर बगत आनंद और खुशी संघे एही अरज 5 कि तम्हें आसा पैहलै ओही आझः तैणीं सुसमाचारा फैलाऊणा लै मूह संघे मेरै सैहभागी। 6 और मूह आसा एसा गल्लो भरोसअ कि जुणीं तम्हां दी बधिया काम करनअ शुरू किय, तेऊई करनअ सह यीशूमसीहे धैळी तैणीं पूरअ। 7 ठीक आसा कि हूँ तम्हां लै इहय बचार करूँ, किल्हैकि तम्हें आसा मेरै मनै बस्सै दै और मेरी कैदा दी और सुसमाचारा लै जबाब और प्रमाण दैणा लै मूह संघे अनुग्रहा दी सैहभागी। 8 एता दी आसा परमेश्वर मेरअ गुआह कि हूँ मसीह यीशू जिहअ प्यार करी करै करा थारी लालसा। 9 और हूँ करा एही प्राथणां कि थारअ प्रेम और ज्ञान और सोभी प्रकारे बिबेका संघी होर बी बढदअ लागे। 10 इधी तैणीं कि तम्हें उत्तम से उत्तम गल्ला प्यारी जाणें, और मसीहे धैळी तैणीं रहै सच्चै बणीं, और तम्हें कधि ठोहळ नां खाए। 11 और तेऊ धार्मिकते फळा करै जुण प्रभू यीशू मसीह करै हूआ, तेता करै हूआ भरपूर, जेता करै परमेश्वरे महिमां और स्तुति हंदी रहे।

## जेहलखानें का पौलुसे सेवकाई बढोतरी

12 हे भाईयो, हूँ चाहा इहय कि तम्हां का लोळी थोघ लागअ कि मुल्है जुण बितअ, तेता करै हुई सुसमाचारे ही बढोतरी। 13 इधी तैणीं कि कैसरे राईसीए सारी पळटण और बाकी सोभी लोगा दी गूअ अह प्रगट हई कि हूँ आसा मसीहे तैणीं कैद। 14 और प्रभू दी जुण भाई आसा, तिन्नां मांझै बडे भारी मेरै कैद हणें कारण, हिम्मत बाह्नी करै नधड़क परमेश्वरे बचना शणांऊणें हिम्मत करा।

15 कई लोग ता करा डाह और झगळे बज्जह मसीहो प्रचार और कई करा भली मनसा दी। 16 कई ता इहय जाणीं करै कि हूँ आसा सुसमाचारा लै जबाबा दैणां लै डाहअ द, तियां करा बडे प्रेमा संघे प्रचार। 17 पर कई ता ईहे बी आसा जुण सिधै मनै ता नाई पर बिरोध करी करै शणांऊआ मसीहे कथैया, इहय सोची करै कि मेरी कैदा दी तियां मुल्है क्लेश पैदा करे। 18 तै किज्जै हुअ? सिधअ इहय कि, हर प्रकारै, चाहे सह किज्जै भानै दी होए, चाहे सच्चाई दी, मसीहे कथैया आसा शणांऊंदै लागै दै, और हूँ हूआ एता करै खुश, और मूह खुश रहणअ बी।

## जिऊंदै रहणअ आसा मसीह

19 किल्हैकि मुखा आसा थोघ कि, थारी प्राथणां बिनती करै और प्रभू यीशू मसीहे आत्में दाना करै हणअ एतो प्रतिफल मेरअ उद्धार ई। 20 हूँ डाहा दिला का एही लालसा और आशा कि हूँ किछी गल्ला लै शर्मिंदअ नां होए, पर जेही मंए प्रबल साहस डाही करै हमेशा मेरी देही करै मसीहे बडाई हंदी रही, तेही ई ऐबे बी, चाहे हूँ जिऊंदअ रहूँ या मरूँ। 21 किल्हैकि मुल्है आसा जिऊंदअ रहणअ मसीह और मरनअ आसा मुल्है नफअ। 22 पर जे शरीरा दी जिऊंदै रहणअ ई मेरै कामां लै लाभकारी आसा, तै निं मुखा पतअ कि हूँ किज्जै चुनु।

23 किल्हैकि हूँ आसा दुही बिचै आधा-आधी लटकअ द, ज़िऊ ता चाहा इहय कि एऊ संसारा छाडी मसीहा सेटा लै नाशूँ, किल्हैकि सह आसा शोभलअ। 24 पर शरीरा दी रहणअ आसा थारी तैणी होर बी जरूरी। 25 मूँह आसा एसा गल्लो भरोसअ, और मुखा एसा गल्लो थोघ बी आसा कि हूँ रहणअ ज़िऊंदअ, और रहणअ बी तम्हई संघे, जेता करै तम्हें विश्वासा दी मजबूत होए और तेताई दी खुश रहे। 26 और जुंग घमंड तम्हें मेरै बारै करा, सह लोळी मेरै तम्हां सेटा लै भी एछणें करै बढअ।

27 सिधअ एतरअ करा कि थारअ चाल चलण लोळी मसीहे सुसमाचारा जोगी हुअ, चाहे हूँ तम्हां सेटा एछी करै भाळूँ, चाहे नां बी एछूँ, पर थारै बारै लोळी मूँह इहय शुळणां लै भेटअ कि तम्हें आसा एकी आत्मा दी स्थिर, और एक मन हई करै सुसमाचारे विश्वासा लै आसा मैन्था करदै लागै दै। 28 और किछी गल्ला लै नि बिरोधी का डरदै? और अह आसा तिन्नां लै बिनाशो चिन्ह। पर तम्हां लै आसा उद्धार, और अह आसा परमेश्वरे तरफा का। 29 किल्हैकि मसीहे कारण आसा तम्हां लै इहय अनुग्रह हुअ द कि नां सिधअ तेऊ दी विश्वास करा, पर तेऊ लै चका दुख बी 30 और तम्हां आसा तेही मैन्थ बी करना लै, ज़िहअ तम्हें हूँ करदअ भाळअ, और ऐबै बी शुणा कि हूँ करा तिहअई।

### मसीहे दीनता और महानता

2 तै ऐबै, जै मसीह दी धख शांती, प्रेम ढाढस और आत्मां दी सैहभागिता, करुणा और दैया आसा, 2 तै करा मेरी एसा खुशी पूरी कि एक मन रहा और ऐकैई प्रेम, एक चित, और एक ही मनसा डाहा। 3 बिरोध और झुठी बड़ाई लै नि किछे करा पर दीन मनै एकी दुजै समझा आपू का बधिया। 4 हेरेक ज़हअ नि सिधै आपणें फाईदे पर दुजे फाईदे बी करा चिंता। 5 ज़िहअ मसीहो स्वभाव त, तिहअई लोळी थारअ स्वभाव बी हुअ।

6 जुंणी परमेश्वरे स्वरुपा दी हई करै बी परेश्वरा ज़िहअ हणअ नि आपणें बशा दी डाहणें चीज समझी।

7 पर आपणें आप हुअ इहय शुन्य कि दासो रूप किय धारण और आपू बणअ आमं माळूँ ज़िहअ।

8 और माळूँ रूप प्रगत हई करै हुअ दीन, और ईधी तैणी आज्ञाकारी रहअ कि मौत, हां, क्रुसे मौत बी की सैहन।

9 तैहीता परमेश्वरै सह सोभी का महान किय, और तेऊ लै दैनअ अह नांअ जुंग सोभी नांओआ का श्रेष्ठ आसा।

10 कि जुंग स्वर्ग और पृथ्वी दी और जुंग पृथ्वी हेठै आसा, तियां सोभै प्रभू यीशू नांओए जाहूँ टेके।

11 और पिता परमेश्वरे महिमा लै हेरेक ज़िभ एसा गल्ला मनै कि यीशू मसीह ई आसा प्रभू।

### संसारा दी चमका ज्योति ज़िहै

12 तैहीता, हे मेरै प्यारो, ज़िहै तम्हें हमेशा आज्ञा मंदी आसा आए दै, तिहैई ऐबै बी, सिधअ मूँह संघे रहंदी नि पर खासकर ऐबै मेरे दूर रहणें का बी डरदी-कांबदी आपणें-आपणें उद्दारे कामां रहा पूरै करदै लागी। 13 किल्हैकि परमेश्वर ई आसा जुंणी आपणें सुझा करै थारै मनै इछा और काम, दुहे गल्ला करनेओ प्रभाव पाअ।

14 सोभै काम करा बिणा कुड़कुड़ाए और बिणां कोई बिबाद करी। 15 ताकि तम्हें निर्दोष और भोळै हई करै टेढै और हठीलै लोगा बिचै परमेश्वरे निष्कलंक संतान बणी रहे। (जसा बिचै तम्हें ज़िऊणेंओ बचन लई एऊ संसारा दी ज़ळदै सदीए ज़िहै धेछिए)। 16 कि मसीहे धेळी मुल्है बी तम्हें घमंड करने कारण होए कि नां मेरअ अह तुहनअ और नां मेरी अह मैन्थ बेकार हई।

17 और जै मूँह थारै विश्वासे बलिदान और सेऊआ संघे आपणअ खून बी बहाऊणअ पळे, तैबी बी आसा हूँ खुश, और तम्हां सोभी संघे मनाऊआं हूँ खुशी। 18 तिहैई रहा तम्हें बी खुश, और मूँह संघे मनाऊआ खुशी आनंद।

### तीमुथियुस और इपफ्रुदीतुस

19 मूँह आसा प्रभू यीशू दी आशा कि तिमुथियुस भेजणअ मूँह तम्हां सेटा लै एभी, ताकि थारै हाल-चाल ज़ाणी करै मूँबी शांती भेटे। 20 किल्हैकि मुखा नि ईहै स्वभावो कोहै आथी जुंग शुध मना करै थारी चिंता फिकर करे।

21 किल्हैकि सोभै हूआ आपणें स्वार्था लोळे लागैदै, नां कि प्रभू यीशू लोळे।

22 पर सह आसा तम्हें परखी बी हेरअ द और तम्हां का इहय थोघ बी आसा कि ज़िहअ शोहरू बापू संघे करा, तेही मैन्थ की तेऊ मूँह संघे सुसमाचारा फैलाऊणा लै। 23 मूँह आसा एही आशा कि ज़िहअ ई मूखा थोघ लागे कि आजू मेरी किजै दशा हणी, तिहअ ई भेजणअ मूँह अह नढेउरे। 24 और मूँह आसा प्रभू दी भरोसअ कि आपू बी एछणअ हूँ तम्हां सेटा लै छेकै।

25 पर मएँ समझअ इपफ्रुदीतुस तम्हां सेटा लै भेजणअ जरूरी, जुंग मेरअ भाई, सैहकर्मी और साथी जोधअ और थारअ दूत आसा और जरूरी गल्ला लै मेरी सेऊआ टैहल करनैआळअ आसा। 26 किल्हैकि तेऊओ मन त तम्हां सोभी सेटा लागअ द, और एऊई कारणें रहा त अह बड़अ बेचैन ज़िहअ, किल्हैकि तम्हें त एऊए बमारीओ हाल शुणअ द। 27 अह सची बमार ता हुअ त, ईधी तैणी कि सह गूअ त मरी, पर परमेश्वरै की तेऊ लै दैया, पर सिधी तेऊलै ई नि पर मुल्है बी की दैया कि मुल्है शोगा परदै शोग नां होए।

28 तैहीता मएँ तेऊ भेजणें कोशिश की कि तम्हें तेऊ का भी मिली करै खुशी होए और मेरअ शोग बी घटे। 29 तैही करै तम्हें बी प्रभू दी तेऊ संघे बडे आनंद और खुशी दी भेंट, और इना ईहैओ करनअ आदरमान। 30 किल्हैकि अह पुजअ त मसीहे कामां लै आपणें प्राणा खातरै दी पाई मौता बिलकुल नेळ, ताकि जुंग कामी पेशी थारी तरफा का मेरी सेऊआ दी हई, तेसा पूरी करे।

### सची धार्मिकता

3 इहय करै, हे भाईयो, प्रभू दी रहा आनंदित, इन्नाई गल्ला भी-भी लिखणा लै नि मूँह कोई बी कष्ट हंदअ और एताई दी आसा थारअ कुशल मंगल। 2 तिन्नां कुत्तै का रहा चतान, और इन्नां बूरै कामां करनैआळै का बी रहा चतैन, तिन्नां काटणें फणाटणें आळै का बी रहा चतैन। 3 किल्हैकि खतनैआळै आसा हाम्हें ई, जुंग परमेश्वरे आत्मं अगुआई करै उपासना करा, और मसीह यीशू दी घमंड बी करा, और आपणें शरीरो भरोसअ नि डाहंदै।

4 पर हूँ सका शरीरा दी बी भरोसअ डाही, जै कसा शरीरा दी भरोसै करनैओ बचार होए, ता हूँ सका तेऊ का बढकर करी। 5 आतूरे धैळै हुअ मेरअ खतनअ इस्त्राईलै खानदानि का और बिन्यामीने गोत्रा का आसा हूँ; ईब्रानीओ आसा हूँ ईब्रानी; व्यवस्थे साबै जै कुंग बोले ता हूँ आसा फरीसी।

6 उत्साहे साबै जै कुंग बोले ता तै आसा हूँ कलीसिया सताऊणें और क्लेश दैणें आळअ, और व्यवस्थे धार्मिकते बारै जै कुंग बोले ता तै थिय हूँ बिलकुल निर्दोष। 7 पर जुंग-जुंग गल्ला मेरै फाईदे लै ती, तियांई समझी मएँ मसीहे कारण आपू लै हानि। 8 पर हूँ समझा एसाई गल्ला उत्तम कि लोग बछेणें मूँह प्रभू यीशू नांओए ई। जेते बजह मएँ इन्नां सोभी गले हानि चकी, और हूँ समझा इना गल्ला कूळअ-कवाळ, ताकि हूँ मसीह प्राप्त करी सकूँ। 9 और तेथे ई भेट्टै, नां कि आपणें तेसा धार्मिकता संघे, जुंग व्यवस्था करै आसा, पर तेसा धार्मिकता संघे जुंग मसीह दी विश्वास करनै करे आसा, और परमेश्वरा का बिश्वास करी करै भेटा। 10 और हूँ तेता और तेते मृत्यंजय सामरथा, और तेऊ संघे दुखी हणें महमां समझूँ और तेऊए मौते समानता प्राप्त करी सकूँ।

11 ताकि हूँ केऊ बी तरिकै करै मूएँ दै मांझै ज़िऊणें पदा दी पुजुँ।

### नशाणें बाखा तुहनअ

12 एतो नि इहय मतलब आथी कि मूँह मुकअ अह भेटी, या हूँ मुकअ सिध हई, पर एऊ पदार्था ढाकणा लै आसा हूँ तुहदअ लागअ द; जेते तैणी मसीह यीशू हूँ ढाकअ त। 13 हे भाईयो, मेरी भावना नि एही आथी कि हूँ मुकअ ढाकी; पर सिधअ एक काम करा हूँ इहय कि जुंग गल्ला पिछू आसा छुटी गई दी, तिन्नां बिसरी करै बढा हूँ आजू लै, 14 और नशाणें बाखा लै रहा हूँ तुहदअ लागी, ताकि हूँ तेते नाम पाऊ जेता लै हूँ मसीह यीशू दी उझै आसा शादअ

द। 15 ता, हाम्हां मांझै जेतरे लोग सिध आसा, तियां डाहै इहय ई बचार, और जै थारअ किजी गला लै किजै होर बचार होए, ता परमेश्वरा हेरनअ सबी तम्हां दी प्रगत करी। 16 इधी तैणी आसा हाम्हां पुजै दै और एऊई साबै रहणअ हांढदै लागी।

17 हे भाईयो, तम्हें सोभै चला मिलीकरै मूँह जेही चाल, और तिन्नां डाहा बछैणीं जुंण एऊ साबै चला, जसरअ उदहारण तम्हां मूँह दी भेटा।

18 किल्हैकि कई चला एही चाल, जेते चरचा मंए तम्हां का कई बारी आसा की दी और एभै बी बोला हूँ लेरा लाई- लाईकरै तम्हां लै कि तियां आसा आपणें चाल-चलणा करै मसीहे क्रूसे बैरी। 19 तिंनो अंत आसा बिनाश, तिंनो ईश्वर आसा पेट, और तियां करा आपणीं लज्जाऊणें गला दी बी घमंड, और संसारे चिजा दी डाहा मन लाई। 20 पर म्हारअ स्वदेश आसा स्वर्ग; और हाम्हां आसा उद्धारकर्ता प्रभू यीशू तिधा का एछदै न्हैळै भाळै लागै दै। 21 सह सका आपणीं शगतीए तेऊ प्रभावा करै, जेता करै सह सोभी चिजा आपणें बशै करी सका, म्हारी दीन-हीन देहीओ रूप बदळी करै आपणीं महिमे देहीए साबै बणाई।

4 तैहीता हे भाईयो, जेथ दी मेरअ जिऊ लागी रहा, जुंण मेरअ आनंद और मुकुट होए, हे प्रिय भाईयो, प्रभू दी रहा एऊई साबै स्थिर।

### व्यवहारिक नर्देश

2 हूँ समझाऊआ यूओदिआ बी, और सन्तुखे बी कि तिन्नां लै बोला हूँ प्रभू दी रहा एक मन हई करै। 3 और हे सच्चै सैहकर्मो हूँ करा ताखा अरज कि तूह कर तिन्नां स्त्रीए सहायता, किल्हैकि तिन्नां आसा मूँह संघै सुसमाचारा फैलाऊणें दी, क्रैमैस और मेरै तिन्नां होरी संघा काम करनै आळै संघी आसा बडी मँन्थ की दी, जसरै नांअ जिंदगीए कताबा दी आसा लिखै दै।

4 प्रभू दी रहा सदा आनंदित; भी-भी बोला हूँ आनंदित रहा। 5 थारी कोमलता लोळी सोभी मांझू दी प्रगत हुई, प्रभू आसा नेळ। 6 किछू गल्लो हैळअ फिकर निं करी, पर हरेकी गला दी करनीं थारै प्राथणा निबंदन और बिनती, धन्यबाद संघे परमेश्वरा सेटा पेश। 7 तैबै हणीं परमेश्वरे शांती, जुंण समझ म्हारी समझा का बिलकुल बागै आसा, और थारै दिल और थारै बचार डाहणें मसीह यीशू दी सुरक्षित।

8 एते तैणी, हे भाईयो, जुंण-जुंण गला सच्चै आसा, और जुंण-जुंण गला आदर करनै जोगी आसा, और जुंण-जुंण गला ठीक आसा, और जुंण-जुंण गला पबित्र आसा, और जुंण-जुंण गला सुहाबणीं आसा, औ जुंण-जुंण गला

मनै भाऊणें आळी आसा, एते तैणी, जुंण-जुंण गला सदगुण और प्रशंसा करनै जोगी आसा, तिन्नां दी ही दैआ धैन। 9 जुंण गला तम्हें मुखा शिखळी, और ग्रहण की, और शुंणी, और मूँह दी भाळी, तिंनो ई करा पाळण, तै रहणअ परमेश्वर जुंण शांतीओ सोबळ आसा, तम्हां संघे।

### दान देणा लै धन्याबाद

10 हूँ आसा प्रभू दी आनंद और खुश कि एतरै धैळै बाद थारअ बचार मेरै बारै जागअ भी; जरूर तम्हां पैहलै बी त एतो बचार, पर तम्हां निं मौकअ भेटअ। 11 इहय निं कि हूँ बोला एसा गला आपणीं कार्मी पेशीए कारण, किल्हैकि मंए आसा शिखळअ द कि जेसा दशा दी हूँ आसा, तेथे रहणअ संतुष्ट। 12 हूँ ज्ञाणा दीन हणअ बी और बढणअ बी, हरेकी गला और सोभी दशा दी तृप्त हणअ, भुख्खै रहणअ, और बढणअ-घटणअ आसा मंए शिखळअ द। 13 जुंण मुल्है सामर्थ दैआ तेऊ दी सका हूँ सोभ किछ करी।

14 तैबी बी किय तम्हें भलअ कि मेरै क्लेशा दी बी हुए तम्हें सैहभागी। 15 और हे फिलिप्पियो, तम्हां का आसा थोघ कि सुसमाचार प्रचारे शुरुआता दी जधू हूँ मकिदुनियां का चलअ तधू निं तम्हां छाडी होरी कोही मण्डळी लैणें-दैणैए बारै मेरी मदद की। 16 इहयई करै जधू हूँ थिस्सलुनिके थिय, तधू बी भेजअ किछ तम्हें मेरी कमी घटी पुरी करना लै। एकी बारी निं पर दूई बारी पै भेजअ त तम्हें मुल्है धन। 17 इहय निं कि हूँ चाहा दान, पर हूँ चाहा इहय फळ जुंण थारै फाईदै लै बढदअ रहे। 18 मुखा आसा सोभै गला, बोले ता खासअ बी आसा, जुंण चिजा तम्हें इपफूदीतुसे हाथे भेजी ती तिन्नां भेटी करै हुअ हूँ भरपूर, सह ता सुगंध और ग्रहण करनै जोगी बलिदान आसा, जुंण परमेश्वरा भाऊआ। 19 और मेरअ परमेश्वर बी आपणें तेऊ धने साबै जुंण महिमा संघी मसीह यीशू दी आसा, तेऊ करनी थारी हरेक कामी घटी पुरी। 20 म्हारै प्रभू और पिता परमेश्वरे महिमा लोळी जुगै-जुगै हंटी रही।

### आखरी नमस्कार

21 हरेकी पबित्र मांझू जुंण यीशू मसीहा दी आसा, तिन्नां लै बोलै नमस्कार और राजी-बाजी दैए, जुंण भाई मूँह संघे आसा, तियां बी बोला तम्हां लै नमस्कार और राजी-बाजी। 22 सोभै पबित्र लोग, खासकर जुंण कैसरे घराने का आसा, तियां बी बोला तम्हां लै नमस्कार और राजी-बाजी।

23 म्हारै प्रभू यीशू मसीहो अनुग्रह लोळी थारी आत्मां संघे रहअ।

# कुलुस्सियों

## भूमिका

प्रेरित पौलुसे कुलुस्सिये नांऊएँ चिठी लिखी ती एशीया माईनरे कुलुस्से नगरी दी रहणें आळें विश्वासी लै जुण इफिसुस नगरीए पुर्बा दिशा बाख थिय। अह कलीसिया निं पौलुसे थीई बणाई दी, पर अह ती तेऊ लाक्रे दी जेऊ लाक्रेए जिम्मेंबारी पौलुस आपनीं कान्हां समझा त, जिहय कि हाम्हेँ पौलुसा रोमीं राजे एकी राईसी अखाये राजधानीं इफिसुसा लै चिठी भेजदें पढळा। पौलुसा का लागअ इहय थोघ कि कुलुस्से कलीसिया दी आसा तै कई गलत शिक्षा देंगेँ आळें जुण एही शिक्षा लै ज़ोर देंआ तै कि हरेकी माळूं लागा परमेश्वरा समझणा लै और पूरै मोक्ष पाणा लै लागा किछ खास “आत्मिक प्रधाना औरू गुरूए” भगती ज़रूरी करनीं। संघा बोला तै तियां शिक्षा देंगेँ आळें इहय बी कि हरेकी आदमीं लागा किछ खास धर्म-बिधी, जिहअ: खतनअ करनअ, और खाणें पीणेंए बारै और होर बी कई चिजे बारै काठे नियमों पालन करनअ ज़रूरी।

पौलुस लिखा एसा चिठी इनां चिजे बिरोध करना लै सच्चै मसीही संदेशा संघे। तेऊए ज़बाबो मल्हम आसा अह कि प्रभू यीशू मसीह आसा पूरी तरह उध्दार देंगा लै सामर्थी, और इहय बी कि ईयां होर विश्वास और बिधी करा असली दी तेऊ आदमी मसीहा का दूर। मसीहा करैई की परमेश्वरै एसा सुधीए रचना और तेऊई करै लागअ दा सह एता आप्पू सेटा लै बापस आणदअ। उध्दारे आशा आसा सिधी मसीहाई दी। तै खोजा पौलुस विश्वासीए जिन्दगी लै एऊ महान ज्ञानों अर्थ।

अह आसा धैन देंगेँ जोगी गल्ल कि तुखिकुस, जुणीं पौलुसे अह चिठी कुलुस्से लै नीई ती, तेऊ संघे त उनेसिमुस बी- सह गुलाम ज़सरे पक्षा लै पौलुसे फिलैमोन नांऊएँ चिठी लिखी ती।

रूप-रेखा

भूमिका 1:1-8

मसीहे स्वभाव और काम 1:9-2:19

मसीह दी नंऊई जिन्दगी 2:20-4:6

नचोळ उपसंहार 4:7-18

## आदर-सत्कार

1 पौलुसे तरफा का जुंण परमेश्वरे इछा करै मसीह यीशूओ प्रेरित आसा, और भाई तिमथियसे तरफा का चिठी। 2 मसीहा दी तिनां पबित्र और विश्वासी भाईए नांओए जुंण कुलुसे देशें रहा।

म्हारै पिता परमेश्वरे तरफा का लोळी तम्हां लै अनुग्रह और शांती भेटदी रही।

## धन्यवादे प्राथणां

3 हाम्हेँ करा हर धैळें तम्हां लै प्राथणां और आपणें प्रभू यीशू मसीहे पिता अर्थात परमेश्वरो धन्यबाद। 4 किल्लैकि हाम्हेँ शुणअ इहय कि मसीह यीशू दी आसा थारअ विश्वास और सोभी पबित्र लोगा संघे डाहा तम्हें प्रेम। 5 तेसा आशा की दी चिजा करै जुंण तम्हां लै स्वर्गें आसा डाही दी, ज़सरअ बर्णन तम्हें तेऊ सुसमाचारे सच्चाईए बचना दी शुणीं आसा मुकें दै, 6 जुंण तम्हां सेटा आसा पुजअ द, और जिहअ संसारा दी बी फल आणां, और बढाऊआ बी; अर्थात ज़सा धैळी ओही तम्हें शुणअ, और सच्चाई संघे परमेश्वरो अनुग्रह बछेणअ, तम्हां बिचै बी करा इहय ई। 7 तेऊए ई शिक्षा भेटी तम्हां म्हारै प्रिय सैहकर्मी इपफ्रासा का, जुंण हाम्हां लै मसीहो विश्वासयोग्य सेवक आसा।

8 तेऊई किय थारअ प्रेम जुंण आत्मां दी आसा, प्रगट।

9 तैहीता ज़सा धैळी ओही अह शुणअ द आसा, हाम्हेँ बी निं तम्हां लै प्राथणां करना लै और बिनती करना लै बिसरदें कि तम्हें सारै आत्मिक ज्ञान और समझ संघे परमेश्वरे बछेणां दी परीपूर्ण हई सके। 10 ताकि थारअ चाल चलण प्रभू जोगी होए, और सह सोभी साबे खुश होए, और तम्हां दी हर प्रकारे भलै कामां फळ लागे, और परमेश्वरे बछेणां दी बढदें रहे। 11 और तेऊए महिमें शगतीए साबे सोभी प्रकारे सामर्था करै बलबंत हदें लागे, इधी तैणीं कि आनंदा संघे हर प्रकारे धीरज और सैहनशीलता रहैऊई सके। 12 और पिता परमेश्वरो धन्यबाद रहा करदें लागी, जुंणीं हाम्हेँ एता जोगी बणांएँ कि ज्योती

दी पबित्र लोगे मिरासा संघे सैहभागी होए। 13 तेऊई छडैऊए हाम्हेँ न्हैरेए बशा का और आपणें प्रिय शोहरूए राजा दी कियै प्रवेश। 14 ज़सा का हाम्हां छुटकारअ अर्थात पापे क्षमा भेटा।

## मसीहे श्रेष्ठता और तेऊए काम

15 सह आसा अदृष्य परमेश्वरो प्रतिरूप और सारी सृष्टी दी जेतअ।

16 किल्लैकि तेऊई दी हुई सारी चिजे सृष्टी, स्वर्गें या पृथुईए, भाळी दी होए या नांई भाळी दी होए, कै सिंहासण, कै राज-पाठ, कै प्रधानता, सारी चिजा आसा तेऊ करै और तेऊई लै सृजी दी। 17 और सहेई आसा सोभी चिजा दी पैहलअ, और सोभै चिजा रहा तेऊई दी स्थिर। 18 और सहेई आसा देह, अर्थात - कलीसिओ मूंड, सहेई आसा आदी और सहेई आसा मूएँ दै मांझै जिऊणें आळअ पैहलअ कि सोभी गल्ला दी सहेई प्रधान होए। 19 किल्लैकि पिता परमेश्वरे खुशी आसा एताई दी कि तेऊ दी सारी परिपूर्णता वास करे। 20 और तेऊए क्रूसा दी बगै दै लोहू करै मेलमिलाप करी करै सोभै चिजा तेऊई करै आप्पू दी मेल करे, चाहे तियां पृथुईए होए या चाहे तियां स्वर्गें होए।

21 और तेऊ किय आपणीं सारी देही करै और मौता करै थारअ बी मेल-मलाप, जुंण पैहलै काठे दै थियेँ और बूरै कामां करै मना का बेरी थिये।

22 ताकि तम्हां आप्पू सेटा निष्कलंक और निर्दोष बणाई करै हाज़र करे।

23 जै तम्हें विश्वासे आथरी दी दृढ बणीं रहे, और तेऊ सुसमाचारे आशा, जुंण तम्हें शुणअ द आसा नांई छाडे, ज़सरअ प्रचार सरगा हेतै सारी सृष्टी दी किय, और ज़सरअ हूँ पौलुस सेबक बणअ।

## कलीसियो सेऊआकार- पौलुस

24 ऐबै हआ मूँह तिनां दुखे कारण खुशी जुंण हूँ तम्हां लै चका, और मसीहे क्लेशे घटी करा हूँ तेसा देही लै अर्थात, कलीसिया लै आपणें शरीरा दी पूरअ। 25 ज़सरअ हूँ तेऊ प्रबन्धे साबे सेबक बणअ जुंण तम्हां लै मुखा सभाळअ,

ताकि हूँ परमेश्वरे बचनो पूरा-पूरा प्रचार करी सकूँ। 26 अर्थात् तेऊ भेदा, जुंग कई जमाने ओही गुप्त आसा त रहअ द पर ऐबे हुअ तेऊए पबित्र लोगा दी प्रगट। 27 जसा लै परमेश्वर प्रगट करनअ चाहअ कि इन्ना का थोघ लागे कि होरी जाती बिचै तेऊ भेदे किम्मत किजै आसा? और सह आसा इहय कि मसीह जुंग महिमं एक आशा आसा, सह रहा तम्हां दी। 28 जसरअ प्रचार करी करै हाम्हें हरेकी का खोजा और सारै ज्ञान हरेकी मांछू का सखाऊआ कि हाम्हें हरेकी मांछू मसीहा दी सिध करी करै पेश करे 29 और एताई लै हूँ, तेऊए शगतीए साबै जुंग मूह दी सामर्थे साबै प्रभाव पाआ, तेता लै करा तन-मन और धन लाई करै मैन्थ बी।

2 हूँ चाहा इहय कि तम्हां का लोकी थोघ लागअ कि तम्हां लै और जुंग लौदिकिआ दी आसा और तिन्नां सोभी लै जुंणीं मैची तैणीं मेरअ शरीरिक मूह नाई भाळअ, हूँ तम्हां लै केही मैन्थ करा। 2 ताकि तिन्नें मना दी शांती भेटे और प्रेम प्यारा दी आप्पू मांझै कठा रहे, और तियां पूरी समझो सारअ धन प्राप्त करे, और पिता परमेश्वरो भेद अर्थात्, मसीहा बछेणें। 3 जसा दी बुधी और ज्ञाने सारै भडार आसा छुपै दे। 4 इहय बोला हूँ तै कि कोई बी मांछू तम्हां लै लळचाऊणें आळी गल्ला करी करै धोखअ नां देए। 5 किल्हैकि जै हूँ तम्हां का शरीरे भावा का दूर आसा, तैबी बी आसा हूँ आत्मं भावा का तम्हां नेळ, और थारी बिधिए साबै थारै चरित्र और विश्वास जुंग मसीह दी आसा, एते मजबूती भाळी करै हआ हूँ खुश।

### मसीह दी जिन्दगीए भरपूरी

6 तै जिहअ तम्हें मसीह यीशू प्रभू मनीं करै ग्रहण किय, तिहैई रहा तेथ हांढदै लागी। 7 और तेतैई जमाऊआं आपणें जलैळै; और जिहै तम्हें सखाऊए तै, तिहैई हआ विश्वासा दी मजबूत, और जेतरअ जादअ हई सका तेतरै रहा धन्यबाद करदै लागी।

8 चतैन रहा कि कोई तम्हां तेऊ तत्वज्ञान (कथैया काहणीं) और बेकार धोखे करै खतम नां करे, जुंग मांछूए रिति रबाजे मत और संसारे आदि शिखे साबै आसा, पर मसीहे साबै निं आथी। 9 किल्हैकि तेऊ दी करा इशबरत्वे सारी परिपूर्णता सहदेह बास। 10 और तम्हें आसा तेऊ दी ही भरपूर हुए दे, जुंग सारी प्रधानता और अधिकारो शिरोमणीं आसा। 11 तेऊई दी आसा थारअ खतनअ हुअ द, जुंग हाथा करै नाई हंदअ, अर्थात् मसीहो खतनअ, जसा करै शारीरिक देह पोर्ही खोला। 12 और तेऊई संघे बपतिस्मै दी दाबे बी, और तेऊई दी परमेश्वरे शक्ति दी विश्वास करी करै, जुंणीं सह मरी करै जिऊंदअ किय, तेऊ संघे तम्हें बी हुए जिऊंदै। 13 और तिन्नें तम्हें बी, जुंग आपणें अपराधा दी, और आपणें शरीरा दी खतनै बगैर मुल्दै तै, सह बी किय जिऊंदअ और म्हारै अपराध बी किये माफ। 14 और बिधी बधानो सह लिखअ द, जुंग म्हारै नांओआ दी और म्हारै बिरोधा दी थिय, सबी मटाऊअ; और सह किय कूसा दी किला करै टोकी दूर। 15 और तेऊ प्रधानता और अधिकार आप्पू दी उतारी करै तिंनो बणांअ खुल्लमखुल्लअ तमासअ, और कूसे बजह शणांऊई तिन्नां परदै जय-जयकारे छेळ।

16 तैहीता खाणें पीणें और तिह थैर और उआंस पूनूई या सबते धैळए बारै थारअ कोई फँसलअ नां करे। 17 किल्हैकि ईयां सोभै आसा एछणें आळी गले छैली, पर मूल चिजा आसा मसीहे। 18 कोई बी मांछू दीनता और स्वर्गदूते पूजा करी करै पुजा कराऊई करै तेसा तुहरे प्रतिफला का बंचित नां करे। इहय आदर्मी रहा भाळी हेरी दी चिजा दी लागी और आपणीं शारीरिक समझा दी रहा बेकार राळअ-मताळअ हई। 19 और तेऊ शिरोमणीं निं ढाकी डाहंदअ जसा करै सारी देह जोळा और पाटा करै पाळण पोशण पाई करै और कठा जुळी करै परमेश्वरा बाखा बढदी लागी।

### मसीहा संघे मरनअ और जिऊणअ

20 जैकि तम्हें मसीहा संघे संसारे आदी शिक्षा लै गूए मरी, ता तेखअ तिन्नां जिहै जुंग संसारा दी जिंदगी बताऊआ, मांछूए शिक्षा और आज्ञे साबै, 21 और एही बिधिए बशै किल्है रहा? कि अह निं छुंहणअ, सह निं चाखणअ और एथ निं हाथ लाई! 22 किल्हैकि ईयां सोभै चिजा हणीं कामां दी आणंदी-आणंदी नाश किल्हैकि ईयां गल्ला आसा मांछूए गल्ला और ज्ञाने साबै। 23 इना

बिधी दी आसा आपणीं इच्छा करै घळी दी भगतीए रिति और आत्मदीनता और शारीरिक योगाभ्यासे भाव करै ज्ञानों नांअ ता आसा, पर शारीरिक लालसा रोकणा लै निं इन्नां करै कोई फाईदअ हंदअ।

3 तै, जै तम्हें मसीह संघे जिऊंदै किये, ता तै रहा स्वर्गीय चिजा बस्ती लोळै लागी, जिधी मसीह आप्पू परमेश्वरे दैहणीं बाखा आसा बेटअ द। 2 पृथुईए निं पर स्वर्गीय चिजा बस्ती दी लाआ धैन। 3 किल्हैकि तम्हें गूए ऐबे संसारा लै मरी और थारी जिंदगी आसा मसीहा संघे परमेश्वरा दी लुकी दी। 4 जेभै मसीह, जुंग म्हारअ जीबन आसा, सह प्रगट हणअ, तेभै करनं तम्हें बी तेऊ संघे महिमा दी प्रगट।

### पराणीं और नंऊई जिन्दगी

5 तैहीता आपणें तिन्नां आंगा पाआ मारी जुंग पृथुई दी तम्हां बिचै आसा, अर्थात्- भयिचार, अशुधता, दुष्कामना, बुरी लालसा और लोभ, जुंग मुति पुजा बराबर हआ। 6 इन्नाई करै पळा परमेश्वरो प्रकोप तेऊलै जुंग आज्ञा नाई मना। 7 और तम्हें बी ज़धू इना बुराई दी आपणीं जिन्दगी बताऊआ थियै, ता एतेई साबै तम्हें चला बी थियै। 8 पर ऐबे तम्हें बी इन्नां सोभी गल्ला अर्थात्- क्रोध, रोश, बैरभाव, निंदा, खाखा का गाळी बकणीं, इन्नां सोभी गल्ला दैआ छाडी। 9 एकी दुजे का निं झुठअ बोला, किल्हैकि तम्हें खोल्ही पराणीं मनुष्या देही तेते कामां संघी। 10 और नंऊई मनुष्यादेही बाह्नी, जुंग आपणें सृजनहारे स्वरूपे साबै ज्ञाना प्राप्त करना लै नंऊअ रहा बणांदअ लागी। 11 तेथ नाई ता कुण यूनानी रह, नां यहुदी, नां खतनै आळअ, नां बिणहीं खतनैओ, नां जंगली, नां स्कूती, नां गुलाम, नां आज्ञाद, पर सिधअ मसीह आसा सोभ किछ और सोभी दी।

12 तैहीता परमेश्वरे चुनै दै जिहै, जुंग पबित्र और प्रिय आसा, बडी करुणा और भलाई, और दीनता, नम्रता, और सैहनशीलता धारण करा। 13 और जै कसा कहा लै दोषा लागेओ किजै कारण होए ता तेता बी सैहा एकी दुजेए, और एकी दुजेए अपराध बी करा क्षमा, जिहै प्रभू थारै अपराध क्षमा कियै, तिहैई करा तम्हें बी। 14 और इन्नां सोभी का जादअ करा प्रेम, जुंग सिध हणेंओ कटिबंध आसा, तेऊ बान्हां 15 और मसीहे शांती, जसा लै तम्हें एक हई करै शादे दै बी आसा, थारै दिला दी राज करे और तम्हें रहा धन्यबादी बणीं। 16 और मसीहे बचन दैआ आपणें दिलादी खासअ बसणें; और सिध ज्ञाना संघे एकी दुजे सखाऊआ, और चताउआ, और आपणें - आपणें मनै बोला अनुग्रहा संघे परमेश्वरा लै भजन और स्तुतिगान और आत्मिक गिहा रहा गांदै लागी। 17 और बचन करै या कामां करै जुंग बी तम्हें करा, सोभै करा प्रभू यीशूए नांओए, और तेता करै करा परमेश्वरो धन्यबाद।

### नंऊई जिन्दगीए पारिवारिक नियम

18 हे बेटळीओ, जिहअ प्रभू दी ठीक आसा तिहअई रहा आपणें-आपणें मरधे डरा हेतै। 19 और हे मरधो, आपणीं-आपणीं लाळी संघे डाहा प्रेम और तिन्नां लै निं काठै रहा बणीं। 20 और हे शोहरूओ, सोभी गल्ला लै मना आपणें आम्मां बाप्पूए आज्ञा, किल्हैकि प्रभू हआ तेता करे खुश। 21 हे शोहरू माठै आळैओ, आपणें बाल बच्चै निं तंग करा, ईहअ निं हआ कि तिन्नें हिम्मत बी चुटे। 22 हे सेबको, जुंग शरीरे साबै थारै मालक आसा, सोभी गल्ला लै करा तिन्नां आज्ञापालन, मांछू लै खुश करनै जिहअ रहैऊणा लै निं पर सिधे मनै और परमेश्वरे डरा हेतै रहदी करा। 23 जुंग किछ बी तम्हें करा, तेता करा तन मना संघे, ईहअ समझी करै कि अह निं मांछू लै लाई करी पर एता आसा हाम्हें परमेश्वरा लै लागे दै करदै। 24 किल्हैकि तम्हां का आसा थोघ कि तम्हां भेटणअ एते बदळै प्रभू का फल; तम्हें करा प्रभू मसीहे सेऊआ। 25 किल्हैकि जुंग बूरअ करा, तेऊ भेटणअ तेसा बुराईओ फल; तिधी निं कोही लै पक्षपात हंदअ।

4 हे सुआमिंओ, आपणें दासा लै करा न्याय और ठीक बर्ताव, इहय समझी करै कि स्वर्ग आसा थारअ बी एक मालक।

### थोळी व्यावहारिक सलाह

2 प्राथणां दी रहा लागी, और धन्यवाद संघै रहा तेथ ज़ागदै। 3 और एता संघा-संघा हाम्हां लै बी रहा प्राथणां करदै लागी कि परमेश्वर हाम्हां लै बी बचना शणांऊणा लै इहय दुआर खोले कि हाम्हें मसीहे तेऊ भेदो बर्णण करी सके ज़ेता करै हूँ कैद आसा किय द। 4 और तेऊ इहय प्रगट करी सकूँ, ज़िहअ मुल्है करनअ ठीक आसा।

5 एऊ मोकै किम्मती समझी करै बाघलै होरी लोग संघै बी करा बुधीमानिं संघै बर्ताव। 6 थारअ बचन लोळी सदा अनुग्रहा सघै सांऊअ सिधअ हुअ, ताकि हर आदमी लै ठीक रिती संघै ज़बाब दैणअ एछे।

### आखरी आदर-सत्कार

7 प्रिय भाई और विश्वासयोग्य सेबक तुखिकुस, जुंण प्रभू दी मेरअ सैहकर्मी आसा, तेऊ हेरनिं मेरी गला तम्हां का खोजी। 8 सह आसा भेजअ द मंएँ तम्हां सेटा लै एते तैणीं कि तम्हां का म्हारी हालतो थोघ लागे और सह थारै दिला लै शांती दैए। 9 और तेऊ संघै आसा उनेसिमुस बी भेजअ द, जुंण विश्वासयोग्य और प्रिय भाई और तम्हां ई बिचो आसा, इना हेरनी तम्हां का इधे सारी गला खोजी।

10 अरिस्तर्खुस जुंण मूँह संघै इधी कैदी आसा, और मरकुस जुंण बरनबासो रिश्ते दी भाई लागा, (ज़सरै बारै तम्हां लै आज्ञा दैनी दी ती कि ज़ै

सह तम्हां सेटा लै एछे, तेऊ संघै करै शोभलअ बर्ताव) 11 और यीशू ज़सा लै युस्तुस बोला, तिन्नै बी आसा तम्हां लै राजी-बाजी दैनीं दी। खतने कियै दै लोगा मांझै आसा सिधै ईयांई परमेश्वरे राजा लै कामां करना लै मेरै साथी और मेरी शांतीए कारण रहै दै। 12 इपफ़ास जुंण तम्हांई का आसा, और मसीह यीशूओ दास आसा, सबी बोला तम्हां लै नमस्कार और राजी-बाजी, और धैळ हआ सह तम्हां लै प्राथणां करदअ लागअ द, ताकि तम्हें सिध और पूरै विश्वास संघै परमेश्वरे इछा दी स्थिर रही सके। 13 हूँ आसा तेऊओ गुआह कि सह तम्हां लै और लौदिकिआ और हियरापुलिसा आळै लै करा बडी भारी कोशीश। 14 प्रिय बैद लूका और देमासे तरफा का बी तम्हां लै नमस्कार। 15 लौदीकिए भाईलै और तुमफास और तिन्नै घरे कलीसिया लै बी खोजै राजी-बाजी और नमस्कार 16 और ज़ेभै एसा चिठी तम्हां सेटा पढळे, ता इहय करै कि लौदिकिआ आळै सेटा बी फळाऊरे एसा चिठी, और तेसा चिठी जुंण लौदिकिआ का एछे, तम्हें पढळै तेसा। 17 तेखअ बोलै अखिप्पूसा लै इहय कि जुंण सेऊआ प्रभू ताखा सभाळी दी आसा, तेसा करै बडी साबधानिं संघै पूरी।

18 मेरअ पौलुसो तम्हां सोभी लै आपणें हाथे लिखी करै नमस्कार। मेरै इन्नां शांघळी लोहै डाहै आद; तम्हां सोभी लै लोळी अनुग्रह हंदअ रहअ लागी॥ आमीन॥

# 1 थिस्सलुनीकियों

## भूमिका

रोम साम्राज्य की ती कई राईसी, तेता मांझे ती मकीदुनिया बी एक राईसी और थिस्सलुनीके नगरी ती तेसा राईसीए राजधानी। फिलिप्पी नगरी का इधा लै एछी करै की ती पौलुसे इधी एकी कलीसिये स्थापना। इधी बी हेरअ त तिन्नै यहुदी बिरोध करनअ शुरू करी जूण गैर-यहुदी बिचै पौलुसे मसीही सुसमाचारा फैलणें का जळा तै, किल्हैकि ईयां गैर यहुदी डाहा तै यहुदी धर्मा दी रूची। इहय करै पळअ पौलुसा थिस्सलुनिके छाडणअ और सह नाठअ बीरीया लै। बादा दी जांऊं सह कुरिन्थुस पुजअ तिधी भेटअ तेऊ आप्पू संघै काम करनै आळै और साथी तीमुथियुसा का मूहां सद्दैनै थिस्लुनीके कलीसिये स्थितिए बारै समाचार।

एऊ समाचारा भेटणें का बाद लिखी ती थिस्सलुनीकिये नांऊंरें प्रेरित पौलुसे पैहली चिठी तिन्नां उत्साहित करना और भी हैऊआ दैणां लै। सह दैआ तिन्नां लै तिन्नै विश्वास और प्रेमं बारै समाचारा लै धन्यावाद। सह फरेऊआ तिन्नां का आपर्णी जिन्दगीए तिन्नां धैले आद जुण तेऊ तिन्नां बिचै रही करै बताऊए तै। तेखअ दैआ सह प्रभू यीशूए एसा भी फिरी एछणें बारै सुआले उत्तर जुण तेसा कलीसिया दी तै उच्चुए दै। सुआल तै इहै कि : एक विश्वासी, जुण प्रभू यीशूए भी एछणें का पैहलैई जाए मरी, सह तेसा जिन्दगीओ भागी हणअ बी कि नाई, जुण प्रभू यीशूए आगमना दी भेटणें आळी आसा? मसीहो पुनरागमन केभै हणअ? पौलुस खोजा एऊ मोकै तिन्नां का इहय कि तेसा स्थिती दी जै तम्हें प्रभू यीशू फिरी एछणें न्हैळै भाळै आसा लागै दै, तै रहा चुप-चाप आपणें एऊ कामां दी लागी।

रूप-रेखा

भूमिका 1:1

धन्यवाद और स्तुति 1:2-3:13

मसीही आचार-व्यवहारे बारै उपदेश 4:1-12

मसीहे पुनरागमने बारै शिक्षा 4:13-5:11

आखरी उपदेश 5:12-22

नचोळ 5:23-28

## आदर-सत्कार

1 पौलुस और सिलबानुस और तीमुथियुसे तरफा का थिस्सलुनीकिए नांओं जुण परमेश्वर पिता और प्रभू यीशू मसीह दी आसा, अनुग्रह और शांती लोळी तम्हां लै भेटदी रही।

## थिस्सलुनीकिए लोगो विश्वास

2 हाम्हें करा तम्हां आपर्णी प्राथणां दी आद और कबल्लै करा हाम्हें तम्हां सोभीए बारै धन्यवाद। 3 और आपणें परमेश्वर पिता सद्दैनै थारै विश्वासे कामां और प्रेम, मैन्थ, और म्हारै प्रभू यीशू मसीह दी आशा और धीरता करा लागतार आद। 4 हे भाईयो, परमेश्वर प्रिय लोगो, हाम्हां का आसा थोघ कि तम्हें आसा चुने दै। 5 किल्हैकि म्हारअ सुसमाचार निं तम्हां बिचै सिधअ बचन मात्र पुजअ पर सामर्थ, पबित्रात्मा और बड़ै निश्चय संघै पुजअ, जिहअ तम्हां का थोघ आसा कि हाम्हें तम्हां लै तम्हां दी किहै बणें तै। 6 और तम्हें बड़ै क्लेशा दी पबित्रात्में आनंदा संघै बचन मनी करै लागै म्हारी और प्रभू जेही चाल चलदै। 7 इधी तैणीं मकिदुनियां और अखाये सोभी विश्वासी लै बणें तम्हें आदर्श। 8 किल्हैकि तम्हां सेटा का नां सिधअ मकिदुनियां और अखाया दी प्रभूओ बचन पुजअ, पर थारै विश्वासे जुण परमेश्वरा दी आसा, हर जैगा आसा एही चरचा फैली दी कि हाम्हां निं बोळणें जरूरत ई आथी। 9 किल्हैकि तियां खोजा आप्पैई म्हारै बारै कि तम्हां सेटा एछणअ किहअ हुअ; किल्हैकि तम्हें फिरै मूरती का परमेश्वरा बाखा लै, ताकि जिंऊंदै और परमेश्वरै सेऊआ करी सके 10 और तेऊए शोहरूप स्वर्गा का एछणें न्हैळै-भाळै रहे लागी, जुण तेऊ मरी करै जिंऊंदअ किय। अर्थात प्रभू यीशू, जुण एछणें आळै प्रकोपा का बचाऊआ।

## पौलुसो प्रचारो काम

2 हे भाईयो, तम्हां का आसा आप्पै थोघ कि म्हारअ तम्हां सेटा एछणअ निं जाएं नाठअ। 2 पर तम्हें जाणां आप्पैई कि पैहलै-पैहल फिलिपी दी दुख चकणें और उपद्रब सैहणें पर बी म्हारै परमेश्वरै दैनी हिम्मत कि हाम्हें परमेश्वरो सुसमाचार भारी बिरोध हणें का बाद बी तम्हां का खोजे। 3 किल्हैकि म्हारअ उपदेश नां ता भ्रमा का आथी और नां अशुधता का, और नां छल करी करै आथी। 4 पर जिहअ परमेश्वरै हाम्हां योग्य समझी करै सुसमाचार सभाळअ, हाम्हें करा तिहअ ई बर्णन; और एता करै निं हाम्हें मांळू खुश करदै पर हाम्हें करा एता करै परमेश्वरा खुश। 5 किल्हैकि तम्हां का आसा थोघ कि हाम्हें नां ता लिपापोतीए गल्ला करदै और नां ता कोई लाळचे तैणीं भानें करदै, एसा गल्लो आसा परमेश्वर गुआह। 6 तैबी बी हाम्हें मसीहे प्रेरित हणें कारण निं हाम्हें तम्हां लै बोझ पाई सकदै तै, और तैबी बी निं हाम्हें मांळू का आदर चाहंदै तै, और नां तम्हां का और नां कसा होरी का। 7 पर जिहअ करै आम्मां आपणें शोहरू माटै धाचा पाळा, तेही ई हेर सभाळ की हाम्हें तम्हां बिचै रही करै। 8 और तेही ई हाम्हें थारी लालसा करदी नां सिधअ परमेश्वरो सुसमाचार, पर आत्मां और आपणें प्राण बी थिये हाम्हें तम्हां लै दैणा लै त्यार, किल्हैकि तम्हें गूए तै म्हारै प्यारै शोहरू जिहै हई।

9 किल्हैकि हे भाईयो, तम्हें डाहा म्हारी मैन्थ और कष्टा आद कि हाम्हें राची धैळी आंधा-धुंध काम करी करै तम्हां का सुसमाचार शणांऊंअ, कि तम्हां मांझै कोही लै बी भार नां होए। 10 तम्हें आसा आप्पै एसा गले गुआह और परमेश्वर बी, कि तम्हां बिचै जुण विश्वास डाहा, हाम्हें किहै पबित्रता और धार्मिकता और निर्दोषता दी रहै। 11 जिहअ तम्हें जाणां कि जिहअ पिता आपणें शोहरू संघै बर्ताव करा, तिहअई दैआ हाम्हें तम्हां मांझै हरेकी लै उपदेश और शांती, और समझाऊआ बी तै। 12 कि थारअ चाल-चलण लोळी परमेश्वरा जोगी हुअ, जुण तम्हां आपणें राज और महिमा दी शादा।



13 तैहीता हाम्हेँ बी करा परमेश्वो धन्यवाद कि जै हाम्हां करै करै परमेश्वरे सुसमाचारो बचन तम्हां सेटा पुजअ, ता तम्हेँ निं तेऊ मांहुँओ, पर परमेश्वरो बचन समझी करै (और सच्ची आसा इहयई) ग्रहण किय, और सह तम्हां दी आसा प्रभावशाली जुंण विश्वास करा। 14 तैहीता तम्हेँ हे भाईयो, परमेश्वरे तिन्नां कलीसिए चाल चलदै लागै, जुंण यहूदीआ दी मसीह यीशू दी आसा, किल्हैकि तम्हेँ बी भेटअ आपणें लोगा का तिहूअ ई दुख कि जिहअ तिन्नां यहूदिया का भेटअ त। 15 जुंणीं प्रभू यीशू और भविश्यबगता बी पाए मारी, और हाम्हां लै बी दैनें कष्ट, और परमेश्वर निं तिन्नां का खुश आथी; और तियां करा सोभी मांहुँओ बिरोध 16 और तियां हुआ लागै दै होरी जाती लै तिन्नें उद्धार बरै गला करनै का हाम्हां रोकदै कि तियां सदा आपणें पापे घळै भरदै रहे लागी, पर तिन्नां लै आसा गूअ द भयानक प्रकोप पुजी।

### कलीसिया का मिलणें इछा

17 हे भाईयो, जै हाम्हेँ थोळी घळी मना का ई निं पर सच्ची प्रगटै हुरे तै तम्हां का जुदै, ता हाम्हेँ की ती बडी लालसा संघे थारअ मूँह हेरना लै बडी भारी कोशिष। 18 तैहीता हाम्हेँ अर्थात मंएँ पौलुसै, एकी बारी निं, पर दूई बारी चाहअ तम्हां सेटा लै एछणअ, पर शेताने डहहै हाम्हेँ रोकी। 19 भला म्हारी आशा, आनंद खुशीए बडाइओ मुकुट किजै आसा? कै म्हारै प्रभू यीशूए सहनै नाशणें समै तम्हेँ कै हाम्हां संघे निं हणें? 20 म्हारी बडाई और आनंद आसा तम्हेँ ई।

### तीमुथियुस भेजणअ

3 तैहीता ज़ांऊं म्हारै होर बी निं रहूअ, ता हाम्हेँ किय इहय फैसलअ कि एथेन्स रहणअ मूँह एकी, 2 और हाम्हेँ तीमुथियुस जुंण मसीहे सुसमाचारो दी म्हारअ भाई आसा, और परमेश्वरो सेबक आसा, सह भेजअ तम्हां सेटा लै तै कि सह तम्हां स्थिर करी सके और थारै विश्वासे बरै तम्हां का समझाऊए। 3 कि इन्नां क्लेश बजह कोई डगमगाऊए नाई, किल्हैकि तम्हां का आसा आप्पै थोघ कि हाम्हेँ आसा एताई लै चुनै दै। 4 किल्हैकि जधू पैहलै बी हाम्हेँ तम्हां सेटा थियै, ता तम्हां का करा तै बोली कि हाम्हां लागणें दुख क्लेश चकणें, और इहय ई हुअ, एसा गल्लो बी आसा तम्हां का थोघ। 5 तैहीता ज़ांऊं मेरै होर बी नाई रहूअ, ता थारै विश्वासे हाल-चाल पतअ करनेए तैणीं भेजअ कि, इहूअ निं हुआ कि परिक्षा करनै आळै थारी परिक्षा की होए और म्हारी मैंन्थ हुई होए बरैबाद।

### तीमुथियुसा बाती खबर भेटणीं

6 पर एभै तीमुथियुसै तम्हां सेटा का बापस फिरी करै थारै विश्वास और प्रेमो सुसमाचार शणाऊंअ और ईयां गल्ला बी खोजी कि तम्हेँ करा हमेशा हाम्हां बडै प्यारा संघे आद, मूँह हेरने बी आसा तम्हां बडी भारी इछा, जेही मेरी बी तम्हां का मिलणें इछा आसा। 7 तैहीता हे भाईयो, हाम्हेँ आपणीं सारी तंगी तकलिफी और क्लेशा दी थारै विश्वासा करै थारै बरै पाई बडी शांती। 8 किल्हैकि जै तम्हेँ एबै प्रभू दी स्थिर रहै, तै आसा हाम्हेँ जिऊंदै। 9 और जेही खुशी हाम्हां तम्हां करै परमेश्वरे सहनै आसा, तेते बदळै हाम्हेँ केऊ साबै सका परमेश्वरा लै धन्यवाद करी? 10 हाम्हेँ हुआ राची धैळी प्राथणां करदै लागै दै कि थारअ मुंह हेरी सके, और थारै विश्वासे कमी पेशी पूरी करी सके।

11 एबै म्हारअ परमेश्वर पिता करे आप्पेई और म्हारअ प्रभू यीशू तम्हां सेटा लै एछणां लै अगुआई। 12 और प्रभू लोळी त इहय किय कि जिहअ हाम्हेँ तम्हां का प्रेम डाहा; तिहअई थारअ प्रेम बी आप्पू मांझै और सोभी मांहुँ संघे बडे, और तरक्की करदअ रहे 13 ताकि सह थारै मना इहय मजबूत करे, कि ज़ांऊं म्हारअ प्रभू यीशू मसीह आपणें सोभी पबित्र लोगा संघे एछे, ता तियां म्हारै परमेश्वर पिता सहनै पबित्रता दी निर्दोष निखळै।

### एही जिन्दगी जुण परमेश्वरा खुश करे

4 इहय करै, हे भाईयो, हाम्हेँ करा तम्हां का अरज और तम्हां समझाऊआ प्रभू यीशू दी कि जेही तम्हेँ हाम्हां का सही चाल चलणीं,

परमेश्वर खुश करनअ आसा शिखळअ द, और जिहअ तम्हेँ चला बी, तिहैई होर बी लागा तम्हेँ बढदै। 2 किल्हैकि तम्हां का आसा थोघ कि हाम्हेँ प्रभू यीशूए तरफा का तम्हां लै कुंण-कुंण आज्ञा पजैळी। 3 किल्हैकि परमेश्वरे आसा एही इछा कि तम्हेँ बणां पबित्र अर्थात- व्यभिचारा का रहा बची 4 और तम्हां मांझै लोळी हरेकी आदरा संघे आपणीं लोळी प्राप्त करनीं शिखळी। 5 अह काम निं अभिलाषा संघे लोळी हुअ, और नां तिन्नां जाती जिहअ जुंण परमेश्वरा नाई ज़ाणदी कि 6 एसा गल्ला लै निं कोई बी आपणें भाई ठगी, और नां तेऊ लै कोई दाव-पेच चलाऊई, किल्हैकि प्रभू आसा इना सोभी गल्लो पळ्टै लणें आळअ; जिहअ कि हाम्हेँ पैहलै बी तम्हां का बोलअ और चतैनगी बी दैनीं। 7 किल्हैकि परमेश्वरै निं हाम्हेँ अशुध हणां लै आथी पर हाम्हेँ आसा पबित्र हणां लै शादै दै। 8 एऊई कारणें जुंण तुछ समझा, सह निं मांहुँ तुछ समझदअ पर सह समझा परमेश्वरा तुछ जुंण तम्हां लै आपणअ पबित्रात्मां तम्हां लै दैआ।

9 पर भाईचारे प्रिती लै निं जरूरी आथी कि हूँ तम्हां लै किजै लिखुं: किल्हैकि आप्पू मांझै प्रेम डाहणअ आसा तम्हेँ आप्पै परमेश्वरा का शिखळअ द। 10 और सारै मकिदुनियां देशे सोभी भाई संघे तम्हेँ इहय करा बी, पर हे भाईयो, हाम्हेँ समझाऊआ तम्हां इहय कि होर बी लागा आजू बढदै। 11 और जेही हाम्हेँ तम्हां लै आज्ञा आसा दैनीं दी, तिहैई चुपचाप रहंदी आपणें कामां काजा रहा करदै और आपणें-आपणें हाथे रहा खटदै लागी। 12 ताकि बागै होरी लोगा बिचै बी करा शोभलअ बर्ताव, और तम्हां कोई बी चिजे कामी पेशी नां होए।

### यीशूओ भी फिरी एछणअ

13 हे भाईयो, हाम्हेँ निं चाहंदै कि तम्हेँ तिन्नें बरै जुंण सुतै दै आसा, तिन्नें बरै नजाण रहे, इहय निं हुआ कि तम्हेँ होरी जिहअ शोग करे, जहा आशा निं आथी। 14 किल्हैकि जै हाम्हेँ भरोसअ करा कि प्रभू यीशू मूअ और जिऊंदअ बी हुअ, तिहअई परमेश्वर तिन्नां बी जुंण मसीह दी सुतै, तियां बी आळणें तेऊ संघा। 15 किल्हैकि हाम्हेँ बोला प्रभूए बचनें साबै तम्हां लै कि हाम्हेँ जुंण जिऊंदै आसा, और प्रभू एछणें तैणीं रहणें बची, ता सुतै दै का आजू निं बढणें। 16 किल्हैकि प्रभू होथणअ आप्पै स्वर्गा का; तेऊ समै शुद्धणअ ललकार और प्रधान स्वर्गदूतो शब्द और परमेश्वरे तुरही फुकरनीं, और जुंण मसीह दी मूएँ दै आसा, तियां हणें पैहलै जिऊंदै। 17 तेखअ रहणें हाम्हेँ जिऊंदै और बची, और तिन्नां संघे चकणें उझै बादळा दी कि प्रभू संघे हावा दी मिले और इहय करै रहणें हाम्हेँ सदा प्रभू संघे। 18 इहय करै करा इन्नां गल्ला करै एकी दुजे लै शांती दैई।

### प्रभू यीशूए फिरी एछणा लै त्यार रहणअ

5 हे भाईयो, एही बी निं किछै जरूरत आथी कि बगत और काले बरै तम्हां लै किजै लिखे। 2 किल्हैकि तम्हेँ जाणा आप्पै इन्नां गल्ला ठीक कि जिहअ राची चोर एछा, तेही ई एछणीं प्रभूए धैळी। 3 जेभै लोगा इहय बोळणअ कि ठीक-ठाक आसा, और किछे हैळअ फिकर निं आथी, ता तिन्नां लै एछणअ एकाएक बिनाश, जेही सुंदी बेटळी लै सुणें दाह एछा, तिहैई तियां निं केई बी साबै बचणें। 4 पर हे भाईयो, तम्हेँ निं न्हैरे दी आथी, कि सह धैळी एछणीं तम्हां लै चोरा जेही। 5 किल्हैकि तम्हेँ सोभै आसा ज्योतिए संतान, और धैळीए संतान, हाम्हेँ नां राचीए आथी और नां न्हैरेए आथी। 6 तैहीता होरी जिहै सुती निं रहा, पर जागदै और साबधान रहा। 7 किल्हैकि जुंण सुती रहा, तियां रहा राची ही सुती, और जुंण मतबालै हुआ तियां हुआ राची ई मतबालै। 8 पर हाम्हेँ आसा धैळीए। विश्वास और प्रेम कबच बाही करै और उद्धारो टोप बाहिं करै रहा साबधान। 9 किल्हैकि परमेश्वरै निं हाम्हेँ क्रोधा लै चुनै, पर एते तैणीं आसा डाहै दै कि हाम्हेँ उद्धार प्राप्त करे। 10 सह मूअ हाम्हां लै एते तैणीं कि हाम्हेँ चाए बिऊधै रहा, या सुती रहा, सोभै मिली करै तेऊई संघे जिऊए। 11 एते तैणीं दैआ एकी दुजे लै शांती, और एकी दुजेए बणां बढोतरिए कारण। और इहयई रहा करदै लागी।

## कलीसिया लै उपदेश

12 और हे भाईयो, हाम्हेँ करा तम्हां लै अरज कि जुण तम्हां बिचै मैन्थ करा, और प्रभू दी थारे अगूरे आसा, और तम्हां लै शिक्शा दैआ, तिन्नां मना।  
 13 तिन्नें कामेँ बजह बडेँ प्रेमा संघेँ समझा तिन्नां आदरमाना जोगी; और आप्पू बिचै रहा मेल-मलापा संघेँ। 14 और हे भाईयो, हाम्हेँ समझाऊआ तम्हां कि जुण ठीक चाल नाई चलदै, तिन्नां समझाऊआ, और डरैहू लै दैआ हैअ विश्वास, कमजोरे करा हेर सभाळ, और सोभी लै रहैऊआ सहनशीलता।  
 15 खबरदार! कोई बी कसरी बुराईए बदळै बुराई निं करी; पर कबलै रहणअ भलाई करनां लै आजू, और आप्पू मांझै और सोभी संघेँ करा भलाई करनेए कोशिष। 16 सदा रहणअ आनंदित। 17 हर बगत रहणअ प्राथणां दी लागी।  
 18 हर गल्ला लै करनअ प्रभूओ धन्यवाद, किल्हैकि तम्हां लै आसा मसीह दी परमेश्वरे अहैई इछा। 19 आत्मां निं शेऊआ। 20 भबिश्यबाणीं निं तुछ

समझणीं। 21 सोभी गल्ला परखा, जुण ठीक आसा सह गल डाहणीं ढाकी।  
 22 सोभी प्रकारे बुराई का रहणअ बची।

## आशीर्वाद

23 शांतीए परमेश्वरा करनेँ आप्पै तम्हेँ पबित्र; और थारी आत्मां और प्राण और देह लोळी म्हारै प्रभू यीशू एछणेँ तैणीं पूरे-पूरे निर्दोष और सुरक्षित रहै।  
 24 तम्हां शादणै आळअ आसा सचअ, और तेऊ करनअ इहयई।  
 25 हे भाईयो, हाम्हां लै बी करै प्राथणा।  
 26 और सोभी भाईलै पबित्र चुंबन दैई करै करनअ नमस्कार।  
 27 हूँ दैआ तम्हां लै प्रभूए शपथ कि एसा चिठी शणांऊरे पढळी करै होरी भाई का बी।  
 28 और म्हारै प्रभू यीशू मसीहे दैया लोळी तम्हां सोभी लै हंदी रही।

## 2 थिस्सलुनीकियों

### भूमिका

मसीहे आगमने बारै उलझन पळनें बजहा ती थिस्सलुनीकिये कलीसिया दी गड़बड़ी पैदा हुई दी। थिस्सलुनीकिये नांऊरें प्रेरित पौलुसे दुजी चिठी ती लिखी दी एसा गल्ला दी बचार करनें बारै लिखी दी कि मसीहे आगमने धैळी आसा गई दी पैहलैई एछी। पौलुस सुधारा एसा इहय खोजी करै कि मसीहे आगमना का पैहलै हर्णी दुष्टता और बुराई आपणीं चरम सीमा दी। इहय हणअ एकी रहस्यमयी शासके गुलामी दी जसा लै "पापो पुरख अर्थात बिनाशो पुत्र" आसा बोलअ द, जसा मसीहो बिरोध करनअ।

प्रेरित दैआ एसा जरूरता दी जोर कि सारै दुख और कष्ट सैहंदी लागा तेऊए पट्ळणें आळै विश्वासा दी मजबूत रहणअ बर्णी। आपणीं रोजी-रोटी लै लागा रहणअ कामां-काजा करदै लागी ज़िहय कि पौलुस और तेऊए साथी करा लै, और भलाई करदै बी रहणअ लागी।

रूप-रेखा

भूमिका 1:1,2

स्तुति और प्रशंसा 1:3-12

मसीहे पुनरागमने बारै शिक्षा 2:1-17

मसीही आचार व्यवहारे बारै शिक्षा 3:1-15

नचोळ 3:16-18

### आदर-सत्कार

1 पौलुस, सिलवानुस और तीमुथियुसे तरफा का थिस्सलुनिकोए कलीसिए नांओए चिठी, जुंण म्हारै पिता परमेश्वर और प्रभू यीशू मसीह दी आसा।

2 म्हारै पिता परमेश्वर और प्रभू यीशू मसीह दी लोळी तम्हां लै अनुग्रह और शांती भेटदी रही।

### न्याये धैळी

3 हे भाईयो, थारै बारै चाहिए हाम्हां हर बगत धन्यवाद करनअ, और अह ठीक बी आसा इहय करै कि थारअ विश्वास आसा बढदअ लागअ द और तम्हां सोभीओ प्रेम बी आसा आप्पू मांझै बढदअ लागअ द। 4 इधी तैणीं कि हाम्हां करा आप्पू बी परमेश्वरे कलिसीया दी थारै बारै घमंड कि जेतरे उपद्रव और क्लेश तम्हें सैहा, तिन्नां सोभी दी हआ थारअ धीरज और विश्वास प्रगट।

5 अह आसा परमेश्वरे सच्चै न्यायेओ स्पष्ट प्रमाण कि तम्हें बणां परमेश्वरे राजा जोगी, जेता लै तम्हें दुख चका। 6 किल्हैकि परमेश्वरा सेटा आसा अह न्याय कि जुंण तम्हां लै क्लेश दैआ तिन्नां भेटणअ तेते बढळै क्लेश ई। 7 और तम्हां जसा क्लेश भेटा, हाम्हां संघे भेटे तेभे चैन जेभे कि प्रभू यीशू मसीह आपणें सामर्थी स्वर्गदूता संघे धधकदी हुई आगी दी स्वर्गा का प्रगट होए।

8 और जुंण परमेश्वरा नाई बछैणदै, और म्हारै प्रभू यीशू सुसमाचारा नाई मंदै, तिन्नां का लणअ प्रभू यीशू मसीह बढळअ। 9 तिन्नां भेटणअ प्रभू सच्चै का दूर हई करै और तेऊए शगतीए तेजा का दूर हई अनंत बिनाशो दंड।

10 अह हणअ तेसा धैळी, जेभे तेऊ आपणें पबित्र लोगा दी महिमा पाणें और विश्वास करनें आळै आश्चर्य हणा लै एछणअ, कि तम्हें निं म्हारी ग्वाहीए प्रतीति की। 11 तैहीता हाम्हां तम्हां लै प्राथणां करा कि म्हारअ परमेश्वर तम्हां लै तम्हां एऊ बुलाबै जोगी समझे, और भलाईए हर इछा और विश्वासे हरेकी कामां सामर्था संघे पूरअ करे। 12 कि म्हारै परमेश्वर और प्रभू यीशू मसीह अनुग्रहे साबै म्हारै प्रभू यीशूओ नांओ तम्हां दी महिमा पाए, और तम्हें तेऊ दी।

### पापो पुत्र अर्थात बमाशो पुत्र

2 हे भाईयो, हाम्हां करा आपणें प्रभू यीशू मसीहे एछणें, और तेऊ सेटा कटा हणें बारै तम्हां का बिनती कि 2 कसा आत्मां या बचन या पत्री करै जुंण कि मानो म्हारी तरफा का होए, ईहअ समझी करै कि प्रभू धैळी आसा गई दी पुजी, थारअ मन अचानक अस्थिर नां होए और तम्हें ना हैळिए। 3 केऊ बी साबै निं कसरै धोखे दी एछी, किल्हैकि तेभे तैणीं निं सह धैळी एछणीं जेभे तैणीं धर्मो त्याग निं होए, और सह पापो मरध, अर्थात बिनाशो पुत्र प्रगट नां होए। 4 जुंण बिरोध करा और हरेकी का जुंण परमेश्वर और पुज्य कहलाऊआ, आपणें आप बडअ समझा, इधी तैणीं कि मांदरै बेशी करै आपणें आप्पू परमेश्वर प्रगट करा, 5 तम्हां कै आद निं आथी, कि जधू हूँ तिधी तम्हां सेटा थिय, ता हूँ करा त इन्नां गल्ला तम्हां का खोजी? 6 और एबै ज़ाणा तम्हें तेसा चिज़ा, जुंण तेऊ रोकदी आसा लागी दी, कि सह आपणें ही बगतै प्रगट होए। 7 किल्हैकि अधर्मो भेद आसा लागअ द मैची बी कामां करदअ, पर मैची बी आसा एक रोकणें आळअ, और जेभे तैणीं सह दूर नां होए तेभे तैणीं डाहणअ तेऊ रोकी। 8 तैबै सह अधर्मो प्रगट हणअ, जुंण प्रभू यीशू मसीहा आपणी खाखे फूका करै पाणअ मारी, और आपणें एछणए तेजा करै करनअ भस्म। 9 तेऊ अधर्मोओ एछणअ शैतानें कामें साबै सोभी प्रकारे झुठी सामर्थ, चिन्ह और अदभुत कामां संघे। 10 और नाश हणेंआळैलै लै हणअ अधर्म सोभी प्रकारे धोखे संघे; किल्हैकि तिन्नां निं सच्चैओ प्रेम ग्रहण किय जसा करै तिन्नां उद्धार हणअ त। 11 और एऊई कारणें भेजणीं परमेश्वरा तिन्नां लै एक भटकाऊणें आळी आत्मां ताकि तिंयां झुठेए प्रतीति करे। 12 और जेतरे लोग सच्चैए प्रतीति नाई करदै पर अधर्म करनें करै खुश रहा, तिन्नां सोभी लै भेटणअ दंड।

### मजबूत रहा बर्णी

13 पर हे भाईयो, और प्रभूए प्रिय लोगो, तम्हां चाहिए कि हाम्हां थारै बारै सदा परमेश्वरा लै धन्यवाद करदै रहे कि परमेश्वर आसा आदी का ही तम्हें चुनै दै कि आत्मां करै पबित्र बर्णी और सच्चै समझी करै उद्धार पाई सके।

14 जसा लै तेऊ तम्हें आपणें सुसमाचारा लै आसा शादै दै कि तम्हें म्हारै प्रभू यीशूए महिमा प्राप्त करी सके। 15 तैहीता हे भाईयो, स्थिर रहा, और जुंण गल्ला

तम्हें कै बचन, कै चिठी पत्री करै हाम्हां का शिखळी दी आसा, तिन्नां डाहा थर्हीं।

<sup>16</sup> म्हारअ प्रभू यीशू मसीह आप्पू ही और म्हारअ पिता परमेश्वर जुंणीं हाम्हां संघे प्रेम आसा डाहअ द, अनुग्रहा करै अनंत शांती और उत्तम आशा आसा दैनी दी। <sup>17</sup> थारै मनै लोळी शांती दैनी, और तम्हां हरेकी कामां लै मजबूत करे।

### प्राथणां करनें अरज

**3** हे भाईयो, हाम्हां लै बी करा प्राथणां, कि प्रभूओ बचन इहय छेकै फैले और महिमा पाए, जिहअ तम्हां दी हुअ। <sup>2</sup> और हाम्हें टेढे और दुष्ट मांछू का बी लोळी बची रहै, किल्हैकि हरेकी दी निं विश्वास आथी।

<sup>3</sup> पर प्रभू आसा सन्नअ, तेऊ करनें तम्हें मजबुती संघे स्थिर और तेऊ दुष्टा का बी डाहणै बचाऊई। <sup>4</sup> और हाम्हां आसा प्रभू दी आप्पू परैदैं भरोसअ कि जुंण आज्ञा हाम्हें तम्हां लै दैआ, तिन्नां तम्हें मना और मन्दै बी रहणै। <sup>5</sup> परमेश्वरे प्रेम और मसीहे धीरजा और थारै मनै करे प्रभू अगुआई।

### कामां करनें जिम्मेबारी

<sup>6</sup> हे भाईयो, हाम्हें दैआ तम्हां लै प्रभू यीशूए नांओरे आज्ञा कि हरेक रहा इहै भाई का जुदै जुंण गळत चाल चला, और जुंण शिक्षा तेऊ हाम्हां का पाई दी आसा, तेते साबै निं करदअ। <sup>7</sup> किल्हैकि तम्हां का आसा आप्पे थोघ कि तम्हां केऊ साबै लागा हाम्हां जेही चाल चलणीं, किल्हैकि हाम्हें निं तम्हां

बिचै कधि गळत चाल चली। <sup>8</sup> हाम्हें निं कोहिए रोटी मुफ्त खाई, पर मैन्थ और कष्ट करी करै राची धैळी करा तै आप्पू काम-धांधअ, ताकि तम्हां मांझै कोही लै बी बोझ नां होए। <sup>9</sup> इहय निं आथी कि हाम्हां निं एतो हक आथी; पर एते तैणीं कि आपणें आप तम्हां लै आदर्श बणें और तम्हें बी म्हारी चाल चले। <sup>10</sup> ता जधू हाम्हें तम्हां सेटा थियै, तधू दैआ तै तम्हां लै हाम्हें एही बी आज्ञा कि जै कुंण काम नाई करनअ चाहंदअ ता सह निं खाई बी आथी। <sup>11</sup> हाम्हें शुंणअ इहय बी कि कई लोग आसा तम्हां बिचै ईहै बी, तियां चला बूरी चाल, और काम-काज बी निं किछै करदैं, पर होरीए कामां दी पाआ खरोळअ।

<sup>12</sup> इहै लै दैआ हाम्हें प्रभू यीशू दी आज्ञा और समझाऊआ कि चुपचाप काम करी करै खाआ आपणीं रोटी। <sup>13</sup> और तम्हें हे भाईयो, भलाई करना लै निं हिम्मत छाडी।

<sup>14</sup> जै कोई म्हारी एसा चिठिए गला नाई मने, ता तेऊ दी डाहा नजर और तेऊए संगती का रहै दूर, ताकि सह शर्मिदअ होए। <sup>15</sup> पर तैबी बी निं तेऊ बैरी समझी, पर भाई समझी करे दैए तेऊलै चतैनगी।

### आखरी नमस्कार

<sup>16</sup> ऐबै प्रभू जुण शांतीओ मूळ आसा, सह दैए आप्पे तम्हां लै हर बगत शांती और प्रभू रहे आप्पे तम्हां सोभी संघे।

<sup>17</sup> हूँ पौलुस लिखा तम्हां लै आपणें हाथे नमस्कार और राजी-बाजी और हर चिठी दी आसा मेरअ अहैई चिन्ह और हूँ लिखा इहय ही। <sup>18</sup> म्हारै प्रभू यीशूए दैया लोळी तम्हां सोभी दी हुई।

# 1 तीमुथियुस

## भूमिका

तीमुथियुस त एक जुआन मसीही एशिया माईनरो रहणें आळअन, तेऊए आममां ती यहूदी और बाप्पू त यूनानीं। सह बणअ पौलुसे प्रचारे कामां दी साथी और तेऊए मददा करणें आळअ। तीमुथियुसे नांऊणें प्रेरित पौलुसे पैहली चिठी लिखी ती चीई खास गला दी बचार करना लै। सोभी का पैहलै आसा अह चिठी झूठी शिक्षे खलाफ चतैनगी। सह शिक्षा जुण यहूदी और गैर यहूदीए बचारे मलावट ती। सह ती एसा धारणां परेंदें कि अह भौतिक संसार ई आसा बूरअ और एकी माळू लागा खास गुप्त ज्ञान और रीति-रवाज जिहय कि कई खाणें चिजा निं खाणीं, और बैह निं करनअ बगैरा, करैई सका उध्दार (मोक्ष) भेटी। एसा चिठी दी आसा कलीसिये प्रबन्ध और आराधने बारै बी निर्देश, संघा आसा तेऊ चाल-चलणें बारै बी वर्णन जुण कलीसिये मुखिये और सहायका लै जरूरी आसा। आखरी दी आसा दैनीं दी तीमुथियुसा लै अह सलाह कि सह किहय करै सका बर्णी प्रभू यीशूओ एक शोभलअ सेबक। और हरेक विश्वासी मंडळीए प्रति तेऊए किजै-किजै जिम्मेबारी आसा।

रूप-रेखा

भूमिका 1:1,2

कलीसिया और तेते मुखिये बारै निर्देश 1:3-3:16

तीमुथियुसा लै तेऊए कामें बारै निर्देश 4:1-6:21

## आदर-सत्कार

1 पौलुसे तरफा का जुण म्हारै उद्धारकर्ता परमेश्वर, और म्हारी आशा स्थान मसीह यीशूए आज्ञा करै मसीहो प्रेरित आसा, 2 तीमुथियुसे नांओणें, जुण विश्वासा दी मेरअ सच्चअ पुत्र आसा, पिता परमेश्वर, और म्हारै प्रभू यीशू का अनुग्रह, दैया और शांती लोळी भेटी।

## झुठै गुरूए खलाफ चतैनगी

3 जिहअ मणें मकिदुनियां लै नाशदी बारी ताखा समझाऊअ त कि इफिसुसै रही करै दैरे कई लै एही आज्ञा कि होरी साबै शिक्षा निं दैया। 4 और तिन्नां एही काहणीं और अनंत बंशाबली दी निं मन लाई, जसा करै बिबाद ह्आ; तियां निं परमेश्वरे तेऊ प्रबन्धे साबै आथी, जसरअ संबंध विश्वासा संघे ह्आ। तिहअई बोला हूँ भी कि 5 आज्ञा सारांश आसा इहय कि शुध मन और भलै बिबेका और विश्वास जेथ कपट नां होए, इन्नां करै करा प्रेम। 6 इन्नां छाडी आसा कई लोग बिबादा दी पळी करै भटकै दै। 7 और तियां चाहा व्यवस्थापक हणअ, और तियां जुण गला मजबूती संघे बोला, तिन्नां निं तियां समझदें आथी।

8 पर हाम्हां का आसा थोघ कि जै व्यवस्था, व्यवस्थे साबै कामां दी आणें ता तै आसा सह बी भली। 9 इहय समझी करै कि व्यवस्था निं धर्मी आदमीं लै आथी, पर अधर्मि, निरंकुश, भक्तीहीन, पापी, अपबित्र, अशुध, आममां बाप्पू लै घात करनैआळै हत्यारे, 10 कंजरै, पुरुषगामीं, माळू बेचणें आळै लै, झुठै लै और झुठी कसम खाणें आळै लै, और इना झाडी आसा खरै उपदेशे सोभी बिरोधी लै बणाई दी। 11 अहैई आसा परमधन्य परमेश्वरे महिमे सुसमाचारे साबै, जुण मुखा आसा सभाळअ द।

## प्रभूए दैया लै धन्याबाद

12 और हूँ करा आपणें प्रभू यीशूओ जुणीं मुल्है सामर्थ आसा दैनी दी, तेऊलै धन्यबाद कि तेऊ चुनअ हूँ विश्वासयोग्य समझी करै सेऊआ लै। 13 हूँ थिय पैहलै निंदा करनै आळअ, दुखा दैणेंआळअ, बुराई करनै आळअ, पर तैबी बी हुई मुल्है दैया, किल्हैकि मणें किये अविश्वासे दशा दी बिंणा समझै भुजै ईया काम। 14 और म्हारै प्रभूओ अनुग्रह तेऊ विश्वासा और प्यारा संघे जुण प्रभू यीशू दी आसा, सह हूअ भरी-भरी करै। 15 अह गल आसा सच्चै

और हर प्रकारै मनणें जोगी कि मसीह यीशू आसा पापी लै उद्धार देणें तैणीं संसारा दी आअ द। 16 पर मुल्है हूई तै दैया कि, मुँह सोभी का बडै पापी दी प्रभू यीशू मसीह पूरी सैनशीलता रहैऊई सके। कि जुण लोग तेऊ दी अनंत जिऊणा लै विश्वास करे, तिन्नां लै हूँ एक आदर्श बणू। 17 एबै सनातन राजअ अर्थात, अबिनाशी अनदेखे अद्वैत परमेश्वरो आदर महिमा लोळी जुगै-जुगै रही हंदी लागीं॥ आमीन॥

18 हे पुत्र तीमुथियुस, तिन्नां भविष्याबाणिंए साबै, जुण पैहलै ई तेरै बारै की ती, मणें सभाळी अह आज्ञा कि तूह रह तिन्नें साबै ठीक लळाई लळदअ लागी। 19 और विश्वास और शोभलै बिबेका डाह थर्ही, जहा दूर करी करै कई लोगो विश्वास रुपी जहाज डुबअ। 20 तिन्नांई मांझै आसा हुनिनयुस और सिकंदर, जुण मणें शैताने हाथे आसा हेरै दै सभाळी, कि तियां निंदा करनी नां शिखळै॥

## आराधने बारै नर्देश

2 एबै दैया हूँ सोभी का पैहलै इहय उपदेश कि बिनती, प्राथणां निबेदन और धन्यबाद करनै सोभी मांहणू लै। 2 राजे और सोभी उंचे पदा आळै लै करनीं एते तैणीं कि हाम्हें बिश्राम और चैना संघे सारी भगती और गंभीरता संघे जिन्दगी बिताऊई सके। 3 इहय लागा म्हारै परमेश्वरा शोभलअ और भाऊआ बी। 4 सह चाहा इहय कि सोभी माळूओ लोळी उद्धार हुअ; और तियां सच्चाई भली भांती बछैणीं सके। 5 किल्हैकि परमेश्वर आसा एक, और परमेश्वरा और मांळू बिचै आसा एकैई बिचुआई करनै लाळअ, अर्थात प्रभू यीशू मसीह जुण मांळू आसा। 6 जुणीं आपणीं ज्ञान सोभीए छुटकारै लै किम्मत दैनीं ताकि तेऊए ग्वाही ठीक बगती दैणां लै होए। 7 हूँ खोजा सच्चाई और झुठअ निं बोलदअ, कि हूँ आसा एतेई तैणीं होरी ज्ञाती लै विश्वास और सच्चाईओ उपेशक चुनअ द।

8 ता हूँ चाहा इहय कि हर जोगा करा मरध बिना क्रोध और बिना बिबाद करी आपणें पबित्र हाथा चकी प्राथणां। 9 और तेही ई बेटळी बी करै, लाज और सबरा दी शोभलै झिकळै बाहिं आपणें आपू सवारी नां कि बांबळा गुंदी करै और सुनै चंदी, मोती, और किमती झिकळै करै, पर भलै कामो हार शंगार करनअ। 10 किल्हैकि परमेश्वरे भगती ह्आ ग्रहण करनैआळी बेटळी लै इहयई ठीक। 11 और बेटळी लागा रहणअ चुपचाप पूरी अधीनता दी शिखळदें लागी। 12 और हूँ बोला इहय कि बेटळी नां ता उपदेश करी, और नां मरधा लै आज्ञा चलाऊई, पर चुपचाप रहै। 13 किल्हैकि आदम आसा

पैहलै और तेता बाद बणाई हव्वा (बेटळी)। 14 और आदम नि बैहकाऊअ, पर स्त्री हुई बहकाबै दी एछी करै अपराधिणी। 15 तैबै बी बच्चै जल्मणै करै हणअ तेसरअ उद्धार, जै तियां सयंम डाही करै विश्वास प्रेम और पबित्रता दी स्थिर रहे।

### कलीसिया दी अध्यक्ष (बिशप)

3 अह गल आसा सच्ची कि जुंण अध्यक्ष हणअ चाहा, ता सह करै भलै कामें इछा। 2 ता अध्यक्ष लोळी निर्दोष और एकी बेटळीओ मरध हुअ और सयंमी, सूशील, सभ्य, पाहुणचारी करनै आळअ और सखाऊणें दी निपुण। 3 शराबी-खराबी और मारपीट करनैआळअ नि लोळी हुअ, पर कोमल, नां झगडाळू और ना लोभी हो। 4 आपणें घोरो राम्बळै प्रबन्धा करनै आळअ, और शोहरू माठै डाहा सारी गंभीरता दी अधीन। 5 जै कुंण आपणें घोरो परबन्ध करनअ ई नाई जाणा, ता तेऊ परमेश्वर कलीसिये रखबाली किहअ करै लाई करी? 6 तेखअ आसा इहय बी कि सह नि कुंणअ चेलअ बी लोळी हुअ, इहय नि हआ कि अभिमान करी करै सह शैताना जिहअ दंड पाए। 7 और बागै भितरी लोळी तेऊओ नांअ सुनांम हुअ, कि निंदित हई करै शैतानं फंदै दी न फसे।

### कलीसिया दी सेबक (डिकन)

8 तिहअ ई एक सेबक बी लोळी गंभीर हुअ, दूई रंगे गल्ला करनै आळअ और शराबी, नीच कमाईओ लोभी बी नि लोळी हुअ। 9 पर विश्वास भेदा शुध बिबेका संघे लोळी सभाळणें आळअ। 10 और ईयां बी लोळी पैहलै परखै, तैबै जै निशकळंक निखळे, ता तै सका ईयां सेबको काम करी। 11 ठीक एही ई बेटळी बी लोळी गंभीर हुई, तियां नि दोषा लागैआळी लोळी हई, पर सचेत और सोभी गल्ला दी लोळी विश्वासयोग्य। 12 और सेबक बी लोळी एकी बेटळीए मरध हुए, और शोहरू माठैओ और आपणें घोरो प्रबन्ध करनअ बी लोळी तिन्नै जाणअ द हुअ। 13 किल्हैकि जुंण सेबकाईओ काम राम्बळै करै सका करी, तियां करा आप्पू लै रांबळअ पद तेऊ विश्वासा दी जुंण मसीह दी आसा, तेथ बडी हिम्मत प्राप्त।

### महान भेद

14 हूँ करा ताह सेटा छेके एछणें आशा, पर तैबी बी लिखा हूँ तालहै इना गल्ला एते तैणी कि 15 जै मेरै एछणें दी देर बी होए ता तूह ल्पे समझी कि परमेश्वरो घर जुंण परमेश्वर कलीसिया आसा, और जुंण सच्चाईओ थाह्य और आथरी आसा, तेथ दी किहअ बर्ताव लागा करनअ। 16 एथ नि कोई बी शक आथी कि भगतिओ भेद आसा गंभीर, अर्थात्, सह जुंण शरीरा दी प्रगट हुअ, आत्मां दी धर्मी हुअ, स्वरगदूता का बी धेछुअ, होरी जाती बिचे हुअ तेऊओ प्रचार, संसारा दी किय तेऊ दी विश्वास, और महिंमा दी चकअ सह उझै।

### झूठे गुरू

4 पर आत्मां बोला शपश्ट इहय कि एछणें आळै धैळे दी भटकणें विश्वासा का कई लोग भरमाऊणै आळी आत्मां, और दुष्टात्मै शिक्षा दी मन लाई करै। 2 इहय हणअ तिन्नां झूठै मांहुंए छळ कपटे बजह दी, जसरअ बिबेक जिहअ जळदै लोहै करै प्रासअ द होए। 3 तिन्नां रोकणें कई जळ्ळै बैहा करनै का, और खाणें कई चिजा का दैणीं तिन्नां दूर रहणें आज्ञा; जुंण परमेश्वर एते तैणीं सृजै कि विश्वासी और सच्चाई जाळणें आळै तिन्नां धन्यवाद करी करै खाए। 4 किल्हैकि परमेश्वर आसा सृजी दी सोभै चिजा भली, और कोई बी चिज नि एही आथी कि जुंण सबीकार करनै जोगी नां होए, पर जै धन्यवाद करी करै खाए। 5 किल्हैकि सह हआ परमेश्वर बचन और प्राथणां करै शुध।

### मसीह यीशूओ बधिया सेबक

6 जै तूह सोभी विश्वासी भाई लै इना गले आद फरेऊंदअ लागी रहे, ता तै हणअ तूह मसीह यीशूओ शोभलअ सेबक, और विश्वास और तिन्नां राम्बळै

उपदेशे गल्ला करै, जुंण तूह मंदअ आअ, तेरअ पाळण पोषण रहणअ हंदअ लागी। 7 पर अशुध और बुढळी जेही काहणों का रह दूर, और भक्ती लै कर आपणों साधना। 8 पर देहीए साधना करै हआ थोळअ जिहअ नफअ पर भगती आसा सोभी गल्ला लै फाईदें दैणेंआळी, किल्हैकि एऊ बगता लै और आजू एछणें आळी जिन्दगीए प्रतिज्ञा आसा एताई लै। 9 और अह गल आसा सच्ची और हरेकी साबै मनणें जोगी। 10 किल्हैकि हाम्हें करा मैन्थ और कोशिश एते तैणीं कि म्हारी आशा आसा तेऊ जिऊंदै परमेश्वरा दी; जुंण सोभी मांहुंओ और निजी बोले ता विश्वासिओ उद्धारकर्ता।

11 इना गले आज्ञा दैए और सखाऊंदअ बी रह लागी। 12 कोही नि लोळी तेरी जुआनिं तुछ समझी, पर बचन, चाल चलण, प्रेम, विश्वास, पबित्रता दी बण होरी विश्वासी भाई लै आदर्श। 13 जेभै तैणीं हूँ नि एछूँ, तेभै तैणीं रह पळहदअ, सखाऊंदअ और उपदेशा दैदअ धैळी राची लागी। 14 तेऊ बरदाना करै जुंण ताखा आसा, और भबिष्यबाणीं करै रह निश्चित जुण ताह प्राचीने हाथा डाहंदी बारी भेटअ त। 15 तिन्नां गल्ला रह सोचदअ लागी, ताकि उन्नती सोभी दी प्रगट होए, आपणों और आपणें उपदेशे कर चौकसी। 16 इना गल्ला दी रह टेकी, किल्हैकि जै तूह इहय करदअ रहे, ता तै हणअ तूह आप्पू लै और आपणें शुळणेंआळै लै बी उद्धारो कारण। ताकि परमेश्वरो जन सिद्ध बणें और हरेक भलै कामां लै तयार रहे।

### सोभी रंगे विश्वासीए प्रति जिम्मबारी

5 कसा बुढळै निं डांडदअ, गाळी-माळी दैदअ लागी, पर बाप्पू समझी करै समझाऊए तिन्नां, और जुआन समझाऊणें आपणें भाई समझी करै, और बुढळी बेटळी मां समझी करै। 2 और जुआन बेटळी समझाऊ पुरी पबित्रता संघे आपणों बैहण समझी करै।

3 तिन्नां बिधबा जुंण सच्ची बिधबा आसा, तिन्नां कर आदरमान। 4 और जै कसा बिधबे शोहरूमाठै और नाती पोती होए, ता तियां करे पैहलै आपणें ई घराने संघे-संघे भक्तीओ बर्ताअ और आपणें आममां बाप्पू लै तिन्नां शिखळा हक दैणअ, किल्हैकि अह भाऊंआ परमेश्वरा बी। 5 पर जुंण सच्ची बिधबा आसा, और जसरअ कोहै नि आथी, सह डाहा परमेश्वरा दी आशा, और राची धैळी रहा बिनती और प्राथणां दी लौलीन हई। 6 पर जुंण भोगबिलासा दी पळी, सह गई जिऊंदी-जिता मरी। 7 इना गले बी कर आज्ञा दैई, ताकि तियां निर्दोष रहे। 8 पर जै कोई आपणें और खासकर आपणें घरानेए चिंता नां करे, ता तै गूअ सह विश्वासा का मुकरी, और अविश्वासी का बी गूअ बूरअ बणीं।

9 तेसा बिधबो ई नांअ लिखे जुंण शाठी साला का होछ्छी अमरे नां होए, और एकी ही लाळेए बेटळी होए। 10 और भलै कामां लै होए हमेशा सुनांम रही दी, जुंणीं शोहरू माठै धाचै पाळै दै होए, पाहुणें सेऊआ चाकरी की दी होए, दीन दुखीए सहायता की दी होए, और हरेकी भलै कामां दी आपणअ मन लाअ द होए। 11 पर जुआना बिधबे नांअ नि लिखी, किल्हैकि जांऊं तियां मसीहो बिरोध करी करै सुखबिलासा दी पळा, ता तियां चाहा तेखअ बैह करनअ। 12 तियां बणां तेखअ दोषी, किल्हैकि तिन्नां आसा हेरअ द पैहलअ विश्वास छाडी। 13 और एताई संघे शिखळिआ तियां घरै-घरै फिरी करै आळसी हणअ, सिधी आळसी ही नि, पर बकबक करदी बी रहा लागी, और होरीए कामां दी बी पाआ हाथ और जुंण गल्ला ठीक नि हंदी तिन्नां गल्ला करा तियां। 14 तैहीता हूँ इहय चाहा कि जुआन बेटळी जुंण बिधबा आसा एता का चाहिए तिन्नां बैह करनअ, और शोहरू माठै पैदा करी करै घर बार सभाळणअ, ताकि लोगा बदनाम करनेओ मोकअ नां भेटे। 15 किल्हैकि कई ता आसा गई दी बैहकी करै शैताना पिछू बी नाशी। 16 जै कसा विश्वासिनी सेटा बिधबा होए, ता सहैई करै तिन्ने हेर सभाळ, ताकि कलिसीया लै बी बोझ नां होए, कि तियां तिन्ने सहायता करी सके जुंण सच्ची बिधबा आसा।

17 जुंण प्राचीन रांबळअ प्रबन्ध करा, खासकर तियां जुंण बचन शणांऊणें और सखाऊणें दी मैन्थ करा, तियां समझणें दुगणें आदरमाना जोगी। 18 किल्हैकि पबित्रशास्त्र बोला इहय कि हळै लाए दै बल्दे खाख निं बाही डाहणीं, किल्हैकि मजदूर आसा मजदूरीओ हकदार। 19 कोई बी दोष कसा बुजुर्गा दी कुंण लाए ता तांऊं तैणीं नि तूह शुणी जांऊं तैणीं तिधी दूई या चअन गुआह नां होए। 20 पाप करनै आळै समझाऊ सोभी सहनै, ताकि होर

लोग बी डरे। 21 परमेश्वर और मसीह यीशू, और चुनै दै स्वर्गदूते उपस्थिती समझी करै हूँ दैआ ताल्है चतैनगी कि तूह मन इना गल्ला दिल खोल्ही करै, और कोई बी काम निं पक्षपात करी करै करी। 22 कसा दी छेकै हाथ निं डाहणअ, और दुजे पापा दी भागी निं हणअ, आपणें आप डाह पबित्र बणाई।

23 भबिष्य दी निं सिधअ पाणी झुटदअ ई रही लागी, पर आपणें पेट और बार- बार बमार हणां लै कर धख-धख दाखरस बी झुटी।

24 केतरै माळुए पाप हुआ प्रगट, और न्याय लै जाआ पैहलै ई पुजी, और केतरे एछा पिछू का। 25 तिहैई केतरै काम हुआ भलै प्रगट, और जुण ईहै नाई हंदै, तियां बी निं सकदै छुपी।

6 जेतरे दास जूँआ हटै आसा, तियां सोभ समझै आपणें-आपणें सुआमी आदरमाना जोगी, ताकि परमेश्वरे नांओं और उपदेश निंदा नां होए। 2 और जसरे मालक विश्वासी आसा, तिनां निं भाई हणें कारण तुछ समझी; पर तिनें करै होर बी जादी सेऊआ, किल्हैकि एते फाईदैं चकणें आळै आसा विश्वासी और प्रेमी।

### झूठी शिक्षा और धन-मायो लाळ

3 जै कुण होरी साबो उपदेश दैआ, और खरी गल्लो, अर्थात म्हारै प्रभू यीशू मसीहे गल्ला और तेऊ उपदेशा नाई मंदअ, जुण भक्तिए साबै आसा, 4 तै आसा सह अभिमानी, और सह निं किछै जाणदअ, पर तेऊ आसा बिबाद और तर्क करनेए बमारी, जेता करै डाह, झगळै, निंदा करने गल्ला, और बूरे-बूरे शक, 5 और माळू बिचै हुआ बेकार झगळै, जसरी बुधी बिगळी दी आसा और तियां आसा हुए दै सच्चाई का दूर, जुण ईहअ समझा कि भगती आसा कमाईओ दुआर। 6 पर संतुष्टी संघै भगती आसा सोभी का बडी कमाई। 7 किल्हैकि नां हाम्हे संसारा दी पैदा हंदी किजै आणअ और नां ता हाम्हे किजै निई सकदै। 8 और जै हाम्हां का खाणां और बाहणा लै किजै आसा, ता एताई दी डाहणी संतुष्टी। 9 पर जुण सेठ हणअ चाहा, तियां पळणें एही परिक्षा

और फंदै दी और कई बेकार हानिं करनेआळी लालसा दी फसणें जुण माळू बगाळी करै बनाशे समुंदरा दी डबेऊआ। 10 किल्हैकि डबेओ लोभ आसा सोभी बुराईओ जलैऊअ, जसा लोळणें कोशिशा करदी कई लोगै विश्वासा का भटकी करै आपणें आप्पू किय कई प्रकारे दुखा करै बरैबाद।

### तीमुथियुसा लै व्यक्तिगत नर्देश

11 पर हे परमेश्वरे माणुंआ, तू भाग इनां गल्ला का दूर; और धर्म, भक्ती, विश्वास, प्रेम, धीरज और नम्रता पिछू नाश। 12 विश्वास शोभली कुशती लळ; और तेऊ अनंत जिऊंणा कर धारण, जेता लै तूह शादअ द आसा और कई ग्वाही सहनै किय त तंए कबूल। 13 हूँ ता परमेश्वरो, जुण सोभी जिऊंदै डाहा और मसीह यीशूओ गुआह बणाई करै जुणीं पुन्तियुस पिलातुसा सहनै ठीक अंगीकार किय, एसा आज्ञा दैआ कि 14 तूह म्हारै प्रभू यीशू मसीहे प्रगट हणें तैणीं डाहै एसा आज्ञा निष्कलंक और निर्दोष। 15 जुण तेऊ ठीक बगती रहैऊणीं, जुण परमधन्य और अद्वैत अधिपति और राजेओ राजअ और प्रभूओ प्रभू आसा। 16 अमरता आसा तेऊए ई, और सह रहा अगम्य ज्योती दी, और ना सह कुणीं माणुं हेरअ, और ना कधू भाळि सकदअ, तेऊए प्रतिष्ठा और राज रहणअ जुगै-जुगै।

17 एक संसारे सेठा लै दै आज्ञा कि अभिमानी निं हुआ और नां चंचल धनमाया दी आशा डाहा, पर परमेश्वरा दी जुण म्हारै सुखा लै भरी-भरी करै दैआ। 18 भलाई करा, भलै कामां दी बणां धनबान, और धुआर और मजत-मदैदा दैणां लै रहा हर बगत त्यार 19 और आजू लै पा पाकी आथरी कि सचूचै जीबना करा आपणें बशै।

20 हे तीमुथियुस, एसा धरोहरे कर रखबाली, और जसा ज्ञाना लै, ज्ञान बोळणअ ई भूल आसा, तेते अशुध बकबाद और बिरोधे गल्ला का रह दूर।

21 21 कई भटकै एक ज्ञानों अंगीकार करी करै विश्वासा का।

तम्हां लै लोळी दैया हंदी रही लागी।

## 2 तीमुथियुस

### भूमिका

तीमुथियुसे नांओं पौलुस प्रेरिते चिठी आसा पौलुसे एकी नौजुआन साथी और सहायके रूपे काम करनें आळे तीमुथियुसा लै एक व्यक्तिगत सलाह। एतो खास विषय आसा धीर धरनअ। तीमुथियुसा लै आसा परामर्श और प्रोत्साहन दैनअ द कि दुख-दर्ध और बिरोध हंदि बी रहे सह विश्वासयोग्यता संघे प्रभू यीशू गुआही देंदअ। सुसमाचार और पराणें नियमें सच्ची शिक्षा दी बी रहे सह मजबूत बणीं और एक सखाऊणेंआळे और प्रचार करनें आळैए रूपे बी रहे सह जिम्मेबारी नभाऊंदअ लागी।

तीमुथियुसा लै आसा खास करके “मुख्रा जिंयै और बेकारे बाद-बिबादा” दी पळी करै पैदा हआ खातरे बारै चतैनगी देंनी दी। एता करै नफअ ता निं हंदअ और शुळणें आळै बी हआ बिनाशो कारण।

इन्नां दी आसा तीमुथियुसा लै लिखणें आळै आपणीं जिन्दगीए उदेश्य - तेऊए विश्वास, सहन शक्ती, प्रेम, धैर्य, दुख-दर्धे बगती दुख- उदाहरण आद फरेऊए दें।

रूप-रेखा

भूमिका 1:1,2

प्रशंसा और उपदेश 1:3-2:13

सलाह और चतैनगी 2:14-4:5

पौलुसे आपणीं स्थिति 4:6-18

नचोळ 4:19-22

### आदर-सत्कार

1 पौलुसे तरफा का जुंण जिंदगीए प्रतिज्ञे साबै जुंण मसीह यीशू दी आसा, परमेश्वरे इछा करै मसीह यीशूओ प्रेरित आसा। 2 प्रिय पुत्र तीमुथियुसे नांओंः परमेश्वर पिता और म्हारै प्रभू यीशू मसीहे तरफा का ताल्है अनुग्रह देंया और शांती।

### धन्याबाद और प्रोत्साहन

3 जहा परमेश्वरे सेऊआ हूँ बाबदादे रिती दी शुध बिबेका करै करा, तेऊलै धन्यबाद कि आपणीं प्राथणां दी करा हूँ ताह कबल्लअ आद। 4 और तेरै आशूए आद डाही करै राची धैळी करा हूँ ताह सेटा एछणें इछा कि हूँ आनंद और खुशी दी मगन हऊं। 5 मूँह फिरा तेरै तेऊ निष्कपट विश्वासे आद जुंण पैहलै तेरी नांनी लोईस, और तेरी आम्मां यूनिके दी थिय, और मूँह आसा पूरअ भरोसअ कि सह आसा तम्हां दी बी। 6 एऊई कारणें फरेऊआ हूँ ताखा आद कि तूह तेऊ परमेश्वरे बरदाना जुंण मेरै ताह दी हाथा लागणें करै ताह परमेश्वरा का भेटअ द आसा, तेऊ चमकाऊ। 7 किल्हैकि परमेश्वरें निं हाम्हां लै डरे आत्मां आथी पर हाम्हां लै आसा सामर्थ, प्रेम, संयम डाहणें आत्मां देंनी दी।

8 तैहीता म्हारै प्रभू यीशूए ग्वाही करै, और मूँह करै जुंण तेऊओ कैदी आसा, शर्मिंदे निं हणअ, पर तेऊ परमेश्वरे सामर्थे साबै सुसमाचारा लै दुख चक। 9 जुंणीं म्हारअ उद्धार किय, और पबित्र बुलाहटा लै शादै, और म्हारै कामें साबै निं पर आपणी मनसा और तेऊ अनुग्रहे साबै जुंण मसीह यीशू दी हाम्हां लै सनातना ओही आसा हुअ द। 10 पर एबै हुअ म्हारै उद्धारकर्ता मसीह यीशूए प्रगत हणें करै प्रगतअ, जुंणीं मोत बी की नाश और जिंदगी और अमरता की सुसमाचारा करै प्रकाशमान। 11 जसा लै हूँ प्रचारक, प्रेरित और उपदेशक बी बणअ। 12 एऊई कारणें चका हूँ इना दुखा बी और मूँह निं एता का शर्म लागदी, किल्हैकि हूँ जसरी मरें प्रतिती आसा की दी, मुखा आसा एसा गल्लो थोघ और पूरअ भरोसअ बी कि सह सका मेरी थातीए तेसा धैळी तैणीं रखबाली बी करी। 13 जुंण खरी गल्ला तरें मुखा शुणीं दी आसा, तिन्नां

डाह तेऊ विश्वासा और प्रेमा संघे जुंण मसीह यीशू दी आसा, आदर्श बणाईं 14 और पबित्र आत्मा करै जुंण हाम्हां दी बसअ द आसा, एसा शोभली थाथीए कर रखबाली।

15 ताखा आसा एसा गल्लो थोघ कि आसिआ आळै फिरै सोभ मुखा, जिना मांझै फुगीलुस और हिरमुगिनेस आसा। 16 उनेसीफूरुसे घरानें लै करे प्रभू देंया, किल्हैकि तेऊ किय कई बारी मेरअ जिऊ ठांडअ, और मेरै इना शांघळी लोहै करै निं शर्मिंदअ हुअ। 17 पर जाऊं सह रोम देशा दी आअ, ता बडी भारी कोशिश करी करै तेऊ हूँ लोळअ और मुखा मिलअ। 18 (प्रभू करे कि तेसा धैळी करे प्रभू तेऊलै देंया)। और जुंण-जुंण सेऊआ तेऊ इफिसुसै आसा की दी, तिन्नां बी जाणा तूह भली भांती।

### मसीह यीशूओ स्वामीभक्त सपाही

2 तैहीता, हे मेरे पुत्र, तूह तेऊ अनुग्रह करै जुंण मसीह यीशू दी आसा, तेथ दी हअ बलबंत। 2 और जुंण गल्ला तरें सोभी गुआह सन्नै मुखा शुणीं दी आसा, तिन्नां सभाळ विश्वासी माळू लै, जुंण होरी बी सका सखाऊई। 3 मसीह यीशूए शोभलै जोधै जिहअ चक दुख। 4 जेभै कुंण जोधअ जुधा लै नाशा, सह निं आप्पू संसारे कामां दी शाचदअ किल्हैकि सह जाणां कि मूँह लागा सह खुश करनअ जुंणीं हूँ भरती आसा किय द। 5 तेखअ बी जुंण अखाडै ली लळणें आळअ बिधि बधाने साबै नाई लळे, ता तै निं तेऊलै नाम भेटदी। 6 जुंण किसान मँन्थ करा, फळो भाग चाहिए तेऊ पैहलै भेटणअ। 7 जुंण हूँ बोला तेता दी दें धैन, और प्रभू देंणीं ताल्है सोभी गले समझ। 8 प्रभू यीशू मसीह डाह आद, जुंण दाऊदे बंशा का हुअ, और मूँए दें बिचा का जिऊंदअ हुअ, और अह आसा मेरै सुसमाचारे साबै। 9 जसा लै हूँ कुकर्मी जिहअ दुख चका, इधी तैणीं कि जेहला दी बी आसा हूँ कैद, पर परमेश्वरो बचन निं कैद आथी। 10 तैहीता हूँ चुने दें लोगा लै सोभै गल्ला सका सैही। कि तियां बी तेऊ उद्दारा, जुंण मसीह यीशू दी आसा, अनंत महिमा संघे पाए। 11 एसा गल्ला दी आसा सन्नाई कि, हाम्हें गए तेऊ संघे मरी और तेऊ संघे जिऊंदै बी हणें। 12 जै हाम्हें धीर धरी करै सैहंदै रहे लागी, तै सका हाम्हें तेऊ संघे राज बी करी, और तेऊ बी निं म्हारअ नकार करनअ। 13 जै



हाम्हें अविश्वासी बी होए, तैबी रहा सह विश्वासा करनैं जोगी बर्णी, किल्हैकि सह निं आप्पु आपणअ नकार करदअ।

### उत्तम कारीगीर

14 इन्नां गले आद फरेऊ तिन्रां का बी और प्रभू सहनैं चतैनगी बी दै, कि शब्दा दी तर्क बिचर्क निं करा, जसा का कोई बी फाईदअ निं हंदअ बल्कि शुळ्णेंआळै बिगळा। 15 आपणें आप परमेश्वरो ग्रहण हणें जोगी और इहय काम करनैंआळअ बणाणें कोशिष कर, जुंण शर्मिदअ नां होए, और जुंण सच्चाईओ बचन ठीक-ठीक रीति दी काम आणा। 16 पर अशुध बकबासा का रह बची; किल्हैकि इहै लोग बढा होर बी अभक्ती दी। 17 और तिन्रां बचन रहा चिजें दै घाऊआ जिहूअ बढदअ लागी, हनिनयुस और फिलेतुस आसा तिन्रांई मांझै। 18 जुंण इहय बोली करै कि पुनरुथान आसा गूअ द हई, और तियां आसा गूए दै सच्चाई का भटकी, और कईए विश्वासा करा उंबळै-टुंबळै। 19 तैबी बी रहा परमेश्वरे पाकी आथरी बर्णी, और तेथ दी आसा अह छाप लागी दी कि प्रभू बछैणा आपणें लोग; और जुंण बी प्रभूओ नांअ ल्आ, सह रहै पाप करनैं का बची।

20 बडै घरै निं सिधै सुनैं चन्दीए भांडै हंदै, पर तेथ ह्आ काठे और माटेए भांडै बी, कोई-कोई आदर और कोई-कोई अनादर करना लै। 21 जै कुंण आप्पु इना का शुध करे, ता सह आसा आदरो भांडअ और पबित्र, और मालकए कामे बी एछणअ, और हर भलै कामां लै तैर बी हणअ। 22 जुआनिंए अभिलाषा का भाग; जुंण शुध मना करै प्रभूओ नांअ ल्आ, तिन्रां संघै कर धर्म, विश्वास, प्रेम, और मेल-मलापो पिछअ। 23 पर मुखता और कुबिद्या का रह जुदअ, किल्हैकि ताखा आसा थोध कि एता करै ह्आ झगळै 24 और प्रभूओ दास निं झगडालू हणअ, पर सोभी संघै हणअ कोमल और शिक्षा दी निपुण और सैहनशील। 25 और बिरोधी समझाऊ नम्रता संघै, कै पतअ कि परमेश्वर तिन्रां लै बी मन फरेऊणें अबसर दैए कि तियां बी सच्चाई बछैणें 26 और एता करै तेऊए इछा पूरी करना लै सचेत हई करै शैताने फंदै का छुटे।

### प्रळया नेळ अधर्म

3 पर एसा गला डाह आद कि प्रळया एछणीं बडी मुशकळ घळी। 2 किल्हैकि माळू हणअ स्वार्थी, लोभी, डींगमार, अभिमानी, निंदक, आममां बाप्पूए आज्ञा नाई मनणें आळै, क्रतज्ञ और अपबित्र। 3 माये मदा दी चूर, क्षमा नाई करनैंआळै, असंयमी, कठोर, भलेए बैरी, 4 विश्वासघाती, डीठ, घमडी, और परमेश्वर छाडी सुखबिलासा चाहणें आळै। 5 तिन्रां भगतीओ भेष ता धरनअ पर तेऊए शगती निं तिन्रां मनणीं; इन्नां इहै का रहै दूर। 6 इन्नां मांझैई आसा तियां लोग बी जुंण दुजेए घरै बरैळै जिहै हांडी नाशा, और छछौरी बेटळी करा तियां आपणें बशै, जुंण पापा दी पळी दी और हर प्रकारे अभिलाषे बशै आसा। 7 तियां सदा शिखळदी ता रहा, पर सच्चाईए बछैणा तैणीं निं कधि पुजदी। 8 और जिहूअ यन्नेस और यम्बेसै मूसा नबीओ बिरोध किय त, तिहूअ ई करा ईयां बी सच्चाईओ बिरोध। ईयां आसा इहै आदमीं जसरी बुधी भ्रष्ट आसा हुई दी और ईयां आसा विश्वासा दी नकाम्मै। 9 पर तियां निं एता का आजू बढी सकदैं, किल्हैकि जेही तिन्रें अज्ञानता सोभी माळू दी प्रगट गई ती हई, तेही ई हणीं इनें बी।

### तीमथियुसा लै खास नर्दश

10 पर तंए दैनअ मेरअ उपदेश, चाल-चलण, मनसा, विश्वास, सैहनशीलता, प्रेम, धीरज और दुखा दी, और दुखा चकणें लै साथ। 11 और इहै दुखा दी बी जुंण अन्ताकिया, इकुनियुम और लुस्त्रा दी मुल्है पळै तै और होर बी कई दुखा दी, जुंण मंए चकै दै आसा; पर प्रभू छडैऊअ हूँ तिन्रां सोभी का। 12 पर जेतरे मसीह यीशू दी भक्ती संघै जिंदगी बिताऊणअ चाहा, तिन्रां सोभी लै एछणअ दुख-दर्ध। 13 और दुष्ट और बहकाऊणें आळै रहणें धोखै

देंदी और धोखै खांदी बिगळदैं लागी। 14 पर तूह इन्नां गला दी जुंण तंए शिखळी दी आसा, तंए की प्रतीति, और इहय समझी करै रह मजबूत बर्णी कि तंए तियां कसा लोगा का आसा शिखळी दी। 15 और बचपणा ओही आसा पबित्रशास्त्र तंए समझअ द, सह सका ताह मसीहा दी विश्वास करना लै और उद्धार प्राप्त करना लै बुधिमान बणाई। 16 हरेक पबित्र शास्त्र आसा परमेश्वरे प्रेरणा करै रचअ द, तियां आसा उपदेश, समझाऊणें, सुधारनैं और धर्म शिक्षा दैणां लै लाभकारी, 17 ताकि परमेश्वरो जन सिध बणें और हरेक भलै कामां लै तत्पर रहे।

4 परमेश्वर और मसीह यीशू गुआह बणाई करै, जसा जिऊंदै और मूएंदैओ न्याय करनअ, तेऊ और तेऊए प्रगट हणें, और राईसिए सुधी दलाऊई करै दैआ हूँ तालहै चतैनगी कि 2 तूह रह बचन और प्रचार करना लै; बगत और बेबगत रह त्यार, सोभी प्रकारे सैहनशीलता, और शिवशा संघै दै उलाहना, डांड और समझाऊ। 3 किल्हैकि इहय बगत एछणअ कि लोगा निं खरअ उपदेश सैहन हणअ, किल्हैकि काने खरोखणीं कारण आपणीं अभिलाषे साबै लोळणें तिन्रां आप्पु लै कई उपदेशक। 4 और आपणें कान लागें तिन्रां सच्चाई का फरेउई करै कथैआ और काहणीं दी। 5 पर तूह रह सोभी गला दी साबधान, दुख चक, सुसमाचारो काम कर और आपणीं सेऊआ कर पूरी।

6 किल्हैकि एबै लाअ हूँ अघें जिहअ तरैळी, और मेरै नाशणेंओ बगत गूअ एछी। 7 हूँ मुकअ बधिया कुशती लळी, और आपणीं तुहर बी मुकअ हूँ पूरअ करी, मंए आसा की दी विश्वासे रखबाली। 8 भबिष्य दी आसा मुल्है एक धर्मो मुकुट डाहअ द, जुंण प्रभू जुंण धर्मी और न्यायी आसा, तेऊ देणअ मुल्है सह तेसा धैळी, और सिधअ मुल्है ई निं पर तिन्रां सोभी लै बी, जुंण तेऊए प्रगट हणां लै प्यार करा।

### व्यक्तिगत संदेश

9 मूह सेटा लै कर छेकै एछणें कोशिष। 10 किल्हैकि देमासै समझअ संसार प्यारअ और हूँ हेरअ तेऊ छाडी और सह नाठअ थिस्लुनिके लै, और क्रेंसकेंस गलातिआ लै और तितुस नाठअ दलमतिआ लै। 11 सिधअ लूका आसा मूह सेटा, आप्पु एछै और मरकुसा बी आणें संघा, किल्हैकि सेऊआ लै आसा सह मुल्है बडेभारी कामां। 12 तुखिकुस हेरअ मंए इफिसुसा लै भेजी। 13 जुंण बागअ मंए त्रोआस करपुसा सेटा छाडी आअ द आसा, जेभै तूह एछे, ता तेभै आणें तूह तेऊ बागै और कताबा, खासकर चर्मपत्रा आप्पु संघा। 14 सिकंदर ठठेरै की मूह संघै बडी भारी बूराई, प्रभू लणअ तेऊका तेऊए कामे साबै बदळअ। 15 तूह बी रहै तेऊका बचदअ, किल्हैकि तेऊ किय म्हारी गला बडअ भारी बिरोध। 16 मेरी पैहली पेशीए जबाबदेहीए बगती निं मेरअ साथ कोही दैनअ, पर सोभी छाडअ त हूँ, भलअ हणअ त इहय कि तेतो इना लेखअ ना दैणअ पळे। 17 पर प्रभू रहअ मेरअ सहायक, और तेऊ दैनीं मुल्है सामर्थ, ताकि मुँह करै पूरअ प्रचार हई सके, और सोभै होर जाती बी शुणें, और हूँ ता छडैऊअ प्रभू जिहूअ शेरे खाखा का। 18 पर प्रभू छडैऊणअ हूँ हरेकी बुरै कामां का, और आपणें स्वर्गीया राजा दी पजैळणअ हूँ उद्धार करी करै। तेऊए ही महिमा लोळी जुगै-जुगै हुई।

### आखरी आदर-सत्कार

19 प्रिस्किल्ला और अकबिले पूरै परिवारा लै बी दैए राजी-बाजी। 20 इरास्तुस आसा कुरिंथै रह द और त्रिफिमस आसा मंए मिलैतुसै ई छाडअ द, सह आसा बमार। 21 कोशिश करै सरदी का पैहलै एछणें, युबलूस और पुंदेस, और लीनुस और कलौदिया, और होरी सोभी भाई लै दैए राजी-बाजी। 22 प्रभू तेरी आत्मा संघै रहे और तम्हां सोभी लै लोळी अनुग्रह हंदअ रहअ लागी।

# तीतुस

## भूमिका

तीतुस त एक गैर यहूदी विश्वासी जुण पौलुसे प्रचारे कामां दी तेऊओ साथी और सहायक त गअ द बणीं। तीतुसे नांओएँ प्रेरित पौलुसे अह चिठी आसा पौलुसे एऊई नौजुआन सहायका लै लिखी दी, जुण तिधी कलीसिये हेर-सभाळ करना लै थीय डाहअ द। अह चिठी करा चअन खास गल्ला प्रगट। पैहली, तीतुसा का फरेऊई एसा गल्ले आद कि कलीसिये मुखियेओ चाल-चलण किहय लोळी हुअ, अह गल्ल आसा खासकर क्रेतै रहणेंआळें कई बूरै चाल-चलणा आळें भाळी करै बोली दी। दुजी आसा तीतुसा लै एही सलाह देंनीं दी कि कलीसिया दी हरेकी मंडळी लै केही शिक्षा लागा देंनीं, अर्थात, बुजुर्ग मरध, बुजुर्ग बेटळी (जुण एक-एक करके जुआन बेटळी लै शिक्षा दें), जुआन मरध और सेऊआकार। चिउथी दैआ लिखणें आळअ तीतुसा लै मसीही आचरणें बारें सलाह, खासकर शान्तीपूर्ण और मित्रवत् बळनां लै; ओर घृणा, बाद-बिबाद और कलीसिया दी गुटबंदी का बचणा लै।

रूप-रेखा

भूमिका 1:1-4

कलीसिये मुखिये 1:5-16

कलीसिया दी हरेकी मंडळीए जिम्मंबारी 2:1-15

उपदेश और चतैनगी 3:1-11

नचोळ 3:12-15

## आदर-सत्कार

1 पौलुसे तरफा का जुण परमेश्वरो दास और प्रभू यीशू मसीहो प्रेरित आसा, जुण परमेश्वर चुनै दै लोगे विश्वास और भगतीए साबै आसा। 2 तेऊ अनंतजिऊणें आशा दी, जसरी प्रतिज्ञा परमेश्वरै जुण झुठअ निं बोलदअ, तेऊलै सनातना ओर्ही आसा की दी। 3 पर बिलकुल ठीक बगतै आपणें बचन तेऊ प्रचारा करै प्रगट किअ, जुण म्हारै उद्धारकर्ता परमेश्वर आजे साबै मुखआ आसा सभाळअ द।

4 तीतुसे नांऊरे, जुण विश्वासे सहभागिते बचारा दी मेरअ सच्चअ शोहरू आसा,

परमेश्वर पिता और म्हारै उद्धारकर्ता और मसीह यीशू का देया और शांती लोळी भेटदी रही।

## क्रेतै दी तीतुसो काम

5 हूँ आअ त ताह क्रेतै एते तैणीं छाडी कि तूह बाकी रही दी गल्ला सुधारे, और मेरी आज्ञे साबै नगरी-नगरी दी प्राचीन नियुक्त करे। 6 जुण निर्दोष और एकी ई बेटळीओ मरध होए, और जसरे बाल बच्चे विश्वासी होए और जहा दी लुचै लफंगै हंगेओ दोष निं होए। 7 किलहैकि अध्यक्ष लोळी परमेश्वरो भंडारी हणें बजह निर्दोष हुअ, नां हठी, नां क्रोधी, नां शराबी-खराबी, नां मारपीट करनेआळअ, और नां नीच कमाईओ लोभी होए। 8 पर पाहुणचारी करनेआळअ, भलाई चाहणें आळअ, सब्र करने आळअ, न्यायी, पबित्र, और आपणीं इंद्री बशा दी डाहणें आळअ 9 और विश्वासयोग्य बचन जुण धर्म उपदेश साबै आसा, तेथ दी स्थिर रहे; कि खरी शिक्षा करै उपदेश दैई सके; और बिबाद करनेआळेओ मूह बी सके बंद करी।

10 किलहैकि कई लोग आसा ईहै जुण कुण कोहीए निं शुणदैं और धोखै दैणें आळें, खासकर खतनै करने आळें मांझे। 11 इंनो मूह चाहिए बंद करनअ, ईयां लोग बगाळा नीच कमाई लै बूरी गल्ला सखाऊई करै घरा परदैं घअ। 12 तिन्नां मांझे ई एकी आदमीं जुण तिंनो भविष्यवक्ता आसा, तेऊ बोलअ इहय कि क्रेती लोग ह्आ सदा झूठै, दुष्ट पशू, आलसी और पेटू। 13 अह ग्वाही आसा सच्ची, तैहीता तिन्नां लै कर सखती संघे चतैनगी दैई कि तियां विश्वासा दी पाक्रे होए। 14 और तियां यहूदिए कथेया काहणीं दी और तिन्नां लोगे आज्ञा दी मन निं लाआ, जुण सच्चाई का भटकै दै ह्आ। 15 शुध लोगा लै आसा सोभी

गल्ला शुध, पर हळकै विश्वासी लै निं किछ बी शुध हंदअ, तिन्नें आसा बुधी और बिबेक दुहै अशुध। 16 तियां बोला इहय कि हामहें ज्ञाणा परमेश्वरा, पर आपणें कामां का करा तेऊओ नकार, किलहैकि तियां आसा घृणित और आज्ञा न मनणेंआळे, और कोई बी राम्बळे कामां जोगी निं तियां आथी॥

## शोभलै आचरणा लै खरी शिक्षा

2 तूह कर एही गल्ला करी जुण खरै उपदेशा जोगी आसा, 2 अर्थात, बुजुर्ग आदमीं लोळी सचेत गंभीर और सबर डाहणें आळें हुए और तिन्नां दी लोळी विश्वास प्रेम और धीरज पाकअ हुअ। 3 इहयई करै बुजुर्ग बेटळीओ चाल-चलण लोळी पबित्र लोगा जिहअ हुअ, दोषलाणें आळी और शराबी निं लोळी हुई, पर शोभली गल्ला सखाऊणें आळी लोळी हुई। 4 ताकि तियां जुआन शोहरी और बेटळी लै चतैनगी देंदी और समझाऊंदी रहे लागी, कि आपणें पति और शोहरू माठै संघे डाहै सच्ची झूरी। 5 और संयम, पबित्रता, घरे हर काम करनेआळी, भली और आपणें लाळेए डरा हेठै रहणें आळी हआ, ताकि परमेश्वर बचनें निंदा नां होए।

6 ईहैई जुआना मरधा बी कर समझाऊई, कि संयमीं होए। 7 सोभी गल्ला लै बणां आपणें आप भलै कामो नमूनअ, तेरै उपदेशा दी लोळी सफाई और गंभीरता हुई। 8 और तियां गल्ला लोळी एही खरी हुई कि कोई बी तेता लै बूरअ न बोली सके; ताकि बिरोधी हाम्हां लै कोई बी दोष नां पाई करै शरमिंदै होए।

9 दासा और सेऊआकरा समझाऊ, कि आपणें-आपणें मालकए अधीन रहा, और सोभी गल्ला करै डाहै तिन्नां खुश, और बापस जबाब निं काटणें। 10 चोरी चलाकी निं करनी, पर सोभी साबै बणणअ पूरै विश्वासी, कि तियां सोभी गल्ला दी म्हारे परमेश्वर उद्धारकर्ते उपदेशे शोभा दें।

11 किलहैकि परमेश्वरो अनुग्रह आसा प्रगट जुण सोभी मांहुं लै उद्दारा देंणेंओ कारण आसा। 12 और एसा गले दैआ सह हाम्हां लै चतैनगी कि, हामहें अभक्ती और सांसारिक अभिलाषा का मन फरेऊई करै एऊ जुगै धर्म भक्ती और संयमा संघे जिंदगी बताऊरे। 13 और तेसा धन्य आशा, अर्थात आपणें महान परमेश्वर प्रभू यीशू मसीहे महिमा प्रगट हणें न्हैळें रहै लागी। 14 जुणीं आपणीं जिंदगी हाम्हां लै दैनी कि हाम्हां हर प्रकारे अधर्मा का छड़ैऊरे, और शुध करी करै आप्पू लै एक एही ज्ञाती बणांए, जुण भलै कामां लै सर गर्म हो।

15 पूरे अधिकारा संघे समझाऊ इना गला और सखाऊंदअ रह, ताकि कोई ताह तुछ नां समझे।

### मसीही चाल-चलण

3 लोग का फरेऊ आद कि हाकिमे और अधिकारी अधीन रहे, तिन्नं आज्ञा मना, और हरेकी शोभलै कामां लै रहा त्यार। 2 कोही बी निं बदनाम करी, झगड़ालू निं हणअ, पर कोमल स्वभावे हणअ, और सोभी संघे रहणअ बड़ी नम्रता संघे। 3 किल्हैकि हाम्हें बी थियै पैहलै निर्बुधी, आज्ञा नांई मनणैआळै, और भ्रमा दी पळै दै, और रांगा-रांगे अभिलाषा और सुखबिलासे गुलामी दी पळै दै और बैरभाव और डाह दी बताऊआ तै आपणीं जिंदगी, और हाम्हें बी थियै घृणित, और एकी दुजै संघे बैर करनैआळै। 4 पर ज्ञाऊं म्हारै उद्धारकर्ता परमेश्वरे क्रिया मांछू लै तेऊए झूरी प्रगट हुई, 5 ता तेऊ किय म्हारअ उद्धार, और अह निं म्हारै धर्म कामां करै हुअ, पर तेऊए आपणीं दैया करी करै, नंऊए जल्में स्नान और पबित्र आत्मां करै नंऊअ बणाई करै हुअ। 6 जुंण तेऊ पबित्र परमेश्वरै म्हारै प्रभू यीशू मसीह करै हाम्हां लै बतेहअ तरैळअ। 7 जेता करै हाम्हें तेऊए अनुग्रहा करै धर्मो बणीं करै अनंत जिऊणें आशा डाही करै तेऊए बारिस हुरे।

8 अह गल आसा सही, और हूँ चाहा इहय कि तूह बोलै इना गला दृढता संघे कि जुंणीं परमेश्वरा दी भरोसअ किय, तियां रहे भलै कामां दी लागी और धैन डाहै कि ईयां गला आसा भली और मांछूए फाईदे 9 और मूर्खते बिबादा दी, बंशाबलीए, और बिरोध और तिन्नां झगळै जुंण व्यवस्थे बारै होए तिन्नां का रह बची, किल्हैकि तियां आसा निष्फल और बेकार। 10 कसा पाखंडी समझाऊ एकी बारी और तेऊ का रह जुदअ। 11 इहय समझी करै कि अह मांछू गअ भटकी, और आपणें आप दोषी बणाई करै करा अह पाप।

### व्यक्तिग नर्देश और आदर-सत्कार

12 जेभै हूँ ताह सेटा लै अरतिमास या तुखिकुसा भेजूं, ता मूँह सेटा लै करै नीकपुलिस तैणीं एछणें कोशिष, किल्हैकि मूँह काटणें हिंऊंदे धैळै तिधी। 13 जेनास व्यवस्थापक और अप्पूलोसा पजैळै कोशिष करी करै आजू, और हेरे कि किछी गले कार्मी निं लोळी हुई। 14 और म्हारै सोभ लोगा लागी हर जरूरता पूरै करनै लै हरेक राम्बळै कामां दी रहणअ सिखणअ ताकि निष्फल नां होए।

15 मेरै सोभी साथिओ तम्हां लै नमस्कार और राजी-बाजी और तिन्नां लै बी जुंण विश्वासे कारण हाम्हां लै झूरी डाहा, तिन्नां लै बी नमस्कार॥ तम्हां सोभी लै अनुग्रह हंदअ रहे॥ आमीन॥

# फिलेमोन

## भूमिका

फिलेमोन त एक प्रमुख मसीही, हुई सका कि सह त कुलुस्से कलीसियो सदस्य और उनेसिमुस नांऊं एकी सेबको सुआमी। अह सेबक त आपणें सुआमी सेटा का भागअ द, और तेखअ मिलअ सह कि किहअ करै पौलुसा का जुण तेऊ समें जेहला दी त बंद। पौलुसा करै बणअ उनेसिमुस एक मसीही विश्वासी। फिलेमोनें नाओं प्रेरित पौलुसे अह चिठी करा फिलेमोना का एही अरज कि सह करै आपणें सेऊआकारा संघे भी मेल-मलाप जुण पौलुसै तेऊ सेटा लै भी लाअ भेजी; तेऊओ निं सिधअ माफ कियै दै सेबका रूपै सुआगत करी पर तेऊओ सुआगत करै मसीही भाईए रूपै।

रूप-रेखा

भूमिका 1-3

फिलेमोने सराहणा 4-7

उनेसमुसा लै अरज 8-22

नचोळ 23-25

## आदर-सत्कार

1 पौलुसे तरफा का जुण मसीह प्रभू यीशुओ कैदी आसा और भाई तिमुतियुसे तरफा का म्हारै प्रिय सैहकर्मी फिलेमोन, 2 और बैहण अफफिआ, और म्हारै साथी जोधे अरखिप्पुस और फिलेमोने घरे कलीसिए नांओं चिठी॥

3 म्हारै पिता परमेश्वर और प्रभू यीशु मसीहा का रहे तम्हां सोभी अनुग्रह और शांती भेटदी लागी।

## फिलेमोनो प्रेम और विश्वास

4 हूँ तेरै तेऊ प्रेम और विश्वासे चरचा शृणी करै, जुण सोभी लोगा संघे और प्रभू यीशु दी आसा, 5 तेता लै करा हूँ सदा धन्यबाद और आपणीं प्राथणां दी करा हूँ ताह आद कि 6 तेरअ विश्वासा दी साझू हणअ लोळी थारी सारी भलाई और बछेण मसीहा लै असर करनं आळी हुई। 7 किल्हैकि हे भाई, मूँह भेटी तेरै प्यारा करै बडी भारी खुशी और शांती, इहय करै कि ताह करै हुए पबित्र लोगे मन हरै भरै।

## उनेसिमुसा लै अरज

8 तैबी आसा मूँह मसीह दी बडी हिम्मत कि जुण गल ठीक आसा, तेते आज्ञा दैऊं ताल्हे। 9 तैबी बी मूँह बुजुर्ग पौलुसा, जुण ऐबै मसीहा लै कैदी आसा, इहय लागा होर बी ठीक कि बडे प्रेम प्यारा संघे बिनती करूं। 10 हूँ करा आपणें बचै उनेसिमुसा लै जुण मेरी जेहला दी जल्मअ द आसा, ताखा अरज कि, 11 पैहलै ता निं सह तेरै किछू कामो थिय, पर ऐबै आसा सह तेरै और मेरे दूहीए कामो। 12 सहैई, अर्थात जुण मेरै हिको काल्जअ आसा, मणें भेजअ सह ताह सेटा लै बापस। 13 तेऊ चाहा त हूँ आप्पू सेटा डाहणअ कि

तेरी तरफा का आसा एसा कैदा दी सुसमाचारे बजह कैदी, और सह मेरी सेऊआ टैहल करे। 14 पर मणें निं तेरी इछा बगैर किछू बी करनअ ठीक समझअ कि तेरी अह कृपा निं लोळी कोई दबाबा करै हुई पर आनंदा करै होए।

15 किल्हैकि कै पतअ आसा कि सह ताखा थोळे धैळै तैणीं हुअ जुदअ कि ऐबै कबलअ ताह संघे रहे। 16 पर एभा पोही निं दास जिहअ रहणअ, पर दासा का बी उत्तम, अर्थात भाई बराबर रहे, जुण शरीरा का बी और खासकर प्रभू दी बी मेरअ प्यारअ होए। 17 जै तूह मूँबी सैहभागी समझा ता तै करै तूह तेऊ सोभी साबै ग्रहण, तूह समझै इहय कि तंरें किय हूँ ग्रहण। 18 और जै तेऊ तेरी किजै हानि होए की दी, या जै तेऊ तेरअ किजै लैण-दैण होए, ता तेता लिखै मेरै नांओं। 19 हूँ पौलुस आसा लागअ द आपणें हाथे लिखदअ कि हूँ भरूं तेता; और हाम्हां निं बोळणें जरुरत ई आथी कि मेरअ कर्ज जुण ताह आसा, सह आसा तुहैई। 20 हे मेरै भाई, खुशी लोळी मूँह तेरी तरफा का भेटी, मसीह दी दैरे मेरअ जिऊ हरअ भरअ करी।

21 हूँ लिखा ताल्हे तेरै आज्ञाकारी हणें भरोसै डाही करै, और एसा गल्लो बी आसा मुखा थोघ कि ताह करनअ तेता का बी बढीकरै। 22 और इहय बी कि मुल्है होथणें जैगा डाह त्यार, मूँह आसा एही आशा कि थारी प्राथणां करै हेरनअ हूँ तम्हां लै दैई॥

## आखरी आदर-सत्कार

23 इपफ्रास, जुण मसीह यीशु दी मूँह संघे कैदी आसा, 24 और मरकुस, अरिस्तर्खुस, दमास और लूका, जुण मेरै सैहकर्मी आसा, इनें बी आसा ताल्हे राजी-बाजी दैनीं दी।

25 म्हारै प्रभू यीशु मसीहो अनुग्रह लोळी थारी आत्मां दी हंदअ रहअ। आमीन॥

# इब्रानियों

## भूमिका

इब्रानिये नाऊंरें चिठी आसा ती लिखी दी विश्वासी भाईए एकी बड़ी मंडळी लै जुण लोगे बिरोधे कारण मसीही विश्वासा छडणें खातरें दी थियै। लिखणें आळअ करा तिन्नां आपणें विश्वासा दी रहणा लै उत्साहित, खासकर एसा गल्ला दर्शाऊंदी कि मसीह ई आसा परमेश्वरो वास्तविक और आखरी प्रकाशन। इहय करदी दैआ सह चीई सच्चाई दी जोर : (1) यीशूई आसा परमेश्वरो शाशवत पुत्र, जुणीं दुख चक्की-चक्की पिता परमेश्वरे सच्ची आज्ञाकारिता शिखळी। परमेश्वरे पुत्रे रूपे आसा यीशू पराणें नियमें कई भविष्यवक्ता, स्वर्गदूत और मूसा का श्रेष्ठ। (2) यीशू बणांअ परमेश्वरें अनंतकालो माहायाजक, सह आसा पराणें नियमें माहायाजका का श्रेष्ठ। (3) यीशू करै हेरें विश्वासी पाप, डअर और मौता का बचाऊई; और यीशू दैआ माहायाजके रूपे सच्चअ मोक्ष, जेतो यहूदी धर्म-बिधी और पशू बळी करै सिधअ अभ्यास ई भेटा त।

इस्राईली इतिहासे कई मशूर आदमीए विश्वासे उदाहरणां दैदी (अध्याय 11) करा लिखणें आळअ पळणें आळें का विश्वासा दी टेकी रहणें अरज। और बाहूरे धैऊआ दी करा सह आपणें पळणेंआळें का एही अरज कि आखरी तैणीं रहा विश्वासा दी टेकी और आपणीं आच्छी डाहा यीशू बाखा लाई, ता जुण दुख और कष्ट तिन्नां परेंदै एछा; तिन्ना करा धीर-धरी करै सैहन। अह चिठी हआ कई सलाह और चतैनी करै खतम।

### रूप-रेखा

भूमिका : मसीह, परमेश्वरो पूरअ प्रकाशन 1:1-3

मसीह स्वर्गदूता का बी श्रेष्ठ 1:4-2:18

मसीह मूसा और यहोशू का बी श्रेष्ठ 3:1-4:13

मसीहे याजकपदे श्रेष्ठता 4:14-7:28

मसीहे वाचे श्रेष्ठता 8:1-9:28

मसीहे बलीदाने श्रेष्ठता 10:1-39

विश्वासे श्रेष्ठता 11:1-12:29

आखरी उपदेश और नचोळ 13:1-25

## शोहरू करै, परमेश्वरो वचन

1 पराणें जमानें परमेश्वरें म्हारै बाब-दादें का थोळअ-थोळअ करी करै भांती-भांती करै भविष्याबगता बाती गल्ला करी करै, 2 इन्नां धैळें की एऊ आखरी जमानें हाम्हां संघें शोहरू बाती गल्ला, जुण तेऊ सारी गल्लो बारिस बणांअ और तेऊई करै आसा परमेश्वरें अह सारी सृष्टी रची दी। 3 सह आसा तेऊए महिमों प्रकाश और तेऊए तत्वे छाप, और सह सभाळा सोभी गल्ला आपणें सामर्थे बचना करै, सह आसा बेटअ द पाप धोई करै उछटी जैगा माहामहिम परमेश्वरें दैहणें। 4 और स्वर्गदूता का बी आसा तेतरअई बडअ, जेतरअ तेऊ तिन्नां का बडै औधें लै बारिस हई करै उत्तम नांअ पाअ।

## परमेश्वर-शोहरूए श्रेष्ठता

5 किल्हैकि परमेश्वरे स्वर्गदूता मांझें कसा लै बोलअ कधू इहय कि तूह आसा मेरअ शोहरू, तूह आसा आज्ञा मुखा पैदा हुअ द? या इहय कि हूँ हणअ तेऊओ बाब और सह हणअ मेरअ शोहरू? 6 और जांऊं परमेश्वर आपणें जेठें संसारा लै आणां, ता सह बोला तेभै इहय कि सोभै स्वर्गदूत टेका तेऊ सेटा माथअ। 7 और स्वर्गदूते बारै बोला सह इहय कि सह बणांआ आपणें दूता बागरी और आपणें सेऊआकारा बणांआ सह भकदी आग। 8 पर शोहरू का बोला सह इहय कि हे परमेश्वर तेरअ सिंहासण रहणअ जुगै-जुगै, और तेरी राईसिओ राजदंड आसा न्याय करनेओ राजदंड। 9 तंरें किय धर्मा लै प्रेम और अधर्मा लै बैर; तेहीता तेरें परमेश्वरें, तेरें साथी का बढकर, हर्षरूपी तेला करै तेरअ अभिषेक किय। 10 और इहय बी कि हे प्रभू शुरु दी पाई तंरें पृथुईए आथरी और तेरअ स्वर्ग आसा तेरें हाथे कारीगरी। 11 तियां ता हणें नाश, पर तूह रहणअ बणीं, और तियां सोभै हणें झिकळें जिहै पराणें। 12 और ताह चफळणें तियां चादरा जिहै, और तियां बधळणें झिकळें जिहै। पर तूह आसा सहैई और तेरी अमर निं कधि खतम हणि। 13 और स्वर्गदूता

मांझें कसा लै कधू बोलअ इहय कि तूह बेश मेरें दैहणें, जैभै तैणीं कि हूँ तेरें बैरी तेरें पैरा हेठे चऊकी नां बणांऊं? 14 तियां कै सोभ सेऊआ टैहली करदी आत्मां निं आथी? जसा परमेश्वरें उद्धार पाणें आळें सेऊआ चाकरी करदी भेजा?

## महान उध्दार

2 तैही लोळी कि हाम्हें तिन्नां गल्ला दी जुण हाम्हें शुंणीं दी आसा, मन लाए, इहय निं हआ कि बैहकी करै तिन्नां का दूर नाशे। 2 किल्हैकि जुण बचन स्वर्गदूता करै बोलअ त, जांऊं सह तिहअई हुअ, और हरेक अपराध और आज्ञा नां मनणें आळें भेटअ ठीक-ठीक तिहअई बदळअ जिहअ बोलअ थिय। 3 तै हाम्हें लोग ईहै बडै उद्दारा का निश्चित हई किहअ करै सका बेशी रही? जसरी चरचा पैहलै प्रभू यीशू की दी आसा, और तिन्नां शुंळणें आळें करै हुअ हाम्हां पाकअ भरोसअ। 4 और संघा परमेश्वरें बी आपणीं इछानुसार चिन्ह, अदभुत काम, और कई प्रकारे सामर्थी काम और पबित्रआत्मां बांडी करै दैनी एसा गले ग्वाही।

## म्हारअ उध्दार करणें आळअ

5 तेऊ निं सह एछणें आळअ जूग, जसरी चरचा ईयां हाम्हां का करा, स्वर्गदुते अधीन किय। 6 कोई आसा एही ग्वाही दैनी दी कि आदमीं किजै आसा, कि तूह तेऊओ खैल डाहे? या मांझेंओ शोहरू किजै आसा कि तूह तेऊए फिकर डाहा? 7 तंरें किय स्वर्गदूता का सह थोळअ ई कम, तंरें डाहअ तेऊ दी महिमा और आदरो मुकुट और तेऊलें दैनअ तेऊए हाथे कामां दी अधिकार। 8 तंरें की सोभै गल्ला तेऊए पैरा हेठै। तैहीता जै तेऊ सोभै गल्ला तेऊए अधीन की ता तै निं तेऊ किछे बी चकी डाहअ, जुण तेऊए अधीन नां हो, पर मैची तैणीं निं सोभै गल्ला तेऊए अधीन भाळदें। 9 पर हाम्हें भाळा तेऊ जुण स्वर्गदूता का थोळअ ई कम किय, मौत और दुखा भोगणें कारण हाम्हें

तेऊ महिमा और इज्जतीए मुकुटा बाहें दें, ताकि परमेश्वर अनुग्रहा करे सह हरेकी मांहुं लै मौतो सुआद चाखे। 10 किल्हैकि जसा लै सोभै गल्ला आसा, और जसा करै सोभै गल्ला आसा, तेऊ लागअ इहय ई ठीक कि खास्सै शोहरू पजेळणें तेऊ महिमा दी, ता तिन्नै मोक्षदैणेंआळें दुख भोगी करै सिध करे। 11 किल्हैकि पबित्र करनैआळअ और जुण पबित्र हुआ, सोभै आसा एकी मूळा का, तैहीता तेऊ तिन्नां लै भाई बोळणां लै बी नि कोई शरम एछदी। 12 पर सह बोला इहय कि, मूह शणाऊणअ तेरअ नांअ आपणें सोभी भाई का, और सभा बिचै गाणअ मूह तेरअ भजन। 13 और तेखअ बोला इहय की मूह डाहणअ ताह दी भरोसअ, और इहय बी कि भाळ, हूँ आसा तिन्नां शोहरू संघै जुण परमेश्वर मुल्है दैनै।

14 तैहीता जै शोहरू मासा और लोहूए भागी आसा, ता तै हूअ सह आपू बी तिन्नां संघै साझू, ताकि मौता करै तेऊ जसा शगती भेटी ती, अर्थात शैतानां नकाम्मअ करी सके। 15 और जेतरे मऊतै डरा संघै सारी जिन्दगी गुलामी दी तै शाचै दें, तिन्नां छडेउई लओ। 16 किल्हैकि सह नि स्वर्गदूता, पर सह ता अब्राहमं बंशा सभाळा। 17 एऊई कारणें लोळी त तेऊ कि सोभी गल्ला दी आपणें भाई जिहअ बणें, जिहअ करै सह तिन्नां गल्ला जुण परमेश्वरा का संबंध डाहा, एक दयालू और बिश्वासजोगी माहायाजक बणें, ताकि लोगे पाप दोषा लै प्रायश्चित करे। 18 किल्हैकि जै सह परिक्षा दी पळी करै दुख भोगे, ता तै सका सह तिन्नै मदद करी जसरी परिक्षा हुआ।

### यीशू आसा मूसा का श्रेष्ठ

3 तै, हे पबित्र भाईयो, तम्हें जुण स्वर्गीय बुलाहटे भागी आसा, तेऊ प्रेरित और माहायाजक प्रभू यीशू दी करा धैन, जसा हाम्हें मना। 2 जुण आपणें नियुक्त करनै आळें लै बिश्वासजोगी थिय, जिहअ मूसा बी तेऊए सहारै त। 3 किल्हैकि अह आसा मूसा का एतरअ बडअ महिमा करनै जोगी समझअ द, जिहअ कि घरा बणाणेंआळेंओ आदर घरा का जादअ हुआ। 4 किल्हैकि हरेकी घरो हुआ कोई नां कोई बणाणेंआळअ, पर जुणीं सभ किछ बणांअ, सह आसा परमेश्वर। 5 मूसा रहअ तेऊए सहारै घरे एकी सेऊआ चाकरी करेनैआळें जिहअ बिश्वासजोगी कि जिना गल्लो बर्णण हणें आळअ त, तेते ग्वाही दैई सके। 6 पर मसीह आसा पुत्रा जिहअ तेऊए घरो अधिकारी, और तेऊए घर आसा हाम्हें, जै हाम्हें हिम्मत डाही करै आपणीं आशा दी घमंड करी आखरी तैणीं वृढ हई करै स्थिर रहे।

### विश्वास नाई करनै प्रति चतैनगी

7 तै जिहअ पबित्रात्मा बोला कि, जै आज्ञा तम्हें तेऊओ शब्द शुणें, 8 ता तै नि आपणें मना काठै करा, जिहअ कि रोशै आळणें समें और परिक्षा पळणें समें जंगलै किय त। 9 जिधी थारै बाब दादै हूँ जाची करै परखअ और चाहळी साला तैणीं मेरें काम भाळें। 10 एऊई कारणें रुशअ हूँ तेऊ जमानें लोगा का और बोलअ कि इने मन रहा सदा भटकदै लागी। इने नि मेरअ रसतअ बछेणअ। 11 तैबै मरें रोशै कसम खाई कि ईयां नि मेरें बिश्वामें कधि पुजणें। 12 हे भाईयो, एसा गल्ला लै रहा चतैन कि थारअ मन नि लोळी इहय अविश्वासी हूअ जुण जिउंदै परमेश्वरा का दूर हटे। 13 पर जसा धैळी तैणीं आज्ञाकी धैळी बोला, हर धैळै रहा एकी दुजे समझाऊंदै लागी, इहय नि हुआ कि तम्हां मांझे कोई आदमी पापे छला दी नाशी करै काठअ होए। 14 किल्हैकि हाम्हें आसा मसीहे भागीदार, जै हाम्हें आपणें पैहलै भरोसै दी आखरी तैणीं मजबुती दी खळें नि रहे। 15 जिहअ बोला बी कि, जै तम्हें आज्ञा तेऊए आबाज शुणें, ता आपणअ मन नि काठअ करा, जिहअ कि गुस्सै आळणें बगती तम्हें किय त। 16 कुणीं लोगे आणीं शुणीं करै रोशै? कै तिन्नै सोभी नि आणीं रोशै जुण मुसा संघे मिसरा का छुटी आए तै? 17 और सह चाहळी बरशा तैणीं कसा का रहअ रुशी? सह कै तिन्नांई का नि रुशअ जुणीं पाप किय, और तिन्नै लाहसा रही जंगलै पळी? 18 और तेऊ कसा लै लई शपथ कि तम्हें नि मेरें बिश्वासा दी पुजणें, पर तियां पुजणें जुणीं आज्ञा मनीं?

19 हाम्हें सका एसा गल्ला भाळी कि, तिन्नै विश्वास नाई करनै बजह नि तियां तिधी पुजी सकै।

### परमेश्वर लोगा लै विश्राम

4 जै कि तेऊए बिश्वासा दी पुजणें प्रतिज्ञा आज्ञा तैणीं आसा, ता हाम्हां बी लागा डरनअ; इहय नि हुआ कि तम्हां मांझे कोए जन तिन्नां बाझी रहे। 2 किल्हैकि हाम्हां लै आसा तिन्नां जिहअ ई सुसमाचार शणाऊंअ द, पर शुणें दै बचनो नि तिन्नां किछै फाईदअ हुआ, किल्हैकि तिन्नां शुळणें आळें मनै नि बचन विश्वासा संघे बैठअ। 3 और हाम्हें जुणीं विश्वास किय, हाम्हें पुजणें तेऊ बिश्वासा दी; जिहअ तेऊ बोलअ द आसा कि मरें आसा आपणें क्रोधा लै शपथ लई दी कि तियां नि मेरें बिश्वासा दी पुजणें, हालांकि संसार उतपत्ति का पैहलै गूरे तै ईयां काम हई। 4 किल्हैकि सातुई धैळीए बार आसा तेऊ किधी इहय बोलअ द कि, परमेश्वर किय सातुए धैळै आपणें सोभै काम निपटाऊई करै बिश्वासा। 5 और एसा जैगा बोला भी इहय कि मेरें बिश्वासा दी नि तियां पुजणें? 6 ता, जै अह गल बाकी आसा, ता होर केतर आसा जसा तेऊए बिश्वासा दी पुजणअ, तिन्नां का ता शणाऊंअ अह समाचार पैहलै पर आज्ञा नां मनणें कारण नि तियां तेथ पुजै। 7 तै आसा तेऊ कुण खास धैळी डाही दी और एतरें धैळै बाद दाऊदे कताबा दी बोला सह तेता लै आज्ञाकी धैळी, जिहअ पैहलै बोलअ त कि जै आज्ञा तम्हें तेऊओ शब्द शुणें ता आपणअ मन नि काठअ करी। 8 जै यहोशू तिन्नां बिश्वासा दी पजेळी मुकदअ ता तै नि दुजी धैळीए चरचा हंदी ती। 9 ता एसा गल्ला लए समझी कि परमेश्वर लोगा लै आसा सबते बिश्वासा धैळी बाकी। 10 किल्हैकि जुणीं तेऊए बिश्वासा धैळी दी प्रवेश किय, तेऊ बी कीय परमेश्वरा जिहअ आपणें काम पूरै करी करै बिश्वासा। 11 ता तेऊ बिश्वासा दी प्रवेश करनै कोशिष करा, इहय नि हुआ कि कोई आदमी तिन्नां जिहअ आज्ञा नां मनी करै गिरे। 12 किल्हैकि परमेश्वरो बचन आसा जिउंदअ, प्रबल और एकी दोहरी बाखा तिछी तलबारा का बी चोखअ और जिव, आत्मां, गांठ-गांठ और गुदै-गुदै जुदै करी करै बार-बार छेदा सह और मने भावना और बचारा जाचा राम्बळै करै। 13 और सृष्टीए नि कोई बी चीज तेऊ का छुटी दी आथी, बरन जसा का हाम्हां काम आसा, तेऊए आच्छी सहनै आसा सोभै चिजा खुली और बेपरदअ।

### बडअ माहायाजक

14 तै, जै म्हारअ इहय बडअ माहायाजक आसा, जुण स्वर्गा का हांडी आअ, अर्थात परमेश्वरो पुत्र प्रभू यीशू, ता एछा, हाम्हां डाहणअ आपणअ कबूलनामअ मजबूती दी थम्ही। 15 किल्हैकि म्हारअ नि इहय माहायाजक आथी जुण हाम्हां संघे म्हारी कमजोरी दी दुखी नां होए, अह ता सोभी गल्ला लै हाम्हां जिहअ परखअ, पर तैबी बी निखळअ निष्पाप। 16 तैहीता चाला, हाम्हां नाशणअ अनुग्रहे सिंहासणा सेटा हिम्मत बाहिन करै ताकि हाम्हां लै दैआ होए और हाम्हें अनुग्रह पाए, जुण जरूरतीए समें म्हारी मदद करे।

5 किल्हैकि हरेक माहायाजक बणांआ मांहुं बिचा का ही, और मांहुं लै ही तिन्ना गल्ले बारै जुण परमेश्वरा संघे संबंध डाहा, हुआ चुनअ द कि भेंट और पाप बळी चढाऊरे। 2 और सह सका अज्ञान और भूलै भटकै संघे बडी नरमी संघे सका बभार करी, किल्हैकि सह आसा आपू बी निर्बलता दी घिरअ द। 3 और तैहीता तेऊ लोळी कि जिहअ लोगा लै, तै ई आपू लै बी पाप बळी चढाऊई करे। 4 अह आदरमानो पद नि कसा आपणें आप लंदअ, जेभै तैणीं कि हारुणा जिहअ परमेश्वर तरफा का चुनाव नि होए।

5 ठीक तैही प्रभू मसीहै बी माहायाजक बळणें बडाई नि आपणें आप लई, पर तेऊ लै दैनीं तेऊई, जुणीं तेऊका इहय बोलअ त कि तूह आसा मेरअ प्रिअ पुत्र, आज्ञा दैनअ मरें ताल्है जल्म। 6 सह दुजी जैगा बी बोला इहय कि तूह मलकिसिदिका जिहअ एसाई रिति आसा सदा लै याजक।

7 तेऊ आपणीं देही दी रहणें धैळै जोरै-जोरै पुकारी-पुकारी और आशू बहाऊई-बहाऊई तेऊका, जुण तेऊ मौता का बचाऊई सका त, प्राथणा और बिनती की और तेऊए भक्तिए कारण तेऊए शुणीं। 8 और शोहरू हई करै बी सिखी तेऊ दुख चकी-चकीकरै आज्ञा मनणीं। 9 और सिध बणीं करै बणअ

आपणें सोभी आज्ञा मनणेंआळें लें सदाकाले मोक्षा देंणेंओ कारण। 10 और तेऊ परमेश्वरे तरफा का मलिकिसिदिका जिहअ याजक हणेंओ पद भेटअ।

### विश्वासा का भटकणेंओ परिणाम

11 एते बारै आसा हाम्हां खासी गल्ला बोळणां लें, जेतो समझणअ बी मुशकळ आसा, तै कि तम्हां पळी एबै ज़ोरै शुंळणें आदत। 12 बगते साबै ता लोळी तै तम्हें गुरु हुऐ, तैबी बी कै अह ज़रूरी आसा कि कोई तम्हां लें परमेश्वरे आदि शिक्षा दबारी सखाऊऐ? और तम्हें हुऐ ईहै कि तम्हां लोळी रोटीए बदळें मैची बी दुध ई। 13 किल्हैकि दुधा झुटणें आळें शोहरु निं धर्म बचने बच्छेण हंदी, किल्हैकि सह ता बच्चअ आसा! 14 पर सैणें लें आसा रोटी, जसरी ज्ञान इंद्रि अभ्यासा करदी-करदी, गई दा भलै और बूरै दी भेद समझणा लें पाकी हई॥

6 तैहीता बोला हूँ एछा, मसीहे शुरूए शिक्षा छाडी करै, हाम्हां बढणअ सिधता बाखा लें, और मूणें दै कामां का मन फरेऊणें और परमेश्वरा का विश्वास करनैं बाखा। 2 बपतिस्मैं और हाथा डाहणें और मरी करै जिऊंदै हणें, और आखरी न्याये शिक्षा रूपी आथरी निं हाम्हां भी पाणी। 3 जै परमेश्वर चाहे ता तै करनअ हाम्हां इहयई। 4 किल्हैकि जुंणी एकी बारी ज्योती पाई, जुंण स्वर्गीय बरदानें सुआद चाखी आसा मुकै दै, और पबित्र आत्में भागी हई मुकै दै आसा, 5 और परमेश्वर उत्तम बचन और एछणें आळें जुगे सामर्थो सुआद चाखी आसा मुकै दै, 6 जै तियां भटके, ता तियां मना फरेऊणां लें भी नंऊणें बणाणें आसा अनहोणें, किल्हैकि तियां परमेश्वरे शोहरु आप्पू लें क्रूसा दी ता चढाऊआ और प्रगटै दी ला तेऊदी कळक। 7 किल्हैकि जुंण भूमी बरसातीए पाणी, जुंण भी-भी तिन्नां दी पळा, तेता झुटी-झुटी करै लोणा लें बाहा-बूऊआ, तिन्नें कामो शाग-पाच पजेरा और सह पा परमेश्वरा का आशीष। 8 पर जै सह भूमीं कांडै-रिडै और बाण-भेखळ पजेरा, ता तै आसा सह नकाम्मीं और श्रापित हणां लें, और तेतो अंत आसा दहणअ ई।

9 हे प्रियो, इन्नां गल्ला एही ता बोला हाम्हें, पर तैबी बी डाहा हाम्हें थारै बारै एता का बढकर उदारबादी गल्लो भरोसअ। 10 किल्हैकि परमेश्वर निं अन्यायी आथी कि थारै कामां और थारै प्रेम प्यारा बिसरे, जुंण तम्हें तेऊए नांआ लें एसा रीती रैऊए और पबित्र लोणे सेऊआ की और करदैं बी आसा लागै दै। 11 पर हाम्हें चाहा होर बी कि तम्हां मांझे हरेक आदमीं आखरी तैणी पूरी आशा लें एही कोशिश रहा करदैं लागी। 12 ताकि तम्हें आळसी नां होए, पर तिनों पिछअ करा जुंण विश्वास और धीरजा करै प्रतिज्ञे बारिस हआ।

### परमेश्वरे अटळ प्रतिज्ञा

13 और परमेश्वरै इबराहिमा लें प्रतिज्ञा करदी बगती, शपथ खाणां लें आप्पू का बडअ निं कोहै त, ता परमेश्वरै आपणीं ही शपथ खाई करै बोलअ कि 14 मूँह देंणीं सच्ची ताल्हे आशीष और तेरी पोस्ती रहणअ मूँह बढाऊंदै लागी। 15 और एसाई रिती की तेऊ धीर धरी करै प्रतिज्ञा की दी गल्ला प्राप्त। 16 मांळू ता खा आप्पू का कसा बडेए कसम, और तिन्नें हरेकी बिबादो फँसलअ हआ कसमा करै पाळअ। 17 तैहीता परमेश्वरै बी प्रतिज्ञे बारिसा लें जांऊं होर बी साफ प्रगट करनअ चाहअ कि तेऊओ मन निं बदळी सकदअ ता शपथ आणीं बिचै। 18 ताकि दूर्ई बे-बदळ गल्ला करै, जेता लें परमेश्वर झूठअ बणाणअ अनहोणअ आसा, म्हारी मजबूती संघें हिम्मत बणीं रहे, कि जुंण परमेश्वरा सेटा लें शरण लई करै तै आसा आरे दै कि जुंण सह आशा तेऊ समैं डाही दी आसा, तेता प्राप्त करी सके। 19 सह आशा आसा म्हारै प्राणां लें इहय लंगर जुंण स्थिर और मजबूत आसा, और जुंण परदैं भितरी पुजा। 20 जिधी प्रभू यीशू मलिकिसिदिका जिहअ सदा लें माहायाजक बणीं करै हाम्हां लें एक अगुए रूपे प्रवेश आसा हुअ द।

### मलिकिसिदक याजक

7 मलिकिसिदक शालेमो राजअ और परमप्रधान परमेश्वरो याजक रहा सदा याजक बणीं, जधू अबराहिम बूरै राजै मारी करै फिरदअ त लागअ द, ता एऊई दैनीं तेऊ संघें भेंट करी करै आशीष। 2 एऊई लें दैनअ अब्राहमैं हर गल्लो दसुअ हेस्सअ, अह आसा पैहलै आपणें नांऊंए अर्थे साबै

धर्मो राजअ। 3 जसरअ नां पिता, नां राजअ, ना कोई बंशाबली आथी, जसरी नां धैळीए शुरुआत आथी और नां जिन्दगीओ अंत, पर परमेश्वरे शोहरुओ स्वरूप बणअं।

4 एबै एसा गल्ला लें दैआ धैन कि अह किहअ महान थिय, जसा लें कुलपति अब्राहमैं शोभली का शोभली धन दौलतो दशवांश दैनअ? 5 लेवीए बंशा का जुंण याजको पद पा, तिन्नां आसा आज्ञा भेटी दी कि लोणा का अर्थात भाई का चाहे इबराहमैं देहा ई का किल्है निं जल्मैं होए, हां तिन्नां का बी लणअ व्यवस्थे साबै दशवांश। 6 पर एऊ ता जुंण अब्राहमे बंशा का बी नाई थियें, तिन्नां का बी ल्अ दशवांश और जसा लें प्रतिज्ञा भेटी ती तिन्नां लें दैनीं आशीष। 7 और एता दी निं कोई शक आथी कि होछअ पा बडै का आशीष। 8 और इधी ता ल्आ मरणहार मांळू दसुअ हेस्सअ, पर तिधी बी ल्आ सह जसरी ग्वाही हाम्हें दैआ कि सह आसा जिऊंदअ। 9 तै हाम्हें सका इहय बी बोली कि, लेवी बी जुंण दसुअ हेस्सअ ल्आ, तेऊ बी दैनअ अब्राहमा करै दसुअ हेस्सअ। 10 किल्हैकि जधू मलिकिसिदकै तेऊए बाबा संघें भेंट की, तेऊ समैं त सह आपणें बाबे देही दी।

### मलिकिसिदका जिहअ दुजअ याजक

11 तै, जै लेवीए याजक पदा करै सिधी हई सका, (जसरै सहारै लोणा लें व्यवस्था भेटी) ता तै किजै ज़रूरत थी कि दुजअ याजक मलिकिसिदका जिहअ खळअ होए, और हारुणा जिहअ बोळणा लें नां होए? 12 किल्हैकि जै याजको पद बदळा, तै आसा व्यवस्था बदळणीं बी ज़रूरी। 13 किल्हैकि जसरै बारै इन्नां गल्ला बोला कि अह आसा दुजै गोत्रो, जसा मांझे कुंणीं बेदीए सेऊआ नाई की, 14 ता अह आसा प्रगट कि म्हारअ प्रभू आसा यहूदे गोत्रा का जल्मअ द, और एऊ गोत्रे बारै निं मुसा याजक पदे बारै कोई चरचा की।

15 और जांऊं मलिकिसिदका जिहअ एक होर याजक त जल्मणें आळअ, 16 जुंण शारीरिक कानुने व्यवस्थे साबै निं आथी, पर अबिनाशी जिदगीए सामर्थे साबै नियुक्त आसा किय द, ता अह करा म्हारै दावे होर बी स्पष्ट करी करै प्रगट। 17 किल्हैकि तेऊए बारै आसा अह ग्वाही दैनीं दी कि तूह आसा मलिकिसिदका जिहअ जुगै-जुगै याजक। 18 तैहीता पैहली आज्ञा हुई कमजोर और निष्फल छेए बजहा लोप हुई। 19 (तै कि व्यवस्था निं कोई गले सिधी की) और तेते जैगा दी डाही एही उत्तम आशा कि जसा करै हाम्हें परमेश्वरा नेळ सका नाशी। 20 और मसीहे नियुक्ती निं बिंणा शपथ खाई हुई। 21 (किल्हैकि तियां ता बणाणें बिंणा शपथ खाई याजक, पर एऊए नियुक्ती हुई शपथ खाई करै तेऊए तरफा का जुंणीं एऊए बारै इहय बोलअ कि, प्रभू खाई शपथ और सह निं तेता का भी पछताऊणअ कि तूह आसा जुगै-जुगै याजक)। 22 ता यीशू हुअ एक उत्तम बाहीदेओ भरोसअ।

23 तियां ता आरे कई याजक बणदी, एतो कारण त इहय कि मौत निं तिन्नां देंदी ती रहणें, 24 पर अह रहणअ जुगै-जुगै, एता करै ई आसा अह याजक पद अटळ। 25 तैहीता जुंण तेऊ करै परमेश्वरा सेटा एछा, सह सका तिंनो पूरअ उद्धार करी, किल्हैकि सह आसा तिन्नां लें बिनती करना लें सर्वदा जिऊंदअ।

26 और हाम्हां लें बी लोळी त इहय ई माहायाजक, जुंण पबित्र, निष्कपट, निर्मल, पापी का जुदअ और स्वर्गा का बी उछटअ किय द होए, 27 और तेऊ निं तिन्नां माहायाजका जेही ज़रूरत आथी कि हर धैळै आपणें पापा लें बळीदान डिलण करे, किल्हैकि तेऊ नपटाऊई सारी गल्ला आपणें आप बलिदान करी करै एकी बारी। 28 किल्हैकि व्यवस्था करा निर्बल मांळू माहायाजक नियुक्त, पर सह शपथ, जुंण व्यवस्था का बाद खाई, सह करा तेऊ पुत्रा निउक्त जुंण जुगा-जुगा लें सिध आसा किय द।

### यीशू आसा म्हारअ माहायाजक

8 एबै जुंण गल्ला हाम्हें बोलदैं आसा लागै दै, तिन्नां मांझे आसा सोभी का महामहिमन परमेश्वरे दैहणें आसा बेठअ द। 2 और पबित्र स्थान और तेते ताम्बूओ सेबक हुअ, जुंण कुंणीं मांळू निं पर परमेश्वरै आसा खळअ किय द। 3 किल्हैकि हरेक माहायाजका बणांआ भेंट और बलिदान चढाऊणें तैणीं, तैहीता अह ज़रूरी आसा कि एऊ का बी लोळी किजै चढाऊणा लें हुअ।

4 और जै पृथुई दी हंदअ ता तै नि कधि माहायाजक हंदअ, तै की व्यवस्थे साबै भंटा चढाऊंदै ता आसा, 5 जुंण स्वर्गे चिजे प्रतिरूप और प्रतिबिंबे सेऊआ करा, जिहअ जधू मुसा ताम्बू बणाणें आळअ त, तेऊलै दैनीं अह चतैनीं कि भाळै, जुंण नमूनअ ताखा मंरें धारा खोजअ त, तेऊई साबै बणाणें सोभै गल्ला। 6 पर तेऊ भेटी तिन्नै सेबकाई का बी बढकर, किल्हैकि सह बणअ होर बी उत्तम वाहीदेओ बिचूआई करनै आळअ जुंण उत्तम प्रतिजे साबै आसा बाही दी।

7 किल्हैकि जै तियां पैहली वाचा निर्दोष हंदी, ता तै नि दुजी लै मोकअ भेटणअ त। 8 पर सह बोला तिन्नां लै दोष लाई करै कि "प्रभू बोला इहय कि भाळा, कि तियां धैळै एछणें कि मूँह करनअ इस्त्राएले और यहूदे घरानें संघे नंऊअ बाहीदअ।

9 अह नि तिन्नां बाहीदे जेही हर्णी जुंण मंरें इने बाबदादैं संघे तधू किय त जधू मंरें तियां हाथे ढाकी करै मिसर देशा का छडैऊई आणें तै, किल्हैकि तियां नि मेरै बाहीदे दी बर्णी रहै और मंरें नि तिन्नै सुधी लई। प्रभू बोला इहयई।

10 तेखअ बोला प्रभू इहय कि जुंण बाईदअ मूँह तिन्नां धैळै बाद इस्त्राएले घरानें संघे करनअ, सह आसा इहय कि मूँह पाणें आपणें व्यवस्थे कानून तिन्नै मनै, और तियां लिखणें मूँह तिन्नै दिलै, और हूँ हणअ तिनों परमेश्वर और तियां हणें मेरै लोग।

11 और तेभै नि कोही आपणें देशा आळै लै और आपणें भाई लै एही शिक्षा दैणीं कि तूह बछेण प्रभू, किल्हैकि होछै का पोही बडै तैणीं हेरनअ सोभी तूह जाणीं।

12 किल्हैकि हूँ आसा तिन्नै अधमें बारै दैआबान और तिन्नै पाप नि हूँ भी आद करदअ। 13 नंऊअ बाहीदअ दैई करै किय प्रभू आप्णै पैहलअ बाहीदअ पराणअ और जुंण चिज पराणीं और खई आळी हआ, तेसरअ खतम हणअ आसा जरूरी।

### पार्थिव ताम्बू दी सेऊआ

9 इहय करै थियै तेऊ पैहलै बाहीदे दी बी सेऊआ करनै नियम, और पबित्र शास्त्र थिय इहय जुंण संसारो त। 2 अर्थात एक ताम्बू त बणांअ द, पैहलै ताम्बू दी थिय सदीअ और मेज और भंटा चढाऊई दी रोटी, और तेऊ लै बोला तै पबित्र स्थान। 3 और दुजै परदैं पिछू त सह ताम्बू, जसा लै अति पबित्रस्थान बोला तै। 4 और तेथ हआ ती डाही दी सुनै धूपदानि, और चऊ तरफा का महळअ द बाहीदेओ सदूक और तेथ त मन्ने करै भरअ द एक सुनैओ डिबकू और हारुणें शोटी जेथ फूल और फळ बी तै आरै दै और तियां बाहीदे तगती। 5 और तेता परदैं तै तेजोमय करुब, जुंण प्रायाश्चिते ढकणा दी तै चैळै दै, इना गले एक-एक करै खोजणेंओ बगत नि एभै आथी।

6 जांऊं ईयां गल्ला सोभ हई गई ता पैहलै ताम्बू भितरी करा तै याजक हर बगत नाशी करै सेऊआ चाकरीओ काम काज। 7 पर दुजै दी नाशा त माहायाजक सिधअ साला दी एकी बारी, और बिणा लोहू लई नाई त सह नाशदअ, जेता सह आप्णै लै और लोगे भूल चुका लै चढाऊआ त। 8 एता लै रहैऊआ पबित्रआत्मा इहय ई कि, जेभै तैणीं पैहलअ ताम्बू खळअ त, तेभै तैणीं नि पबित्रस्थानों मार्ग प्रगत हुअ त। 9 और अह ताम्बू आसा आजके बगता लै एक दृष्टांत कि जसा दी इहै भेंट और बलिदान चढाऊआ तै, जसा करै आराधना करनै आळैए बिबेक सिध नि हई सकदैं तै। 10 किल्हैकि तियां थियै सिधे खाणें पिणें चिजा और भांती-भांतीए स्नान बिधीए साबै आसा शरीरा लै नियम, जुंण सुधारे समें तैणीं लै बणाणें दै थियै।

### मसीहे लोहूए सामर्थ

11 पर जांऊं मसीह एछणेंआळी सोभी शोभली-शोभली चिजो माहायाजक बर्णी आअ, ता तेऊ होर बी बडै सिध ताम्बू दी नाशी करै जुंण हाथा करै नि आथी बणांअ द, अर्थात जुंण सृष्टिओ नि आथी, 12 और गाभू-छेल्हूए लोहू करै नि, पर आपणें ई लोहू करै एकी बारी पबित्र स्थाना लै नाशी करै किय अनंत छुटकारअ प्राप्त। 13 किल्हैकि जै गाभू छेल्हूओ लोहू और कलरो छार छळिकी करै देही शुध करी पबित्र करा, 14 तै मसीह जुंणीं आप्णै सनातन

आत्मां करै परमेश्वर संहनै आपणअ निर्दोष लोहू चढाऊआ, थारै बिबेका मूणें दै कामां का किल्है नि सह पबित्र लोहू शुध करी सकदअ। ताकि तम्हें जिऊंदै परमेश्वर सेऊआ करी सके।

15 और एतेई तैणीं आसा सह नंऊअ बाहीदेओ मध्यस्त, ताकि तेसा मौता करै, जुंण पैहलै बाहीदे समें अपराधा का छुटकारै पाणें तैणीं हूई, तिन्नां शादैं दै लोगा अनंत मिरास भेटी सके। 16 किल्हैकि जिधी बाहीदअ आसा, तिधी आसा बाहीदैं करनैआळै मौता समझणअ बी जरूरी। 17 किल्हैकि इहय बाहीदअ हआ मरी करै ई पूरअ, और जेभै तैणीं बाहीदैं करनै आळअ जिऊंदअ आसा, तेभै तैणीं नि सह बाहीदअ किछू कामों हंदअ। 18 तैहीता पैहली बाचा बी नि बिंणा लोहू करै बाही दी। 19 किल्हैकि जांऊं मुसा सोभी लोगा का व्यवस्था कानून सोभी गल्ला समझाऊई मुकअ ता तेऊ मिम्मू छेल्हूओ लोहू लई करै, पाणीं और लाल ऊन, जुफा संघे तेसा कताबा दी और सोभी लोगा दी छळिकअ। 20 और तिन्नां लै इहय बोलअ कि अह आसा तेऊ बाहीदेओ लोहू जसरी आज्ञा परमेश्वरें तम्हां लै आसा दैनीं दी। 21 और एसाई रिती तेऊ ताम्बू और सेऊआ करनै आळै सारै समाना दी बी छळिकअ। 22 और व्यवस्थे साबै करा तै सोभी चिजा लोहू करै शुध और बिणां लोहू बहाए नि पाप क्षमा हंदी।

### मसीहे बळीदाना करै पाप-क्षमा

23 तैहीता जरूरी आसा कि स्वर्गे चिजा बी एऊई साबै शुध होए, पर स्वर्गे चिजा लै लोळी एता का बी बडअ बलिदान जुंण पबित्र होए। 24 किल्हैकि मसीहै बी तेऊ हाथा करै बणाणें दै ताम्बू जुंण सन्नै पबित्रस्थानों एक नमूनअ आसा, तेथ नि प्रवेश किय, पर स्वर्गे किय प्रवेश ताकि हाम्हां लै सह परमेश्वर संहनै धेछिए। 25 इहय नि कि सह भी-भी चढाए, जिहअ माहायाजक हर साल दुजैओ लोहू लई पबित्रस्थाना दी नाशा। 26 नाई ता संसारे उत्पत्ती का ओही लागणअ त तेऊ कई बारी दुख भोगणअ, पर एभै एऊ जुगे आखरी बगती हुअ सह प्रगत ताकि आपणअ बलिदान दैई करै सह सोभीओ पाप दूर करी सके। 27 जिहअ मांळू लै एकी बारी मरनअ और न्याय हणअ नियुक्त आसा, 28 तिहअई हुअ मसीह बी बहुतेरे पापा चकणा लै बलिदान और जुंण लोग तेऊ न्हैळा भाळा, तिन्नै मोक्षा लै धेछणअ सह दुजी बारी बीणां कोइ पापा दी।

### सिध्द बलिदान

10 किल्हैकि व्यवस्था आसा एछणें आळी शोभली गल्लो प्रतिबिंब, असली रूप नि आथी, तैहीता तिन्नै एकी प्रकारे बलिदाना करै, जुंण हर साल बिणां कोई भूल चूक करी करै चढाऊआ, सेटा एछणें आळै नि कधि सिध करी सकदी। 2 नाई ता तिनों चढाऊणअ सका त कधू बंद हई? तैहीता सेऊआ करनै आळै एकी बारी शुध हआ ता तिनों बिबेक नि तिन्नां भी-भी पापी बणांदअ त। 3 पर तिन्नां करै हर साल फरेऊआ त पापे आद। 4 किल्हैकि अह गल आसा अनहोणीं कि मिम्मू छेलुओ खून पाप दूर करी सके।

5 एऊई कारणें बोला सह संसारा दी एछणें बगती कि बलिदान और भेंट नि तंरें चाही, पर मुल्है की एक देह तैर,

6 होमबळी और मेल बळी का नि तूह खुश हुअ।

7 तैबै मंरें भाळअ, हेर, हूँ गअ एछी, (पबित्र शास्त्रा दी आसा मेरै बारै लिखअ द) ताकि हे परमेश्वर तेरी इछा पूरी करुं। 8 उपर ता बोला सह इहय कि तंरें नां होमबळी और भेंट नां बलिदान और पापबळी चाही, और नां तिन्नां का खुश हुअ, हालाकि इन्नां बळीदाना चढाऊआ तै व्यवस्थे साबै, 9 तेखअ बोला इहय कि हेर हूँ गअ एछी, ताकि तेरी इछा पूरी करी सकूँ, इहय करै चका सह पैहलै ताकि दुजै नियुक्त करी सके। 10 तेसाई इछा करै आसा हाम्हें मसीहे देही एकी बारी बलिदान करनै करै पबित्र हुए दै।

11 और हरेक याजक ता करा खट्ळुई करै हर धैळै सेऊआ, और एकी प्रकारे बलिदान करा भी-भी जुंण पाप कधि दूर नि करी सकदैं। 12 पर अह ता पापे बदळै एकी बारी एकै बळीदान करी करै परमेश्वरें दैहणें बेठअ। 13 और तेभाई ओही आसा न्हैळअ लागअ द कि तेऊए बैरी तेऊए पैरा हेठै चऊकी



बणों। 14 किल्हैकि तेऊ एकी चढाबै करै किए तियां सिध जुंण तेऊ करै पबित्र हआ। 15 और पबित्रात्मां बी दैआ हाम्हां लै एसा ग्वाही, किल्हैकि तेऊ बोलअ त पैहलै ई कि

16 प्रभू बोला इहय कि, जुंण बाहीदअ मूँह तिन्नां धैळै बाद तिन्नां संघे करनअ सह आसा इहय कि मूँह लिखणी आपणीं व्यवस्था तिन्नें दिला दी तिन्नें सोचा दी पाई करै। 17 तेखअ बोला इहय कि मूँह निं तिन्नें पाप और अधर्म काम कधि आद करनै।

18 और जै तिन्नें पाप क्षमा हई आसा गई दी ता ऐबै निं पाप बलिदान रहअ।

### परमेश्वरा नेळ नाशा

19 तै हे भाईयो, जै कि हाम्हां प्रभू यीशूए लोहू करै तेऊ नंऊरें और जिऊंदै रसतै पबित्र जैगा दी नाशणें हिम्मत हई आसा गई दी, 20 जुंण तेऊ परदै अर्थात्, शरीरा दी एछी करै हाम्हां लै अभिषेक किय। 21 और तैहीता म्हारअ इहय बडअ माहायाजक आसा, जुंण परमेश्वरे घरो अधिकारी आसा। 22 तै एछा, हाम्हां नाशणअ परमेश्वरा नेळ सचै मन, और पूरै विश्वासा संघे और बिबेको दोष दूर करना लै दिला दी लोहू छळिकी करै, और देही निंबळै पाणीं करै धोई। 23 और आपणीं आशा दी डाहणअ अंगीकार मजबुती दी थमीं; किल्हैकि जुंणीं प्रतिज्ञा आसा की दी, सह आसा सच्चअ। 24 और एकी दुजेए करनीं चिंता प्रेम और भलै कामां दी उकसाऊणें। 25 और एक दुजै निं कठा हणअ छाडी, जिहअ कि कईए आदत आसा, पर एकी दुजै रहा समझाऊंदै लागी; और जिहअ-जिहअ तेऊ धैळै तम्हें नेळ एछदअ भाळै, तिहअ-तिहअ करा होर बी इहय करी।

26 किल्हैकि सच्चाई बछैळणें का बाद बी जै हाम्हें जाणीं भुझी करै पाप करे, तै निं पापा लै होर कोई बलिदान आथी। 27 हाँ, दंडा लै एक भयानक धैळी और आगी जैदरे जळण आसा बाकी, जसा बिरोधी भस्म करनै। 28 जैकि मूसे व्यवस्था मनणें आळै पा, दूई या चिई ग्वाही करै बिणां कोई दैया किए मारी। 29 तै तम्हें सोचा कि सह केतरै जादे होर बी भारी दंडा जोगी हणअ, जुंणीं परमेश्वरे शोहरूए पैरा हेतै जैटणअ, और बाहीदे लोहू, जेता करै सह पबित्र किय त, तेऊ मनअ सह अपबित्र और अनुग्रहे आत्मां किय अपमान।

30 किल्हैकि हाम्हें जाणा तेऊ, जुंणीं इहय बोलअ कि बदळअ लगनअ आसा मेरअ काम, मूँह लगनअ आप्पै बदळअ, और तेखअ इहय कि प्रभू करनअ आपणें लोगो न्याय। 31 जिऊंदै परमेश्वरे हाथे पळणअ आसा भयानक गल।

32 पर तिन्नां पैहलै धैळै करा आद जेथ तम्हें ज्योती पाई करै दुखे बडै-बडै झमेलै दी बी रहै स्थिर। 33 किछ ता ईहै बी कि तम्हें निंदा और क्लेश सेंहदी बणें लोगा लै तमासै, और किछ ईहै कि तम्हें हुऐ तिन्नें साझू, जसरी दुर्दशा नाशदी रही। 34 किल्हैकि तम्हें हुऐ कैदीए दुखा दी बी दुखी, और आपणीं सम्पती बी दैनीं खुशी-खुशी खरचणें, इहय समझीकरै कि तम्हां का आसा एक होर सदा रहणेंआळी सम्पती। 35 आपणीं हिम्मत निं छाडा, किल्हैकि तेतो प्रतिफल आसा बडअ। 36 किल्हैकि तम्हां आसा धीर धरनअ जरूरी, ताकि परमेश्वरे इछा पूरी करी करै तम्हें प्रतिज्ञा फल पाई सके।

37 किल्हैकि ऐबै रहअ थोळअ ई बगत, कि एछणेंआळअ एछणअ, और तेऊ निं ऐबै देर करनीं।

38 और मेरअ धर्मी आदमीं रहणअ विश्वासा करै जिऊंदअ, जै सह पिछू हटे ता मेरअ मन निं तेऊका खुश हणअ। 39 पर हाम्हें निं हटणेंआळै आथी, कि नाश होए पर हाम्हें आसा विश्वास करनैआळै ताकि प्राण बचाऊई सके।

### विश्वासे उदाहरण

**11** ऐबै विश्वास आसा आशा की दी चिजो निश्चय और नाई भाळी दी चिजो प्रमाण। 2 किल्हैकि एतेई बारै आसा बुजुगें बी ठीक ग्वाही दैनीं दी। 3 विश्वासा करै ई सका हाम्हां का थोघ लागी कि, सारी सृष्टीए रचना आसा हूई दी परमेश्वरे बचना करै। इहय निं कि जुंण बी हाम्हें भाळा, सह आसा तिन्नां भाळी दी चिजो करै बणअ द।

4 विश्वासा करै ही चढाऊअ हाबिलै आपणें भाई कैना का उत्तम बलिदान; और तेताई करै तेऊए धर्मी हणें ग्वाही बी दैनीं, किल्हैकि परमेश्वरें दैनीं तेऊए भंटे बारै ग्वाही, और तेऊ करै सह मरी करै बी करा मैची तैणीं बी गल्ला।

5 विश्वासा करै ई चकअ हणोक उड़ै कि कधि मौत नां भाळे, और तेऊओ निं पतअ बी लागअ, किल्हैकि सह चकअ परमेश्वरें उड़ै। तेऊए उड़ै चकणें का पैहलै दैनीं ती एही ग्वाही कि तेऊ किय त परमेश्वर खुश। 6 और विश्वासा बिणहीं परमेश्वर खुश करनअ आसा नाई हणें आळी गल, किल्हैकि परमेश्वरा सेटा एछणें आळै लोळी विश्वास कीय कि सह आसा; और परमेश्वर दैआ तेऊ लोळणें आळै लै प्रतिफल। 7 विश्वासा करै ई नुहै तिन्नां गले बारै जुंण तेऊ जमानें धेछिआ ती, चलैनगी पाई करै बडी भगती संघे आपणें परिवारे बचाऊणें लै जहाज बणांअ और तेऊ करै लागा संसारा लै दोष, और सह हुअ धर्मां बारिस, जुंण विश्वासा करै हआ।

8 विश्वासा करै जदू अब्राहम शादअ, ता सह आज्ञा मनी करै एही जैगा लै निखळअ जुंण तेऊ भेटणीं ती पर तेऊ का निं इहय थोघ बी त आथी की सह चालअ द किधा लै आसा, पर तैबी बी लागअ सह हांडदअ। 9 विश्वासा करी करै ई सह प्रतिज्ञा किए दै देशें, परदेसी हई करै लागअ रहदअ इसहाक, याकुब संघी जुंण-जुंण तेऊ संघे तेऊए प्रतिज्ञे बारिस तै, तियां लागै ताम्बू दी रहदै। 10 किल्हैकि सह त तेऊ पाकी आथरी आळै नगरा न्हैळअ भाळअ लागअ द, जसा रचणें और बणांणेंआळअ परमेश्वर आसा। 11 विश्वासा करै ई सारा आप्पू बुढळी हणें का बाद बी पाई गर्भधारण करनै शगती। किल्हैकि तेसा बी समझअ प्रतिज्ञा करनै आळअ सच्चअ। 12 इहय करै एकी ई आदमीं का जुंण मूअ द त, सरगे तारै और समुंदरे रेतै बराबर बंश बणांअ जसा गिणीं निं सकदै।

13 इयां सोभै मूँरें विश्वासे दशा दी, और तिन्नें प्रतिज्ञा की दी चिजो निं पाई, पर तिन्नां दुरा का ही भाळी करै हुऐ तियां खुश और अह गल मनीं कि हाम्हें आसा पृथुई दी परदेसी और बाहरी। 14 जुंण एही गल्ला करा, तियां करा प्रगट कि तिन्नां आसा देशे लोळ-तोप। 15 और जसा देशा का तियां निखळै तै, जै तियां तेऊई देशे बारै धैन डाहंदै ता तिन्नां का त बापस फिरनेओ मोकअ। 16 पर तियां तै एकी उत्तम अर्थात् स्वर्गीअ देशे अभिलाषी, तैहीता परमेश्वर तिनां परमेश्वर कहलाणें दी निं शरमाऊंदअ। इहय करै परमेश्वरें आसा तिन्नां लै एक नगर तैयार किय द।

17 विश्वासा करै ही अब्राहम जधू परखअ त, आपणें एकलौतै शोहरूओ बळीदान चढाऊअ, और जुंणीं प्रतिज्ञा की सह मनअ सच्चअ। 18 और जसा का इहय बोलअ त कि इसहाक हणअ तेरअ बंश, पर सह त आपणें तेऊ एकलौतै शोहरूओ बळीदान करना लै त्यार। 19 किल्हैकि तेऊ किय इहय बचार कि परमेश्वर आसा सामर्थी, सह सका मरी करै बी जिऊंदै करी, ता तिन्नां मांझै ही दृष्टांते साबै भेटअ तेऊ सह भी। 20 विश्वासा करै ई इसाकै याकुबा और एसाबा लै आजू एछणेंआळी गले दैनीं आशीष। 21 विश्वासा करै ई याकुबै मरदी बारी युसुफे दुई शोहरू मांझै एकी-एकी लै आशीष दैनीं और आपणीं शोटीए सीरेंओ सहारअ दैई करै टेकअ माथअ। 22 विश्वासा करै ई युसुफे जाऊं सह मरनै लै तैर त, ता इस्त्राएले संताना निखळणें चरचा की और आपणीं हाडीए बारै आज्ञा दैनीं।

23 विश्वासा करै ही मुसा नबीए आम्मां बाप्पू तेऊ पैदा हणें का बाद डाहअ चिई भिनैं तैणीं चोरी; किल्हैकि तिन्नें हेरअ कि शोहरू आसा सुंदर और तियां निं राजेए आज्ञा का डरै। 24 विश्वासा करै ई मुसा सैणअ हई करै फिरने बेटोओ शोहरू हणें का किय नकार। 25 इहय सोची करै कि थोळै धैळै पापा दी सुख भोगणें का आसा परमेश्वरे लोगा संघे दुख भोगणअ ई ठीक। 26 और मसीहे कारण, परमेश्वरा लै निंदित हणअ समझअ तेऊ मिसरे धन दौलते भडारा का ठीक; किल्हैकि तेऊए आच्छी ती फळा पाणें इछा दी लागी दी। 27 विश्वासा करै ई तेऊ राजेए क्रोधे का नाई डरी तेऊ मिसर देश छाडअ और किल्हैकि सह अनदेखै मानो भाळी करै होए लोळअ लागअ द। 28 विश्वासा करै ई तेऊ फसह और लोहू छळिकणें बिधी मनीं, कि पैलौठेओ नाश करनै आळअ इस्त्राएली लै कोई नुकसान नां करे।

29 विश्वासा करै ई तियां लाल समुंदरा पार ईहै उतरै जिहै शुकी जैगा बाती नाठै होए, और जाऊं मिसरी बी तिहअई किय ता तियां डुबै और मूँरें। 30 विश्वासा करै ई येरिहे दुआल, जाऊं साता धैळै तेते चक्कर काटै ता सह दूळी। 31 विश्वासा करै ई राहब बैश्या आज्ञा नां मनणें आळै संघे निं मूई, तै कि तेसा दैनीं ती भेदिरे लै लुकणां लै जैगा।

32 ऐसे होर के बोलें? किल्हैकि बगत निं रहअ, कि गिदोनो, बाराक, समसूनो, यिफतह, दाउद, शमुएल और होरी भबिष्याबगते बारें बिस्तारा दी खोजू। 33 तिन्नै विश्वासा करै ई राईसी जिती, धर्म काम किये प्रतिज्ञा की दी चिजा प्राप्त की शेर खखा बी की बंद। 34 आगीए ज्वाला की टांडी, तलबारे धारा का निखळै बची, कमजोरी दी हुए बलबंत, जुधा दी बी निखळै जोधै, परदेसिए फौजी पाए मारी। 35 बेटळी बी आपणें मूएँ दै भेटै भी जिऊंदै, कई ता मार खांदी-खांदी मूएँ, और छुटकारअ निं चाहअ, एते तैणीं कि उत्तम पुनरुत्थाने भागी होए। 36 कई एक ठठै दी उड़ाऊणें, कोडै खाणें, बाहणें, और केदा दी पळी करै परखै। 37 कई लै दैनअ पाथरो ढो बी, कई चीरै आरै करै, तिन्नै हूई परिक्षा, तलबारा करै मारै, तियां फिरै कंगाळी दी और दुखा भोगदी, भेडा और बाकरीए खाला ओढी करै ओर्ही-पोर्ही मारै-मारै; 38 और जंगलै, धारा, डुआरै जुहळी, और पथरुए दरारा दी भटकदै फिरै।

39 संसार त तिन्नां लै दुशमण, सह नाई त तिन्नां जोगी आथी, विश्वासा करै ई दैनीं इन्नां सोभी लै शोभली ग्वाही, तैबी बी इन्नां प्रतिज्ञा की दी चीज निं भेटी, 40 किल्हैकि परमेश्वर आसा हाम्हां लै पैहलै ई एक उत्तम चीज डाही दी कि तियां हाम्हां बगैर सिधता दी नां पुजे।

### पिता परमेश्वर ताड़ना

12 एऊई कारणें जै कि ग्वाहीए एकी बडै बादळै आसा हाम्हें घेरै दै, ता एछा, हरेक रोकणें आळी चिजा और उलझाऊणेंआळै पाप दूर करी करै, तेसा तुहरा दी जेथ हाम्हां तुहनअ, तेथ तुहनअ हाम्हां धीर धरी करै। 2 और विश्वासे कर्ता और सिध करनै आळै यीशू मसीहा रहा ताकदै लागी, जुंणीं तेऊ आनंदा लै जुंण तेऊ आजू डाहअ द त, लाज शर्ममें कोई बी परबाह निं की और कूसो दुख सैहअ और सिंहासणा परदै परमेश्वर दैहणें बेटअ।

3 तैहीता तेऊ दी दैआ धैन जुंणीं आपणें बिरोधा दी पापिओ एतरअ बाद-बिबाद सैहअ कि तम्हें निराश हूई करै हिम्मत नां छाडे। 4 तम्हें निं पापा का मुकाबलै करदी कधि एही मुठभेड़ की कि थारअ खून बगअ होए 5 और तम्हें तेऊ उपदेशा जुंण तम्हां लै शोहरू जिहअ दैनअ द आसा, तम्हें गृए बिसरूई, कि हे मेरै पुत्र, प्रभूए ताड़णा निं तूह हळकअ जाणीं, और जेभै ताह सह घुड़के ता हिम्मत निं छाडी।

6 किल्हैकि प्रभू जसा संघे प्रेम करा, तेऊए करा ताड़णा बी; और जसा आपणअ शोहरू बणां तेऊलै बाहा कोडै बी। 7 तम्हें सैहा दुखा ताड़णा समझी करै, परमेश्वर करा तम्हां संघे पुत्र समझी करै बताव, इहय कुण शोहरू आसा, जसरी ताड़णा तेऊओ बाब नाई करदअ। 8 जै सह ताड़णा, जसरै भागीदार सोभै हूआ, थारी नाई हूई, ता तै आसा तम्हें कंजरेए संतान। 9 तेखअ जै म्हारै शारीरिक पिता बी ताड़णा दैआ, तै कै आत्माएं पिता सेटा होर बी अधीन निं हणअ, जेता करै हाम्हें जिऊंदै रहे। 10 तियां ता दैआ तै आपणीं-आपणीं समझे साबै थोळै धैळै ताड़णा, पर परमेश्वर करा म्हारै फाईदे तैणीं ताकि हाम्हें बी तेऊए पबित्रता दी साझू हूई सके। 11 और आज्ञा-काला निं हर प्रकारे ताड़णा खुशिए आथी, पर शोगे ई गल धेछिआ, पर तैबी बी जुंण तेता सैहदी-सैहदी पाके आसा गृए दै हूई, बादा का भेटा तिन्नां चैना संघे धर्म प्रतिफल।

### उपदेश और चतैनगी

12 एते तैणीं करा ढीलै हाथा और कमजोर जाहूँ सिधै। 13 और आपणें पैरा लै बणांआ सिधै रसतै, कि लैगळअ निं किधी भटके पर भलअ चांगअ होए।

14 सोभी संघे डाहणअ मेल मिलाप, और पबित्रता लोळै, जसा बगैर कुण प्रभू निं भाळी सकदअ। 15 और धैना संघे रहा हेरै भाळै लागी, इहय निं हूआ कि कुण परमेश्वर अनुग्रहा बिणहीं एही रहे, या कोई कळुअ जलैळअ निखळी करै कष्ट दैए और तेता करै होए बडै भारी लोग अशुध। 16 इहय निं हूआ कि कोई आदर्मी कंजरअ, या एसाबा जिहअ अधर्मी होए, जूणीं एकी बारी रोटीए चकरै आपणअ पैहलौठै हणेंओ पद बी खोअ। 17 तम्हां का आसा एसा गोलो थोघ कि बादा का जांऊं तेऊ आशीष लणीं च़ाही, ता सह निं तेता जोगी

निखळअ, और आशू बहाऊई करै बी निं तेऊ मना फरेऊणेंओ मोकअ भेटअ।

18 तम्हें ता आसा तेसा धारा सेटा, जसा छुई सका तै, और आगी करै त चमकदअ लागअ द, और काळी घटा, न्हैरै और आंधी बागरी सेटा, 19 और तुरहीए छेळा, और बोळणें आळै, ईहै शब्दा सेटा निं आणे, जसरै शूळणें आळै की एही बिनती ई कि ऐबै निं हाम्हां का होर गला करी। 20 किल्हैकि तियां निं तेसा आज्ञा सैही सकै, कि जै कोई पशू बी तेसा धारा छूएँ ता तेऊलै बी दैए पाथरो ढो, 21 और सह दर्शन त इहय डरैऊणअ कि मूसा बोलअ इहय कि, मूह लागी डर और कामणीं।

22 पर तम्हें सिय्योने धारा सेटा, और जिऊंदै परमेश्वर नगरी स्वर्गीय येरुश्लेमा सेटा, 23 और लाखों स्वर्गदूता और तिन्नां पैलौठे साधारण सभा और कलीसिया, जसरै नांओं स्वर्गें लिखै दै आसा, और सोभीए न्यायी परमेश्वर सेटा और सिध की दी धर्मिए आत्मां, 24 और नंऊई वाचा लै मध्यस्त प्रभू यीशू, और छळिकणें तेऊ लोहू सेटा आणे, जुंण हाबिले लोहूका उत्तम गला करा।

25 साबधान रहा, और तेऊ बोळणेंआळै का निं मूह फरेऊआ, किल्हैकि तियां लोग जै पृथुईए चतैनगी दैणें आळै का मुंह मोळी करै निं बचै, ता हाम्हें स्वर्गा का चतैनगी दैणेंआळै का मूह फरेऊई करै किहअ करै सका बची? 26 तेऊ जमाने ता तेऊए शब्दै हिलाऊई ती पृथुई, पर ऐबै आसा तेऊ प्रतिज्ञा की दी कि एकी बारी भी मूह सिधी पृथुई ई निं पर सरग बी हिलाऊणअ झणांऊणअ। 27 और अह गल करा एकी बारी भी एसा गला प्रगट कि जुंण चिजा झणांऊणीं, तियां टळणीं सृजी दी चिजा हणें बजह, ताकि जुंण चिजा नाई झणांऊणीं तियां अटळ बणीं रहे। 28 इहय करै हाम्हें एऊ राजा पाई करै निं झणांऊणें, तेऊ गूणा जशे हाथा निं नाशणें दैआ, जसा करै हाम्हें भक्ती, डरा संघे परमेश्वर एही आराधना करी सका, जेता करै सह खुश हूआ। 29 किल्हैकि म्हारअ परमेश्वर आसा भस्म करनै आळी आग।

### मसीही जिन्दगी जिऊणें नर्देश

13 भाईचारेओ प्रेम भाव डाहै बणाई। 2 पाहुणचारी करनै निं बिसरनअ, किल्हैकि इहय करै आसा की दी कई अनजाणें स्वर्गदूते पाहुणचारी। 3 कैदिए सुधी बी लूआ एही कि मानो तिन्नां संघे आसा तम्हें बी कैद; और जसा संघे बूरअ बताव हूआ, तिन्नै करा इहय समझी करै देखभाळ कि मानों अह आसा म्हारी आपणीं देह। 4 बेह समझणअ सोभी लै आदरमाने गल, और बिस्तरअ लोळी निष्कलक रहअ, किल्हैकि परमेश्वर करनअ भ्यभीचारीओ और परस्त्रीगामींओ न्याय। 5 थारअ स्वभाव निं लाळची लोळी हूअ, और जुंण तम्हां का आसा, तेताई दी रहा संतुष्ट; किल्हैकि तेऊ आसा आप्पै इहय बोलअ द कि, हूँ निं कधी तम्हां छाडदअ और नां थारअ त्याग करदअ। 6 तैहीता हाम्हें बेधड़क हूई करै बोला कि, प्रभू आसा मेरअ सहायक, हूँ निं डरदअ आथी; माहूँ मेरअ कै सका बगाळी।

7 जुंण थारै अगुए तै, और जुंणीं तम्हां लै परमेश्वरो बचन आसा शणांऊंअ द, तिन्नां डाहा आद; और धैना संघे तिनों चाल-चलण हेरी करै चला तिन्नै विश्वासा पिछू। 8 प्रभू यीशू मसीह हिझ और आज्ञा और जुगै-जुगै आसा तिहअ ई। 9 कई प्रकारे आपरै उपदेशा करै निं भरमांऊई, किल्हैकि मन अनुग्रहा करै मजबूत डाहणअ आसा भलअ, न कि तिन्नां खाणें चिजा करै, जसा तिन्नां दी मतलब डाहणें आळै कोई बी फाईदअ निं हूअ। 10 म्हारी आसा एक एही बेदी, जसा परैदा का खाणेंओ अधिकार निं तिन्नां लोग आथी, जुंण ताम्भूए सेऊआ करा। 11 किल्हैकि जिना पशुओ लोहू पापबळी लै पबित्र स्थाना लै निंआं, तिन्नै देही पा छाबनिं बागै जाळी। 12 तैहीता प्रभू यीशू बी आपणें लोग आपणें लोहू करै पबित्र करना लै नगरी बागै दुख चकअ। 13 एछा, तेऊए निंदा आप्पू परैदैं चकी करै छाबनिं बागै चला तेऊ सेटा लै। 14 किल्हैकि इधी निं म्हारअ कोई बी स्थिर रहणें आळअ घर आथी, पर हाम्हें आसा आजू एछणें आळी नगरीए लोळा तोपा दी। 15 तैहीता तेऊ करै हाम्हें स्तुतीरूपी बलिदान, अर्थात्- तिन्नां होठो फळ जुंण तेऊए नांओं अंगीकार करा, परमेश्वर लै चढाऊआ धैळ। 16 पर भलाई करनीं और उदारता निं बिसरा; किल्हैकि परमेश्वर हूआ ईहै बलिदाना करै खुश।

17 आपणें अगुए गल्ला मना; और तिन्नै अधीन रहा, किल्हैकि तियां ह्आ तिन्नां जिहै थारै प्राणें तैणीं ज़ागदै रहै दै, जसा लेखअ-जोखअ लागणअ दैणअ कि तियां एऊ कामां खुशी संघै करा, न कि ठांडै शाह काढी करै, किल्हैकि एसा दशा दी निं तम्हें किछै फाईदअ हणअ। 18 हाम्हां लै बी रहा प्राथणां करदै लागी, किल्हैकि हाम्हां आसा भरोसअ, कि म्हारअ बिबेक आसा शुध, और हाम्है चाहा सोभी गल्ला दी शोभली चाल चलणीं। 19 और इहय करना लै समझाऊआ हूं तम्हां होर बी, कि हूं बी तम्हां सेटा छेकै एछी सकूं।

20 ऐबे शांतीदाता परमेश्वर जुंण थारै प्रभू यीशू, जुंण भेडो महान रखुआळअ आसा, सनातन वाचे लोहूए गुणा करै मूरें दै बिद्या का जिऊंदै करी आअ।

21 कि तम्हां हरेक भली गल्ला लै सिध करे, जिहअ करै तम्हें तेऊए इछा पूरी करी सके, और जुंण किछ तेऊ शोभलअ लागा, तेता यीशू मसीह करै पैदा, जेते बड़ाई जुगै-जुगै हंदी रहे। तथास्तू।आमीन॥

22 हे भाईयो, हू करे तम्हां लै बिनती कि इन्नां उपदेशे गल्ला सैहा, किल्हैकि मंएँ लिखअ तम्हां लै थोळअ जिहअ ई। 23 तम्हें ल्आ एसा गल्ला समझी कि तिमुथिउस म्हारअ भाई ग्अ छुटी, जै सह छेकै एछे, ता तै एछूं हूं तेऊ संघै तम्हां सेटा लै मिलदअ।

24 आपणें सोभी अगुए और सोभी पबित्र लोगा लै दै राजी-बाजी, इतालिया आळै बी आसा भेजी दी तम्हां लै राजी-बाजी।

25 तम्हां सोभी लै लोळी प्रभू का आशीश भेटदी रही। आमीन॥

# याकूब

## भूमिका

याकूबे चिठी आसा व्यवहारिक उपदेशो एक संग्रह जुण सारै संसारा दी तित्तर-बित्तर हई करै रहणें आळै परमेश्वरे लोगा लै आसा लिखे दै। लिखणें आळअ करा मसीही आचार-व्यवहार और चाल चलणां लै व्यवहारिक ज्ञान और मार्गदर्श बारै निर्देश पेश करना लै सजीव चिजे उपमाओ प्रयोग। सह करा हरेक बिषय दी मसीही नजरीए करै बचार, जिहय कि साहूकारी और गरीबी, परिक्षा, शोभलअ चाल-चलण, पक्षपात, विश्वास और कर्म, जिभो प्रयोग, बुद्धिमानी, लळाई-झगळै, घमंड और दीनता, दुजै लै दोष लागणअ, डिगा मारनीं, धीर धरनअ और प्राथणां करनीं। अह चिठी दैआ मसीहता पालन करना लै विश्वासा संघै कर्म करनै महत्वा परेंदैं बी जोर।

रूप-रेखा

भूमिका 1:1

विश्वास और बिद्धिमानी 1:2-8

गरीबी और धन-दौलत 1:9-11

परख और प्रलोभन 1:12-18

शुणनअ और करनअ 1:19-27

पक्षपाते खलाफ चतैनी 2:1-13

विश्वास और कर्म 2:14-26

विश्वासी और तेऊए जिभ 3:1-18

मसीही और संसार 4:1-5:6

विभिन्न नर्देश 5:7-20

## आदर-सत्कार

1 परमेश्वरे और प्रभू यीशू मसीहे दास याकूबे तरफा का तिन्नां बाराह गोत्रा लै जुण तित्तर-बित्तर हई करै रहा, तिन्नां लै राजी-बाजी और नमस्कार।

## विश्वास और बुद्धिमानी

2 हे मेरै भाईयो, जेभै तम्हें नाना प्रकारे परिक्षा दी पळा, 3 ता एता समझा पूरे आनंदे गल, और इहय समझी करै कि थारै विश्वासा परखी करै हआ धीरज पैदा। 4 पर धीरजा दैआ आपणअ पूरअ काम करनै कि तम्हें पूरे सिध हआ और तम्हां नि किछू गले कामीं पेशी लोळी रही।

5 पर जे तम्हां मांझै कसा बुधिए घटी बी आसा, ता तेता मांगा परमेश्वरा का, ता सह दैआ बिणां कोई सुआल पुछे सोभी लै खुल्लै हाथे। 6 पर मांगा विश्वासा संघै, और कोई शक नि करी किल्लैकि शक करनै आळअ हआ समूंदरे छाली जिहअ जुण हाऊआ दी उछळदी रहा लागी। 7 इहय आदमीं नि समझी कि मूँह प्रभू का किजै भेटे। 8 सह आदमीं आसा दुचितअ और आपणीं सारी गल्ला दी आसा सह चंचळ।

## गरीबी और अमीरी

9 दीन भाई नि आपणें उंचे पदा लै घमंड करी, 10 और धनबान रहे आपणीं नीच दशा दी किल्लैकि सह नाशणअ घाहे फूला जिहअ दूर। 11 किल्लैकि सुरजा निखळणें का बाद पळा चटाक धुपअ और घाह दैआ सह शकेऊई, और तेतो फूल झळा धरनीं और तेते शोभा बी हआ खतम। ठीक इहयई सेठ बी मिलणअ आपणें रसतै हांडदी-हांडदी धूळै जैदरी।

## परख और प्रलोभन

12 धन्य आसा सह मांझू जुण परिक्षा दी स्थिर रहा, किल्लैकि तेऊ पाणअ खरै रही करै जिऊणेंओ सह मुकुट, जसरी प्रतिज्ञा प्रभू आपणें प्रेम करनै

आळै लै आसा की दी। 13 जेभै कसरी परिक्षा होए, ता सह नि इहय बोली कि मेरी परिक्षा हआ परमेश्वरे तरफा का। किल्लैकि नां ता बूरी गल्ला करै परमेश्वरे परिक्षा हंदी, और नां ता सह कसरी परिक्षा आपू करदअ। 14 पर हरेक मांझू आपणीं ही अभिलाषा दी खिचूई करै और शाची करै पळा परीक्षा दी। 15 तेखअ दैआ अभिलाषा गर्भ धारण करी करै पापा लै जल्म और जाऊं पाप बढा, ता सह दैआ मौता लै जल्म।

16 हे मेरे भाईयो, धोखअ नि खाई। 17 किल्लैकि हरेक शोभलअ बरदान और हरेक उत्तम दान एछा उपराई का, और सह भेटा ज्योतिए पिता का, जेथ नां ता कोई बदळाव हई सकदअ नां ता अदळी-बदळी करी करै तेथ छैली लागदी। 18 तेऊ आसा आपणीं इछा करै हाम्हे सच्चाईए बचना करै हाम्हे बणांए दै, ताकि हाम्हे तेऊ बणांई दी चिजा मांझै एकी प्रकारो पैहलअ फळ हई सके।

## शुळणअ और करणअ

19 हे मेरे प्रिअ भाईयो, एसा गल्लो आसा तम्हां का थोघ, तैहीता हरेक मांझू रहै शुळणा लै आजू और बोळणा लै पिछू और क्रोधा दी रहै धीमअ। 20 किल्लैकि मांझूओ क्रोध नि परमेश्वरे धर्मा निर्बाह करी सकदअ। 21 तैहीता सारी मलिनता, बैरभावे बढदी दूर करी करै, तेऊ बचना करै नम्रता संघै ग्रहण, जुण थारै दिला दी आसा बूऊअ द और जुण तम्हां लै मोक्ष दैई सका। 22 पर बचना दी चलणें आळै बणां, सिधै शुळणें आळै नि जुण आपणें आपू लै धोखअ दैआ। 23 किल्लैकि जुण कोई बचना शुळणें आळअ आसा, और तेथ चलदअ नाई आथी, ता सह आसा तेऊ आदमीं जिहअ जुण आपणअ मूँह शिशै दी भाळा, 24 और आपू भाळी करै लागा सह हांडदअ तेतरी जाआ सह तेभी बिसरुई कि सह किहअ त। 25 पर जुण मांझू आज्ञादीए सिध व्यवस्था दी धैन दैआ, तेऊ भेटणीं आपणें कामां लै इहय करै आशीष कि सह नि शुणीं करै पर सह करा तिहअई काम बी। 26 जे कोई आपणें आप भक्त समझे, और आपणीं जिभा दी लगाम नां दैरे, पर आपणें दिला लै धोखअ दैरे, ता तेऊए भगती आसा बेकार। 27 म्हारै परमेश्वरा नेळ आसा शुध और निर्मल

भगती एही कि अनाथ, और बिधबे, केशा दी तिन्नं मजत-मदैद करे, और आपणें आप डाहे संसारा का निष्कलंक।

### पक्षपाते खलाफ चतैनगी

2 हे मेरै भाईयो, म्हारे महिमायुक्त प्रभू यीशू मसीहो विश्वास निं तम्हां दी पक्षपाता संघे लोळी हुआ। 2 किल्हैकि जै कुण आदमीं सुनें मुंदळी बाहिं और नंऊरें कोट पेंट बाहिं थारी सभा दी एछे और कंगाळ बी खिथळै बाहिं करै थारी सभा दी एछे, 3 और तम्हें तेऊ कोट पेंट आळेए मुंहा भाळी इहय बोले कि तूह बेश इधी राम्बळी जैगा और तेऊ गरीबा लै बोले इहय कि तूह रह इधी खट्खुई, या इधी बेश बोरी परेंदें, 4 तै इहय करै के तम्हें आप्पु मांझै भेदभाव निं किये? या बुरै बचारा करै न्याय करनै आळें निं हुऐ? 5 हे मेरै प्रिय भाईयो, शुणां परमेश्वरें के एऊ संसारे गरीब निं चुनै कि तियां बी विश्वासा दी धर्मी और तेऊ राजे अधिकारी होए, जुंण प्रतिज्ञा प्रभू तिन्नां लै आसा की दी जुंण तेऊ संघे प्रेम करा? 6 पर तम्हें कई की तेऊ गरीबे बेइज्जती, ईयां सेठ लोग के तम्हां लै अत्याचार निं करदै? तियांई के तम्हां कोर्ट कचैहरी लै घिशी निं निंदै? 7 तियां के तेऊ प्रभू यीशूए उत्तम नांओए निंदा निं करदै जसरै तम्हें आसा? 8 तैबी जै तम्हें पबित्र शास्त्रे तेऊ बचने साबै कि तूह कर आपणें पड़ोसी संघे प्रेम करा सच्ची तेऊ राजेए कानूने व्यवस्था पूरी, एता करा तम्हें ठीक। 9 पर जै तम्हें पक्षपात करे, ता तै करा तम्हें पाप, और व्यवस्थे साबै बी आसा तम्हें अपराधी। 10 किल्हैकि जुंण कोई सारी बबस्थो पाळण करा पर एकी गल्ला दी चूक करे, ता तै आसा सह सोभी गल्ला दी दोषी। 11 तैहीता जुंणीं इहय बोलअ कि, तूह निं कंजरी गल्ला करी, और तेऊई बोलअ इहय बी कि तूह निं हत्या करी। एते तैणीं कि तूह निं किधी कंझरुअ आथी पर हत्या की, तैबी बी बणअ तूह व्यवस्था उलंघन करनै आळअ। 12 तम्हें बोला बचन तिन्नां लोगा जिहै, और काम बी करा, जसरअ न्याय आज्ञादीए व्यवस्था करै आसा हणें आळअ। 13 किल्हैकि जुंणीं दैया नाई की तिन्नां न्याय हणअ बिणा कोई दैया किये, दैया हुआ न्याय दी जयबंत।

### विश्वास और कर्म

14 हे मेरै भाईयो, जै कुण इहय बोला कि मुँह आसा विश्वास पर कर्म निं करदअ, ता तेतो के फाईदअ आसा? इहय विश्वास के कधु उद्धार करी सका? 15 जै कोई भाई या बैहण नांगे बळिगै होए, और तिन्नां का बैळी कलारी खाणां लै नाई होए, 16 और तम्हां मांझै कुण इहय बोले कि राम्बळै करै नाशा, और गरम रहा और रजी खा-पिया, पर जुंण चिजा शरीरा लै जरूरी आसा और तिन्नां नाई दैए, ता तै किजै फाईदअ हुआ? 17 तिहअई विश्वास बी जै कर्मा संघे नाई होए ता तै आसा सह आपणें स्वभाऊआ दी मूअ द।

18 कै कोई इहय बोली सका कि ताह आसा विश्वास, और हूँ करा कर्म, तूह आपणअ विश्वास मुखा कर्मा बिणहीं ता रहैऊ, मुँह रहैऊणअ आपणअ विश्वास ताखा कर्मा करै, 19 ताह आसा विश्वास कि एक परमेश्वर आसा, तूह करा रांबळअ, दुष्टात्मां बी करा विश्वास और तियां डरा कांबा बी। 20 पर हे नकामें मांझुआ, के तूह इहय बी निं ज्ञाणदअ कि कर्मा बिणहीं निं विश्वास किछू कामो आथी? 21 जधू म्हारै पिता अब्राहमैं आपणअ शोहरू इसहाक बेदी दी बळी करना लै चढाऊअ, ता सह कै कर्म करी करै निं बणअ धर्मी? 22 जै तंरें भाळी हेरअ कि विश्वास पाअ तेऊए कामां संघे मिली करै प्रभाव और कर्म करी करै हुआ विश्वास सिध, 23 और पबित्र शास्त्रो अह बचन हुआ पूरअ कि इब्राहम चलअ परमेश्वरे साबै और अह गिणअ तेऊलै धर्म, और तेऊलै बोलअ परमेश्वरो साथी। 24 तै हेरी तम्हें अह गल भाळी कि मांझु निं सिधअ विश्वासा करै धर्मी हंदअ पर कर्मा करी करै बी हुआ धर्मी। 25 और तेही ई राहाब बैश्या बी, जधू तेसा दूता लै आपणें घरै आसरअ दैनअ और दुजै रसतै किये तियां बिदा, ता सह कै कर्म करी करै निं बणीं धर्मी? 26 हे नादान, जेही देह आत्मा बगैर मुँई दी आसा, तिहअ ई आसा विश्वास कर्म बिना मूअ द।

### आपणीं जिभ बशै करनीं

3 हे मेरे भाईयो, तम्हां मांझै निं खास्सै उपदेशक बणां, किल्हैकि तम्हां का आसा थोघ बी कि हाम्हें उपदेशक बी बणणें दोषी। 2 इहय करै कि

हाम्हें करा कई बारी चूक, जुंण कोई बचना दी चूक नाई करदअ, सहैई आसा सिध मांझु और सह सका सारी देही दी लगाम कशी। 3 जेभै हाम्हें आपणें बशा दी करना लै घोळै दी लगाम लाआ, तेता करै सका हाम्हें तेऊए सारी देही बी फरेऊई। 4 भाळा, एहीता हुआ जहाज बडै पर प्रचंड हाऊआ करै चलाऊअ द तैबी बी फरेऊआ एकी होछी जेही पतबारा करै मांझीए साबै तिन्नां ओही-पोही। 5 तेही ई आसा जिभ एक होछअ जिहअ आंग पर अह मारा बड़ी-बड़ी डिंगा, भाळा कि धख जेही आग केतरै बडै बणें शाचा। 6 जिभ बी आसा एक आग, म्हारै आंगा मांझै अधर्मो एक लोक और सारी देही लै लाआ कळंक, भवचक्रै डाहा अह आग लाई और नरक कुंडे आगी करै रहा जळदी लागी। 7 किल्हैकि हर प्रकारे बणें पशू, पंछी और रिंणणें आळै जीब, पाणीं दी चळणें आळै सोभै जीब सका मांझुए बशै हई और हुऐ बी। 8 पर जिभा निं कोहै मांझु बशा दी करी सकदअ, सह आसा एक एही बला, जुंण कधी निं रुकदी, सह आसा प्राण नाशक बिशा करै भहूई दी। 9 एताई करै करा हाम्हें प्रभू और पिता परमेश्वरे स्तुती, और एताई करै दैआ मांझु लै श्राप, जुंण परमेश्वरे स्वरूपा दी आसा बणें दै। 10 एकी खाखा का निखळा धन्यबाद और श्राप दुहै। 11 हे भाईयो, इहय निं लोळी हुआ। 12 कै सोबळीए एकी मुंहा का मिठअ और कळूअ दुही प्रकारो पाणीं निखळी सका? हे मेरै भाईयो, कै अंजीरे पेळा दी जैतून, या अंगूरे बेला दी अंजीर लागी सका? तिहअई कळूए सोतै का निं मिठअ पाणीं निखळी सकदअ।

### स्वर्गीय ज्ञान

13 तम्हां मांझै ज्ञानबान और समझदार कुण आसा? जुंण इहय होए सह करे आपणें कामां शोभलै चाल चलणा और नम्रता संघे प्रगट जुंण ज्ञाना का उत्तपन्न हुआ। 14 पर जै तम्हें जुंण आपणें मनं कळूई डाह और बिरोध करा, ता सच्चाईए खलाफ निं घमंड करी और नां झुठअ बोली। 15 अह ज्ञान निं सह आथी, जुंण उपरा का होथा, पर अह आसा संसारिक और शैतानि। 16 तै की जिधी डाह ओर बिरोध हुआ, तिधी हुआ बखेळअ ओर हर प्रकारो दुष्कर्म बी। 17 पर जुंण ज्ञान उझै का एछा, पैहलै हुआ सह पबित्र, तेखअ मिलनसार, तेखअ कोमल, मृदुभाव और दैआ, और शोभलै फळा करै लाधूअ द और पक्षपात और कपट निं तेथ हंदअ। 18 और मेल मलाप करनैआळै धर्मो फळ बूऊआ मेल-मलाप करी करै।

### संसारा संघे दोस्ती

4 तम्हां बिचै लळाई-झगळै किधा का आए? तियां के तिन्नां सुखबिलासा का निं आए जुंण थारै आंगै-आंगै चिखदै-धमुखदै रहा लागी। 2 तम्हें लालसा ता डाहा पर तम्हां निं सह भेटदअ, तम्हें करा हत्या और डाह, तम्हें निं किछै प्राप्त करी सकदै, तम्हें हुआ झगळदै और लळदै लागै दै; तम्हां निं तै भेटदअ कि मांगदै निं आथी, 3 तम्हें मांगा, पर तम्हां निं भेटदअ, किल्हैकि तम्हें मांगा बुरी इछा संघे, ताकि तम्हें तेता भोग बिलासा दी उडाऊई सके। 4 हे कंजरीओ, तम्हें कै ईहअ बी निं ज्ञाणदी कि संसारा संघे दोस्ती डाहणीं आसा परमेश्वरा संघे बैर डाहणअ? जुंण बी संसारो दोस्त बणणअ चाहा, सह बणां आप्पु परमेश्वरो बैरी। 5 तम्हें कै इहय समझा कि पबित्र शास्त्र आसा बेकार? जुंण आत्मां तेऊ हाम्हां भितरी बसाऊई दी आसा, सह कै एही लालसा करा कि जसरअ प्रतिफल डाह होए? 6 सह दैआ होर बी गूण-जश, तैहीता इहय आसा लिखअ द कि परमेश्वर करा अभिमानिओ बिरोध और दीन मना आळै लै दैआ गूण-जश। 7 तैहीता परमेश्वरे अधीन हुआ और शैतानो करा सहनअ, तै भागणअ सह तम्हा सेटा का दूर। 8 परमरबेश्वरा नेळ एछा, तै एछणअ सह तम्हां नेळ बी, हे पापीओ, आपणें हाथा करा शुध, और हे दुचितै लोगो, आपणें दिला करा पबित्र। 9 दुखी हुआ, और शोग करा, और लेरा ला। थारअ हासणअ बदळणअ शोगा दी और थारअ आनंद बदळणअ उदासी दी। 10 प्रभूए सहनै बणां दीन, तै बणाणें तम्हें तेऊ शिरोमणीं।

## भाई लै दोष लागअ

11 हे भाईयो, एकी दुजेए बदनामीं निं करा, जुण आपणें भाईए बदनामीं करा, या आपणें भाई लै दोष ला, सह करा व्यवस्थे बदनामीं, और व्यवस्था दी लाआ सह दोष, तै निं तूह परमेश्वरे व्यवस्था दी चलणें आळअ आथी। 12 व्यवस्था देंणेंआळअ और हाकिम आसा एकै, जसा बचाऊणें और नाश करणें शगती बी आसा तेऊ एकी का, तूह कुण आसा? जुण आपणें पड़ोसी लै दोष ला?

## घमंडे खलाफ चतैनगी

13 तम्हें जुण इहय बोला कि आज्ञा या काल्ना हाम्हें कसा होरी नगरी नाशी करै तिधी बताऊणीं हाम्हां एक साल होर, और कोई बपार करी करे खटणें हाम्हां ढबै। 14 पर इहय निं तम्हां का थोघै आथी की काल्ना किजै हणअ? शुणीं ता लआ, थारी जिन्दगी आसा किजै? तम्हें ता जिहै भाफा जिहै आसा, जुण थोळी घळी ता धेछिआ और तेखअ हआ लोप। 15 एता का उल्टअ चाहिए तम्हां इहय बोळणअ कि, जै प्रभू चाहे ता तै रहणें हाम्हें जिऊंदै और अह काम बी करनअ हाम्हां। 16 पर ऐबे करा तम्हें आपणीं डींग मारी करै घमंड, इहय सारअ घमंड हआ बूरअ। 17 तैहीता जुण भलाई करनअ जाणां और तेता नाईं करदअ, तेऊलै आसा अह पाप।

## सेठ लोगा लै चतैनगी

5 हे सेठो, तम्हें बी लआ शुणीं, तम्हें आपणें आजू एछणें आळै केशा लै ला लैळा। 2 थारअ धन गुअ बिगळी, और थारै झिकळै हेरै ल्हूरे खाई। 3 थारै सुनै चन्दी दी गई खई लागी और तेसा खई देंणीं तम्हां लै गूआही और आगी जिहअ खाणअ थारअ मास, तम्हें आसा आखरी जुगै आप्पू लै धन बटोरअ द। 4 हेरा, जुणीं मजदूरै थारै खेच लऊरे, तिन्नं मजदूरी जुण तम्हें धोखअ दैई करै खाई, सह लागी लैळा लांदी, और तिन्नां लऊणें आळैए लेरपकार गई पुजी फौजे मालका प्रभू परमेश्वरा सेटा। 5 तम्हें रहै पृथुई दी भोग बिलासा दी लागी, और बडअ भारी सुख भोगअ, तम्हें आसा एसा काटणेंए धैळी लै आपणअ दिल धाची-पाळी करी मोटअ ताजअ किय द। 6 तम्हें पाअ धर्मी दोषी बणाईं करै मारी; सह निं थारअ सहनअ करदअ।

## दुखा दी धीर धरनअ

7 हे भाईयो, प्रभू एछणें तैणीं धरा धीर, हेरा, जिम्मीदार बी धरा धरतीए अनमोल फळे आशा डाही करै पैहली और आखरी बरसाती तैणीं धीर। 8 तम्हें बी धरा धीर, और आपणें दिला करा मजबूत, किल्हैकि प्रभू एछणें शुभ धैळी आसा नेळ। 9 हे भाईयो, एकी दुजै लै निं दोष लाआ, ताकि तम्हां लै बी कुण दोष नां लाए, हेरा, हाकम आसा दुआरै खट्खुअ द। 10 हे भाईयो, जुणीं भविष्यवक्ता, प्रभूए नांओरे गल्ला की, तिन्नां समझा दुखा चकणें और धीर धरना लै आपणअ आदर्श। 11 हेरा, हाम्हें बोला धीरज डाहणें आळै लै धन्य, तम्हें अय्यूबे धीर धरनें बारै ता आसा शुणअ द, और प्रभूए तरफा का जुण तेतो प्रतिफल तेऊ भेटअ तम्हें तेता बी जाणा, जिहअ करै प्रभूए खासी करुणा और दैआ प्रगट हआ।

12 पर हे मेरै भाईयो, सोभी का श्रेष्ठ गल आसा अह कि कसम निं खाणीं, नां स्वर्गे, नां धरतीए, नां कोई बी चिजे। पर थारी गल्ला लोळी हुई हां ए हां और नाईं ऐ नाईं, ताकि तम्हां कोई दंड नां भेटे।

## प्राथणें शगती

13 जै तम्हां मांझै कोई दुखी होए; ता तेता लै करै प्राथणां। जै तम्हें खुशी होए, ता प्रभूए स्तूती करना लै बोलै भजन। 14 जै तम्हां मांझै कुण बमार होए, ता कलीसिया (मंडळी) का प्राचीन (बुजुर्ग प्राथणां करनै आळै) शादै, और तियां प्रभूए नांओरें तिन्नां लै तेल मळी करै प्राथणां। 15 और विश्वासे प्राथणां करै जाणअ रोगी बची और प्रभू करनअ सह झैऊई करै खळअ। और जै तेऊ कोई पाप बी किये दै होए, तेते बी भेटणीं तेऊलै माफी। 16 तैहीता तम्हें मना आप्पू मांझै एकी दुजै सहनै आपणें पापा और एकी दुजै लै करा प्राथणां, जिहअ करै तम्हें बमारी का राम्बळै हणें, और धर्मी आदमीए प्राथणें प्रभावा करै सका कई गल्ला हई। 17 एलिया बी ता हाम्हां जिहअ दुख भोगी मांझू थिय, और तेऊ की लेरा लाई प्राथणां कि पाणीं निं लोळी बरशअ; और साढै चीइ बर्शा तैणीं निं भूमीं दी ओश बी पळी। 18 तेखअ की तेऊ भी प्राथणां, और सरगा का हुअ पाणीं और भूमीं हुई हरी भरी।

19 हे मेरै भाईयो, जै तम्हां मांझै कुण सच्चाईए रसतै का भटके, और तेऊ कुण फरेऊई आणें, 20 ता सह लए एसा गल्ला समझी कि जुण कोई भटके दै पापी फरेऊई आणें, सह बचाउआ एक प्राण मौता का, और कई पापा दी पाआ सह परदअ।

# 1 पतरस

## भूमिका

पतरसे पैहली चिठी लिखी ती तिन्ना मसीह विश्वासीए नांउंए, जसा लै इधी 'परमेश्वरे चुनै दै लोग' आसा बोलअ द, जुण पूरै एशिया माईनरे उत्तर दिशे लाक्रे दी तित्तर-बित्तर हई करै रहा तै। एसा चिठीओ खास उदेश्य आसा आपणें तिन्ना पढ्ळणें आळै लै उत्साह दैणअ, जुण आपणें विश्वासे बजहा दुख और सताव तै सैहंदै लागै दै। लिखणें आळअ करा इहय आपणें पढ्ळणें आळै लै यीशू मसीहे सुसमाचारे आद फरेऊई करै, किल्हैकि यीशूए मौत, पुनरुत्थान और फिरी एछणेंओ वाईदअ दैआ तिन्ना लै आशा। एऊ नजरीए करै तै तिन्ना आपणें दुख मनणें और सैहन करनै इहय विश्वास करी करै कि अह आसा तिन्नै विश्वासे सच्चाईए परख, और इहय कि तेतो प्रतिफल भेटणअ "मसीहे प्रगट हणेंए धैळी"।

दुख दुख-दर्धे बगती हैअ विश्वास दैणें संघा-संघा करा लिखणें आळअ एही अरज बी कि तेऊए पढ्ळणें आळै लोग इहै लोगा जेही बताऊए जुण मसीहे जन आसा।

रूप-रेखा

भूमिका 1:1,2

परमेश्वरे उध्दारे आद फरेऊर्णी 1:3-12

पवित्र जिनंदगी लै उपदेश 1:13-2:10

दुखे बगती मसीहीए जिम्मैबारी 2:11-4:19

विश्वासीए दीनता और सेऊआ 5:1-11

नचोळ 5:12-14

## आदर-सत्कार

1 पतरसे तरफा का जुंण प्रभू यीशू मसीहो प्रेरित आसा, तिन्नां परदेसिए नांओं, जुंण पुन्तुस, गल्लातिआ, कप्पदुकिआ, आसिआ और बिथुनिआ दी तित्तर-बित्तर हई करै रहा। 2 और पिता परमेश्वरे भविष्य ज्ञाने साबै, आत्मां पबित्र करी करै आज्ञा मनणें और प्रभू यीशू मसीहे लोहू छळिकणा लै चुनै दै आसा।

तम्हां लै लोळी खासअ गूण जश और शांती भेटी।

## एक जिऊंदी आशा

3 म्हारै प्रभू यीशू मसीहे परमेश्वर पिता लै दैआ धन्यवाद। जुंणीं प्रभू यीशू मसीह मरी करै जिऊंदअ करी करै, आपणीं दैया करी करै हाम्हां लै, जिऊंदी आशा लै नूऊंअ जल्म दैनअ। 4 अर्थात अबिनाशी और निर्मल और अजर जायदाता लै। 5 जुंण तम्हां लै स्वर्गें आसा डाही दी, जसरी रक्षा परमेश्वरे सामर्था करै, विश्वासा करै मोक्षा लै, जुंण आजू आसा प्रगट हणें आळी, हआ। 6 एऊई कारणें हआ तम्हें मगन, तैबी बी इहय बी आसा जरूर कि थोळै धैळै तैणीं कई होच्छी बडी परिक्षा करै रहा तम्हें उदास बी॥ 7 इहय आसा तै कि थारअ परखअ द विश्वास, जुंण नाशबान ताऊरै दै सुनै का बी खासअ किम्मती आसा, प्रभू यीशूए प्रगट हणेंए बगती हणअ सराहणें, महिमा और आदरमानो कारण। 8 तेऊ संघे डाहा तम्हें बिणा भाळै हरे प्यार, और ऐबै ता तेऊ दी बिणा भाळै विश्वास करी मगन बी हआ, जुंण बर्णन करनै का बागै और महिमा करै आसा भरुअ द। 9 और आपणें विश्वासो प्रतिफल अर्थात आत्मांओ मोक्ष करा प्राप्त।

10 एऊई मोक्षे बारै तिन्नै भविष्यवक्ता लोळ- तोप और जांच -पड़ताळ की, जुंणीं तेऊ अनुग्रहे बारै जुंण तम्हां लै हणें आळअ त, भविष्याबाणीं की।

11 तिन्नै की एसा गले लोळ तोप कि मसीहो आत्मां जुंण तिन्नां दी थिय, और पैहलै ई का मसीहे दुखे और तिन्नां बाद हणेंआळी महिमे ग्वाही दैआ, अह कसा, और किहै बगते बारै करा शारअ। 12 तिन्नां दी किय इहय प्रगट कि तियां निं आपणीं पर थारी सेऊए बारै करा तै बोली, जसरअ समाचार ऐबै तम्हां तिन्नां करै भेटअ, जुंणीं पबित्र आत्मां करै तम्हां का सुसमाचार

शणांऊंअ, जुंण स्वरगा का भेजअ द आसा। इन्नां गल्ला चाहा स्वर्गादूत बी धैना करै भाळणअ।

## पवित्र जिनंदगी जिऊंणें बुलाहट

13 तैहीता आपणीं बुधिए गाची बाही करै जगदै रही, तेऊ अनुग्रहे डाहा पूरी आशा, जुंण प्रभू यीशू मसीहे प्रगट हणें बगती तम्हां लै भेटणें आळअ आसा। 14 और आज्ञाकारी लान्है जिहै आपणीं नांसमझीए बगतीए निं पराणीं अभीलाशा जिहै बणीं। 15 पर जिहअ थारअ शादणेंआळअ पबित्र आसा, तिहैई बणा तम्हें ऐबै आपणें सारै चाल-चलणा दी पबित्र। 16 किल्हैकि पबित्र शास्त्रा दी आसा लिखअ द कि पबित्र बणां, किल्हैकि हूँबी आसा पबित्र। 17 और जै कि तम्हें करा हे पिता, हे पिता बोली करै प्राथणां, जुंण बिणां कोई पक्षपात करी हरेकीए कामें साबै न्याय करा, ता आपणअ परदेसी हणेंओ बगत बताऊआ तम्हें डरा हेतै। 18 किल्हैकि तम्हां का आसा थोघ कि थारअ नकामअ चाल चलणअ जुंण बाब दादै ओही आसा चलअ द, तेता का निं थारअ छुटकारअ सुनै चन्दी करै अर्थात नाशबान चिजा करै निं हुअ। 19 पर निर्दोष और निश्कलक मेम्मनै अर्थात मसीहे किम्मती लोहू करै आसा हुअ द। 20 तेऊओ ज्ञान हेरअ त संसारे उत्तपत्ति का पैहलै ही समझी, पर एभै एऊ आखरी जुगै हुअ तम्हां लै प्रगट। 21 जुंण तेऊ करै परमेश्वरा लै विश्वास करा, जुणीं सह मरी करै जिऊंदअ किय, और महिमा दैनी कि थारअ विश्वास और आशा लोळी परमेश्वरा दी हई।

22 तै, जै तम्हें भाईचारे निष्कपट झरी दी सच्चाई मनी करै आपणें मन पबित्र कियै दै आसा, ता मन लाई करै करा एकी दुजै संघे प्रेम। 23 किल्हैकि तम्हें निं नाशबान पर अबिनाशी बीजा करै आसा परमेश्वरे जिऊंदै और सदा रहणें आळै बचना करै नंऊंअ जल्म ल्अ द। 24 किल्हैकि हर प्राणीं आसा घाह जिहअ, और एते सारी शोभा आसा घाहे फूला जेही, घाह शुका और फूल बी झळा धरनीं।

25 पर प्रभूओ बचन रहणअ जुगै-जुगै इहयई बणीं और अह आसा सुसमाचारो बचन जुंण तम्हां का आसा शणांऊंअ द।

### जिऊंदअ पात्थर और पवित्र परजा

2 तैहीता सोभी प्रकारो बैरभाव, छळ कपट और डाह बदनामी दूर करी करे, 2 नऊँए जल्में दै शोहरू जिहै निर्मल आत्मिक दुधै आशा करा, इहय करै लागा तेऊ करै उद्धार पाणां लै आजू बढदै। 3 जै तम्हें प्रभू किरपो सुआद चाखी हेरअ द आसा।

4 तेऊ सेटा लै एछी करै, जसा लै मांहुं नकाम्मअ बोलअ, पर परमेश्वरा नेळ आसा चुनअ द, और सह आसा किम्मती जिऊंदअ पाथर। 5 तम्हें लागा आप्पू बी जिऊंदै पाथरा जिहै आत्मिक घरा बणांदै, जसा करै याजको पबित्र समाज बणी करै, इहै आत्मिक बलिदान चढाऊआ, जुण प्रभू यीशू मसीह करै परमेश्वरा ग्रहण होए। 6 एता लै आसा पबित्र शास्त्रा दी बी लिखअ द कि हेरा, मूँह डाहणअ सिय्योनें कुंणेंओ चुनअ द किम्मती पाथर किल्ली। जुण बी तेऊ दी विश्वास करे, सह नि केही शर्मिदअ हणअ। 7 तम्हें करा तैही विश्वास, सह ता किम्मती आसा, पर जुण विश्वास नाई करदैं, तिन्नां लै जुण पाथर राज मिस्तरी ढेका शोटअ, सहई हूअ कुंणिए मोहरेओ पाथर, 8 और ठोहळा दैणें लै हई टोल्ह। किल्लहैकि तिया खाआ बचन नाई मनी करै ठोहळ और एता लै ई तियां आसा। 9 पर तम्हें आसा चुनअ द खानदान, राजपदधारी, परोहितो समाज, और पबित्र लोग, और परमेश्वरे निज्जी परजा। तैही कि जुंणीं तम्हें न्हैरै का प्रेशे लै शादैं दै आसा, तेऊए गुण करा आप्पू दी प्रगट। 10 तम्हें नि पैहलै किछे बी थिये, पर ऐबे आसा परमेश्वरे परजा, तम्हां लै नि दैया हुई ती पर ऐबे हुई तम्हां लै दैआ।

### मसीही उत्तरदायित्व

11 हे प्रियो, हूँ करा तम्हां लै अरज कि तम्हें आपणें आप परदेसी और यात्री समझी करै, संसारिक अभिलाषा का जुण आत्मां संघे जुध करा, तेता का रहा बची। 12 होरी जाती बिचै लोळी थारअ चाल चलण भलअ रहअ; तै कि जहा-जहा गला लै तियां तम्हां कूकर्मो बोली करै बदनाम करा, तियां थारै भलै कामां भाळी करै, तिन्नें कारण किरपा दृष्टीए धैळै परमेश्वरे महिमा करे।

### परमेश्वरे दास

13 प्रभू लै रहा मांहुं बणांए दै हरेक कानूने अधीन, राज्जै अधीन रहा तै कि सह आसा सोभी परदैं परधान 14 और हाकमें अधीन रहणअ तै, कि कुकर्मि लै सजा दैणें और सुकर्मिए प्रशंसा करदैं आसा तियां तेऊए भेजै दै। 15 किल्लहैकि परमेश्वरे इछा आसा एही कि तम्हें भलै कामां करी करै निर्बुधि लोगे नझैनी गला सका तम्हें बंद करी। 16 और आपणें आप समझा आज्ञाद, पर आपणीं एसा आज्ञादी बुराईए आड नि बणां, पर आपणें आप चला परमेश्वरे दास समझी करै। 17 सोभीओ करा आदरमान, होरी भाई संघे डाहा प्रेम, परमेश्वरा का डरा, और राज्जैओ करा मान सम्मान।

### मसीह आसा म्हारअ आदर्श

18 हे सेउआकारो, हर प्रकारे डरा संघे रहा आपणें मालकए अधीन, सिधै भळै और नम्र नि पर बुरै मालकए बी रहा अधीन। 19 किल्लहैकि जै कोई परमेश्वरो बचार करी करै अन्याय करै दुख चकी क्लेश सैहा, तै आसा अह बधिया। 20 किल्लहैकि जै तम्हें अपराध करी करै मुहकै खाए और धीरज डाहअ, ता तेते किजै बडाईए गल हुई? पर जै भलै काम करी करै दुख चका, और धीरज धरा, ता अह भाऊंआ परमेश्वरा बी 21 और तम्हें एते तैणीं शादैं दै बी आसा। किल्लहैकि मसीह बी बणअ तम्हां लै दुख चकी करै तम्हां सेटा एक आदर्श कि तम्हें बी तेऊए चिन्हां दी चले। 22 ना ता तेऊ पाप किय, और ना तेऊए खाखा का छळ कपट गला निखळी। 23 सह नि गाळी शुणीं करै गाळी दैंदअ त, और दुख चकी करै नि कोही लै बी धमकी दैंदअ त, पर आपणें आप सभाळा त सह सच्चै न्यायी सेटा। 24 सह उखळअ आप्पूई म्हारै पाप आपणीं देही दी लई करै कूसा दी जिहअ करै हाम्हें पापा लै मरी करै धार्मिकता लै आपणीं जिन्दगी बिताए, तेऊई मारा खाणें करै हुए तम्हें चांगे। 25 किल्लहैकि तम्हें तै पैहळै भटकी दी भेडा जिहै, पर ऐबे आए आपणें प्राणें रखबाले और अध्यक्षा सेटा लै भी फिरी।

### लाळअ और लाळी

3 हे लाळीओ, तम्हें बी रहा आपणें लाळेए अधीन। 2 जै इनां मांझे कोई इहै बी होए, जुण बचन नाई मंदै, तैबी बी आसा तियां थारै डरा संघे पबित्र चालचलणा भाळी बचना बिणहीं बी आपणीं-आपणीं लाळीए चालचलणां भाळी खिचणें तम्हां संघा। 3 और थारअ हार शंगार नि दखाऊटी लोळी हुअ, अर्थात-भांती-भांतीओ मूंड करिणअ, सुनै चन्दीए गैहणें या भांती-भांतीए झिकळै बाहणें। 4 पर थारै भितरो गुप्त मनुष्यत्व, नम्रता और मना दी दीन हई करै अबिनाशी सजाऊटा करै रहणअ सजी। किल्लहैकि परमेश्वरे नजरा दी आसा एतो मोल बडअ। 5 और पराणें जमानें बी पबित्र स्त्रीं, जुण परमेश्वरा दी आशा डाहा ती, आपणें आप्पू सजा सबांरा ती एऊई साबै और आपणें-आपणें लाळे रहा ती अधीन। 6 जेही सारा, अब्राहमें आज्ञा दी रहा ती और तेऊलै बोला ती मालक। तम्हें बी जै भलाई करे, और किछू गले डरा का नाई डरे, तम्हें बी बळणीं तेऊए शोहरी।

7 तिहअई हे लाळेओ, तम्हें बी जिऊआ बुधिमानिं संघे आपणीं लाळी संघे जिंदगी और स्त्री लै करा माटेओ भांडअ समझी करै तेसरअ आदर मान। इहय समझी करै कि हाम्हें दुहै आसा जिऊणें बरदानें बारिस, जिहअ करै थारी प्राथणां नां रुके।

### भलाई करनै पिछू कष्ट

8 एऊ साबै, सोभ कै सोभ एक मन हई करै कृपामय और भाईचारे प्रिती डाहणें आळै, करुणांमय और नम्र बणां। 9 बुराईए बदळै बुराई नि करा और नां गाळीए बदळै गाळी दैआ, पर एते उल्टी दैआ लोगा लै आशीष, किल्लहैकि तम्हें आसा आशीषे बारिस हणां लै शादैं दै। 10 किल्लहैकि जुण बी जिऊणें इछा करा और शोभळै धैळै भाळणअ चाहा, सह डाहै आपणीं जिभा बुराई का और आपणें होटा छळा कपटा का रोकी।

11 तेऊ छाडणअ बुराईओ साथ, और भलाई करनीं। तेऊ लोळणअ मेल-मलाप और तेतेई कोशिश दी रहणअ।

12 किल्लहैकि प्रभूए आच्छी रहा धर्मी दी लागी, और तेऊए कान रहा तेऊए बिनीती दी लागी, पर बुराई करनैआळै बाखा फरेऊआ प्रभू पिट।

13 होर जै तम्हें भलाई करनै दी छळैघ रहे ता तेखअ थारी बुराई कुंणीं लाई दा करी? 14 पर जै तम्हें धर्म कारण दुख बी चके, ता तै आसा तम्हें धन्य। पर तिन्नें डरैऊणें का नि डरनअ और ना हैळीया। 15 पर मसीह प्रभू समझी करै आपणें-आपणें मनै समझा पबित्र, और जो कोई थारी आशा डाहणें बारै किजै पुछे, ता तेते उत्तर दैणा लै रहा हमेशा तैयार, पर नम्रता और भलाई संघे। 16 और आपणअ बिबेक बी डाहा शुध, तै कि जिना गले बारै थारै बाब दादैं मसीहीए शोभलै चालचलणों अपमान करा तै तियां शर्मिदै होए। 17 किल्लहैकि जै परमेश्वरे एही इछा ई होए कि तम्हें भलाई करी करै दुख भोगे, ता अह आसा बुराई करी करै दुखा भोगणें का उतम। 18 तै बी कि मसीहै बी अर्थात-अधर्मीए पापा लै धर्मी एकी बारी दुख भोगअ, ताकि सह हाम्हें परमेश्वरा सेटा पजैळै; सह शरीरे भावा का ता पाअ मारी पर आत्मै भावा का किय जिऊंदअ। 19 तेथै किय तेऊ नाशी करै कैदी आत्मां लै बी प्रचार। 20 जुणीं तेऊ बिदै जमानें आज्ञा नाई मनी जधू परमेश्वर नूहे धैळै धीरज धरी करै रूकी रहअ, और नूह त जहाजा बणांदअ लागअ द जेथ दी बेटी करै थोळै लोग अर्थात आठ आदर्मी जहाजा करै पाणीं का बचै। 21 और तेऊए पाणींओ दुष्टांत आज आसा, अर्थात बपतिस्मअ, प्रभू यीशू मसीहै जिऊंदै हणें का बाद बचाऊआ तम्हें; (तेतो मतलब नि इहय आधी कि शरीरो मैल करनअ दूर, पर इहय कि शुध बिबेका संघे हणअ परमेश्वरे बशै)। 22 सह बेठअ स्वर्गें नाशी करै परमेश्वरे दैहणीं बाखा और स्वर्गदूत, अधिकारी और सामर्थी किये तेऊए अधीन।

### बधळूई दी जिन्दगी

4 तै, जै प्रभू यीशू मसीह बी शरीरा दी हई करै दुख चकअ, ता तम्हें बी कशा तेऊए ईच्छा धारण करी करै अस्त्र-शस्त्र। किल्लहैकि जुणीं शरीरा दी दुख चकअ, सह ग्अ पापा का छुटी। 2 ताकि आजू आपणीं बची दी



शारीतिक जिंदगी माहूँए अभिलाषे साबै निं पर एऊ साबै बिताऊआ कि परमेश्वरे कै इछा आसा । 3 किल्हैकि होरी जातीए इछे साबै काम करने और लुचपने बूरी चाहना, मतवाळअ पन, लीलाक्रीड़ा, पियकडपन और घृणित मुर्तिपूजा, जिधी पैहलै हाम्हेँ आपणअ बगत बरैबाद किय, सह हुअ एबै बतेरअ । 4 एता का हुआ तिन्नां रैहनगी कि तम्हें निं इहै भारी लुचपना दी तिनों साथ दैन्दै और तैही ता तियां तम्हां लै बूरअ भलअ बोला । 5 पर तिन्नां लागणअ तेऊ लै इन्नां सोभी गल्लो लेखअ दैणअ, जुंण जिऊंदै और मूँएँदैओ न्याय करा । 6 किल्हैकि मूँएँ दै लै बी शणांऊअ सुसमाचार तैही कि शरीरा दी ता तिनों न्याय होए, पर आत्मां दी रहे परमेश्वरे साबै जिऊंदै ।

### परमेश्वरे भलै भडारी

7 सोभी गल्लो अंत आसा छेकै हणें आळअ, तैहीता संयंमी हई करै प्राथणा लै रहा जागदै । 8 और सोभी दी उत्तम गल आसा एही कि एकी दुजै संघे करा खासअ प्रेम, किल्हैकि प्रेम ढोपा कई पाप । 9 बिणां कुड़कुड़ाए करा एकी दुजेए पाहूणचारी । 10 जसा लै जिहअ बरदान आसा भेटअ द, सह लाआ तेऊ परमेश्वरे कई प्रकारे भलै अनुग्रहे भलै भडारी जिहै एकी दुजेए सेऊआ लै । 11 जै कुंण बोले ता इहय बोले कि मानों परमेश्वरो बचन आसा; जै कुंण सेऊआ करे, ता तेसा शगती करै जुंण परमेश्वर दैआ, जेता दी सोभी गल्ला दी प्रभू यीशू मसीह करै परमेश्वरे महिमा प्रगट होए । महिमा साम्राज्य आसा जुगै-जुगै तेऊओ ई ।

### मसीहे दुखा दी साझू हणअ

12 हे प्रियो, जुंण दुखा रुपे आग तम्हां परखणा लै तम्हां दी भकी दी आसा, एता लै निं इहय सोची करै परशैन ह्आ कि कोई नोखी गल आसा तम्हां लै लागी दी बितदी । 13 तेखअ जिहै-जिहै तम्हें मसीहे दुखा दी भागी ह्आ, आनंद करा, जेता करै तेऊए महिमा प्रगट हंदी बारी तम्हें आनंदित और मगन होए । 14 तेखअ जै मसीहे नांओआ लै थारी निंदा बी ह्आ, तै आसा तम्हें धन्य, किल्हैकि महिमे आत्मां जुंण परमेश्वरे आत्मां आसा, तम्हें परदै छैऊअ द । 15 तम्हां मांझै निं कोई बी आदमीं हत्यारअ, या चोर, या कुकर्मीं हणें या परायें कामां दी हाथा पाई करै निं दुख पाई । 16 पर जै तम्हें मसीह हणें कारण तम्हें दुख पाए, ता तै निं तम्हें शरमिंदै हई, पर एसा गल्ला लै करै परमेश्वरे महिमा । 17 किल्हैकि सह बगत आसा ग्अ द एछी कि पैहलै परमेश्वरे लोगो न्याय होए । ता जै न्याये शुरुआत हाम्हां का ही हणीं, ता सोचा कि तिनों किहअ अंत हणअ जुंण परमेश्वरे सुसमाचारा नाई मंदै? 18 और “जै धर्मीं मांझैई कठणाई करी करै मोक्ष भेटणअ,

ता भक्तीहीन और पापीओ कै ठकाणअ आसा?”

19 तैहीता जुंण परमेश्वरे इछानुसार दुख चका, तियां भलाई करदी, आपणें प्राणा सभाळा विश्वासयोग्य सृजणहारे हाथै ।

### बुजुर्गा और नौजुआना लै संदेश

5 तम्हां मांझै जुंण बुजुर्ग आसा, हूँ समझाऊआ तम्हां तिन्नां जिहअ बुजुर्ग और मसीहे दुखो गुआह और प्रगट हणेंआळी महिमा दी साझू हई करै कि 2 परमेश्वरे तेऊ छुंडे, जुंण तम्हां बिचै आसा, करा रखबाली । एसा गल्ला निं कोई दबाबा दी एछी करै पर परमेश्वरे इछा और आनंदा दी । नीच कमाई लै निं पर मन लाई करै । 3 और जुंण लोग तम्हां का सभाळै दै आसा, तिन्नां दी निं आपणअ अधिकार रहैऊआ, पर तिन्नां लै बणां आदर्श । 4 और जांऊं प्रधान रखबालअ प्रगट हणअ, तेभै दैणअ तम्हां लै महिंमामय मुकुट, जुंण कधि निं फिकअ पळदअ । 5 हे नौजुआनों, तम्हें बी रहा, बुजुर्ग, अधीन, ईधी तैणीं कि तम्हें सोभै एकी दुजेए सेऊआ करना लै दीन हई करै आपणीं कमर बाह्ना, किल्हैकि परमेश्वर करा अभिमानिओ सहनअ, पर दीन मना आळै लै दैआ अनुग्रह ।

6 इहय करै परमेश्वरे बलबंत हाथा हेठै रहा दीन हई करै, ताकि सह तम्हां सही बगतै बढाऊए । 7 और आपणीं सारी चिंता छाडा तेऊदी, किल्हैकि तेऊ आसा थारअ धेन । 8 चुशत ह्आ, और जागदै रहा, किल्हैकि थारअ बिरोधी शैतान रहा गर्जणेंआळै शैरा जिहअ लोळअ लागी कि कुंण खाणअ धेळी-चिरी करै । 9 विश्वासा दी दृढ हई करै, और इहय समझी करै करा तेऊओ सहनअ कि थारै भाई जुंण संसारा दी आसा, लागे दा ईहैई दुखा सैहदै । 10 एबै परमेश्वर जुंण सारै गूणा-जशा दैणेंआळअ आसा, जुणीं तम्हें मसीहा दी आपणीं अनंत महिमा लै शादै दै आसा, थोळी घळी दुखा सैहणें का बाद करनै तम्हें बादा आप्पैई बलबंत सिध और स्थिर । 11 तेऊओई साम्राज्य लोळी जुगै-जुगै रहअ । तथास्तू ।

### आखरी आदर-सत्तकार

12 मंएँ सिलबानुसे हाथै, जसा हूँ विश्वासयोग्य भाई समझा, थोळअ जिहअ लिखी करै तम्हें समझाऊए और ग्वाही दैनीं कि परमेश्वरो सच्चअ गूण जश अनुग्रह आसा अहैई, एथ दी रहा स्थिर । 13 जुंण बाबुलै तम्हें जिहै लोग चुनै दै आसा, सह और मेरअ पुत्र मरकुसै बी आसा तम्हें लै राजी-बाजी दैनीं दी । 14 प्यारा दी चुंजी-माक्की दैई करै एकी दुजै लै करा नमस्कार ।

तम्हां सोभी लै जुंण मसीहा दी आसा शांती होए ।

## 2 पतरस

### भूमिका

पतरसे दुजी चिठी लिखी ती सोभी जेगा फैलै दै शुरुआती मसीही विश्वासीए समुदाये नांऊएँ। एसा चिठीए खास फिकर करनें गल्ल आसा झूठे शिक्षा दैणें आळेए काम और तिन्ने शिक्षा का पैदा हुई बुराईए खलाफ संघर्ष करनअ। इन्ना समस्या उतर भेटा परमेश्वर और प्रभू यीशू मसीहे सच्चे ज्ञाना दी टेकी रही करै, सह ज्ञान जुग तिन्नां लोगा करै पजेळअ जुणीं प्रभू यीशू मसीह आपणीं आच्छी भाळअ और तेऊए शिक्षा शूणीं दी आसा। लिखणें आळे आसा खासकर तिन्ने शिक्षो हैळअ जुग इहय दाऊअ पेश करा कि मसीह निं भी फिरी एछणअ। लिखणें आळअ बोला इहय कि इहय ज़ाह्नीयां कि मसीह एछणां लै आसा देर, पर असली दी आसा इहय एते तैणीं कि परमेश्वर निं चाहंदअ कोई बी नाश होए, पर सोभी लोळी मना बदळणेंओ मोकअ भेटअ।”

रूप-रेखा

भूमिका 1:1,2

मसीही बुलाहट 1:3-21

झूठे शिक्षा दैणेंआळे 2:1-22

मसीहो आखरी आगमन 3:1-18

### आदर-सत्कार

1 शमोन पतरसे तरफा का जुंण मसीहो दास और प्रेरित आसा, तिन्नां लोगे नांओएँ जुणीं म्हारै परमेश्वर और उद्धारकर्ता प्रभू यीशू मसीहे धार्मिकता करै म्हारअ किमती विश्वास आसा प्राप्त किय द।

2 परमेश्वर और म्हारै प्रभू यीशू मसीहे जाण-बछैणां करै रहे तम्हां सोभी लै दैया और शांती तम्हां दी भरी-भरी करै बढदी लागी।

### ईश्वरीय बुलाहट और चुनाव

3 किल्लहैकि तेऊए इश्वरीय सामर्थे सोभ किछ जुंण ज़िंदगी और भक्ती संघे डाहा संबंध, हाम्हां आसा भेटअ द सह तेऊए ई जाण-बछैणां करै, जुणीं हाम्हां आपणीं महिमां और सदगुणें साबै आसा शादें दै। 4 जेते तैणीं तेऊ हाम्हां लै बहूमुल्य और बडी प्रतिज्ञा आसा दैनीं दी। ताकि तिन्नां करै तम्हें चिजणें-शळणें का छुटी करै जुंण संसारे बुरी अभिलाषा करै हूआ, इश्वरीय स्वभाबे साझू हई सके। 5 और एतेई बजह संघे तम्हें सोभी प्रकारे कोशिश करी करै आपणें विश्वासा परेंदें सदगुण, और सदगुणां परेंदें समझ, 6 समझा परेंदें संयम, संयमा परेंदें धीरज और धीरजा परेंदें भगती। 7 भगती परेंदें भाईचारेए झूरी, और भाईचारेए झूरी परेंदें रहा प्रेमा दी बढदै लागी।

8 किल्लहैकि जै तम्हां दी ईयां गल्ला होए, और बढदी रहे, ता तै नि तम्हें म्हारै प्रभू यीशू मसीहे बछैणां दी नकाम्में और निष्फल हणें दैणअ। 9 और जसा दी ईयां गल्ला नांई आथी, सह आसा काणअ, और तेऊका धेछिआ पालअ, और सह भूलअ आपणीं पूर्वकाले पापा का धोऊई करै शुध हणें। 10 तैहीता, हे भाईयो, आपणें शादणें और चुनणेंए सिध हणा लै रहा भली भांती कोशिश करदें लागी। किल्लहैकि जै तम्हें इहय करे, ता तै निं कधि बी तम्हां ठोहळ लागणीं। 11 इहय करै सका तम्हें म्हारै प्रभू और उद्धारकर्ता यीशू मसीहे अनंत राज्य लै बडै आदरमाना संघे नाशी।

### पतरसो आखरी बगत

12 एऊई साबै, एही ता आसा तम्हां का थोध, जुंण सच्चअ बचन तम्हां भेटअ द आसा, तेथ रहा तम्हें बणीं। पर तैबी बी मूह रहणअ तम्हां का इन्नां गले आदी फरेऊणा लै हमेशा त्यार। 13 और हूँ समझा एसा गल्ला आप्पुलै ठीक कि जेभै तैणीं हूँ एऊ डेरै दी आसा, तेभै तैणीं रहणअ मूह तम्हां का आद फरेऊई करै तम्हां उभारदअ लागी। 14 किल्लहैकि मुखा आसा थोध कि, मसीहे बचने साबै आसा मेरै डेरै ढोळणेंओ बगत छेकै एछणें आळअ।

15 तैहीता मूह एही कोशिश करनीं कि मेरै नाशणें का बाद तम्हें इन्नां सोभी गल्ला हमेशा आद करी सके।

### मसीहे महिमां आच्छी सहानें हेरनें आळै गुआह

16 किल्लहैकि जधू हाम्हें तम्हां लै आपणें प्रभू यीशू मसीहे सामर्थो और एछणेंओ समाचार दैनअ त, सह निं तम्हां का चलाकी करै बणाई दी काहणीं खोजी ती, पर हाम्हें भाळअ त आपणीं आच्छी तेऊओ प्रताप। 17 कि तेऊ परमेश्वर पिता का आदर और महिमा पाई तधू, जधू तेऊए प्रतापमय महिमा लै एही आकाशबाणीं हुई कि अह आसा मेरअ प्यारअ पुत्र और एऊ का आसा हूँ खुश। 18 और जधू हाम्हें तेऊ संघे पबित्र धारा दी थिये, ता स्वर्गा का शुणीं हाम्हें भी एही ई बाणीं। 19 और हाम्हां सेटा जुंण भविश्याबगतो बचन बी आसा, सह बी बणांआ एसा घटना पाकी। और तम्हें करा एसा गल्ला ठीक कि इहय समझी करै दैआ तेऊ दी धैन कि सह आसा एक दिपक, जुंण न्हैरी जैगा तेभै तैणीं रहा प्रेशे करदअ लागी जेभै तैणीं कि राच भेदी नां लागे, और दोतकअ तारअ थारै दिलै ना चमकी उझिए। 20 पर पैहलै लआ एसा गल्ला समझी कि पबित्र शास्त्रे निं कोई बी भविश्यबाणीं कोहिए आपणें बचारे साबै पूरी हंदी। 21 किल्लहैकि कोई बी भविश्यबाणीं निं माळ्णुं आपणीं इछा करै कधि हई, पर भक्त बोला तै पबित्रात्मां का शुणीं करै परमेश्वर तरफा का।

### झूठे गुरू

2 जिहै तिन्नां लोगा बिचै झूठै भविश्याबाणीं करनें आळै थिये, तिहैई हणें तम्हां बिचै बी झूठै भविश्याबाणीं करनें आळै और उपदेशक, जसा नाश करनेंआळै पाखंडो उदघाटण लुकी-लुकी करै करनअ, और तेऊ सुआर्मिओं, जुणीं तियां मोलै आसा लुए दै, करनअ नकार और आप्पू पळणअ तिन्नां छेकै बिनाशा दी। 2 और कई लोगा करनअ तिन्नां जिहअ लुचपन, जसा करै सच्चाईए रसते निंदा हणीं। 3 तिन्नां लाळ्चे तैणीं गल्ला बणांई करै बणांणें तिन्नां तम्हें आपणें फाईदे तैणीं, और जुंण दंडे आज्ञा तिन्नां लै पैहलै का ही हई मुकी दी आसा, तेता एछणां लै निं किछे देरी आथी, और तिन्ने बिनाशा निं उघी लागदी।

4 किल्लहैकि जै परमेश्वरै तियां स्वर्गदत्त निं छाडै जुणीं पाप किय, पर नरकै भेजी न्हैरै कुंडे पाए, ताकि न्याये धैळी तैणीं बंदी रहे। 5 और पैहले जुगो संसार बी निं छाडअ, पर भक्तिहीन संसारा दी माहा जलप्रळया भेजी करै धर्म प्रचार करनें आळै तेऊ नूहा संघे बचाऊए आठ आदमीं। 6 ता सदोम और अमोरे नगरो बनाश करी करै दैनीं तिन्नां लै एही सजा कि तिनीं बणांअ दहई

करै छार ताकि तियां आजू एछणें आळै भक्तीहीन लोगा लै एक दृश्टांत बणें। 7 और धर्मी लूत, जुंण अधर्मीए अशुध चाल चलणा करै बडअ दुखी त, तेऊलै दैनअ छुटकारअ। 8 (किल्हैकि सह धर्मी तिन्रां बिचै रही करै, और तिन्रें अधर्मे कामां भाळी करै, और शुंणी करै हर धैलै हूआ त आपणें मनै दुखी)। 9 ता प्रभू जाणां राम्बळै करै आपणें भगत परिक्षा का काढणें और अधर्मी डाहणअ न्याये धैळी तैणीं दंडे दशा दी। 10 खासतर तिन्रां, जुंण अशुध अभिलाषा पिछू शरीरे साबै चला, और प्रभूता समझा तुछ;

तियां आसा ढीठ और हठी, और तियां निं उंचै पदा दी बेशणें आळै लै बूरअ भलअ बोळणें का डरदै। 11 तैबी बी स्वर्गदूत बी, जुंण शगती और सामर्था दी तिन्रां का बडै आसा, प्रभूए सहनै निं तिन्रां लै बूरअ-भलअ बोली करै दोष लानदै आथी। 12 पर ईयां लोग आसा निर्बुधी और पशू बराबर, जुंण ढाकणां लै और नाश ई हणां आसा उत्पन्न हुएे दै। और ज़सा गल्ला ईयां जाणदै ई निं आथी, तिन्रें बारै बोला ईयां होरी लै बूरअ-भलअ, और ईयां चिजणें-शळणें आपणें ई शळाना दी। 13 होरी लै बुरअ भलअ बोली करै हणअ तिन्रें आपणअ ई बूरअ। तिन्रां लागा धैळी दपहरै सुखबिलास करनअ शोभलअ। अह आसा कळंक और दोष। ज़ाऊं तियां तम्हां संघै खाआ-पिया ता आपणों बाखा करा तियां प्रेम भोज करी करै भोग-बिलास। 14 तिन्रें आच्छी आसा कंजरी बसी दी, और तियां निं पाप करै बिण्हीं रुकी सकदै। और तियां चंचल मना आळै शकाऊआ बी। तिन्रें मना गूआ दा लाळचा करनेओ भैस पळी, तियां आसा संतापे संतान। 15 तियां आसा सिधै रसतै छाडी भटकै दै, और तियां नाठै बोओरे शोहरू बिलामे रसतै दी; जुंणी अधर्मे मजदरी लै प्यार किया। 16 पर तेऊए अपराधे बारै आसा उलाहना इधी तैणीं की दी कि अबोक नाओए गाधी बी आदर्मी ज़ेही गल्ला करी करै तेऊ भविष्याबगते बाबलैपना का सह रोकअ।

17 ईयां लोग आसा शुक्कें कुंए, और दिशा बागरी करै तुहदै बादळ, इन्नां लै आसा घोर न्हैरअ डाहअ द। 18 ईयां फसाऊआ बेकार घमंडे गल्ला करी करै लुचपनें कामां करी करै तिन्रां लोगा शारीरे ईच्छा दी, जुंण भटकै दै बिचा का माची निखळदैई आसा लागै दै। 19 तियां तिन्रां लै आज़ाद हणें प्रतिज्ञा ता दैआ, पर आप्पूई आसा शळणें दास, किल्हैकि जुंण आदर्मी ज़सा का हारा, सह बणां तेऊओ दास। 20 और ज़ै तियां प्रभू और उद्धारकर्ता यीशू मसीहे बछैणां करै संसारे नाना प्रकारे अशुधता का बची निखळै, और तेखअ तेता दी ही शाची करै हारै, ता तिन्रें पिछली दशा हूई दा पैहली का बी बूरी। 21 किल्हैकि धर्मे रसतै थोघ नाई हणअ ई त तिन्रां लै एता का भलअ कि तेतो थोघ लागी करै पबित्र आत्मां करै फिरदै, जुंण तिन्रां का सभाळी ती। तिन्रां लै बेशा अह कहाबत ठीक कि 22 कुत्तअ नाशा आपणों उल्टी चाटदअ और सुंगर नाशा न्हैऊई धोई करै बी चिकरैई जैदरा लै।

### प्रभूए फिरी एछणें धैळी

3 हे प्रियो, ऐबै लिखा हूँ तम्हां लै एसा दुजी चिठी, और इन्नां दूही चिठी दी दैआ हूँ तम्हां का आद फरेऊई करै थारै शुध मना जगाऊणीं कि

2 तम्हें डाहै तिन्रां गल्ला आद जुंण पबित्र भविष्याबगता पैहलै ई आसा बोली दी, होर प्रभू और उद्धारकर्ते तेसा आज़ा बी डाहा आद जुंण प्रेरितै तम्हां लै दैनी ती। 3 होर एसा गल्ला लूए पैहलै ज़ाणीं कि आखरी धैलै दी एछणें हासी मज़ाक और ठठै करनै आळै, जुंण आपणों अभिलाषे साबै चलणें। 4 होर तिन्रां बोळणअ इहय कि तेऊए ऐछणें प्रतिज्ञा किधी आसा? किल्हैकि जधकै बाब दादै मुंए दै आसा, तथा ओही आसा ईयां गल्ला एही ई, जिहअ सृष्टीए शुरुआता दी थिय? 5 तियां बिसरुए ज़ाणीं भूझी करै एसा गल्ला कि परमेश्वरे बचना करै आसा सरग पराणें जमानै का मैची तैणीं और धरती बी पाणीं का बणीं करै मैची तैणीं आसा स्थिर। 6 इने बज़ह ई हुअ तेऊ जुगै संसार पाणीं दी डुबी करै नाश। 7 पर आज़ा कालकै सरग और पृथूई आसा तेऊई बचना करै एते तैणीं डाहै दै कि एकी धैळै पाणें ईयां दहई: और भक्तीहीन आदर्मीए न्याय और नाश हणेंए धैळी तैणीं डाहणें ईयां ईहै ई।

8 हे प्रियो, अह एक गल निं लोळी तम्हां का गुप्त रही कि प्रभू सेटा हूआ एक धैळी म्हारै हजार साला बराबर। 9 प्रभू निं आपणों प्रतिज्ञा करी करै देर करदअ, ज़ेही देर कई लोग समझा; पर तम्हां लै धरा सह धीर, होर सह निं इहय चाहंदअ कि कोई बी नाश होए, पर सह चाहा इहय कि सोभी लै लोळी मना फरेऊणेंओ मोकअ भेटअ। 10 पर प्रभूए सह धैळी एछणीं चोरा ज़ेही, तेसा धैळी सरग नाशणअ गुळूबिजळूए बडी डिम्हांगळिम्हीं छेळा करदी और तेते तत्व गळणें बडै भारी तातै हूई करै, होर पृथूई और तेते सारै काम दज़णें। 11 ता, जै ईयां चिज़ा इहय करै गळणें आळी आसा, ता सोचा कि तम्हां पबित्र चालचलणां और भक्ती दी किहअ चाहिए हणअ? 12 होर परमेश्वरे तेसा धैळी न्हैळै किहै रहणअ और तेऊए छेकै एछणां लै केही कोशिश चाहिए करनीं, ज़सा करै कि सरग दज़णअ आगी जैदरी और सरगे गण आगीए जाह्नां करै गळणें? 13 पर तेऊए बाईदेए साबै हाम्हां भाळणीं एक नऊंई पृथूई और सरग ज़ेथ धार्मिकता करनअ बास।

### तैहूई करै रहा विऊधै

14 तैहीता, हे प्रियो, जै कि तम्हां इन्नां गले आशा आसा, तै करा एही कोशिश कि तम्हें शांती दी तेऊए सहनै निष्कलंक और निर्दोष निखळै 15 और म्हारै प्रभू यीशूए धीरजा समझा उद्धार, जिहअ म्हारै भाई प्रिअ पौलुसै बी तमा लै तेऊ ज्ञाने साबै जुंण तेऊ भेटअ, तम्हां लै आसा लिखअ द। 16 तिहअई तेऊ तम्हां लै आपणों सोभी चिठी दी बी आसा इन्नां गले चरचा की दी, ज़ेथ दी कई गल्ला एही आसा, जुंण समझा का बागै आसा, और नपहळ और चंचल लोग बणांआ तिन्रां अर्थां बी पबित्र शास्त्रे होरी गल्ला जिहै खींच तान करी करै आपणें बनाशो कारण। 17 तैहीता, हे प्रियो, तम्हें रहा इन्नां गल्ला पैहलै ही समझी करै चतैन, ताकि अधर्मीए भरमाऊणें दी शाची करै आपणों स्थिती आपणें हाथै निं किधी खोई। 18 पर म्हारै प्रभू और उद्धार करनै आळै प्रभू यीशू मसीहे बछैणां दी रहा बढदै लागी। तेऊएई महिमा लोळी एभै और जुगै-जुगै हंदी रही॥ तथास्तु॥

# 1 यूहन्ना

## भूमिका

यूहन्नै एसा पैहली चिठीए आसा दई उदेश्य : (1) आपणें पढळणें आळें परमेश्वर और तेऊए शोहरू यीशू मसीहे साझा दी जिनंदगी जिकुंणां लै उत्साहित करनअ। (2) तिन्नां लै एही झूठी शिक्षे खलाफ चतैनगी दैणीं जेता करै अह साझ चुटा। अह झूठी शिक्षा ती एसा गल्ला परेंदै कि भौतिक संसारे संपर्का दी एछणें करै पनपा बुराई, तैहीता, यीशू मसीह परमेश्वरो पुत्र, निं असली दी मनुष्यो पुत्र हई ई सकदअ। इन्नां एही शिक्षा दैणें आळेंओ त इहअ दाऊअ कि मोक्षा पाणां लै लागा हरेकी माळूं संसारे जिनंदगीए बारै कई जिजा का मुक्त हणअ; ता तियां सखाऊआ तै इहय कि निति-पत्त और भाई संघे प्रेम जेही गल्लो निं मोक्षा का कोई लैणअ-दैणअ आथी।

एसा शिक्षे खलाफ बोला लिखणें आळअ साफ-साफ कि यीशू मसीह त असली दी एक मानव, ता तेखअ दैआ सह एसा गल्ला दी जोर कि तियां लोग जुण यीशू मसीह दी विश्वास करा और परमेश्वरा संघे झूरी डाहा, तिन्नां लागा आप्पू बिचै बी झूरी जरूरी डाहणीं।

रूप-रेखा

भूमिका 1:1-4

न्हैरअ और प्रैशअ 1:5-2:29

परमेश्वरे सन्तान और शैतानें सन्तान 3:1-24

सच और झूठ 4:1-6

प्रेम डाहणेंओ कर्तव्य 4:7-21

विजयी विश्वास 5:1-21

## जिनंदगीओ वचन

1 तेऊ जिकुंदै बचने बारै, जुण शुरु का ई थिय, जुण हाम्हें शुणअ द आसा और जुण हाम्हें आपणीं आच्छी भाळअ, इधी तैणीं, जुण हाम्हें धैना संघे भाळअ और आपणें हाथा करै छुंअ। 2 अह जिकुंदअ हुअ प्रगट और हाम्हें सह भाळअ बी, और हाम्हें तेऊए ई ग्वाही बी दैआ, जुण पिता परमेश्वरा संघे थिय और हाम्हें बिचै हुअ प्रगट। 3 जुण बी हाम्हें भाळअ और शुणअ द आसा, तेतो समाचार शणाऊआ हाम्हें तम्हां का बी ताकि तम्हें बी हाम्हें संघे भगीदार हई सके और म्हारी साझ आसा पिता परमेश्वरा संघे और तेऊ संघे बी जुण पुत्र प्रभू यीशू मसीह संघे आसा। 4 होर इन्नां गल्ला लिखा हाम्हें एते तैणीं कि म्हारी खुशी लोळी पूरी हुई।

## ज्योति दी हांढणअ

5 जुण समाचार हाम्हें तेऊ का शुणअ द आसा, सह आसा इहय कि परमेश्वर आसा ज्योती, और तेथ निं किछ बी न्हैरअ आथी। 6 जै हाम्हें इहय बोले कि प्रभू संघे आसा म्हारी साझ, और तेखअ बी चले हाम्हें न्हैरै दी, तै आसा हाम्हें झूठै और तै निं हाम्हें सचाई दी चलणें आळें आथी। 7 पर जै जिहअ प्रभू ज्योती दी आसा, तिहई हाम्हें बी ज्योती दी चले, तै हआ म्हारी एकी दुजै संघे साझ; और प्रभू यीशूओ लोहू करा हाम्हें सोभी पापा का शुध। 8 जै हाम्हें इहय बोले कि हाम्हें दी निं किछे पाप आथी, ता तै दैआ हाम्हें आप्पू लै धोखअ, और तै निं हाम्हें दी कोई बी सचाई आथी। 9 जै हाम्हें आपणें पापा मनै, ता तै आसा प्रभू यीशू म्हारै पापा का हाम्हें लै माफी दैणें आळअ और म्हारै सारै अधर्मा का हाम्हें शुध करना लै विश्वास करनै जोगी और धरमी। 10 पर जै हाम्हें इहय बोले कि हाम्हें निं किछे पाप किय, तै बणांआ हाम्हें तेऊ झुठअ और तै निं तेऊओ बचन हाम्हें दी आथी।

## मसीह आसा म्हारअ मददगार

2 हे मेरै शोहरूओ, मरें लिखी तम्हां लै तै ईयां गल्ला एते तैणीं कि तम्हें पाप ना करे; पर जै कोई पाप करे, ता तेता लै आसा बाप्पू सेटा एक सहायक, अर्थात प्रभू यीशू मसीह। 2 सहेई आसा म्हारै पापो प्राश्चित, सिधअ

म्हारै ई निं, पर सारै संसारे पापा लै बी आसा सहेई। 3 जै हाम्हें तेऊए आज्ञा मनै, ता तै हेरनअ हाम्हें समझै कि हाम्हें हेरअ सह बछैणीं। 4 जुण बी इहय बोला कि हाम्हें हेरअ प्रभू यीशू बछैणीं, और तेऊए आज्ञा दी निं चलदअ आथी, सह आसा झुठअ और तेऊ दी निं कोई बी सचाई आथी। 5 पर जो कोई तेऊए बचना दी चले, तेऊ दी हुअ सच्ची परमेश्वरो प्रेम सिध; एता करै चला हाम्हें का पतअ कि हाम्हें आसा तेऊ दी। 6 जै कुंण इहय बोला कि हूँ रहा प्रभू दी बणीं, तेऊ चाहिए कि सह आप्पू बी तिहअ ई चले, जिहअ प्रभू आप्पू थिय।

## नकुंई आज्ञा

7 हे प्रियो, हूँ निं तम्हां लै कोई बी आज्ञा लिखदअ, पर सहेई पराणीं आज्ञा जुण तम्हां शुरु का भेटी दी आसा, सह आसा बचन, जुण तम्हें शुणअ द आसा। 8 तेखअ लिखा हूँ तम्हां लै एक नकुंई आज्ञा; अह आसा तेऊदी और तम्हां दी सच्ची, किल्हैकि न्हैरअ नाशा दूर और सचाईए जेत लागा चमकदी। 9 जुण इहय बोला कि हूँ आसा ज्योती दी; और आपणें भाई संघे करा जीद, सह आसा मैची तैणीं न्हैरै दी। 10 जुण आपणें भाई लै प्रेम-प्यार करा, सह रहा ज्योती दी और सह निं कधि ठोहळ खाई सकदअ। 11 पर जुण आपणें भाई संघे बैर डाहा, सह आसा न्हैरै दी और सह हांढा बी न्हैरै दी, और तेऊ का निं इहय थोघ हंदअ कि सह किधा लै चालअ नाशी, किल्हैकि न्हैरै आसा डाही दी तेऊए आच्छी कारणी करी।

12 हे लान्हेंओ, हूँ लिखा तम्हां लै एते तैणीं कि प्रभू यीशूए नांऊए आसा हुए दै थारै पाप माफ। 13 हे पितरो, हूँ लिखा तम्हां लै एते तैणीं कि जुण शुरु का आसा तम्हें हेरा तिन्नां गल्ला जाणीं। हे जुआनो, तम्हां लै लिखा हूँ एते तैणीं कि तम्हें आसा तेऊ दुष्ट शैताना का जितती गृए दै, और हे शोहरूओ, तम्हां लै लिखा हूँ एते तैणीं कि तम्हें हेरअ बाप्पू बछैणीं। 14 हे पितरो, मरें लिखअ तम्हां लै एते तैणीं कि जुण शुरु का आसा, तम्हें हेरअ सह ज़ाणीं और हे जुआनों, तम्हां लै लिखअ मरें तै कि तम्हें बलबंत होए, और परमेश्वरो बचन तम्हां दी बणीं रहे, और तम्हें आसा गृए दै तेऊ दुष्टा का जितती।

### संसार संघे झूरी निं डाहणीं

15 तम्हें ना संसार का और ना संसारे जिजा का प्रेम करा। जै कुंण संसार का प्रेम करा; तेऊ दी निं बापूओ प्रेम आथी। 16 किल्हैकि जुंण किछ बी संसारे आसा, अर्थात शरीरे चाहना, आच्छीए लालसा, जिऊणेंओ घमंड, सह निं बापू (परमेश्वरे) तरफा का आथी, पर सह आसा संसारे तरफा का। 17 संसार और संसारे अभिलाशा ह्आ दुहै नाश, पर जुंण परमेश्वरे इछा दी चला, सह रहणअ सर्वदा बणीं।

### मसीह-बरोधी

18 हे शोहरुओ, अह आसा आखरी बगत, और जिहअ तम्हें शुणअ द आसा कि मसीहो बिरोधी आसा एछणें आळअ, तेते साबे गेए दा कई मसीह बिरोधी उझूई; इहय करै लागा हाम्हां का थोघ कि अह आसा आखरी बगत। 19 तियां निखळे दै ता आसा हाम्हां ई बिचा का, पर तियां नाई तै म्हारे आथी; किल्हैकि जै तियां म्हारे हंदै, ता तै रहंदै तियां हाम्हां संघे। पर हाम्हां का दूर नाठै तियां एते तैणीं कि इहय थोघ लागे कि तियां नि हाम्हां सोभी संघे आथी। 20 पर थारअ आसा तेऊ पबित्रा कर अभिषेक हुअ द और तम्हें हेरा सोभी गला समझी। 21 मंरें नि तम्हां लै एते तैणीं लिखअ कि तम्हां का नि सच्चाईओ थोघ आथी, पर मंरें लिखअ तम्हां लै तै कि तम्हां का आसा थोघ और तै बी कि कोई बी झूठ नि सच्चाईए तरफा का आथी। 22 झूठअ कुळ आसा? सिधअ सह जुंण प्रभू यीशूओ मसीह हणेंओ नकार करा; और मसीहो बिरोधी आसा सह ई जुंण बापू और शोहरुओ नकार करा। 23 जुंण शोहरुओ नकार करा, तेऊ सेटा निं बापू बी आथी, जुंण शोहरु मना, तेऊ सेटा आसा बापू बी। 24 जुंण बी तम्हें शुरु का शुणअ द आसा, सहई लोळी तम्हां दी बणीं रहअ, तै रहणें तम्हें बी शोहरु ओर बापू दी बणीं। 25 और जसा गले तेऊ हाम्हां लै कूऊलै बचन दैने दै आसा, सह आसा अनंत जिऊण।

26 मंरें लिखी दा तम्हां लै ईयां गला तिन्नै बारै, जुंण तम्हें भरमाऊआ। 27 और थारअ अभिषेक जुंण प्रभू आसा किय द, सह रहा तम्हां दी बणीं; तम्हां निं एसा गलो मतलब आथी कि तम्हां कोई तम्हां सेटा एछी करै सखाऊए, बल्कि जिहअ अभिषेक जुंण प्रभू किय द आसा, सह सखाऊआ तम्हां का सोभे गला, और सह आसा सच्चअ, और झूठअ निं आथी। जिहै तम्हें तेऊ सखाऊए दै आसा, तिहई रहा तम्हें तेऊ दी बणीं।

### परमेश्वरे लुआद

28 इहअ करै हे शोहरुओ, प्रभू दी रहा बणीं, कि जेभै सह प्रगट होए, तेभै लोळी हाम्हां हैअ हुअ कि जेभै सह एछे, तेभै निं लोळी पळअ शर्मिंदअ हणअ। 29 पर जै हाम्हें इहय बोले कि हाम्हें निं किछै पाप किय, तै बणांआ हाम्हें तेऊ झूठअ और तै निं तेऊओ बचन हाम्हां दी आथी।

3 हेरा, पिता परमेश्वरै हाम्हां संघे केही झूरी की कि हाम्हें तेऊए शोहरु हई सके। हाम्हें आसा बी, तैहीता संसार हाम्हां बछैणदअ निं, किल्हैकि तिन्नै निं प्रभू, म्हारअ बापू बी बछैणअ। 2 हे प्रियो, एबै आसा हाम्हें परमात्मं संतान, और मैची तैणीं नि अह प्रगट हुअ कि आजू हाम्हें किजै-किजै हणें, पर एतरअ आसा हाम्हां का थोघ कि जेभै सह प्रगट होए, तेभै हणें हाम्हें बी तेऊ जिहै, किल्हैकि सह हेरनअ हाम्हां तिहअई जिहअ सह आसा। 3 जुंण बी तेऊ दी आशा डाहा, सह करा आपू बी तिहअ पबित्र जिहअ प्रभू पबित्र आसा।

4 जुंण पाप करा, सह करा शास्त्रो बिरोध और पाप आसा शास्त्रो बिरोधी। 5 तम्हां का आसा एसा गलो थोघ कि सह हुअ एते तैणीं प्रगट कि पाप हरे, और तेऊए स्वभावा दी नि पाप आथी। 6 जुंण बी तेऊ प्रभू दी बणीं रहा, सह निं पाप करदअ। जुंण पाप करा, तेऊ ना ता प्रभू भाळअ द आथी, ना सह तेऊ बछैणदअ आथी। 7 हे शोहरुओ, कसरै ज्ञाणें निं लागी; जुंण धर्मं काम करा, सह आसा तेऊ प्रभू जिहअ ई धरमीं। 8 जुंण पाप करा, सह आसा शताना बाखा का, किल्हैकि शैतान करा शुरुई का पाप। परमेश्वरो शोहरु हुअ एते तैणीं प्रगट कि शैतानें तिन्नां सारै कामा नाश करे। 9 जुंण कोई बी परमेश्वरा

का जल्मअ द आसा; सह निं कधी पाप करदअ; किल्हैकि तेऊओ बेजअ रहा तेऊ दी बणीं; और सह निं पाप करी ई सकदअ, किल्हैकि सह आसा परमेश्वराई का जल्मअ द। 10 एताई करै बछैणियां परमेश्वरे लुआद और शैताने लुआद; जुंण कोई धर्मं काम नाई करदअ, सह निं परमेश्वरा का आथी, और सह बी नि आथी जुंण आपणें भाई संघे झूरी निं डाहंदअ।

### एकी दुजै संघे करनअ प्रेम

11 किल्हैकि जुंण समाचार तम्हें शुरु का शुणअ द आसा, सह आसा इहय कि हाम्हें एकी दुजै संघे झूरी डाहे। 12 तेऊ कैना जिहअ निं बणीं, जुंण दुष्ट थिय और जुंणीं आपणें भाऊ लै घात किय? तेऊ किय इहय तै कि तेऊए काम तै बूरै और तेऊए भाऊए काम तै धरमीं।

13 हे भाईयो, जै तम्हां संघे संसार बैर करा, ता तेसा गला लै निं रहैण हई। 14 हाम्हें हेरा जाणीं कि हाम्हां आसा मौता का पार तरी करै जिंदगी दी पुजै दै; किल्हैकि हाम्हें करा आपणें भाई लै झूरी। जुंण आपणें भाई लै झूरी नाई करदअ, सह ह्आ मूँरें दै जिहअ। 15 जुंण कोई आपणें भाई लै बैर करा, सह आसा हत्या करनें आळअ; और तम्हां का आसा थोघ कि हत्या करनै आळै दी निं अनंत जिऊण हंदअ। 16 हाम्हें समझी झूरी इहय करै कि, तेऊ प्रभू दैने हाम्हां लै प्राण बी, और हाम्हां बी लागा आपणें भाई लै प्राण दैणै। 17 पर जसा कसा का बी संसारे सम्पती आसा, और आपणें भाई नांगअ भुखअ भाळी करै तेऊलै झीण निं करे, ता तेऊदी किहअ करै रहणअ परमेश्वरो प्रेम बणीं। 18 हे शोहरुओ, हाम्हां निं सिधी बचन और जिभा करै झूरी रहैऊणीं, पर आपणें कामां और सच्चाई करै बी लोळी झूरी कीई।

### परमेश्वरा सहनै हियाव

19 इहय करै बछैणियां हाम्हें कि हाम्हें आसा सच्चाईए; और जसा गला दी म्हारअ मन हाम्हां लै दोष दैआ, तेते बारै सका हाम्हें प्रभूए सहनै आपणें मना लै हैअ दैई। 20 किल्हैकि परमेश्वर आसा म्हारे मना का बडअ; और सह जाणा सोभे गला। 21 हे प्रियो, जै म्हारअ मन हाम्हां लै दोष दैए, तै ह्आ हाम्हां आपणें परमेश्वरा सहनै हैअ। 22 और जुंण किछ बी हाम्हें मांगा, सह भेटा हाम्हां तेऊका; किल्हैकि हाम्हें मना तेऊए आज्ञा; और जिहअ परमेश्वरा पसंद आसा; हाम्हें करा तिहअई। 23 और तेऊए आज्ञा आसा एही कि हाम्हें तेऊए शोहरु प्रभू यीशू मसीह दी विश्वास करे और जेही तेऊ हाम्हां लै आज्ञा दैनी दी आसा, तेऊई साबे आपू बिचै झूरी डाहे। 24 जुंण प्रभूए आज्ञा मना, सह रहा एऊ दी और तेऊ दी बणीं; और एताई करै अर्थात तेसा आत्मां करै जुंण तेऊ हाम्हां लै दैनी दी आसा, हाम्हां का आसा थोघ कि सह रहा हाम्हां दी बणीं।

### आत्मां करनीं परखी

4 हे प्रियो, हरेक आत्मां कतैर निं करनअ, पर सोभी आत्मां ल्आ परखी कि तियां परमेश्वरा का आसा कि नाई; किल्हैकि बडै भारी झूठै भबिशयाबाणीं करनै आळै आसा उझूई गेए दै। 2 परमेश्वरे आत्मां सका तम्हें इहय करै समझी कि जुंण कोई आत्मां इहय मना कि प्रभू यीशू आसा देह धारण करी करै आअ द और सह आसा परमेश्वरा का। 3 और जुंण आत्मां यीशू नाई मंदी, सह नि परमेश्वरा का आथी; सह आसा मसीहो बिरोधी आत्मां, जसरी चरचा तम्हें शूर्णी आसा मुके दै कि सह आसा एछणें आळअ और एभै बी आसा सह एऊ ई संसारा दी। 4 हे शोहरुओ, तम्हें आसा परमेश्वरे तम्हें आसा तिन्नां का जीत पाई दी; किल्हैकि जुंण तम्हां दी आसा, सह आसा तेऊ का बडअ जुंण संसारा दी आसा। 5 तियां आसा संसारे; तैहीता तियां संसारे गला बोला और संसार बी शुणा तिन्नैई। 6 हाम्हें आसा परमेश्वरे: जुण परमेश्वरा जाणा, सह शूणा म्हारी गला; जुंण परमेश्वरा नाई जाणदअ; सह निं म्हारी शुणदअ। इहय करै सका हाम्हां सच्चाईए आत्मां और भरमाऊणें आळी आत्मां बछैणीं।

### परमेश्वर आसा प्रेम

7 हे प्रियो, हाम्हां लागा आप्पू बिचै प्रेम डाहणअ; किल्हैकि प्रेम आसा परमेश्वरा का; और जुंण कोई प्रेम करा; सह आसा परमेश्वरा का जल्मअ द, और सह बछेणा परमेश्वरा। 8 जुंण प्रेम नाई डाहा, सह निं परमेश्वरा जाणदअ, किल्हैकि परमेश्वर आसा प्रेम। 9 जुंण प्रेम परमेश्वर हाम्हां संघे करा, सह हुअ इहय करे प्रगट कि परमेश्वरै छाडअ आपणअ एकलौतअ शोहरु संसारा दी ताकि हाम्हां तेऊ करै मोक्ष भेटे। 10 प्रेम निं एता दी आथी कि हाम्हां किय परमेश्वरा संघे प्रेम; पर सह आसा एता दी कि परमेश्वरै किय हाम्हां लै प्रेम और म्हारै पापे प्राश्चते तैणीं भेजअ आपणअ शोहरु। 11 हे प्रियो, जै परमेश्वरै हाम्हां संघे इहय प्रेम किय ता हाम्हां बी चाहिए आप्पू मांझै प्रेम करनअ। 12 परमेश्वर निं कधू कोही भाळअ; पर जै हाम्हां आप्पू मांझै प्रेम डाहे, ता परमेश्वर रहा हाम्हां दी बणीं और तै हुआ तेऊओ प्रेम हाम्हां दी सिध।

13 एताई करै जाणा हाम्हां कि हाम्हां रहा तेऊ दी बणीं और सह रहा हाम्हां दी; किल्हैकि तेऊ आसा आपणीं आत्मा का हाम्हां लै दैनअ द। 14 और हाम्हां हेरअ भाळी बी और तेते ग्वाही बी दैआ कि बाप्पू भेजअ शोहरु संसारा लै मोक्ष दैणैआळअ बणाई। 15 जुंण कोई बी इहय मना कि यीशू आसा परमेश्वरो पुत्र, परमेश्वर रहा तेऊ दी बसी और सह बसा परमेश्वरा दी। 16 और जुंण प्रेम परमेश्वर हाम्हां संघे डाहा, सह हेरअ हाम्हां बछेणीं और हाम्हां चला बी तेऊई साबै; परमेश्वर आसा प्रेम। जुंण प्रेम प्यारा दी बणीं रहा, सह रहा परमेश्वरा दी बसी और परमेश्वर रहा तेऊ दी बसी। 17 एताई करै हुई प्यार प्रेम हाम्हां दी सिधी कि न्याये धैळी रहणअ हाम्हां हैअ; किल्हैकि जिहअ सह आसा, तिहैई आसा संसारा दी हाम्हां बी। 18 प्रेमा दी निं डर हंदी, सिध प्रेम करा डरा बी दूर। किल्हैकि डरा करै हुआ कष्ट और जुंण हैळअ करा, सह निं प्रेमा दी सिध हदअ। 19 हाम्हां करा तै प्रेम कि पैहलै किय तेऊ हाम्हां संघे प्रेम। 20 जै कुंण इहय बोले कि हूँ करा परमेश्वरा संघे प्रेम और आपणै भाई संघे करा बैर; तै आसा सह झूठअ, किल्हैकि जुंण आपणै भाई संघे जुंण तेऊ भाळअ द आसा; प्यार नाई करदअ, तै तेऊ परमेश्वरा संघे किहअ करे लाअ प्रेम डाही जुंण तेऊ भाळअ द ई निं आथी? 21 और प्रभू यीशू का आसा हाम्हां अह आज्ञा भेटी दी कि जुंण बी परमेश्वरा संघे झूरी डाहा, तेऊ लागा आपणै भाई संघे बी प्रेम करनअ।

### संसारा दी जीत पाणीं

5 जसरअ इहय विश्वास आसा कि यीशू आसा मसीह, सह आसा परमेश्वरा का उत्पन्न हुअ द और जुंण बी उत्पन्न करनै आळै संघे झूरी डाहा, सह डाहा तेऊ संघे बी झूरी जुंण उत्पन्न हुअ द आसा। 2 जांऊं हाम्हां डाहा परमेश्वरा संघे झूरी और तेऊए आज्ञा मना, ता एताई करै जाणा हाम्हां कि हाम्हां करा परमेश्वरै शोहरु माठै संघे प्रेम। 3 प्रमेश्वरो प्रेम आसा अह कि हाम्हां मना तेऊएई आज्ञा और तेऊए आज्ञा निं मुशकळअ आथी। 4 किल्हैकि जुंण किछ परमेश्वरा का आसा उत्पन्न हुअ द, सह करा संसारा दी जय प्राप्त;

और सह बिजय जेता करै संसारा दी जय प्राप्त हुआ, सह आसा म्हारअ विश्वास। 5 संसारा दी जय पाणै आळअ कुंण आसा? सह ई सका जय पाई; जसरअ विश्वास इहय आसा कि यीशू आसा परमेश्वरो शोहरु।

### प्रभू यीशू मसीहे बारै ग्वाही

6 अह आसा सहैई जुंण पाणीं और लोहू करै आअ। अर्थात- यीशू मसीह; सह निं पाणीं करै आई पर सह आअ पाणीं और लोहू दुही करै। 7 ता जुंण ग्वाही दैआ सह आसा आत्मा; किल्हैकि आत्मा आसा सच्च। 8 ग्वाही दैणै आळै आसा चअन; पाणीं, लोहू और आत्मा; और ईयां चिहै आसा एकी गल्ला दी सैहमत। 9 जांऊं हाम्हां माळ्णू ग्वाही मनी हेरा, ता परमेश्वरै ग्वाही ता आसा तेता का बढकर; और परमेश्वरै ग्वाही आसा एही कि तेऊ आसा दैनीं दी आपणै शोहरुए बारै ग्वाही। 10 जुंण परमेश्वरै शोहरु दी विश्वास करा, सह डाहा आप्पूई दी ग्वाही; जुंणीं परमेश्वरो भरोसअ ई नाई किय, तेऊ ठैहराऊअ सह झूठअ, किल्हैकि तेऊ नि तेसा ग्वाही दी विश्वास किय जुंण परमेश्वरै आपणै शोहरुए बारै दैनी। 11 होर सह ग्वाही आसा अह कि तेऊ आसा दैनअ द हाम्हां लै अनंत जिऊण और अह जिऊण आसा तेऊए शोहरु दी। 12 जसा का शोहरु आसा तेऊ का आसा जिऊण; और जसा का परमेश्वरो शोहरु निं आथी, तेऊ का निं जिऊण बी आथी।

### अनंत जिऊण

13 जुंण परमेश्वरै शोहरुए नांऊंआ दी विश्वास करा, मंरें लिखअ तम्हां लै एते तैणीं कि तम्हां का थोघ लागे कि अनंत जिऊण आसा थारअ। 14 होर हाम्हां तेऊ सहनै जुंण हैअ हुआ, सह आसा अह कि जै हाम्हां प्रभूए जेही इछा आसा तेऊ साबै मांगा, तै शुणां सह म्हारी। 15 जै हाम्हां का इहय थोघ आसा कि जुंण हाम्हां मांगा, तेता शुणां प्रभू; तै आसा हाम्हां का इहय बी थोघ कि जुंण हाम्हां मांगअ सह ग्अ हाम्हां भेटी बी।

16 जै कुंण आपणै भाई इहय पाप करदै भाळे, जेते सजा मौत ना होए, ता तेता लै करै प्राथणां। जुंणीं इहय पाप आसा किय द कि तेते सजा मौत होए, तेते बारै निं परमेश्वर तिन्नां लै बोलदअ कि प्राथणां करा। 17 सोभी प्रकारो अधर्म आसा पाप, पर इहय पाप बी हुआ जसरी सजा मौत नाई हंदी।

18 हाम्हां जाणा एसा गल्ला कि जुंण परमेश्वरा का उत्पन्न आसा हुअ द सह निं पाप करदअ। जुंण परमेश्वरा का आसा उत्पन्न हुअ द तेऊ डाहा परमेश्वर बचाऊई और तेऊ निं सकदअ सह दुशट शैतान छूई बी।

19 हाम्हां इहय बी जाणा कि हाम्हां आसा परमेश्वरा का, और सारअ संसारा आसा तेऊ दुशटे बशै पळअ द।

20 और हाम्हां इहय बी जाणा कि परमेश्वरो शोहरु आसा ग्अ द एछी और तेऊ आसा दैनी दी हाम्हां लै समझ कि हाम्हां तेऊ सच्चै बछेणीं सके और हाम्हां तेऊ दी जुंण सच्चअ आसा, अर्थात प्रभू यीशू मसीह दी रहा, सच्चअ परमेश्वर और अनंत जिऊण आसा अहैई। 21 हे शोहरुओ, आप्पू रहै इन्नां मुरती का बची।

## 2 यूहन्ना

### भूमिका

यूहन्नं दुजी चिठी आसा “बुजुर्गा” और “चुनी दी परमेश्वरे महिला सेबक और तेसरै शोहरूए” नांऊं लिखी दी। एतो अर्थ सक इहय हई कि एक स्थानीय कलीसिया और तेते लोग। थोळै बोला दी आसा एतो संदेश कि, एकी दुजै संघै झूरी डाहणें अरज और झूठी शिक्षा देंगेंआळै और तिन्नै शिक्षा का दूर रहणें चतैनगी।

रूप-रेखा

भूमिका 1-3

झूरीओ पैहलअ स्थान 4-6

झूठे धर्म सिध्दांते खलाफ चतैनगी 7-11

नचोळ 12,13

### आदर-सत्कार

1 चुनी दी परमेश्वरे सेबक श्रीमती और तेसरै शोहरूए नांऊं जसा लै हूँ मसीहे कारण सचाईए झूरी करा, जुंण हाम्हां संघै टेकी रहा, और हाम्हां संघै सदा अटळ बी रहणीं, मूँह बुजुर्गे तरफा का चिठी। 2 सिधअ हूँ नि, पर तियां होर बी करा प्रेम जुंण सचाई समझा और जाणा।

3 परमेश्वर बाप्पू, और बाप्पूए शोहरू यीशू मसीहे तरफा का अनुग्रह, दैआ, शांती, प्रेम और सचाई संघै रहणें हाम्हां संघै।

### सत्य और प्रेम

4 हूँ हुअ बडअ भारी खुशी कि मंएँ भाळै तेरै केतरैई शोहरू माठै आज्ञा दी चलदै जुंण हाम्हां लै बाप्पू परमेश्वरा का आसा भेटी दी। 5 ऐबै हे बैहण, मंएँ नि ताल्है किछै कोई नंऊंई आज्ञा लाई दैई, पर तेसाई लिखा हूँ ताल्है जुंण शुरू का ताखा आसा, और हूँ करा ताखा अरज कि एकी दुजै संघै डाहै प्रेम।

6 और प्रेम आसा अह कि हाम्हां लागा प्रभूए आज्ञा दी चळणअ, अह आसा सहई आज्ञा जुंण तम्हें शुरू का शुर्णी दी आसा और तम्हां लागा एता दी

चलणअ बी। 7 किल्हैकि देशै गए कई भरमांऊंणें आळै निखळी जुंण इहय नि मन्दै कि प्रभू यीशू मसीह आअ देह धारण करी। भरमांऊंणें आळअ और मसीहो बिरोधी आसा अहैई। 8 आपणें बारै रहै चतान; कि जुंण मैन्थ हाम्हें आसा की दी, तेता नि तम्हें जांएँ पाई पर तेतो लोळी पूरअ-पूरअ फल भेटअ। 9 जुंण कोई आजू बढा और मसीहे शिक्षा दी बणीं नि रहंदअ, तेऊ सेटा नि परमेश्वर आथी। जुंण कोई बी प्रभूए शिक्षा दी टेकी रहा, तेऊ सेटा आसा बाप्पू बी, और शोहरू बी। 10 जै कुंण तम्हां सेटा एछे, और इन्नाई शिक्षा नाई दैए, तेऊ नां ता घरे दैई एछणें और नां तेऊलै नमस्ते करी। 11 किल्हैकि जुंण ईहै आदमीं लै नमस्ते करा, सह हआ तेऊए बूरे कामां दी बी हेसेदार।

### आखरी आदर-सत्कार

12 मूँह आसा बडी भारी गल्ला तम्हां लै लिखणा लै, पर कागज और सैही करै नि लिखणअ चाहंदअ; पर मूँह आसा आशा कि हूँ एछणअ तम्हां सेटा लै और तम्हां सहनै करनी मूँह गल्ला ताकि तम्हां बी खुशी होए।

13 तेरी चुनी दी बैहण और शोहरू माठै बी बोला ताल्है नमस्ते।

## 3 यूहन्ना

### भूमिका

यहून्ने चिऊथी चिठी ती "बुजुर्गे" तरफा का कलीसिये एकी मुखियै गयुसा लै लिखी दी। लिखणें आळअ करा गयुसे एते तैणीं तरीफ, किल्हैकि सह करा त होरी मसीह विश्वासीए बड़ी मजत-मदैद। संघा दैआ सह दियुत्रफेस नाऊए एकी आदर्मी का बचदै रहणें चतैनगी बी।

### रूप-रेखा

भूमिका 1-4

गयुसे तरीफ 5-8

दियुत्रिफेसे खलाफत 9,10

दिमेत्रियुसे सराहणां 11,12

नचोळ 13-15

### आदर-सत्कार

1 प्यारै गयुसा लै मेरी बजुर्गे चिठी जसा संघै हूँ सच्ची झुरी करा।  
2 हे मेरै प्यारैआ, मेरी आसा एही प्राथणां कि ज़िहअ तूह आत्मां दी बढदअ आसा लागअ द, तेही तरकी लोळी तेरी सोभी गला दी हुई और दाह खिजा का लोळी रांबळअ रहअ। 3 किल्हैकि ज़ाऊं होरी भाई दैनीं मूँह सेटा एछी करै तेरी सच्चाईए ग्वाही, जसा दी तूह सच्ची हांडा, मूँह हुई शुणीं करै बडी भाई खुशी। 4 मुल्है निं एता का बडी होर किछै खुशी आथी कि इहय शुणअ कि मेरै शोहरु चला सच्चाई दी।

### गयुसे तरीफ

5 हे मेरै प्यारै, जुण बी तूह तिन्नां भाई लै करा, जुण परदेसी बी आसा, तिन्नां करा तूह एक विश्वासी ज़िहअ। 6 तिन्नें दैनी ती सोभी सच्चनै तेरै प्रेमें ग्वाही; जै तूह तिन्नां तिहअ करै बिदा करे, ज़िहअ परमेश्वरे लोगा शोभा, सह करनअ ताह ठीक। 7 किल्हैकि तियां आसा तेउ प्रभूए नाऊंआं दी निखळै दै और तियां निं होरी ज़ाती का किछै मांगदै। 8 तैहीता इनो लागा सुआगत करनअ, ज़िहअ करै हाम्हें बी सच्चाईए पक्षा दी और तिन्नें सहकर्मी हई सके।

### दियुत्रिफेस और दिमेत्रियुस

9 मंरें लिखअ त किजै मंडळी लै बी पर दिऊतरिप्स जुण तिन्नां दी बडअ बळणअ चाहा, सह निं हाम्हां मंदअ। 10 जेभै हूँ एछणअ, ता तेऊए काम जुण सह करदअ आसा लागअ द, तियां बी फरेऊणें मूँह आद कि हाम्हां लै रहा सह बूरी-बूरी गला बकदअ लागी और तेता करै बी निं सह रजदअ होर आप्पू निं होरी भाई बी ग्रहण करदअ और जुण ग्रहण बी करनअ चाहा, तिन्नां लै बी करा नाई।

11 हे प्यारो, बुराईए निं पर भलाई पिछू चलदै बणां। जुण भलाई करा, सह आसा परमेश्वरा का; पर जुण बुराई करा, तेऊ निं कधि परमेश्वर भाळअ। 12 दिऊतरिप्से बारै दैनीं सोभी ग्वाही और सच्चाई बी दैनी आप्पै ग्वाही; और हाम्हें बी दैआ ग्वाही, और ताखा बी आसा थोघ कि म्हारी गूआही आसा सच्ची।

### आखरी आदर-सत्कार

13 मूँह लिखणअ त ताल्है बडअ भारी, पर सैही और कलमा करै निं हूँ लिखणअ चाहंदअ। 14 पर मूँह आसा आशा कि हूँ एछणअ ताह सेटा लै छेकै और तेभै करनी मूँह मुंहा सच्चनै गला।

15 ताल्है लोळी प्रभूए शांती भेटदी रही लागी। इधे सोभै साथी भाई बी करा ताल्है नमस्ते और तिधे साथी भाई लै दैए नांअ लई करै नमस्ते।



# यहूदा

## भूमिका

यहूदे चिठी आसा ती लिखी दी झूठे शिक्षाद्वैत आळेंए खलाफ चतैनगी देणां लै, किल्हैकि कई लोग बणां आहीं विश्वासी। ऐहा होचूछी जेही चिठीओ बिषय आसा पतरसे दुजी चिठी जिहय, एथ करा लिखणें आळअ आपणें आपणें पटळणें आळें एसा गला लै उत्साहित कि “तेऊ विश्वासा लै करा पूरअ यत्न जुण पवित्र लोगा लै एकी ई बारी आसा सभाळअ द।”

रूप-रेखा

भूमिका 1,2

झूठे सखाऊणें आळेंओ चाल-चलण, शिक्षा और अंत 3-16

विश्वासा दी बर्णी रहणें चतैनगी 17-23

आशीर्वचन 24,25

## आदर-सत्कार

1 यहूदे तरफा का जुण प्रभू यीशू मसीहो दास और याकुबो भाई आसा, तिन्नां शादें दै और चुनै दैए नांओएँ, जुण परमेश्वर पिता दी प्यारै और प्रभू यीशू मसीह लै बचाऊई आसा डाहै दै।

2 तिन्नां सोभी लै लोळी दैआ, शान्ती और प्रेम भरपूर भेटअ।

## झूठे गुरू

3 हे प्रियो, जांऊं हूँ तम्हां लै तेऊ मोक्षे बारै लिखणा लै बड़ी मैन्थ और कोशिश करदअ त लागअ द, जेथ हाम्हेँ सोभै साझू आसा, ता मंएँ समझअ तम्हां लै इहय समझाऊणअ जरूरी कि तेऊ विश्वासा लै लाआ पूरअ जोर जुण पबित्र लोगा लै एकीई बारी आसा दैनअ द। 4 किल्हैकि कई ईहै आदमी बी आसा हाम्हां संघे चुप-चुपै मिलै दै, जसा लै एऊ दंडे बारै पराणें जमानें पैहलैई का आसा लिखअ द कि ईयां आसा भक्तीहीन, और म्हारै परमेश्वरो अनुग्रह पाआ ईयां गंदै कामां लै बदळी, और म्हारै अद्वैत मालक प्रभू यीशू मसीहो करा ईयां नकार।

5 एहीता आसा गअ द तम्हां का इन्नां सोभी गल्लो थोघ लागी, पर तजी बी फरेऊआ हूँ तम्हां का आद कि प्रभू सह कुलबअ मिसर देशा का छड़ेऊई आळणें का बाद बी विश्वास नाई करनै आळें किरै नाश। 6 तेखअ जुणीं स्वर्गदूतै बी आपणअ पद स्थिर नाईं डाहअ, आपणअ निज निबास छाडअ, तेऊ पाए तियां बी तेऊ भीषण न्याये धैळें न्हैरे दी बाहिनं जुण सदाकाल तैणीं रहणअ। 7 जिहअ करै सदोम और अमोरा तेता ओरी-पोरीए नगर, जुण इन्नां जिहै ही कंजरै तै हई गऐ दै और जुण पराए शरीरा पिछू तै लागै दै, तियां बणें आगीए अनंत दंडा दी दृश्टांत।

8 इहय करैई गंदै सुपनैं लणें आळें बी करा आपणें-आपणें शरीरा अशुध, और तियां समझा प्रभूता बी अशुध; और उंचै पदा आळें लै बोला तियां बूरअ-भलअ। 9 पर प्रधान स्वर्गदूत मिकाईलै जांऊं शैताना का मुसा नबिए लाहसे बारै बाद-बिबाद किय, ता तेऊ निं तेऊलै बी बूरअ-भलअ बोली करै लाअ तेऊलै दोष, पर एतरअ बोलअ तेऊ कि तूह लोळी प्रभू आपणें डांडअ। 10 पर इन्नां लोगा का जिना गल्लो थोघ निं हंदअ, तिन्नां लै बोलअ बुरअ भलअ, और जिना गल्ला तियां नासमझ पशू जिहै तियां स्वभाबाई का ज्ञाणां, तिन्नां दी करा तियां आपू नाश। 11 तिन्नां लै हाय! कि तियां चला कैनां जेही चाल, और मजदूरी लै हुऐ बिलाम नबी जिहै भ्रष्ट, होर कोरह जिहै हुऐ तियां नाश। 12 तियां खाआ-पिया थारी प्रेम सभा दी जिहै समुंदरै लुकी दी टोल्हा

जिहै, तियां आसा बेधड़क आपणेंई पेटा भरनै आळें; तियां आसा बेशर्म बादळ; जसा बागरी नियां फरळाऊई; तियां आसा पाचाझळणें आळी ऋतुए बिण्हीं फळे डाळ-बूट, जुण दूई बारी आसा मरी मुकै दै और जलैळैई का आसा पेछुए दै। 13 ईयां आसा समुंदरे प्रचंड हिलकोरै, जुण आपणीं बेशरमींए छाली शोटा, ईयां आसा तियां डावाडोल तारै, जसा लै सदाकाल तैणीं घोर न्हैरअ आसा डाहअ द।

14 हनोकै बी, जुण आदमा का सातुई पोस्ती थिय, तेऊ आसा इनं बारै भबिष्याबार्णी की दी कि हेरा, प्रभू आअ आपणें लाखो पबित्र लोगा संघे 15 कि सोभियो न्याय करे, सोभी भक्तीहीना लै तिन्नें अभक्तीए बारै, जुण भक्तीहीन पापी तेऊए बिरोधा दी आसा बोली दी, दोषी बणांए। 16 इना निं संतुश्टी आथी, ईयां आसा खाखा भितरी बड़-बड़ करनैआळें और आपणें मनं चाहनां दी चलणें आळें, और आपणें मुंहेँ गल्ला दी घमंडे गल्ला बोळणें आळें, और आपणेंई फाईदे तैणीं करा तियां मूह भाळी करै बड़ाई।

## चतैनगी और उपदेश

17 हे प्रियो, तम्हें डाहा तिन्नां गल्ला आद जुण म्हारै प्रभू यीशूए प्रेरित पैहलैई आसा बोली मुकै दै। 18 तियां करा तै तम्हां का इहय बोली कि, आजू हणें ईहै ठठै करनैआळें, जसा आपणीं अभक्ती और आपणीं दोला मनं चाहनें साबै चलणें। 19 ईयां आसा तियां जुण फूट पाआ, ईयां आसा इहै शारीरिक लोग जसा दी आत्मां निं आथी। 20 पर हे प्रियो, तम्हें रहै आपणें पबित्र विश्वासा दी उन्नती करदी और पबित्र आत्मां दी प्राथणां करदी; 21 आपू डाहा परमेश्वर प्रेमा दी बणांई; और अनंतजिऊणां लै म्हारै प्रभू यीशू मसीह दैया करनेए आशा रहा न्हैळै लागी। 22 और निला लै करा दैआ, जसा मैची बी आसा शक। 23 और खास्सै जहें काढा आगी जैदरा का खिंची, और कई लै करा डरा हेठै रही करै दैया। होर तेऊ झिकळें का बी करा घृणा जसा शरीरा करै कळक आसा लागअ द।

## आशीर्वचन

24 ऐबै जुण तम्हां टोहळ खाणें का बचाऊई सका, और आपणीं महिंमं भरपूरी सन्ननै मगन और निर्दोष खळअ हई करै खट्ठुई सका। 25 तेऊ अद्वैत परमेश्वरा म्हारै उद्धारकर्ते महिंमां गौरब, और पराक्रम, और अधिकार, म्हारै प्रभू यीशू मसीह करै जिहअ सनातन काल का आसा, एभै बी और जुगै-जुगै रहे, आमीन।

# प्रकाशितवाक्य

## भूमिका

यूहन्ना प्रकाशितवाक्य लिखअ तेऊ तधू; जधू काला मसीही विश्वासी तिन्नं विश्वासे बजहा यीशू मसीह दी प्रभू और सुआमीए रूपे विश्वास करनें वजहा चिक्रदै-मारदै तै लागे दै। एते लिखणें आळै-फिकर करनेओ प्रमुख विषय आसा त आपणें पळ्ळणें आळै दी आशा और उत्साह भरनअ और इहय खोजणअ कि तियां इन्नां दुखा-दर्दे धैळै विश्वासयोग्य बणीं रहे।

एसा कताबो अधिकांश भाग आसा प्रकाशने और दर्शणें श्रंखले रूपा दी, जुण शारेए भाषा दी आसा पेश किय द, हई सका कि तेऊ जमानेंए कलीसिया गई ती तियां गल्ला समझ एछी, पर होरी सोभी लोगा लै रहअ अह एक भेद बणीं। जेही संगीता दी एक धुन हूआ तेही धराऊआ एसा कताबे विषय-वस्तु बी भी-भी कई तरिके करै जुदै-जुदै दर्शणें श्रंखला करै। हालांकि एसा कताबे व्याख्या करनें बारै आसा मत-भेद, तज्जी बी आसा एते प्रमुख विषय साफ-साफ : परमेश्वर प्रभू यीशू करै करनें शैताना संघी आपणें सारै शतरू पूरी तरह सदा लै खतम; जाऊं अह ज्जीत पूरी जाणीं हई ता तेता बाद करनें तेऊ आपणें विश्वासयोग्य लोग नंऊई पृथूई और नंऊंए सरो आशीषा करै परिपूर्ण।

रूप-रेखा

भूमिका 1:1-8

शुरुआती दर्शण और साता कलीसिया लै चिठी 1:9-3:22

साता मोहरा करै बंद चर्मपत्र 4:1-8:1

सात तुरही 8:2-11:19

अजगर और दूई पशू 12:1-13:18

होर कई दर्शण 14:15-8

परमेश्वरे प्रकोपे सात कटोरै 16:1-21

बेबीलोनो बनाश ओर पशू, झूठे भविष्यवक्ता और शैताने हार 17:1-20:10

आखरी न्याय 20:11-15

नंऊंअ सारग, नंऊंई पृथूई और नंऊंअ यरूशलेम 21:1-22:5

नचोळ 22:6-21

1 प्रभू यीशू मसीहे भविष्यबाणीं जुंण प्रभू एते तैणीं दैनीं कि आपणें सेऊआकारा का तिन्नां गल्ला, जसरअ एबै छेकै हणअ जरूरी आसा, तिन्नां रहैऊए; और प्रभू आपणें स्वर्गदूत भेजी करै, और तेऊ दुता करै आपणें चेलै यहूना का। खोजअ 2 जुंणीं परमेश्वरे बचन और प्रभू यीशू मसीहे ग्वाही, अर्थात जुंण किछ तेऊ भाळअ, तेते ग्वाही दैनीं। 3 धन्य आसा सह जुंण एसा भविष्यबाणींए बचन पहळा, और तियां जुंण शुणां, और एथ दी लिखी दी गल्ला मना, किलहैकि सह बगत आसा नेळ।

## सोभी साता कलीसियो आदर-सत्कार

4 यहून्ने तरफा का आसिए साता कलीसिए नांऊंए, तेऊए तरफा का, जुंण आसा, जुंण पैहलै थिय, जुंण आजू एछणें आळअ आसा, और तिन्नां साता आत्मां बाखा का, जुंण तेऊए सिंहासणा सहनै आसा 5 और प्रभू यीशू मसीहे तरफा का, जुंण बिश्वाशा करनें जोगी ग्वाही और मरी करै जिऊंदअ हणें आळै मांझै पैहलअ आसा और पृथूईए राजेओ हाकिम आसा। तम्हां लै लोळी गूण-जश और शांती भेटदी रही,

जुंण हाम्हां संघे प्रेम करा और आपणें खून बहाऊई करै हाम्हां सोभै पापा का आसा छडेऊए दै; 6 और हाम्हां एकी राईसी और आपणें पिता परमेश्वरा लै याजक बी बणांए, तेऊए ई महिमा और थल-बल लोळी जुगै-जुगै रहअ। तथास्तू। 7 भाळा, सह आसा बादळा संघे एछणेंआळअ; और हरेकी आच्छी भाळणअ सह, इधी तैणीं बी जुंणीं तेउलै कील बरछै बी बाहै तै तिन्नां का बी धेछणअ सह। और धरतीए सोभी कुल और खानदानी पटाकर्णीं तेऊए कारण आपणीं हिका। तथास्तू।

8 प्रभू परमेश्वर, जुंण आसा, जुंण आज्जा का पैहलै थिय और जुंण एछणेंआळअ आसा, जुंण सर्वशगतीमान आसा, सह बोला इहय कि आदी और अंत आसा हूँई॥

## यूहन्ना मसीहे दर्शण हणें

9 हूँ यहून्ना जुंण थारअ भाई और प्रभू यीशूए क्लेश, राज्य और धीरजा दी थारअ साझू आसा, परमेश्वरे बचन और प्रभू यीशू मसीहे ग्वाहीए बजह दी त पतमुसा नांओए टापू दी। 10 इहय हुअ कि प्रभूए धैळै भरुअ हूँ आत्मां दी और आप्पू पिछू एक तुरहीओ बडअ शब्द मुखा इहय बोलदअ शुंहुँअ कि 11 "जुण किछ तूह भाळा, तेता लिख कताबा दी और तेता भेज साता कलीसिया लै, अर्थात- इफिसुस, स्मुरना, पिरगमुन, थुआथिरा, सरदीस और फिलेदीलफिआ और लौदीकिआ लै।

12 तेखअ मंए, जुंण सह मुखा बोलदअ त लागअ द; तेऊ भाळणा लै पिछू मूँह फरेऊअ, ता मुखा धेछुए पिछू सात सदीए जळै दै। 13 ता तिन्नां सदीए बिचै भाळअ मंए एक मांहुँ मरध। मुखा धेछुअ सह इहय कि तेऊ आसा पैरा तैणीं लाम्मै झिकळै बाहै दै और हीका दी आसा जेही सुनें गाची बाह्नि दी। 14 तेऊओ मूँड और शराळ तै उना जिहै, तियां ज़ाह्नींआं तै जिहै ओशा जिहै चमकदै लागै दै; और तेऊए आच्छी ती आगीए लुपळै जेही। 15 और तेऊए पैर तै जिहै शुध पितळा जिहै जेथ ज़ाळणअ भठी दी आसा होए पाण दैनीं दी; और तेऊए बोल तै पाणिंए छेळा जिहै। 16 और तेऊ तै आपणें दैहणें हाथै सात तारै ढाकै दै और तेऊए खाखा का निखळा ती चोखी दोहरी तिछी तलबार, और तेऊओ मूँह त इहय चमकदअ लागअ द कि जिहअ सूरज दपहरै चमका। 17 ज़ाऊं मंए सह भाळअ, ता तेऊए पैरै पटिकअ हूँ जिहअ मुल्दै जिहअ। तेखअ तेऊ मुँह परैदें आपणअ दैहणअ हाथ डाही करै बोलअ,

“डरै नि आथी, हूँ आसा आदी और अंत और जिऊंदअ। 18 हूँ गुअ त मरी, और ऐबे भाळ, हूँ आसा जुगै-जुगै जिऊंदअ, और मौते और अधोलोके कुंजी आसा मुखा। 19 तैहीता, जुण गला तंरै भाळी, और जुण गला हंदा आसा लागी दी, और जुण गला एता बाद हणैआळी आसा, तिन्नां सोभी गला लिख। 20 अर्थात-तिन्नां साता तारेओ भेद, जुण तंरै मेरै दैहणै हाथै भाळै, और तिन्नां साता सुन्नै सदीऊएओ भेद। तियां सात तारै आसा साता कलीसिए दूत और तियां सात सदिये आसा सात कलीसिया

### इफिसुसा लै संदेश

2 इफिसुसे कलीसिए दूता लै लिख इहय कि, जुणीं सात तारै आपणै हाथै आसा ढाकै दै, और जुण सुन्नै साता सदीए बिचै हांदा फिरा, सह बोला इहय कि 2 मुखा आसा तैरै काम, मैन्थ, और तैरै धीर धरनेओ थोघ; और इहय बी आसा थोघ कि तूह नि बुरै लोगा भाळी सकदअ; और जुण आपणै आप लै प्रेरित बोला, पर तियां नि आथी, तियां परखै तंरै और तियां निखळै झुठै। 3 और तूह धरा धीर, और मेरे नांओआ लै दुख चकी-चकी नि थकअ आथी। 4 पर मंरै लाअ तैरै खलाफ बोली कि तंरै छाडअ मुखा पैहलै जिहअ प्यार करनअ। 5 एसा गला लै दैरे धैन कि तंरै किधी की चूक, आपणअ मन बदळ और पैहलै जिहअ काम कर; जै तूह मन नाई फरेऊए, तै चकणअ मूँह ताह सेटा लै एछी करै तेरअ सदीअ तेसा जैगा का पोही। 6 पर हाँ, एक गल आसा ताखा जरूर कि तूह करा तिन्नां निकुलईए बुरै कामां का नफरत, जसा का हूँबी नफरत करा। 7 जसरे कान होए, सह शुणै कि आत्मां कलीसिया लै किजै बोला, जुण जय पाए, तेऊलै दैणअ मूँह जिदगीए पौधै का फळ खाणां लै जुण स्वर्गलोकै आसा।

### स्मूरना लै संदेश

8 और स्मूरनिए कलीसिए दूता लै लिख इहय कि, जुण आदी और अंत आसा, जुण मरी त गअ द और ऐबे आसा गअ द जिऊंदअ हई; सह बोला इहय कि 9 हूँ ज्ञाणां तैरै दुःख-दळिदरा; पर तूह आसा धनबान; और जुण लोग आपणै आप यहूदी बोला, पर तियां नि आथी, तियां आसा शैताने सभा, तिन्नें निंदा बी आसा मुखा थोघ। 10 जुण दुख ताह झेलणै, तेता का नि डरी, किलहैकि भाळै, शैताना आसा तम्हां मांझै कई लाए दै जेहल खाने दी पाई ताकि तम्हां परखी सके; तम्हां लागणअ दसा धैळै क्लेश सैहणअ, प्राण दैणै तैणीं रहै विश्वासी बणीं, तै दैणअ मूँह तालहै जिदगीओ मुकट। 11 जसरे कान होए, सह शुणै कि आत्मां कलीसिया का किजै बोला, जुण जय पाए, तेऊ निं दुजी मौता करै कोई बी हानिं पुजणीं।

### पिरगमुना लै संदेश

12 और पिरगमुने कलीसिए दूता लै लिख इहय कि, जसा का दूई धारे दोहरी तिछी तलबार आसा, सह बोला इहय कि- 13 मुखा इहय ता आसा थोघ कि तूह रहा तिधी, जिधी शैतानों सिंहासन आसा, और मेरै नाओआ दी रहा तूह टेकी, मूँह दी विश्वास करना लै नि तूह तिन्नां धैळै बी पिछू हटअ, जिना धैळै मेरअ बिशबाशा करनै जोगी ग्वाही अन्तिपास, तम्हां बिचा का तिधी पाअ मारी, जिधी शैतान रहा। 14 पर मूँह आसा बोळणा लै तैरै खलाफ थोळी जेही गला, किलहैकि ताह सेटा आसा कई ईहै, तियां चला बिलामा नबीए बुरी शिक्षा दी, जुणीं बालाक इस्त्राएली सहनै ठोहळा लागणैओ कारण सखाऊअ कि मूरती सेटा करा बलिदान और भ्यभिचार करा। 15 और ताह सेटा ईहै बी आसा कई जुण नीकुलईए शिक्षा बी मना। 16 मन फरेऊ, नाई ता मूँह एछणअ छेकै ताह सेटा लै और आपणीं मूँह तलबारा करै करनीं मूँह तिन्नां संघै लळाई। 17 जसरे कान होए तियां शुणै कि आत्मां कलीसिया का किजै बोला, जुण जिती जाए, तेऊ लै दैणअ मूँह गुप्त मन्नअ और तेऊ लै मूँह एक शेतअ पाथर बी दैणअ और तेऊ पाथरा दी हणअ एक नांअ लिखअ द, तेऊ पाथरा दी लिखै दै नांओ थोघ निं तेऊ का सुआई होरी कोही का लागणअ।

### थुआतीरा लै संदेश

18 और थुआतीरे कलीसिए दूता लै लिख इहय कि, परमेश्वरो शोहरु; जसरी आच्छी आगीए लुपळै जेही आसा, और जसरे पैर शुध पितळा जिहै आसा, सह बोला इहय कि 19 हूँ ज्ञाणा तैरै कामां, प्रेम, विश्वास, तेरी सेऊआ और तेरअ धीरज, और इहय बी कि तैरै पिछलै काम आसा तैरै पैहलै कामां का बी बढकर। 20 पर मूँह आसा तैरै खलाफ धख बोळणा लै कि तूह दैआ तेसा बेटळी रहणै, जुण आपू लै भविश्याबगतण बोला, और मेरै दासा रहा सह भ्यभिचारा और मूरती आजूए बलिदाना खैऊई करै भरमांऊदी लागी। 21 मंरै दैनअ तेसा लै मना फरेऊणा लै बी मोकअ, पर सह नि आपणै भ्यभिचारा का मन फरेऊणअ चाहंदी। 22 हेर, मंरै लाई बमारीए बिस्तरै दी पाई; और जुण तेसा संघै भ्यभिचार करा, जै तियां बी आपणअ मन नाई फरेऊआ, ता तियां पाणै मूँह बडै भारी क्लेशा दी। 23 और तिन्नें शोहरु पाणै मूँह मारी; और तम्हां मांझै लणअ मूँह हरेकी का तेऊए कामे साबै बदळअ। 24 पर तम्हें थुआथीरे बाकी लोगा का, जेतरे एसा शिक्षा नाई मंदै, और तिन्नां गला, जसा लै शैताने गैहरी गला बोला, नाई ज्ञाणदै, तिन्नां लै बोला हूँ इहय कि मूँह पाणअ तम्हां लै होर बी बोझ। 25 पर हाँ, जुण तम्हां सेटा आसा, तिन्नां डाहै मूँह एछणै तैणीं थम्हीं। 26 जुण जय पाए, और मेरै कामे साबै आखरी तैणीं करदअ रहे, मूँह दैणअ तेऊलै ज्ञाती-ज्ञातीए लोगा परदै अधिकार। 27 और तेऊ करनअ लोहेओ राजदंड लई तिन्नां परदै राज, जिहै खमारे माटे भांडै चूर-चूर हआ, जिहअ कि मंरै बी इहयई अधिकार आसा आपणै बापू का पाअ द। 28 और तेऊलै दैणअ मूँह दोतकअ तारअ। 29 जसरे कान आसा, तियां शुणै कि आत्मां कलीसिया का किजै बोला।

### सरदीसा लै संदेश

3 और सरदीसे कलीसिया लै लिख तूह इहय कि, जसा का परमेश्वरे सात आत्मां और सात तारै आसा, सह बोला इहय कि मुखा आसा तैरै सोभी कामों थोघ, कि तालहै जिऊंदअ ता बोला, पर तूह आसा मूँअ द। 2 जागदअ रह, और तिन्नां चिजा जुण बाकी आसा रही गई दी, और जुण खतम ती हणै आळी, तिन्नां कर मजबूत; किलहैकि मंरै निं तेरअ कोई बी काम परमेश्वरा सेटा पूरअ भाळअ। 3 होशा दी एछ, कि तंरै केऊ साबै आसा शिक्षा पाई दी और शुणीं ती, तिन्नां दी रह बणीं और आपणअ मन फरेऊ, जै तूह जागृत नाई रहे, ता मूँह एछणअ चोरा जिहै और ताखा निं कधि थोघ लागणअ कि मूँह केसा घळी चुटणअ ताह दी। 4 पर हाँ, सरदीसा दी आसा ताह सेटा किछ ईहै लोग बी जुणीं आपणै-आपणै झिकळै कधि अशुध निं कियै, तियां घूमणै शेतै झिकळै बाहिं मूँह संघै, किलहैकि तियां एता जोगी आसा बी। 5 जुण जय पाए, तेऊलै बनेऊणै ईहैई करै शेतै झिकळै, और तेऊओ नांओ नि हूँ जिदगीए कताबा का काटदअ। पर तेऊओ नांओ लाणअ मूँह आपणै बापू और आपणै स्वर्गदूता सहनै। 6 जसरे कान होए तियां शुणै कि आत्मां कलीसिया का किजै बोला।

### फिलदिलफिया लै संदेश

7 और फिलदिलफिया कलीसिया लै लिख कि: जुण पबित्र और सच आसा, और जुण दाऊदे कुंजी डाहा, जसरे खोल्है दै कोहै नि बंद करी सकदअ, सह बोला इहय कि- 8 मुखा आसा तैरै कामो थोघ, भाळ, मंरै आसा डाहअ द ताह सहनै एक दुआर खोल्ही जसा कोहै नि बंद करी सकदअ, कि तेरी सामर्थ आसा थोळी जेही, तंरै किय मेरै बचनों पालन बी और मेरै नांओ नकार निं किय। 9 भाळ, मूँह करनै शैताने सभा आळै तैरै बशै; जुण यहूदी बणीं करै आसा बेठै दै, पर तियां नि आथी, बरन तियां बोला झुठअ। हेर, मूँह करनअ इहय कि तिन्नां पळणअ तैरै पैरै, और तेभै लागणअ तिन्नां का थोघ कि मंरै आसा ताह संघै प्रेम डाहअ द। 10 तंरै आसा मेरै धीरजो बचन थर्हीं डाहअ द, तैहीता हूँ ताह परिक्षे समै बचाऊई सका, जुण धरती दी रहणै आळै परखदअ आसा एछी चालअ द। 11 हूँ आसा छेकै एछणैआळअ, जुण किछ ताखा आसा, तेता डाहै थर्हीं कि कोई तेरअ मुकुट

ना छड़ैऊइ सके। 12 जुंण जय पाए, सह बणाणअ मूँह परमेश्वरे मांदरै एक थाह, और सह निं भी कधि बागै निखळणअ, और मूँह आपणें परमेश्वरो नांअ और आपणें परमेश्वरे नगरी, अर्थात्- नंऊंरें येरुशलेमो नांअ जुंण मेरै परमेश्वरा सेटा स्वर्गा का उतरनै आळअ आसा, आपणअ नंऊंअ नांअ लिखणअ मूँह तेऊ दी। 13 जसरै कान आसा सह शुणें कि आत्मां कलीसिया का किजै बोला।

### लौदीकिया लै संदेश

14 और लौदीकिया कलीसिए दुता लै लिख इहय कि:

जुंण आमीन और विश्वासा करने जोगी और सच्चअ गुआह आसा, और परमेश्वरे सृष्टीओ मूल कारण आसा, सह बोला इहय कि- 15 मुखा आसा तेरै कामों थोघ कि तूह नाई ता ठांडअ आथी और नाई ता तातअ आथी। भलअ हणअ त इहय कि या ता तूह ठांडअ हंदअ या तातअ। 16 तूह आसा स्तोतअ सीलगरम, तूह नां ठांडअ और ना तातअ आथी, तैहीता तूह मंरें आपणें मुंहा का हुकरी आसा लाअ द। 17 तूह जुंण इहय बोला कि हूँ आसा सेठ, और हूँ आसा ग्अ द धनबान हई, और मूँह नि किछी गले कामी पेशी आथी। ताखा निं इहय थोघ आथी कि तूह आसा नभागअ, तुच्छ, कंगाळ, काणअ और नांगअ। 18 तैहीता हूँ तालहै सलाह दैआ कि आगी जेंदरी ताऊअ द सुन्नअ ल्अ मुखा मोले, ताकि तूह सेठ होए, और शेते झीकळे ल्अ ताकि तिन्नां बाहिनै करै तूह नांगे हणैए बेशमीं का बचे और आपणीं आच्छी लाणां लै ल्अ काजळ ताकि ताखा धेछदअ लागे। 19 हूँ जहा-जहा संघे झूरी डाहा, तिन्नां लै दैआ हूँ उलाहना और ताड़ना बी। तैहीता ऐबै जाह्न और मन फरेऊ। 20 हेर, हूँ आसा दुआरै खटलुअ हई करै खटखटाऊंदअ लागअ द; जै मेरअ बोल शुणीं करै कोई मुल्लै दुआर खोल्ले, तेऊ सेटा लै एछणअ मूँह भितरी और तेऊ संघे खाणीं मूँह रोटी, और तेऊ खाणीं मूँह संघे। 21 जुंण जय पाए, मूँह बशैळणअ सह आप्पू संघे सिंहासणा परेंदें, जिहअ हूँबी जय पाई करै आपणें बाप्पू सिंहासणा दी बाप्पू संघे बेटअ। 22 जसरै कान होए सह शुणें कि आत्मां कलीसिया का किजै बोला।

### स्वर्गे आराधना

4 इन्नां गला बाद जाऊं मंरें नजर दैनीं, ता मंरें कै भाळअ कि स्वर्गे आसा एक दुआर खुल्लहअ द; जुंण मंरें पैहलै तुरहीए शब्दा जिहअ गला बोलदअ शुणअ त सहई बोला इहय कि उन्नै एछ इधा लै, और मूँह रहैऊणीं ताखा तियां गला, जुंण इन्नां गला बाद जरूर हणीं। 2 और तेभी आअ हूँ आत्मां दी और मंरें कै भाळअ कि स्वर्गे आसा एक सिंहासण, और तेऊ सिंहासणा दी आसा कुंण बेटअ द। 3 ता जुंण तेथ परेंदें बेटअ द आसा, सह धेछिआ यशब और मानिक जिहअ, और तेऊ सिंहासणा फेर धेछुअ चूऊ बाखा मरकता जिहअ मेघ धणश। 4 संघा तेऊ सिंहासणा चूऊ बाखा आसा चौबी सिंहासण होर, और तिन्नां सिंहासणा दी आसा चौबी प्राचीन(बुजुर्ग) शेते झिकळे बाहिनै बेटे दै और तिन्नेए मुंडे आसा सुन्नैए मुकुट। 5 ता सिंहासणा का आसा बिजळी और गुळबिजळू जेही छेळ निखळदी और सिंहासणा सहनै आसा आगीए सात दिपक लागै दै जळदें, इयां आसा परमेश्वरे सात आत्मां। 6 तेऊ सिंहासणा आजू आसा, सह ज़ाह्नींआं शिशे बलौरा जिहअ समूंदर। और सिंहासणा बिचै और चूऊ बाखा आसा चार प्राणीं, तिन्नां आजू पिछू आसा आच्छी ई आच्छी। 7 पैहलअ प्राणीं आसा शेरा जिहअ, और दुजै प्राणींओ मूँह आसा बाछू जिहअ और चिऊथै प्राणींओ मूँह आसा आदमीं जिहअ और चूऊथै प्राणींओ मूँह आसा उकाबा जिहअ। 8 और तिन्नां चूऊ प्राणींए आसा छः छः फैंख और चूऊ बाखा आसा आच्छी ई आच्छी; और तियां रहा रावी धैळी, बिणा कोई विश्राम किए इहय बोलदें लागी कि "पबित्र,पबित्र,पबित्र प्रभू परमेश्वर, जुंण पैहलैई का थिय, जुंण आसा और जुंण एछणें आळअ आसा। 9 और जेभै तियां प्राणीं तेऊए जुंण सिंहासणा दी बेटअ द आसा, और जुंण जुगै-जुगै जिऊंदअ आसा, महिमा आदर और धन्याबाद करा, 10 तेभै तियां चौबी बुजुर्ग पळा सिंहासणा परेंदें बेशणें आळै सहनै धरनीं, और तेऊ लै जुंण जुगै-जुगै जिऊंदअ आसा तेऊ सेटा टेका माथअ और आपणें मुकुट डाहा सिंहासणा सेटा इहय बोली करै धरनीं कि,

11 "म्हारै प्रभू परमेश्वर, तूहई आसा महिमां, आदर, और सामर्था जोगी; किल्लैकि तंरेंई आसा सोभे गला बणाई दी और इन्नां बणाणें पिछू ती तेरी ई ईछा।"

### मोहरबंद कताब और मिम्मू

5 और जुंण सिंहासणा दी बेटअ द थिय, मंरें भाळी तेऊए दैहणें हाथै एक कताब, सह ती भितरा और बागा का लिखी दी। 2 तेखअ भाळअ मंरें एक बलबान स्वर्गदूत और सह त ज़ोरै-ज़ोरै ईहै प्रचार करदअ लागअ द कि एसा कताबा खोळणें और एते मोहरा चोळणें जोगी कुंण आसा? 3 और नां स्वर्गे और नां धरती दी और ना धरती हेठै कुंण एसा कताबा खोळणें और एता दी नजर लागें जोगी निखळअ। 4 और हूँ लागअ हिंह करै लेरा लांदअ किल्लैकि तेसा कताबा खोलणें आळअ और तेता भाळणें आळअ निं कोहै भेटअ। 5 तैबै तिन्नां प्राचीना मांझै एकी बोलअ मुखा इहय कि "लेरा निं लाए, भाळ, यहूदे गोत्रा का आसा सह शेर, जुंण दाऊदो मूल आसा, सह आसा तेसा कताबा खोळणें और साता मोहरा चोळणें लै जयबंत हुअ द।"

6 और मंरें तिन्नां तेऊ सिंहासणा और चूऊ प्राणीं और तिन्नां प्राचीना बिचै, जिहअ एक काटअ द मंन्अ खळअ भाळअ तेऊए तै सात शींग और सात आच्छी, इयां आसा परमेश्वरे सात आत्मां सारी पृथूई लै भेजी दी। 7 जुंण सिंहासणा दी थिय बेटअ द, तेऊ तेऊए दैहणें हाथा का सह कताब ढाकी। 8 और जाऊं तेऊ सह कताब ढाकी, ता तियां चार प्राणीं और चौबी प्राचीन पळै तेऊ मिम्मू सहनै धरनीं, और तिन्ने हरेकीए हाथै तै बीणां और धूपा करै भरे दै सुन्नैए कटोरै, इयां आसा पबित्र लोगे प्राथणां। 9 और तियां लागै ईहै नंऊंरें भजना बोलदें कि तूह आसा एसा कताबा खोलणें और एते मोहरा खोळणें जोगी, किल्लैकि तंरें लूए आपणअ बलिदान दैई करै सारै कुळ, भाषा, और लोग, और ज़ाती का परमेश्वरा लै लोग मोलै।

10 और तियां बणाणें म्हारै परमेश्वरा लै एक राईसी और याजक, और तिन्नां करनअ धरती दी राज। 11 और जाऊं मंरें भाळअ कि तेऊ सिंहासणा और तिन्नां प्राणीं फेर और तिन्नां प्राचीना चूऊ बाखा बडैभारी खारसै स्वर्गदूतो शब्द शुणअ, तिन्ने गिणती ती लाखों करोळों दी। 12 और तियां तै ज़ोरै-ज़ोरै इहय बोलदें लागै दै कि बलिदान किय द मिम्मू (गाभू) ई आसा सामर्थ, धन, ज्ञान, शक्ती, आदर, महिमा और धन्याबादा जोगी। 13 तेखअ मंरें स्वर्गे और धरती दी, और धरती हेठै और समुंदरे सृजी दी हरेक चिजा, और सोभ किछ जुंण तेथ आसा, इहय बोलदें शुणअ कि जुंण सिंहासणा दी बेटअ द आसा, तेऊओ और मिम्मूओ धन्यबाद, आदर, महिमा और राज लोळी जुगै-जुगै रहअ 14 और चूऊ प्राणीं बोलअ आमीन, और प्राचीनै धरनीं पळी करै टेकअ माथअ

### सात मोहरा खोळहणीं

6 तेखअ भाळअ मंरें इहय कि, मिम्मू खोळही तिन्नां साता मोहरा मांझै एक मोहर, और तिन्नां चूऊ प्राणीं मांझै एकिए गर्जण शुंहुई कि एछ। 2 जाऊं मंरें नजर दैनीं, तै भाळअ कि एक शेतअ घोळअ आसा, और तेऊओ शुंआर आसा हाथै धणशा लई, और तेऊलै दैनअ एक मुकुट, और जै-जैकार करदी निखळअ कि होर बी जय पाए।

3 और जाऊं तेऊ दुजी मोहर खोळही, ता मंरें दुजअ प्राणीं इहय बोलदअ शुणअ कि एछ। 4 तेखअ निखळअ एक होर घोळअ, सह थिय लाला रांगो; और तेऊए शुंआरा लै दैनअ इहय अधिकार कि पृथूई का चक शांती उन्नै, ताकि लोग एकी दुजै काटे, और तेऊलै दैनीं एक बडी तलबार।

5 और जाऊं तेऊ चिऊथी मोहर खोळही, ता मंरें शुणअ चिऊथअ प्राणीं इहय बोलदअ कि, एछ। और मंरें भाळअ कि तिधी आसा एक काळअ घोळअ, और तेता परेंदें शुंआरा का आसा एक तराकळ 6 और मंरें तिन्नां चूऊ प्राणीं बिचै एक बोल बोलदें शुणें कि रपईओ एक सेर गिहूँ, और रपईए चून सेर जौ, तेल, दाखरसे हानि निं करी।

7 और जाऊं तेऊ चूऊथी मोहर खोळही ता मंरें चूऊथअ प्राणीं इहय बोल बोलदअ शुणअ कि एछ। 8 और जाऊं मंरें नजर दैनीं ता हेरा, एक पिंऊळअ घोळअ आसा, और तेऊए शुंआरो नांअ आसा मौत, और अधोलोक आसा

तेऊ पिछू-पिछू और तिन्नां लै दैनअ पृथुईए चूऊ भागा लै अधिकार कि तलबार, नकाळ, माहामारी और धरतीए जंगली पशू करै पाआ लोगा मारी।  
 9 और जाऊं तेऊ पांजूई मोहर खोल्ही ता मंरें भाळै बेदी हेठै तिन्नां लोगे प्राण, जुंण परमेश्वरे बचने, और तेऊए ग्वाही दैणैए कारण जुंण तिन्नें दैनी ती, मारै दै थियै। 10 और तिन्नें ज़ोरै-ज़ोरै पकार पाई कि “हे मालक, हे पबित्र, और सत्य, ताह केभै तैणीं नि न्याय करनअ? और धरती दी रहणें आळै का म्हारै खूनो बदळअ केभै तैणीं नि ताह लणअ?” 11 और तिन्नां मांझै हरेकी लै शेतै झिकळै दैई करै बोलअ कि धख करा तम्है होर थोळी घळी विश्राम, जेभै तैणीं कि थारै साथी संघी दास, भाई जुंण तम्हांई जिहै मारी आसा लाए दै, तिन्नें बी गिणती पूरी ना होए।

12 और जाऊं तेऊ छूऊए मोहर खोल्ही, ता मंरें भाळअ कि एक बडी जाजरी हूई और सुरज हुअ काळै चादरु जिहअ काळअ, और पूरी जोथ हूई खुनां जेही लाल। 13 और सरगे तारे पटिके पृथुई दी इहै जिहै दिशा बागरी करै पाकी शाहळी धरनीं झणाईयां। 14 और सरग धेछुअ इहय, जेही कुडळी गोळ पळेठिआ, और हरेक धारा और टापू टळै आपणीं जैगा का पोही। 15 और धरतीए राजै, प्रधान, सरदार, सेठ और बलबान लोग, और हरेक दास हरेक मंत्री लुकै धारा दी खोखा और डुआरै। 16 और धारा और भीळी लै लागै बोलदै कि हाम्हां परंदा लै पळा, हाम्हां चोरा तेऊए मुंहा सन्नै का जुंण सिंहासणा दी बेटअ द आसा और मिम्मूए (मिम्मूए) प्रकोपा का बी डाहा चोरी। 17 किल्हैकि तिन्नें प्रकोपे भयानक धैळी गई पुजी एबै कुंण सका तिन्नां सेटा खट्छुई।

### इस्त्राएले 1,44,000 लोग

7 एता बाद भाळै मंरें धरतीए चूऊ कुंणें स्वर्गदूत खट्छुए दै, तिन्नें ती धरतीए चार बागरी डाही दी थम्हीं ताकि धरती और समुंदरै, कसा पौधै दी हाऊआ बागरी नां लागे। 2 तेखअ भाळअ मंरें एक होर स्वर्गदूत जिऊंदै परमेश्वरे मोहरा लई पूरबा दिशा का उझै निखळदअ, तेऊ तिन्नां चूऊ स्वर्गदूता का, जसा लै धरती और समुंदर नाश करनेओ अधिकार थिय दैनअ द, तिन्नां लै ज़ोरै-ज़ोरै बोलअ, “जेभै तैणीं हाम्हें आपणें परमेश्वरे दासे माथै दी मोहर निं लाई मुके, तेभै तैणीं निं धरती, समुंदर और पेळ पौधे हानी करी।” 4 और जसा लै मोहर दैनीं दी आसा, मंरें शुंणीं तिन्नें गिणती कि, इस्त्राएले संताना मांझै सोभी गोत्रा का एक लाख चरताळी हजार लै दैनीं मोहर। 5 और यहूदे गोत्रा लै दैनीं बारा हजार लै मोहर, रुबेने गोत्रा लै बी दैनीं बारा हजार लै मोहर, और गादे गोत्रा का बी बारा हजार लै। 6 अशेर गोत्रा लै का बी बारा हजार और मनिश्शे का बी बारा हजार लै। 7 शमौने गोत्रा का बी बारा हजार और लेबीए गोत्रा का बी बारा हजार, ता इस्साकारे गोत्रा का बी बारा हजार लै। 8 जब्बलूने गोत्रा का बी बारा हजार लै, युसुफे गोत्रा का बी बारा हजार और बिन्यानीनें गोत्रा लै बी दैनीं बारा हजार मोहरा लाणा लै।

### एक बडी भीड़

9 एता बाद मंरें के भाळअ कि, भाळा, हर ज़ाती, हर कूला का लोग और हर भाषा का एक एही बडी भीड़, जसा कुंण गीणीं निं सकदअ, शेतै झिकळै बाहिनै करै और आपणें हाथै खज़ूरे डाळी लई सिंहासणा और मिम्मू आजू खट्छुए दै। 10 ता तियां आसा लागै दै ज़ोरै-ज़ोरै इहय बोलदै कि “मोक्षा दैणा लै म्हारै परमेश्वरे जुंण सिंहासणा दी आसा बेटअ द, और मिम्मूए लोळी जै-जैकार हुई।” 11 और सारै स्वर्गदूत आसा तिन्नां सिंहासणा दी बेठै दै प्राचीना और चूऊ प्राणीए चूऊ तरफा खट्छुए दै, तेखअ पळै तियां सिंहासणा सन्नै उटै और परमेश्वरा सेटा टेकअ माथअ संघा बोलअ तिन्नें आमीन। 12 म्हारै परमेश्वरे स्तुती, और महिमा, और ज्ञान, धन्यवाद और आदर और सामर्थ और शगती लोळी जुगै-जुगै बणीं रही। आमीन।

13 एता लै प्राचीना मांझै एकी बोलअ मुल्है इहय, “ईयां शेतै झिकळै बाहिनै दै कुंण आसा और किधा का आसा आए दै?” 14 मंरें बोलअ इहय कि “हे मालक, ताखाई हणअ एतो थोघ।” तेऊ बोलअ मुल्है इहय कि, “ईयां आसा तियां, जुंण तेऊ बडै क्लेशा का निखळी करै आसा आए दै; इनै किये आपणें-आपणें झिकळै मेमने लोहू करै धोई शेतै।

15 तेता करैई आसा ईयां परमेश्वरे सिंहासणा सन्नै खळे, और तेऊए मांदरै करा धैळी राची ईयां सेऊआ, और जुंण सिंहासणा दी बेटअ द आसा, तेऊ लाणअ तिन्नां परंदा आपणअ ताम्बू।

16 तियां नि कधी एता बाद तेखअ भुखे प्यासै हणें, और नां तिन्नां लै धूपअ और ना तिन्नां लै कोई गरमिओ जाह्न पळणअ।

17 किल्हैकि मिम्मू जुंण सिंहासणा बिचै आसा, तेऊ करनीं तिन्नें रखबाली, और तेऊ करनै तियां जिऊणै पाणीए सोबळी सेटा लै निई, और परमेश्वरा दूशणें तिन्नें आच्छीए आशू सदा लै।

### सातुई मोहर और सुत्रेओ धूपदान

8 और जाऊं तेऊ सातुई मोहर खोल्ही ता स्वर्गें हूए आध घळी सोभ नडक। 2 और मंरें भाळै तियां सात स्वर्गदूत जुंण परमेश्वरा सन्नै खळे रहा, मंरें भाळअ कि तिन्नां लै दैनीं सात तुरही।

3 तेखअ आअ एक होर स्वर्गदूत सुत्रेओ धनैरै लई, और सह खट्छुअ बेदी नेळ; और तेऊ दैनअ तिधी धूप कि सोभी पबित्र लोगे प्राथणां संघै सह तेसा सुनै करै मट्ठी बेदी दी जुंण सिंहासणा सन्नै आसा धूप चढाऊए। 4 और तेऊ धूपो धूँ पबित्र लोगे प्राथणां संघै स्वर्गदूते हाथा करै पुजअ परमेश्वरा सन्नै। 5 और स्वर्गदूतै धनैरअ ढाकअ और बेदीए आग भरी, और धरती दी पाई और गुळबिजळू संघै लागी बिजळी चमकदी और भूईडोल लागै हंदै।

### सात तुरही

6 और तियां सात स्वर्गदूत, जसा का सात तुरही ती, तियां हूए तेता फुकरदै त्यार।

7 पैहलै स्वर्गदूतै तुरही फुकरी, और तेता का निखळै लोहू दी मिलै दै शरू और आग, और सह पाई धरती दी, और पृथुई हुई एक तिहाई दझी करै खतम और सारअ हरअ घाह बी दझअ।

8 और दुजे स्वर्गदूतै तुरही फुकरी, ता इहय जाह्नुअ कि आगीए जळदी-जळदी धार पाई समुंदरै और समुंदर बी हुअ एक तिहाई खुनां जिहअ। 9 और समुंदरे चिऊथअ निसब सूजी दी चिजा जुंण जिऊंदी ती तियां मुई सोभ और एक तिहाई जहाज बी हूए खतम।

10 और चिऊथै स्वर्गदूतै जाऊं तुरही (नाद, काहळू) फुकरी और एक बडअ तारअ जुंण आगीए मसालै जिहअ जळा त, सह स्वर्गका चूटअ और गाडा, नदीए चिऊथै निसबा और पाणीए सोबळी दी पळअ। 11 और तेऊ तारै लै बोला नागदौणअ, और एक तिहाई पाणी हूअ नागदौणै जिहअ कळुअ और बडै भारी आदमीं मुंरें तेऊ कळुए पाणीं झुटी करै।

12 और चूऊथै स्वर्गदूतै जाऊं तुरही फुकरी ता सुरजो चिऊथअ निसब और जोथो चिऊथअ निसब और तारेए चिऊथै निसबा लै आई बिबत्ती, इधी तैणीं कि तिनां एक तिहाई अंग हुअ न्हैरअ और धैळीओ एक तिहाई प्रैशअ निं रहअ, और तिहअई हुअ राची बी।

13 और जाऊं मंरें भी भाळअ ता सरगा बिचै एक उकाब उडदअ और ज़ोरै-ज़ोरै बोलदअ शुंणअ कि तिन्नां चीई स्वर्गदूते तुरहिए कारण, जुंण तिन्नां मैची फुकरनीं आसा रही दी, पृथुई दी रहणें आळै लै हाय ! हाय ! हाय !

9 और जाऊं पांजूए स्वर्गदूतै तुरही फुकरी ता मुखा स्वर्गा का एक तारअ पटिकदअ धेछुअ, और तेऊलै दैनीं अथाह कुंडे कुंजी। 2 तेऊ अथाह कुंड खोल्हअ और तेऊ कुंडा का बडी भठी जिहअ धूँ उझुअ, और तेऊ कुंडे धूँआ करै हुई हाऊआ और सुरज न्हैरअ। 3 और तेऊ धूँआ का निखळै रैटै और तिन्नां लै दैनीं पृथुईए बिचू जेही शगती। 4 और तिन्नां का डाहअ इहय बोली कि, “नां ता पृथुईए घाहा, नां ता हरै भरै पेळा पौधे लै हानि करी। पर तिन्नां आदमीं लै करै हानिं जसरै माथै परमेश्वरे मोहर नाई होए लागी दी।” 5 और तिन्नां लै मारनैओ हक ता निं दैनअ पर तिन्नां लै दैनअ पांजा भिनै तैणीं लोगा लै दुखा दैणेंओ अधिकार, और तिन्नें दाह ती एही कि जेही बिचू खाई करै दाह उझिआ। 6 तिन्नां धैळै लागणें लोग मौता लोळै, नां तिन्नां खाणअ नां तिन्नां पिणअ, तिन्नां चाहणअ सिधअ मरनअ, और मौत बी भागणीं तिन्नां का दूर।

7 और तिन्नां रैटेओ रूप तै जिहै लळाई लै त्यार किये दै घोळै जिहै, और तिन्नें मुंडा दी जाल्हीयां तै जिहै सुन्नैए मुकुट और तिन्नें मुंह तै आदमीं जिहै। 8 और तिन्नें शराळ तै बेटळी जिहै और दांद शेरा जिहै। 9 और तिन्नें ती हीका दी जेही लोहे कबच बाह्नि दी, और तिन्नें फेंखे छेळ ती एही, जिहै रथ और खास्सें घोळै लळाई लै तुहरा। 10 और तिन्नें लिंघणें तै बिचू जिहै, और तेथ त बिचू जिहअ बिश। और तिन्नां लै ती पांजा भिनै तैणीं तिन्नां मांळू लै दुखा दैणें शगती दैनीं दी, और सह ती तिन्नें लिंघणें दी। 11 अथाह कुंडो दूत त तिन्नां पदेंदें राजअ, तेऊओ नांअ त इब्रानी बोली दी अबदोन और यूनानी दी अपुल्लयोन।

12 पैहली बिपत्ती गई बिती, भाळा, ऐबै इन्नां बाद आसा दूर्इ बिपत्ती होर हणें आळी। 13 और जांऊं छुऊरे स्वर्गदूतै तुरही फुकरी ता जुंण सुनें बेदी परमेश्वरे सहनै आसा, तेते शिंगा का शुणअ मरें एक इहय शब्द 14 कि कोई जाल्हीआ त इहय बोलदअ कि "तेऊ छुऊरे स्वर्गदूता लै जसा का तुरही ती; कि तिन्नां चूऊ स्वर्गदूता खोल्ह, जुंण बडी नदी फुराता नेळ आसा बाह्नि दै।" 15 और तियां चार दूत खोल्है, जुंण तेसा घळी, और धैळी, भिनै और साला लै, मांळूए गिणतीओ चिऊथै निसबा मारना लै आसा त्यार। 16 और फौजे शुंआरे गिणती ती बिह करोळ, मरें शुंणीं तिन्नें गिणती। 17 और मुखा धेछुए घोळै और तिन्नें ईहै शुंआर, तिन्नें कबचा ती आगी और धुम्रकांत, और गंधका जेही, और तिन्नें घोळैए मूंड तै शेरे मुंडा जिहै और तिन्नें खाखा का निखळा ती आग, गंधक और धूँ। 18 जुंण माहामारी; अर्थात-आग, धूँ और गंधका का जुंण तेऊए मुंहां का निखळा ती, तेता करै पाए तिन्नें मांळू मांझै एक तिहाई मारी। 19 किल्हैकि तिन्नां घोळैए शगती ती तिन्नें खाखा और तिन्नें लिंघणें दी; तैहीता तिन्नें लिंघणें सर्पा जिहै तै और तिन्नां लिंघणें दी थिये मूंड बी, और एता करैई दैआ तै तियां कष्ट। 20 और बाकी मांळू, जुंण तिन्नां माहामारी करै नाई मूए, तिन्नें नि आपणें हाथे कामां का मन फरेऊअ कि भूता परेता, सुनें चन्दी और पीतल, पाथर और काठे पुजा निं करा जुंण ना भाळी सकदी और ना शुंणीं और नां हांढी सकदी। 21 और जुंण खून, जादू टोणअ, भ्यभिचार, चोरी तिन्नें की ती, तिन्नां का नि तिन्नें मन फरेऊअ।

### स्वर्गदूत और होछी कताब

10 तेखअ भाळअ मरें बली स्वर्गदूत बादळा ओढी करै स्वर्गा का उतरदअ, तेऊए मुंडा दी थिय मेघ धणश, और तेऊओ मूंह त सुरजा जिहअ और तेऊए पेर तै आगीए थाम्हां जिहै। 2 तेऊए हाथै ती एक होछी जेही खुल्ही दी कताब, तेऊ त आपणअ दैहणअ पेर समुंदरें और बांऊअ पेर त धरती दी डाहअ द। 3 तेऊ एक एही लैळ पाई, जिहअ शेर करुंगा, जांऊं तेऊ लैळ पाई ता गर्जणा संघे बोल शुंळूए। 4 और जांऊं सात गर्जणें बोल शुंळूई मुकै, ता मरें तै लिखी लाए दै, और तेभी मरें स्वर्गा का एक इहय शब्द शुणअ कि जुंण तंरें इयां गर्जणा संघे बोल शुणें, इन्नां नि लिखी, इन्नां डाहै गुप्त। 5 और जुंण स्वर्गदूत मरें समुंदर और धरती दी खट्ळुअ द भाळअ, तेऊ चकअ आपणअ दैहणअ हाथ स्वर्गा बाखा लै; 6 और जुंण जुगै-जुगै जिंऊंदअ आसा, और जुंणीं स्वर्ग और धरती बणाई, और जुंण बी तेथ आसा और पृथूर्इ, समुंदर और जुंण बी तेथ आसा तियां सोभ सूजै, तेऊए शपथ खाई करै बोलअ कि "ऐबै निं होर देर हणीं।" 7 सातुए स्वर्गदूते बोले धैळै ई, जेभै सह तुरही फूकरदअ हणअ, तेभै हणअ परमेश्वरो गुप्त मनोरथ (गुप्त गल) तेऊए सुसमाचारे साबै पूरअ जुंण तेऊ आपणें दास और भबिशयाबाणीं करनै आळै का दैनअ त। 8 और जुंण बोळणें आळअ मरें स्वर्गें शुणअ, सह लागअ भी मूंह संघे गल्ला करदअ कि नाश, जुंण स्वर्गदूत समुंदरें और धरती दी खट्ळुअ द आसा, तेऊए हाथै खुल्ही दी कताबा ढाका। 9 और मरें तेऊ स्वर्गदूता सेटा नाशी करै बोलअ, "एसा होछी जेही कताबा दै मुल्है।" तेऊ दैनअ मुल्है जबाब कि "निंऊं और एसा खा। एसा तेरअ पेट कळुअ ता करनअ पर तेरी खाखा लागणीं मखीरा का बी मिठी।" 10 और मरें सह कताब स्वर्गदूते हाथा का ढाकी और खाई। सह कताब मेरी खाखा मिठी ता जांळूई पर जांऊं मेरें पटै नाठी ता मेरअ पेट हुअ कळुअ। 11 तेबै बोलअ मुल्है इहय कि ताह लागणीं कई लोगा लै, कई ज़ाती लै, कई भाषा बोली लै और राजै लै बी भबिष्याबाणीं करनीं।

### दूर्इ गुआह

11 और मुल्है दैनअ एकी शोठी जिहअ सरकंडअ और तेथ बोलअ कुणीं मुल्है इहय कि "उझू, और परमेश्वरे मांदरे बेदी और तेथ दी भजना करनै आळै नाप। 2 पर मांदरे बाघलै आंगणा छाडै, तेऊ निं नापी, किल्हैकि सह आसा होरी ज़ाती लै दैनअ द, और तिन्नां करनीं बयाळी साला तैणीं पबित्र नगरी माटै दी सरली।" 3 और मूंह दैनअ आपणें दूर्इ ग्वाही लै अधिकर कि टाट पळूची करै करनीं तिन्नां एक हजार दूर्इ शौ आठा धैळी तैणीं भबिष्यबाणीं।"

4 इयां आसा तियांई जेतूने पेळ और सदीए, जुंण पृथूर्इए प्रभू सहनै खळै रहा। 5 और जै कुंण तिन्नां लै हानिं करनीं चाहा, ता तिन्नें खाखा का निखळा आग और तिन्नें बैरीओ करा भस्म। और जै कोई तिन्नां लै हानिं पजैळै ता सह हणअ जरूर इहयई करै खतम। 6 इन्नां लै आसा अधिकार कि सरगा बंद करे, कि तिन्नें भबिष्यबाणींए धैळी तिन्नां लै बरशा करे, और तिन्नां आसा पाणीं दी बी अधिकार, कि तेऊ सका खून बणाई, और जेभै चाहे, तेभै सका धरती दी बिबत्ती आणीं। 7 और जांऊं तियां आपणीं ग्वाही दैई मुकणें, ता सह पशू जुंण अथाह कुंडा का निखळणअ, तिन्नां करै लळाई करी तियां जितणें और तियां पाणें मारी। 8 और तिन्नें लाहसा रहणीं तेऊ बडे चफे पळी दी जसा लै आत्मिक रिती दी सदोम और मिसर बोला, जिधी तिनों प्रभू कूसा दी छडाऊअ त। 9 और सोभी लोगा, कुल, ज़ाती, भाषा का हणें लोग तिन्नें लाहसा चिई धैळै तैणीं भाळै लागै दै और तिन्नें लाहसा निं दैनअ तिन्नां घोरी दी दाबणें बी। 10 और पृथूर्इ दी रहणेंआळै हणें तिन्नें मरनै करै बडे भारी खुशी और मगन, और एकी दूजै सेटा भेजणअ शकन भोजन, किल्हैकि इनें दूर्इ भबिष्यबाणीं करनैआळै कियै तै सारै पृथूर्इ दी रहणें आळै तंग। 11 और साटै चिई धैळी बाद पेटअ तिन्नां दी परमेश्वरा का जिऊणेंओ आत्मां और तियां हूए आपणें पैरा दी खळै, और तिन्नां भाळणें आळै पळअ हैळअ। 12 और तिन्नां का स्वर्गा का एक बडअ शब्द शुणअ कि उझै एछा इधा लै, इहय शुंणीं करै तियां बादळा दी शुंआर हई करै आपणें बैरीए हेरदी-हेरदी उखळै स्वर्गा लै। 13 और तेसाई घळी हुअ एक भूईडोल, और नगरीओ दसुअ हेसुअ दूळअ, और एक भूईडोला करै मूए सात हजार आदमीं और जुंण बाकी थिये; तियां हैळुए, और स्वर्गें परमेश्वरे महिमा की।

14 दुजी बिबत्ती ता बिती, भाळा, चिऊथी बिबत्ती आसा एछणें आळी।

### सातूर्इ तूरही

15 और जांऊं सातुए दुतै तुरही फुकरी, ता स्वर्गें लागै एते बारै बडै-बडै बोल हंदै कि संसारो राज गूअ म्हारै प्रभूओ और तेऊए मसीहो हई। 16 और तेऊ करनअ जुगै-जुगै राज; और तियां चौबी प्राचीन जुंण परमेश्वरा सहनै आपणें सिंहासणा दी बैठै दै आसा, तियां उटी बाखा पळी करै माथअ टेकी लागै बोलदै कि 17 "हे सर्बशक्तीमान प्रभू परमेश्वर, जुंण आसा, जुंण पैहलै बी थिय, जुंण आजू बी रहणअ, हाम्हें करा तेरअ धन्याबाद कि तंरें किय बडी सामर्थ कामें आणीं करै राज।

18 और होरी ज़ाती कियै रोश, और तेरअ प्रकोप पळअ, और तेरअ सह बगत गूअ एछी कि मूए दै मांळुओ न्याय करे, और तेरै दास भविष्यवक्ता और पबित्र लोगा और तिन्नां होछै बडै, जुंण तेरै नाओंआ का डरा, बदळअ लूए पर पृथूर्इए बगाळणेंआळै नाश करे।"

19 और परमेश्वरो मांदर जुंण स्वर्गें आसा, सह खोल्हअ, और तेऊए मांदरै धेछुअ तेऊए बाचो संदूक, और बिजळी और शब्द और गर्जण और भूईडोल हूए और बडै-बडै शरु पळै।

### बेटळी और अज़गर

12 तेखअ धेछुअ स्वर्गा का एक बडअ चिन्ह, अर्थात- एकी बेटळी त सुरज ओढअ द और जोथ ती तेसरै खूरा हेठै; और तेसरै मूंडै त बाराह तारेओ मुकुट लागअ द। 2 और सह हुई गुरभणीं, और सह लाआ ती लैळा, किल्हैकि तेसा ती सुणेंए दाह लागी दी, और तेसा ती शोहरू हणेंए दाह लागी दी। 3 और एक होर चिन्ह बी धेछुअ स्वर्गा दी, हेरा, एक बडअ लाल

अजगर त, तेऊए तै सात मूंड और दस शींग, और तेऊए मुंडे तै सात राजमुकुट। 4 और तेऊए लिंघणें पाए सरगा का एक तिहाई तारै धरती दी, और सह अजगर तेसा बेटळी सहनै जुंण सुंदी ती, खट्खुअ कि जेभै सह शोहरू लै जल्म देए, तेभै पाणें तेऊ तियां घूटी। 5 और जांऊं तेसा शोहरू लै जल्म दैनअ ता तेऊ त लाअ द लोहे दंडा करै सोभी जाती लै राज करी, और तेसरअ बच्चअ नदैंऊए चकअ और सह पजैळअ परमेश्वरा और तेऊए सिंहासणा सेटा। 6 और सह बेटळी भागी तेऊ जंगला लै जिधी परमेश्वरै तेसा लै एक जैगा ती बणाईं डाही दी, कि तेसा तिधी एक हजार दूई शौ शाठी धैलै पाळे।

7 तेखअ हूई स्वर्गें घोर लळाई, मीकाईल स्वर्गदूत और तेऊए सैना चलै तेऊ अजगरा संघे जुधा करदैं और अजगर और तेऊए दूते किय तेऊ संघे जुधा। 8 पर तियां नि जिंतै और स्वर्गें नि तिन्नां लै भी जैगा रही। 9 सह बडअ अजगर, अर्थात् पराणअ सांप, जसा लै इबलीस और शैतान बोला, और जुंण सारै संसारा भरमांऊणें आळअ आसा, सह शोटअ धरती दी और तेऊए दूत बी शोटै धरती दी। 10 तेखअ शुणअ मंएँ स्वर्गें एक बडअ बोल एछदअ कि एबै हूअ म्हारै परमेश्वरो उद्धार, सामर्थ, राज और तेऊए मसीहो अधिकार प्रगट। किल्हैकि म्हारै भाई लै दोषा लागेंआळअ, जुंण राची धैळी म्हारै परमेश्वरा सहनै तिन्नां लै दोष करा त लाई सह शोटअ धरती। 11 और मिम्मूए लोहूए कारण, और आपणीं ग्वाहीए बचने कारण हूए तेऊ दी जयबंत, और तिन्नें नि आपणें प्राणां लै बी प्यार किय, इधी तैणीं कि तिन्नें कीई मौत बी सैहन। 12 तैही ता, हे स्वर्ग और तेथ दी रहणेंआळैओ, मगन हूआ; हे धरती और समुंदर, तम्हां लै हाय! किल्हैकि शैतान उतरअ तम्हां सेटा लै बडै गुस्सै दी, किल्हैकि तेऊ का आसा थोघ कि तेऊओ आसा थोळअई बगत बचअ द।

13 और जांऊं अजगरै भाळअ कि हूँ शोटअ एबै धरती दी, ता सह लागअ तेसा बेटळी लै दुखा दैंदअ जुंणीं तेऊ शोहरू लै जल्म दैनअ त। 14 और तेसा बेटळी लै दैनै एकी बडै उकाबा जिहै दूई फैंख; कि तेऊ सांभे सहनै का उडी करै जंगलै तेसा जैगा लै उडी करै नाश, जिधी सह एकी बगती और आधी बगती पाळणीं। 15 और तेऊ सांभे तेसा पिछू आपणीं खाखा का एकी दरैऊआ जिहअ पाणीं बहाऊअ कि तेऊ पाणीं दी तेसा बहाऊई सके। 16 पर धरती की तेसा बेटळीए मदद, और आपणीं खाख खोल्ही करै सह दरैअ जुंण तेऊ अजगरै आपणीं खाखा का बहाऊअ त, सह झुटअ। 17 और तेऊ अजगरा आअ तेसा बेटळी लै क्रोध और तेसरै बाकी शोहरू जुंण परमेश्वरै आज्ञा मना तै और जुंण प्रभू यीशूए ग्वाही दैणा लै खळै तै टेके दै, 18 तिन्नां संघे आअ जुधा करदअ, और सह खट्खुअ समुंदरै रेता परदैं।

### दूई पशू

13 और मंएँ भाळअ एक पशू समुंदरा का निखळदअ, तेऊए तै दस शींग और सात मूंड तेथ तै मुकुट और तेथ ती निंदा लिखी दी। 2 और जुंण पशू मंएँ भाळअ, सह त चितै जिहअ और तेऊए खूर तै भालू जिहै और तेऊओ मूँह त शेरा जिहअ और तेऊ अजगरै दैनी आपणीं बडी शगती और आपणअ सिंहासण और आपणअ सारअ अधिकार तेऊ लै। 3 और मंएँ भाळअ तेऊए मुंडै एक बडअभारी बडअ खाटढ पळअ द, और सह जाल्हीआ त जिहअ मरी चालअ, और सह मरनै जोगी घाव हूअ रांबळअ और सारी पृथूईए लोग चलै तेऊ पिछू प्राछुई करै। 4 और तियां लागै तेऊ अजगरै पुजा करदैं, किल्हैकि तेऊ दैनअ त तेऊ पशू लै आपणअ अधिकार। और तिन्नें इहय बोली करै तेऊ पशूए पुजा की कि "एऊ पशू बराबर कुंण आसा?"

5 एऊ संघे कुंण सका जुध करी?" और बडै बोल बोळणा लै और निंदा करना लै दैनी तेऊलै एक खाख और तेऊलै दैनअ बयाळी धैळै तैणीं कामां करनेओ अधिकार। 6 और तेऊ परमेश्वरै निंदा करना लै खोल्ही आपणीं खाख कि तेऊए काम और ताम्बू अर्थात्- स्वर्गा दी रहणें आळैए निंदा करे। 7 और तेऊ लै दैनअ इहय अधिकार कि पबित्र लोगा संघे जुध करे और तिन्नां दी जीत हासल करे। और तेऊलै दैनअ हर कूळ, हर लोग और हर भाषा दी अधिकार। 8 और पृथूई दी तियां सोभै रहणें आळै जसरै नांअ तेऊ

मिम्मू कताबा दी नाईं लिखै, जुंण जंगले उतपत्ती का पैहलै घात आसा किय द, तियां लागै तेऊ पशूए पुजा करदैं। 9 जसरै कान आसा, सह शुणें।

10 जसा कैदा दी नाशणअ, सह हणअ कैद, जुंण तलबारा करै मारे, सह बी मारनअ तलबारा करै, पबित्र लोगो विश्वास और धीरज आसा एताई दी।

11 तेखअ भाळअ मंएँ एक होर पशू धरती का निखळदअ, तेऊए तै होछै मिम्मू जिहै दूई शींग और सह करा त अजगरा जेही गल्ला। 12 अह करा त तेऊ पैहलै पशूओ सारअ अधिकार और काम, और पृथूई और तेथ दी रहणें आळै का तेऊ पैहलै पशूए पुजा जसरअ सह खाढ ठीक हूअ त। 13 और सह रहैऊआ त बडै-बडै चिन्ह चमत्कार, इधी तैनिं कि मांछू सहनै बरशाऊआ त सह सरगा का धरती दी आग बी। 14 और तिन्नां चिन्हां करै, जहा तेऊ पशू लै मांछू सहनै रहैऊणेंओ अधिकार दैनअ त, सह भरमांऊआं त पृथूई दी रहणें आळै लै इहय बोली करै कि जसा पशू लै तलबार लागी ती, सह हूअ जिऊंदअ, तेऊए बणांआ मूरती। 15 और तेऊलै दैनअ तेऊ पशूए मूरति दी शाह छाडणेंओ अधिकार कि तेऊ पशूए मूरत बोलदी लागे, और जुंण बी तेऊ पशूए मूरतीए पुजा नाईं करे, तियां पाणें मारी। 16 और तेऊ होछै-बडै, सेठ-कंगाळ, राजै-मंत्री और दास, सोभिए माथे एक-एक मोहर लाई। 17 कि तेऊ छाडी जसा दी छाप अर्थात् तेऊ पशूओ नांअ या तेऊए नांओ नंबर नाईं होए, होर निं कोहै लैण-दैन करी सकदअ। 18 ज्ञान आसा एथ दी, जसा का बुधी आसा, सह जोळा एऊ पशूओ नंबर, किल्हैकि अह आसा मांछूओ नंबर और तेउओ नंबर आसा छः शौ छट्ट।

### मिम्मू और तेऊए लोग

14 तैबै मंएँ नजर दैनी कि, हेरा, सह मिम्मू आसा सिओन धारा दी खट्खुअ द, और तेऊ संघे आसा एक लाख चरताळी हाजार आदमीं, जसरै माथे दी तेऊओ और तेऊए बाप्पुओ नांअ आसा लिखअ द। 2 और स्वर्गा का मुखा एक इहय बोल शुळुअ, सह त जिहअ बगदी गाडा और बडै गर्जणा जिहअ बोल, और जुंण बोल मंएँ शुणअ सह त इहय कि जांळणअ कि बिणां बजाऊणें आळै आसा बिणां बजांऊंदै लागै दै। 3 और तियां सिंहासणा सहनै और चूऊ प्राणीं और प्राचीना सहनै, जांळणअ तियां आसा लागै दै एकी कंऊई गिहा बोलदैं और तियां एक लाख चरताळी हाजार आदमीं छाडी निं होर कोहै तेसा गिहा शिखळी सकदैं तै जुंण मोलै आसा लूए दै। 4 ईयां आसा तियां जुंण बेटळी संघे अशुध निं हूए पर कुंआरै आसा, ईयां आसा तियांई, जिधा लै मिम्मू नाशा, तियां बी नाशा तिधा लै तेऊ पिछू-पिछू। ईयां आसा परमेश्वरा लै पैहलै फळ मांछू बिचा का मोल लूए दै। 5 और तिन्नें मूँहा का निं कधि झुठअ निखळदअ त, तियां तै निर्दोष।

### चअन स्वर्गदूत

6 तेखअ भाळअ मंएँ एक होर स्वर्गदूत सरगा बिचै उडदअ, तेऊका त पृथूई दी रहणें आळै, हर जाती, हर कूलबै, हर भाषा, और लोगा का शणांऊणा लै सनातन सुसमाचार। 7 और तेऊ जोरै-जोरै बोलअ, परमेश्वरा का डरा, और तेऊए महिमा करा, किल्हैकि तेऊए न्याये धैळी गई एछी। तेऊओ भजन करा, जुंणीं स्वर्ग, पृथूई, समुंदर और पाणिणै सोतै आसा बणांए दै।

8 तेखअ एता बाद एक होर दुजअ स्वर्गदूत इहय बोलदी आअ कि दूळअ, सह बाबूल दूळअ, जुंणीं भ्यभीचारे कोपमय शराब सोभी जाती का पणैऊंई ती।

9 तेखअ इन्नां बाद एक होर स्वर्गदूत जोरै-जोरै बोलदी आअ कि जुंण बी तेऊ पशू और मूरतीए पुजा करे, और आपणें माथे और हाथे तेऊए छाप लाए, 10 ता तेऊ पळणअ परमेश्वरो प्रकोप झुटणअ, निरा शराब, जुंण परमेश्वरै क्रोधे कटोरै दी पाई दी आसा। और सह पाणअ पबित्र स्वर्गदूते सहनै और मिम्मू सहनै आगी और गंधका जैदरी तळफदअ। 11 और तिन्नें दङ्गणेंओ धूँ रहणअ जुगै-जुगै उझदअ लागी। और जुण तेऊ पशू और तेऊए मूरतीए पुजा करा, और जुण तेऊए नांओ मोहर लाआ, तिन्नां नि राची धैळी चैन भेटणअ।

12 पबित्र लोगो धीरज आसा एताई दी। जुंण परमेश्वरे आज्ञा मनां और प्रभू यीशू दी विश्वास करा।

13 और मंरें शुणअं स्वर्गें इहय बोल कि, लिख, जुंण मुंलदै एभा पोहीं प्रभू दी मरा, तियां आसा ऐबे धन्य, आत्मां बोला इहय, हाँ, किल्हैकि तिन्नां भेटणअ आपणीं मैंन्था का आराम और तिन्नें काम नाशा तिन्नां संघै।

### लऊणीं

14 और मंरें नजर दैनीं कि, हेरा, एक शेतअ बादळ आसा, और तेऊ बादळा दी आसा मांळूए शोहरू जिहअ कुंण बेठअ द, और तेऊए मुंडा दी आसा सुनेंओ मुकट और हाथे आसा तिछी दाची। 15 तेखअ एकी स्वर्गदूतै मांदरा का निखळी करै, तेऊलै जुंण बादळा दी बेठअ द थिय, जोरै-जोरै पुकारी करै बोलअ कि आपणीं दाची करै दै लऊणीं, किल्हैकि लऊणींओ बगत गूअ हई, धरतीए फसल गई पाकी। 16 ता सह जुंण बादळा दी बेठअ द थिय, तेऊ लाई धरती दी आपणीं दाची और पृथूईए लऊणीं की।

17 और तेखअ निखळअ एक होर स्वर्गदूत मांदरा का, जुंण स्वर्गें आसा, और तेऊका बी आसा ती एक चोखी दाची। 18 और तेखअ बेदी का निखळअ एक होर स्वर्गदूत; जसा आगी दी थिय अधिकार। तेऊका बी थी एक चोखी दाची, तेऊलै बोलअ जोरै कि आपणीं दाची करै काट पृथूईए अंगूरे लुबरू, किल्हैकि तियां आसा गए दै पाकी। 19 और तेऊ स्वर्गदूतै धरती दी आपणीं दाची लाई और धरतीए अंगूरे फळ काटी करै पाए आपणीं परमेश्वरे प्रकोपे बडै रसे कुंडा दी। 20 और नगरी बागै तेऊ कुंडा का तियां अंगूर जैटै और रसे कुंडा का निखळअ एतरअ लोहू कि घोळेए नाका तैणीं पुजअ और शौ कोस दूर तैणीं पुजअ।

### आखरी बिपत्ति संघै स्वर्गदूत

15 तेखअ भाळअ मंरें एक होर बडअ और अद्भुत चिन्ह, अर्थात- सात स्वर्गदूत जसा का पिछली सारी सात बिपत्ति ती, किल्हैकि तिन्नां हणें का बाद आसा परमेश्वरे प्रकोपो अंत।

2 और मंरें भाळअ आगी मलाऊअ द एक शिशेओ समुंदर, जुंण तेऊ पशू और तेऊए मुरती परेंदै और तेऊए नाओए नंबरा का जयबंत हुए तै, तेऊ शिशे समुंदरा नेळ परमेश्वरे बीणां लई खळै भाळै। 3 और तियां परमेश्वरे दास मूसा और मिम्मूए गिहा लाई करै बोला तै इहय कि हे सर्वशक्तीमान प्रभू परमेश्वर, तैरै काम आसा बडै अद्भुत, हे जुगै-जुगे राजैआ, तेरी चाल आसा शोभली और सच्ची।

4 हे प्रभू, ताखा कसा निं डरनअ? और तैरै नाओए महिमा कसा निं करनी किल्हैकि सिधअ तूहई आसा पबित्र और सोभी जाती टेकणअ ताह सेटा एछी करै ताह सेटा माथअ। किल्हैकि तैरै न्याये काम हुए प्रगत।

5 और एता बाद मंरें भाळअ कि स्वर्गें ग्वाहीए ताम्बूओ मांदर खोलहअ। 6 और तियां सात स्वर्गदूत जसा का तियां सारी सात बिपत्ति ती, शुध और चमकदी मणीं बाहिन करै और हीका दी सुनेहलै पटुके बाहिन करै मांदरा का निखळै। 7 तिन्नां चूऊ प्राणीं मांझे एकी तिन्नां साता स्वर्गदूता का, जुंण जुगै-जुगै जिऊंदअ आसा, प्रकोपा का भहूए दै सात सुत्रेए कटोरै दैनें 8 और परमेश्वरे महिमां और तेऊए सामर्थे कारण मांदर भरूअ धूँआं करै। और जेभै तैणीं तिन्नां साता स्वर्गदूते सात बिपत्ति खतम निं हई, तेभै तैणीं निं कोहै मांदरै नाशी सकअ।

### परमेश्वरे प्रकोपे सात कटोरै

16 तेखअ शुणअ मंरें मांदरै कुंण जोरै तिन्नां साता स्वर्गदूता का इहय बोलदअ कि नाशा, परमेश्वरे प्रकोपे तिन्नां साता कटोरै तरैळा पृथूई दी।

2 ता पैहलै स्वर्गदूतै कटोरअ पृथूई दी तरैळअ तिन्नां आदमीं दी जसा तेऊ पशूए छाप आसा ती लागी दी और जुंण तेऊए मूरतीए पुजा करा तै, तिन्नां निखळअ एक दुखदाई दुखणअ।

3 और दुजै तरैळअ आपणअ कटोरअ समुंदरै ता सह बणअ मंरें दैरे खुना जिहअ, और समुंदरै मूंअ हरेक जीब।

4 और चिऊथै आपणअ कटोरअ नदी दी और पाणिंए सोबळी दी तरैळअ, और तियां बणें खूंन। 5 और मंरें पाणींओ स्वर्गदूत इहय बोलदअ शुणअ कि “हे पबित्र, जुंण आसा, जुंण पैहलै का थिय, तूह आसा न्यायी और तैरैई किय अह न्याय।

6 किल्हैकि तिन्नें आसा पबित्र लोगा, भविश्याबगतो खून बहाऊअ द और तंरें पणैऊअ तिन्नां का खूंन, किल्हैकि तियां तै एताई जोगी। 7 तेखअ मंरें बेदी का इहय बोल शुणअ कि हाँ, सर्वशक्तीमान प्रभू परमेश्वर, तैरै फैसलै आसा ठीक और सच्चे।

8 और चूऊथै तरैळअ आपणअ कटोरअ सुरजा दी और तेऊलै दैनअ आदमीं आगी करै दहणेंओ अधीकार। 9 और मांळू दङ्गै बडै भारी घमासा करै और परमेश्वरे नाओए जसा इना बिबत्ती दी अधिकार आसा, निंदा की; और प्रभूए महिमा करना लै निं मन फरेऊअ।

10 और पांजूरै तरैळअ आपणअ कटोरअ तेऊ पशूए सिंहासणा दी और तेऊए राईसी हुअ न्हैरअ; और लोग लागै दाह झोशे मारे आपणीं जिभा चाबदै। 11 और आपणीं दाह और दुखणें करै लागै तियां स्वर्गो परमेश्वरे निंदा करदै; पर आपणीं-आपणीं बूरै कामां का निं मन फरेऊअ।

12 और छूऊए आपणअ कटोरअ बडी नदी फुराता दी तरैळअ और तेतो पाणीं शुका कि पुर्बा देशे राजै लै रसतअ खुल्लै। 13 और मंरें भाळअ तेऊ अजगरे खाखा का, और तेऊ पशूए खाखा का और झूठै भविश्याबगते खाखा का चूनअ अशुध आत्मां मिंडके रूपे निखळदी। 14 ईयां आसा चिन्हां रहैऊणें आळी आत्मां, जुंण संसारे राजै सेटा नाशा तै निखळी करै कि तिन्नां सर्वशक्तीमान परमेश्वरे तेसा बडी धैळी लै जुधा करना लै कटा करै। 15 भाळ, हूँ एछणअ चोरा जिहअ; धन्य आसा सह जुंण जागदअ रहा, और आपणेंए झिकळेओ पहरअ करा, कि नांगअ निं फिरै और लोग तेऊ नांग-बळिगै नाई भाळै। 16 और तिन्नें तियां तेसा जैगा कटा कियै, जसा लै इब्रानी भाषा दी मगीदोन बोला।

17 और सातुए आपणअ कटोरअ बागरी दी तरैळअ, और मांदरे सिंहासणा का इहय बोल निखळअ कि “हई मुकअ”। 18 एता बाद बिजळी और बोल, और गुळुबिजळू हुए, और एक इहय भूईडोल हुअ कि जधा ओहीं धरती दी आदमीए उतपत्ती हुई, तथा ओहीं निं इहय भूईडोल कधि हुअ। 19 और तेसा बडी नगरीए हुए चूनअ ठोर, और जाती-जातीए नगरी दूळी, और तेऊ बडै बाबूले आद फरेऊई परमेश्वरै इधी कि सह तिन्नां का आपणीं क्रोध और जलजलेए शराब पणैऊए। 20 हरेक टापू टळअ हरेकी जैगा का और धारो निं थोघै लागअ 21 और सरगा का पळै लोगा परेंदा मण-मण पाके शरू, अह बिबत्ती ती बडी भारी और लोगै की एसा बिबत्ति कारण परमेश्वरे निंदा।

### बडी वेश्या

17 और जसा सात स्वर्गदूता का तियां सात कटोरै थियै, तिन्नां मांझे एकी जळै सेटा लै एछी करै बोलअ कि ओहीं एछ, मूँह रहैऊणअ तेसा बडी बैश्या बेटळीओ दंड, जुंण खास्सै पाणीं दी आसा बेठी दी। 2 जसा संघै पृथूईए कई राजै कंझरुए, और जसरे कंझरुए करै पृथूई दी रहणें आळै मतवाळै हुए थियै। 3 तैबै तेऊ हूँ आत्मां दी जंगला लै निय और मंरें किरमिजी रांगे पशू जुण निंदे कामां करै जंगलै लुकअ द थिय और जसरे सात मूंड और दस शींग तै, एक बेटळी बेठी दी भाळी। 4 एसा बेटळी थियै बैजणीं और किरमिजी रांगे झिकळै बाह्नै दै। और सह ती सुनें और किम्मती मणीं और मोती करै सजी दी, और तेसे हाथै त एक सुनेंओ कटोरअ, जुंण घृणित चिजा और तेसे कंझरुए अशुध चिजा करै भहूअ द। 5 और तेसरे माथै त इहय लिखअ द कि “भेद, बडअ बाबुल और पृथूईए सारी कंझरा बेटळीए और घृणित चिजे ईज”। 6 और मंरें सह बेटळी पबित्र लोगे खूंना और प्रभू यीशू मसीहे गूआहीए लोहू झुटी करै आसा हई दी मतबाली और तेसा भाली हूअ हूँ रहैन।

7 और स्वर्गदूतै मुखा बोलअ; तूह किल्है हुअ रहैन? हूँ खोजूं ताखा एसा बेटळी और एऊ पशूओ जसादी अह बेठी दी आसा, जसरे सात मूंड और दस शींग आसा, इनां भेद। 8 जुंण पशू तंरें भाळअ, अह पैहलै ता थिय पर ऐबे निं आथी। अह पळणअ अथाह कुंडा का निखळी करै बनाशा दी, और पृथूई



दी रहणें आळे, जसरे नांअ जगते उत्पत्तीए बगती जिऊणें कताबा दी नाई लिखै, एक पशूए दशा भाळी करै कि पैहलै थिय और ऐबे निं आथी; अह एछणअ भी और तियां प्राछणै। 9 तेसा बुधी लै जसा दी ज्ञान आसा, तेसा लै आसा अहई मोकअ, तियां सात मूड आसा सात धारा, जसा दी सह बेटळी आसा बेठी दी। 10 और तियां सात राजे बी आसा, पांज आसा गृए दै हई, एक आसा एभै, और एक निं मैची आअ, और जेभै एछे ता थोळी घळी आसा तेऊओ रहणअ बी जरूरी। 11 और जुंण पशू पैहलै आसा, सह निं एभै आथी, सह आसा आप्पू आदूअ और तिन्नां साताई का आसा सह जल्मअ द, और सह पळणअ बनाशा दी। 12 और जुंण दस शींग तंरें भाळै, तियां आसा दस राजे; जुंणीं मैची तैणीं बी राज निं किय, पर तेऊ पशू संघे भेटणअ तिन्नां बी घळी भर राजे जिहअ अधिकार। 13 ईयां सोभ हणें एक मन, और तिन्नां दैणीं आपणीं-आपणीं सामर्थ और अधिकार तेऊ पशू लै। 14 इन्नां करनअ मिम्मूं संघे जुध और मिम्मूं जितणअ तिन्नां का; किल्हैकि सह आसा प्रभूओ प्रभू, और राजेओ राजअ, और जुंण शादें दै आसा, और चुनै दै आसा, और विश्वासी आसा, तियां बी जितणें।

15 तेखअ तेऊ मुखा बोलअ कि जेऊ पाणीं तूह भाळै, जसा दी बैश्या बेठी दी आसा, तियां आसा लोग, भीड़ और भषा, और जाती। 16 और जुंण दस शींग तंरें भाळै, तिन्नां और पशू डाहणअ तेसा बैश्या संघे बैर और सह करनी तिन्नां लाचार और नांगी; और तिन्नां खाणअ तेसरअ मास और सह पाणीं तिन्नां आगी जेंदरी जाली। 17 किल्हैकि परमेश्वरा पाणअ तिन्नें मनै इहय कि तिन्नां करनीं तेसरी मनसा पूरी; और जेभै तैणीं परमेश्वरो बचन पूरअ नां होए, तेभै तैणीं दैणअ तिन्नां एक मन हई करै आपणअ-आपणअ राज तेऊ पशू लै। 18 और सह बेटळी, जुंण तंरें भाळी, सह आसा बडी नगरी, जुंण पृथूईए राजे दी राज करा।

### बेबीलोनो बनाश

**18** एता बाद भाळअ मंरें एक स्वर्गदूत स्वर्गा का होथदअ, तेऊओ त बडअ अधिकार; और पृथूई हई तेऊए तेजा करै प्रज्वलित। 2 तेऊ बोलअ जोरै-जोरै इहय कि दूळी गअ, बडअ बाबुल दूळअ, और हर दुश्टात्मं घर, तियां हुए हर भुता परते आडै, और हरेक अशुध और घृणित पांछिए आडै।

3 किल्हैकि तेसे भ्यभिचारे भयानक शराबे कारण गिरी सोभै जाती। और पृथूईए राजे किय तेसा संघे भ्यभिचार और पृथूईए बपारी हुए तेसरे सुखबिलास करै सेठ। 4 तेखअ शुणअ मंरें कहा होरीओ बोल कि "हे मेरे लोगो, तेता का निखळा ओही; ताकि तम्हें तेसरे पापा दी साझू नां होए, और तेसरी बिपती मांझे तम्हां लै निं एछे।

5 किल्हैकि तेसरे पाप गृए स्वर्गा तैणीं पुजी, और तेसरे अधर्म फिरे परमेश्वरा आद।

6 जिहअ तेसा तम्हां लै आसा दैनअ द, तिहअई दैआ तेसरअ भरी, तेसरे कामें साबै दैआ तेसा लै दूई गुणा बापस भरी।

7 जेतरी तेसा बडाई की और भोग-बिलास किय, तेतरी दैआ तेसा लै दाह कशट और शोघ; किल्हैकि सह बोला आपणें मनै इहय कि हूँ आसा राणीं बेठी दी, और हूँ निं बिधबा आथी और ना कधि हूँ शोगा दी पळणीं।

8 एते कारण एकी धैळी पळणीं तेसा लै बिपत्ती, अर्थात- मौत, शोग, नकाळ और सह हणीं आगी जेंदरी भस्म किल्हैकि तेसरअ न्यायी आसा प्रभू परमेश्वर सर्वशक्तिमान।

9 और पृथूईए राजे, जुंणीं तेसा संघे भ्यभिचार किय और भोग बिलास किय, जांऊ तेसरे जळणेंओ धूँ तिन्नां भाळणअ, ता तिन्नां लाणीं तेसा लै हीक पटाकी करै लेरा। 10 तेसरी दाहे उरें मारै बोळणअ तिन्नां दूर खहळुई करै इहय कि हे बडे नगर बाबूल, हे दूढ नगरीए, हाय ! हाय! घळी भर गई ताल्है सजा भेटी।

11 ता धरतीए बपारी लाणीं तेसा लै लेरा और तियां तळफणें तेसा लै, किल्हैकि ऐबे निं कोही तिन्नों माल मोल लणअ। 12 अर्थात सुन्नअ, चन्दी, रत्न, मोती, मलमल, बैजणीं रेशमीं और किरमिजी झिकळै, और हर प्रकारे सुगंधित काठ, हाथी दांटे हर प्रकारे चिजा, किम्मती काठ, पितळ, लोहे और

संगमरमे सोभी भांतिए भांडे 13 और दारचिनी, मसाले, धूप, इत्र, लोबान, शराब, तेल, मैदअ, गिहूँ, गाअ, बल्द, भेडा, बाकरी, घोळै, रथ, दास, और माछुए प्राण। 14 ऐबे मेरे भाऊणें आळै फळ बी नाठै, और स्वादिष्ट और भडकीली चिजा बी हुई ताखा दूर, और तियां निं भी कधि भेटणीं। 15 इन्नां चिजे बपारी जुंण तेसा करै धनबान हुए तै, तेसरी दाहे मारै रहे दूर लेरदै तळफदै और तिन्नां बोळणअ इहय कि

16 हाय! हाय! अह बडअ नगर जुंण मलमली और बैजणीं और किरमिजी झिकळै बाहिं थिय, सुनै, रत्न और मोती करै थिय सजअ द,

17 घळी पळा दी हुअ तेसरअ भारी धन नाश; और हरेक मांझी और जलयात्री और मल्लाह और जेतरे समुंदरा का खटा, सोभै खहळुए दुर।

18 तेसरे दझणेंओ धूँ भाळी करै लागणें बोलदै कि कुंण जिहअ नगर आसा एक बडे नगर बराबर? 19 और आपणें-आपणें मुंडै पाणअ तिन्नां माटअ और लेरदी तळफदी बोळणअ तिन्नां लैळा लाई करै इहय कि "हाय! हाय! अह बडअ नगर, जसरी सम्पती करै सोभ समुंदरै जहाजा आळै सेठ हुए और घळी पलै उजळअ।"

20 "हे स्वर्ग, और हे पबित्र लोगो, और प्रेरितो, और भविष्याबगतो, तेता लै करा आनंद, किल्हैकि परमेश्वरै लअ न्याय करी करै तेऊ का थारअ बदळअ।"

21 तेखअ एकी बलबंत स्वर्गदूतै एकी बडे घरटे पाटा बराबर एक पाथर चकअ, और इहय बोली करै समुंदरै शोटअ कि बडअ नगर बाबूल शोटणअ इहयई करै बडे बला संघे समुंदरै और तेखअ निं तेऊओ पतअ बी भेटणअ।

22 और बीणा बाजणें आळै, और बजंतरी, और बिशळी बाजणें आळै, और तुरही फुकनरै आळैए छेळ निं ताखा भी कधि शुहळणीं, और कोई बी चिजा बस्ती बणाणें आळअ कारीगीर निं ताह कधि भेटणअ; और घरटा फिरनै छेळ बी निं ताखा कधि शुहळणीं।

23 और लादूओ प्रेशअ बी निं कधि ताह दी चमकणअ और दुलहै और दुल्हणों शब्द बी नियं ताखा कधि शुहळणअ, किल्हैकि तेरै बपारी तै पृथूईए प्रधान, और तेरै जादू टोणें करै भरमाऊई ती पृथूईए सोभ जाती

24 और भविष्यवक्ता और पबित्र लोगो, और पृथूई दी मारै दै लोगो खून भेटअ तेथे।

**19** एता बाद मंरें स्वर्गा का मानो एक बडी भीड़ जोरै-जोरै इहय बोलदी शुणीं कि हाल्लेलुयाह, उद्धार, महिमा और सामर्थ आसा म्हारै परमेश्वरै ई।

2 किल्हैकि तेऊए फेंसलै आसा सन्नै और ठीक, तैबी किय तेऊ तेसा बडी बैश्या जुंणीं कंझरुई करै पूरी पृथूई भ्रष्ट शोटी ती करी, न्याय और तेसा का लअ आपणें सेऊआकरो बदळअ। 3 तेखअ बोलअ दुजी बारी तिन्नें हाल्लेलुयाह, और तेसरे दझणेंओ धूँ रहणअ जुगै-जुगै लागी।

4 चौबी प्राचीन और चूऊ प्राणीं बी उटअ पळी करै परमेश्वरा लै दंडबत किय जुंण सिंहासणां दी थिय बेटअ द, और बोलअ, आमीन, हाल्लेलुयाह।

### मिम्मूंओ बेह

5 और सिंहासणा का एक शब्द निखळअ कि "हे म्हारै परमेश्वरा का सोभी उरनै आळै दासो, कै होछे, कै बडे, तम्हें सोभै करा तेऊए स्तुती।" 6 तेखअ शुणअ मंरें बडी भीड़ा जिहअ और गर्जणा जिहअ शब्द कि "हाल्लेलुयाह, कि म्हारअ परमेश्वर, सर्वशक्तिमान करा राज।"

7 एछा, हाम्हां हणअ आनंद और मगन, और एऊए करनी हाम्हां स्तुति; किल्हैकि मिम्मूंओ बेह आअ नेळ, और तेऊए लाळी गई त्यार हई।

8 और तेसा लै दैनअ शुध मलमल और चमकदार महीन मलमल बाहणेंओ अधिकार, किल्हैकि तेऊ महीन मलमलो अर्थ आसा पबित्र लोगे धर्म काम।

9 और तेऊ मुखा बोलअ; "इहय लिख, कि धन्य आसा तियां जुंण मेम्मने बेहे भोजा दी आसा शादें दै" तेखअ तेऊ मुखा बोलअ, "ईयां बचन आसा परमेश्वरै सन्नै बचन।" 10 और मंरें जाहूँ टेकी करै तेऊलै माथे टेकणां लै आपणें पैर शोटे धरनीं और तेऊ मुखा बोलअ, "भाळ, इहय निं करै, हूँ आसा तेरअ और तेरै भाई संघोई दास, जुंण प्रभू यीशूए ग्वाही दैणा लै स्थिर आसा।

परमेश्वरा सेटा ई टेक माथअ, किल्हैकि प्रभू यीशूए ग्वाही आसा भबिश्यबाणीए आत्मां।”

### शेतै घोळे ओ शुंआर

11 तेखअ भाळअ मंरें स्वरग खुल्हअ द, और तेथ कै भाळअ कि एक शेतअ घोळअ आसा, और तेऊ घोळे परेंदै आसा एक शुंआर, जसा लै विश्वासयोग्य और सन्नअ बोला, और धर्मा संघै रही करै न्याय और लडाई करा। 12 तेऊए आच्छी आसा आगीए लुपळै; और तेऊए मुंडै आसा राज मुकुट। और तेथ आसा तेऊओ नांअ लिखअ द जहा तेऊ छाडी होर कोहै नि ज्ञानदअ। 13 और सह आसा लोहू करै छळिकै दै झिकळै बाह्नी और तेऊओ नांअ आसा परमेश्वरो बचन। 14 और स्वरगे सैनां शेतै घोळै दी शुंआर और शेतै शुध मलमले झिकळै बाह्नि तेऊ पिछू-पिछू। 15 ता जाती-जाती मारना लै निखळा तेऊए मुंहा का एक चोखी तलबार और तेऊ करनअ लोहेए राजदंड लई करै तिन्नां दी राज, और तेऊ सर्बशक्तीमान परमेश्वरे भयानक प्रकोप और जलजलेए मदिरा कुंडे चेह्लनिं तेऊ अंगूर दाख। 16 और तेऊए झिकळै दी और जांघा आसा इहय नांअ लिखअ द कि राजेओ राजअ और प्रभूओ प्रभू।

17 तेखअ भाळअ मंरें एक स्वर्गदूत सुरजा दी खट्खुअ द और तेऊ ज़ोरै-जोरै सरो उडणें आळै सोभी पंछी लै बोलअ कि एछा परमेश्वरे बड़ी बयारी लै हुआ कठा। 18 जेथ तन्हें राजेओ मास, सरदारो मास, बलबान मरधो मास, घोळेओ और तिन्नां दी शुंआरो मास, कै मंत्री, कै दास, कै होछे, कै बडे, सोभी लोगो मास खाआ।

19 तेखअ भाळअ मंरें सह पशू और पृथूईए सारै राजै और तिन्ने सैनां तेऊ घोळे दी शुंआरा और तेऊए सैनां संघै जुधा करना कठा हंदा। 20 सह पशू और तेऊ संघै सह झुठअ भबिष्याबाणी करनैआळै ढाके, जुणीं तिन्नां सहनै चिन्ह रहैऊए तै, जसा करै तेऊ तियां भरमाऊए तै जसा दी तेऊ पशूए छाप ती और जुण तेऊए मूरतीए पुजा करा तै, ईयां दूई पाए जिऊंदै-जिऊंदै ई तेऊ आगीए दरैऊआ दी जुण गंधका करै जळा। 21 बाकी लोग पाए तेऊ घोळे दी शुंआरे तलबारा करै जुण तेऊए खाखा का निखळा ती, मारी, और सोभै पंछी रजै तिन्ने मासा खाई करै।

### हजारा सालो राज

20 तेखअ भाळअ मंरें एक स्वर्गदूत स्वर्गा का होथदअ; तेऊए हथै ती अथाह कुंडे कुंजी और एक बड़ी शांघळ। 2 और तेऊ अजगर अर्थात सह पराणअ सांप, जुण इबलीस और शैतान आसा, सह ढाकअ और हजारा साला लै डाहअ बाह्नि। 3 और सह किय अथाह कुंडा दी पाई करै बंद। और तेथ दी लाई मोहर कि सह किय हाजार साला पूरे हणें तैणीं बंद ताकि जाती-जातीए लोगा तेभै तैणीं भी नां भरमाऊए, एता बाद आसा अह जरूरी कि थोळी घळी खोळणअ अह भी।

4 तेखअ भाळै मंरें सिंहासण, और तेथ दी ते लोग बेटै दै और तिन्नां लै त दैनअ द न्याय करनेओ हक, और तिन्ने आत्मां बी भाळी, तिन्ने मुंड तै प्रभू यीशूए ग्वाही दैणां लै और तेऊए बचने बजह दी काटै दै। और जुणीं तेऊ पशूए नां ता पुजा की और नां तेऊए मोहर आपणें माथै और हाथै लाई ती, तियां लागै दा जिऊंदै हई करै प्रभू यीशू मसीह संघै हजारा साला तैणीं राज करदै। 5 और जेभै तैणीं ईयां हजारा साला पूरी नि हुई और होर मंरें दै बी जिऊंदै नाई हुए अह आसा पैहलअ मृत्कोथान। 6 धन्य और पबित्र आसा सह जुण पैहलै पुनरुथानो भागी आसा, ईहै लै नि दुजी मौतो किछे अधिकार आथी, पर तियां हणें परमेश्वरे और मसीहे याजक और प्रभू संघै करनअ तिन्नां हजारा साला तैणीं राज।

### शैतानो बनाश

7 और जांऊं हजारा साला पूरी मुकर्णीं हई, ता एता बाद छाडणअ शैतान कैदा का पोही। 8 और तियां जाती जुण पृथूईए चूऊ पासै हणीं अर्थात-याजूज और माजूज जसरी गिणती समुंदरे रेतै बराबर हणीं, तिन्नां भरमाऊई करै निखळणअ लडाई लै कठा करदअ। 9 और तियां फैलणीं सारी धरती दी;

और पबित्र लोगे बस्ती और प्रिअ नगरी घेरनी और सरगा का आगी करनै तियां भस्म। 10 और तिन्नां भरमाऊंणें आळअ शैतान आगी और गंधके झीला दी, जेथ सह पशू और झूठअ भविष्यवक्ता बी हणअ, पाणअ और तियां रहणें राची धैळी जुगै-जुगै तळफदै लागी।

### बड़अ शेतअ सिंहासण और आखरी न्याय

11 तेखअ भाळअ मंरें एक शेतअ सिंहासण और सह जुण तेथ बेटअ द आसा, जसरै सहनै पृथूई और सरग भागै और तिन्नां लै नि जेगा भेटी। 12 तेखअ भाळै मंरें होछे और बडे सोभ सिंहासणा आजू खट्खुए दै। और कताबा खोल्ही और तेखअ खोल्ही एक होर कताब; अर्थात जिऊंणे कताब। और जिहअ तिन्नां कताबा दी लिखअ द थिय, तिन्नां कामे साबै हुअ तिन्नां मूंरें दै आदमिओ न्याय। 13 और समुंदरै दैनें तियां मूंरें दै सोभै, और मौतै, अधोलोकै बी दैनें तियां मूंरें दै और तिन्नां मांझै हरेकीओ न्याय हुअ तिन्नें कामें साबै। 14 और मौत और अधोलोक बी पाए आगीए दरैऊआ दी। अह आगीओ दरैअ ता दुजी मौत आसा। 15 और जसरअ नांअ जिऊणें कताबा दी लिखअ द नाई भेटअ, सह बी पाअ आगीए झीला दी।

### नंऊंअ सरग और नंऊंई पृथूई

21 तेखअ भाळअ मंरें नंऊंअ सरग और नंऊंई पृथूई किल्हैकि पैहलअ सरग और पृथूई हुई खतम और समुंदर बी नि रहअ। 2 तेखअ भाळी मंरें पबित्र नगरी येरुशलैम स्वर्गा का परमेश्वरा सेटा का होथदी, और सह ती दूल्हणा जेही, जुण आपणें लाळै लै हार शंगार करी की दी हुआ। 3 तेखअ मंरें सिंहासणा सेटा का एक ज़ोरै ईहअ बोलदअ शुणअ कि हेर, परमेश्वरो डेरअ आसा मांछू बिचै, और तेउ पाणअ तिन्नां बिचै डेरअ, और तियां हणें तेऊए लोग और परमेश्वरा रहणअ आप्पूई तिन्नां संघै और सहैई हणअ तिनां परमेश्वर। 4 और तेऊ दुशणें तिन्ने आच्छी का सारै आशू, और एता बाद नि कधि मौत एछणीं और नां शोग और नां लेरनअ पकारनअ और नां दाह दुख। पैहले हणीं सारी गला खतम।

5 और जुण सिंहासणा परेंदै बेटअ द थिय, तेऊ बोलअ इहय कि हेर, मंरें लाई सोभै गला नंऊंई करी। तेखअ बोलअ तेऊ इहय कि इन्नां गला लिख, किल्हैकि ईयां बचन आसा विश्वास करनै जोगी और सन्नै। 6 तेखअ बोलअ तेऊ मुल्है इहय कि ईयां गला गई पूरी हई, हूँ आसा अल्फा और ओमेगा, आदि और अंत; मूह दैणअ नचिंशै लै जिउणें सोबळा का मुफ्त पणेंऊंई। 7 जुण जय पाए, सहैई हणअ तिन्नां चिजो बारिस; और हूँ हणअ तिनां परमेश्वर और सह हणअ मेरअ पुत्र। 8 पर डरपोका, अल्पविश्वासी, धिनौनै, हत्यारै, कंजरै, जादू टोणें करनै आळै, मुर्ती पुजा करनै आळै और सोभी झुठेओ भाग भेटणअ आगीए झीला दी, जुण आगी और गंधका दी जळदी रहा लागी। अह आसा दुजी मौत।

### नंऊंअ यरुशलैम

9 तेखअ जसा का तियां साता बिपत्ति आळै भरै दै सात कटोरै थिये, तिन्नां मांझै एकी जहें मूह सेटा लै एछी करै बोलअ, “ओही एछ, मूह रहैऊणीं ताखा लाळी अर्थात मँन्ने लाळी। 10 और तेऊ नियं हूँ आत्मां दी एकी उछटी धारा परेंदा लै और पबित्र नगरी येरुशलैम स्वर्गा का परमेश्वरा सेटा का होथदी रहैऊई। 11 परमेश्वरे महिमा ती तेथ दी और तेते चमक ती किम्मती पाथर अर्थात बलौरा यशबा जेही साफ। 12 और तेते दुआली ती बड़ी उछटी, और तेते ती बाराह परौळी और तिन्नां बाराह परौळी दी तै बाराह स्वर्गदूत। 13 पुर्बा बाखा चून, उत्तर दिशा बाखा चून, पछमा बाखा बी चून, और दखना बाखा बी थी चून परौळी। 14 और नगरीए दुआलीए थी बाराह आथरी, और तिन्नां दी थिये मिम्मूए बाराह प्रेरिते नांअ लिखै दै। 15 और जुण मूह संघै गला करदअ त लागअ द, तेऊका ती नगरी, परौळी और तेसा दुआली नापणेंए एक सुन्नैए गअज। 16 और सह नगरी ती चकोर बसी दी और सह ती लाम्मी और बिरली बराबर। और तेऊ तेसा गजा करै सह नगरी नापी, ता सह निखळी साढै सात शौ कोस, तेसरी लंबाई, चौडाई और उछटी ती सह बराबर। 17 तेऊ सह दुआल मांछूए नापै अर्थात स्वर्दूते हाथै नापी, ता सह

निखळी एक शौ चरताळी हाथ। 18 और तेसा नगरीए दुआलीओ जोळ त यशब, और नगरी ती चोखै सुनै करै बणाई दी जेही साफ शिशै जेही। 19 और तेसा नगरीए थहळै तै हर प्रकारे किम्मती पाथरा करै बणाएँ दै। पैहली आथरी ती यशब, दुजी, नीलमणी, चिऊथी लालडी और चऊथी मरकते। 20 पांजूई गोमेदक, छऊई मणिंक्य, सातुई पीतमणी, आतूई पेरोज और नौहूई पुखराज, दसूई लहसनिए, गैहरूई धूप्रकांत और बाहरूई याकूते। 21 और बारह परौळी ती बाराह मोतीए, एक-एक परौळ ती एकी-एकी मणी करै बणाई दी। और नगरीए सळक ती साफ शिशै जेही चोखै सुनै करै बणाई दी।

22 और मंए निं तेथ कोई बी मांदर भाळअ किल्हैकि स्वर्गशक्तिमान परमेश्वर और मेम्नअ आसा तेतो मांदर। 23 और तेसा नगरी निं सुरज और जोथो कोई बी काम आथी, किल्हैकि परमेश्वरे झाळा-माळा करै आसा तेथ प्रैशअ लागअ द हंदअ, और मिम्मू आसा तेतो दिपक। 24 और ज्ञाती-ज्ञातीए लोग चलणें फिरनै तेथ और पृथूईए राजे आळणअ आपणें तेजो समान तेता लै। 25 और तेते परौळी निं धैळी बंद हणी और राच निं तिधी कधि हणी। 26 और लोग आळणअ ज्ञाती-ज्ञातीए तेज और बैभवो समान तिधा लै 27 और तेथ निं कोई बी अपबित्र और घृणित काम करनैआळअ या झूठ बोळणें आळअ केऊ बी साबै प्रवेश करी सकदअ। पर सिधै तियां लोग सका तेथ नाशी, जसरै नांअ मिम्मू (मिम्मूए) जिऊणें कताबा दी आसा लिखै दै।

22 तेखअ तेऊ मुखा बिल्लोरा जेही झळकदी, जिऊणें पाणीए एक नदी रहैऊई, जुण परमेश्वरे और मेम्नने सिंहासणा का निखळी करै नगरीए सळका बिची-बिची ती बहूदी लागी दी। 2 और नदीए आर-पार बाढे थियै जिऊणें पेळ लागै दै और तेथ लागा तै बाराह प्रकारे फळ, और तियां फळा तै हर भिनै और तेऊ पेळे पाचा करै हआ तै ज्ञाती-ज्ञातीए लोग चांगै। 3 और तेखअ निं कधू श्राप हणअ और परमेश्वर और मिम्मूओ सिंहासण हणअ तेसा नगरी। और तेऊए दासा करनीं तेऊए सेऊआ। 4 और तेऊओ मुंह बि भाळणअ तिन्नां और तिन्नें माथै हणअ तेऊओ नांअ लिखअ द। 5 और तेखअ निं कधि राच हणी, और तिन्नां निं लाटू और सुरजे प्रैशेओ कोई बी काम किल्हैकि परमेश्वरा का हणअ तिन्नां लै प्रैशअ लागअ द और तिन्नां करनअ जुगै-जुगै राज।

### प्रभू यीशूओ भी फिरी एछणअ

6 और तेऊ बोलअ मुखा इहय कि, “इन्नां गल्लो करै विश्वास, और ईयां आसा सञ्जी, और प्रभू जुण भबिष्याबगते आत्मों परमेश्वर आसा, आपणअ स्वर्गदूत जुणीं भेजअ कि आपणें दासा का तियां गल्ला जुण छेकै हणीं जरूरी आसा, तिन्नां रहैऊए।

7 हेर, हूँ आसा छेकै एछणें आळअ, धन्य आसा सह जुण एसा कताबे भबिष्याबाणीए गल्ला मना।”

8 हूँ आसा सहैई यहून्ना, जुण इन्नां गल्ला शुणां और भाळा त; और जाऊं मंए भाळअ और शुणअ, ता जुण सह स्वर्गदूत मुखा इन्नां गल्ला रहैऊआ त, हूँ पळअ तेऊए पैरै माथै टेकणा लै उटअ। 9 और तेऊ बोलअ मुल्है इहय, “भाळ, इहय निं करै किल्हैकि हूँबी आसा तेरअ और भबिष्याबगतो और एसा कताबे गल्ला मनणेंआळैओ संघी साथी दास, परमेश्वरा सेटा ई टेक माथअ।”

10 तेखअ बोलअ तेऊ मुँह सेटा इहय कि “एसा कताबे भबिष्यबाणीए कताबा निं बंद करै किल्हैकि बगत आसा नेळ। 11 जुण अन्याय करा, सह रहे अन्याय करदअ लागी, जुण मनो कोहमीं आसा, सह रहे कोहमीं, जुण धर्मी आसा, सह रहे धर्मी बणी, और जुण पबित्र आसा, सह रहे पबित्र बणी।

12 भाळ हूँ आसा छेकै एछणें आळअ, और हरेकी लै आसा मुखा तेऊए कामें साबै प्रतिफल। 13 हूँ आसा अल्फा और ओमेगा, पैहलअ और पिछलअ, आदी और अंत।

14 धन्य आसा तियां जुण आपणें झिकळै धोआ, किल्हैकि तिन्नां भेटणअ जिऊणें पेळा सेटा लै एछणेंओ अधिकार और तिन्नां करनअ प्रूळी बाती नगरी दी प्रवेश। 15 पर कुत्तै, जाटू टोणें करनै आळै, कंजरै, हत्यारै, मुर्तीपुजा करनैआळै और हरेक झूठअ चाहणें आळअ और बोळणें आळअ रहणअ बागौ।”

16 “मंए यीशू भेजअ स्वर्गदूत एते तैणीं कि तम्हां आजू कलीसिया का इन्नां गले बारै ग्वाही दैई सके। हूँ आसा दाऊदो बंश, मूळ, और दोती चमकणेंआळअ तारअ।

17 और आत्मां और दुल्हन बोला दुहै इहय कि एछ, और शुळणें आळै बी बोले कि एछ; और जुण नचिशअ आसा, सह एछे, और जुण बी चाहे सह सका जिऊणेंओ पाणीं मुफ्त निर्ई।

### नचोळ

18 हूँ दैआ हरेकी लै जुण एसा भबिष्याबाणीए गल्ला शुणा, ग्वाही कि जै कोई माळू इन्नां गल्ला दी किछ बढाऊए, ता परमेश्वरा बढाऊणीं तेऊलै तियां बिपत्ती जुण तेऊए कताबा दी लिखी दी आसा। 19 पर जै कुंण एसा भबिष्याबाणीए कताबा का किजै कम करे, ता परमेश्वरा करनअ तेऊ जिऊणें पेळा का तेऊओ हेस्सअ दूर जुण पबित्र नगरी दी आसा, जसरी चरचा एसा कताबा दी आसा।

20 जुण इन्नां गले ग्वाही दैआ, तेऊए जुण इहय बोला कि हॉ हूँ आसा छेकै एछणें आळअ। आमींन। हे प्रभू यीशू छेकै एछ॥

21 प्रभू यीशूओ अनुग्रह लोळी पबित्र लोग संघै रहअ। तथास्तू।